



Chyoiyúng chyumlaiká: dangshikaq asik; Zaiwa

Zaiwa New Testament



Contents

MAHTE é Gabú Danglù Laiká	1
MARKUQ é Gabú Danglù Laiká	59
LUKAQ é Gabú Danglù Laiká	96
YOHAN é Gabú Danglù Laiká	159
LAGYO Laiká	206
ROMAQ Pê Chyáng Hun Kat é Laiká	261
KORINHTUQ Pê Chyáng Hí Dàm Hun Kat é Laiká	287
KORINHTUQ Pê Chyáng Htang Dàm Hun Kat é Laiká	312
GALATIQ Mau Bâng Chyáng Hun Kat é Laiká	328
EHPEHU Pê Chyáng Hun Kat é Laiká	337
HPILIPÍ Pê Chyáng Hun Kat é Laiká	345
KOLOSE Pê Chyáng Hun Kat é Laiká	351
HTESALONI Pê Chyáng Hí Dàm Hun Kat é Laiká	357
HTESALONI Pê Chyáng Htang Dàm Hun Kat é Laiká	362
TIMOHTI Chyáng Hí Dàm Hun Kat é Laiká	365
TIMOHTI Chyáng Htang Dàm Hun Kat é Laiká	372
TITUQ Chyáng Hun Kat é Laiká	377
HPIEMON Chyáng Hun Kat é Laiká	380
HEBRE Pê Chyáng Hun Kat é Laiká	382
YAKUQ Hun Kat é Laiká	401
PETRUQ Hí Dàm Hun Kat é Laiká	408
PETRUQ Htang Dàm Hun Kat é Laiká	415
YOHAN Hí Dàm Hun Kat é Laiká	420
YOHAN Htang Dàm Hun Kat é Laiká	427
YOHAN Súm Dam Dàm Hun Kat é Laiká	428
YUDE Hun Kat é Laiká	429
YOHAN É SHING-RÁN Laiká	431



Chyoiyúng chyumlaiká: dangshikaq asik; Zaiwa

New Testament in Zaiwa

Language: Zaiwa

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2009 Wycliffe Bible Translators, Inc.

Copyright © 2009 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

225ee1d3-3fd3-534d-91e4-7a7950e8e44a

ISBN: 978-1-5313-0057-9

MAHTE

é Gabú Danglù Laiká

(The Gospel of Matthew)

Yesuq É Byùxik Shap Kyô É Hkyô

Luk 3:23-38

1 Abraham é awut ashín, Dawiq é yhangzo yhangshu,* Yesuq Hkrisduq é byùxik labau gi, a-ô mâ é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, hau nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniaq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq[†] é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô

Luk 2:1-7

¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woinyí mai zogúng dut bê nghut ri. ¹⁹ Yhâng é yhumsîng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dâ ri.

***1:1** Awut ashín eq yhangzo yhangshu gâ é lé, Chyúmdang ra-am má, “yhangzo” ga le bo tô lhê.

[†]**1:17** Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

²⁰Nghut kôlhang, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, “Dawiq é yhangzo yhangshu Yosep ê, haû náng é yhumsing myhí Mariq lé hâng yù rá hkyô lé, hkâ-myit chiq; haí mù gà le, yhang wun tô é zoshâng gùng gi, Chyoiyúng Woi-nyí dông lo é nghut lhê.” ²¹Yhang gi, yuqzo rayuq hkû rá nghut luí, nàng gi, zoshâng haú lé, Yesuq nghú myíng myhíng byi ra rá nghut lhê; hkâsu mù gà le, Yhang gi, Yhâng é byu pé lé, yhangmoq é yubak mara mai hkyi yù rá sù nghut lhê.” ga taí ri.

²²Shí hkyô banshoq gi, Garai Gasâng eq, haû myiqhtoi dông taí é dang lé lhoq dik é nghut ri. ²³Myiqhtoi dang haû gi, “Haû zomyi gyíng gi, zogúng dut luí, yuqzo rayuq hkû rá nghut lhê; Yhâng é myíng lé gi, Emanuelaq ga kó rá nghut lhê.”^a gà ri. Hau é lichyúm gi, “Garai Gasang gi, nga-nhúng eq rahá nghut nyi lhê.” gà é nghut lhê.

²⁴Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri. ²⁵Nghut kôlhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byí ri.

Buihtaq Hkyam Má É Hpaqchyí Bò Bang

2Herut hkohkâm up nyi é u lé, Yuda mau má é Betlehem wà má Yesuq lé hku é nghut ri. Hau htâng, buihtaq hkyam má é hpaqchyí bò bang gi, Yerusalem wà mó má jé lé kômù, ²“Haû hku lé lô bê Yudaq byu pê é Hkohkâm gi, hkâmá nghut lhê lhú? Yhâng é kyí lé, buihtaq hkyam má ngamoq myàng luí,

Yhang lé noq rá matú jé lé é nghut lhê.” ga luí, myí akô nghut ri.

³Herut hkohkâm gi, haû hkyô lé wó gyo jáng myit myô nyi ri; hau htoq agó, Yerusalem wà mó má é lhunglhang bang le, myit myô bum akô nghut ri. ⁴Haû mù luí, yhang gi, byu pê é hkyangjong agyi pé eq tará sará pé banshoq lé, ji tsíng yù mù, haû Hkrisduq hkâmá hku lé lô rá nghut é hkyô lé myí ri. ⁵Haú hkûn, yhangmoq gi, “Yuda mau Betlehem wà má nghut lhê. Hkâsu mù gà le, shí hkyô eq séng luí, haû myiqhtoi kâ tô é má,

⁶Yudaq mau má é Betlehem wà ê, nàng gi, Yudaq mau má é wà pé má, je tiq sù a nghut; hkâsu mù gà le, ngá é Israelaq byu pé lé upzúng rá Zau gi, náng chyáng mai htoq lô rá nghut lhê.^b ga bo tô ri.” ga tú taí akô.

⁷Hau htâng, Herut gi, haû hpaqchyí bò bang lé haq ji yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri. ⁸Haû mù, yhang gi, “Nungmoq, zoshâng haú lé rago ê ho wú keq. Ngò le, Yhang lé é wó noq rá matú, Yhang lé nungmoq é myâng eq yhang, ngo lé lo shit kyo keq.” ga taí luí, haú bang lé Betlehem wà shut nhang kat bê nghut ri.

⁹Yhangmoq gi, haû hkohkam é dang lé gyô yu é htâng má, htoq e ló beko nghut ri. Haû buihtaq hkyam má yhangmoq myang é kyí gi, haû zonú nyi é ahtaq ang ang má ló nô é jé shoq, yhangmoq é hí má e ló byí ri. ¹⁰Yhangmoq gi, kyí haú lé myàng jáng, gyai yhang gabú bum akô nghut ri. ¹¹Yhangmoq gi, haû yhûm má wang e ló kô é hkûn, zonú eq yhângnu Mariq lé myàng kômù, hkyihput htúq luí, haû zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq

^a1:23 Esai 7:14 ^b2:6 Mihka 5:2

mura[‡] pé lé yù mù, Yhang lé chyunghuq byî akô nghut ri. ¹²Yhangmoq gi, Herut chyáng a dum taù ló rà matú, yhupmoq má, yhangmoq lé sidiq byî é hui kômù, hkyô gó hkat đông yhangmoq é mau shut taù ló bekô nghut ri.

Egutuoq Ming Shut Hfang E É Hkyô

¹³Yhangmoq ló byuq é htâng má, haù Yhumsing é maumang lagyo rayuq gi, Yosep lé yhupmoq má htoq shit mù, “Toq aq! Haù zoshâng eq yhângnu lé, Egutuq ming shut shuí hfang ê aq. Ngò, nang lé dum ji yu é ahkyíng jé shoq, haù má nyi nyi keq. Haù mù gà le, Herut gi, zoshâng haù lé sat rà matú, ho nyi bê nghut ri.” ga taí ri.

¹⁴Haù mù, yhang gi, toq luí, myín lé yhang, zôshang me lé shuí chùng mù, Egutuq ming shut e ló bê nghut ri. ¹⁵Yhangmoq gi, Herut shi é jé shoq, haù má nyi nyi akô. Haù gi, “Ngá zo lé, ngò, Egutuq ming mai wut htoq yû bê nghut lhê.”^c ga, haù Yhumsing èq myiqhtoi đông taí é dang lé lhoq dik é ru nghut lhê.

¹⁶Herut gi, yhang lé, hpaqchyî bò bâng èq mhaù pyâm tô é lé sé jáng, nhikmo-yo bê nghut ri; haù mù, yhang gi, haù hpaqchyî bò bâng chyáng mai wó sê yu é ahkyíng lé sôn wú mù, Bethlehem wà eq hau é awui ayàm mã é wà pé má nyi é, í zân mai a-ô mã é yuqzo pé ban-shoq lé, sat pyám nhang ri. ¹⁷Haù gi, “Ramaq gà é jowò má, yón kuq é eq ngau garú é htê lé wó gyô ri; Rahkelaq gi, yhang zô pé a nyi byuq lo kô é yanmai, ngau nyi é eq nhik a wó títg dut ri.”^d ga luí, ¹⁸myiqhtoi Yeremiaq đông taí tô é dang lé lhoq dik é nghut ri.

Nazaret Wà Má Dum Taù Lo É Hkyô

¹⁹Herut shi byuq é htâng, Egutuq ming má, haù Yhumsing é maumang lagyo gi, Yosep chyáng yhupmoq đông lé htoq shit mù, ²⁰“Toq aq, haù zôshang me lé shuí chùng mù, Israelaq ming má taù ló aq; hkâsu mù gà le, haù zoshâng lé sat naù bang shi byuq bekô nghut ri.” ga taí ri.

²¹Haù mù, Yosep gi, zôshang me lé shuí chùng mù, Israelaq ming shut taù ló bê nghut ri. ²²Nghut kôlhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haù má a wám ló lo nghut ri. Yhupmoq má sidiq byî é huí é eq rajung za, yhang gi, Galile mau shut e ló mù, ²³Nazaret gà é wà má ló nyi nyi bê nghut ri. Haù mù, “Yhang lé, Nazaret wà byù ga rà nghut lhê.” ga luí, haù myiqhtoi pé đông taí tô é dang lé lhoq dik é nghut ri.

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

3 Haù yoq má, Wui-myhup Sará Yohan htoq lô mù, Yuda mau mã é yoso má hko kyô é gi, ²“Myit lhíng keq; hkâsu mù gà le, mauhkúng mingdán gi, chyâng lò bê[¶] nghut ri.” gà ri. ³Haù yuq gi, “Haù yoso má, byù rayuq garú taí é htê gi, Haù Yhumsing é matú, hkyô hen to keq; Yhâng é matú, hkyô lhoq nyhang to keq. gà ri.”^e ga myiqhtoi Esai-aq taí tô é sù yuq nghut ri.

⁴Yohan gi, gola-uq shomaù èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq

[‡]2:11 Mura gi, chi wó kut jung xù nghut lhê.

[¶]3:2 Mauhkúng mingdán gi, chyâng lò bê gà é lichyúm gi, Garai up rà ahkyíng chyâng lò bê gà é nghut lhê.

^c2:15 Hos 11:1 ^d2:17 Yer 31:15 ^e3:3 Esai 40:3

gi, dinggám eq yosô byo-î pé nghut ri. ⁵Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglhang mâ é bang gi, yhang chyáng htoq e bum akô. ⁶Yhang-moq gi, yhumsing é mara lé yín yû kôluí, yhang chyáng mai Yodan làng má wui-myhup hkâm yu bum akô nghut ri.

⁷Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé taí é gi, “Duq htân lhangmuí amyú pé ê, jé lô rá yubak dam mai wó hpang lut kó sháng gaq ga, nungmoq lé ó yuq taí pún é lúhú?” ⁸Myit lêng hkyô eq gingdán é ashi pé zui keq. ⁹Ngamoq gi, Abraham é yhangzo yhangshû pé nghut lhê.’ nghû luí, yhum-sing é i-myt unghkaú má hkâlum to kó. Hkâsu mù gà le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰Ahkuí lhang, Garai Gasang gi, Yhâng é wazung lé haú sikkâm wang pé má tô to bê nghut ri; haú mù, ge é ashi a zuí é agàm hkangmó lé gi, htuq lêng pyám mù, myi má dú kat pyám rá nghut lhê.

¹¹Ngò gi, nungmoq myit lêng kó sháng gaq nghû, wui èq za wui-myhup hkâm byí lhê. Nghut kôlhang, ngá htoq má wum-o a-tsam je bo é sù rayuq, ngá htàng má jé lé lô shirâ nghut luí, ngò gi, Yhâng é hkyí-tsung chùng byi rá lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi rá nghut lhê. ¹²Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám rá nghut lhê.” gà ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³Haú hkûn, Yesuq gi, Yohan chyáng wui-myhup hkâm yû rá ga, Galile mau mai Yodan làng má jé lé lo ri. ¹⁴Nghut kôlhang, Yohan gi, “Ngò sheq Náng chyáng wui-myhup hkâm yû rá sù ru nghut lhê nhing! Nàng sheq ngá chyáng lé lo lhê lúhú?” ga luí, lhom taí hkûm ri.

¹⁵Haú hkûn, Yesuq gi, “Dingmán hkyô banshoq lé, nga-nhúng lhoq dik rá é yan-mai, Ngo lé wui-myhup hkâm byi laq.” ga tú taí ri. Haú mù, Yohan le, gyo byi bê nghut ri.

¹⁶Yesuq gi, wui-myhup hkâm yû eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri. ¹⁷Haú hkûn, “Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê.” ga mauhkûng mai danghtê htoq lo ri.

Yesuq, Gúnglaú Huí É Hkyô

Mrk 1:12-13; Luk 4:1-13

4 Hau htàng má, Chyoiyúng Woi-nyí gi, Yesuq lé, nat Tsadán èq gunlaú é huí nhâng rá matú, yoso shut shuí ê ri. ²Yesuq gi, zoshuq gám é myi xê nyí myi xê myin jé jáng, zòmut hui bê nghut ri. ³Haú hkûn, gunlaú sù gi, Yhâng chyáng lé mù, “Nàng, Garai Gasâng é Yhangzo nghut le gi, luqgok shí pé lé muk dut nhâng aq.” ga taí ri.

⁴Haú jáng, Yesuq gi, “Byù gi, muk èq za asak duí rá a nghut; Garai Gasâng é nhut mai htoq lo é mungdang hkangmó èq sheq asak duí rá nghut lhê.”^f ga luí, Chyúmdang má kê tô ri.” ga yhang lé tú taí ri.

^f4:4 Tarâ Pun 8:3

⁵Haú hkûn, nat Tsadán gi, Yesuq lé, chyoiyúng myuq[§] má shuí ê mù, noqkuq yhum je myhang é shúhtâng htoq má yap nhang to luí, ⁶“Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le, 'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyí a ló htung shoq, yhangmoq é loq èq Nang lé lhom bún yú kó râ nghut lhê.”[§]

ga luí, Chyúmdang má kê tô ri.” ga taí ri.

⁷Nghut kôlhang, Yesuq gi, “Haú Yhumsíng, nungmoq é Garai Gasang lé, wó chyam wú râ a nghut.^h ga luí le, Chyúmdang má kê tô ri.” ga, yhang lé tû taí ri.

⁸Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pé é hkikhkâm hkyô lé tûn shit ri.

⁹Hau htâng, yhang gi, “Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ.” ga, Yesuq lé taí ri.

¹⁰Haú hkûn, Yesuq gi, “Tsadán nàng, ló byuq aq! Hkâsu mù gâ le, 'Haú Yhumsíng náng é Garai Gasang lé za, nàng noqkuq dojaú ra râ nghut lhê.ⁱ ga luí, Chyúmdang má kê tô ri.” ga, yhang lé taí ri.

¹¹Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Ló É Hkyô

Mrk 1:14-15; Luk 4:14-15

¹²Yesuq gi, Wui-myhup Sará Yohan htóng gyó é hkyô lé wó gyo jáng,

Galile mau shut dum taú ló bê nghut ri.

¹³Yhang gi, Nazaret wà mai htoq ló mù, Zebulun eq Nahtali mau má é nhông yàm má joq é Kaperna-um wà má ló nyi nyi ri. ¹⁴Haú gi, myiqhtoi Esai-aq laiká má,

¹⁵“Zebulun mau eq Nahtali mau, wuimau má é hkyô, Yodan làng yàm, tûngbaù pé nyi é Galile mau é,

¹⁶mauchut hkaú má nyi nyi é bang, maubó mó lé myàng bê nghut ri;

shí wup hkaú má nyi to bâng é matú, maubó lô bê nghut ri.”^j

ga kê tô é dang lé lhoq dik râ matú nghut ri.

¹⁷Haú hkûn mai, Yesuq gi, “Myit lhâng keq! Mauhkûng mingdán gi, chyâng lò bê nghut ri.” ga, mungdang hko hi e lò bê nghut ri.

Yesuq É Chángzo Hí Dut Bang

¹⁸Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri.

Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹Haú mù, Yhang gi, haú nhiktâng lé, “Ngá htâng cháng keq; Ngò,

nungnhik lé, byù lé châng kóng su nhik dut nhâng râ nghut lhê.” ga taí ri. ²⁰Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng,

²²yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

[§]4:5 chyoiyúng myuq gi, Yerusalem lé gâ lhê.

[§]4:6 Hkya-on 91:11-12

^h4:7 Tarâ Pun 6:16

ⁱ4:10 Tarâ Pun 6:13

^j4:16 Esai 9:1-2

**Nò Bang Lé, Yesuq
Lhoq Gê Byí É Hkyô**

Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkúng mingdán eq sêng é gabú dang-lú lé, hko kyo uchyang, byu pè chyáng má é nòhpyo ajung jung hui bang eq noli nojàng amyú myú dap bang lé, lhoq gê byí wún ri. ²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huí é bang, hkê-nhò jamjaú nyi é bang, nat gang wang júng é bang, mhûng-tuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byí ri. ²⁵ Galile mau, Dekapoli,** Yerusalem, Yuda mau eq, Yodan làng tú tap má é byù moq mó gi, Yesuq htâng châng bum akò nghut ri.

Hkungso Wó É Tarà

Luk 6:20-23

5 Yesuq gi, byù moq mó lé myàng jáng, bùm má doq ló luí, ló zung tô ri. Haú hkún, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luí, yhangmoq lé mhoqshit é gi:

³ “Woi-nyí má, asho awui dut é bang gi, hkungso wó nyi ri; hkâsu mù gà le, mauhkúng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungso wó nyi ri; hkâsu mù gà le, yhangmoq gi, nhik lhoq tîng é hui kó rà nghut lhê.

⁵ I-myt nú-nhâm é bang gi, hkungso wó nyi ri; hkâsu mù gà le, yhangmoq gi, mingkan lé wó sîng kó rà nghut lhê.

⁶ Dingmán hkyô lé mut shit nyi é bang gi, hkungso wó nyi ri; hkâsu mù gà le, yhangmoq gi, nhik dik shoq myàng zo kó rà nghut lhê.

⁷ Shogyo nhikmyin myit bo é bang gi, hkungso wó nyi ri; hkâsu mù gà le, yhangmoq gi, shogyo nhikmyin yu é hui kó rà nghut lhê.

⁸ Myit sansêng é bang gi, hkungso wó nyi ri; hkâsu mù gà le, yhangmoq gi, Garai Gasang lé myàng kó rà nghut lhê.

⁹ Nguingón hkyô sô xoq byí é bang gi, hkungso wó nyi ri; hkâsu mù gà le, yhangmoq gi, Garai Gasang é yhangzô pé gà é hui kó rà nghut lhê.

¹⁰ Dingmán hkyô é yanmai zing-ri huí é bang gi, hkungso wó nyi ri; hkâsu mù gà le, mauhkúng mingdán gi, yhangmoq é nghut nyi ri.

¹¹ Ngá é yanmai, byu pè èq, nungmoq lé rhoi é, zing-rí é, a teng a mán é đông agè ashop é dang amyú myú taí tso kô é hkún, nungmoq hkungso wó nyi ri.

¹² Nguingón gabú nyí keq, hkâsu mù gà le, nungmoq é matú kô é chyunghuq gi, mauhkúng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rí lai lo wú beko nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq má é xo nghut nyi lhê. Nghut kôlhang, xo gi, màn kân byuq jáng, haú lé hai èq dum wó lhoq ngam yù rà lú? Shinggan shut dú pyám mù, byu pè èq nâng pyeq pyâm é mai lai luí, hai akyú le bò rà a nghut lo.

¹⁴ Nungmoq gi, mingkân é maubó nghut akò; bùm htoq má é myuq lé gi, wó nghop to rà a nghut. ¹⁵ Myibung lé tap mù, mûng èq nghop tô é ó a kut wú kó; haú su kut rà malaí, yúmhaú má lúng tô é bang yuq hkangmó myoq wó myàng rà matú, tsungjang má kúm tsung to rà nghut lhê. ¹⁶ Haú eq rajung za, byu pé gi, nungmoq é ge é muzó pé

** 4:25 Dekapoli gà é gi, Grik đông myuq raxê lé gà lhê.

lé byu-myàng luí, mauhkúng htoq mâ é nungmoq é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷Ngò gi, myiqhtoí pè é dang eq jep é tarâ lé lhoq hpyoq pyám rà matú, jé lé é nghut nhò hkâ-ngâm kó; haú pé lé lhoq dik rà matú sheq jé lé é ru nghut lhê. ¹⁸Ngò, nungmoq lé teng za taí kôlé, mauhkúng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhú lhang byuq byuq rà a nghut. ¹⁹Jep é tarâ shí pé mâ é tiq dik é dang rahkun lé lu lai luí, góbang lé le, haú su kut rà matú mhoq byí é sù ó yuq nghut kôle, mauhkúng mingdán má tiq dik sù gâ é hui rà nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkúng mingdán má, hkik sù gâ é hui rà nghut lhê. ²⁰Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkúng mingdán má, nungmoq wó wâng kó rà a nghut.

Byù Hkâsat

²¹'Byù hkâsat,^k sat é sù gi, jéyáng é hui rà nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê. ²²Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui rà nghut lhê. Hau htoq agó, gumang hpó lé, 'Byù gang'^{††} ga taí é sù gi, Yudaq byìn tú wapdoq má jéyáng é hui rà nghut lhê; 'Byù bam ê' ga wut é sù gi, ngaraí myi eq gíngdán nyi ri.

²³Haú mù, hkungga gyap má, nàng hkungga nhông rà dâ é hkûn, náng é

gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, ²⁴náng é hkungga lé, haú hkungga gyap hí má tô pyâm to mù, náng é gumang hpó haú yuq eq hí ngu-ingón hkyô ló yù luí sheq, hkungga lé nhông byi aq.

²⁵Nang lé yí tsuq sù gi, nang lé tarâ rûng má dé e ló é hkûn, hkyô má ru nghut nyi ashí u lé, yhang eq nguingón hkyô hí hân yù aq. Haú a nghut jáng, haú yuq gi, nang lé, tarâ agyi chyáng ê ap pyám mù, haú tarâ agyi gi, nang lé htóng hkyô pyám rà matú, htóng suwún hpó é loq má ap pyám rà nghut lhê. ²⁶Ngò, nang lé teng za taí lé, yuichyîn haú a ban xap xap gi, htóng haú mai nàng wó htoq ló rà a nghut.

Su-myi Sulàng Lú É Hkyô Eq Séng Luí Mhoqshit É Dang

²⁷'Su-myi sulàng hkâlú'^l gâ é dang lé, nungmoq wó gyo wú bê nghut lhê. ²⁸Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaú má, myiwe haú yuq eq su-myi sulàng lú hkyô kut é sù nghut bê. ²⁹Haú mù, náng é loqyo myoq èq, nang lé mara kut shut nhang é nghut le gi, haú lé lap choq yù mù, dú pyám aq. Hkâsu mù gâ le, náng é ragùngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri. ³⁰Haú eq rajung za, náng é loqyo loq èq, nang lé mara kut shut nhang é nghut le gi, haú lé hpyit yù mù, dú pyám aq. Hkâsu mù gâ le, náng é ragùngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri.

^{††}5:22 Byù gang gâ é lé, Grik đông "Raka" gâ lhê.

^k5:21 Htoq Ló 20:13 ^l5:27 Htoq Ló 20:14

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

³¹ Yhumsing é yhangmyi lé kâng é sù gi, lhoq kang laiká byi rã dut lhê.^m gâ é dang joq lhê. ³² Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglàng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. ³⁴ Nghut kôlhang, Ngò, nungmoq lé taí kôlé, hai èq le hkâdakâm kó: mauhkûng lé lang luí le, hkâdakâm kó; hkâsu mù gâ le, haú gi, Garai Gasâng é zùng tanghkuq nghut lhê; ³⁵ myigùng lé lang luí le, hkâdakâm kó; hkâsu mù gâ le, haú gi, Garaí é hkyí nang jang nghut lhê; Yerusalem lé lang luí le, hkâdakâm kó; hkâsu mù gâ le, haú gi, Hkohkâm mó é myuq nghut lhê. ³⁶ Hau htoq agó, yhumsing é ulhùm èq le, hkâdakâm kó; hkâsu mù gâ le, xãm rahkat lé lhang hpyû shoq noq shoq, nàng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haú mai lai é gi, haú agé ashop su chyáng má é nghut ri.

Lató Hpuq É Hkyô

Luk 6:29-30

³⁸ Myoqjí matú myoqjí xap, zui matú zui xapⁿ gâ é dang lé, nungmoq wó gyô wú bê nghut lhê. ³⁹ Nghut kôlhang, Ngò,

nungmoq lé taí kôlé, agé ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq. ⁴² Nang lé dung sù lé, byi aq; náng chyáng mai chyí naú sù lé le, nunghtáng hkâlhhik pyám.

Gyè Lé Chyitdap Rã É Hkyô

Luk 6:27-28, 32-36

⁴³ Náng é chyangnâm mã é bang lé gi, chyitdap mù, náng é gyè lé gi, a jú kut aq^o gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé taí kôlé, nungmoq gi, mauhkûng htoq mã é nungmoq é Íwã é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyúdung byi keq; ⁴⁵ hkâsu mù gâ le, Yhang gi, agé ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó rã lú? Kang guq bang lhang, haú su kut lhê a nghut kó lú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbbâng htoq má haí wá laklai rã lú? Tungbaù pé lhang haú su kut lhê a nghut kó lú? ⁴⁸ Haú mù, mauhkûng htoq mã é nungmoq é Íwa gumjup é su, nungmoq le gumjup nyi keq.

Alu Byi É Hkyô

6 Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haú su

kut é nghut jáng, mauhkúng htoq mâ é nungmoq é Íwâ chyáng mai, chyunghuq wó yû kó rá a nghut.

²Haú mù, haú gegùn labyoq kut bang gi, byu pè eq shigyau é hui sháng gaq ga, tarajong pé hká, hkyô pé hká kut é su, nàng gi, alu byí é hkùn, tut hté su hkálhoq htoq. Ngò, nungmoq lé teng za taí kôlé, haú bang gi, yhangmoq é chyunghuq lé hkúm shoq wó yû bekô nghut lhê. ³Ra châ to bang lé nàng alu byí é hkùn, náng é loqyo loq kut é hkyô lé, loqpaí loq lé lháng hkâsé nhâng. ⁴Haú hkùn, nàng alu byí é lé, ó a châng sé rá nghut lhê. Haú jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyau rá nghut lhê.

Kyûdúng É Hkyô

Luk 11:2-4

⁵Nungmoq kyûdúng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung rá ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô nghut ri. ⁶Nghut kôlhâng, nàng kyûdúng le, náng é gok hkaú má wang ló mù, hkum myhí pyám luí, a byu-myang é náng é Íwâ chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi rá nghut lhê. ⁷Haú mù, kyûdúng le, tûngbau pé su kut luí, dang puq hkâhtau kó; hkâsu mù gà le, yhangmoq gi, dang hîng chín luí dung jáng sheq, gyo byi nhô ngam akô nghut ri. ⁸Haú bang su hkâkut kó; hkâsu mù gà le, nungmoq é Íwa gi, nungmoq rá é hkyô lé, nungmoq a dung shi mai sê to Sù nghut lhê.

⁹Haú mù, nungmoq kyûdúng le,

'Mauhkúng htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq,

¹⁰Náng é mingdán jé lô sháng gaq,

Nàng ô nau é hkyô, mauhkúng htoq má dik é su, myigùng htoq má le dik sháng gaq ô.

¹¹Ngamoq nyí wui rá é zoshuq lé, ngamoq lé hkû-nyí byi laq.

¹²Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

¹³Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gà le, kô dik é up sîng hkyô, a-tsam eq hpungwup shing kang gi, pyat dedu ahtum abyuq Náng chyáng ru joq nyi ri ô! Amen.)^{††}

ngû dung keq. ¹⁴Supê eq, nungmoq lé kut shut é mara lé, nungmoq hkyut pyám byí é nghut le gi, mauhkúng htoq mâ é nungmoq é Íwa le, nungmoq lé mara hkyut pyám byi rá nghut lhê. ¹⁵Nghut kôlhâng, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi rá a nghut.

Zoshuq Gám É Hkyô

¹⁶Nungmoq gi, zoshuq gám é hkùn, gegùn labyoq kut bang su myoqdong hkálhoq nyhui kó; hkâsu mù gà le, haú bang gi, yhangmoq zoshuq gám é hkyô lé, tûn shit rá matú myoqdong lhoq nyhui shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri.

¹⁷Nungmoq kúm gi, zoshuq gám é hkùn, nungmoq zoshuq gám é hkyô lé, byu pè hí má de de a dut é za, nungmoq a byu-myang é Íwa za myàng sháng gaq, myoq chí pyám luí, u xû but keq; ¹⁸haú jáng

††6:13 Chyúmlaiká ra-am má, shí tùm a bo é nghut lhê.

sheq, ó a sé loshoq kut é hkyô lé myang é Sû, nungmoq é Íwa gi, nungmoq lé chyunghuq shigyau râ nghut lhê.

Mauhkûng Htoq Mã É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyâm byí é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byí é mauhkûng htoq má sheq, nungmoq é matú sutzè hkong to keq. ²¹ Hkâsu mù gà le, náng é sutzè joq jang má, náng é i-myt le jé nyí râ nghut lhê.

²² Myoqjí gi, gungdú é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. ²³ Nghut kôlháng, náng é myoqjí a ge é nghut le gi, náng é gungdu gón gi, mauchut tuq dut nyí râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htú râ lhâ!

²⁴ Ó yuq nghut kôle, yhumsing í yuq lé wó dojaú râ a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myt Chiq Kó

Luk 12:22-31

²⁵ Haú mù luí, Ngò, nungmoq lé tái kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mã é nghozô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsing

kat to kô é nghut le lháng, mauhkûng htoq mã é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpau-dap nyi lhê a nghut kó lhú? ²⁷ Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lhú?

²⁸ Haú nghut le nhîng, haí mù, mebû matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyíng le a duí kó nghut ri. ²⁹ Nghut kôlháng, Ngò, nungmoq lé tái kyo kôlé, hkohkâm Sholomon hpung kô dik u lé wut é mebu lháng, ban haú rabó lé a hkyit nghut ri. ³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haú su kut hut é nghut le gi, nungmoq lé je riyhang hut râ a nghut kó lhú? ³¹ Haú mù, 'Haí zo râ lhi?' 'Haí shuq râ lhi?' 'Haí wut râ lhi?' nghû hkâ-myt chiq myhíng kó. ³² Tungbaù pé kúm gi, haú pé banshoq lé châng hkat ho nyi akô; nghut kôlháng, mauhkûng htoq mã é nungmoq é Íwa gi, haú pé lé nungmoq râ é hkyô, sé byí nyi lhê. ³³ Nghut kôlháng, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi râ nghut lhê. ³⁴ Haú mù, napmá lhê é matú hkâ-myt chiq kó; hkâsu mù gà le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

A Jéyáng Râ Hkyô

Luk 6:37-38, 41-42

7 Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gà le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

³ Yhumsing myoq hkaú má lúng tô é siktúm lé lháng a myit wú é nhîng,

haî mù luî, nunggu nungmâng é myoqwàng lé myang lhê lú? ⁴Yhumsing é myoq má siktúm lhung to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taí rã lú? ⁵Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi rã matú, nàng san za myàng rã nghut lhê.

⁶Hkuî pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haû bang gi, zê haû pé lé nàng pyeq pyám mù, nungmoq lé dum taû ngat lò rã nghut lhê.

Dung Keq, Hô Keq, Hkum Má Kok Keq

Luk 11:9-13

⁷Dung keq, haû jáng, nungmoq lé byi rã nghut lhê; hô keq, haû jáng, nungmoq myàng kó rã nghut lhê; hkum má kok keq, haû jáng, nungmoq lé hpóng byi rã nghut lhê. ⁸Hkâsu mù gã le, ó yuq nghut kôle, dung sù wó rã; hô sù myàng rã; hkum kok sù lé gi, hpóng byi rã nghut lhê.

⁹Nungmoq má, ó yuq wá, yhumsing yhangzo muk dúng le, luqgok byi kó rã lú? ¹⁰Ngozo dúng le, lhangmuì[¶] byi kó rã lú? ¹¹Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é îwa gi, Yhang lé dúng é bang lé, je riyhang ge é chyunghuq byi rã nghut lhê! ¹²Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haî mù gã le, haû gi, jep é tarã eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³Chyap é hkúmdong mai wàng keq. Hkâsu mù gã le, lam é hkúmdong eq hkyô mó gi, htên byoq hkyô shut shuí e é nghut mù luî, haû dông wàng bang gi, myô akô nghut ri. ¹⁴Chyap é hkúmdong eq hkyô zo kúm gi, asak hkyô shut shuí e é nghut mù luî, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵Nungmoq chyáng jé lé lo é myiqh-toi pyoq pé lé, sidiq nyî keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuî pé nghut akô. ¹⁶Yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê. Zubyap mai tsibiyq shi, zugâm mai maihpáng-shi wó yu wú akô lú? ¹⁷Ge é agàm gi, ge é ashi zui mù, a ge é agàm gi, a ge é ashi za dat zui ri. ¹⁸Ge é agàm gi, a ge é ashi a wó zui, a ge é agàm le, ge é ashi a wó zui nghut ri. ¹⁹Ge é ashi a zui é shigâm hkangmó lé gi, htuq pyám mù, myi má dú kat pyám rã nghut lhê. ²⁰Haû mù, yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê.

²¹Ngo lé, 'Yhumsîng ê, Yhumsîng ê,' ga, wut é bang yuq hkangmó gi, mauhkûng mingdán má myang wàng kó rã a nghut; haû mauhkûng htoq mâ é Ngá Wa ô nau é dông kut sù za sheq, myang wàng rã nghut lhê. ²²Haû buinyî má, byù myo myo gi, 'Yhumsîng ê, Yhumsîng ê, Náng é myîng mai, ngamoq gi, myiqhtoî le htoi bê; nat gang lé hkat htoq bê; laklaí kumlhá ajung jung

[¶]7:10 Garai Gasang gi, lhangmuì a zo rã matú, Yudaq byu pé lé hkunmó hkyô tô é nghut lhê.

lé, kut bê a nghut lú? ga luí, Ngo lé myi kó rã nghut lhê. ²³ Haú hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tũ taí kat rã nghut lhê.

Hpaqchyí Bò Sũ Eq Ngok Sũ

Luk 6:47-49

²⁴ Haú mù, Ngá é dang shí pé lé wó gyô yù luí, châng kut é sũ gi, hpaqchyí bò mù, lunghtân htoq má, yhùm saí é sũ eq wuí nyi ri. ²⁵ Mau wô, wuì je, laidun lò mù, yhùm haú lé lo htung kôlhang, yhùm haú gi, a htên byoq byuq rã nghut lhê; hkâsu mù gâ le, yhùm haú gi, lunghtân htoq má tsuq tô é yanmai nghut ri. ²⁶ Nghut kôlhang, Ngá é dang lé, wó gyô yù mù, a cháng sũ gi, semuì-jàng má, yhùm saí é byù ngok eq wuí nyi rã nghut lhê. ²⁷ Mau wô, wuì je, laidun wò yup dut lò mù, yhùm haú lé lo htung jáng, yù whuì a mù loshoq htên byoq byuq rã nghut lhê." gâ ri.

²⁸ Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akò; ²⁹ hkâsu mù gâ le, Yhang gi, yhangmoq é tarã sará pé eq a pung é za, ahkáng ayá wó sũ rayuq su, mhoqshit é yanmai nghut ri.

Manggâm Dap É Byù Rayuq

Mrk 1:40-45; Luk 5:12-16

8 Yesuq gi, bùm htoq mai gyó lo é hkûn, byù moq mó gi, Yhâng htâng châng bum akò nghut ri. ² Haú hkûn, manggâm dap é byù rayuq gi, Yhâng é hí má, lé mù, hkyihput htuoq luí, "Yhumsing ê, Nàng dóng é nghut le gi, ngo lé Nàng wó lhoq sân-yúng byi rã nghut lhê." ga taí ri.

³ Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri.

⁴ Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tũn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

Gyezau Hpô É Lumjín Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, ⁶ "Yhumsing ê, ngá é dui-nhâng zoshâng gi, gùngjum shi é htoq agó, yhùm má gyaí no jamjaú leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi rã." ga taí kat ri.

⁸ Gyezau hpó haú, Yhang lé dum tũ taí é gi, "Yhumsing ê, Nàng, ngá é laishînhtâng má, lé nang rã lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló rã nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jún lé le, 'Shí kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé, Israelaq amyú má lháng, shí í lumjín é sũ lé, Ngò, rayuq lé le a myàng wú é nghut lhê. ¹¹ Ngò, nungmoq lé taí kôlé, buihtoq buiwàng hkyam má é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó rã nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngàu nhap eq zuí kyik kyik shoq hpuzô nyi bùm bekò rã nghut lhê." ga taí ri.

¹³Hau htâng, Yesuq gi, gyezau lé, “Ló aq hko! Nàng lumjínng é eq rajung za, dut râ nghut lhê.” ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

¹⁴Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri. ¹⁵Yesuq gi, yhâng é loq má ê záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶Myinhâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nõhpyo huí é bang ban-shoq lé lhoq gê byí ri. ¹⁷Haú gi, “Yhang gi, nga-nhûng é noli nojàng lé yu pyám byi mù, nga-nhûng é noli no-jàng lé, wùn waq pyám byi bê nghut ri.”^p

ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸Yesuq gi, Yhâng é lhínghkyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap ê sháng gâ ri. ¹⁹Haú hkûn, tarâ sará rayuq gi, lé lô mù, “Sará ê, ngò gi, Nàng hká e le hká cháng râ nghut lhê.” ga Yhang lé lé taí ri.

²⁰Haú jáng, Yesuq gi, “Wamhkuí pé gi, hkyûng wó akô; nghoq pé le, ngho-qsut wó akô. Nghut kôlhâng, haú Byu Yhangzo gi, u nghê jowò lháng a wó nghut ri.” ga lhom taí kat ri.

²¹Haú hkûn, chángzo rayuq gi, “Yhumsíng ê, ngá wa lé lô yhûm pyám râ ahkáng hí byi shílaq.” ga taí kat ri.

²²Nghut kôlhâng, Yesuq gi, “Shí bê bang gi, shí bê bang yhangchang yhûm lhum kó sháng gaq, nàng gi, Ngá htâng cháng aq.” ga dum taú taí ri.

Laidun Lhoq Zím É Hkyô

Mrk 4:35-41; Luk 8:22-25

²³Hau htâng, Yesuq lhaí hkaú má wàng mù, Yhâng é chángzô pé le, Yhâng htâng châng wàng bekô nghut ri. ²⁴Haú hkûn, nhông má byodan-htik laidun mó lò mù, wuìlhêng pé gi, lhaí má bat úm lò bê nghut ri. Nghut kôlhâng, Yesuq gi, yhup myhí tô ri. ²⁵Chángzô pé gi, Yhâng chyáng jé ê mù, Yhang lé nhaú pun luí, “Yhumsíng ê, hkyi yù laq ô! Nga-nhúng myup ló nyi ri.” ga taí akô.

²⁶Yhang gi, “Lumjínng myit shaú é bang ê! Haí mù, haú-í gyuq bum akô lú?” ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, ban-shoq zím byuq bê nghut ri.

²⁷Byù haú bang gi, maúhong byuq kômù, “Shí yuq gi, hkasú é byù lhà? Lai eq wuìlhêng pé lháng gi, Yhâng é dang lé gyo byí ri myhi-nhung!” ga luí, rayuq eq rayuq myí lhûm bum akô nghut ri.

Nat Wang Júng Su Nhik Lé, Lhoq Gê Byí É Hkyô

Mrk 5:1-20; Luk 8:26-39

²⁸Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lháng a wám lai loshoq wuí é su nhik nghut akô. ²⁹Yhangnhik gi, Yesuq lé, “Garai Yhangzo ê, Nàng, ng-amoq eq haí sêng lhê lú? Ahkyíng a jé shimá, ngamoq lé zing-ri râ matú jé lé lo é nghut lhê lú?” ga taí garú akô.

³⁰Haú mai a lúm wê é jowò má, waq rajùm mó gi, myì dũ but zô nyi bum akô nghut ri. ³¹Nat gâng pé gi, Yesuq lé, “Nàng, ngamoq lé hkat htoq râ nghut jáng, hê waq pê chyáng wàng nhâng laq.” ga dũng akô.

³²Yesuq gi, “Htoq ló keq!” ga taí kat ri. Haú mù, yhangmoq gi, htoq ló luí, waq pê chyáng wàng mù, waq haú jũm gi, gampyoq mai nhông hkaũ shut din yán wang ló kôluí, wuì hkaũ má myup shi byuq bekô nghut ri. ³³Waq zúng bang gi, myuq hkaũ shut hpang din wang ló kômù, dut laí lo é hkyô banshoq lé le, nat gang wang júng hui su nhik hkâsu dut é hkyô lé le, ló taí kyo akô nghut ri. ³⁴Haú mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chômdũng tôngbán akô nghut ri.

Gungjum Shî Sũ Lé Lhoq Gê Byí É Hkyô

Mrk 2:1-12; Luk 5:17-26

9 Yesuq gi, lhaí má wàng mù, yhum-sing é wà shut jĩ dap ló bê nghut ri. ²Byù ra-am gi, gũngjum shî sũ rayuq lé, taphkang mai Yhâng chyáng waq lé lo akô. Yesuq gi, yhangmoq é lumjĩng myit lé byu-myàng jáng, haú gũngjum shî sũ lé, “Ngá zo ê, nhik hkâ-ngê; náng é yubak mara lé hkyut pyám byi bê.” ga taí ri.

³Haú hkũn, tarâ sará pé ra-am gi, yhangmoq é i-myit hkaũ má, “Byù shí yuq gi, Garai Gasang lé rhoi dang taí nyi ri.” ga myit nyi bum akô nghut ri.

⁴Yesuq gi, yhangmoq myit nyi é hkyô lé sé mù, “Nungmoq é i-myit hkaũ má, haú su agè ashop é đông haí mù myit nyi akô lúhú? ⁵Náng é yubak mara lé hkyut

pyám byi bê.’ nghũ taí râ eq ‘Toq luí, hkyô so aq.’ nghũ taí râ má, hká hkun je taí lui lhê lúhú? ⁶Nghut kôlháng, haú Byu Yhangzo gi, mingkan htoq má, mara hkyut byi râ ahkáng wó Sũ nghut é lé, nungmoq lé sé nhâng nau lhê.” ga taí luí, haú gũngjum shî sũ lé, “Toq aq, náng é taphkang yu chũng luí, yhũm taú ló aq hkoi.” ga taí kat ri. ⁷Haú mù, haú yuq gi, toq mù, yhũm shut ló byuq bê nghut ri. ⁸Byù hpũng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹Yesuq gi, haú jowò mai sô e ló é hkũn, kang guq zúm má zung tô é Mahte ga sũ lé myàng mù, “Ngá htàng cháng aq.” ga taí jáng, haú yuq gi, toq luí, Yhâng htàng cháng bê nghut ri.

¹⁰Yesuq gi, Mahte é yhũm má my-inzang zô nyi é hkũn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹Haú lé, Hparishe pé myàng kôjáng, Yhâng é chángzô pé lé, “Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lúhú?” ga myí akô.

¹²Yesuq gi, haú su ga kô é lé wó gyo jáng, “Wángzán bang gi, chi sará a ra kó; nõhpyo hui bang za sheq ru râ lhê. ¹³Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.’^a gâ é lichyúm lé mhoq yũ keq. Hkâsu mù gâ le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê.” ga tũ taí kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴Hau htâng, Wui-myhup Sará Yohan é chángzô pé gi, Yesuq chyáng jé lé kômù, “Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lhú?” ga luí, lé myí akô.

¹⁵Haú mù, Yesuq tũ taí é gi, “Bíng pé gi, lusik eq rahá nghut nyi to ashí hkûn, hkâsu ge yón kó râ lhú? Lusik lé, yhang-moq chyáng mai shuí yu pyâm é hkyíng jé râ nghut lhê; haú hkûn kúm gi, yhang-moq zoshuq gám kó râ nghut lhê.

¹⁶Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê. ¹⁷Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut râ nghut lhê. Haú mù, tsibiyiq wing asik lé, shokuq htûng sik má kat jáng sheq, haú í jûng é a hten râ nghut lhê.” gâ ri.

Shí Bê Myiwe Zo Eq No É Myiwe Myhí

Mrk 5:21-43; Luk 8:40-56

¹⁸Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, “Ngá zo byizo gi, ahkuí za shi byuq bê. Nghut kôlhang, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò râ nghut lhê.” ga taí ri. ¹⁹Yesuq gi, toq mù, Yhâng é chángzô pé eq rahá, haú yuq htâng châng e lô akô.

²⁰Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹Myiwe myhí haú gi, yhang gûng yhang, “Ngò, Yhâng é buhtâng má ê wó záng jáng gi, ge byuq

râ nghut lhê.” ga, wó myit é yanmai nghut ri.

²²Yesuq gi, lhing wú kat luí, yhang lé myàng jáng, “Ngá zo ê, nhik hkâ-ngê, náng é lumjíng myit gi, nang lé lhoq gê byi bê nghut ri.” ga taí ri. Haú hkûn jáng yhang, myiwe myhí haú gi, ge byuq bê nghut ri.

²³Yesuq gi, suwún hpô é yhûm má jé wang lô é hkûn, sampyí mut bang eq garu garín dut nyi é bang lé, ê myàng mù, ²⁴yhangmoq lé, “Hui keq. Myiwe zo gi, shi byuq é a nghut, yhup myhí tô é sheq ru nghut lhê.” ga taí jáng, yhang-moq gi, Yhang lé wuizui kut pyám byí akô. ²⁵Yesuq gi, byù hpûng lé, shing-gan shut htoq lô nhâng mù, Yhang wang ê luí, myiwe zo haú lé loq èq zuí kat jáng, myiwe zo haú gi, dum dui toq lo ri. ²⁶Haú hkyo é danglù gi, ramau gón yhang jam lô byuq bê nghut ri.

Myoqjit Í Yuq Eq Nhut Jit Sú Rayuq Lé, Lhoq Gê Byí É Hkyô

²⁷Yesuq gi, haú jowò mai xoq e lô nyi le, Yhâng é htâng má, myoqjit í yuq gi, châng đin uchyang, “Dawiq é Yhangzo ê, ngá-nhik lé shogyô yù laq ô!” ga wut taí akô.

²⁸Yesuq gi, yhúmhaú má jé wang lô é hkûn, myoqjit su nhik châng wang lò kômù, haú nhik lé, “Ngò wó kut byí é lé, nungnhik lumjíng akô luq?” ga myí ri.

Haú hkûn, yhangnhik gi, “Lumjíng lhê ô, Yhumsíng ê.” ga tũ taí akô.

²⁹Hau htâng, Yhang gi, haú nhik é myoqjí má ê záng htung luí, “Nungnhik lumjíng é eq rajung za dut sháng gaq.” ga taí ri. ³⁰Haú mù, yhangnhik gi, myoq wó myàng bekô nghut ri. Yesuq gi, “Shí hkyô, ó lé le hkâsé nhâng kó.” ga, yhangnhik lé htân htân sidíq byí ri. ³¹Nghut kôlhang, yhangnhik gi, haú hkyô lé, haú mau ramau gón yhang taí pyo lô bekô nghut ri.

³²Haú nhik htoq ló nyî kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô.

³³Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpúng mó gi, haú lé wú maú byuq kômù, “Shî su dut é hkyô lé, Israelaq amyû má radàm lháng a myang wú.” ga taí bum akô.

³⁴Nghut kôlhang, Hparishe pé kúm gi, “Nat gâng pé é zaú é wum-o a-tsam éq za, nat gâng pé lé hkat htoq pyâm é nghut ri.” ga taí bum akô nghut ri.

Mû Zui Byù Shaú Ri

³⁵Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nõjàng hui bang yuq hkanmó lé, lhoq gê byí wún ri. ³⁶Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷Haú mù, Yhang gi, Yhâng é chángzô pé lé, “Kyôshû yù râ myo shoq joq kôlhang, mù zui râ byù gi, shaú nyi ri. ³⁸Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq.” ga taí ri.

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41;

13:9-13; Luk 6:12-16; 9:1-6;

12:2-9, 51-53; 14:26-27; 21:12-17

10 Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nõjàng eq nõhpyo ajung jung lé wó lhoq gê râ ahko ahkáng yhangmoq lé byí ri.

²Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³Hpilip eq Barhtol-ume; Htomaq eq kang guq sù Mahte; Alhpe é yhangzo Yakuq, Htade, ⁴Zelutúq^{§§} dut é Simun eq, Yesuq lé ap pyám rà sù, Yudaq Iskarut pé nghut akô.

⁵Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, “Tûngbaù pé chyáng le hkâ-ê kó; Samariq wà rawà má le hkâwâng kó. ⁶Haú byuq byuq é sau pé su nghut nyi é Israelaq byu pé chyáng sheq ê keq. ⁷Nungmoq gi, ê mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq. ⁸Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹Nungmoq é hpyihit má, hîng, ngùn eq gyi pé hkâkat chûng kó; ¹⁰hkyowui é matú, etap, mebu htaí, hkyî-tsung eq dumbáng pé hkâyú chûng kó; hkâsu mù gâ le, mù zui sù gi, zoshuq wó gíng lhê.

¹¹Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. ¹²Haú yhûm má wang é hkûn, shichyên yù keq. ¹³Haú yhûm gi, gingdán é nghut jáng, nungmoq shimân byí é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq. ¹⁴Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuihaú lé ko hkyô pyâm to keq. ¹⁵Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ

§§10:4 Zelutúq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutúq gâ lhê.

nghut lhê. ¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haù mù, lhang-mù su hpaqchyí bò luí, hpúngkyui su nú-nhâm nyí keq.

¹⁷ Byu pé lé sidíq keq; hkâsu mù gâ le, yhangmoq gi, nungmoq lé, tarâ rúng pé má ê ap pyám kó rà nghut é htoq agó, yhangmoq é tarajong pé má, nungmoq lé nguq bat kó rà nghut lhê. ¹⁸ Nungmoq gi, Ngá é yanmai, mauzau wuì eq hkohkam pé é hí má shuí jé é hui luí, yhangmoq é hí má le, tûngbau pé é hí má le, saksé myang hkám kó rà nghut lhê. ¹⁹ Nghut kôlhang, nungmoq lé ap pyám kó é hkûn, nungmoq hkâsu taí rà eq haí taí rà lé, hkâ-myt chiq kó. Haù hkûn taí rà dang, nungmoq wó kó rà nghut lhê. ²⁰ Hkâsu mù gâ le, haù gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí rà ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rà nghut lhê; zo wuí gi, mó wuí lé gumlau toq mù, sat pyám nhâng kó rà nghut lhê. ²² Byù lhunglhang bang gi, Ngá é yanmai, nungmoq lé a nguì kut kó rà nghut lhê; nghut kôlhang, jihâtum jé shoq wó hkam jân nyí é sù gi, hkyi yu é hui rà nghut lhê. ²³ Rawò má zing-ri é hui jáng, rawò shut h pang ê keq. Ngò, nungmoq lé teng za taí kôlé, Israellaq byu pé é myuq pé má, nungmoq a ban wang ngap shimá, haù Byu Yhangzo jé rà nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rà a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé

lhang Bezebulaq* ga kô le gi, Yhâng é yhumbyù wuì lé gi, je riyhang nghû kó rà a nghut lhu?

²⁶ Haù mù, yhangmoq lé hkâgyuq kó. A byông htoq loshoq wó zaú nghop tô é haí le a joq rà nghut lhê; a sé loshoq wó haq tô é le, haí a joq rà nghut lhê. ²⁷ Ngò, nungmoq lé mauchut hkaù má taí é hkyô lé, myoq myàng maubò má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq. ²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyí keq. ²⁹ Johkyáng í du lé, gyi htingchap rachap èq wó ûng pyâm lhê a nghut kó lhu? Nghut kôlhang, haù radu lhang, nungmoq é Îwâ é myit èq a nghut jáng, myigùng má wó byit gyó rà a nghut. ³⁰ Nungmoq é ulhum mâ é xâm banshoq lé lhang, nghap to gù nghut lhê. ³¹ Haù mù, hkâgyuq kó; nungmoq gi, haù johkyáng myo myô htoq má lhang gù je bo é bang nghut lhê.

³² Byu pé hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yú rà nghut lhê. ³³ Byu pé é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám rà nghut lhê.

³⁴ Ngo lé, haù myidàm htoq má simsaq hkyô byi rà matú lé lo é sù su hkâ-ngâm kó. Ngò gi, simsaq hkyô byi rà matú lé lo é a nghut, shâm byi rà matú sheq lé lo é ru nghut lhê.† ³⁵ Hkâsu mù gâ le, 'Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kó rà nghut lhê.

*10:25 Bezebulaq gâ é gi, Tsadán é myíng rajà nghut lhê.

†10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rà nghut é hkyô lé sé mù, haù su ga taí é nghut lhê.

³⁶ Yhumsing é yhumbyù wuì gi, yhumsing é gyè taù dut rã nghut lhê.^r gâ tô é matú sheq, Ngò jé lé é ru nghut lhê.

³⁷ Ngo lé chyit é htoq yhumsing é ìnu ìwa lé je chyit é sù ó yuq nghut kôle, Ngá é chángzo kut rã gingdán sù a nghut; Ngo lé chyit é htoq yhumsing é zo wuì lé je chyit é sù ó yuq nghut kôle, Ngá é chángzo kut rã gingdán sù a nghut;
³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rã gingdán sù a nghut.

³⁹ Yhumsing é asak lé ha bún é sù ó yuq nghut kôle, asak sum rã nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó rã nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù rã nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù rã nghut lhê.

⁴² Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù rã za nghut lhê.” gâ ri.

Yesuq Eq Wui-myhup Sará Yohan

Luk 7:18-35

11 Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit rã matú eq hko kyo rã matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, ³ “Nàng gi, haù jé lé lô rã Sù nghut lhê lúhú? Haù a nghut jáng, ngamoq gi,

góyuq lé lán ra shirâ lúhú?” ga, yhâng é chángzô pé lé myí nhang kat ri.

⁴ Yesuq tũ taí é gi, “Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri.” ga taí ri.

⁷ Yohan é chángzô pé taù ló kô é u lé, Yohan eq séng lui, byù moq mó lé Yesuq taí é gi; “Nungmoq gi, haí lé hpuy wú rã matú, haù yoso shut e akô lúhú? Lai èq hik nhún é jamgàm lé wú rã matú nghut akô lúhú? ⁸ Haù a nghut jáng, haí lé wú rã matú e akô lúhú? Nú-nhâm é mebu wut sù lé wú rã matú e akô lúhú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê. ⁹ Haù nghut lé gi, haí lé wú rã matú ê kô é lúhú? Myiqhtoi rayuq lé lúhú? Haù kúm nghut ri; Ngò, nungmoq lé taí kôlé, Yohan gi, myiqhtoi htoq lhang gyaú sù nghut lhê. ¹⁰ Haù yuq é hkyô lé, Chyúmdang má kâ tô é gi,

“Wú aq, Nàng é hkyô lajang lán rã matú, Ngá é lagyo lé, Nàng é hí má Ngò nhang kat rã nghut lhê.”^s

gâ ri. ¹¹ Ngò, nungmoq lé teng za taí kôlé, myiwe wuì mai hku kat é bang má, Wui-myhup Sará Yohan htoq je kô é rayuq lhang a htoq wú shi; nghut kôlhang, Garai Gasâng é mauhkûng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkûng mingdán gi, lú chyîn wang nyi é hui mù, sarhé pé gi, haù lé wó yù bekô nghut ri. ¹³ Hkâsu mù gâ le, Yohan é ahkýing jé shoq, haù myiqhtoi pé banshoq eq tará

gi, haú hkyô eq séng luí, myiqhtoi htoí to gù nghut lhê. ¹⁴Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê. ¹⁵Gyô yù râ nohkyap dap sù gi, gyô yù sháng gaq.

¹⁶Shí ipyat lhê é byu pé lé, Ngò, hai eq taí kê wú râ lúh? ¹⁷Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaú hkyangsâng kôlhang, nungmoq gi, a ngaú kó.'

ga luí, gai pé má zùng mù, góbang lé wut taí lhum nyi é zoshâng wui eq wuí akô. ¹⁸Hkâsu mù gà le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. ¹⁹Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzó èq saksé tún shit nyi ri." gâ ri.

Myit A Lhîng É Wà Mó Pê Hkyô

Luk 10:13-15

²⁰Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi, ²¹"Kuraizin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tú wut lhê, myiwap kyaq gyûn lhê kut bekô râ nghut lhê. ²²Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³Dum mù, Kaperna-um wà nàng ê, nàng gi, mauhkûng jé shoq waq toq é hui râ lúh? A nghut, mosumhkung má sheq gyó râ

nghut lhê. Náng chyáng kut shit é laklaí kumlhá lé, haú Sodom wà má kut shit é ru nghut le gi, myuq haú hkû-nyí jé shoq joq nyi râ nghut lhê. ²⁴Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

Ngú Nyí Bâng É Matú Bánno Jang

Luk 10:21-22

²⁵Haú u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tún shit bê nghut é yanmai, Ngò, Nang lé hkya-on lhê ô. ²⁶Nghut bê, Áwa ê, haú gi, Nàng ô nau é hkyô nghut ri.

²⁷Ngá Wa gi, lhunglhang lé Ngá é loq má ap byí to bê. Haú Zo lé, Áwa mai lai luí ó le a sé; Áwa lé le, haú Zo eq haú Zo mai sé nhâng râ matú hkyin yu é bang mai lai luí ó a sé.

²⁸Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. ²⁹Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haú hkûn, nungmoq é asak woi-nyí bánno kó râ nghut lhê. ³⁰Haí mù gà le, Ngá é kandang gi, waq lui é htoq agó, Ngá é wò le sóm lhê." gâ ri.

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

12 Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akô nghut ri. ²Hparishe pé gi, haú lé myàng kôjáng, "Wú aq! Náng é chángzô

pé gi, Bánno buinyi má a ge kut jung lé kut nyi akô.” ga taí kat akô.

³Haú hkûn, Yesuq tú taí é gi, “Dawiq lháng gi, yhâng htâng châng é bang eq rahá zòmút huí é hkûn hkâsu kut é hkyô lé, nungmoq a nghap wú kó lú? ⁴Dawiq gi, Garai Gasâng é yhúmhaú má wang é mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú? ⁵Hau htoq agó, Bánno buinyi má, hkyangjông pé gi, noquq yhúmhaú má Bánno buinyi é tarâ lé shut kôlháng mara a wó é lé, haú tarâ laiká má nungmoq a nghap wú kó lú? ⁶Ngò, nungmoq lé taí kôlé, haú noquq yhúm htoq je ko sú gi, shí má nghut nyi lhê. ⁷Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê^u gâ é lichyúm lé nungmoq sé kô é ru nghut le gi, mara a bò bang lé mara hùn kó râ a nghut. ⁸Hkâsu mù gâ le, haú Byu Yhangzo gi, haú Bánno buinyi é Yhum-sîng nghut lhê.” gâ ri.

⁹Hau htâng, Yhang gi, haú jowò mai e ló mù, yhangmoq é tarajong má wang e ló ri. ¹⁰Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, “Bánno buinyi má, nõhpyo lhoq gê byi le, tarâ wang lhê lú?” ga myi é đông, Yhang lé mara hùn râ hkyô ho akô nghut ri.

¹¹Haú hkûn, Yesuq gi, “Nungmoq chyáng mã é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lú? ¹²Byù gi, saú htoq má hpaudap dik é nghut lhê! Haú mù, Bánno buinyi má ge é hkyô kut le, tarâ wang lhê.” ga yhangmoq lé tú taí ri.

¹³Hau htâng, Yhang gi, haú loq jum shí sú lé, “Náng é loq nyhang kat aq.” ga taí kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri. ¹⁴Hparishe pé kúm gi, htoq ló

kômù, Yesuq lé hkâsu kut wó sat pyám râ hkyô lé, chôm hpyê lhúm bum akô nghut ri.

Garai Hkyin Tô É Dui-nhâng Zoshâng

¹⁵Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo hui bang banshoq lé lhoq gê byi luí, ¹⁶Yhang ó yuq nghut é hkyô lé, a taí byông htoq râ matú, yhangmoq lé taí hkûm tô ri. ¹⁷Haú gi, myiqh-toi Esai-aq é nhut đông mai taí tô é dang lé lhoq dik râ matú nghut ri. Dang haú pé gi,

¹⁸“Shí yuq gi, Ngò chyt, Ngò myit ngui luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myú banshoq pé má taí kyo râ nghut lhê.

¹⁹Yhang gi, haí a hpuq tú é htoq agó, a garu râ nghut lhê; Yhâng é hté lé, hkyô mó pé má wó gyo râ a nghut.

²⁰Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

²¹Byù myú chângjup gi, Yhâng é mying má myit myoqbyù kó râ nghut lhê.”^v gâ ri.

Yesuq Eq Bezebulaq

Mrk 3:20-30; Luk

11:14-23; 12:10; 6:43-45

²²Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byí ri; haú mù, haú yuq gi, dang le wó nyô,

myoq le wó myâng dut bê nghut ri. ²³Byù hpûng mó gi, haú lé wú maú byuq kômù, “Shí yuq, Dawiq é Yhangzo za gi, nghut lhê laq?” ga taí bum akô.

²⁴Nghut kôlhang, Hparishe pé gi, haú lé wó gyo kôjáng, “Shí yuq gi, nat gâng pé é zau Bezebulaq[‡] é wum-o a-tsam èq za nat gâng pé lé wó hkat htoq é nghut ri.” ga taí bum akô nghut ri.

²⁵Yhangmoq myit nyi é hkyô lé Yesuq sé mù, yhangmoq lé taí é gi, “Hká mingdán nghut kôle, ahkaú má byoq gâng lhúm nyi kô é nghut jáng, htên byoq byuq râ za nghut lhê; haú eq rajung za, myuq ralhüm nghut nghut, yhumhtu ralhüm nghut nghut, yhangchang byoq lhúm nyi kô é nghut jáng, haú gi, wó gîng nyi râ a nghut. ²⁶Tsadán gi, Tsadán lé hkat htoq pyâm é nghut jáng, yhum-sing gùng yhumsîng lhoq hpýoq nyi gù bê nghut ri. Haú su nghut jáng, yhâng é mingdán gi, hkâsu kut wó gîng to râ lúhú?

²⁷Haú mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyâm kô é nghut lhê lúhú? Haú su nghut jáng, haú bang gi, nungmoq lé tarâ jéyáng bang dut kó râ nghut lhê. ²⁸Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhüm má lú wâng mù, yhâng é sutzè lé hkâsu wó lú yú râ lúhú? Haú yuq lé hí tuí zing pyâm jáng sheq, yhâng é sutzè lé wó lú yú râ nghut lhê.

³⁰Ngá hkyam shut a dap sù gi, Ngo lé gýè kut sù nghut lhê; Ngò eq rahá a shùm tsing sù gi, lhoq pyo pyâm é sù nghut nyi ri. ³¹Haú mù, Ngò, nungmoq lé taí kôlé, byu pé é yubak mara hkangmò eq

Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyâm é gi, mara hkyut byí é hui râ a nghut. ³²Haú Byu Yhangzo lé dang đông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

³³Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê jáng, ashi le gè râ a nghut; ³⁴Duq htân lhang-muì amyù ê, nungmoq gi, agè ashop é bang nghut to kôluí nhîng, dang gè hkâsu wó taí kó râ lúhú? Hkâsu mù gâ le, i-myt unghkaú má byíng mui tô é lé za, nhut mai taí htoq lo é nghut lhê.

³⁵Ge é sù gi, yhumsing é i-myt unghkaú mâ é sutzè mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú mâ é agè ashop é sutzè mai, agè ashop é zè pé lé lhoq htoq shit lhê. ³⁶Ngò, nungmoq lé taí kôlé, byù gi, yhumsîng taí kat é akyú a bo é dang pé é matú, tarâ jéyáng é buinyi má taí sân kyo ra kó râ nghut lhê. ³⁷Hkâsu mù gâ le, yhumsîng mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê.” gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸Hau htâng má, Hparishe pé eq tarâ sará pé ra-am gi, “Sará ê, ngamoq gi, Nàng, limik kumlhá kut shit râ lé myàng nau ri.” ga Yhang lé dúng akô.

³⁹Haú mù, Yhang tú taí é gi, “Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqh-toi Yonaq é kumlhá mai lai luí, gotú haú

[‡]12:24 Bezebulaq gâ é gi, Tsadán é myîng raja nghut lhê.

le tũn shit rã a nghut. ⁴⁰ Hkãsu mù gã le, Yonaq gi, ngo mó é wamdau hkaũ má sum nyí sum myĩn lúng é su, haũ Byu Yhangzo le, myigũng kãng má sum nyí sum myĩn lúng rã nghut lhê. ⁴¹ Ninewe wã byũ wui gi, Yonaq mungdang hko kyô é hkũn myit lhĩng kô é nghut mù, tarã jéyãng é buinyi má, ipyat shí mã é bang eq rahã toq lò luĩ, ipyat shí mã é bang eq rahã toq lò luĩ, ipyat shí mã é bang lé mara hũn kó rã nghut lhê; haũ Yonaq htoq ko sũ gi, ahkuĩ shí mã jé nyi to bê. ⁴² Maupyĩ mã é hkohkãm myhĩ gi, maumyĩ lò htãng é mai lé lô mù, Sholumon é hpaqchyĩ dang lé, lé gyô yũ bê nghut mù, haũ tarã jéyãng é buinyi má, ipyat shí mã é bang eq rahã toq lò luĩ, ipyat shí mã é bang lé mara hũn rã nghut lhê; haũ Sholumon htoq ko sũ gi, ahkuĩ shí mã jé nyi to bê.

⁴³ Haũ agè ashop é nat gi, byũ rayuq chyãng mai htoq lò mù, kyuq huĩ é jowò pé mã sô yõng e lò luĩ, no rã jowò hkat ho wũ le, a myang hô nghut ri. ⁴⁴ Haũ hkũn, yhang gi, 'Ngò nyi laĩ lo é yhũm mã dum taũ lò wũ rã.' ga taĩ ri. Yhang dum taũ jé lò wũ le, yhũm haũ lé, ó le a sing yu hpyuq é htoq agó, san za rago dut to lãng é lé lò myang ri. ⁴⁵ Haũ jãng, yhang gi, dum taũ ê mù, yhãng htoq je wuĩ é nat nyhit nat lé shuĩ lò luĩ, haũ má lo wang nyi to bekô. Haũ mù, haũ yuq é nyi yap sãmlai gi, hí lhê htoq mã je wuĩ lò bê nghut ri; agè ashop é ipyat shĩ le, haũ eq rajung za dut rã nghut lhê." gã ri.

Yesuq É Yhãngnu Eq Yhanggũ Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rũ nyo nyi ashĩ hkũn, yhãngnu eq yhanggu pé gi, Yhang lé nyò naũ kômù, shinggan mã lé yap tô akô nghut ri. ⁴⁷ Haũ mù, Yesuq lé, "Nãng nu eq nunggu pé gi, Nang lé nyò naũ mù, shinggan mã lãng yap bum akô." ga taĩ kyô akô.

⁴⁸ Haũ hkũn, Yhang gi, "Ô pé gi, Ngã nu eq Ngã gu pé nghut akô lhũ?" ga tũ

taĩ kat ri. ⁴⁹ Hau htãng, Yhang gi, Yhãng é chãngzô pé lé loq tun luĩ, "Wũ keq, shĩ bang gi, Ngã nu eq Ngã é gumang wui nghut bê. ⁵⁰ Hkãsu mù gã le, mauhkũng htoq mã é Ngã Wa ô nau é hkyô chãng é sũ ó yuq nghut kôle, Ngã gu Ngã mang, Ngã gu Ngã nhã, Ngã nu chyat nghut bê." ga xoq taĩ ri.

Kyôshi Sãn É Dangtũ

Mrk 4:1-20; Luk 8:4-15

13 Haũ nyi mã yhang, Yesuq gi, yhũmhkaũ mai htoq lò mù, wui nhõng yãm mã ê zung tô ri. ² Byũ hpũng mó gi, Yhãng é lhĩnghkyuq mã zup zĩng lé bum kô é yanmai, Yhang gi, lhai hkaũ mã doq zũng tô ri. Shiwa byu pé kũm gi, gin-gau htoq mã yap tô bum akô. ³ Hau htãng, Yhang gi, haũ bang lé, dangtũ pé dõng myo myo taĩ é mã, "Kyô hkyô sũ rayuq gi, kyôshi san rã ga htoq e lò ri. ⁴ Yhang, kyôshi sãn kat é hkũn, ra-am gi, hkyô mã gyó ang mù, nghoq pé èq lé hte zô pyãm ri. ⁵ Ra-am gi, myi-tse a htu é luqgok yò pé mã gyó ang mù, myi-tse a htu é yanmai, luĩ za yuq htoq lò kôle, ⁶ amyit a wó chĩn hing é nghut mù, bui htoq lò jãng, lhap kyuq pyãm bê nghut ri. ⁷ Dum ra-am gi, zugyóm hkaũ mã gyó ang luĩ, zubyap haũ pé kô lò mù, wup pyãm ri. ⁸ Ra-am dum nghut jãng, myih-pũn bo é jang mã gyó ang luĩ, ashĩ zũ lo é gi, sãn kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yũ rã nohkyap dap sũ gi, gyô yũ shãng gaq." ga le taĩ ri.

¹⁰ Haũ hkũn, chãngzô pé gi, Yhãng chyãng lé mù, "Nãng gi, haũ mù, shĩ bang lé, dangtũ dõng taĩ lhê lhũ?" ga myĩ akô.

¹¹ Haũ jãng, Yhang tũ taĩ é gi, "Mauhkũng mingdãn eq sêng é sê gyo wuĩ é hkyô pé lé sê gyo rã ahko ahkãng, nungmoq lé byĩ to bê, nghut kôlhãng, yhangmoq lé gi, a byi shĩ é nghut lhê. ¹² Wó to sũ lé gi, yhang agũn agó wó rã matũ, jat byi shĩ rã nghut lhê. A wó

su chyáng mai kúm gi, yhang wó tô é lé lhang yu pyám byi shirâ nghut lhê.¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí rã é nghut lhê.¹⁴ Haú gi, 'Nungmoq gi, wó gyô tô nyi kôlhang, sê gyo kó rã a nghut; myang tô nyi kôlhang, wú sé kó rã a nghut.

¹⁵ Hkâsu mù gâ le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqjî le chûm byuq bekô nghut ri. Haú su a nghut le gi, yhangmoq, myoq myàng no gyo mù, i-myt bun bóng luí, lhang lò kômù, Ngò, yhangmoq lé yâ gè byi berâ nghut lhê.^w

gâ é, Esai-aq é myiqhtoi dang lé lhoq dik é nghut ri.¹⁶ Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyi ri.¹⁷ Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoi pé eq dingmán bang myo myo gi, myàng naù gyo naù kôlhang, a wó myâng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkung mingdán eq sêng é danglù lé wó gyo kôlhang, a sê gyô é yanmai, haú agè ashop sù lé lô mù, yhang é i-myt hkaú má san kat tô é kyôshi lé, lé yu pyám byí é hui sù lé gá nau é nghut lhê.²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chin é yanmai, razup zo za yuq mù, mungdang é yanmai, wuîhkê é eq zing-rí é hui kôjáng, hân hân htaq lò byuq é

sù lé gá nau é nghut lhê.²² Zugyóm má gyó âng é kyôshi gi, haú mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí ngoq jung ngùn hîng zèhkoq èq hup pyám é yanmai, ashí a wó zuí é sù lé gá nau é nghut lhê.²³ Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashí zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkung mingdán gi, ge é kyôshi lé, yò má san kat sù rayuq eq du ri.²⁵ Byu pé yhup myhí tô bum é u lé, yhang é gyè gi, lé jé mù, guq gàm gyoro má, myoqshi lé sân to hkó luí, taú lò byuq bê nghut ri.²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhang zoshang wui gi, yhang chyáng lé jé mù, 'Yhumsîng ê, ge é kyôshi lé za yò má sân tô é a nghut lú? Myoqgàm pé gi, hkâmai htoq lo é lú?' ga myi kôjáng, ²⁸ haú yhumsîng hpô gi, 'Gumlau gye èq kut é nghut ri.' ga tú taí ri.

Haú jáng, dui-nhang zoshang wui gi, 'Ngamoq, myoq haú pé lé ê nut pyám rã lé, nang ô nau ri lú?' ga myí akô.

²⁹ Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó rã nghut lhê.³⁰ Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám rã matú hkyom dîng to luí, guq lé kúm gi, shù yù mù, ngá é chyí má tsing kat to rã matú, kyô shu bang lé ngò taí rã nghut lhê.' ga tú taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhú dum xoq taí é gi; “Mauhkúng mingdán gi, byù rayuq èq, yhâng hkyâm má hô tô é angshi cham eq wuí ri. ³² Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gám banshoq htoq má je kô é agám dut lò mù, akoq pé má, maulat nghoq zô pé lé wó zung nô bum lhê.” gâ ri.

³³ Yhang, gotú dangtú dum xoq taí é gi, “Mauhkúng mingdán gi, myiwe rayuq èq sungso mún sum búng má yu nyhó luí, haú pé banshoq lé wó lhoq dau nhang é múnchi eq wuí ri.” gâ ri.

³⁴ Yesuq gi, byù moq mó lé, haú pé banshoq dangtú đông mai chyat taí ri; yhangmoq lé, dangtú a bo é haí lhang a taí wú nghut ri. ³⁵ Haú gi, “Ngá nhut lé hpóng mù, dangtú đông mai taí râ; mingkan lé sâng-hi hpan é mai zaú tô é hkyô pé lé taí sân kyo râ nghut lhê.”^x ga, myiqhtoi đông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lô mù, yhúmhkaú má wang lô ri. Haú hkún, Yhâng é chángzô pé gi, Yhâng chyáng lé lô kômù, “Yò má é myoqgàm dangtú eq sêng é hkyô lé taí sân kyo laq.” ga taí akô.

³⁷ Haú jáng, Yhang tú taí é gi, “Ge é kyôshi san sũ gi, haú Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkúng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; ³⁹ haú

lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htúm é ahkyíng nghut ri; kyô shu bang gi, maumang lagyô pé nghut akô.

⁴⁰ Haú myoqgàm pé lé, nut yù mù, myi má nyhê pyâm é su, haú mingkan htúm é ahkyíng má dut râ nghut lhê. ⁴¹ Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù, ⁴² gyúng nyi é myibung hkyúng hkaú má dú kat pyám kó râ nghut lhê; hau má, ngaubyi ngaú nhap eq zui kyik kyik shoq hpuzò nyi kó râ nghut lhê. ⁴³ Haú hkún, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sũ gi, gyô yù sháng gaq.

Haq Tô É Sutzè Dangtú

⁴⁴ Mauhkúng mingdán gi, yò má haq tô é sutzè eq wuí ri. Sutzè haú lé myang é sũ gi, haú lé saí haq to mù, gabú myit èq taú lô luí, yhang wó é banshoq lé ùng pyám mù, yò haú lé wui yu ri.

⁴⁵ Dum, mauhkúng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaú é palhé lé myàng jáng, yhang wó é banshoq lé lô ùng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkúng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô. ⁴⁹ Haú eq ra-jung za, mingkan htúm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng

mai gam htoq yû luî, ⁵⁰ngaubyi ngaù nhap eq zùi kyik kyik shoq hpuzô nyi rà nghut é, gyúng nyi é myibung hkyûng hkaù má dú kat pyám kó rà nghut lhê.

⁵¹Shí hkyô banshoq lé nungmoq sê gyo bekô lhú?" gâ ri.

Háú hkûn, yhangmoq gi, "Sê gyo bê." ga tû taí akô nghut ri.

⁵²Hau htâng, Yesuq gi, yhangmoq lé, "Mauhking mingdán eq séng luí mhoq yû bê é tarâ sará ó nghut kôle, yhang mhoq é hkyô gi, yhumsing é sut-púnglhung hkaù mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³Yesuq gi, dangtú háú pé lé ban taí jáng, háú jowò mai htoq e ló bê nghut ri. ⁵⁴Yhang gi, Yhâng é yhummau má jé ló jáng, byu pé lé, yhangmoq é tara-jong má mhoqshit ri; háú hkûn, yhangmoq gi, gyô maú byuq kôluî, "Byù shí yuq gi, hpaqchyí byéng-yá shî eq hpungwup a-tsam mó shí pé lé, hkâmai wó yu é nghut lhê lhà? ⁵⁵Yhang gi, laksíma hpô é yhangzo a nghut lhú? Yhângnú é mying gi, Mariq gâ lhê a nghut lhú? Yhanggú pé gi, Yakuq, Yosep, Simun eq Yudaq gâ é bang a nghut kó lhú? ⁵⁶Yhâng nhammó pé le, nga-nhung eq rahá nghut nyi lhê a nghut kó lhú? Háú su nghut le nhing, háú pé banshoq lé, Yhang hkâmai wó yu é nghut lhê lhà?" ga myî bùm kômù, ⁵⁷Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhûm má za, myoqdong a lhaq wó wú é nghut lhê." ga tû taí kat ri.

⁵⁸Yhangmoq lumjing myit a bò kô é yanmai, Yesuq gi, háú má, laklai kumlhá myo myo a kut shit lo nghut ri.

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

14 Háú hkûn, mauzau Herut gi, Yesuq eq séng é ludang lé wó gyo jáng, ²yhâng a-ô mã é bang lé, "Shí yuq gi, Wui-myhup Sará Yohan nghut rinhung; Yhang gi, shi é mai dum dui toq lo é nghut mù, hpungwup a-tsam háú pé lé wó kut é nghut ri." ga taí ri.

³Herut háú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyám é yanmai nghut ri. ⁴Hkâsu mù gâ le, Yohan gi, yhang lé, "Nàng, miwe háú lé hâng yu é gi, tarâ a wang é nghut lhê." ga taí byí nyi é yanmai nghut ri.

⁵Herut gi, Yohan lé sat pyám naù kôlhang, mingbyû wuí lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyî kô é yanmai nghut ri.

⁶Nghut kôlhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷byizo háú lé, yhang haí dung le haí byi rà ga dakam é danggidiq byí ri.

⁸Byizo háú gi, yhângnu hpaqchyí byí é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi rà matú, ¹⁰htóng hkaù má lúng tô é Yohan é ulhum lé hpyit râ hkunmó hkyô kat bê nghut ri. ¹¹Yohan é ulhum lé bó má kat luî, miwe zo háú lé byi jáng, miwe zo háú gi, háú lé yhângnú chyáng yu ló byí ri. ¹²Háú mù, Yohan é chángzô pé gi, yhâng é mâng lé lé yû luî, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyîng Lé Byi Tsô É Hkyô*Mrk 6:30-44; Luk 9:10-17; Yhn 6:1-14*

¹³ Yesuq gi, haù hkyô lé wó gyo jáng, haù mai lhaì ji mù, tsím tsâm é jowò shut Yhang baù e ló ri. Haù lé, byu pé wó gyô bùm kôjáng, wà mó pé mai htoq lé lô kômù, hkyî hkyô Yhâng htâng châng e ló akò nghut ri. ¹⁴ Yesuq gi, lhaì mai gyó dap ló é hkûn, byù moq mó nyi to láng é lé myàng jáng, yhangmoq lé wú shogyo luí, nò bang lé lhoq gè byí ri.

¹⁵ Myinhâng jé lô jáng, haù chángzô pé gi, Yhâng chyáng lé kômù, “Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuí kó sháng gaq, yhangmoq lé nhang kat aq hkoi.” ga taì akò.

¹⁶ Haù hkûn, Yesuq gi, “Yhangmoq ló a ra. Nungmoq, yhangmoq lé rajung jung byi tso keq.” ga tû taì kat ri.

¹⁷ Haù su ga jáng, yhangmoq gi, “Muk ngo long eq ngozo í du za ru wó lhê.” ga dum tû taì akò.

¹⁸ Haù jáng, Yesuq gi, “Yu lò keq.” ga tû taì mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haù muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haù chángzô pé gi, shiwa byu pé lé gàm byí akò nghut ri. ²⁰ Yhangmoq banshoq bang zô gyí bùm kô é htâng má, haù chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri. ²¹ Haù má zô é bang gi, myiwe wuì eq zoshâng wuì lé a nghap lhôm é za, yuqgè baù ngo hkyîng kô bo ri.

Yesuq, Wuì Htoq Má Sô É Hkyô*Mrk 6:45-56; Yhn 6:15-21*

²² Yesuq gi, haù shiwa byu pé lé byo ló nhang nyi é hkûn jáng, chángzô pé lé lhaì má wang ji nhâng mù, tû tap shut

dap ló láng nhâng ri. ²³ Shiwa byu pé lé nhang pyâm é htâng má, Yhang gi, kyûdung râ ga, Yhang baù bùm shut doq e ló ri. Myinhâng chutshúm zó jé shoq, Yhang baù haù má nyi nyi ri. ²⁴ Haù u lé, lhaì gi, gin-gau mai tsómra wê é jowò má jé é hkûn, laì tau mut é yanmai, wuìheng èq gyai yhang lo bat nhùn é hui zô ri.

²⁵ Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haù mù, chángzô pé gi, Yesuq nhông htoq má só nyi é lé myàng kôjáng, gyuq dàn kômù, “Sobyô ô!” ga gyuq nán é èq taì garú akò nghut ri.

²⁷ Haù jáng yhang, Yesuq gi, yhangmoq lé, “Hkâgyuq kó! Ngò ru nghut lhê; myit wum lhoq kíng keq.” ga nyo kat ri.

²⁸ Haù hkûn, Petruq gi, “Yhumsíng ê, Nàng yhang ru nghut le gi, ngo lé, wuì htoq mai sô lé lô nhâng laq.” ga taì kat ri.

²⁹ Haù jáng, Yesuq gi, “Lé lô aq.” ga tû taì kat ri.

Haù mù, Petruq gi, lhaì mai gyó mù, wuì htoq mai Yesuq chyáng sô e ló ri. ³⁰ Nghut kôlhâng, yhang gi, laidun htan é lé myang kat jáng, wú gyuq luí, wuì má nop ló nyí mù, “Yhumsíng ê, ngo lé hkýi yù laq.” ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé lêng zing to mù, “Lumjíng myit shau sù ê, nàng haì mù úng-àng lhê lúh?” ga taì ri.

³² Yhangnhik, lhaì má wàng kôjáng, laidun le zím byuq bê nghut ri. ³³ Hau htâng, haù lhaì má lúng tô é bang gi, Yhang lé paì gop mù, “Nàng gi, gè gè yhang, Garai Gasâng é Yhangzo nghut bê.” ga taì akò nghut ri.

³⁴ Yhangmoq gi, gû dap ló kômù, Genesarat mau má jé wang ló bekò nghut ri. ³⁵ Haù mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akò. Haù mù, byu pé

gi, nõhpyo hui bang lhunglhang lé, shuí lé lô kômù, ³⁶ nõhpyo hui bang lé, Yhang é bushi htâng má za lhang záng nhâng rã matú dúng tóngbán akô; Yhang lé záng é lhunglhang bang gi, lhoq gê byí é huí bekô nghut ri.

Sansêng É Hkyô Eq A Sansêng É Hkyô

Mrk 7:1-23

15 Hau htâng má, Hparishe pé eq tarã sará pé ra-am gi, Yerusalem và mó mai Yesuq chyáng jé lé lô kômù, ² “Náng é chángzô pé gi, haí mù luí, íchyi íwa pé é htunglí lé a cháng kut akô lhu? Yhangmoq gi, loq hí a chí é zang zô akô nghut ri.” ga, lé taí akô.

³ Haú jáng, Yesuq tú taí é gi, “Nungmoq gi, haí mù, nungmoq é htunglí é yanmai, Garai Gasâng é hkunmó lé a cháng kô é lhu? ⁴ Hkâsu mù gâ le, Garai Gasang gi, 'Nungmoq é ínu íwa lé, hkungga keq.'^y ga le, 'Ínu íwa lé, nhing é sũ ó yuq nghut kôle, sat pyâm é hui rã lhê.'^z ga le, taí tô é nghut lhê. ⁵ Nghut kôlhang, nungmoq taí é gi, 'byù rayuq yuq, yhumsing é yhangnu yhangwa lé byi âng é zè lé, Garai Gasang lé byi rã chyunghuq nghut lhê ga taí é nghut jáng, ⁶ haú yuq gi, yhangwa lé hkungga nó a ra.' gâ akô nghut ri. Haú đông mai, nungmoq gi, nungmoq é htunglí é yanmai, Garai Gasâng é mungdang lé hengik pyâm akô nghut ri. ⁷ Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri. ⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggã akô; yhangmoq é myit nhiklhum gi, Ngò eq wê gâng nyi akô.

⁹ Yhangmoq, Ngo lé noquq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.^a gâ é nghut lhê.” gâ ri.

¹⁰ Hau htâng, Yesuq gi, shiwa byu pé lé, Yhang chyáng wut yù luí, “Gyô yù mù, sé lo keq. ¹¹ Nhut má wang lo é haí jung le, byù lé a sansêng dut nhang é a nghut, nhut mai htoq lo é pé sheq, byù lé a sansêng dut nhang é ru nghut lhê.” ga taí ri.

¹² Haú hkûn, haú chángzô pé gi, Yhang chyáng lé lô kôluí, “Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lhu?” ga myi kôjáng,

¹³ Yhang gi, “Mauhkûng htoq tsáng myhâng mâ é Ngá Wa a hô tô é agàm hkangmó gi, apùn eq roq nut pyâm é hui rã nghut lhê. ¹⁴ Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhum é nghut le gi, í yuq é yhang donghkong má byit gyó kó rã za nghut lhê.” ga tú taí ri.

¹⁵ Haú hkûn, Petruq gi, “Ngamoq lé, dangtú hau é lichyúm taí sân kyo laq.” ga taí jáng, ¹⁶ Yesuq gi, “Nungmoq, ahkuí le haú-í yhang go nyi ashi kô luq? ¹⁷ Nhut má wang lo é haí jung le, wamdau hkaú má jé wang lô mù, gungdu mai dum htoq lô é nghut lhê. ¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sansêng dut nhang ri. ¹⁹ Hkâsu mù gâ le, myit nhiklhum mai htoq lo é gi, agè ashop é đông myit é hkyô pé, byù sat é hkyô, su-myi sulàng lú hkyô, ashop é đông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sansêng dut nhang é hkyô pé nghut ri;

loq a chî e za zo shuq é gi, byù lé a san-séng a dut nhang é nghut lhê.” ga taî ri.

**Hkanan Myiwe Myhí
Rayuq É Lumjín Myit**

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e lô bê nghut ri.

²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, “Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nô gýn nyi ri.” ga taî garû ri.

²³ Nghut kôlhang, Yesuq gi, dang rahkun le a tû taî nghut ri. Haú mù, Yhâng é chángzô pé gi, Yhâng chyáng lé jé kômù, “Myiwe myhí haú lé lô nhang pyám aq; haî mù gâ le, yhang gi, nganhûng é htâng má châng garû nyi ri.” ga taî akô.

²⁴ Yesuq gi, “Byuq byuq é sau pé su nghut nyi é Israelaq byu pê chyáng sheq, Ngo lé nhang kat é ru nghut lhê.” ga taî ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, “Yhumsîng ê, ngo lé garúm yù laq ô!” ga taî ri.

²⁶ Yesuq gi, “Zô wui chyáng mâ é zoshuq lé yù mù, hkuí pé lé byi tsô é jung a nghut.” ga tû taî jáng, ²⁷ myiwe myhí haú gi, “Yhumsîng ê, haú kúm nghut ri; nghut kôlhang, hkuí pé lhang, yhumsîng hpô é zohpoq mai gyó é zang cham zang htâng lé, zô akô mhaî.” ga dum taî ri.

²⁸ Haú mù, Yesuq gi, “Myiwe zo ê, náng é lumjín myit gi, kô nyi ri! Nàng dúng é hkyô lé gyo byi bê nghut lhê.” ga tû taî ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

²⁹ Yesuq gi, haú mai htoq lô luí, Galile không yàm má ê jé mù, bùm shut doq lô

luí, lô zung nyi ri. ³⁰ Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nô bang gotú myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byi ri. ³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, “Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. Yhangmoq, hkyolat má mut yut lô yut kó abe, yhangmoq zòmüt to gû lé, Ngò a nhang kat naù.” ga taî ri.

³³ Haú hkûn, Yhâng é chángzô pé gi, “Isû é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lú?” ga myí akô.

³⁴ Yhang gi, “Nungmoq, muk hkâ-myhó long wó akô lú?” ga tau myi jáng, yhangmoq gi, “Muk nyhit long eq ngonú zo ratsuí wó lhê.” ga tû taî akô.

³⁵ Haú mù, Yhang gi, byù hpûng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byí akô nghut ri. ³⁷ Yhangmoq lhungl-hâng bang zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsîng yu ashî kô nghut ri. ³⁸ Haú hkûn zô é bang má, myiwe wui eq zoshâng wui lé a nghap lhôm é za, yuqgè wui baú myi hkyîng yuq bo ri. ³⁹ Yesuq gi, byù hpûng lé lô nhang pyám é htâng má, lhai má wang ji mù, Magadan mau shut dap e lô bê nghut ri.

Kumhá Dung Kô É Hkyô*Mrk 8:11-13; Luk 12:54-56*

16 Hparishe pé eq Saduke pé gi, Yesuq chyáng lé jé kômù, Yhang lé chyam wú é đông, mauhkúng mà é kumhá kut shit rã matú, dúng akô.

²Haù mù, Yhang gi, yhangmoq lé, “Nungmoq gi, myinhâng jé jáng, 'Mau hpong rã nghut lhê, hkâsu mù gà le, mauhkúng ne ri.' ga le, ³napkyó lé nghut jáng, 'Hkû-nyí laidun lò rã nghut lhê, hkâsu mù gà le, mauhkúng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yû kô é nghut kôlhâng, shí ipyat lhê é kumhá lé gi, a sê gam hkoq yû kô nghut ri. ⁴Agè ashop é eq lhum a zuí é ipyat shí gi, limik kumhá lé ho nyi akô; nghut kôlhâng, Yonaq é kumhá mai lai luí, gotú haí le tân shit rã a nghut.” ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pê É Múnchi*Mrk 8:14-21*

⁵Yhangmoq, nhông hé hpoq shut gú dap ló kô é hkûn, haù chángzô pé gi, muk yu chûng rã lé tô-myhí pyâm akô.

⁶Haù hkûn, Yesuq gi, “Hparishe pé eq Saduke pê é múnchi lé, sidiq luí, koi pyâm nyi keq.” ga, yhangmoq lé taí kat ri.

⁷Yhangmoq gi, “Nga-nhúng, muk a yu chung é yanmai, haù su ga taí é nghut ri.” ga luí, taí lhum bum akô nghut ri.

⁸Yhangmoq haù su taí lhùm nyi kô é lé Yesuq sé jáng, yhangmoq lé, “Lumjúng myit shaù é bang ê, muk a bo é hkyô lé, haí mù taí lhùm nyi akô lúhú? ⁹Ahkuí jé shoq, nungmoq gi, a sê gyo shi kó lúhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, ¹⁰muk

nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myit bun kó lúhú? ¹¹Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pê é múnchi lé koi pyám keq nghut taí é ru nghut lhê.” ga taí ri. ¹²Haù hkûn sheq, Yhang taí é gi, muk má chung é múnchi lé koi pyám rã matú taí é a nghut e za, Hparishe pé eq Saduke pê é mhoshit hkyô lé koi pyám rã matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô*Mrk 8:27-30; Luk 9:18-21*

¹³Yesuq gi, Kesare-Hpilipi wà mó nâm mà é mau má jé é hkûn, Yhâng é chángzô pé lé, “Haù Byu Yhangzo gi, ó yuq nghut lhê ga, byu pé taí akô lúhú?” ga myí ri.

¹⁴Haù hkûn, yhangmoq gi, “Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotú myiqhtoi rayuq yuq nghut ri ga, taí akô.” ga tũ taí kôjáng, ¹⁵Yhang gi, “Haù jáng, nungmoq gi, Ngo lé ó yuq nghut lhê nghu akô lúhú?” ga, yhangmoq lé xoq myí ri.

¹⁶Haù hkûn, Simun Petruq gi, “Nàng gi, rû dui nyi é Garai Gasâng é Yhangzo, Hkrisduq nghut ri.” ga tũ taí ri.

¹⁷Haù mù, Yesuq tũ taí é gi, “Yonaq é yhangzo Simun ê, nàng gi, hkungsô wó nyi ri; hkâsu mù gà le, nang lé haù hkyô tân shit é gi, byù mai a nghut, mauhkúng htoq má nyi é Ngá é Êwa mai tân shit é ru nghut lhê. ¹⁸Ngò, nang lé taí lé, nàng gi, Petruq^f nghut luí, luq-gok shí má, Ngò, Ngá é noqkuq hpúng lé xuq to rã nghut mù, haù moming hkúmdong pé gi, hpúng haù lé wó ùng rã a nghut. ¹⁹Mauhkúng mingdán é zoqshi pé lé, Ngò, nang lé ap byi rã nghut lhê;

^f16:18 Grik đồng Petruq gà é gi, luqgok lé gà é nghut lhê.

myigùng htoq má, nàng tuí to má tuí to lé, mauhkùng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkùng htoq má le, lhoq lhut byi râ nghut lhê.” gâ ri. ²⁰Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkùm kat ri.

**Yesuq Gi, Yhang Shí Râ
Lé Hí Te Taí É Hkyô**

Mrk 8:31—9:1; Luk 9:22-27

²¹Yesuq gi, Yhang Yerusalem wà mó má ló mù, suwún wuí, hkyangjong agyi pé eq tará sará pê é loq má, zing-rí é myo myo hui zo luí, sat pyâm é hui ra râ nghut kôle, sum nyí nghû râ buinyí má, lhoq toq yu é hui râ nghut é hkyô lé, haú hkùn mai, Yhâng é chángzô pé lé taí kyo hi ló bê nghut ri.

²²Haú mù, Petruq gi, Yhang lé rahkyam shut shuí htoq yú mù, “Yhumsing ê, haú hkyô Náng chyáng hkâ-nhám le a dut sháng gaq.” ga Yhang lé tân ri.

²³Yesuq gi, lhing wú kat mù, Petruq lé, “Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri.” ga taí ri.

²⁴Hau htâng, Yhang gi, Yhâng é chángzô pé lé, “Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzìng lé waq chùng luí, cháng ra râ nghut lhê. ²⁵Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yú râ nghut lhê. ²⁶Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lúh? Byù gi, yhumsing é asak woi-nyí lé, hai èq wó htaí yù râ lúh? ²⁷Haú Byu Yhangzo gi,

Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkùn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê. ²⁸Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shí kó râ a nghut.” ga taí ri.

Yesuq, Isâm Htaí Lo É Hkyô

Mrk 9:2-13; Luk 9:28-36

17 Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chùng mù, yhangmoq baú myhang é bùm ralhum má doq ló akò. ²Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. ³Haú hkùn jáng, Mosheq eq Eliyaq gi, yhangmoq é hí má htoq shit mù, Yesuq eq dǎng nyo lhùm nyi akò.

⁴Haú mù, Petruq gi, Yesuq lé, “Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá.” ga taí ri.

⁵Petruq dang ru taí nyi ashí le, duqbó é mhut gi, yhangmoq lé htup zìng lô mù, mhut hkaú mai htoq lo é htê gi, “Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq.” gâ ri.

⁶Haú su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri. ⁷Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, “Toq keq, hkâgyuq kó.” ga taí ri. ⁸Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹Bùm mai taù gyó lô kô é hkûn, Yesuq gi, “Ahkuí nungmoq myang é hkyô lé, haù Byu Yhangzo shi é mai lhoq dui toq yu é a hui hui gi, ó lé le hkâtaí kyo kó.” ga, yhangmoq lé taí hkûm tô ri.

¹⁰Haù jáng, chángzô pé gi, “Eliyaq hí lé ra râ nghut lhê ga, tarâ sará pé haí mù taí kô é lhú?” ga, Yesuq lé myí akô.

¹¹Haù hkûn, Yesuq gi, “Eliyaq hí lé luí, lhunglháng lé hen lajàng to râ gâ é gi, têng lhê. ¹²Nghut kôllhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haù eq rajung za, haù Byu Yhangzo le, yhangmoq é loq má hpuzo râ nghut lhê.” ga tú taí ri. ¹³Haù hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haù chángzô pé sê gyô akô nghut ri.

Nat Wang Júng Sû Lé Lhoq Gê Byí É Hkyô

Mrk 9:14-32; Luk 9:37-45

¹⁴Yhangmoq, byù moq mó pé chyáng dum taù jé lô kô é hkûn, byù rayuq gi, Yesuq chyáng lé jé mù, hkyihput htuoq luí, ¹⁵“Yhumsing ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaù nyi ri. My-ihkyóm má le, wuì má le, anum num lêng wàng wàng dut nyi ri. ¹⁶Yhang lé, Náng é chángzô pê chyáng shuí ê kôllhang, yhangmoq a wó lhoq gê byi kó nghut ri.” ga taí ri.

¹⁷Haù mù, Yesuq gi, “Lumjúng myit a bo é eq agè ashop é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haù lé, Ngá chyáng shuí lé lô keq.” ga tú taí kat ri. ¹⁸Yesuq gi, nat gang lé tân kat jáng, nat gang haù gi, yuqgè zo haù yuq chyáng mai htoq lô byuq bê nghut mù,

haù hkûn jáng, yuqgè zo haù gi, ge byuq bê nghut ri.

¹⁹Hau htàng, chángzô pé gi, ó a nyi é u má, Yesuq chyáng lé lô kômù, “Ng-amoq gi, haí mù, nat haù lé a wó hkat htoq é lhú?” ga, lé myi kôjáng, ²⁰Yhang gi, “Nungmoq é lumjúng myit shaù é yan-mai nghut ri. Ngò, nungmoq lé teng za taí kôlé, nungmoq é lumjúng myit angshi cham í za hkâllháng bò kô é nghut le gi, bùm shí lé, ‘Hé shut htot lô aq.’ ga taí le, htot râ nghut lhê. Nungmoq a wó kut é haí lháng joq râ a nghut. ²¹Shí jung gi, kyúdung é eq zoshuq gám é dông za a nghut jáng, a htoq lô é nghut lhê.”[§] ga dum tú taí ri.

²²Yhangmoq, Galile mau má rahá zup nyi kô é hkûn, Yesuq gi, yhangmoq lé, “Haù Byu Yhangzo gi, byu pé é loq má ap pyâm é hui zo râ nghut lhê. ²³Haù bang gi, Yhang lé sat pyám kó râ nghut lhê; nghut kôllhang, Yhang gi, shi é htàng sum nyí nghú râ nyí má lhoq dui toq é hui râ nghut lhê.” ga taí ri. Haù mù, haù chángzô pé gi, gyai yhang gyô yón nyi bekô nghut ri.

Noqkuq Yhúm Hkansê Kat É Hkyô

²⁴Yesuq eq Yhâng é chángzô pé gi, Kaperna-um wà má jé kô é hkûn, no-qkuq yhúm hkansê hkyuì bang gi, Petruq chyáng lé jé kômù, “Nungmoq é sará gi, noqkuq yhúm hkansê a kat lhú?” ga myí akô.

²⁵Petruq gi, “Kat lhê.” ga tú taí ri.

Hau htàng, Petruq yhúmhaù má wang lô le, Yesuq hí lhom taí é gi, “Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lhú? Yhumsing byu pé chyáng mai lhú? Haù a nghut jáng, góbâng chyáng mai lhú? Nàng, hkâsu wó myit lhê lhú?” gâ ri.

[§]17:21 Chyumbun shí gi, chyúmding myo myo má a bo é nghut lhê.

²⁶ Haù mù, Petruq gi, “Góbâng chyáng mai nghut ri.” ga tù tái jáng, Yesuq gi, “Haù su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lãng há kat jáng, ngùn htingchap rachap lé myàng rà nghut lhê. Haù lé yù mù, Ngá é matú eq náng é matú, yhangmoq lé ló byi aq.” ga taí ri.

Kô Dik Sù Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48; 17:1-2

18 Haù hkûn, haù chángzô pé gi, Yesuq chyáng lé jé kômù, “Mauhkûng mingdán má, kô dik sù gi, ó yuq nghut lhê lhú?” ga myi akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí, ³ taí é gi, “Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhám le wó wãng kó rá a nghut. ⁴ Haù mù, zoshâng zo shí yuq su, yhumsing é i-myit wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjîng é zoshâng wuí mà é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè rà nghut lhê.

⁷ Haù mingkan gi, byu pé lé mara kut shut nhâng jang joq é yanmai, dingnyé wó ri. Haù mara kut shut nhâng hkyô gi, htoq lugù bê; nghut kôlhang, haù lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang

lé mara kut shut nhang é nghut le gi, haù lé hpyit dú pyám aq. Ahtum abyuq é myi má, hkyi hkúm loq hkúm gù dú hkyô pyâm é hui rà htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjî èq, nang lé mara kut shut nhang é nghut le gi, haù lé lap choq yù mù, dú pyám aq; myoqjî í jí dap gù ngaraí myi má dú hkyô pyâm é hui rà htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wuí mà é rayuq lé lhang a wú tiq rà matú, sidiq nyi keq. Hkâsu mù gâ le, Ngò, nungmoq lé tái kôlé, mauhkûng mà é yhangmoq é mau-mang lagyô pé gi, mauhkûng htoq mà é Ngá Wá é myoqdong lé, hkâ-nhám le myang nyi akô. ¹¹ (Hkâsu mù gâ le, haù Byu Yhangzo gi, byuq byuq bê bang lé hkyi yù rà matú, jé lé é nghut lhê.)**

¹² Byù rayuq gi, sau rashô du wó é nghu sháng, sau haù gù mà é radu byuq byuq é nghut jáng, haù gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi rà lhú? Haù lé, nungmoq hkâsu wó myit ngam akô lhú? ¹³ Ngò, nungmoq lé teng za taí kôlé, yhang gi, haù byuq byuq é sau haù lé myang ho é hkûn, a lám byuq é sau gaú xe gaú dû é matú gabú é htoq má, haù dû matú je riyhang gabú ri. ¹⁴ Haù eq rajung za, mauhkûng htoq mà é nungmoq é Íwa gi, shí tiq bang mà é rayuq htên byoq byuq rà lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng

**18:11 Bun zo shí gi, chyúmding myo myo má a bo é nghut lhê.

ê mù, nungnhik baú za nghut é hkûn, yhang é mara lé tân shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri. ¹⁶Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lôm jáng, wó lhoq teng sháng gaq.^b gâ tô é eq rajung za, nàng, gotû byû ra-í yuq lé shuí chùng aq. ¹⁷Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpúng é dang lé le a gyô é nghut jáng, yhang lé, a lumjín é byû rayuq dông le, kang guq sù rayuq dông le sôn pyám aq.

¹⁸Ngò, nungmoq lé teng za tái kôlé, myigùng htoq má, nungmoq tuí to má tuí to lé, mauhkûng htoq má le, tuí to rã nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi rã nghut lhê.

¹⁹Ngò, nungmoq lé dum tái kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú nhik lé gyo byi rã nghut lhê. ²⁰Hkâsu mù gâ le, Ngá myíng lé lang luí, í yuq sum yuq zup zing é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nhikmyin A Sê É Jùn Hpô É Dangtú

²¹Haú hkûn, Petruq gi, Yesuq chyáng huí ê mù, "Yhumsing ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rã lhú? Nyhit dâm jé shoq hkyut byi ra rã lhí?" ga myí ri.

²²Haú jáng, Yesuq tû tái é gi, "Ngò, nang lé tái lé, nyhit dâm za a nghut, nyhit xe nyhit tú dâm hkyut byi rã lhê.

²³Mauhkûng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri. ²⁴Yhang gi, jihpán lé jep hi ló é u lé, yhang chyáng ngùn wan myo myo chyín dap to sù lé shuí lé lo akô. ²⁵Haú yhumsing hpó gi, haú yuq chyín a wó xap é yanmai, chyín wó yû rã matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám rã hkunmó hkyô kat ri.

²⁶Haú mù, dui-nhâng zoshâng haú yuq gi, yhang é hí má hkyihput htuq luí, 'Ngo lé myit hing byi shi laq; banshoq lé, ngò xap rã.' ga dúng tôngbán ri. ²⁷Haú dui-nhâng zoshâng é yhumsing hpó gi, haú yuq lé wú shogyo luí, chyín banshoq lhut pyám byi mù, nhang kat ri.

²⁸Nghut kôlhang, dui-nhâng zoshâng haú gi, htoq ló mù, yhang lé, denari^{††} rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga tái ri.

²⁹Haú hkûn, yhang é luzúm dui-nhâng zoshâng haú gi, yhang é hí má hkyihput htuq luí, 'Ngo lé myit hing byi shi laq; ngò xap rã.' ga dúng tôngbán ri.

³⁰Nghut kôlhang, yhang gi, a gyo byí e za, yhang é chyín dum wó xap é hkûn jé shoq, haú yuq lé htóng hkyô pyám nhâng ri. ³¹Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí, yhangmoq é yhumsing hpó lé, haú hkyô banshoq ló tái kyô akô.

³²Haú mù, haú yhumsing hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lhê mhaí. ³³Haú su é nhing, ngò, nang lé shogyô yu é su, náng é luzúm dui-nhâng zoshâng lé, nàng ge

^{††}18:28 Denari rachap gi, ra-nyí lhê é byû rayuq é zuihpau eq wuí ri.

^b18:16 Tarã Pun 19:15

shogyô yu lhê a nghut lú?' ga tái luí, ³⁴ yang gi, nhikjum yo mù, yhang é chyín ban xap é hkún jé shoq, jamjau hui zo rã matú, yang lé, htóng suwún pé chyáng ap byí pyám bè nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkúng htoq tsáng myhâng mã é Ngá Wa le, nungmoq lé haú dông kut rã nghut lhê." ga ri.

Myi Làng Gâng É Hkyô

Mrk 10:1-12

19 Yesuq gi, mhoqshit é dang haú pé lé ban tái jáng, Galile mau mai htoq ló mù, Yodan làng tũ tap mã é Yuda mau mã ê jé ri. ² Byù moq mó gi, Yhâng htâng cháng kô é nghut mù, Yhang gi, haú bang mã é nõhpyo hui bang lé, haú má lhoq gê byí ri.

³ Haú hkún, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yangmyi lé lhoq kâng pyâm le, tarã wang lhê lú?" ga myí akô.

⁴ Haú jáng, Yhang tũ tái é gi, "A-nham sâng-hi lé, Hpân Sũ, 'byu hpan é hkún, yuqgè eq myiwe lé hpan é nghut lhê."^c

⁵ 'Hau é yanmai, yuqgè gi, yhumsing é ìnu ìwã chyáng mai htoq luí, yangmyi eq rahá rading ralhum za kut nyí mù, yangnhik gi, gungsho ralhum za dut byuq kó rã nghut lhê."^d ga kã tô é lé, nungmoq a nghap wú kó lú? ⁶ Haú mù luí, yangnhik gi, í yuq a nghut lô e za, rayuq za dut bè nghut ri. Haú mù luí, Garai Gasang lhoq tsúm tô é lé, byù gi, a lhoq kang sháng gaq." ga ri.

⁷ Haú hkún, yangmoq gi, "Haú lé nhing, yuqgè rayuq gi, lhoq kang laiká za ká byi mù, yangmyi lé wó nhang pyâm lhê ga, haí mù, Mosheq, hkunmó hkyô tô lhê lú?" ga, Yhang lé dum taũ myí akô.

⁸ Haú mù, Yesuq gi, "A-nham sâng-hi mai gi, haú dông a nghut. Nghut kôhang, nungmoq é myit nhikhum htân kô é yanmai, nungmoq é yangmyi pé lé lhoq kang rã ahkáng, Mosheq byí tô é ru nghut lhê. ⁹ Ngò, nungmoq lé tái kôlé, sulàng lú é za a nghut jáng, yhumsing é yangmyi lé kâng pyám mù, myiwe gotũ dum hâng yu é sũ ó yuq nghut kôle, sumyi lú é sũ dut bè." ga, yangmoq lé dum tũ tái ri.

¹⁰ Haú hkún, haú chángzô pé gi, "Myi làng hkyô mã haú dông ru nghut le gi, a yu le lhang je ge nyo ri." ga tái akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm rã jeju wó é bang za sheq, wó hap yu é nghut lhê. ¹² Byù ra-am gi, ìnu unghkaũ mai yang, yuqgè a jé gũ hku lé lo é bang nghut akô; ra-am gi, góbang èq kut é yanmai, yuqgè a jé dut byuq akô; ra-am nghut jáng, mauhkúng mingdán é matú, yuqgè a jé rã dông kut yu pyâm akô nghut ri. Shí hkyô lé wó hap yũ sũ gi, hap yũ sháng gaq." ga dum tái ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq mã loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkún akô nghut ri.

¹⁴ Nghut kôhang, Yesuq gi, "Haú zoshâng wui lé, Ngá chyáng lé nhâng keq; yangmoq lé hkâhkúm zing to kó; hkâsu mù gã le, mauhkúng mingdán gi, haú sũ é bâng é mingdán ru nghut lhê." ga tái kat ri. ¹⁵ Yhang gi, zoshâng wui htoq mã loq ke shimân byi mù, haú jowô mai htoq ló bè nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, “Sarâ ê, ahtum abyuq é asak wó yû râ matú, ge é muzó haí kut ra râ lhú?” ga myí ri.

¹⁷ Haù jáng, Yesuq gi, “Ge é hkyô eq séng luí, haí mù Ngo lé myí lhê lhú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq.” ga tû taí ri.

¹⁸ Haù yuq gi, “Hká gû lé lhú?” ga dum myi jáng, Yesuq gi, “Byù hkâsat, su-myi hkâlú, hkâhkau, a teng a mán é saksé hkâhkám, ¹⁹ nángnu nánngwa lé hkungga aq,^e ga le, ‘náng gûng lé nàng chyitdap e su, náng é chyangnâm mâ é bang lé le chyitdap aq.’^f ga le bo tô ri.” ga taí kat ri.

²⁰ Haù hkûn, zorâm hpó haù gi, “Haù pé banshoq lé, ngò cháng bê nghut lhê; haí kut râ ashí lhú?” ga dum taù myí ri.

²¹ Yesuq gi, “Nàng, gumjup sù dut nau le gi, ló mù, nàng wó é sutzè pé lé ùng pyám luí, myùng bang lé byí pyám aq; haù jáng, nàng, mauhkûng htoq má sutzè wó râ nghut lhê; haù mù, Ngá htâng lé cháng aq.” ga tû taí ri.

²² Zorâm hpó haù gi, sutzè gyai wó sù nghut é yanmai, dang haù lé wó gyo jáng, gyai yhang myit a ngón é èq ló byuq bê nghut ri.

²³ Hau htâng, Yesuq gi, Yhâng é chángzô pé lé, “Ngò, nungmoq lé teng za taí kôlé, sutzè wó bang gi, mauhkûng mingdán wó wàng râ gyai yhang wuí ri.

²⁴ Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê.” ga taí ri.

²⁵ Haù chángzô pé gi, haù su gâ é lé wó gyo kôjáng, haù ru nghut le gi, ó yuq

za hkyi yu é hui râ nghut lhê lhú?” ga Yhang lé myí akô nghut ri.

²⁶ Haù hkûn, Yesuq gi, yhangmoq lé wú kat mù, “Haù hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê.” ga taí ri.

²⁷ Haù hkûn, Petruq gi, Yhang lé, “Ng-amoq gi, wó é gû lhunglhang lé tô pyâm to luí, Náng htâng cháng bê nghut lhê. Ngamoq, haí wá wó râ nghut lhê lhú?” ga myí kat ri.

²⁸ Haù mù, Yesuq tû taí é gi, “Ngò, nungmoq lé teng za taí kôlé, lhunglhang lé asik dum sai dut nhang é má, haù Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyú raxe í hú lé jéyáng kó râ nghut lhê. ²⁹ Ngá é yanmai, yhumsing é yhûm, nhiktâng wuí, înu îwa, zo dù wuí eq yò pé rajung jung lé tô pyâm tô é sù ó yuq nghut kôlé, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. ³⁰ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lhê.

Tsibiyiq Hkyâm Mû Zui Bang Lé Dangtú Yu É Hkyô

20 Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng râ langchyáng ê lûng râ ga, napsún noq le htoq e ló é hkyâm yhumsing eq du ri. ² Yhang gi, ranyí é matú denari rachap byi râ đông, haù bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³Napkyó gau hkyíng[‡] kô má, yhang gi, htoq e ló le, hai mù le a kut é za, gài má yap tô é bang ra-am lé ê myang ri. ⁴Haú mù, yhang gi, haú bang lé, 'Nungmoq le, ngá é hkyâm má mù ê zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekò nghut ri.

⁵Hau htâng, yhang gi, raxe í hkyíng má le, myinhâng sum hkyíng kô má le, dum htoq ê mù, haú eq rajung za langchyang pé ê lung kat ri. ⁶Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akò lhú?' ga myí jáng, ⁷haú bang gi, 'Ngamoq lé, ó yuq èq le a lùng kô é yanmai nghut lhê.' ga tũ taí akò.

Haú hkùn, yhang gi, 'Nungmoq le, ngá é hkyâm má mù ê zui keq.' ga taí ri.

⁸Myinhâng jé jáng, tsibiyiq hkyâm yhumsíng gi, yhâng é mù shuí u sù lé, 'Haú langchyang pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga taí ri.

⁹Myinhâng ngo hkyíng má mù wàng bang le, denari rachap chap wó yu bum akò. ¹⁰Haú mù, je hí má mù wàng bang gi, yhangmoq je myo wó nhò ngam akò. Nghut kôlhang, yhangmoq le, rayuq denari rachap chap za wó akò nghut ri.

¹¹Yhangmoq gi, haú myhó za wó yu bùm kô é yanmai, haú hkyâm yhumsíng lé, ¹²'Shí bang gi, je htâng má mù lé wâng mù, nayí rahkum za mù zui kôlhang, nàng gi, ra-nyí buigyùm chap bui htân yò má mù zuí é bang ngamoq eq rajung za byí ri.' ga mara hùn dang taí akò.

¹³Nghut kôlhang, haú hkyâm yhumsíng gi, haú bang má é rayuq lé, 'Buinùm

hpó ê, ngò, nang lé a tarâ é đông kut é a nghut. Denari rachap byi râ nghú, nàng eq ngò myit huí to bê a nghut lhú?

¹⁴Nàng wó âng é lé yu chùng mù, ló aq. Je htâng má mù lé wang é sù lé le, nang lé byí é myhó, ngò byí nau ri. ¹⁵Ngá é ngùn lé, ngò kut nau é su a ge kut lhú? Ngò, ge é kut le, nàng manòn ri lhú?' ga taí ri.

¹⁶Haú mù luí, htâng gyó nyí bang gi, hí bekò râ nghut mù, hí nghut nyí bang gi, htâng gyó byuq kó râ nghut lhê." ga ri.

Yesuq Gi, Yhang Shí Râ Hkyô Lé Dum Taí Ri

Mrk 10:32-34; Luk 18:31-34

¹⁷Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotú kut wut yù mù, ¹⁸"Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui râ nghut lhê; haú bang gi, Yhang lé, shí râ mara byi kó râ nghut é htoq agó, ¹⁹jóng pyâm é, nhuq bat é eq tapzîng má jén sat pyâm é hui râ matú, haú tûngbaù pê é loq má ap pyám kó râ nghut lhê. Nghut kôlhang, Yhang gi, sum nyí nghú râ buinyí má, lhoq dui toq é dum hui râ nghut lhê." ga taí ri.

Zô Nhik Matú Ânù Èq Dung Byí É Hkyô

Mrk 10:35-45

²⁰Hau htâng má, Zebedi é yhangzò nhiktang é yhângnu gi, yhangzò nhik eq rahá jé lé lô kômù, rajung dung râ matú, Yesuq é hí má hkyihput htuq nyi ri.

²¹Haú mù, Yesuq gi, "Nàng, haí ô nau ri lhú?" ga yhang lé myí jáng, yhang gi, "Náng é mingdán má, shí ngá zô nhiktâng lé, Náng é loqyò hkyam má rayuq,

[‡]20:3 Chyúmdang ra-am má, sum hkyíng ga chung tô é gi, Yudaq byu pê é ahkyíng nghut lhê. Yudaq byu pê é ahkyíng gi, napkyó hkyuq hkyíng mai nghap hi lhê.

loqpaí hkyam má rayuq kut, zùng râ ahkáng byi laq.” ga taí ri.

²² Haú hkûn, Yesuq gi, “Nungnhik haí dúng nyi é lé, nungnhik a sé kó nghut ri. Ngò shuq râ góm^f lé, nungnhik wó shuq kó râ lhú?” ga myi jáng, yhangnhik tâng gi, “Wó shuq lhê.” ga tũ taí akô nghut ri.

²³ Haú mù, Yesuq gi, yhangnhik lé, “Ngò shuq râ góm lé, nungnhik shuq râ kó râ za nghut lhê. Nghut kôlhang, Ngá é loyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê.” ga taí ri.

²⁴ Gotũ chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri. ²⁵ Haú mù, Yesuq gi, yhangmoq banshoq bang lé wut tsing yù luí, “Túngbaù pé lé uphkan é ga bang gi, túngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shíhtaí gunglik hkungga đông, Yhâng é asak lé byi pyám râ matú sheq, jé lé é ru nghut é su, ²⁷ nungmoq má, byù mó dut naù sũ ó yuq nghut kôle, nungmoq é dui-nhâng zoshâng dut ra râ nghut lhê. ²⁸ Hau htoq agó, nungmoq má ushuq dut naù sũ ó yuq nghut kôle, nungmoq é jùn dut ra râ nghut lhê.” ga taí ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má

châng e ló bum akô. ³⁰ Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, “Dawiq é Yhangzo, Yhumsing ê, ngá-nhik lé shogyô yù laq ô!” ga, wut garũ kat akô nghut ri.

³¹ Byù moq mó gi, yhangnhik zím byuq râ matú tân hkúm kôlhang, yhangnhik gi, “Dawiq é Yhangzo, Yhumsing ê, ngá-nhik lé shogyô yù laq ô!” ga, je riyhang htê mó eq wut garũ kat akô nghut ri.

³² Haú mù, Yesuq gi, yap kat mù, “Ngò, nungnhik lé haí kut byi râ ô nau akô lhú?” ga, yhangnhik lé wut myí kat ri.

³³ Haú hkûn, yhangnhik gi, “Yhumsing ê, ngá-nhik myoq myàng nau ri.” ga tũ taí akô.

³⁴ Yesuq gi, yhangnhik lé wú shogyô luí, yhangnhik é myoqjí má ê záng byí ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

Yesuq, Yerusalem Wà Mó Má Wang E Ló É Hkyô

*Mrk 11:1-11; Luk
19:28-38; Yhn 12:12-19*

21 Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, ² “Nungnhik, hí mâ é wà má ê keq; wà haú má, logúng zing radu lé, logúng zo eq rahá tuí to lán é lé, ê myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, ‘Shí í du lé, haú Yhumsing chùng râ ri.’ gâ nghũ tũ taí keq; haú jáng, yhang, radá dâm nhâng byi râ nghut lhê.” ga Yesuq taí luí, nhang kat ri.

^f20:22 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

⁴Haû gi, myiqhtoi dang lhoq dik râ matú dut lo é nghut ri. ⁵Myiqhtoi dang haû gi,

“Zi-un byizo^{§§} lé, shî su nghû keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.”^g gâ ri.

⁶Haû chángzô nhik gi, e lô mù, Yesuq taî kat é eq rajung za ê kut bekô nghut ri. ⁷Yhangnhik gi, logúng me lé she lò mù, yhangnhik é buhîng pé lé, haû logúng mê é htoq má ke byi kôjáng, Yesuq gi, doq jî ri. ⁸Byù moq mó má é myo myo gi, yhangmoq é buhîng lé, hkyô má hkyut hkang byî akô; ra-am gi, mhandíng pé lé zân hkyô yù mù, hkyô má hkang byî akô nghut ri. ⁹Yhâng é hí má htâng má châng sô nyi bum é bang gi,

“Dawiq é Yhangzo gi, hosana* nghut nyî sháng gaq ô!”

“Haû Yhumsing é myîng mai jé lé lô Sû gi, hkungsô wó nyî sháng gaq ô!”^h

“Htoq tsáng myhâng má, hosana nghut nyî sháng gaq ô!”

ga luî, taî garú bum akô nghut ri.

¹⁰Yesuq, Yerusalem và mó má wang lô é hkûn, rawà gón é bang gi, gabyông lo bùm kômù, “Shí yuq gi, ó wá nghut lhê lhà?” ga luî, myi lhùm bum akô.

¹¹Haû hkûn, byù moq mó gi, “Shí yuq gi, Galile mau, Nazaret và byù Yesuq gâ é myiqhtoi nghut lhê.” ga taî akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

¹²Yesuq gi, noqkuq yhûm má wang ê mù, haû má é zè ung zè wùi kut nyi é bang banshoq lé, hkat htoq pyâm luî, ngùn htaí zo bâng é siboí pé eq hpûngkyui ung zo bâng é tanghkuq pé lé, tu mhuq pyâm byî ri. ¹³Haû hkûn, Yhang gi, “Ngá yhûm gi, kyûdung yhûm ga râ nghut lhê.”ⁱ ga kâ to kôlhang, nungmoq gi, jowò shî lé 'damaq hkyûng'^j kut nyi akô.” ga, yhangmoq lé taî ri.

¹⁴Yesuq, noqkuq yhûm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haû bang lé lhom lhoq gê byî ri. ¹⁵Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, “Dawiq é Yhangzo gi, hosana nghut sháng gaq.” ga, noqkuq yhûm má zoshâng wùi garú nyi bùm kô é lé le, myàng kôjáng, wú nhik-yô bum akô nghut ri.

¹⁶Haû mù, yhangmoq gi, “Zoshâng shí bang haî taî nyi kô é lé, Nàng wó gyô lhê lú?” ga, Yesuq lé myi kôjáng, Yhang gi, “Wó gyô ri. Nungmoq gi,

‘Zoshâng wùi eq nyheqnú pê é nhut mai hkyá-on kungtôn râ matú, nàng la-jâng to bê nghut ri.’^k

ga kâ tô é lé, Chyúmdang má a nghap wú kó lú?” ga yhangmoq lé taî ri.

¹⁷Hau htâng má, Yhang gi, haû bang lé nyhi to luî, và hkaû mai htoq lô mù, Behtani và má ê jé luî, haû myîn, haû má bíng yu ri.

^{§§}21:5 Zi-un byizo gâ é lichyúm gi, Yerusalem byu pé gâ é nghut lhê.

*21:9 Hebre dang má, hosana gâ é gi, “ahkuí hkyi yù laq” gâ é nghut lhê. Nghut kôlhang, bun zo 9 má gi, hkyá-on dang đông chung é nghut lhê.

^g21:5 Zhk 9:9 ^h21:9 Hkyá-on 118:26 ⁱ21:13 Esai 56:7 ^j21:13 Yer 7:11

^k21:16 Hkyá-on 8:2

**Maih páng Gâm Nyhuí
Kyuq Shi Byuq É Hkyô**

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú ló é hkûn, hkyô má zòmut hui bê nghut ri.

¹⁹ Haú mù, Yhang gi, hkyô yàm má yuq tô é mailhpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, “Nàng má, hkâ-nhám le ashí a zui sháng gaq.” ga taí kat ri. Haú hkûn jáng, agâm haú gi, nyhuí kyuoq shi ló byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, “Maih páng gâm shí gi, haí mù haú-í hân nyhuí kyuoq shi ló lhê lhà?” ga myí akô.

²¹ Yesuq gi, “Ngò, nungmoq lé teng za taí kôlé, nungmoq, úng-âng é myit a bo é za, lumjáng kô é nghut le gi, mailhpáng gâm má Ngò kut é muzó lé, nungmoq wó kut kó rã nghut é htoq agó, bùm shí lé, 'Htòt mù, wuimau má ló gyó wàng aq.' ga taí jáng, taí é eq rajung za dut rã nghut lhê. ²² Nungmoq, lumjáng myit èq dung kô é nghut jáng, haí dúng le le wó yú kó rã nghut lhê.” ga tú taí ri.

**Yesuq É Ahkáng Ayá Lé
Myí Chyam É Hkyô**

Mrk 11:27-33; Luk 20:1-8

²³ Yesuq gi, noqkuq yhúm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuí gi, Yhâng chyáng lé jé kômù, “Hai ahko ahkâng èq, Nàng, shí pé lé kut nyi lhê lú? Ahko ahkáng shí, Nàng lé ó yuq byí é lú?” ga myí akô.

²⁴ Haú hkûn, Yesuq gi, “Ngò le, nungmoq lé rajung myí wú kôlé, nungmoq wó tú taí kô é nghut jáng, hai ahko ahkâng èq, Ngò, shí pé kut é hkyô lé taí kyo rã nghut lhê. ²⁵ Yohan byí é baptisma gi, ó yuq é ahko ahkáng mai nghut lhê lú?

Mauhkûng mai lú? A nghut jáng, byu chyáng mai lú?” ga taú myí kat ri.

Haú hkûn, yhangmoq, chòm hpyé lhum kô é gi, “Mauhkûng mai nghut lhê.' nghú, nga-nhúng taí jáng le, 'Haú nghut le nhing, haí mù, yhang lé a lumjáng kô é lú?’ ga rã nghut; ²⁶ 'Byu chyáng mai nghut lhê.' nghú jáng le, yhangmoq lhunglhang bang gi, Yohan lé, myiqhtoi rayuq ga lumjáng bùm kô é nghut lhê yanmai, haú bang lé, nga-nhúng gyuoq rã lhê nghut.” gâ akô.

²⁷ Haú mù, yhangmoq gi, Yesuq lé, “Ngamoq a sé.” ga tú taí akô.

Haú hkûn, Yesuq gi, “Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo.” ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, “Nungmoq hkâsu wó myit akô lú? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí tsibiyiq hkyâm má mù ê zui aq.' ga taí jáng, ²⁹ yuqzo haú gi, 'Ngò a kâm ê.' ga tú taí ri; nghut kôlhang, htâng má, yhang gi, myit dum lhing mù, ê bê nghut ri.

³⁰ Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haú gi, 'Ê rã, âwa!' ga yín yú kôlhang, a ê kut ri.

³¹ Haú nhiktâng mà é hká yuq sheq, yhângwa ô nau é hkyô lé kut sù nghut ri lú?” gâ ri.

Haú hkûn, yhangmoq gi, “Ko sù nghut ri.” ga tú taí akô.

Haú mù, Yesuq gi, yhangmoq lé, “Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kó rã nghut lhê.

³² Hkâsu mù gâ le, Yohan gi, nungmoq chyáng lé jé mù, dingmán hkyô lé tún shit kôlhang, nungmoq gi, yhang lé a jing kut akô nghut ri; nghut kôlhang,

haû kang guq bang eq shiwa myhî pé gi, yhang dang lé jing akô nghut ri. Nungmoq gi, haû hkyô lé myang é nghut kôlhang, myit a lêng kô é htoq agô, yhang lé a lumjing shi kô nghut ri.

**Tsibiyiq Hkyâm Saí
Bang Lé Dangtú Yu É Hkyô**

Mrk 12:1-12; Luk 20:9-19

³³Gotû dangtú lé gyô wú shi keq; hkyâm yhumsing rayuq gi, tsibiyiq hkyâm ralhüm saí to mù, lêngkhuyq kyâm to luí, tsibiyiq wing pyik htoq rá dongkong dù to mù, machya ralhüm saí tô ri. Hau htang, yhang gi, hkyâm haú lé, hkyâm saí zo bang chyáng ngho byí to mù, gó ming shut e ló byuq bê nghut ri. ³⁴Kyôshu yoq jé jáng, yhang gi, yhang eq sêng é tsibiyiq shi ê yú rá matú, yhang é dui-nhang zoshang wuì lé, haû hkyâm saí zo bang chyáng nhang kat ri.

³⁵Haû hkyâm saí zo bang gi, dui-nhang zoshang wuì lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri. ³⁶Hau htang má, yhang gi, hí dam lhê htoq je myo shoq gotû dui-nhang zoshang wuì lé dum nhang kat le le, haû hkyâm saí zo bang gi, hí lhê bang lé su lhom dum kut akô nghut ri. ³⁷Ló htang má, yhang gi, 'Ngá zo lé gi, yhangmoq lhom hkungga kô rá nghut lhê.' ga, yhang zo lé, haû bang chyáng nhang kat ri.

³⁸Nghut kôlhang, haû hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yú rá sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq taí lhum bum akô nghut

ri. ³⁹Haû mù, yhangmoq gi, yhang lé, chyup yú luí, hkyâm shinggan shut dú htoq kômù, sat pyám bekô nghut ri.

⁴⁰Haû mù luí, tsibiyiq hkyâm yhumsing lé jé é hkún lé, haû hkyâm saí zo bang lé hkâsu kut nhô ngam akô lhú?" ga Yesuq myí ri.

⁴¹Haû hkún, haû hkyangjong agyi pé eq suwún wuì gi, "Haû agê ashop bang lé gi, agê ashop é đông sat pyám rá nghut lhê. Haû tsibiyiq hkyâm lé gi, kyô shu yoq má, yhang é gambùm lé byi rá bang lé, htot ngho byí pyám rá nghut lhê." ga, tú taí akô nghut ri.

⁴²Haû jáng, Yesuq dum taí é gi, "Chyúmdang má,

'Yhüm saí bang èq hkyin htoq pyám é luqgok gi, htungchyún mã é ahkyak dik é luqgok dut bê.

Shí hkyô gi, haû Yhumsing kut é nghut luí, nga-nhung é myoq hí má mauhpo dut bê nghut ri.¹

ga bo tô é lé, nungmoq a nghap wú kô lhú?

⁴³Haû mù, Ngò, nungmoq lé taí kôlé, Garai Gasang é mingdán lé, nungmoq chyáng mai yú mù, hau é ashi wó zui rá byuhú lé byí pyám rá nghut lhê. ⁴⁴Luqgok haú má gyó záng é sù gi, gyuí gyop byuq rá nghut lhê. Luqgok hau èq gyó nhê záng é sù le, nhê pyeq pyám é hui rá nghut lhê." gâ ri.

⁴⁵Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶Haû mù, yhangmoq gi, Yhang lé chyup yú rá hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haû bang lé gyuq akô nghut ri.

¹21:42 Hkya-on 118:22-23

Myiháng Poí Dangtú Pé

Luk 14:15-24

22 Yesuq, dangtú pé đông yhang-moq lé dum taí é gi, ²“Mauhkúng mingdán gi, yhumsing yhangzô é matú myiháng poí hen lajâng to byí é hkohkâm rayuq eq du ri. ³Hkohkâm hpó haú gi, yhang ji tô é bang, haú poí má lé lò rà matú, yhâng é dui-nhâng zoshâng wuì lé ê tsing taí nhang ri; nghut kôlhang, haú bang gi, a lé kut akô nghut ri.

⁴Hau htâng má, yhang gi, gotú dui-nhâng zoshâng wuì lé, ‘Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poí má lé lò keq hkoì nghû, haú ji tô é bang lé ê taí keq.’ ga pyîng luí, nhang kat ri.

⁵Nghut kôlhang, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri. ⁶Ra-am dum nghut jáng, yhâng é dui-nhâng zoshâng wuì lé lhom chyup yû kômù, nhuq bat luí, sat pyám byí akô nghut ri. ⁷Haú mù, hkohkâm gi, nhikjum yo luí, yhâng é gyezô pé lé, haú byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸Hau htâng má, yhang gi, yhâng é dui-nhâng zoshâng wuì lé, ‘Myiháng poí gi, rì rì nghut to bê; nghut kôlhang, haú ji to huí é bang gi, lé rà a gingdán kó nghut ri.

⁹Haú mù, hkyô kang pé má é luí, myang é yuq hkangmó lé, poí má lé rà matú é jî keq.’ ga taí ri. ¹⁰Haú jáng, dui-nhâng zoshâng haú bang gi, hkyô kang pé má htoq ê luí, myang é byù gè byù gang lhunglhang lé ji tsing yù kô é nghut mù, myiháng poí gi, bíng pé zung byíng bùm bê nghut ri.

¹¹Nghut kôlhang, bíng haú bang lé, hkohkâm hpó, lé wang wú é hkùn, my-

iháng poí wàng hking a wut tô é byù rayuq lé, yhang byu-myang ri. ¹²Haú mù, yhang gi, haú yuq lé, ‘Buinùm hpó ê, nàng gi, myiháng poí wàng hking le a wut é nhîng, shí má hkâsu kut wang lo é lhu?’ ga myi jáng, haú yuq gi, haí le a dat tú taí lo nghut ri.

¹³Haú hkùn, hkohkâm hpó gi, yhâng é dui-nhâng zoshâng wuì lé, ‘Yhâng é hkyî loq má tui luí, haú ngaubiyi ngaù nhap eq zuì kyik kyik shoq hpuzô nyì rà nghut é shinggan mauchut hkaú má, dú htoq pyám keq.’ gâ ri.

¹⁴Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaú ri.” gâ ri.

Kehtaq Lé Kang Kat Byí É Hkyô

Mrk 12:13-17; Luk 20:20-26

¹⁵Hau htâng má, Hparishe pé gi, htoq ló kômù, Yhâng é dang pé má mara chyup rà hpaqchyî dâ akô nghut ri.

¹⁶Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, “Sarâ ê, Nàng gi, tengmán sù nghut é eq, Garai Gasâng é hkyô lé, tengmán é đông mhooqshit é sù nghut é lé le, Nàng gi, ó haí ga rà lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷Haú mù, hkoséng Kehtaq lé kang kat byí le gi, ge lhê lhu? A gè lhu? Nàng, hkâsu wó myit é hkyô taí kyô wú aq.” ga taí akô nghut ri.

¹⁸Yesuq kúm gi, yhangmoq é agè ashop hkyô lé sé byi mù, “Gegùn labyoq kut bang ê, nungmoq gi, haí mù, Ngo lé lé chyam wú akô lhu? ¹⁹Kang kat rà ngùn htingchap rachap, Ngo lé byí wú keq.” ga taí kat ri. Haú hkùn, yhangmoq gi, denari rachap yù byí akô. ²⁰Haú mù, Yhang gi, yhangmoq lé, “Shí má, ó yuq é alhò eq masat laiká dap tô ri lhu?” ga myi jáng, ²¹yhangmoq gi, “Kehtaq é

nghut ri.” ga tũ taĩ akõ. Haũ mù, Yhang gi, yhangmoq lé, “Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq.” ga taĩ kat ri.

²² Haũ su gâ é lé, wó gyo kôjáng, haũ bang gi, maũ byuq kômù, Yhâng chyáng mai htoq ló byuq bekõ nghut ri.

**Saduke Pé, Yesuq Lé
Myĩ Chyam É Hkyô**

Mrk 12:18-27; Luk 20:27-40

²³ Haũ nyĩ má yhang, haũ dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myĩ akõ. ²⁴ Yhangmoq myi kô é gi, “Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taĩ tô é nghut lhê. ²⁵ Hí hpyang lé, ngamoq chyáng, gumang nhiktâng wuĩ nyhit yuq nyi akõ. Lagám yuq gi, myiwe yù luĩ, zo dù a dap é za yhangmyi lé shi lhuĩ pyâm to bê nghut ri. ²⁶ Haũ eq rajung za, Lanong, Lalaq mai Lahkâ jé shoq, chuimó haũ lé gon luĩ, ó le zo dù a dap é za shi ló byuq bùm bekõ nghut ri. ²⁷ Ló htáng má, myiwe myhĩ haũ le châng shi ló byuq bê nghut ri. ²⁸ Haũ mù luĩ, haũ dum dui toq é buinyi má, myiwe myhĩ haũ gi, haũ nhiktâng wuĩ nyhit yuq mã é hká yuq é yhangmyi nghut râ lú? Hkâsu mù gâ le, yhang gi, haũ nhiktâng wuĩ banshoq bâng é yhangmyi dut wú bê sũ nghut ri.” gâ akõ.

²⁹ Haũ hkũn, Yesuq gi, yhangmoq lé, “Nungmoq gi, Chyúmdang eq Garai Gasâng é wum-o a-tsam lé a sé kô é yan-mai, hkyô nghoq akõ nghut ri. ³⁰ Haũ dum dui toq é buinyi má gi, myi byi myi yũ hkyô joq lo râ a nghut; yhangmoq gi, mauhkúng htoq mã é maumang lagyô pé su dut byuq kó râ nghut lhê.

³¹ Shi é mai dum dui toq bang eq séng luĩ, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.^m ga, nungmoq lé taĩ tô é lé, nungmoq a ng-hap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê.” ga taĩ ri.

³³ Byù moq mó gi, dang haũ wó gyo kôjáng, Yhang mhoqshit é hkyô lé maũ byuq bum akõ nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zĩm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zĩng lé bum akõ. ³⁵ Yhangmoq má bo é tarâ sarâ rayuq gi, Yesuq lé chyam wú é dõng, ³⁶ “Sarâ ê, jep é tarâ má, hká lhum gi, je ahkyak dik lhê lú?” ga myĩ ri.

³⁷ Haũ mù, Yesuq gi, “Haũ Yhumsĩng náng é Garai Gasang lé, náng é myit nhiklhum banshoq, náng é asak woi-nyĩ lhum gón, nàng myit é hkyô banshoq èq, chyitdap râ lhê.ⁿ gâ é nghut lhê. ³⁸ Tarâ haũ gi, je hĩ lhum eq je ahkyak dik é lhum nghut lhê. ³⁹ Hau htang lhum le haũ eq du é nghut mù, 'Náng gũng lé nàng chyitdap é su, náng é chyangnâm mã é bang lé le chyitdap aq.^o gâ é nghut lhê. ⁴⁰ Tarâ haũ í lhum gi, jep é tarâ banshoq eq myiqhtoi laiká banshoq é dangchyung nghut lhê.” ga, yhang lé taĩ kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zĩng to kô é hkũn, Yesuq gi, yhangmoq lé, ⁴² “Nungmoq gi, Hkrisduq eq séng luĩ hkâsu myit ngam akõ lú? Yhang gi, ó yuq é yhangzo nghut lhê lú?” ga myi jáng, yhangmoq

gi, “Dawiq é yhangzo nghut ri.” ga tũ táí akô.

⁴³ Haũ mù, Yhang gi, yhangmoq lé, “Haũ hkũn, Dawiq gi, Woi-nyí dõng mai, Yhang lé, 'Yhumsing' ga, haũ mù wut lhê lhú? Hkâsu mù gâ le, Dawiq táí é gi,

⁴⁴ Haũ Yhumsing Garai gi, ngá é Yhumsing lé, “Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyì shi aq.” ga táí ri.^p

gâ ri. ⁴⁵ Haũ mù, Dawiq yhang lháng, Hkrisduq lé, 'Yhumsing' gâ é nghut le gi, yhangzo za hkâsu ge nghut rã lhú?” ga táí ri. ⁴⁶ Haũ mù, ó yuq le, dang rahkun lháng a wó tũ táí lo kô é nghut mù luí, haũ nyí mai, ó yuq lháng Yhang lé dan-gmyi a wám myi lo kô nghut ri.

Tarâ Sará Pé Eq Hparishe Pé Lé Sidiq Rã Hkyô

Mrk 12:38-40; Luk 11:37-52; 20:45-47

23 Hau htâng, Yesuq gi, byù moq mó eq Yhâng é chángzô pé lé táí é má, ² “Tarâ sará pé eq Hparishe pé gi, Mosheq é tanghkuq má zung akô. ³ Haũ mù, yhangmoq mhoqshit é hkyô chângjup lé, nungmoq châng kut ra kó rã nghut lhê. Nghut kôlhang, yhangmoq kut é dõng gi, hkâkut kó; hkâsu mù gâ le, yhangmoq gi, yhangmoq táí é dõng a kut kó nghut ri. ⁴ Yhangmoq gi, byu pê é goqsân má wòlai ke byi kôlhang, yhangmoq yhang gi, wò haũ pé lé bo waq rã matú, loqnyhui lháng a kãm lhoq tuí kô nghut ri.

⁵ Yhangmoq kut é hkyô lhunglháng gi, byu pé myàng rã matú za kut shit é nghut akô; haũ chyumbun bo é showuĩ-htung pé lé lhoq kô yù kômù, buhíng pé má é banbyaú pé lé lhoq hing yu akô nghut ri;

⁶ yhangmoq gi, poĩ pé má é réng é jowò pé eq tarajong pé má é ahkyak dik é zùng jang pé má, myang zùng rã lé ô nau nyi akô; ⁷ yhangmoq gi, gài pé má lhom shikyâm yù kó rã eq, byu pé mai, yhangmoq lé, 'Rabai'[†] ga lhom wut kó rã lé ô nau nyi bum akô.

⁸ Nungmoq kúm gi, 'Rabai' ga wut rã lé hkâ-ô nau kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹ Haũ mù, myidàm htoq má, ó yuq lé le, 'àwa' hkâ-nghũ kó; hkâsu mù gâ le, mauhkung htoq má é Íwa rayuq za, nungmoq é Íwa nghut lhê.

¹⁰ Hau htoq agó, 'sará' ga wut rã lé, hkâ-ô nau kó; hkâsu mù gâ le, Hkrisduq za, nungmoq é Sará nghut lhê. ¹¹ Nungmoq má é je gyaú sũ gi, nungmoq é dui-nhâng zoshâng dut rã nghut lhê. ¹² Hkâsu mù gâ le, yhumsing gùng lé waq toq sũ ó yuq nghut kôle, lhoq nyhum pyâm é hui rã nghut lhê, yhumsing gùng lé lhoq nyhũm sũ kúm gi, waq toq é hui rã nghut lhê.

¹³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pê hí má, mauhkung mingdán hkyô lé xaũ tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴ (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhũm-yò pé lé hpyoq zo hpyoq shuq é eq kyú híng híng dúng shit mhaũ é bang nghut akô; haũ mù, dam byí é je myo hui zo kó rã nghut lhê.)[‡]

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù

[†]23:7 Aramaik dang dõng *rabai* gâ é gi, sará gâ é lichyúm nghut lhê.

[‡]23:14 Chyúmding ra-am má gi, bun zo 14 shĩ a bo é nghut lhê.

rayuq lé nungmoq é noqkuq htûng má wó lhoq lhik yû râ matú, myì hkyô, wui hkyô, châng jón wún kômù, wó lhoq lhik yu é sù lé gi, nungmoq su ngaraí byù í tú shuí dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haí a ra, noqkuq yhûm mâ é hîng lé lang mù dakam é sù kúm gi, cháng ra bê.' ga lhaq taí akô. ¹⁷ Myoqjit é byù nâ pé ê! Haú hîng eq hîng lé lhoq yúnglhô é noqkuq yhûm gi, hká lhum je ahkyak lhê l hú? ¹⁸ Hau htoq agó, nungmoq gi, 'Haú hkungga gyap lé lang luí dakam é sù gi, haí a ra, nghut kôlhang, haú hkungga zè lé lang mù dakam é sù gi, cháng ra bê.' ga le, lhaq taí akô nghut ri. ¹⁹ Myoqjit pé ê! Haú hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê l hú? ²⁰ Haú mù, haú hkungga gyap lé lang luí dakam é sù gi, haú hkungga gyap eq hau é ah-toq má ke tô é zè banshoq lé lang luí dakam é sù dut bê nghut ri. ²¹ Noqkuq yhûm lé lang luí dakam é sù gi, haú noqkuq yhûm eq haú má nyi é Sù lé lang luí dakam é sù dut bê nghut ri. ²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byî nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uk lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ah-toq má wú yúng kôlhang, ahkaú má gi, mâng bup showui pé eq achau achyut é chângjup byíng tô é nghut ri. ²⁸ Haú eq rajung za, nungmoq gi, byu pê hí má, ah-toq pyâm dingmán é su kut shit kôlhang, ahkaú má gi, gegùn labyoq kut é eq agé ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoí pé é lup lé luptsuq tsuq kômù, dingmán bâng é lup pé lé mhón byi kôluí, ³⁰ Ngamoq gi, ngamoq é íchýí íwa pé é ipyat má nyi âng é ru nghut le gi, haú myiqhtoí pé é sui lhoq shun é bang má, ngamoq bo lòm râ a nghut.' ga lhaq taí akô. ³¹ Haú su mù, nungmoq gi, haú myiqhtoí pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haú mù, nungmoq é íchýí íwa pé hi tô é muzó lé, banshoq châng kut pán keq!

³³ Lhangmui pé ê, duq htân lhangmui amyú pé ê! Ngarai mîng é dam byi hkyô mai, hkâsu wó hpanq lut kó râ l hú? ³⁴ Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-

myuq htâng ra-myuq châng hkat zing-rí wún kó rã nghut lhê. ³⁵Hau é yanmai, haù dingmán sũ Abelaq é sui mai hí luí, noqkuq yhũm eq hkungga gyap gyoro má nungmoq sat pyãm é, Berehkiq é yhangzo Zahkariq é sui jé shoq, myidàm htoq má shun pyãm é dingmán bang banshoq é sui gi, nungmoq é ahtoq má jé lô rã nghut lhê. ³⁶Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé rã nghut lhê.

³⁷Yerusalem ê, Yerusalem ê, myiqh-toí pé lé sat pyãm pyãm kut mù, náng chyáng nhang kat é bang lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaù má tsíng lhũng yu é su, nungzô pé lé, Ngò, hkâ-myhó dãm shuí tsíng yù nàu kôlhang, nàng a dóng nghut ri. ³⁸Wú keq, nungmoq é yhũm gi, nungmoq é matú chamchyuiyui dut pyãm to berã nghut lhê. ³⁹Hkâsu mù gà le, Ngò, nungmoq lé taí kôlé, 'Yhumsing é myìng mai jé lé lo é Sũ gi, hkungsô wó nyí sháng gaq.¹⁹ ga, nungmoq a taí taí gi, Ngo lé wó myàng kó rã a nghut lo." gà ri.

Ló Htâng Buinyì Má Dut Lò Rã Hkyô

Mrk 13:1-31; Luk 21:5-33

24 Yesuq gi, noqkuq yhũm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haù noqkuq yhum é loqmú pé lé tũn shit akò. ²Hau hkũn, Yesuq gi, yhangmoq lé, "Hau pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok hau pé gi, rachâm htoq racham lháng a kê lhum loshoq, hpyoq hpyi pyãm é hui rã nghut lhê." ga taí ri.

³Yesuq gi, Tsanlun Bùm má zung tô é hkũn, haù chángzô pé gi, yhangmoq baú Yhâng chyáng lé jé kômù, "Hau hkyô pé gi, hkâ-nhám dut lò rã lú? Nàng gyó lé

rã hkũn eq ló htâng buinyì má, hkasũ é kumlhá htoq lò rã nghut lhê lú? Ngamoq lé taí kyô wú laq." ga, Yhang lé myí akò.

⁴Hau hkũn, Yesuq, yhangmoq lé tũ taí é gi, "Nungmoq lé, ó yuq èq le a wó shuí nghoq sháng gaq, sidiq nyí keq. ⁵Hkâsu mù gà le, 'Ngò gi, haù Hkrisduq nghut lhê.' ga, Ngá myìng lé lãng é byù myo myo pò htoq lò mù, byù myo myo lé hkyô shuí nghoq kó rã nghut lhê. ⁶Nungmoq gi, majan dut nyí é hkyô eq majan eq sêng é danglãm pé lé, wó gyo kó rã nghut lhê; nghut kôlhang, hkâgyuq dàn kó. Hau hkyô pé gi, dut lò rã za nghut lhê; nghut kôlhang, ló htâng é buinyì gi, a nghut shi. ⁷Byù ra-myú eq ra-myú, mingdán ralhũm eq ralhũm majan zãn lhũm lò kó rã nghut lhê. Jowò myo myo má, mutmó gyó é pé eq layàng nún é pé dut lò rã nghut lhê. ⁸Hau pé gi, wuìhke jamjau hkyo é apũn awang za ru nghut ashí.^r

⁹Hau hkũn, nungmoq gi, zing-rí é eq sat pyãm é hui zo rã matú, ap pyãm é hui kó rã nghut lhê. Byù myú lhungl-hâng bang gi, Ngá é yanmai, nungmoq lé a nguì kut kó rã nghut lhê. ¹⁰Hau u lé, byù myo myo gi, lumjìng myit lé tô pyãm kômù, rayuq eq rayuq a nguì lhum dut é htoq agó, rayuq eq rayuq ap pyãm lhum kó rã nghut lhê. ¹¹Hau htoq agó, myiqhtoí pyoq pé myo myo pò htoq lò kômù, byù myo myo lé hkyô shuí nghoq kó rã nghut lhê. ¹²Agè ashop é hkyô myô jat lo é yanmai, byù myo myô é chyitdap myit gi, kãn ló byuq rã nghut lhê; ¹³nglut kôlhang, jìhtũm jé shoq wó hkam jãn nyí é sũ gi, hkyi yu é hui rã nghut lhê. ¹⁴Byù myú banshoq má saksé dut rã matú, haù mingdán eq sêng é gabú danglù lé, mingkan gón má hko kyo rã nghut lhê. Hau htâng má sheq, ló htum buinyì jé rã nghut lhê.

¹⁵Haû mù luí, myiqhtoi Danielaq dông mai taí tô é eq rajung za, 'haû lhoq hten lhoq hpyoq é achao achyut hkyô^s gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sê gyo sháng gaq). ¹⁶Haú hkûn, Yuda mau má nyi é bang gi, bùm pé shut hpang doq lô kó sháng gaq. ¹⁷Yhumhkûng htoq má nyi tô é sù gi, yhúmhaú má é zè haí lé le, a lô gyó wang yù lo sháng gaq. ¹⁸Yò má nyi tô é sù gi, yhâng é buhng lé a lô taú yu nyi lo sháng gaq. ¹⁹Haú buinyi pé má, zogúng dut é myiwe eq naú huq ashí nghut é ìnu wuì gi, gyai yhang wuìhke jamjau kó râ nghut lhê. ²⁰Haú nungmoq hpâng râ buinyi gi, gyoqmyò,^f a nghut jáng, Bánno buinyi má a ang râ matú, kyúdung nyi keq. ²¹Hkâsu mù gâ le, mingkan lé joq é hkûn mai ahkuí jé shoq, hkâ-nhám le a dut wú shí é wuìhke jamjau mó gi, haú buinyi pé má dut lò râ nghut lhê; haú sù é hkyô gi, htàngnùng má hkâ-nhám le dum dut lo râ a nghut. ²²Buinyi haú pé lé lhoq shaú pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haú pé lé, lhoq shaú pyâm byi râ nghut lhê. ²³Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjáng kó. ²⁴Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê.

²⁵Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

²⁶Haú mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-é kó; 'Yhang gi, shí gok hkaú má lúng tô ri.' ga jáng le, hkâjáng kó. ²⁷Hkâsu mù gâ le, bui htoq hkyam má lhap hpyat é gi, bui wang hkyam má lhang jé lé é hkûn le, dut râ nghut lhê. ²⁸Màng leq é jang má, langdâ pé, lé zing bùm râ nghut lhê.

²⁹Buinyi haú pé má é wuìhke jamjau lai eq yhang,

'Bui gi, noq byuq mù, lhamó gi, a tsò dut byuq râ nghut lhê;
kyí pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhún é huí bùm kó râ nghut lhê.^t

³⁰Haú hkûn, haú Byu Yhangzô é kumlhá gi, mauhkûng má htoq shit lô râ nghut mù, myidàm htoq má é byù myú lhunglhang gi, yón ngau bùm kó râ nghut lhê. Haú Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkang eq le, gyó lé lo é lé, yhangmoq byu-myàng kó râ nghut lhê. ³¹Hau htàng má, Yhang gi, Yhâng é maumang lagyô pé lé, tut htê mó èq nhang kat luí, yhangmoq gi, maumyí chyùn myi chyùn eq mauhkûng rahkyam mai, gó hkyam htum shoq má é, Yhang hkyin yu tô é bang lé shuí tsing yù kó râ nghut lhê.

³²Maihpáng gâm lé wú mù, mhoq yù keq; agàm mai a-nyuq nyún lô mù, ahaq htut lô jáng, bui nyé nám chyàng lò bê lé, nungmoq sê lhê. ³³Haú eq rajung za, shí hkyô banshoq^g lé, nungmoq myàng kôjáng, Yhang gi, chyáng bê nghut mù,

^f24:20 Israelaq mau má gi, gyoqmyò lé hkyô htoq le gyai wuìhke é ahkyíng nghut lhê.

^g24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê.

hkúmdong má lhang nghut nyi bê hkyô lé, nungmoq sé lo keq. ³⁴Ngò, nungmoq lé teng za tái kôlé, shí pyat má é byu pé a ban shi byuq shimá, haú hkyô pé** banshoq dut byuq râ nghut lhê. ³⁵Mauhkúng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

Haú Buinyi Eq Ahkying Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶Buinyi eq ahkying haú lé gi, ó yuq le a sé; mauhkúng htoq mã é maumang lagyô pé lhang a sé; haú Zo le a sé; haú Íwa za ru sê lhê. ³⁷Noaq é tsin pyat má dut é su, haú Byu Yhangzo lé lo é hkún le, dut râ nghut lhê. ³⁸Hkâsu mù gâ le, dowui a dng shi é buinyi pé má, byu pé gi, Noaq, wui-sanghpo mó hkaú má wang é hkún jé shoq, zo zo shuq shuq, myi byi myi yû, kut nyi bum akô nghut ri; ³⁹yangmoq gi, dowui dng lô mù, yangmoq banshoq lé ùm sat pyâm é hkún jé shoq, haí dut lò râ lé, a sé kó dut bùm é su, haú Byu Yhangzo lé lo é hkún le, dut râ nghut lhê. ⁴⁰Haú hkún, yò má rahá nyi tô é byù í yuq mã é rayuq gi, shuí yu é hui mù, rayuq gi, myit gyó to râ nghut lhê. ⁴¹Luqluí chòm lhang nyi é myiwe í yuq mã é rayuq gi, shuí yu é hui mù, rayuq gi, myit gyó pyâm to râ nghut lhê.

⁴²Haú su mù, haú nungmoq é Yhumsing gi, hká nyi jé lé lò râ lé, nungmoq a sê kô é yanmai, sidiq machya nyi keq. ⁴³Myín hká u má hkau sù jé lé lò râ lé, yhumsing sê é ru nghut le gi, yhang é yhùm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴Haú mù, nungmoq le rì rì nghut nyi keq; hkâsu mù gâ

le, haú Byu Yhangzo gi, a bün nùng má jé lé lò râ nghut lhê.

⁴⁵Yhumsing hpô é dui-nhang zoshang wui lé, uphkang râ eq ahkying jé jang zoshuq gam byi râ matú, yhumsing hpô èq mù nhang tô é, lhumsuzi lui, hpaqchyí bo é dui-nhang zoshang gi, ó yuq nghut râ lú? ⁴⁶Yhumsing hpô dum tau lo é hkún, haú su kut nyi lhang é dui-nhang zoshang gi, hkungsô wó nyi ri. ⁴⁷Ngò, nungmoq lé teng za tái kôlé, yhumsing hpô haú gi, yhang é sutzè banshoq, dui-nhang zoshang haú yuq lé ap to râ nghut lhê. ⁴⁸Nghut kôlhang, laqmá mù, dui-nhang zoshang haú yuq gi, agè ashop sù nghut lui, 'Ngá é yhumsing hpô jé lò râ gyai myáng ashí.' ga, yhang é i-myt unghkaú má myit yù mù, ⁴⁹gotú dui-nhang zoshang luzúm wui lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi, ⁵⁰dui-nhang zoshang hau é yhumsing hpô gi, yang a myitngam tô é buinyi eq yang a sê tô é ahkying má jé lò mù, ⁵¹yang lé jap pyám lui, gegun labyoq kut bang hkâm zô é, ngaubiyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

Zomyi Raxê Yuq Lé Dangtú Yu É Hkyô

25 Haú hkún, mauhkúng mingdán gi, myibung yu chùng mù, lusik lé te yù râ ga, htoq e ló é zomyi raxê yuq eq púng râ nghut lhê. ²Haú bang má, ngo yuq gi, nhik a gyng kó; ngo yuq gi, nhik gyng akô nghut ri. ³Haú nhik a gyng é bang gi, myibung yu chùng kôlhang, xú a yu chùng kó nghut ri. ⁴Nghut kôlhang, haú nhik gyng é bang kúm gi, yangmoq é myibung lé le, xú bo é bòng lé le yu chung akô nghut ri. ⁵Lusik jé lé lò râ myáng nyi é yanmai, yangmoq

**24:34 Haú hkyô pé gâ é gi, Yerusalem noquq yhùm htên byoq râ lé tái é nghut lhê.

banshoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoí ô!' ga, garú é htê htoq lo ri.

⁷ Haú hkún, zomyi haú bang banshoq gi, toq lô mù, yhangmoq é myibung lé hen lajâng akô nghut ri. ⁸ Haú nhik a gyíng bang gi, 'Ngamoq lé, xú ratsuí byi kó laq; hkâsu mù gà le, ngamoq é my-ibung shi lô nyi ri.' ga, haú nhik gyíng bâng chyáng dúng akô.

⁹ Haú hkún, haú nhik gyíng bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xú ung bâng chyáng ê wui yù keq.' ga tû taí kat akô.

¹⁰ Yhangmoq, xú wui e lô kô é hkún, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang lô bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsíng ê! Yhumsíng ê! Ngamoq lé, hkum hpóng byi laq ô!' ga taí akô.

¹² Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

¹³ Haú mù luí, haú Byu Yhangzo jé lé râ buinyì eq ahkýíng lé, nungmoq a sé kô é yanmai, sidiq machya nyì keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkúng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashî nghut ri. ¹⁵ Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byi to mù, byìn we shut htoq lô byuq bê nghut ri. ¹⁶ Ngùn ngo jói wó yù sù gi, haú hkún jáng htoq

lô mù, hpugá gá luí, ngùn ngo jói wó myat yù bê nghut ri. ¹⁷ Haú eq rajung za, ngùn í jói wó yù sù le, í jói wó myat yù bê nghut ri. ¹⁸ Nghut kôlhang, rajoí za wó yù sù gi, htoq e lô mù, myigùng má du luí, yhâng yhumsíng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsíng hpó gi, dum taú jé lô mù, yhangmoq é ngùn chyaráng lé, lo jep ri. ²⁰ Ngùn ngo jói wó yù sù gi, amyat ngo jói lé le yu lé lô mù, 'Yhumsíng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taí ri.

²¹ Haú hkún, haú yhumsíng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsíng hpô é gabú hkyô má bo wang lòm aq hkoí!' ga tû taí ri.

²² Haú eq rajung za, í jói wó yù sù le, lé lô mù, 'Yhumsíng ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taí ri.

²³ Haú hkún, haú yhumsíng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsíng hpô é gabú hkyô má bo wang lòm aq hkoí!' ga tû taí ri.

²⁴ Hau htâng, rajoí wó yù sù le, lé lô mù, 'Yhumsíng ê, nàng gi, byù wui nghut mù, yhumsíng a hô tô é jang mã é shù yù nau é htoq agó, yhumsíng, kyôshi a sân hkyô tô é jang mã é tsíng yù nau sù nghut é lé, ngò sê lhê. ²⁵ Haú mù, ngò gi, gyuq luí, htoq ê mù, náng é ngùn lé, myigùng má é haq myhup tô é nghut lhê. Wú aq, shî gi, nàng é ngùn nghut lhê.' ga taí ri.

²⁶ Haú mù, yhumsíng hpó gi, yhang lé, 'Agè ashop é eq lagôn é dui-nhâng

zoshâng ê! Ngò gi, yhumsîng a hô tô é jang mâ é shû yù nau é eq, yhumsîng, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taû jé lô jáng, aráng eq amyat wó yù shoq, ngùn hpún kat jang má, haî mù a kat tô é lhú?

²⁸ Haû mù, haû ngùn rajoí lé, náng chyáng mai yù luí, raxê joí wó to sù lé, byí pyám nhâng rà nghut lhê. ²⁹ Hkâsu mù gâ le, wó sù ó yuq lé nghut kôle, yhang agùn agó wó rà matú, jat byi rà nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê. ³⁰ Haû mù, haû akyû a bo é dui-nhâng zoshâng lé gi, ngaubyi ngàu nhap eq zui kyik kyik shoq hpuzò nyì rà jowò nghut é, shinggan mauchut hkaû má dú htoq pyám keq.' gâ ri.

Sau Eq Bainám

³¹ Haû Byu Yhangzo gi, Yhâng é hpungwup shingkan mai, maumang lagyo lunglhang bang eq rahá jé lé lo é hkûn, Yhâng é hpungwup shingkan bo é hkohkâm-tanghkuq htoq má zùng rà nghut lhê. ³² Haû hkûn, byù myû chângjup gi, Yhâng é hí má zîng lé lo bùm kó rà nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám rà nghut lhê. ³³ Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi to rà nghut lhê.

³⁴ Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkan yu é hui bang ê, lé keq; mingkan lé hpan é hkûn mai, nungmoq é matú ga hen la-jâng tô é muí mingdán má wang ló keq. ³⁵ Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuîshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô

é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nõhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí rà nghut lhê.

³⁷ Haû hkûn, haû dingmán bang gi, Yhang lé, 'Yhumsîng ê, Nàng zòmut huí é lé, ngamoq, hkâ-nhám myàng luí, byi tsô wú é lhú? Nàng wuîshit é lé, ngamoq, hkâ-nhám myàng luí, byi huq wú é lhú? ³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú? ³⁹ Nàng nõhpyo huí é lé le, htóng lúng é lé le, ngamoq, hkâ-nhám myàng luí, lé gon lé kum wú é lhú?' ga myi kó rà nghut lhê.

⁴⁰ Haû hkûn, haû hkohkâm gi, 'Ngò, nungmoq lé teng za taí kôlé, shí, Ngá gumang wuî má é je tiq sù lé, nungmoq kut byí é hkyô haî le, Ngo lé kut byí é nghut bê.' ga tû taí rà nghut lhê.

⁴¹ Hau htâng má, Yhang gi, Yhâng é loqpaî hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuîshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nõhpyo huí é eq htóng lúng é u lé, nungmoq, Ngo lé a gon kó nghut ri.' ga taí rà nghut lhê.

⁴⁴ Haû hkûn, yhangmoq gi, 'Yhumsîng ê, nàng zòmut wuîshit é, bíng kut wún é, gùngchîn dut é, nõhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lhú?' ga taû myi kó rà nghut lhê.

⁴⁵ Haû hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù

lé, nungmoq, a kut byí é hkyô haí le, Ngo lé a kut byí é nghut bê.¹ ga, yhangmoq lé tâ taí râ nghut lhê.

⁴⁶Haú mù luí, haú bang gi, ahtum abyuq mara dam byí é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê.” ga Yesuq taí ri.

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

26 Yesuq gi, haú hkyô pé lé ban taí é htâng má, Yhâng é chángzô pé lé,² “Nungmoq sê tô é eq rajung za, í nyí laí é htâng má, Lhoqlhai Poí jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê.” ga taí ri.

³Haú u lé, hkyangjong agyi pé eq suwún wú gi, Kayahpaq gâ é hkyangjong mó rayuq é yhumwàng má zup zîng to kômù,⁴ Yesuq lé haq chyup yú râ eq sat pyám râ hkyô lé, hpyê lhúm bum akô nghut ri.⁵ Nghut kôlhâng, yhangmoq gi, “Byu pé gabyông lò kó abe, poí gyoro má gi, a kut shi sháng.” ga, taí lhúm akô nghut ri.

Yesuq, Xú Hut Gyun Huí É Hkyô

Mrk 14:3-9; Yhn 12:1-8

⁶Yesuq gi, Behtani wà má nyi é mang-gâm dap wú sù Simún é yhúm má nyi tô é hkûn,⁷ myiwe myhí rayuq gi, gyai hpaú é namngón xú bo é luq hpyú bông yu lé lô mù, Yesuq zo shuq nyi é hkûn, namngón xú haú lé, Yhâng é ulhum má hut gyun byí ri.

⁸Haú hkyô lé, haú chángzô pé myàng kôjáng, wú nhik-yo kômù, “Haí mù luí, haú lé aha agó kut pyâm lhê lhú?”⁹ Xú haú lé, ahpau myo myô èq ùng pyám mù, myùng bang lé byí le ge lhê mhai!” ga taí kat akô.

¹⁰Yesuq gi, haú hkyô lé sé luí, “Haí mù, myiwe zo haú lé, i-myit lhoq myô nyi akô lhú? Yhang gi, Ngá é ahtoq má

ge é hkyô kut bê nghut ri.¹¹ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhâng, Ngò gi, nungmoq eq rahá ayang nyi nyi râ sù a nghut.¹² Yhang, Ngá gûng má namngón xú hut gyùn é gi, Ngá gûng lé yhum râ matú, hen lajâng é hkyô nghut ri.¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê.” ga taí kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù,¹⁵ “Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó râ lhú?” ga myí ri. Haú mù, yhangmoq gi, yhang lé ngùn denggá sum xê chap nghap byí akô.¹⁶ Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, “Nàng zo râ Lhoqlhai Poí zoshuq lé, ngamoq hkâmá món to râ lhú?” ga myí akô.

¹⁸Haú mù, Yhang gi, “Myuq hkaú shut wang ló mù, byu rayuq chyáng ê luí, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhúm má Lhoqlhai Poí kut râ nghut lhê.' gâ Sará taí ri nghú, ê taí keq.” ga pyíng kat ri.¹⁹ Haú mù, haú chángzô pé gi, Yesuq pyíng kat é eq rajung za é taí kômù, Lhoqlhai Poí lé món to bekô nghut ri.

²⁰Myinhântang jé lô jáng, Yesuq gi, haú chángzo raxe í yuq eq rahá, zohpoq má

zung tô ri. ²¹ Yhangmoq zô nyi bùm kô é u lé, Yesuq gi, “Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê.” ga taí ri.

²² Haú hkún, yhangmoq gi, gyai gyô yón kômù, rayuq htâng rayuq, “Yhum-sing ê, ngò a nghut hkaí?” ga, Yhang lé chòm myí akò.

²³ Haú hkún, Yesuq gi, “Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. ²⁴ Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lháng, je ge ri.” ga dum taí kat ri.

²⁵ Hau htâng, Yhang lé ap pyám râ sù, Yudaq gi, “Rabai ê, ngò a nghut hkaí?” ga myi jáng, Yesuq gi, “Nàng nghut ri.” ga tũ taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, “Shí gi, Ngá é gungsho nghut lhê; yù mù zo keq.” ga taí uchyang, Yhâng é chángzô pé lé gàm byí ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, “Nungmoq banshoq bang, shuq keq. ²⁸ Shí gi, yubak mara hkyut pyám byi râ, byù myo myô é matú htoq pyám é, dangshikaq eq sêng é Ngá sui nghut lhê. ²⁹ Ngò, nungmoq lé taí kôlé, ahkuí mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buyni a jé jé, tsibiyiq wing lé dum shuq râ a nghut lo.” ga taí ri.

³⁰ Yhangmoq gi, hkya-on mahkôn ralhūm ban hkôn jáng, Tsanlun Bùm shut htoq e ló bekò nghut ri.

Petruq He-ngik Râ Lé, Te Taí É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, “Nungmoq lhunglhang bang gi, hkūmyîn yhang jáng, Ngá é yanmai, myit lingbat kó râ nghut lhê; hkâsu mù gâ le, ‘Haú sau zúng sù lé, Ngò bat sat pyám mù, sau hpúng mã é sau pé gi, lhoq pyo pyám é hui kó râ nghut lhê.’” ga kâ tô ri. ³² Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lángrâ nghut lhê.” gâ ri.

³³ Haú hkún, Petruq gi, “Náng é yanmai, góbang banshoq myit lingbat kôlhang, ngò gi, hkâ-nhám le myit lingbat râ a nghut.” ga tũ taí ri.

³⁴ Yesuq gi, “Ngò, nang lé teng za taí lé, hkūmyîn yhang jáng, woq a tũn shimá, nàng, Ngo lé sum dâm he-ngik pyám râ nghut lhê.” ga tũ taí ri.

³⁵ Nghut kôlhang, Petruq gi, “Ngò, Nàng eq rahá shí râ dut kôlhang, Nang lé ngò he-ngik pyám râ a nghut.” ga saí taí ri. Haú chángzô pé góbang banshoq le, haú su ga châng taí bum akò nghut ri.

Get-samane Gâ É Jowò Má Kyúdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, “Ngò, hé má é mù, kyúdûng nyi é u lé, nungmoq shí má zúng lángrâ keq.” ga taí ri.

³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, “Ngò gi, shí râ í yhang myit yón nyi ri; nungmoq gi, Ngò su machyâ luí, shí má lángrâ nyí keq.” ga taí ri.

³⁹ Yesuq gi, haũ mai ratsuí zo sô ê mù, myigùng má ngóm gop to luí, “Áwa ê, wó dut é nghut le gi, góm^{††} shí lé, Ngá chyáng mai lhaĩ pyám byi laq. Nghut kôlhang, Ngò ô nau é đông a nghut, Nàng ô nau é đông sheq nghut sháng gaq.” ga kyũdùng ri.

⁴⁰ Hau htâng, Yhang gi, Yhâng é chángzô pê chyáng dum taũ lo le, yhang-moq yhup myhĩ to kô é lé lo myàng ri. Haũ mù, Yhang gi, Petruq lé, “Nung-moq gi, hkyíng hkum rahkum za lhang, Ngò eq rahá a wó machya nyi kó lhu? ”

⁴¹ Gunglaũ é a hui sháng gaq, machyâ luí, kyũdùng nyi keq. Haũ woi-nyí gi, kâm nyi kôlhang, gungsho gi, wum ny-hôm nyi ri.” ga taĩ ri.

⁴² Yhang gi, radàm dum ê mù, “Áwa ê, góm shí lé, Ngò a shuq é a wó lai rã nghut jáng gi, Nàng ô nau é đông nghut sháng gaq hkoi.” ga kyũ dum dùng ri.

⁴³ Yhang dum taũ lo le, yhangmoq gi, myoqkuq lai kô é yanmai, yhup myhĩ to lánng kô é lé, lo dum myàng ri. ⁴⁴ Haũ mù, Yhang gi, yhangmoq lé tô pyâm to mù, sum dâm nghũ rã dàm dum ê luí, hí lé dùng é dang lé roq ê dum dùng ri.

⁴⁵ Haũ mù, Yhang gi, haũ chángzô pê chyáng dum taũ jé lô mù, yhangmoq lé, “Nungmoq gi, ahkuĩ jé shoq yhup ngón nyi ashĩ kó lhu? Wú keq! Haũ ahkyíng gi, jé bê nghut luí, haũ Byu Yhangzo gi, yubak dap bâng é loq má ap pyâm é hui rã nghut bê. ⁴⁶ Toq keq! Ló losháng hkoi! Ngo lé ap pyám rã sũ gi, jé lé bê nghut ri.” ga taĩ ri.

Yesuq, Chyup Yũ Hui É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashĩ u lé, haũ chángzo raxe í yuq má bo é Yudaq gi, jé lé lo ri; haũ hkyangjong agyi pé eq

mingbyu é suwún wui chyáng mai nhang kat é bang nghut é, shâm eq dumbáng pé chung tô é byũ moq mó le, yhang eq rahá nghut akô. ⁴⁸ Yesuq lé ap pyám rã sũ gi, haũ bang lé, “Ngò, bopuq puq é sũ gi, haũ yuq nghut bê; Yhang lé chyup yũ keq.” ga kumlhá byĩ tô ri. ⁴⁹ Yudaq gi, Yesuq chyáng hkyê za ê mù, “Rabai ê, wángzán nyi lھے lhu?” ga taĩ luí, Yhang lé bopuq puq byĩ ri.

⁵⁰ Haũ hkũn, Yesuq gi, “Buinùm hpó ê, nàng kut rã muzó lé kut aq hkoi.” ga tũ taĩ kat ri.

Hau htâng, yhangmoq gi, hí shut hui ê luí, Yesuq lé chòm zuĩ zing mù, chyup yũ bekô nghut ri. ⁵¹ Haũ mù, Yesuq eq rahá nyi bang mã é rayuq gi, shâm she htoq yũ mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haũ jáng, Yesuq gi, haũ yuq lé, “Náng é shâm lé, xâng pyám aq; hkâsu mù gâ le, shâm shê sũ gi, ó yuq nghut kôle, sham èq shĩ rã nghut lھے. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rã nghut é lé, nungmoq a sé kó lhu? ⁵⁴ Nghut kôlhang, haũ su nghut é nghut jáng, shĩ hkyô dut lò rã nghut lھے ga Chyũmdang pé má bò tô é hkyô gi, hkâsu wó dik lò rã lhu?” ga taĩ kat ri.

⁵⁵ Hau htâng, Yhang gi, byũ moq lé, “Nungmoq gi, damyaq rayuq lé chyup é su, Ngo lé chyup rã matú, shâm eq dumbáng pé chùng mù, lé lo akô lhu? Ngò gi, nyí wuĩ, noqkuq yhũm má zùng mù, mhòqshit nyi kôlhang, nungmoq, Ngo lé a chyup yũ kô é nghut lھے. ⁵⁶ Nghut kôlhang, shĩ su dut é hkyô pé banshoq gi, haũ myiqhtoĩ pé kê tô é hkyô pé lo dik rã matú dut é nghut ri.” ga taĩ ri. Haũ hkũn, haũ chángzô pé banshoq gi, Yesuq

^{††}26:39 Góm gâ é gi, Yesuq, jamjau hui rã hkyô eq shĩ rã hkyô lé, taĩ nau é nghut lھے.

lé tô pyâm to kôluí, hfang byo byuq bekô nghut ri.

**Yudaq Byìn Tú Wapdoq
Má Jep Huí É Hkyô**

*Mrk 14:53-65; Luk 22:54-55,
63-71; Yhn 18:13-14, 19-24*

⁵⁷ Yesuq lé chyup yu é bang gi, haú tará sará pé eq suwún wuí zup zîng nyi é jang, hkyangjong mó Kayahpaq é yhûm má, Yhang lé shuí e akô. ⁵⁸ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luí, wàng hkaú má wang ê mù, zúng bang eq rahá zung tô ri.

⁵⁹ Haú hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô. ⁶⁰ A têng é saksé myo myo htoq lô kôlhang, wó sat râ í é saksé a myàng kó nghut ri.

Ló htáng má, byù í yuq gi, lé lô kômù, ⁶¹ “Shí yuq gi, 'Ngò gi, haú Garai Gasâng é noqkuq yhûm lé lhoq hten pyám mù, sum nyí gyoro má dum wó saí lhê,' ga taí sù nghut ri.” ga taí akô.

⁶² Haú hkûn, haú hkyangjong mó gi, toq yap mù, “Nàng, haí le a tú taí luq? Shí bang, Nang lé mara hun nyi é saksé gi, hká đông nghut lhê lhú?” ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, “Haú rú dui nyi é Garai Gasâng é myîng lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq.” ga taí jáng, ⁶⁴ Yesuq gi, “Nàng taí é eq rajung za nghut lhê. Ngò, nungmoq ban-shoq lé taí kôlé, nungmoq gi, ahkuí mai htâng hpyang má, haú Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkung mai

lé lo é lé le, nungmoq myàng kó râ nghut lhê.” ga taí ri.

⁶⁵ Haú hkûn, hkyangjong mó gi, yhâng é bu lé lêng cheq pyám mù, “Yhang gi, Garai Gasang lé rhoí dang taí bê nghut ri! Nga-nhúng, hai saksé râ ashí lhú? Yhang, Garai Gasang lé rhoí dang taí é lé, nungmoq, ahkuí wó gyo bekô nghut lhê. ⁶⁶ Nungmoq hkâsu wó myit akô lhú?” ga myí jáng, yhangmoq gi, “Yhang gi, shí gíng sù nghut lhê.” ga tú taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqt-sup èq htui byí akô nghut ri. Góbang gi, Yhang lé bo-pyuq pyuq byi luí, ⁶⁸ “Hkris-duq Nàng, Nàng lé bat sù ó yuq nghut é lé, myiqhtoi htoí wú aq.” ga taí akô.

**Yesuq Lé, Petruq
He-ngik Pyám É Hkyô**

*Mrk 14:66-72; Luk 22:56-62;
Yhn 18:15-18, 25-27*

⁶⁹ Petruq gi, wàng hkaú má nyi tô é u lé, dui-nhâng zoshâng myhí rayuq gi, yhâng chyáng lé jé mù, “Nàng le, haú Galile byù Yesuq eq rahá nyi sù nghut ri.” ga taí ri.

⁷⁰ Nghut kôlhang, Petruq gi, haú bang ban-shoq é hí má yhang, “Nàng haí taí nyi é lé, ngò a sé.” ga he kat ri.

⁷¹ Hau htâng, yhang gi, wàng hkúmdong shut htoq e lô le, haú jowò má, dui-nhâng zoshâng myhí góyuq le, yhang lé myàng mù, “Shí yuq gi, Nazaret wà byù Yesuq eq rahá nyi sù nghut ri.” ga, haú mã é bang lé taí kat ri.

⁷² Haú hkûn, yhang gi, “Byù haú yuq lé, ngò a sé!” ga dakam é đông he pyâm ri.

⁷³ Hau htâng razup zo má, haú jowò má yap to bang gi, Petruq chyáng huí é kômù, “Nàng le, haú bang má bò sù yhang nghut ri; náng é danghté lé sê gyô ri.” ga taí akô.

⁷⁴Haú hkûn, yhang gi, yhanggùng yhang nhing luí, “Haú yuq lé, ngò a sé.” ga dakâm dang taí ri.

Haú-u yhang, woq tân bê nghut ri. ⁷⁵Haú mù, Petruq gi, “Woq a tân shi má, nàng, Ngo lé sum dâm he pyám râ nghut lhê.” ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang ê ngau ri.

Yudaq Juíshi É Hkyô

Mrk 15:1; Luk 23:1-2; Yhn 18:28-32

27 Napsûn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyám nhâng râ matú chòm myit hpyit yú bekò nghut ri. ²Haú mù, yhangmoq gi, Yhang lé tuí yú luí, shuí htoq ê kômù, mauzau Pilat chyáng ê ap byí akò nghut ri.

³Yesuq lé ap pyâm é sù Yudaq gi, Yesuq lé jéyáng doqdán é hkyô lé myang sé jáng, nungngham wó mù, haú ngùn sum xê chap lé, hkyangjong agyi pé eq suwún wui chyáng ló dum taú byí ri. ⁴Haú mù, yhang gi, “Mara a bò Su é sui lé, ngò ap pyám bê nghut é yanmai, ngò mara wó bê.” ga taí jáng, yhangmoq gi, “Haú hkyô, ngamoq eq haí sêng lhê lú? Haú gi, nàng eq sheq ru sêng lhê.” ga lhom taí kat akò nghut ri.

⁵Haú mù, Yudaq gi, ngùn haú lé, noqkuq yhúmhaú má dú pyâm to luí, htoq ló mù, yhang gùng yhang ê juíshi byuq bê nghut ri.

⁶Haú hkyangjong agyi pé gi, ngùn chap haú pé kuí yú luí, “Shí gi, sui hpau ngùn nghut lhê yanmai, alu sidek má a ge kat.” ga taí akò. ⁷Haú mù, yhangmoq gi, tungbaù pé é lupdùng kut râ matú, au saí zo su é maumyí lé, ngùn hau èq wui hpyit yú râ dông, chòm myit hpyit to bekò nghut ri. ⁸Hau é yanmai, ahkuí jé shoq, haú jowò lé, sui myigùng ga myhíng tô akò nghut ri. ⁹Haú gi, “Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yú mù,

haú Yhumsîng Garai, ngo lé pying tô é eq rajung za, ¹⁰haú au saí zo su é maumyí lé, yhangmoq wui yú bekò nghut ri.” ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹Haú u lé, Yesuq gi, mauzau hpò é hí má yap tô é nghut mù, haú mauzau hpò gi, Yhang lé, “Nàng gi, Yudaq byu pé é hkohkâm nghut lhê lú?” ga myi jáng, Yesuq gi, “Nàng taí é eq rajung za nghut lhê.” ga tú taí ri.

¹²Haú hkyangjong agyi pé eq suwún wuí gi, Yhang lé, mara hún kôjáng, Yhang gi, haí le a tú taí nghut ri. ¹³Haú hkûn, Pilat gi, Yhang lé, “Yhangmoq, Nang lé mara hún saksé haú-í hkâm nyi kô é lé, Nàng a wó gyo lú?” ga saí myí ri. ¹⁴Nghut kôlhang, Yesuq gi, dang rahkun lhang a tú taí é yanmai, haú mauzau hpò gi, gyai maú byuq bê nghut ri.

¹⁵Haú Lhoqlhai Poí u lé, mingbyú wui ô nau é má cháng luí, haú mauzau hpò gi, htóng byú rayuq yuq lé nhâng byí é htung joq ri. ¹⁶Haú u lé, a gè mying htoq é htóng byú, Barabaq ga sù rayuq nyi ri. ¹⁷Haú mù, byù moq mó zup zing lò kô é hkûn, Pilat gi, yhangmoq lé, “Nungmoq é matú, hká yuq lé lhut byi nhâng nau akò lú? Barabaq luq? Haú a nghut jáng, Hkrisduq gâ é Yesuq lé luq?” ga myí ri. ¹⁸Yhang haú su ga myí é gi, yhangmoq, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹⁹Pilat gi, tarâ jéyáng tingnyâng htoq má zung tô ashí hkûn, yhangmyi gi, “Haú mara a bò Sù lé, haí le hkâkut; hkâsu mù gâ le, hkû-nyí za lhang, yhupmoq má, haú yuq é yanmai, ngò tsómra hpuzò pyám bê nghut lhê.” ga, yhang chyáng dang pying kat ri.

²⁰ Nghut kôlhang, haû hkyangjong agyi pé eq suwún wuî gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

²¹ Haû mauzau hpô gi, “Shí í yuq má é hká yuq lé, nhâng byi nhâng nau akô lhú?” ga myi jáng, yhangmoq gi, “Barabaq!” ga tû taí akô nghut ri.

²² Haû mù, Pilat gi, “Haû jáng gi, Hkrisduq gâ é Yesuq lé, ngò hkâsu kut râ lhú?” ga dum myí kat jáng, yhangmoq banshoq bang gi, “Yhang lé tapzîng má jén sat pyám aq!” ga dum tû taí akô nghut ri.

²³ Nghut kôlhang, yhang gi, “Haí mù luí lhú? Yhang gi, hai mara kut shut bê lhú?” ga dum myi jáng, yhangmoq gi, htê mó èq, “Yhang lé tapzîng má jén sat pyám aq!” ga je riyhang garû lo bum akô nghut ri.

²⁴ Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yû mù, shiwa byu pé hí má loq chi luí, taí é gi, “Shí yuq é sui gi, ngò eq haí a séng; nungmoq eq za ru séng lhê.” gâ ri.

²⁵ Haû shiwa byû lhunglhang bang gi, “Yhâng é sui gi, ngamoq eq ngamoq é yhangzo yhangshû pê htoq má joq nyi sháng gaq.” ga, dum tû taí kat akô nghut ri.

²⁶ Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang lô kômù, Yhâng é lhîngkyuq má, gyedap gón lé ji tsîng tô akô. ²⁸ Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, ²⁹ zujanmaú

rallum saî yû kôluí, Yhâng é ulhum má tsung byí akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, “Yudaq byu pé é hkohkâm hpô è! Chyung hîng xê hîng nyi sháng gaq ô!” ga, jihpoi dang taí akô. ³⁰ Yhangmoq gi, Yhang lé sôkan byé gyun luí, Yhâng é loq mai jàm-yang lú yû mù, Yhâng é ulhum má dum bat bat kut akô nghut ri. ³¹ Yhangmoq gi, Yhang lé rhoí jihkyoi ban kut yû kôjáng, Yhang wut tô é buhîng lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

*Mrk 15:22-32; Luk
23:27-43; Yhn 19:17-27*

³² Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luí tapzîng waq nhang akô nghut ri. ³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haú má jé jáng, yhangmoq gi, Yesuq lé, hkô jung eq nyhô tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri. ³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byí akô. ³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri. ³⁷ Yhâng é u htoq má, “SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ.” ga, Yhang lé mara hun é laiká kê tap tô akô. ³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô laí ló é bang gi, nyhap é dông u-ngut ngut mù, taí kô é gi, ⁴⁰ “Noqkuq yhúm lé hpyoq pyám

luí, sum nyí gyoro má dum wó saí lhê ga Sû ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhaí!” ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wuí le, Yhang lé rhoí jihkyoí kut mù, taí kô é gi, ⁴² “Shí yuq gi, góbang lé hkyi yù sù nghut kôhang, Yhânggûng yhang gi, a wó hkyi yù nghut ri myhi-nhung! Yhang gi, Israellaq byu pé é hkohkâm nghut lhê lhà! Ngamoq wó lumjîng rá matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri.” ga bum akô nghut ri. ⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhtâng sum hkyíng kô má, Yesuq gi, “Eloi, Eloi, lama sabakhtani?” ga, htê mó èq garú kat ri. Hau é lichyúm gi, “Ngá Garai ê, Ngá Garai ê, Nàng, haí mù, Ngo lé tô pyâm tô lhê lú?” gâ é nghut ri.^v

⁴⁷ Haú nâm má yap tô é bang ra-am gi, haú lé wó gyo kôjáng, “Yhang gi, myiqh-toi Eliyaq lé wut nyi ri.” ga taí akô.

⁴⁸ Haú hkún jáng, yhangmoq mâ é rayuq gi, din e ló mù, wuimaù lé ê yu ri. Yhang gi, haú lé tsibiyiq wing chyín má jum yù luí, jàm-yang má tuí tap mù, Yesuq shuq rá matú yhun byí ri.

⁴⁹ Góbang gi, “Yhang lé, Eliyaq, lé hkyi yu lhê laq, nga-nhúng chôm láng wú sháng.” ga taí akô nghut ri.

⁵⁰ Haú hkún, Yesuq gi, htê mó èq dum garú kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. ⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq^{‡‡} má wang é luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, “Yhang gi, gè gè yhang, Garai Gasâng é Yhangzo nghut rinhung!” ga taí akô nghut ri.

⁵⁵ Myiwe wui myo myo le, we we mai wú nyi bum akô. Haú bang gi, Yesuq rà é má garúm rá matú, Galile mau mai Yhang htâng châng lé é bang nghut akô. ⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhtâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi rá matú hkunmó hkyô kat bê nghut ri. ⁵⁹ Yosep gi, gungsôm lé yù mù,

^{‡‡}27:53 Chyoiyúng myuq gâ é gi, Yerusalem wà mó lé gâ é nghut lhê.

pán yúng èq htup yup luí, ⁶⁰luqgok lé kyúng tô é, yhang é lup sik hkaú má é kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bè nghut ri. ⁶¹Magadalaq wà mâ é Mariq eq goyuq Mariq gi, lup hí má zung tô akò nghut ri.

Lup Zúng É Hkyô

⁶²Haú Hên Lajang Buinyì laí é htâng nyí lé, hkyangjong agyi pé eq Hparishe pé gi, Pilat chyáng è mù, ⁶³“Yhumsîng è, Yhang, asak dui nyi ashí hkûn, 'Sum nyí nghû râ buinyì má, Ngò dum dui toq lô râ.' ga, haú byù mhaú taí é dang lé, ngamoq bûn nyi lhê. ⁶⁴Haú mù, haú sum nyí nghû râ buinyì jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shí, ló htâng dàm mhaú é hkyô gi, sâng-hi dàm htoq je wui râ nghut lhê.” ga, lé taí akò nghut ri.

⁶⁵Haú hkûn, Pilat gi, “Nungmoq sê é dông, lup lé haí a dut loshoq, gyezô pé lé zúng nhang to keq.” ga tû taí kat ri. ⁶⁶Haú mù, yhangmoq gi, è luí, lup lé gau shoq ga, luqgok má dizik htung mù, lup zúng byû nyhi to bekò nghut ri.

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

28 Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má é wú râ ga, e ló akò.

²Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má é luí, haú luqlông lé tu lheng mù, hau ahtoq má zung tô ri. ³Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴Zúng nyi é bang gi, yhang lé lûm wú gyuq

kômù, pyik pyik nán luí, shí gùng su dut bùm bekò nghut ri.

⁵Haú maumang lagyo gi, myiwe haú nhik lé, “Hkâgyuq kó! Haú tapzîng má jén sat huí é Yesuq lé, nungnhik ho nyi kô é lé, ngò sê lhê. ⁶Yhang gi, shí má a nyi lo; Yhang taí tô é eq rajung za, lhoq dui toq é hui bè nghut ri. Yhang lé lhez é jowò lé, lé wú keq. ⁷Haú mù, hân taú ló luí, Yhâng é chángzô pé lé, 'Yhang, shi é mai lhoq dui toq é hui bè nghut ri; nungmoq é hí má, Galile mau shut ló láng berâ. Nungmoq, Yhang lé, haú má ló myâng kó râ nghut lhê.' nghû ló taí kyo keq. Nungnhik lé, ngò taí é lé mat-sîng chûng keq.” ga taí kat ri.

⁸Haú mù luí, myiwe myhí haú nhik gi, gyuq kôlhang, gyai gabú é myit èq lup mai hân taú ló mù, Yhâng é chángzô pé lé ló taí kyo râ matú, din ló bê nghut ri. ⁹Haú hkûn, Yesuq gi, radá dâm yangnhik lé lhom tê mù, “Wángzán nyí kó sháng gaq.” ga taí ri. Haú mù, yangnhik gi, huí è luí, Yhâng é hkyí má po zing to mù, Yhang lé noqkuq akò. ¹⁰Haú hkûn, Yesuq gi, yangnhik lé, “Hkâgyuq kó. Ngá é gumang wui lé, Galile mau shut e ló keq nghû ló taí kyo keq; haú má, yhangmoq, Ngo lé myàng kó râ nghut lhê.” ga taí kat ri.

Zúng Nyi É Gyezô Pé Taí É Danglù

¹¹Myiwe haú nhik hkyô má ru nghut nyi ashí le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akò nghut ri. ¹²Haú hkyangjong agyi pé gi, suwún wui eq huí lhum luí, hpyê lhúm é htâng má, haú gyezô pé lé, ngùn myo myo tsup byi mù, ¹³“Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaú yu ló bekò nghut ri.' nghû taí keq. ¹⁴Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê;

haú hkûn, nungmoq gi, hai manghkáng a htoq râ nghut lhê.” ga taí kat ri. ¹⁵Haú mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶Hau htâng má, haú chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri. ¹⁷Yhangmoq gi, Yesuq

lé myàng kôjáng, noqkuq akô; nghut kôlhang, ra-am gi, a dê jing kó nghut ri. ¹⁸Hau htâng, Yesuq gi, yhangmoq chyáng lé lô mù, “Mauhkûng eq myigùng htoq mâ é ahkáng ayá ban-shoq, Ngo lé byí to bê nghut lhê. ¹⁹Haú mù, nungmoq gi, htoq ê luí, byù myú chângjup lé, Ngá é chángzô pé dut nhang mù, haú Íwa, Yhangzo, Chyoiyúng Woi-nyí é myìng lang luí, wui-myhup hkám byi mù, ²⁰nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htùm é hkûn jé shoq lhang, nungmoq eq rahá ru nghut nyí râ nghut lhê.” ga pying tô ri.

MARKUQ

é Gabú Danglù Laiká

(The Gospel of Mark)

Yesuq É Matú Hkyô Htong Byî É Hkyô

Mht 3:1-12; Luk 3:1-18; Yhn 1:19-28

1 Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ²haû myiqhtoi Esai-aq laiká má:

“Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.”^w

ga luí le,

³“Haû yoso má, byù rayuq garú taí é hté gi,

‘Haû Yhumsing é matú, hkyô hen to keq; Yhâng é matú hkyô lhoq nyhang to keq.’^{wx}

ga luí le, kê tô é eq rajung za nghut lhê. ⁴Haû mù, Wui-myhup Sará Yohan gi, yoso hkaû má jé lé luí, wui-myhup hkám byî nyi é eq, yubak mara hkyut pyám byî é hui râ matú myit lhing mù, wui-myhup hkám yù râ hkyô lé, hko kyô nyi ri. ⁵Haû hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yù kôluí, yhâng chyáng mai Yodan làng má wui-myhup hkám yu bum akô nghut ri. ⁶Yohan gi, gola-ug shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. ⁷Yhang taí kyô é dang gi, “Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. ⁸Ngò gi, nungmoq lé, wui èq za wui-myhup wó

hkám byi lhê; nghut kôlhâng, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê.” gâ ri.

Yesuq, Wui-myhup Hkám Yu É Hkyô Eq Gunlaú Huí É Hkyô

Mht 3:13-17; 4:1-11; Luk 3:21-22; 4:1-13

⁹Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkám yu ri. ¹⁰Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹Haû hkûn, “Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê.” ga mauhkûng mai danghtê htoq lo ri.

¹²Haú hkûn jáng, Woi-nyí gi, Yhang lé yoso shut wang e ló nhang ri. ¹³Haú mù, Yhang gi, yoso má myi xê nyí nyi luí, Tsadán èq gunlaú é huí ri; tân jung yosô zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴Yohan htóng gyó é htâng má, Yesuq gi, Galile mau má ló jé mù, ¹⁵“Ahkyíng gi, jé bê; Garai Gasâng é mingdán gi, chyâng lò bê nghut ri; myit lhing mù, haû gabú danglù lé lumjíng keq hkoi.” ga luí, Garai Gasâng é gabú danglù lé hkô kyo wún ri.

¹⁶Yesuq gi, Galile nhông yàm mai só laí ló le, Simun eq yhanggu Andre nhik-tâng, nhông má gùn dú nyí kô é lé, myang ri; haû nhik gi, ngozo kóng zo su nhik nghut akô. ¹⁷Haû mù, Yesuq gi, haû nhiktâng lé, “Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê.” ga taí ri. ¹⁸Haú hkûn, yhangnhik gi, radá dâm, gùn pé lé

tô pyâm to luí, Yhang htâng cháng bekô nghut ri.

¹⁹ Yesuq gi, radun zo dum sô e ló é hkún, Zebedi é yhangzo, Yakuq eq yhanggu Yohan nhiktâng, lhaí hkaú má gùn hpo nyí kô é lé, myang ri. ²⁰ Haú hkún, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyang pé lé, lhaí hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyí nyí jé jáng, Yesuq gi, tarajong má wang ê mù, mhoqshit hí ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gà le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yan-mai nghut ri. ²³ Haú u lé, agè ashop é nat wang júng é byù rayuq tarajong má bo lom nyí luí, wut garú kat é gi, ²⁴ “Nazaret wà byù Yesuq ê, ngamoq gi, Nàng eq haí sêng lhê lúhú? Ngamoq lé lhoq hten râ matú, Nàng jé lé é nghut lhê lúhú? Nàng gi, Garai Gasâng é Chyoiyúng Sù nghut é lé, ngò sê lhê.” gâ ri.

²⁵ Haú hkún, Yesuq gi, “Hkâjop, yhâng chyáng mai htoq ló aq.” ga yhang lé tân kat ri. ²⁶ Haú hkún, agè ashop é nat haú gi, byù haú yuq lé wum kat langhtân nhâng luí, htê mó èq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, “Shí yuq é dang gi, hkasú é dang wá nghut lhê lúhú? Ahko ahkáng bo é dòng mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byí akô nghut ri.” ga luí, taí lhúm bum akô nghut ri. ²⁸ Yesuq eq sêng é ludang gi, Galile

mau jàm shoq, yang é dòng byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkún jáng, Yakuq eq Yohan nhik le mù, Simun eq Andre nhiktâng é yhúm má wang e ló bekô nghut ri. ³⁰ Simún é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom taí kyô akô nghut ri.

³¹ Haú mù luí, Yesuq gi, yhâng chyáng huí ê mù, yhâng é loq má zui luí tu tsung ri; haú hkún jáng, nò ge byuq luí, yhang gi, yhangmoq lé gaí tso gaí huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôlháng, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralthum má htoq ê luí, kyú ê dúng ri. ³⁶ Simun eq yhâng é luzúm wuí kúm gi, Yhang lé châng hô kômù, ³⁷ Yhang lé myang hô kôjáng, “Yuq hkangmó gi, Nang lé châng hkat ho nyi akô.” ga luí, taí kyô akô nghut ri.

³⁸ Haú hkún, Yesuq gi, yhangmoq lé, “Awui ayàm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê.” ga tú taí ri. ³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byí wún ri.

Manggâm Dap Sû Lé, Yesuq Lhoq Gê Byî É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuoq luí, “Nàng dóng é nghut le gi, ngò lé Nàng wó lhoq sân-yúng byi râ nghut lhê.” ga dung wut ri.

⁴¹ Haú hkûn, Yesuq gi, yhang lé wú shogyo luí, loq lâhm kat mù, haú yuq lé ê záng luí, “Ngò dóng lhê, sân-yúng aq hkoi.” ga taí ri. ⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, “Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq.” ga, yhang lé gyai yhang sidiq byi mù, radá dâm nhang kat bê nghut ri. ⁴⁵ Nghut kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mâ é chamchyuiyui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashí kó nghut ri.

Gùngjum Shí Sû Lé, Yesuq Lhoq Gê Byî É Hkyô

Mht 9:1-8; Luk 5:17-26

2 Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taú jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zîng lé lô kôluí, yhúmhkaú má jowò a joq lô é htoq agó, hkumtot má lháng a

joq lo nghut ri; Yesuq gi, yhangmoq lé mungdang hko kyô nyi ri. ³ Haú hkûn, byù myi yuq gi, gùngjum shí sù rayuq lé chôm dang waq luí, Yhâng chyáng lé lo akô. ⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luí, gùngjum shí sù lé taphkang eq roq hkyô kat akô nghut ri. ⁵ Yesuq gi, yhangmoq é lumjîng myit lé byu-myàng jáng, gùngjum shí sù lé, “Ngá zo ê, náng é yubak mara lé hkyut pyám byi bê.” ga taí ri.

⁶ Haú hkûn, tarâ sará pé ra-am gi, haú má zung to kôluí, yhangmoq é i-myt unghkaú má, ⁷ “Byù shí yuq gi, haí mù luí haú su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi râ lhú?” ga luí, myit són wuî nyi bum akô nghut ri.

⁸ Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, “Nungmoq é i-myt hkaú má, haí mù haú su nghú myit són wuî nyi bum akô lhú? ⁹ Haú gùngjum shí sù lé, 'Náng é yubak mara lé hkyut pyám byi bê.' nghú taí é dang eq, 'Toq aq, náng é taphkang lé yù mù, hkyô so aq.' nghú taí râ má, hká hkun je taí lui lhê lhú? ¹⁰ Nghut kôlhang, haú Byu Yhangzo[¶] gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê.” ga, yhangmoq lé taí kat ri. ¹¹ Hau htâng, Yhang gi, haú gùngjum shí sù lé, “Ngò, nang lé taí bá, toq aq, náng é taphkang lé yu chûng luí, yhûm taú ló aq hkoi.” ga taí ri. ¹² Haú yuq gi, toq mù, yhâng é taphkang lé yu chûng luí, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yan-

[¶]2:10 Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

mai, yuq hkangmó gi, mauhong bùm kômù, “Isû é hkyô gi, hkâ-nhám lhang a myàng wú shi.” ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri.

¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, “Ngá htâng cháng aq.” ga taí ri. Haú hkûn, Lewiq gi, toq luí, Yhang htâng cháng bê nghut ri.

¹⁵ Yesuq gi, Lewiq é yhùm má myin-zang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, “Yhang gi, haí mù luí, kang guq bang eq yubak dap bang eq rahá zo shuq nyi lhê lú?” ga myí bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, “Wángzán bang gi, chí sará a ra kó, nõhpyo hui bang za sheq ru rá lhê. Haú eq rajung za, Ngò gi, dingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lhê.” ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, “Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô

pé gi, haí mù a gám kô é lú?” ga luí, myí akô nghut ri.

¹⁹ Haú hkûn, Yesuq tû taí é gi, “Bíng pé gi, lusik eq rahá nghut nyi tô ashî hkûn, zoshuq hkâsu wó gám rá lú? Yhangmoq gi, lusik eq rahá nghut nyi é u lé, zoshuq gám kó rá a nghut. ²⁰ Nghut kôlhang, lusik lé yhangmoq chyáng mai shuí yu pyâm é hkyíng jé rá nghut lhê; haú buinyi pé má kúm gi, yhangmoq, zoshuq gám kó rá nghut lhê.

²¹ Ó yam le, mebu xau má pán sik eq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám rá nghut lhê.

²² Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq rá nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

Bánno Buinyi É Yhumsíng

Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô laí ló é hkûn, Yhâng é chángzô pé gi, kyôshi ratsuí langshap yu akô nghut ri.

²⁴ Haú mù, Hparishe pé gi, Yesuq lé, “Wú aq, Bánno buinyi má a ge kut jung lé, haí mù, náng é chángzô pé kut nyi akô lú?” ga taí akô.

²⁵ Haú hkûn, Yesuq gi, yhangmoq lé, “Dawiq lhang gi, yhâng htâng châng é bang eq rahá zòmut hui luí, zoshuq rá tô é hkûn, hkâsu kut é hkyô lé, nungmoq hkâ-nhám le a nghap wú kó lú?”

²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê.” ga tû taí ri.

²⁷ Hau htâng, Yhang gi, yhangmoq lé, “Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸Haù mù, haù Byu Yhangzo gi, haù Bánno buinyi é Yhumsîng lhang nghut lhê.” ga xoq taí ri.

3 Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri. ²Haù hkûn, haù má nyi tô é bang ra-am gi, Bánno buinyi má, Yesuq mai haù yuq lé lhoq gê byi râ lhu ga, mara hûn râ matú gyám wú nyi akò nghut ri. ³Yesuq gi, haù loq jum shí sù lé, “Banshoq bâng é hí má, toq yap shit aq.” ga taí kat ri.

⁴Hau htâng, Yhang gi, haù má nyi tô é bang lé, “Bánno buinyi má, ge é muzó kut râ, a ge é muzó kut râ, byù asak hkyí râ eq byù sat râ hkyô pé má, hká lhum kut le sheq tarâ wang lhê lhu?” ga myí kat jáng, yhangmoq kúm gi, jit le a ga kó nghut ri.

⁵Haù mù, Yhang gi, nhik-yô nau é myit eq haù bang lé lhang wú mù, yhangmoq myit htan é hkyô lé, wú yón luí, haù loq jum shí sù lé, “Náng é loq nyhang kat aq.” ga taí kat jáng, haù yuq gi, loq nyhang kat luí, yhang é loq gi, shoq za ge byuq bê nghut ri. ⁶Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhum bum akò nghut ri.

Byù Ajùm Ayò, Yesuq Htâng Cháng Kô É Hkyô

⁷Yesuq gi, Yhang é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akò nghut ri. ⁸Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang,

Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhang chyáng jé lé bum akò nghut ri. ⁹⁻¹⁰Yesuq gi, byù myo myo lé lhoq gê byí é yan-mai, nõhpyo hui to bang gi, Yhang lé wó záng shoq ga, chyín chyap wang ló bum akò. Byù lúm myo luí, Yesuq gi, Yhang lé a nhê pyet pyám sháng gaq ga, Yhang é chángzô pé lé lhai ralhum hen to nhang ri. ¹¹Agè ashop é nat pé gi, Yhang lé myàng hkangmó, Yhang é hí má lêng ngop to luí, “Nàng gi, Garai Gasâng é Yhangzo nghut ri.” ga luí, taí garû akò. ¹²Nghut kôlhang, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³Yesuq gi, bùm shut doq ló mù, Yhang ô nau é bang lé ji kat luí, haù bang gi, Yhang chyáng jé lé lo bum akò nghut ri. ¹⁴Haù hkûn, Yesuq gi, byù raxe í yuq lé hkyin yù luí, lagyo ayá byí ri; haù bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq. ¹⁵nat gâng pé lé hkat htoq râ ahko ahkáng wó râ matú le, nghut akò nghut ri. ¹⁶Haù raxe í yuq gi, Simun (Yesuq mai Petruq ga myìng myhíng byi sù); ¹⁷Zebedi é yhangzô nhiktàng Yakuq eq yhanggu Yohan (Yháng nhiktàng lé Yesuq mai Buanerga ga myìng myhíng byí ri; hau é lichyúm gi, maugum zò nhik gâ é nghut lhê.); ¹⁸Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq^{§§} dut é Simun eq, ¹⁹Yhang lé ap pyám râ sù, Yudaq Iskarut pé nghut akò.

§§**3:18** Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé gâ lhê. Haù u lé, Israellaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

Yesuq Eq Bezebulaq

Mht 12:22-32; Luk 11:14-23; 12:10

²⁰Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. ²¹Yhâng é yhumbyù wùi gi, haú hkyô lé wó gyo kôjáng, “Yhang, myit a gyíng lo nghut ri.” ga luí, Yhang lé hung shuí yù rà matú, e akò nghut ri.

²²Yerusalem wà mó mai gyó lé lo é tarâ sará pé gi, “Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaú é wum-o a-tsam èq za, nat gâng pé lé hkat htoq pyâm é nghut ri.” ga taí bum akò nghut ri.

²³Haú mù luí, Yesuq, yhangmoq lé wut yù mù, dangtú dong taí é gi, “Tsadán gi, Tsadán lé hkâsu kut wó hkat htoq rà lúhú? ²⁴Mingdán ralhúm gi, ahkaú má byoq gâng lhûm nyi kô é nghut jáng, mingdán haú wó gíng nyi rà a nghut. ²⁵Yhumhtu ralhúm má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi rà a nghut. ²⁶Haú eq rajung za, Tsadán le, yhânggùng yhang lhoq hpyoq luí, gam hkoq nyi é nghut le gi, yhang wó nyi nyi rà a nghut, htûm byuq rà za nghut lhê. ²⁷Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wàng mù, yhâng é sutzè lé wó lú yù rà a nghut: Haú yuq lé hí tuí zing pyám jáng sheq, yhâng é sutzè lé wó lú yù rà nghut lhê. ²⁸Ngò, nungmoq lé teng za taí kôlé, byu pé kut shut é mara banshoq eq rhoí dang taí pyâm é pé lé gi, mara wó hkyut pyám byí lhê. ²⁹Nghut kôlhang, haú Chyoiyúng Woi-nyí lé rhoí dang taí pyâm é sù gi, hkâ-nhám le, mara hkyut byí é wó hui rà a nghut; haú yuq gi, ahtum abyuq yubak wó sù nghut nyi ri.” gâ ri.

³⁰Yhang haú su ga taí é gi, yhangmoq mai, “Yhang gi, agè ashop é nat wó sù nghut ri.” ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô rà matú, byù rayuq lé wang taí nhang akò nghut ri. ³²Byù ajùm ayò gi, Yhâng é lhíngkhkyuq má zung tô akò; haú bang gi, Yhang lé, “Wú aq, náng nu eq nunggu pé gi, nang lé hui naú luí, shinggan má láng bum akò.” ga taí kyô akò nghut ri.

³³Haú hkûn, Yhang gi, “Ô pé gi, Ngá nu eq Ngá gu pé nghut akò lúhú?” ga myi kat ri.

³⁴Hau htâng, Yhang gi, Yhâng é lhíngkhkyuq má zung hkyuq tô é bang lé wú mù, taí é gi, “Shí bang gi, Ngá nu eq Ngá é gumang wùi nghut bê! ³⁵Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê.” gâ ri.

Kyôshi Sân É Dangtú

Mht 13:1-23; Luk 8:4-15

4 Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhíngkhkyuq má byù moq mó lúm yán zîng lé lo bùm kô é yanmai, Yhang gi, nhông hkaú mà é lhaí má wang zung tô ri; haú u lé, byù moq mó gi, nhông yàm gin-gau htoq má nyi míng bum akò nghut ri. ²Yhang gi, haú bang lé, dangtú pé dông myo myo mhoqshit byí nyi ri; Yhang mhoqshit é má, ³“Gyo wú keq! Kyô hkyó sù rayuq gi, kyôshi san rà gâ htoq e ló ri. ⁴Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri. ⁵Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq ló kôle, ⁶amyit a wó chin hing é nghut mù, bui htoq lô jáng, lhap kyuq

pyám bê nghut ri. ⁷Dum ra-am gi, zuyóm hkaû má gyó ang luí, zubyap haú pé kô lò mù, wup pyâm é yanmai, ashi a wó zui nghut ri. ⁸Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri.” gâ ri.

⁹Hau htâng, Yesuq dum taí é gi, “Gyo yù rà nohkyap dap sù gi, gyô yù sháng gaq.” gâ ri.

¹⁰Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô. ¹¹Haú hkûn, Yhang, yhangmoq lé taí kyô é gi, “Garai Gasâng é mingdán eq sêng é sê gyo wuí é hkyô lé sé gyo rà ahko ahkáng, nungmoq lé byí to lugù nghut bê. Nghut kôlhang, góbâng é matú gi, jung hkangmó lé dangtú đồng chyat taí é nghut lhê. ¹²Haú mù luí, 'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lhang taú lò mù, mara hkyut pyám byí é hui kó rà nghut lhê!’” gâ ri. ga tô ri.

¹³Hau htâng, Yhang, yhangmoq lé dum xoq taí é gi, “Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó rà lhú? ¹⁴Yò mù zui sù san kat é kyôshi gi, mungdang nghut lhê. ¹⁵Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byí ri. ¹⁶Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô. ¹⁷Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wúhke é eq

zing-rí é pé hui kôjáng, hân hân htak ló byuq kó rà nghut lhê. ¹⁸Dum ra-am nghut jáng, zuyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyâm é yanmai, ashi a wó zui dut kó rà nghut lhê. ²⁰Ra-am kúm gi, myihpún bo é jang má gyó âng é kyôshi eq wuí akô; yhangmoq gi, haú mungdang lé gyô yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zúì lò kó rà nghut lhê.” gâ ri.

Myibung Htûn É Hkyô

Luk 8:16-18

²¹Yesuq, yhangmoq lé xoq taí é gi, “Nungmoq gi, myibung lé yù mù, tsungjang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lhú? ²²Hkâsu mù gâ le, haq tô é zè haí jung le htoq ze lò rà eq, zaú tô é pé haí jung le byông htoq lò rà nghut lhê. ²³Gyô yù rà nohkyap dap sù ó yuq nghut kôle, gyô yù sháng gaq.” gâ ri.

²⁴Hau htoq agó, Yhang dum taí é gi, “Nungmoq gi, wó gyô yu é hkyô lé rago myit wú keq; nungmoq lik byí é bung èq, nungmoq lé dum lik byi rà nghut lhê; hau htoq lhang myo shoq wó kó rà nghut lhê. ²⁵Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê.” gâ ri.

Kyôshi Yuq Kô Lo É Dangtú

²⁶Hau htâng, Yhang dum xoq taí é gi, “Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷Byù haú yuq gi, myín lé yhup

tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sânghí má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê.” gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰ Yesuq dum xoq taí é gi, “Garai Gasâng é mingdán lé, hai èq lhoq whuí wú râ lúhú? Haí jung dangtú yù mù, shit wú râ lúhú? ³¹ Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê.” gâ ri.

³³ Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zím Pyâm É Hkyô

Mht 8:23-27; Luk 8:22-25

³⁵ Haú nyí, myinhâng lé, Yesuq gi, Yhâng é chángzô pé lé, “Nga-nhúng nhông hé hpoq shut dap e lô sháng.” ga taí ri. ³⁶ Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap lô bekô; gotú lhai pé le, yhangmoq eq rahá bo gû dap lô akô nghut ri. ³⁷ Haú u

lé, laidun mó jé lô mù, wuilhêng hta toq lô luí, lhai má lo bat hâng é yanmai, wui byíng lô bê nghut ri. ³⁸ Haú hkûn, Yesuq gi, lhai htâng má uhkuq hkuq mù yhup myhí tô ri; haú chángzô pé gi, Yhang lé nhaú pun luí “Sarâ ê, nga-nhúng myup shi lô râ dut é lé, nàng a chiq byi lúhú?” ga taí akô nghut ri.

³⁹ Yesuq gi, toq mù, laidun lé tan luí, wuilhêng lé, “Zim aq.” ga taí kat jáng, haú laidun num lô byuq luí, banshoq zím byuq bê nghut ri.

⁴⁰ Hau htâng, Yhang gi, Yhâng é chángzô pé lé, “Haí mù, haú-í gyuq bum akô lúhú? Nungmoq gi, lumjúng myit a bò shi kó lúhú?” ga taí ri.

⁴¹ Yhangmoq gi, gyai yhang gyuq dan bùm kômù, “Shí yuq gi, hkasú é byù nghut lhê làh? Lài eq wuilhêng pé lhang gi, Yhâng é dang lé gyo byí ri-nhung!” ga luí, rayuq eq rayuq myí lhum bum akô nghut ri.

Nat Gang Hkat Htoq Pyâm É Hkyô

Mht 8:28-34; Luk 8:26-39

5 Yhangmoq gi, nhông hé hpoq mâ é Gerase byu pê é mau má jé dap e lô akô. ² Yesuq lhai mai htoq lô é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuí èq lhang a wó tuí zing wú kó nghut ri. ⁴ Hkâsu mù gâ le, adàm dàm, yhâng é loq eq hkyí má shamtoq-tuí èq tuí tô wú kôlhang, yhang gi, loq mâ é shamtoq-tui pé lé llang hpyit pyám pyám kut mù, hkyí mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dún cheq wún ri.

⁶ Yhang gi, Yesuq lé, we mai myang kat jáng, din e lô mù, Yhâng é hí má hky-ihput htuq ngop luí, ⁷ htê mó èq, “My-

hang htâng é Garaí Yhangzo Yesuq è! Nàng gi, ngò eq haí sêng lhê lúh? Nàng gi, ngo lé a zing-ri râ matú, Garai Gasâng hí má danggidiq byi laq.” ga taí garú ri. ⁸Haí mù gâ le, Yesuq gi, yhang lé, “Agè ashop é nat nàng ê, byù shí yuq chyáng mai htoq ló aq.” ga taí kat é yan-mai nghut ri.

⁹Hau htâng, Yesuq gi, “Náng myîng haí gâ lhê?” ga, yhang lé myi jáng, yhang gi, “Ngamoq gi, myo myo nghut é yan-mai, Legio gâ lhê.” ga tú taí ri. ¹⁰Hau htâng, yhang gi, haú jowò mai yhang-moq lé a kôn pyám râ matú, Yesuq lé dum dung dung kut nyi ri.

¹¹Haú u lé, waq rajùm mó gi, bùm yàm má dû but zô nyi bum akò nghut ri.

¹²Haú mù luí, nat gâng pé gi, “Ngamoq lé, waq pê chyáng nhang kat luí, yhang-moq chyáng wàng nhâng laq.” ga luí, Yesuq lé dung akò. ¹³Haú hkún, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pê chyáng wang ló byuq bekò nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekò nghut ri.

¹⁴Waq zúng bang gi, hpang din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut laí lò bê hkyô lé, ê htoq wú akò nghut ri.

¹⁵Yhangmoq gi, Yesuq chyáng jé lé kô é hkún, nat gang myo myo wang júng wú é sù, mebu wut luí, byù gè rayuq su zung to lánng é lé myàng kômù, gyuq dan bùm bekò nghut ri. ¹⁶Haú hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé taí kyo akò nghut ri. ¹⁷Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tóngbán akò nghut ri.

¹⁸Yesuq lhaí hkaú má wang ló é u lé, haú nat gâng pé wang júng laí lò bê sù gi, Yesuq htâng cháng râ matú, Yesuq lé dung tóngbán ri. ¹⁹Nghut kôh-ang, Yesuq gi, yhang lé ahkáng a byi e za, “Nàng, yhùm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé ló taí kyo aq.” ga taí kat ri. ²⁰Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkún, wó gyô é bang banshoq gi, mauhong bum akò nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhîngkhyuq má lé zîng bum akò nghut ri; ²²haú hkún, Ya-iruoq gâ é, tara-jong má up bang mâ é rayuq gi, haú má lé luí, Yesuq lé myang kat jáng, Yhâng é hkyî wang má paí gop to mù, ²³“Ngá zo byizo gi, kâng byit ló nyi ri; yhang ge lò mù asak dum duí shi sháng gaq, nàng lé mù, yhâng é ahtoq má loq lé ke byi laq.” ga, wum kat dúng tóngbán nyi ri. ²⁴Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyín chyap wún bum akò.

²⁵Haú hkún, raxe í zân suí yui nyi é myiwe myhí rayuq le haú hpúng má bo tô ri. ²⁶Yhang gi, chi sará myo myô pé chyáng yhang wó é ngunzè banshoq lhoq pán mù, nò hkâm luí yâ wú kôh-ang, ge é hkyô a joq é htoq agó, je lháng wuîhke lò ri. ²⁷Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri. ²⁸Haí mù luí gâ le, yhang gi, “Ngò,

*5:20 Dekapoli gâ é gi, Grik dòng myuq raxê lé gâ lhê.

Yhang é bu má za lhang é wó záng é nghut le gi, ge byuq râ nghut lhê.” ga wó myit é yanmai, haú su kut é nghut ri. ²⁹ Haú hkûn jáng, yhang chyáng suí yui é kân byuq luí, yhang gi, hpuzò nyi é mai wó lut bê hkyô lé, yhanggùng má sê gyô kat bê nghut ri.

³⁰ Yesuq gi, Yhang é gùng mai hpung-wup a-tsam htoq lô é lé, radá dâm châng sê kat luí, byù moq mó shut lhing wú mù, “Ngá é bu má ó yuq záng bê lú?” ga myi kat ri.

³¹ Haú hkûn, Yhang é chángzò pé gi, “Náng é lhinghkyuq má byù ajùm ayò chyín chyap nyi é lé, myang to luí nhing, 'Ngo lé, ó yuq záng bê lú?' nghu myi lhê lú?” ga tú taí kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashí nghut ri. ³³ Haú hkûn, myiwe myhí haú gi, yhang chyáng hkâsu dut laí lò bê hkyô lé sê é yanmai, Yesuq é hí má lé mù, gyuq nán é èq Yhang é hkyí wang má ngóm gop to luí, yhang chyáng dut laí lò bê hkyô banshoq lé taí kyô ri.

³⁴ Haú mù, Yesuq gi, myiwe myhí haú lé, “Byizo é, náng é lumjín myit gi, nàng lé lhoq gê byi bê nghut ri; náng é nõhpyo ge byuq bê nghut ri; ngón za lô aq hkoi!” ga taí ri.

³⁵ Yesuq gi, dang ru taí nyi ashí hkûn, tarajong má up sù Ya-irúq é yhùm mai byù ra-am jé lé mù, “Nang é byizo gi, shi byuq bê; haí mù luí, haú sará lé lhoq hkyik nyi lhê lú?” ga luí, lé taí kat akô.

³⁶ Yesuq gi, haú bang taí é dang lé gyô lhai pyám mù, “Hkâgyuq, za lumjín aq.” ga, haú tarajong má up sù lé taí kat ri.

³⁷ Hau htàng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htàng a cháng nhâng nghut ri. ³⁸ Yhangmoq, haú tarajong má up sù é yhùm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri.

³⁹ Yhang gi, yhúmhaú shut wang lô mù, haú bang lé, “Haí mù, yón ngau gabyông nyi bum akô lú? Haú zoshâng gi, shi byuq é a nghut, yhup myhí tô é sheq ru nghut lhê.” ga taí ri. ⁴⁰ Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhangnu yhangwa nhik eq Yhang é chángzò pé lé za shui luí, zoshâng lé lhez tô é gok má wang e akô nghut ri. ⁴¹ Yesuq gi, myiwe zo hau é loq má zú to mù, “Talihta ku-mi” (haú é lichyúm gi, “Myiwe zo é, ngò, nang lé taí bá, toq aq.” gâ é nghut lhê.) ga taí ri. ⁴² Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zò jung byi tso râ matú le, yhangmoq lé taí ri.

Yhumsing Wà Má

Myoqdong A Wó É Hkyô

Mht 13:53-58; Luk 4:16-30

6 Yesuq gi, haú jowò mai htoq e lô mù, Yhang é yhum mau shut taú lô ri; Yhang é chángzò pé le, Yhang eq rahá bo châng lô akô nghut ri. ² Bánno buinyi jé jáng, Yhang gi, tarajong má mhoqshit hi lô ri; wó gyô é bang myo myo gi, gyô maú byuq kôluí, “Byù shí yuq gi, haú pé lé hkámá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lhang kut lhê laq?” ³ Shí yuq gi, Mariq é yhangzo, laksîma hpó nghut lhê, a nghut lú? Yhang gi, Yakuq, Yose, Yudaq, Simun pê é yhangmang nghut lhê, a nghut lú? Yhang nhammó pé le, nganhúng eq rahá nghut nyi lhê, a nghut kô lú?” ga luí, Yhang lé myit a ngón dut bùm bekô nghut ri.

⁴Yesuq, yhangmoq lé taí é gi, “Myiqhtoi rayuq gi, yhumsing é yhum mau, yhâng é buinùm ji-myi wuè eq yhumsing é yhùm má za, myoqdong a lhaq wó wú é nghut lhê.” gâ ri. ⁵Yhang gi, nò byù ra-am lé loq ke byi mù, lhoq gê byí é mai lai luí, gotú laklaí kumlhá haí le, haú má a wó kut shit nghut ri. ⁶Haú mù, Yesuq gi, yhangmoq lumjǐng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷Yesuq gi, haú lagyo raxe í yuq lé wut yù mù, agè ashop é nat pé lé ûng rã a-tsam byi luí, í yuq yuq kut nhang htoq kat ri.

⁸Yhang, yhangmoq lé châng pying kat é dang gi, “Hkyowui é matú má, dumb-áng mai lai luí, zoshuq le, etap le, ngùn le, gotú haí le, hkâyü chung kó; ⁹hkyî-tsung kúm gi, tsûng chung keq; nghut kôlhang, bu í dung hkâwut chung kó. ¹⁰Hká má nghut kôlhang, rayhùm yhùm má nungmoq wang bǐng kô é nghut le gi, haú wâ mai dum htoq ló é buinyì jé shoq, haú yhùm má za nyi nyi keq. ¹¹Jowò rawò wò mâ é bang, nungmoq lé a lhom hap yù, a lhom gyo byi kô é nghut jǎng, nungmoq lé yhangmoq a lhom hap yu é saksé dut shǎng gaq, nungmoq é hkyiwa má dap é hpuilhau lé ko hkyô pyám to mù, haú jowò mai htoq ló keq.” gâ ri.

¹²Haú mù, yhangmoq gi, htoq e ló luí, myit lhing rã é hkyô, byu pé lé hkô kyô akô. ¹³Hau htoq agó, yhangmoq gi, nat gǎng pé myo myo lé hkat htoq pyám byi mù, no é bang myo myo lé le xû but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴Yesuq é mying hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, “Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri.” ga luí, taí bum akô nghut ri.

¹⁵Ra-am gi, “Yhang gi, Eliyaq nghut ri.” ga taí akô nghut ri.

Dum, ra-am taí kô é gi, “Yhang gi, hí hpyang lhê é myiqhtoi pé su, myiqhtoi rayuq nghut ri.” gâ ri.

¹⁶Herut kúm gi, haú lé wó gyo jǎng, “Ngò, ulhum hpyit pyám byí é Yohan gi, shi é mai dum dui toq bu-nhung!” ga taí ri.

¹⁷Herut gi, yhanggu Hpilip é yhangmyi Herudiaq lé hǎng yu pyâm é hkyô é yanmai, Yohan lé chyup tuí yù nhǎng mù, htóng hkyô pyám nhang wú é sù nghut lhê. ¹⁸Hkásu mù gâ le, Yohan gi, Herut lé, “Nǎng, nunggu é yhangmyi lé hǎng yu é gi, tará a wang é nghut lhê.” ga luí, taí byí nyi é yanmai nghut ri. ¹⁹Haú mù, Herudiaq gi, Yohan lé gyai a jú dut byuq luí, sat pyám naú kôlhang, a wó sat dut nyi ri. ²⁰Haí mù gâ le, Herut gi, Yohan, dingmán chyoiyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jǎng, gyô nhúng nhǎng byuq kôlhang, yhang taí é dang pé lé ru gyô nau nyi ashí nghut ri.

²¹Nghut kôlhang, Herut gi, yhǎng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyí gi, Herudiaq é matú, buinyì gè dut bê nghut ri. ²²Herudiaq é yhangzo byizo gi, wang lé lô mù, gó shit é hkûn,

Herut eq yhang é bing pé gi, myit ngón bum akô nghut ri.

Haû mù, hkohkâm gi, myiwe zo haû lé, “Nàng ô nau é haî nghut kôle, dung aq, ngò nàng lé byi râ nghut lhê.” ga, dakam é danggidiq byî ri. ²³Hau htoq agó, yhang gi, myiwe zo haû lé, “Nàng dung é haî nghut kôle, ngò byi râ; ngá é mingdán rawuí gû lháng, byi râ nghut lhê.” ga, dakam é danggidiq byî ri.

²⁴Haú hkûn, myiwe zo haû gi, htoq lô mù, yhang nu lé, “Haî dúng le gè râ laq?” ga myi jáng, yhangnu gi, “Wui-myhup Sará Yohan é ulhum dung aq.” ga tû taí kat ri.

²⁵Myiwe zo haû gi, radá dâm hân hân wang lô mù, hkohkâm lé, “Ahkuí yhang, Wui-myhup Sará Yohan é ulhum lé, bó má kat mù byi laq.” ga, dúng tôngbán ri.

²⁶Haû su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bing pê é myoqdong lé tê nau é yanmai le, myiwe zo haû taí é dang lé a kâm he pyám lo nghut ri. ²⁷Haû mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haû mù, haú yuq gi, htóng hkaú má ê luí, Yohan é ulhum lé, ê hpyit mù, ²⁸bó má kat luí, myiwe zo haû lé lo byî ri; myiwe zo haû gi, ulhum haû lé, yhangnú chyáng yu lô byî ri. ²⁹Yohan é chángzô pé gi, haú hkyô lé wó gyo kôjáng, yhang é mâng lé lé yû luí, lup má lô myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰Lagyo pé gi, Yesuq chyáng dum jé zing lò kômù, yhangmoq kut lai lo é hkyô pé eq mhoqshit bê hkyô pé ban-shoq, Yhang lé taí kyô akô nghut ri. ³¹Hau htâng, byù myo myo gi, yhang-

moq chyáng htoq htoq wàng wàng kut nyí kô é yanmai, yhangmoq gi, zang zo ahkyîng lháng a wó kó nghut ri. Haû mù, Yesuq gi, chángzô pé lé, “Nga-nhúng, tsím tsâm é jowò ralhüm má ê mù, ê nõ yù sháng.” ga taí ri.

³²Haû mù, yhangmoq gi, yhangmoq baú lhaî racham má ji mù, tsím tsâm é jowò shut e lô akô nghut ri. ³³Nghut kôlhang, yhangmoq e lô é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyô châng din é kômù, yhangmoq é hí má jé to lánng akô nghut ri. ³⁴Yesuq gi, lhaî mai gyó dap lô é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byî hi lô bê nghut ri.

³⁵Buì gyum lô yâm jé jáng, Yhang é chángzô pé gi, lé lô kômù, Yhang lé, “Shí má gi, tsím tsâm é jowò nghut é htoq agó, buì le gyum lô bê; ³⁶yhangmoq gi, awui ayàm má é yhüm pé eq wà pé má, zoshuq lô ho wui zo kó sháng gaq, yhangmoq lé lô nhâng aq hkoi.” ga taí akô nghut ri.

³⁷Haú hkûn, Yhang gi, “Nungmoq, yhangmoq lé rajung jung byi tso keq.” ga tû taí jáng, yhangmoq gi, “Shí myhô é bang zo râ matú, ngamoq gi, ê luí, denari[†] í sho èq muk é wuí byi ra râ luq?” ga dum taú myí akô nghut ri.

³⁸Nghut kôlhang, Yhang gi, “Nungmoq chyáng muk hkâ-myhó wó akô? È wú wú keq.” ga myí ri. Haû mù, yhangmoq gi, myang hô jáng, “Muk ngo long eq ngozo í du wó lhê.” ga, dum tû taí akô nghut ri.

³⁹Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhang é chángzô pé lé taí kat ri. ⁴⁰Haû mù, shiwa byu pé gi, rashô shô kut le, ngo xê xê kut le, ah-

[†]6:37 Denari rachap gi, byù rayuq é ra-nyí lhê é zuihpau eq wuí ri.

púng hpúng zung tô bùm bekô nghut ri. ⁴¹ Yesuq gi, haû muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pê hí má châng hkat to byi râ matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. ⁴² Yhangmoq banshoq bang gi, zô gyí bùm bekô nghut ri. ⁴³ Hau htâng, haû chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haû hkún, zô é bang gi, yuqgè wuì baú lháng, byù du ngo hkyíng nghut ri.

Yesuq, Wuì Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haû shiwa byu pé lé byo ló nhang nyi é hkún jáng, Yhâng é chángzô pé lé lhaí má wang ji nhâng mù, tú tap má é Bet-saida và mó shut dap ló lán nhang ri. ⁴⁶ Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhaí gi, nhông gùng má jé tô é u lé, Yesuq gi, Yhang baú za myí htoq má nyi tô ashí nghut ri. ⁴⁸ Lai tau mut é yanmai, haû chángzô pé gi, lhaí lhu wuíhkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló râ dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akô nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, “Hkâgyuq kó. Ngò ru nghut lhê; zim za nyi keq.” gâ ri. ⁵¹ Hau htâng, Yhang gi, lhaí htoq má yhangmoq eq rahá ê doq ji jáng, lai gi, zim byuq bê nghut ri; haû mù,

yhangmoq gi, gyai yhang mauhong byuq bùm bekô nghut ri. ⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myit-bun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhaí lé haû má ló shap tô akô nghut ri. ⁵⁴ Yhangmoq lhaí mai gyó é hkún jáng, byu pé gi, Yesuq lé lhom wú sê akô nghut ri. ⁵⁵ Haû mù, yhangmoq gi, haû mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkanmó má, shuí lé lo bum akô nghut ri. ⁵⁶ Yesuq jé é và hkanmó, myuq hkanmó, awuí ayàm mâ é và hkanmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lháng, haû bang lé byi záng nhâng râ matú, Yhang lé dúng tôngbán akô. Yhang lé záng é lhunglhang bang gi, lhoq gê byí é huí akô nghut ri.

A Sanséng Dut Nhang É Hkyô Pé

Mht 15:1-20

7 Haû Hparishe pé eq tarâ sará pé ram gi, Yerusalem và mó mai jé lé lò kômù, Yesuq é nàm má lé zup zíng bum akô. ² Haû hkún, Yhâng é chángzô pé ram gi, htúngli dòng a chí pyâm é, a sanséng é loq èq zo shuq nyí kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é íchýí îwâ pê é htúngli lé châng é bang nghut lhê mù luí, loq hí a chí é gi, haí le a zô wú kó nghut ri. ⁴ Yhangmoq gi, gai pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chônkon pé lé chí é htúngli gotú pé lé le, châng akô nghut ri.)

⁵ Haû mù, Hparishe pé eq tarâ sará pé gi, Yesuq lé, “Náng é chángzô pé gi, haí mù luí, íchýí îwâ pê é htúngli lé a châng e za, a sanséng é loq èq zo shuq nyi akô lhu?” ga myí akô.

⁶Haú hkûn, Yesuq gi, yhangmoq lé, “Gegùn labyoq kut bang ê, nungmoq eq séng luí myiqhtoi Esai-aq htoí tô é dang má,

'Byù shí bang gi, nhut htoq mai za Ngo lé hkunggâ akô; yhangmoq é myit nhiklhumi gi, Ngò eq wê gâng nyi akô.

⁷Yhangmoq gi, akôm má za, Ngo lé noqkuq nyi akô; hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.^z

ga kâ tô é gi, têng ri. ⁸Nungmoq gi, Garai Gasang tô tô é hkunmó lé tô pyám luí, byu é htungli lé za, myhik zing tô akò nghut ri.” ga luí tû taí ri.

⁹Hau htâng, Yhang xoq taí é gi, “Nungmoq gi, yhumsing é htungli lé za cháng râ matú, Garai Gasâng é hkunmó lé he-ngik pyâm é má, hpaqchyí gyaí bo akò nghut ri. ¹⁰Hkâsu mù gà le, Mosheq gi, 'Nungmoq é înu îwa lé, hkungga keq.^a ga le, 'Înu îwa lé, nhîng é sù ó yuq nghut kôle, sat pyâm é hui râ lhê.^b ga le, kâ tô é nghut lhê. ¹¹Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô. ¹²Haú mù, háu yuq lé, yhângnu yhângwâ é matú, haí a kut byi nhâng lô é dông dut bê nghut ri. ¹³Haú dông mai, nungmoq gi, nungmoq chung gyó lo é htungli é yanmai, Garai Gasâng é mungdang lé he-ngik pyâm akô; háu sù é hkyô myo myo lé le, nungmoq kut akò nghut ri.” gâ ri.

¹⁴Yesuq gi, shiwa byu pé lé Yhâng chyáng dum wut yù mù, taí é gi, “Nungmoq banshoq bang, ngò taí é lé gyô yù mù, sé lo keq; ¹⁵Shinggan mai wang lo é haí jung le, byù lé a sanséng dut nhang é

a nghut, nghut kôlhang, byu é unghkaú mai htoq lô é zè kúm gi, byù lé a sanséng dut nhang lhê.” gâ ri. ¹⁶(Gyo râ nohkyap dap é sù gi, gyô yù sháng gaq.)” ga taí ri.^z

¹⁷Yhang gi, byù moq mó mai htoq lô mù, yhúmhkaú má jé wang lô é hkûn, Yhâng é chángzô pé gi, dangtú haú eq séng luí, Yhang lé lhom myí akò nghut ri. ¹⁸Haú mù, Yhang gi, yhangmoq lé, “Nungmoq gi, haú-í yhang go akò luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lúh? ¹⁹Hkâsu mù gà lé, háu gi, byu é myit nhiklhumi hkaú má wang lô é a nghut e za, wamdau hkaú má sheq wang lô é nghut mù, shinggan shut dum lhoq htoq pyâm é nghut lhê.” ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

²⁰Hau htoq agó, Yhang xoq taí é gi, “Byù mai htoq lô é haí jung le, byù lé a sanséng nhâng wó dut é nghut lhê. ²¹Hkâsu mù gà lé, ahkaú mai htoq lo é gi, byu pé é myit mai htoq lô é nghut mù, agè ashop é dông myit é hkyô pé, ashop é dông gungsho zùm yap é hkyô, hkaú é hkyô, byù sat é hkyô, su-myi sulàng lú hkyô, ²²myoqnoq é hkyô, agè ashop é hkyô, mhaú zô é hkyô, achaq achyut zùm yap lhúm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri.” gâ ri.

Tûngbau Myiwe Myhí Rayuq É Lumjîng Myit

Mht 15:21-28

²⁴Yesuq gi, háu jowò mai htoq lô mù, Turuq eq Sidun maukyo shut e ló luí, yhúm ralhumi má wang ê ri; Yhang nyi

^z7:16 Bun zo shí gi, Chyúmlaíká ra-am má bo lhê, ra-am má a bò.

^a7:7 Esai 29:13

^a7:10 Htoq Lô 20:12

^b7:10 Htoq Lô 21:17

é hkyô lé, ó yuq lé lé a sé nhâng naù kôlhang, a wó zaú to nghut ri. ²⁵ Haù mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyí wang má lé paí gop to luí, ²⁶ yhang zô chyáng mai nat gang lé hkat htoq pyám byi rã matú, Yhang lé dting tôngbán ri. Myiwe haù gi, Suru-Hpiniki mau mã é Grik byuhú nghut ri.

²⁷ Yesuq gi, “Zo wuí[†] hí zô gyi kó sháng gaq; haí mù gâ le, zô wui chyáng mã é zoshuq lé yù mù, hkuí pé[§] lé byi tsô é jung a nghut.” ga yhang lé taí kyô ri.

²⁸ Haù hkûn, yhang gi, “Yhumsîng ê! Haù kúm nghut ri; nghut kôlhang, siboi ô mã é hkuí lhang, zô wui é zô myhit shuq htâng lé, ge zo lhê a nghut lú?” ga dum tũ taí ri.

²⁹ Haù mù, Yesuq gi, yhang lé, “Nàng tũ taí é dang hau é yanmai, ló lo aq hkoi; haù nat gang gi, nung zô chyáng mai htoq ló byuq bê nghut ri.” ga taí kat ri.

³⁰ Myiwe myhí haù gi, yhâm mã dum taú jé lo é hkûn, yhang zo chong htoq má leq to lánng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gê Byí É Hkyô

³¹ Yesuq gi, Turuq mau mai dum htoq ló mù, Sidun mai sô laí ló luí, Dekapoli mau hkaù dông laí byit mù, Galile nhông shut gyó jé ló ri. ³² Haù hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé ló kômù, haù yuq é ahtaq má loq ke byi rã matú, Yhang lé dting tôngbán akô nghut ri.

³³ Yesuq gi, haù yuq lé baú za byù hpúng mai shuí htoq yù mù, yhâng é nohkyúng má loqnyhui htaù háng byi luí, sôkan byé tik yù mù, haù yuq é shô má htau byí ri. ³⁴ Hau htâng, Yhang

gi, mauhkûng shut tu wú mù, soq mó shê luí, “Ehpahta!” (Lichyúm gi, “Bóng aq hkoi!”) ga luí, haù yuq lé taí kat ri. ³⁵ Haù hkûn, haù yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haù hkyô ó lé le a taí kyo rã matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri. ³⁷ Byu pé gi, gyai yhang mauhong byuq bùm kôluí, “Yhang gi, haí lé le, ge é dông chyat kut ri; nojit sũ lé, wó yo shoq, dang a hkyâng sũ lé, wó nyô shoq, kut byi bê nghut ri.” ga luí, taí bum akô nghut ri.

Byù Myi Hkyîng Lé Byi Tsô É Hkyô

Mht 15:32-39

8 Haù yoq má, gotũ byù moq mó gi, lé zîng bum akô; haù bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² “Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. ³ Yhangmoq chyáng mã é ra-am gi, mau we mai lé é bang nghut é yanmai, yhangmoq lé, zòmút gũ yhâm shut nhang kat é nghut le gi, hkyolat má mutyut yut é ló hui kó rã nghut lhê.” ga taí ri.

⁴ Haù hkûn, Yhâng é chángzô pé gi, Yhang lé, “Ísu é yoso má nhîng, shí myhò bang lé luq shoq byi tso rã zoshuq gi, hkâmá ê yù rã lú?” ga taí akô.

⁵ Yesuq gi, “Nungmoq, muk hkâ-myhó long wó akô lú?” ga taú myi jáng, yhangmoq gi, “Nyhít long.” ga, dum tũ taí akô nghut ri.

⁶ Haù mù, Yhang gi, byù hpúng lé myigùng htoq má zùng nhang to luí, muk haù nyhit long lé yù mù, jeju ban hkya-on jáng, myhik hpé luí, haù bang lé gãm byi rã matú, Yhâng é chángzô pé

[†]7:27 Zo wuí gâ é gi, Yudaq byu pé lé gâ é nghut lhê.

[§]7:27 Hkuí pé gâ é gi, tûngbau pé lé gâ é nghut lhê.

lé byí kat ri; haú mù, yhangmoq gi, haú bang lé gàm byí akô nghut ri. ⁷Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gàm byí nhang ri. ⁸Yuq hkangmó zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kó nghut ri. ⁹Zô é bang gi, byù myi hkyíng kô nghut ri; Yesuq gi, haú bang lé, nhang kat luí, ¹⁰Yhâng é chángzô pé eq rahá, lhaí má wang ji mù, Dalamanuhta mau má ê jé akô nghut ri.

¹¹Hparishe pé gi, lé mù, Yesuq eq dang htíng htíng lhúm akô; hau htoq agó, yhangmoq gi, mauhkúng má é kumlhá lé dúng é dông, Yhang lé chyam wú akô nghut ri. ¹²Yesuq gi, myit nò-kying kying luí, yhangmoq lé taí é gi, “Haí mù luí, shí ipyat lhê é byu pé gi, limik kumlhá dúng akô lú? Ngò teng za taí kôlé, shí ipyat má é bang lé, hai kumlhá le tún shit râ a nghut.” gâ ri. ¹³Hau htâng, Yhang gi, yhangmoq lé pyâm to mù, lhaí má dum taú wang ló luí, tú tap shut gû dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴Haú chángzô pé gi, muk yu chùng râ lé tô-myhí pyám kôluí, lhaí hkaú má muk ralong za ru wó akô nghut ri. ¹⁵Yesuq gi, yhangmoq lé, “Nungmoq gi, Hparishe pé eq Herut é múnchi** lé, sidiq luí, koi pyâm nyí keq.” ga taí ri.

¹⁶Haú hkûn, yhangmoq gi, “Nga-nhùng chyáng muk a bo é yanmai, haú su ga taí é nghut ri.” ga luí, rayuq eq rayuq taí lhúm bum akô nghut ri.

¹⁷Haú su ga taí lhúm nyí kô é lé Yesuq sé jáng, yhangmoq lé, “Nungmoq gi, muk a bo é hkyô lé, haí mù taí lhúm

nyí akô lú? Ahkuí jé shoq, nungmoq gi, a byu-myàng, a sê gyo shi kó lú? Nungmoq é myit nhiklhum gi, ru htan nyí ashí kó lú? ¹⁸Myoq dap to kôluí nhíng, a myàng kó lú? Nohkyap dap to kôluí nhíng, a wó gyo kó lú? ¹⁹Ngò, muk ngo long lé myhik hpé mù, byù ngo hkyíng lé byi tsô é hkûn, zô myhit shuq htâng lé, nungmoq hkâ-myhó mung wó guq tsíng yu é lé, bun ashí kó lú?” ga myi jáng, yhangmoq gi, “Raxe í mung.” ga tú taí akô.

²⁰Dum, Yesuq gi, “Ngò, muk nyhit long lé myhik hpé mù, byù myi hkyíng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsíng yù kô é lú?” ga myi jáng, yhangmoq gi, “Nyhit mung.” ga dum tú taí akô.

²¹Haú hkûn, Yesuq gi, “Haú nghut le nhíng, ahkuí le, a sê gyo shi kó lú?” ga, yhangmoq lé myí ri.

Myoqjit Sù Rayuq Lé Lhoq Gê Byí É Hkyô

²²Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lò mù, haú yuq lé záng byi râ matú, dúng tôngbán akô. ²³Yesuq gi, myoqjit sù haú yuq é loq lé zui mù, wà shinggan shut shuí htoq ló luí, yhâng é myoq má sòkan byé tik byi mù, loq ke byi luí, “Nàng, rajung jung lé myang ri lú?” ga myí kat ri.

²⁴Haú jáng, yhang gi, tu wú kat luí, “Byu pé gi, sikgâm su dut luí, hkyô sò wún é lé, ngò myang ri.” ga taí ri.

²⁵Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lò mù, ge byuq luí, haí lé le san za myàng bê nghut ri. ²⁶Yesuq gi, haú yuq lé, “Wà hkaú má

** 8:15 Shí má taí é *múnchi* gi, Hparishe pé eq Herut é mhoqshit hkyô lé, lhoq pyo é lé gâ lhê.

hkâwang ló lo.” ga taí luí, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayâm mâ é wà pé shut e ló é hkûn, hkyô má, Yesuq gi, chángzô pé lé, “Byu pé gi, ngo lé ó yuq nghut lhê ga, taí akô lhú?” ga myí ri.

²⁸ Haú hkûn, yhangmoq gi, “Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô.” ga, Yhang lé tú taí akô.

²⁹ Yesuq gi, “Nungmoq gi, ngo lé ó yuq nghut lhê nghu akô lhú?” ga, yhangmoq lé xoq myi jáng, Petruq gi, “Nàng gi, Hkrisduq^{††} nghut ri.” ga tú taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhqshít é má, “Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tará sará pê èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyi má, dum dui toq râ nghut lhê.” gâ ri. ³² Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, “Tsdán nàng, Ngá chyáng mai hpâng aq! Nàng gi, Garai Gasang eq sêng é hkyô

lé a myit e za, byù eq sêng é hkyô lé za myit é sù nghut ri.” ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, “Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, yhumsing é tapzîng lé waq chûng luí, cháng ra râ nghut lhê.

³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyú bò râ lhú? ³⁷ Byù gi, yhumsing é asak woi-nyí lé, hai èq wó htaí yù râ lhú? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpungwup shingkan bo é èq, haú chyoyúng maumang lagyô pé eq rahá jé lé é hkûn, hoq pyâm râ nghut lhê.”^c gâ ri.

9 Hau htâng, Yesuq gi, yhangmoq lé, “Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut.” ga taí ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm rallhum má doq ló akô; haú hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan

^{††}8:29 Grik dong *Hkrisduq* gâ é gi, xú but hui Sù gâ é lichyúm nghut mù, Hebre dong “Mesaia” gâ é eq rajung za nghut lhê.

lo ri; myidàm htoq má, ó yuq le haû-í hpyû shoq a wó xaû hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhûm nyi akô.

⁵ Haû mù, Petruq gi, Yesuq lé, “Rabai ê, shí jowò má nga-nhúng nyi le ge ri; haû mù, Náng é matú ralhûm, Mosheq é matú ralhûm, Eliyaq é matú ralhûm kut, ngamoq lé, zúm sùm lhûm saí nhâng laq.” ga taí ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haû su gâ é nghut ri.

⁷ Hau htâng, mhut htoq lô luí, yhangmoq lé htop zing lô mù, mhut hkaû mai htoq lo é htê gi, “Shí yuq gi, Ngò chyt-dap é Ngá Zo nghut lhê; Yhâng é dang gyo keq.” gâ ri.

⁸ Haú hkûn jáng, chángzô pé gi, lhîngkhyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taû gyó lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ matú taí hkûm tô ri. ¹⁰ Chángzô pé gi, dang haú lé myit má kat to kôluí, “Shi é mai dum dui toq râ.” gâ é lichyúm lé, rayuq eq rayuq myí lhûm bum akô nghut ri.

¹¹ Hau htâng, yhangmoq gi, “Eliyaq hí lé ra râ nghut lhê ga, tará sará pé haí mù taí kô é lhú?” ga, Yesuq lé myí akô.

¹² Haú hkûn, Yesuq gi, “Eliyaq hí jé lé é gi, teng bê nghut luí, lhunglháng lé dum lajâng tô é nghut ri. Nghut kôlhâng, haû Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashí, a nghut kó lhú? ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é đông banshoq kut bekô nghut ri.” ga tû taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pè chyáng dum taû jé lô kô é hkûn, haú bâng é lhîngkhyuq má byù moq mó zing lé é lé le, tará sará pé, haú bang eq dang htíng htíng lhûm nyi kô é lé le, myang akô. ¹⁵ Haú má nyi tô é lhunglhâng bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

¹⁶ Haú hkûn, Yesuq gi, yhangmoq lé, “Nungmoq gi, yhangmoq eq haí lé dang htíng htíng lhûm nyi akô lhú?” ga myí ri.

¹⁷ Byù hpúng hkaû mâ é rayuq tû taí kat é gi, “Sará ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê. ¹⁸ Nat haû gi, yhâng chyáng wàng hkangmó, yhang lé myí htoq má lhoq leqbat nhang ri; haû mù, yhang gi, nhut mai guttsû htoq lhê, zuí kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhâng, yhangmoq a wó dut kó nghut ri.” gâ ri.

¹⁹ Haú hkûn, Yesuq gi, “Lumjínng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq.” ga taí kat ri.

²⁰ Haû mù, yhangmoq gi, yuqgè zo haú lé shuí lé lo akô; nat haû gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haû gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haú hkûn, Yesuq gi, yhângwa lé, “Yhang, isu dut é hkâ-myháng myáng bê lhú?” ga myi jáng, yhâng wa gi, “Zoshâng hkûn mai nghut bê. ²² Nat haû gi, yhang lé lhoq sat pyám naû mù, myi má le, wui má le, anum num lêng wàng nhang wú bê nghut lhê; nghut kôlhâng,

Nàng, rajung jung wó kut byî é nghut le gi, ngá hpe lé shogyo yù laq, garúm yù laq.” ga tâ taí ri.

²³ Yesuq gi, “Nàng, wó kut byî é nghut le gi, nghú, haí mù taí lhê lúh? Lumjínng myit bò su é matú gi, haí le wó dut lhê.” ga, yhang lé taí ri.

²⁴ Haú zôshang é yhangwa gi, radá dâm, “Ngò lumjínng lhê; nghut kôlhang, ngá é lumjínng myit gi, shaú ashí nghut é yanmai garúm yù laq.” ga taí garú ri.

²⁵ Yesuq gi, byù hpúng din zínng lé lô kô é lé, myàng jáng, haú agè ashop é nat lé, “Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo.” ga tâ kat ri.

²⁶ Haú hkún, nat haú gi, garu mù, zoshâng haú lé wum kat langhtân nhâng luí, htoq ló byuq bê. Zoshâng haú gi, shí mâng gùng su dut byuq é yanmai, byù myo myo gi, “Yhang shí bê nghut ri.” ga taí akô. ²⁷ Nghut kôlhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhkaú má wang ló é htâng, Yhâng é chángzô pé gi, “Ngamoq gi, haí mù, nat haú lé a wó hkat htoq é lúh?” ga, tsik za Yhang lé myí akô.

²⁹ Yesuq gi, “Haú jung nat lé gi, kyúđung é đông za a nghut jáng, wó hkat htoq râ a nghut.” ga, yhangmoq lé tâ taí ri.

³⁰ Yhangmoq gi, haú jowò mai htoq ló mù, Galile mau mai laí ló akô; nghut kôlhang, Yesuq gi, ó lé le a sé nhâng nàu nghut ri. ³¹ Haí mù gâ le, Yhang gi, “Haú Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghú râ nyí má, dum dui toq râ nghut lhê.” ga, Yhâng é chángzô pé lé mhoqshít byí nyi é yanmai nghut ri. ³² Yhâng é chángzô pé gi, dang haú lé a sê gyo

kôlhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lúh?

Mht 18:1-5; Luk 9:46-48

³³ Yhangmoq gi, Kaperna-um wà má jé e akô nghut ri. Yesuq gi, yhúmhkaú má nyi tô é hkún, chángzô pé lé, “Hkyô má, nungmoq, hai hkyô lé dang chyin chyin lhum kô é lúh?” ga myí ri. ³⁴ Nghut kôlhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghú é hkyô lé, hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haú chángzo raxe í yuq lé, wut yù luí, “Kô dik nàu sû ó yuq nghut kôle, tiq dik sû eq ban-shoq bâng é dui-nhâng zoshâng dut ra râ nghut lhê.” ga tâ ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gung má shap to luí, dum bún yù mù, yhangmoq lé taí é gi, ³⁷ “Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù ó yuq nghut kôle, Ngo lé hap yu é a nghut, Ngo lé nhang kat é Sù lé hap yu é le nghut lhê.” gâ ri.

Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gâ É Hkyô

Luk 9:49-50

³⁸ Haú hkún, Yohan gi, “Sarâ ê! Náng é myìng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkâm pyâm é nghut lhê.” ga tâ ri.

³⁹ Yesuq kúm gi, “Yhang lé hkâhkúm kó; Ngá myìng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut

nghut lhê. ⁴¹Ngò, nungmoq lé teng za taí kôlé, nungmoq gi, Hkrisduq eq sêng é bang nghut lhê gâ é yanmai, ngá é mying lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù rà za nghut lhê.

Mara Shut Nhang É Hkyô

Mht 18:6-9; Luk 17:1-2

⁴²Ngo lé lumjínq é zoshâng wuì mã é rayuq lé, mara kut shut nhang é sù gi, yhâng é lingzing má luqluí long mó túf hut byi luí, wuimau má é dú hkyó pyâm é huí é nghut lé gi, yhang é matú je gè rà nghut lhê. ⁴³Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraí ming wàng rà htoq má, loq raloq eq za ahtum abyuq é asak wó rà shut wàng le gi, náng é matú je ge ri. ⁴⁴(Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.)[†] ⁴⁵Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyí í hkyí dap luí, hkâ-nhám le, myiduoq a dat shum é ngaraí ming má dú hkyó pyâm é hui rà htoq má, hkyí rahkyí za dap luí, ahtum abyuq é asak wó rà shut wang le gi, náng é matú je ge ri. ⁴⁶(Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.) ⁴⁷Náng é myojí èq, nang lé mara kut shut nhang é nghut le gi, haú lé lap choq pyám aq; myojí í jí dap gú, ngaraí ming má dú hkyó pyâm é hui rà htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸(Haú ngaraí ming gi, 'yhangmoq lé hkê nyi é luq le a shí, myiduoq lé a shúm' é jowò nghut lhê.)^d

⁴⁹Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng rà nghut lhê.^e

⁵⁰Xo gi, ge lhê. Nghut kôlhâng, xomân kân byuq jáng gi, hkâsu kut dum wó lhoq ngam yù rà lhú? Nungmoq gi, xo su ngam nyi mù, rayuq eq rayuq nguingón nyí keq." ga taí ri.

Myi, Làng Gâng É Hkyô

Mht 19:1-12; Luk 16:18

10 Hau htâng má, Yesuq gi, Kaperna-um mai htoq ló mù, Yuda mau mã é maukyo má ê jé luí, Yodan làng tú tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byí ri.

²Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhú?" ga myí é dong, Yhang lé chyam wú akò.

³Yesuq gi, "Mosheq gi, nungmoq lé, hkâsu ga hkunmó hkyó tô é lhú?" ga taú myí ri.

⁴Haú hkún, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byí tô ri." ga tú taí akò.

⁵Yesuq dum tú taí é gi, "Nungmoq é myit nhiklhum htân kô é yanmai, Mosheq gi, tarâ haú lé kâ tô é nghut lhê.

⁶Nghut kôlhâng, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.^f ⁷Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhú za kut nyí mù, ⁸yhangnhik gi, gungsho ralhú za dut byuq kó rà nghut lhê.^g Haú mù luí, yhangnhik gi, í yuq a nghut lo é za, rayuq za dut bê nghut ri. ⁹Haú mù luí, Garai Gasang lhoq tsúm tô

[†]9:44 Bun zo 44, 46, gi, Chyúmlaiká myo myo má a bo é nghut lhê.

^d9:48 Esai 66:24

^e9:49 Nhong 2:13

^f10:6 Apùn 1:27

^g10:8 Apùn 2:24

é lé, byù gi, a lhoq kang sháng gaq.” gâ ri.

¹⁰ Yhumhkaû má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myí akô. ¹¹ Haú hkûn, Yhang gi, “Yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. ¹² Myiwe rayuq le, yhumsing é yhanglâng lé kâng pyám mù, yuqgè góyúq eq dum hâng é nghut le gi, sulâng lú é hkyô lé kut bê nghut ri.” ga tû taí ri.

Zoshâng Wuí Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm akô nghut ri. ¹⁴ Haú lé Yesuq myàng jáng, Yhang gi, wú nhik-yo naú luí, “Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lê. ¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut.” ga yhangmoq lé taí ri. ¹⁶ Hau htâng, Yesuq gi, zoshâng wuí lé bún yû mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuoq luí, “Ge é Sará ê, ahtum abyuq é asak wó yû râ matú, ngò haí kut ra râ lú?” ga myí ri.

¹⁸ Haú mù, Yesuq gi, “Haí mù, Ngo lé ge é Sará nghu lê lú? Garai Gasang

mai lai luí, ge é ó yuq le a nyi. ¹⁹ Jep e tarâ má, 'Byù hkâsat, su-myi sulâng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!^h ga bo tô é lé, nàng sê lê.” ga tû taí ri.

²⁰ Haú hkûn, haú yuq gi, “Sarâ ê, haú pé banshoq lé, ngò, zoshâng hkûn mai cháng bê nghut lê.” ga taí ri.

²¹ Yesuq gi, haú yuq lé wú tsuq to mù, yhang lé chyitdap luí, taí é gi, “Nàng kut râ rajung râ tô ashí; lô mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkùng htoq má sutzè wó râ nghut lê; haú mù, Ngá htâng lé cháng aq.” gâ ri.

²² Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq lô byuq bê nghut ri.

²³ Yesuq gi, lêngghyuoq byu wú mù, Yhâng é chángzô pé lé, “Sutzè wó bang gi, Garai Gasâng é mingdán má wàng râ matú, haú-í yhang wuí ri-nhung!” ga taí ri.

²⁴ Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, “Zo wuí ê, Garai Gasâng é mingdán má wàng râ matú, haú-í yhang wuí ri-nhung! ²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luí râ nghut lê.” gâ taí ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, “Haú su ru nghut le gi, ó yuq za hkyi yu é hui râ nghut lê lú?” ga, taí lhum bum akô nghut ri.

²⁷ Haú hkûn, Yesuq gi, yhangmoq lé wú kat mù, “Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lê; hkâsu mù gâ le,

Garai Gasang gi, lhunglhang lé wó kut é Sû nghut lhê.” ga taí ri.

²⁸ Haú hkûn, Petruq gi, Yhang lé, “Ng-amoq gi, wó é gû lhunglhang lé tô pyâm to luí, Náng htâng cháng bê nghut lhê.” ga taí ri.

²⁹ Haú mù, Yesuq tú taí é gi, “Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuè eq yò pé lé tô pyâm tô é sù ó yuq nghut kôle, ³⁰ shí pyat lhê é yhûm pé, gumang gu-nhá wuí, înu pé, zo dù wuè eq yò pé lé, rashô tú wó hkam yù luí, zing-rí é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê. ³¹ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê.” gâ ri.

Yesuq, Yhang Shí Râ Hkyô Lé Dum Taí É Hkyô

Mht 20:17-19; Luk 18:31-34

³² Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzô raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ “Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tará sará pé é loq má ap byí pyâm é hui râ nghut lhê; haú bang gi, Yhang lé, shí râ mara byi luí, tûngbau pé é loq má ap byí pyâm kó râ nghut lhê. ³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yû mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê.” gâ ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, “Sará ê, ngá-nhik dung é gû ban-shoq, Nàng kut byi râ lé, ngá-nhik ô nau ri.” ga taí akô.

³⁶ Haú hkûn, Yhang gi, “Ngò, nungnhik lé haí kut byi râ ô nau akô lú?” ga myí ri.

³⁷ Yhangnhik gi, “Náng é hpungwup shingkang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq.” ga tú taí akô.

³⁸ Nghut kôlhang, Yesuq gi, “Nungnhik haí dung nyi é lé, nungnhik a sé kó nghut ri. Ngò shuq râ góm^f lé, nungnhik wó shuq kó râ lú? Ngò hkam yù râ baptisma lé, nungnhik wó hkam yù kó râ lú?” ga yhangnhik lé tú taí ri.

³⁹ Haú hkûn, yhangnhik gi, “Nga-nhik wó dut lhê.” ga tú taí kôjáng, Yesuq gi, “Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, hen to byí é hui bâng matú za nghut lhê.” ga yhangnhik lé taí ri.

⁴¹ Haú su gâ é hkyô lé, haú gotû chángzô raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq ban-shoq bang lé wut tsing yù luí, “Tûngbau pé lé uphkan é ga bang gi, tûngbau pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nung-

^f10:38 Góm eq baptisma gâ é gi, jamjau hui râ eq shí râ lé, taí nau é nghut lhê.

moq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴Hau htoq agó, nungmoq má ushuq dut nau sù ó yuq nghut kôle, banshoq bâng é jùn dut ra râ nghut lhê. ⁴⁵Hkâsu mù gâ le, haù Byu Yhangzo lhang gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê.” ga, yhangmoq lé taí ri.

Myoqjit Sù Barateme, Myoq Dum Myang É Hkyô

Mht 20:29-34; Luk 18:35-43

⁴⁶Hau htâng, yhangmoq gi, Yerihko và má jé ló akô nghut ri. Yesuq eq Yhâng é chángzô pé gi, byù moq mó eq rahá, và mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷Yhang gi, Nazaret và byù Yesuq laí ló é lé wó gyo jáng, “Dawiq é Yhangzo Yesuq ê, ngo lé shogyo yù laq ô!” ga garú kat ri.

⁴⁸Haù mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi, “Dawiq é Yhangzo ê, ngo lé shogyo yù laq ô!” ga, je riyhang garú kat ri.

⁴⁹Haù mù luí, Yesuq gi, yap nô kat mù, “Yhang lé ji kat keq.” ga taí jáng, yhangmoq gi, “Myit ngón aq hkoi; Yhang, nàng lé ji nyi ri; toq aq.” ga myoqjit sù haù lé taí akô. ⁵⁰Haù hkûn, haù yuq gi, yhâng é buhíng lé hkyut pyám mù, byam chyù luí, Yesuq chyáng lé jé ri.

⁵¹Yesuq gi, yhang lé, “Ngò, nang lé haí kut byi râ ô nau ri lhú?” ga myi jáng, yhang gi, “Sarâ ê, ngò myoq myàng nau ri.” ga tũ taí ri.

⁵²Yesuq gi, “Ló aq hkoi, nàng é lumjíng myit gi, nàng lé lhoq gê byi bê nghut ri.” ga taí kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

Yesuq, Yerusalem Và Mó Má Wang Ló É Hkyô

Mht 21:1-11; Luk 19:28-40; Yhn 12:12-19

11 Yesuq eq Yhâng é chángzô pé gi, Yerusalem và mó eq chyáng lo nyi kô é hkûn, Tsanlun Bùm mà é Bethpage và eq Behtani và má jé ló kôjáng, Yesuq gi, Yhâng é chángzo í yuq lé, ²“Nungnhik, hí mà é và má ê keq; và haù má wang é hkûn jáng, ó le a jì wú shí é logúng zo tuí to lánng é lé, ê myâng kó râ nghut lhê; haù lé hpyi yù mù, Ngá chyáng she lò keq. ³Byù rayuq yuq mai, 'Haí mù, haù su kut nyi akô lhú?' ga nungnhik lé lhom myi jáng, 'Shí du lé, haù Yhumsíng râ ri ga, razup má dum taú dé byi râ nghut lhê.' nghũ tũ taí keq.” ga pyíng luí, nhang kat ri.

⁴Haù nhik gi, e ló mù, hkyô mó yàm mà é hkumdong nàm má tuí tô é logúng zo radu lé, ê myâng kôluí, haù lé tuí hpyi nyi akô. ⁵Haù hkûn, haù má yap tô é bang ra-am gi, “Haí mù, logúng tuí hpyi nyi akô lhú?” ga myí akô. ⁶Haù jáng, yhangnhik gi, Yesuq pyíng kat é eq rajung za taí kyo kôjáng, yhangmoq gi, she ló râ ahkáng byí kat akô nghut ri. ⁷Yhangnhik, logúng zo haù lé Yesuq chyáng she jé lo é hkûn, logúng hau é gùng htoq má, yhangmoq é buhíng pé buí jáng, hau é ahtoq má, Yesuq doq jì ri. ⁸Byù myo myo gi, yhangmoq é buhíng pé lé, hkyô má hkyut hkang byí akô; ra-am gi, yò pé má zân yu é mhandíng lé hkang byí akô nghut ri. ⁹Hí má so bang eq htâng má châng é bang gi, “Hosana!^{§§}

§§11:9 Hebre dang má, *hosana* gâ é gi, “ahkuí hkyi yù laq” gâ é nghut lhê. Nghut kôlhang, bun zo 9, 10 má gi, hkya-on dang dông chung é nghut lhê.

Haù Yhumsing é mying mai jé lé lô Sù gi, hkungsô wó nyí sháng gaq ô!

¹⁰ Jé lé lô râ nghut é, nga-nhùng é iwa Dawiq é mingdán gi, hkungsô wó nyí sháng gaq ô!

Htoq tsáng myhâng má hosana nghut sháng gaq ô!”ⁱ

ga luí, taí garú bum akô nghut ri.

¹¹ Yesuq gi, Yerusalem wà mó má jé mù, noqkuq yhùm má wang ê luí, lhinghkyuq mâ é jung hkangmó lé wú ri; nghut kôhang, búi gyum lô bê nghut é yanmai, Yhâng é chángzo raxe í yuq eq rahá, Behtani wà shut htoq e lô bekô nghut ri.

Maihpáng Gâm Ashi A Zui

Râ Matú Taí É Hkyô

Mht 21:18-19

¹² Hau htang nyí, yhangmoq, Behtani wà mai htoq lô kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashí zúí lhê laq ga é jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui yâm a nghut é yanmai nghut ri. ¹⁴ Haù mù, Yesuq gi, shigâm haù lé, “Ahkuí mai gi, náng chyáng mâ é ashí, ó yuq le a myàng zo lo kó sháng gaq.” ga taí ri. Yhâng é chángzô pé gi, haù su ga taí é dang lé wó gyô yu akô nghut ri.

Yesuq, Noqkuq Yhùm Lé Lhoq Sansêng Pyám É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhùm má wang ê mù, haù mâ é zè ung zè wui kut nyi é bang lé, hkat htoq pyám luí, ngùn htaí zo bâng é siboí pé eq hpúngkyui ung zo bâng é tanghkuq pé lé tu mhuq pyám byí ri. ¹⁶ Hau htoq agó, Yhang gi, ó yuq lé

nghut kôle, ung zê lé noqkuq yhùm mai a waq lai nhâng kut pyâm ri. ¹⁷ Yesuq, yhangmoq lé mhoqshit é gi,

“Ngá yhùm gi, byù myù lhunglhâng bâng é matú, kyúdung yhùm ga rá nghut lhê.”^j

ga kâ tô é a nghut kó lúh? Nghut kôhang, nungmoq gi, 'damaq hkyúng' kut pyám bekô nghut ri.” gâ ri.^k

¹⁸ Hkyangjong agyi pé eq tarâ sará pé gi, haù lé wó gyo kômù, Yhang lé hkâsu kut wó sat pyám rá hkyô ho nyi akô; nghut kôhang, shiwa byu pé gi, Yhang mhoqshit é hkyô má, myit zing zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaù mai htoq lô bekô nghut ri.

Maihpáng Gâm Nyhuí

Shi Byuq É Hkyô

Mht 21:20-22

²⁰ Htang napkyó, yhangmoq sô lai lô le, maihpáng gâm gi, amyit mai yhang nyhuí kyuq shi byuq é lé myang akô.

²¹ Petruq gi, myit bûn kat luí, “Rabai ê, wú aq! Nàng nhîng pyâm é maihpáng gâm gi, nyhuí shi byuq bê nghut ri.” ga luí, Yesuq lé taí ri.

²² Haù hkûn, Yesuq gi, “Garai Gasang lé lumjîng keq. ²³ Ngò, nungmoq lé teng za taí kôlé, ó yuq nghut kôle, i-myyit má úng-âng é hkyô a bo é za, yhumsing taí é hkyô gi, dut lò râ nghut lhê ga lumjîng kô é nghut le gi, bùm shí lé, 'Htot mù, wuimau má lô gyó wâng aq.' ga taí le lháng, haù hkyô dut byi rá nghut lhê.

²⁴ Haù mù luí, Ngò, nungmoq lé taí kôlé, nungmoq haí dúng le le wó yû rá nghut lhê nghû lumjîng kô é nghut le gi, wó yû kó rá za nghut lhê. ²⁵ Mauhkûng htoq mâ é nungmoq é Íwa gi, nungmoq é mara lé hkyut pyám byi sháng gaq, nungmoq

gi, kyûdûng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhang, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)” ga tû taí ri.*

**Yesuq É Ahko Ahkáng Lé
Myí Chyam É Hkyô**

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wú gi, Yhâng chyáng lé jé kômù, ²⁸ “Hai ahko ahkâng èq, Nàng, shí pé lé kut nyi lhê lhu? Haû su kut râ ahko ahkáng, Nang lé ó yuq byi é lhu?” ga myí akô.

²⁹ Haû jáng, Yesuq gi, “Ngò le, nungmoq lé rajung myí wú kôlé, tû taí wú keq; haû hkûn, hai ahko ahkâng èq, Ngò, shí pé kut é hkyô lé taí kyo râ nghut lhê.

³⁰ Yohan byi é baptisma gi, mauhkûng mai lhu? A nghut jáng, byu chyáng mai lhu? Taí wú keq!” ga taû myí kat ri.

³¹ Haû hkûn, yhangmoq chôm hpyê lhum kô é gi, “Mauhkûng mai nghut lhê' nghû nga-nhúng taí jáng le, 'Haû nghut le nhîng, haí mù, yhang lé a lumjîng kô é lhu?’ ga râ nghut; ³² 'Byu chyáng mai nghut lhê.' nghû jáng le...” gâ ri. (Yohan gi, myiqhtoi rayuq gè gè nghut lhê ga, lhunglhang bang lumjîng bûm kô é yanmai, yhangmoq gi, haû byu pé lé gyuq bum akô nghut ri.)

³³ Haû mù, yhangmoq gi, Yesuq lé, “Ngamoq a sé.” ga tû taí akô.

Haû hkûn, Yesuq gi, “Haû jáng, Ngò le, hai ahko ahkâng èq shí pé kut é hkyô lé, nungmoq lé a taí kyo.” ga, yhangmoq lé taí ri.

**Tsibiyiq Hkyâm Saí
Bang Lé Dangtú Yu É Hkyô**

Mht 21:33-46; Luk 20:9-19

12 Hau htâng, Yesuq, dangtú dông yhangmoq lé taí é gi, “Byù rayuq gi, tsibiyiq hkyâm rahkyam saí to mù, lnhnghkyuq kyâm to luí, tsibiyiq wing pyik htoq râ donghkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byi to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shí é yû râ matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhang, haú bang gi, haú yuq lé lhom chyup bat luí, loq kôm taû nhang kat akô. ⁴ Haû mù, yhang gi, gotû dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ram lé lhom bat, ram lé lhom sat pyám, kut akô nghut ri.

⁶ Lô htáng má, yhang gi, yhang chytáp é zo lé nhang kat râ za ru nghut alô; haû mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haû jáng sheq, silí wunlí pé lé nga-nhúng wó yù râ nghut lhê.' ga rayuq eq rayuq taí lhum bum akô. ⁸ Haû mù, yhang lé chyup yù luí, sat pyám mù, hkyâm shinggan shut dú htoq pyâm akô nghut ri.

* 11:26 Bun zo shî gi, Chyúmlaika ra-am má za bo lhê.

⁹Haù jáng, tsibiyiq hkyâm yhumsîng gi, yhangmoq lé hkâsu kut râ lúhú? Yhang gi, ê mù, haù hkyâm saí zo bang lé sat pyâm luí, hkyâm haù lé, góbang lé htot ngho byí pyâm râ nghut lhê. ¹⁰Chyúmdang má,

'Yhùm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹Shí hkyô gi, haù Yhumsîng kut é nghut luí, nga-nhúng é myoq hí má mauhok dut bê nghut ri.' ga bò tô é lé, nungmoq a nghap wú kó lúhú?"¹

gâ ri.

¹²Hau htâng, yhangmoq gi, dangtú haù, yhangmoq lé lhoq ang luí taí é hkyô lé, sé kô é yanmai, Yhang lé chyup yû râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq† Lé Kang Kat Byí É Hkyô

Mht 22:15-22; Luk 20:20-26

¹³Hau htâng má, yhangmoq gi, Yesuq é dang má mara hô luí Yhang lé chyup yû râ matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴Haù bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Haù mù, Kehtaq lé kang kat byí le gi, ge lhê lúhú? ¹⁵Ngamoq kat ra râ lúhú? A kat ra râ lúhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lúhú? Denari ngùn rachap yu lé keq, ngò wú wú bá." ga taí kat ri. ¹⁶Haù hkûn, yhang-

moq yu jé lô jáng, Yhang gi, "Shí má, ó yuq é alhò eq masat laiká dap tô ri lúhú?" ga myí ri.

Yhangmoq gi, "Kehtaq é nghut ri." ga tû taí akô.

¹⁷Haù mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myí Chyam É Hkyô

Mht 22:23-33; Luk 20:27-40

¹⁸Haù dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô. ¹⁹Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byí ri. ²⁰Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ²¹Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haù eq rajung za dut byuq bê nghut ri. ²²Haù nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haù le châng shi ló byuq bê nghut ri. ²³Haù mù luí, haù dum dui toq é buinyi má, myiwe myhí haù gi, hká yuq é yhangmyi nghut râ lúhú? Hkâsu mù gâ le, yhang gi, haù nyhit yuq é yhangmyi dut wú bê sù nghut ri." gâ akô.

²⁴Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lúhú? ²⁵Haù shi byuq bê bang dum dui toq é hkûn gi, myi

[†]12:12 Kehtaq gâ é gi, "hkoséng" gâ é nghut lhê.

¹12:11 Hkya-on 118:22-23

byi myi yû hkyô joq lo râ a nghut; yhang-moq gi, mauhkûng htoq mâ é maumang lagyô pé su dut byuq kó râ nghut lhê.²⁶ Shi é mai dum lhoq dui toq é hkyô eq séng luí, Mosheq kê tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.^m ga kê tô é lé, nungmoq a nghap wú kó lú?²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekò nghut ri." ga taí ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sará rayuq gi, lé lô mù, yhang-moq taí htîng lhum nyi kô é lé, lé wó gyô ri. Yhang gi, haú bang lé, Yesuq rago tú taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lú?" ga myí ri.

²⁹ Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhûng é Yhumsîng Garai Gasang za, Garai Gasang nghut lhê.

³⁰ Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap râ lhê.^m gâ é nghut lhê.³¹ Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq.^o gâ é nghut lhê. Shí í lhum htoq kô é tarâ gotú a joq lo." ga yhangmoq lé tú taí ri.

³² Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotú a nyi lo ga náng taí é gi, têng ri.³³ Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-

o banshoq èq le, chyitdap râ lhê gâ é eq, náng gûng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga taí ri.

³⁴ Yesuq gi, yhang hpaqchyí bo é đông tú taí nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taí é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lhê gâ akò lú?

³⁶ Dawiq gi, Chyoiyúng Woi-nyí èq taí nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri.^p

gâ ri.³⁷ Haú mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lú?" gâ ri.

Byù hpûng mó gi, Yhâng é dang lé, gabú myit èq gyô nyi bum akò nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má lhom shi-kyâm yù râ lé le,³⁹ tarajong pé mâ é ahkyak dik é zùng jang pé eq poi pé mâ é réng é zùng jowò pé má myang zùng râ lé le, ô nau nyi bum akò.⁴⁰ Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dúng shit mhaú é bang nghut akò. Haú su é

^m12:26 Htoq Ló 3:6 ⁿ12:30 Tarâ Pun 6:4-5 ^o12:31 Nhung 19:18

^p12:36 Hkyá-on 110:1

bang gi, dam byî é je riyhang hui zo kó rã nghut lhê.” gã ri.

Chuimó Myhí Kat É Alu Ngùn

Luk 21:1-4

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wò bang myo myo gi, ngùn gamyhó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, “Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsing agùn agó wó é mâ é lé, lé kat akô; yhang kúm gi, myùng sù nghut kôlé, yhâng é asak lé baú rã ngùn banshoq lé, kat bê nghut ri.” ga taí ri.

Ló Htâng Buinyì Má Dut Lò Rã Hkyô

Mht 24:1-21, 29-35; Luk 21:5-33

13 Yesuq, noqkuq yhûm mai htoq ló é hkûn, Yhâng é chángzo rayuq gi, “Sarâ ê, wú aq; hkâ-í ko é luqgok pé! Hkâ-í hkik é yhûm pé!” ga Yhang lé taí kat ri.

² Haú hkûn, Yesuq gi, “Nàng, yhûm mó shí pé lé myàng lhê a nghut lú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui rã nghut lhê.” gã tũ taí ri.

³ Yesuq gi, Tsanlun Bùm má, noqkuq yhûm shut hũ mù zung tô é hkûn, Petruq, Yakuq, Yohan eq Andre pé gi, Yhâng chyáng lé je kômù, ⁴ “Haú hkyô pé gi, hkâ-nhám dut lò rã lú? Haú dut lò rã hkûn, hkasú é kumlhá htoq lô rã nghut lhê lú? Ngamoq lé taí kyô wú laq.” ga Yhang lé baú myi akô nghut ri.

⁵ Haú mù, Yesuq gi, yhangmoq lé, “Nungmoq lé, ó yuq èq le a wó shuí nghoq sháng gaq, sidiq nyi keq. ⁶ Hkâsu mù gã le, 'Ngò gi, haú yuq[‡] nghut lhê.' ga, Ngá mying lé llang é byù myo myo pô htoq lô mù, byù myo myo lé shuí nghoq kó rã nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò rã za nghut lhê; nghut kôlhang, ló htâng é buinyì gi, a nghut shi. ⁸ Byù ra-myû eq ra-myû, mingdán ralhüm eq ralhüm majan zân lhum lò kó rã nghut lhê. Jowò myo myo má, layàng nún é, mutmó gyó é pé dut lò rã nghut lhê. Haú pé gi, wuîhke jamjau hkyo é apûn awang za ru nghut ashî.

⁹ Nungmoq gùng nungmoq sidiq nyi keq. Hkâsu mù gã le, yhangmoq gi, nungmoq lé, tarâ rûng pé má é ap pyâm kó rã nghut é htoq agó, tarajong pé má nungmoq lé nhuq bat kó rã nghut lhê. Hau htoq agó, nungmoq gi, Ngá mying é yanmai, mauzau wuî eq hkohkam pé é hí má, saksé dông yap ra kó rã nghut lhê. ¹⁰ Haú gabú danglù gi, amyû banshoq lé hí hko kyo ra rã nghut lhê. ¹¹ Nungmoq gi, chyup yu é hui luî, jep hui é hkûn, haî taí rã lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gã le, dang haú pé gi, nungmoq taí é a nghut, haú Choyoyúng Woi-nyí èq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rã nghut lhê; zo wuî gi, mó wuî lé gumlau toq mù, sat pyâm nhâng kó rã nghut lhê. ¹³ Byù lunglhang bang gi, Ngá é yanmai, nungmoq lé a nguî kut kó rã nghut lhê; nghut kôlhang, jihâm jé shoq wó hkam jân nyi é sũ gi, hkyi yu é hui rã nghut lhê.

[‡]13:6 Haú yuq gã é gi, Hkrisduq lé gã é nghut lhê.

¹⁴Haû lhoq hten lhoq hpyoq é achag achyut hkyô^q gi, yhang a nyi âng é jawò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hfang doq ló kó sháng gaq. ¹⁵Yhumhkûng htoq má nyi tô é sù gi, yhúmhaû má é zè haî lé le, a ló gyó wang yù lo sháng gaq. ¹⁶Yò má nyi tô é sù gi, yhâng é buhîng lé a ló taû yu nyi lo sháng gaq. ¹⁷Haû buinyi pé má, zogùng dut é myiwe wuì eq náu huq ashî nghut é înu wuì gi, hkâ-í yhang wuîhke bekó nghut ri myhi-nhung. ¹⁸Haû hkyô gi, gyoqmyò má a dut sháng gaq, kyúdùng nyi keq. ¹⁹Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haû buinyi pé má dut lò râ nghut lhê; haû su é hkyô gi, htàngnùng má hkâ-nhám le dum dut lo râ a nghut. ²⁰Buinyi haû pé lé, haû Yhumsîng Garai mai a lhoq shaû é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haû pé lé, Yhang lhoq shaû pyám byi bê nghut ri. ²¹Haû ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó. ²²Hkâsu mù gâ le, Hkrisduq apyoq pé eq myiqh-toi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. ²³Haû mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê. ²⁴Buinyi haû pé má, wuîhke jamjau haû pé laî é htâng, 'Buì gi, noq byuq mù, lhamó gi, a tsò dut byuq râ nghut lhê;

²⁵kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huì bùm kó râ nghut lhê.^r

²⁶Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó râ nghut lhê. ²⁷Hau htâng má, Yhang gi, Yhâng é maumang lagyô pé lé nhang kat mù, maumyí chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsîng yù nhâng râ nghut lhê.

²⁸Maih páng gâm lé wú mù, mhoq yù keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹Haû eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq. ³⁰Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé banshoq dut byuq râ nghut lhê.

³¹Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

Haû Buinyi Eq Ahkyíng Lé, Ó Le A Sé

Mht 24:36-44

³²Buinyi eq ahkyíng haû lé gi, ó yuq le a sé; mauhkûng htoq mâ é maumang lagyô pé lhang a sé; haû Zo le a sé; haû îwa za ru sê lhê. ³³Haû mù, nungmoq gi, ahkyíng haû hkâ-nhám jé râ lé, a sé kô é yanmai, sidiq nyi keq! Machya nyi keq! ³⁴Haû gi, byù rayuq, yhâng é dui-nhâng zoshâng wuì lé, ó le ó eq sêng é mù lé gàm byi to mù, hkum zúng sù lé le, machya nyi râ matú pying to luí, yhâng yhúm lé, haû dui-nhâng zoshâng wui chyáng ap pyám to mù, byìn we shut htoq ló byuq é sù eq pung ri.

³⁵Haù mù, haù Yhumsing hpó gi, my-inhtàng laq, myín gunggàm laq, woqtún hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyi keq. ³⁶Haù a nghut jáng, Yhang, dàn loq tung tau jé lo é hkûn, nungmoq yhup myhí tô é lé, lo myang pyám râ nghut lhê. ³⁷Ngò, nungmoq lé, 'sidiq machya nyi keq,' nghû taí é eq rajung za, yuq hkangmó lé le, taí é nghut lhê." ga taí ri.

Yesuq, Xù But Byi Huí É Hkyô

Mht 26:1-16; Luk 22:1-6;

Yhn 11:45-53; 12:1-8

14 Ahkuí, haù Lhoqlhai Poí eq múnchi a kat é Muk Zo Poí jé râ í nyí za ru ra aló hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akò nghut ri. ²Nghut kôlhàng, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akò.

³Yesuq gi, Behtani wà má nyi é mang-gâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaù é namngón xù bo é alabasta (luq hpyû) bông yu lé lô mù, bông haù lé llang hkyui luí, namngón xù haù lé Yesuq é ulhum má hut gyun byí ri.

⁴Haù má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, "Haí mù, namngón xù lé aha agó kut pyâm lhê laq? ⁵Haù namngón xù lé, denari^f súm sho èq ung luí, myùng bang lé byí le ge lhê mhaí!" gâ akò. Yhangmoq gi, myiwe myhí hau lé le, gyai chôm tân akò.

⁶Nghut kôlhàng, Yesuq gi, yhangmoq lé, "Myiwe zo haù lé, hkâtân nyi kó; haí mù, yhang lé i-myit lhoq myo nhang nyi akò lhu? Yhang gi, Ngá é ahtoq má ge

é hkyô kut bê nghut ri. ⁷Haù myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhàng, ngò gi, shí má nungmoq eq rahá ayang nyi nyi râ sù a nghut. ⁸Yhang gi, yhang wó dut é í kut bê nghut ri. Yhang, Ngá gûng má, namngón xù hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹Ngò, nungmoq lé teng za taí kôlé, haù gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê." ga taí kyo ri.

¹⁰Hau htàng, haù chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pê chyáng e ri. ¹¹Haù bang gi, haù hkyô lé lhom wó gyo kôjáng, gyô gabú luí, yhang lé ngùn byi râ ga, danggidiq byí akò. Haù mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹²Haù htàngli joq é eq rajung za, Lhoqlhai Poí hkungga sauzo jaú byí é, múnchi a kat é Muk Zo Poí sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá ê món to râ lhu?" ga myí akò.

¹³Haù mù, Yhang gi, chángzo í yuq lé, "Nungnhik, myuq hkaù shut wang lô keq, wui yambú waq é byù rayuq lhom hui râ nghut lhê; haù hkûn, nungnhik gi, yhâng htàng cháng keq. ¹⁴Haù yuq, wang lô é yhûm mâ é yhumsing lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lhu ga, Sará myí nhang kat ri.' nghû taí keq.

¹⁵Haù hkûn, hen to gû nghut é, ahtoq mâ é wap mó lé lhom tân shit râ nghut

^f14:5 Denari rachap gi, byù rayuq é ra-nyí lhê é zuihpau eq wuí ri.

lhê. Wap haú má, nga-nhûng é matú ê hen to keq.” ga taí luí, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za ê myâng kômù luí, Lho-qlhai Poí lé, món to bekô nghut ri.

¹⁷ Myinhêng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri. ¹⁸ Yhangmoq gi, siboí má nghê mù, zô nyi bùm kô é u lé, Yesuq gi, “Ngò, nungmoq lé teng za taí kôlé, Ngò eq rahá zô nyi é bang nungmoq má é rayuq sù gi, Ngo lé ap pyám rã nghut lhê.” ga taí ri.

¹⁹ Haú hkún, yhangmoq gi, gyô yón kômù, rayuq htàng rayuq, “Ngò, a nghut hkaí?” ga Yhang lé myí akô.

²⁰ Haú hkún, Yhang gi, “Haú yuq gi, haú raxe í yuq má é rayuq nghut lhê. Ngò eq rahá, hkoq shí má muk jùmzo sù nghut lhê. ²¹ Haú Byu Yhangzo gi, Yhang eq séng luí kâ tô é eq rajung za, shí rã za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, “Shí gi, Ngá é gungsho nghut lhê; yù mù zo keq.” ga taí uchyang, Yhâng é chángzô pé lé gàm byí ri.

²³ Hau htàng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, “Shí gi, byù myo myô é matú htoq pyám é, dangshikaq eq séng é Ngá sui nghut lhê.

²⁵ Ngò, nungmoq lé teng za taí kôlé, Ngò, Garai Gasâng é mingdán má, tsi-byiq wing asik lé shuq é buinyi a jé jé, tsibyiq wing lé dum shuq rã a nghut lo.” ga taí ri.

²⁶ Yhangmoq gi, hkya-on mahkôn ralhūm ban hkôn jáng, Tsanlun Bùm shut htoq e ló bekô nghut ri.

Petruq He-ngik Rã Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, “Nungmoq lhunglhang bang gi, myit lingbat kó rã nghut lhê; hkásu mù gâ le, ‘Haú sau zúng sù lé, Ngò bat sat pyám mù, sau pé gi, lhoq pyo pyám é hui kó rã nghut lhê.’”

ga kâ tô ri. ²⁸ Nghut kôlhang, Ngò gi, lhoq dui toq é huí htàng má, Galile mau shut, nungmoq é hí má e ló lángrã rã nghut lhê.” ga taí ri.

²⁹ Haú hkún, Petruq gi, “Góbang banshoq myit lingbat kôlhang, ngò gi, myit lingbat rã a nghut.” ga taí kat ri.

³⁰ Haú mù, Yesuq gi, “Ngò, nàng lé teng za taí lé, hkú-nyí, hkú-myín yhang jáng, woq í dâm a tûn shimá, nàng, Ngo lé sum dâm he-ngik pyám rã nghut lhê.” ga tû taí ri.

³¹ Nghut kôlhang, Petruq gi, “Ngò, Nàng eq rahá shí rã dut kôlhang, Nang lé ngò he-ngik pyám rã a nghut.” ga zuq zuq taí ri. Góbang banshoq le, haú su ga châng taí bum akô nghut ri.

Get-samane Gã é Jowò Má Kyúdung É Hkyô

Mht 26:36-46; Luk 22:39-46

³² Yhangmoq gi, Get-samane gã é jowò má jé ló kômù, Yesuq gi, Yhâng é chángzô pé lé, “Ngò, kyú ê dúng nyi é u lé, shí má zúng lángrã keq.” ga taí ri. ³³ Yesuq gi, Yhang eq rahá Petruq, Yakuq, Yohan pé lé, shuí chûng ri. Haú hkún, Yhang gi, myit gyai a ngón é eq myit wuñke é hui mù, ³⁴ yhangmoq lé,

“Ngò gi, shí rã í yhang myit yón nyi ri;

nungmoq gi, machyâ luí, shí má lánq nyí keq.” ga taí ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhaí pyám byí le gi, Yhâng chyáng mai lhoq lhaí pyám byi râ matú, ³⁶ “Aba,[§] Áwa ê, Nàng gi, haí le wó dut é Sû nghut lhê. Góm^{**} shí lé, Ngá chyáng mai yu pyám byi laq. Nghut kôlhang, Ngò ô nau é đông a nghut, Nàng ô nau é đông sheq nghut sháng gaq.” ga kyûdùng ri.

³⁷ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhí to kô é lé lo myang ri. Haú mù, Yhang gi, Petruq lé, “Simun, nàng yhup ngón nyi lhê lú? Razup za lhang a wó machya nyi lú? ³⁸ Gunglaú é a hui sháng gaq, machyâ luí, kyûdùng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri.” ga taí ri.

³⁹ Yesuq gi, radàm dum ê mù, hí lé dùng é dang lé za, ê dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhí to lánq kô é lé, lo dum myang ri. Yhangmoq gi, Yhang lé haí táí râ a sé dut byuq akò nghut ri.

⁴¹ Yesuq gi, sum dâm nghû râ lhang má, yhangmoq chyáng dum taú jé lô mù, yhangmoq lé, “Nungmoq gi, ahkuí jé shoq yhup ngón nyi ashí kó lú? Gé bê! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyám é hui râ nghut bê. ⁴² Toq keq! Lô losháng hkoi! Ngo lé ap pyám râ sù gi, jé lé lô bê nghut ri.” ga taí ri.

Yesuq, Chyup Yú Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashí u lé, haú chángzo raxe í yuq má bo é Yudaq gi,

haú hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám râ sù gi, yhangmoq lé, “Ngò bopuq puq é sù gi, haú yuq nghut bê; Yhang lé chyup yú mù, zúng shuí ló keq.” ga kumlhá byí to bê nghut ri. ⁴⁵ Yudaq gi, Yesuq chyáng hkyê za ê mù, “Rabai ê.” ga taí luí, Yhang lé bopuq puq byí ri. ⁴⁶ Haú hkûn, yhangmoq gi, Yesuq lé chòm zuí zìng mù, chyup yú bekò nghut ri. ⁴⁷ Haú mù, nàm má yap tô é byù rayuq gi, yhâng é shâm lé she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, “Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akò lú? ⁴⁹ Ngò gi, nyí wuí, nungmoq eq rahá nyi luí, noqkuq yhûm má mhoqshit byí nyi kôlhang, nungmoq, Ngo lé a chyup yú kô é nghut lhê. Nghut kôlhang, Chyúmdang pé gi, dik ra râ nghut lhê.” ga taí ri. ⁵⁰ Haú hkûn, haú chángzô pé gi, Yesuq lé tô pyám to kôluí, hpang byo byuq bekò nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyám to mù, gùngchín hpang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akò; haú hkyangjong

§14:36 *Aba* gâ é gi, Aramaik dang đông “Áwa” gâ é lichyúm nghut lhê.

**14:36 *Góm* gâ é gi, Yesuq, jamjau hui râ hkyô eq shí râ hkyô lé, táí nau é nghut lhê.

agyi pé lhunglhang bang, suwún wuí eq tará sará pé le, lé zup zing bum akô. ⁵⁴Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵Haú hkyangjong agyi pé eq Yudaq byìn tú wapdoq gón gi, Yesuq lé sat rã saksé hô kôlhang, haí le a myàng kó nghut ri. ⁵⁶Byù myo myo gi, a têng é saksé hkám kôlhang, yhangmoq é dang gi, a tsúng lhum kó nghut ri.

⁵⁷Hau htâng, ra-am gi, toq yap mù, a têng é saksé hkám kô é gi, ⁵⁸“Yhang gi, 'Byu loq èq saí é noqkuq yhúm shí lé, Ngò hpyoq hpyi pyám mù, sum nyí gyoro má, byu loq èq a saí é, gotú ralhum dum saí rã nghut lhê.' ga taí é lé, ngamoq wó gyô ri.” ga akô. ⁵⁹Nghut kôlhang, yhangmoq é saksé gi, a tsúng lhum kó nghut ri.

⁶⁰Hau htâng má, hkyangjong mó gi, yhangmoq é hí má toq yap mù, “Nàng, haí le a tú taí luq? Shí bang, Nang lé mara hun nyi é saksé gi, hká dòng nghut lhê lú?” ga luí, Yesuq lé myí ri. ⁶¹Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yesuq lé, “Nàng gi, hkungsô wó Su é yhangzo, Hkrisduq nghut lhê lú?” ga dum myí ri.

⁶²Haú hkûn, Yesuq gi, “Nghut lhê; haú ngò Byu Yhangzo gi, a-tsam bo dik Su é loqyo hkyam^{††} má zung tô é lé le, mhuth-tui ji mù, mauhkûng mai lé lo é^{‡‡} lé le, nungmoq myàng kó rã nghut lhê.” ga taí ri.

⁶³Haú hkûn, hkyangjong mó gi, yhang é bu lé lãng cheq pyám mù, “Nga-nhúng, hai saksé rã ashí lú?” ⁶⁴Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu

wó myit akô lú?” ga myí ri; yhangmoq banshoq bang gi, shí gíng sù nghut ri ga, chôm myit huí akô. ⁶⁵Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byi lhê kut mù, “Nang lé ó yuq htui é, myiqhtoi htoí wú aq.” ga taí akô. Haú zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyám É Hkyó

Mht 26:69-75; Luk 22:56-62;

Yhn 18:1-18, 25-27

⁶⁶Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri. ⁶⁷Haú yuq gi, Petruq gyoq gang nyi é lé myàng jáng, yhang lé rago wú mù, “Nàng le, Nazaret wà byù Yesuq eq rahá nyi sù nghut ri.” ga taí ri.

⁶⁸Nghut kôlhang, yhang gi, “Nàng taí é hkyô lé, ngò, sé le a sé, gyo le a sé gyo.” ga he pyám luí, wàng hkúmdong shut htoq e ló bê nghut ri.^{¶¶}

⁶⁹Dui-nhâng zoshâng myhí haú gi, Petruq lé, haú má dum myàng jáng, awui ayám má yap tô é bang lé, “Shí yuq le, haú hpúng má lom é sù rayuq nghut ri.” ga dum taí ri. ⁷⁰Petruq gi, radàm dum he pyám ri; hau htâng razup zo má, haú nãm má yap tô é bang gi, Petruq lé, “Nàng gi, Galile byù rayuq nghut é yanmai, haú hpúng mã é byù rayuq hkyak nghut lhê.” ga taí akô.

⁷¹Haú hkûn, yhang gi, yhanggùng yhang nhing luí, “Haú nungmoq taí é byù lé, ngò a sé.” ga dakam ri.

⁷²Haú u yhang, woq radàm dum tun kat bê nghut ri. Haú mù, Petruq gi, “Woq í dãm a tũn shimá, nãng, Ngo lé sum dãm he-ngik pyám rã nghut lhê.” ga, Yesuq,

^{††}14:62 *Loqyò hkyam* gâ é gi, ahko ahkáng wó é jowò lé gâ é nghut lhê.

^{‡‡}14:62 *Mhuthtui ji mù, mauhkûng mai lé lo é gâ é gi, Danielaq 7:14 má bò lhê.*

^{¶¶}14:68 *Chyúmding ra-am má Haú hkûn jáng, woq tũn bê nghut ri gâ é le bo ri.*

yang lé tai é dang lé, myit bûn kat mù, wum kat ngau ri.

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

15 Haû napkyó noq za má, hkyangjong agyi pé gi, suwún wuí, tará sará pé, Yudaq byin tú wapdoq gón bang eq rahá kut, chòm bống yû kômù, Yesuq lé tuí yû luí, shuí htoq é kômù, mauzau Pilat chyáng é ap byí akô nghut ri.

²Pilat gi, Yesuq lé, “Nàng gi, Yudaq byu pé é hkohkâm nghut lhê lú?” ga myi jáng, Yesuq gi, “Nàng tai é eq rajung za nghut lhê.” ga, tú tai ri.

³Haû hkyangjong agyi pé gi, Yang lé mara gyai myo shoq chòm hun akô.

⁴Haû mù, Pilat gi, Yesuq lé, “Wú aq, yangmoq, nàng lé mara haû myhó hun nyi le, nàng, haí le a tú tai lú?” ga myí ri.

⁵Nghut kôlhang, Yesuq gi, haí le a tú tai kut jáng, Pilat gi, maú byuq bê nghut ri.

⁶Haû Lhoqlhai Poí u lé, mingbyû wui dúng é htóng byû rayuq yuq lé, mauzau mai lhaq lhoq htoq byi byi kut é htung joq ri. ⁷Haû hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá, htóng gyó tô ri. ⁸Byû hpûng mó gi, doq lé lô mù, mauzau Pilat lé, yang lhaq kut é eq rajung za, yangmoq lé kut byi râ matú, dúng akô.

⁹Haû mù, yang gi, “Yudaq byu pé é hkohkâm lé nhang htoq kat byi râ lé, nungmoq ô nau akô lú?” ga myí ri. ¹⁰Pilat, haû su ga myí é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. ¹¹Nghut kôlhang, haû hkyangjong agyi pé gi,

Barabaq lé sheq nhâng byi râ matú, Pilat chyáng dung kó sháng gaq ga, haû byû moq mó lé i-myyit lhoq toq byí akô.

¹²Pilat gi, “Haû jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?” ga yangmoq lé myí ri.

¹³Haû hkûn, yangmoq gi, “Yang lé tapzîng má jén sat pyám aq.” ga chòm garu akô.

¹⁴Haû jáng, Pilat gi, “Haí mù luí lú? Yang haí kut shut bê lú?” ga dum myi jáng, yangmoq gi, htê mó èq, “Yang lé tapzîng má jén sat pyám aq.” ga je riy-hang garú lo bum akô nghut ri.

¹⁵Pilat gi, haû byû moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang lô kômù, gyedap gón lé ji tsing yu akô. ¹⁷Hau htâng, yangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akô. ¹⁸Hau htâng, yangmoq gi, “Yudaq byu pé é hkohkâm hpô è! Chyung hîng xê hing nyi sháng gaq ô!” ga wut garú akô. ¹⁹Hau htoq agó, yangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuoq mù, paí mhaú akô nghut ri. ²⁰Yangmoq gi, Yang lé rhoi jihkyoi ban kut yû kôjáng, Yang wut tô é buhîng nè lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yang lé shuí htoq é lô bekô nghut ri.

Yesuq Lé Jén Pyâm É Hkyô

*Mht 27:31-44; Luk
23:27-43; Yhn 19:17-27*

²¹ Alesander eq Ruhpu nhiktang é yhangwa, Kuruni myuq byû nghut é Simun ga sù gi, yosô wà mai lò mù, haú jowò mai lai lò ri. Haú hkún, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gà é jowò má shuí e akô (Golgahta gà é gi, ugyap joq é jowò lé gà é nghut ri). ²³ Hau htàng, yhangmoq gi, Yhang lé, mura^{ss} eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htàng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byî akô nghut ri.

²⁵ Yhangmoq, Yesuq lé tapzîng má jén tap pyâm é hkún gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, “YUDAQ BYU PÊ É HKOHKÂM” gà ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. ²⁸ (Haú gi, “Yhang gi, yubak dap bâng chyáng nghap lhôm é hui bê nghut ri.”^u gà é Chyúmdang lé lhoq dik é nghut ri.)^{*} ²⁹ Hkyô sô lai lò é bang gi, nyhap é dông u-ngut ngut mù, taí kô é gi, “Noqkuq yhúm lé hpoyq pyám luí, sum nyí gyoro má dum wó saí lhê ga Sù ê!” ³⁰ Náng gùng nàng hkyi yù luí, tapzîng mai gyó lò wú aq mhaí!” ga akô nghut ri.

³¹ Haú eq rajung za, hkyangjong agyi pé eq tará sará pé le, yhangmoq hkaú má, “Shí yuq gi, góbang lé hkyi yù sù nghut kôlhang, Yhânggùng yhang gi, a

wó hkyi yù nghut ri myhi-nhung!³² Nghanúng wó myâng mù, lumjîng râ matú, shî, Israelaq byu pé é hkohkâm, Hkrisduq gi, tapzîng mai gyó lo wú sháng ga.” ga, Yhang lé rhoí dang taí akô. Yhang eq rahá tapzîng má jén tap to huí é su nhik le, Yhang lé rhoí dang taí akô nghut ri.

Yesuq, Shi É Hkyô

*Mht 27:45-56; Luk
23:44-49; Yhn 19:28-30*

³³ Nyí-káng raxe í hkyíng mai myinhtàng sum hkyíng jé shoq, ramau gyon mauchut tuq dut byuq bê nghut ri. ³⁴ Myinhàng sum hkyíng jé é hkún, Yesuq gi, “Eloi, Eloi, lama sabakhtani.”^u ga, htê mó èq garú kat ri. Haú é lichyúm gi, “Ngá Garai ê, Ngá Garai ê, Nàng, haí mù, Ngo lé tô pyâm tô lhê luí?” gà é nghut ri.

³⁵ Haú nâm má yap tô é bang ra-am gi, haú lé wó gyo kôjáng, “Gyô wú keq. Yhang gi, myiqhtoi Eliyaq lé wut nyi ri.” ga, taí akô.

³⁶ Haú hkún, byù rayuq gi, din e lò mù, wuimaù lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, “Eliyaq gi, lé lò mù, Yhang lé lé lhoq hkyô yù abe, nghanúng chôm láng wú sháng.” ga taí ri.

³⁷ Yesuq gi, htê mó èq garú kat luí, kâng byit byuq bê nghut ri.

³⁸ Noqkuq yhúm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, “Shí yuq gi, gè gè yhang, Garai Gasâng é Yhangzo nghut ri-nhung!” ga taí ri.

^{ss}15:23 *Mura* gi, chi wó kut jung xú nghut lhê.

^{*}15:28 Bun zo shí gi, chyúmding axau ra-am pé má za bo é nghut lhê.

^u15:28 Esai 53:12 ^u15:34 Hkya-on 22:1

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mà é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng rã é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, gôbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyì (Bánno buinyì é hí nyí) nghut ri. Haú mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri. ⁴⁴ Pilat gi, Yesuq shí bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí teng bê lúhú ga myí ri. ⁴⁵ Shí teng bê hkyô lé, shô up gyezaù chyáng mai wó sê yù jáng, Pilat gi, Yesuq é gungsôm lé yù rã ahkáng, Yosep lé byi kat ri. ⁴⁶ Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyúng tô é lup hkaù má ê kat tô ri. Hau htâng, yhang gi, luphkum má, luqlông eq lhêng chí pyâm tô ri. ⁴⁷ Magadalaq wà mà é Mariq eq Yose é yhângnu Mariq gi, Yesuq lé, hkámá lheq tô é lé, ê myang akô nghut ri.

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

16 Bánno buinyì lai jáng, Magadalaq wà mà é Mariq, Yakuq é yhângnu Mariq eq Salome pé gi, Yesuq é gùng má, ê but byi rã matú namngón jung ê wui akô. ² Bánno buinyì htang napkyó bui

htoq lo é hkûn yhang, yhangmoq gi, lup shut e ló akô. ³ Yhangmoq gi, “Luphkum mà é luqgok lé, ó yuq chyûn lhêng pyám byi rã lúhú?” ga, rayuq eq rayuq taí lhum akô.

⁴ Nghut kôlhâng, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê. ⁵ Yhangmoq gi, lup hkaù má wang ê kô é hkûn, hpyu é buhíng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, “Hkâgyuq dàn kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lúhú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so láng rã nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myàng kó rã nghut lhê.' nghú, Yhâng é chángzô pé eq Petruq lé ló taí kyo keq.” ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpanq htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmd-ing axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mà é Mariq lé hí htoq shit ri. ¹⁰ Mariq haú gi, ló mù, haú Yesuq eq nyi laí lò bê bang, yón ngau nyi kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé

le, Yhang lé, Mariq myang é gâ é hkyô lé le, wó gyo kôlhang, a jíng kó nghut ri.

¹²Hau htâng má, Yesuq gi, yosô wà shut htoq e ló nyi é chángzo í yuq lé, gotû gungghyâng dong htoq shit ri. ¹³Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jíng byi kó nghut ri.

¹⁴Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjíng myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jíng é za myit htan to kô é yanmai le, Yhang gi, yhangmoq lé tân ri.

¹⁵Hau htoq agó, Yesuq gi, yhangmoq lé, “Míngkan jàm shoq htoq ê mù, waxâng zo wuí lhunglhang lé, haú gabú danglù hko kyo keq. ¹⁶Lumjíng mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôl-

hang, a lumjíng é sù ó yuq nghut kôle, mara byî é hui râ nghut lhê. ¹⁷Lumjíng é bang wó kut shit râ kumlhá pé gi, Ngá é myíng lé lang luí, nat gâng pé lé wó hkat htoq kó râ eq laklaí é myíng pé lé dat nyò kó râ nghut lhê; ¹⁸yhangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê.” ga taí ri.

¹⁹Haú Yhumsíng Yesuq gi, yhangmoq lé dang ban taí é htâng má, mauhkûng shut shuí toq yu é hui luí, Garai Gasâng é loqyo hkyam má zung to bê nghut ri. ²⁰Hau htâng, haú chángzô pé gi, htoq ê mù, jowò hkangmó má mungdang ê hko kyô akô nghut ri; haú Yhumsíng gi, yhangmoq eq rahá nghut nyî mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byî é nghut ri. Amen.

LUKAQ

é Gabú Danglù Laiká

(The Gospel of Luke)

1 Aróng wó dik é sù Htohpiluq ê, ng-amoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ²byù myo myo gi, shikut luí kâ to bekô nghut ri. ³⁻⁴Ngò le haú pé banshoq lé awang mai ahpyot hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶Haú nhik gi, Yhumsing Garaí é jep é tarâ eq htungtarâ banshoq lé, rago za cháng mù, Garai Gasâng é hí má dingmán é su nhik nghut akô. ⁷Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garai Gasâng é hí má lé zui le, ⁹haú Yhumsing é noqkuq yhûm ahkaú má namngón hkungga ê wang nyhé râ matú, hká yuq nghut râ lé hkyangjông pé é htungli eq rajung za byù hkyín shosé she wú é hkûn, yhâng chyáng âng ri. ¹⁰Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹Haú hkûn, Yhumsing Garaí é maumang lagyo gi, namngón jung nyhé

é hkungga gyap é loqyo hkyam má, Zahkariq lé, lé yap shit ri. ¹²Zahkariq gi, maumang lagyo haú lé myàng jáng, dan gyuq nyi ri. ¹³Nghut kôlhang, maumang lagyo gi, “Zahkariq ê, hkâgyuq, náng é kyûdung dang lé Garai Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê. ¹⁴Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵Hkâsu mù gà le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsi-byiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyúng Woi-nyí eq byíng nyí râ sù nghut lhê. ¹⁶Yhang gi, Israelaq yhangzo yhangshû pé myo myo lé, Yhumsing yhangmoq é Garai Gasâng chyáng lhing lò nhâng râ sù nghut lhê. ¹⁷Íwâ pé é myit nhiklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê.” ga luí, yhang lé taí ri.

¹⁸Haú hkûn, Zahkariq gi, “Haú hkyô lé ngò hkâsu kut wó sé râ lúh? Ngò le mang byuq bê, ngá é yhumsing myhí le asak ipyat ko bê.” ga luí, maumang lagyo lé tú taí ri.

¹⁹Maumang lagyo haú gi, “Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê. ²⁰Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mù haú dut lo é buinyí jé shoq, nàng gi, nhut jit byuq râ nghut lhê.” ga luí, yhang lé tú taí ri.

²¹ Haû u, shiwa byu pé gi, Zahkariq noqkuq yhûm ahkaû má haû-í myáng shoq lúng byuq é hkyô lé lánq maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haû mù luí, yhangmoq gi, noqkuq yhûm ahkaû má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuí, Zahkariq gi, hkyangjong jong âng é buinyi ngap jáng, yhûm shut dum taû ló byuq bê. ²⁴ Hau htàng má, yhâng é yhumsing myhí Elizabet gi, zogúng dut lò mù luí, hká le a htoq e za lhamó ngo hkyap yhúmhaû má lúng byuq ri. ²⁵ Haû hkûn, yhang gi, “Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyi má, Yhang ge é hkyô lé, ngo lé tún shit bê nghut ri.” ga taí ri.

Yesuq Hku Lé Lô Berâ Gà É Hkyô

²⁶ Ahkuí, Elizabet zogúng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gà ri; yhang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haû gi, Mariq chyáng jé jáng, “Mariq ê, ngu-íngón nyí sháng gaq; Nàng, hkungsô wó nyi ri; Haû Yhumsing Garai gi, nàng eq rahá nyi nyi ri ò!” ga taí ri.

²⁹ Mariq gi, dang haû lé gyo sing nán mù, shí su gà é dang gi, haí jung gá naû é nghut lê lú ga luí, myit maú nyi ri. ³⁰ Haû hkûn, haû maumang lagyo gi, “Mariq ê, hkâgyuq, nàng gi, Garai Gasang é hí má myoqdong wó bê nghut ri. ³¹ Wú aq, nàng zogúng dut lò mù luí, yuqzo rayuq bau râ nghut lê. Yhâng é myíng lé gi, 'Yesuq' nghû luí, nàng my-

híng byi ra râ nghut lê. ³² Yhang gi, hpung bô sù dut râ nghut mù, Myhang htáng htúm Su é Yhangzo gà é hui râ nghut lê. Yhumsing Garai Gasang gi, yhang lé, yhâng é íchyí íwa Dawiq é hkohkâm tanghkuq lé, byi râ nghut mù luí, ³³ Yhang gi, Yakup yhûm† lé hkâ-nhám le ru-up nyi râ nghut lê. Yhâng é mingdán le htum nghu é joq râ a nghut.” ga luí, yhang lé taí ri.

³⁴ Haû hkûn, Mariq gi, “Ngò gi, zomyi gyíng ru nghut ashí, haû gi, hkâsu wó dut râ lú?” ga luí, maumang lagyo lé tú taí ri.

³⁵ Haû maumang lagyo gi, “Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haû baû lò râ Chyoiyúng sù le gi, Garai Gasang é Yhangzo ga kó râ nghut lê. ³⁶ Hau htoq agó, wú aq, náng é amyû suisho baùdung myhí Elizabet lhang, mang bê le yuqgè zo wun to bê. Ahkuí, zogúng dut é lhamó hkyuq hkyap wàng bê nghut ri. ³⁷ Hkâsu mù gà le, Garai Gasang a wó kut é haí le a joq.” ga luí, yhang lé tú taí ri.

³⁸ Haû hkûn, Mariq gi, “Yhumsing é jùnmyhí ngò nghut nyi lê; náng é dang eq rajung za ngá chyáng dut lò sháng gaq.” ga tú taí ri. Hau htàng, maumang lagyo gi, yhâng chyáng mai ló byuq bê.

Elizabet Lé Mariq Ê Huí É Hkyô

³⁹ Hau htàng hkâ-í a myáng má, Mariq gi, Yuda mau bum mau mâ é wà rawá shut hân hân e ló luí, ⁴⁰ Zahkariq é yhûm má wàng mù, Elizabet eq huí nyo lhúm ri. ⁴¹ Mariq é danghtê lé Elizabet wó gyo jáng, yhâng é unghkaû mâ é zoshâng gi, byam chyú lo ri. ⁴² Elizabet le, Chyoiyúng Woi-nyí byíng to mù luí, Mariq lé htê mó èq taí é gi, “Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le

†1:33 Yakup yhûm nghu e gi, Israelaq amyû lé gà lê.

hkungsô wó nyi ri ô! ⁴³Ngá Yhumsing é yhângnu ngá chyáng jé lé é jeju gi, hai é yanmai nghut bê lhu? ⁴⁴Wú aq, náng danghtë lé wó gyo kat jáng, ngá unghkaû mâ é zoshâng gi, gabú luí byam chyû nyi ri. ⁴⁵Haû Yhumsing taí é dang gi, gè gè dik lò râ nghut lhê ga luí, lumjáng é myiwe gi, hkungsô wó nyi ri.” gâ ri.

Mariq É Hkya-on Dang

⁴⁶Haû hkûn, Mariq gi,
 “Ngá é i-myt mai haû Yhumsing lé hkya-on nyi lhê,
⁴⁷ngá é woi-nyí le, Garai Gasang ngá é hkyi yù Sû má gabú nyi lhê.
⁴⁸Ngò Yhâng é jùnmyhí myit nyhum nyi é lé, Yhang myàng byi bê nghut ri.
 Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekò râ nghut lhê.
⁴⁹hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,
 Yhâng é myìng gi, chyoiyúng nyi ri ô.
⁵⁰Yhang lé gyuq hoq nyí bâng é ahtoq má, Yhang shogyo nhikmyín é hkyô gi,
 pyat bán hkanmó jé shoq hkâ-nhám le joq nyi râ nghut lhê.
⁵¹Yhâng é wum-o bo é loq èq mauhpo mù mó pé lé tûn shit bê.
 Yhumsing myit é hkyô má nghutbûn nyi é bang lé, Yhang lhoq pyo pyám bê.
⁵²Zaugun suwún wuí lé gi, zau zûng tanghkuq mai lhoq hkyô pyám mù, i-myt nyhúm bang lé gi, lhoq myhâng bê nghut ri.
⁵³Zòmút hui bang lé gi, ge é zoshuq gyi shoq byi tso mù,
 sutzè wó bang lé gi, akôm nhang kat bê nghut ri.
⁵⁴⁻⁵⁵Nga-nhûng é ichyí íwâ pé lé taí tô é dang eq rajung za, Abraham eq yhangzo yhangshu pé lé,
 hkâ-nhám le shogyo nhikmyín nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri.”
 ga luí, taí ri.

⁵⁶Mariq gi, Elizabet chyáng lhamó sum hkyap kô nyi mù luí, yhúm shut dum taú lò byuq bê.

Wui-myhup Sará Yohan Baú É Hkyô

⁵⁷Hau htâng, Elizabet gi, zoshâng bau râ buinyi jé mù, yuqgè zo bau bê.
⁵⁸Yhang lé haû-í kô é jeju Yhumsing tûn shit é hkyô lé, yhâng é yhumkyo buinùm wuì eq mung moq gumang wuì wó gyo kojáng, yhang eq rahá gabú nyi akò.

⁵⁹Ahkuí shit nyí jé jáng, yhangmoq gi, zoshâng haû lé ahyo-kuq hpyit byi râ matú lé kôluí, yhâng wâ é myìng eq rajung za, Zakhariq ga myhíng byi râ dâ akò. ⁶⁰Nghut kôlháng, yhâng nu gi, “A nghut, Yohan nghû sheq myhíng râ nghut lhê.” ga tû taí ri.

⁶¹Yhangmoq gi, “Náng é amyû suisho má le, haû su gâ é myìng rayuq le a bo wú shi.” ga luí, yhang lé taí akò.

⁶²Haû hkûn, zoshâng haû lé hkâsu nghû myhíng nau lhê laq ga, yhâng wa lé loq lik lik shit mù myí akò. ⁶³Zakhariq gi, kâ jung longpá dîng yù mù, “Yhâng é myìng gi, Yohan nghut lhê.” ga kâ shit ri.
 Haû mù, lhunglhâng bang gi, maú byuq bum akò. ⁶⁴Haû hkûn jáng, Zakhariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri. ⁶⁵Haû su dut é hkyô lé, wó gyô é awui ayàm lhínghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akò. ⁶⁶Wó gyô é lhunglhâng bang gi, haû hkyô lé yhumsing é i-myt unghkaû má kat to mù, “Zoshâng shí gi, hkâsu dut lò râ sù nghut lhê lhu?” ga myit wú nyi akò.
 Haí mù gâ le, haû Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkún, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ “Haú Yhumsíng, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyú lé, lé kúm wú mù luí, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyú mai nga-nhúng é matú wum-o bo é hkyi yu é hkyuí[‡] lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pè é nhut mai taí tô é eq rajung za nghut ri.

⁷¹ Haú hkyuí gi, nga-nhúng lé nga-nhúng é gye pè chyáng mai le, a nguí a naù bang banshoq é loq mai le, hkyi yù râ nghut lhê.

⁷² Íwa Garai gi, nga-nhúng é íchýí íwa pé lé shogyo nhikmyin hkyô lé tún shit râ matú, Yhang byí tô é chyoiyúng dangshikaq lé a tô-myhí nghut ri.

⁷³ Haú gi, nga-nhúng é chyiké Abraham lé byi tô é danggididq nghut lhê.

⁷⁴⁻⁷⁵ Nga-nhúng lé gye pè loq mai hkyi yù râ eq, nga-nhúng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dǐngmán é hkyô mai, Yhang lé wó dojaú nyí nhâng râ matú, Yhang jé lé é nghut lhê.

⁷⁶ Ngá zo è, nàng gi, Yhumsíng é hí má, e ló mù luí, Yhâng é hkyô lé hen la-jang byi râ sù nghut é yanmai, nang lé Myhang htáng htúm Su é myiqhtoi ga kó râ nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui râ hkyô lé taí kyo râ sù nghut lhê.

⁷⁸ Haí mù gâ le, Garai Gasâng é shogyo nhikmyin é yanmai, napsún buí[¶] gi, mauhkúng mai nga-nhúng chyáng htoq lé lô râ nghut lhê.

⁷⁹ Yhang gi, mauchut hkaú[§] eq shí wup hkaú má lúng to bang lé builoq su duqbó byi râ eq, nga-nhúng lé nuingón simsaq é hkyô shut shuí e ló râ sù nghut lhê.” ga ri.

⁸⁰ Zoshâng haú gi, kô lò mù, woi-nyí wum-o bo lò luí, Israelaq byu pè chyáng htoq shit lo é buinyi jé shoq, yoso pé má nyi nyi ri.

Betlehem Wà Mó Má Yesuq Hku Lo É Hkyô

Mht 1:18-25

2 Buinyi haú pé má, Romaq hkoséng ming banshoq mâ é byú lhunglhâng bang gi, myíng jihpán kat râ matú, hkoséng Kehtaq Augustuq chyáng mai mungdang htoq ri. ² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkún nghut ri.

³ Haú hkún, byú du jup gi, myíng jihpán kat râ matú, ó le ô é wà shut ló bum akô.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut, ⁵ yhang dúng tô é myiwe Mariq eq rahá myíng kat lhóm râ matú jé doq ló akô; Mariq kúm gi, gun-gloq laí to bê nghut ri. ⁶ Haú Betlehem má nyi tô ashí le, Mariq gi, zo hkú râ buinyi jé mù, zomún yuqzo lé bau bê.

⁷ Yhang gi, zoshâng haú lé panchoq èq

[‡]1:69 Hkyi yu é hkyuí gi, Yhumsíng Yesuq lé taí é nghut ri.

[¶]1:78 *Napsún buí* gâ é gi, Yesuq lé taí é nghut lhê.

[§]1:79 *Mauchut hkaú* gâ é gi, Garai lé a sé mù woi-nyí má shi tô é bang lé gâ lhê.

htup mù no tso langhkang má lheq tô ri; haí mù gâ le, bíng yhûm má yhangmoq nyí rà jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuí, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsîng é hpungwup shing kang gi, awui ayàm má duqbang lò luí, yhangmoq gyai gyuq bum akô. ¹⁰ Maumang lagyo gi, “Hkâgyuq kó, byù lhunglhâng bâng é matú, gyai yang gabú é danglù, ngò nungmoq chyáng wun lé lo lhê. ¹¹ Hkû-nyí lhê buinyí má, Hkrisduq** nghu é Yhumsîng nghut é hkyi yù Sû gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to lán ra nghut lhê.” ga luí, yhangmoq lé taí ri.

¹³ Haú hkûn jáng yang, mauhkûng bang rajùm rayò htoq lô mù, maumang lagyo haú eq rahá Garai Gasang lé hkya-ôn é dang gi,

¹⁴ “Htoq tsáng myhâng má, Garai Gasang gi, hpungwup shing kang bo nyí sháng gaq ô!

Myigùng htoq má le, Yang ô nau é byu pé má, nguínón é gi, hkâ-nhám le joq nyí sháng gaq ô!”
gâ akô.

¹⁵ Maumang lagyo pé, yhangmoq chyáng mai, mauhkûng shut dum lò byuq jáng, sau zúng bang gi, “Sà! Betlehem wà mó má jé shoq yang, nga-nhúng ê mù, ahkuí za Yhumsîng nga-nhúng lé lé shit kyô laí lò bê hkyô

lé é gôn wú sháng.” ga luí, rayuq eq rayuq taí lhûm akô.

¹⁶ Hau htâng, yhangmoq gi, hân hân é luí, Mariq eq Yosep lé le, no tso langhkang má lheq tô é zoshâng nyheqnú lé le, é myàng akô. ¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé taí kyô é dang lé, taí pyô kat bekô. ¹⁸ Wó gyô é bang banshoq gi, haú sau zúng bang taí kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsîng yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú lò bekô nghut ri.

Yesuq Lé, Noqkuq Yhûm Má Shuí E É Hkyô

²¹ Zoshâng haú, shit nyí jé mù ahpyokuq hpyit byi rà buinyí má, yang unghkaú má a lúng shi mai maumang lagyo myhîng tô é myîng eq rajung za, yang lé, “Yesuq” ga luí, myhîng byí akô.

²² Mosheq é tarâ eq rajung za, yhangmoq é lhoq san lhoq sêng é buinyí byíng jáng, Yhumsîng é tarâ má, “Zomún yuqzo hkangmó gi, haú Yhumsîng é hí má chyoiyúng sù wó nghû rà matú, Yhumsîng chyáng ê ap byi rà lhê.”^v gâ é eq, ²³ “Hpúngkyui razúm, haú a nghut jáng, nghoqmyhú zo í du,”^w hkungga byi rà lhê ga kê tô é eq rajung za, ²⁴ Mariq eq Yosep gi, zoshâng haú lé shui mù Yerusalem wà mó shut ê akô.

²⁵ Haú hkûn, Simeon gâ é mangzo rayuq, Yerusalem wà mó má nyi ri. Haú

**2:11 Grik dong *Hkrisduq* gâ é gi, xû but hui Sû gâ é lichyúm nghut mù, Hebre dong “Mesaia” gâ é eq rajung za nghut lhê.

yuq gi, dingmán é eq tarâ cháng sù nghut mù, Israellaq lé nhik lhoq títng rã ahkýng lé lánng nyí sù nghut ri; haù Chyoiyúng Woi-nyí le, yhâng é ahtoq má nyi nyi ri.

²⁶ Yhang gi, haù Yhumsíng Hkrisduq lé a myang é za, shí rã a nghut, ga Chyoiyúng Woi-nyí èq tún shit tô é hui sù nghut lhê. ²⁷ Yhang gi, Chyoiyúng Woi-nyí èq shui mù, noqkuq yhúmhaù má ê jé nyi tô é hkùn lé, Mariq eq Yosep gi, zoshâng Yesuq lé htúng tarã eq rajung za kut byi rã matú, noqkuq yhúmhaù má shuí wang ló kôjáng, ²⁸ Simeon gi, zoshâng lé loq èq lhóm bún yù mù, Garai Gasang lé hkyá-ôn é dang gi,

²⁹ “Yhumsíng ê, nánng é danggidiq gi, dik bê nghut ri; hkù-nyí nánng é jùn ngò gi, nguínón é èq wó shi ló berã nghut lhê.

³⁰ Haù mù gã le, byù lhunglhâng bâng é matú, nánng lajang tô é hkyi yù hkyô lé, ngá myoq èq yhang wó myáng bê.

³¹ Haù gi, byù myú chângjup wó myáng rã matú, nánng lajang to byí é nghut mù,

³² tûngbaù pé lé, tengmán hkyô má bui su duqbó mù hpông shit rã matú le, nánng é amyú Israellaq é hpungwup shíngkang matú le nghut nyi ri.”

gã ri.

³³ Yhângnu eq yhângwã nhik gi, zoshâng Yesuq é hkyô lé Simeon taí é yanmai, maú byuq akò. ³⁴ Simeon gi, yhangmoq lé shimân byi mù, Yhâng nu Mariq lé, “Wú aq, zoshâng shí gi, Israellaq míng má é byù myo myô é matú lingbat jowò eq myo myô é matú kò lò myhang lò rã hkyô le, byù myo myo taí he pyám rã kumlhá matú le, hkyin tô é hui sù nghut ri. ³⁵ Haù mù, byù myo myô é unghkaù má, myit mi-myit lé lhoq htoq shit rã nghut lhê. Nánng é myit nhiklum má, shâm chún èq htaù kyâng kat é su gã é lé, nánng hui zo rã nghut lhê.” ga taí ri.

³⁶ Ashe amyú mã é Hpanuelaq é yhangzo, Annaq gã é myiqhtoi myhí rayuq nyi ri; yhang gi, ipyat gyai kò bê. Yhang gi, zomyí pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri.

³⁷ Myiwe haù gi, noqkuq yhúm mai a htoq é za, nyí myín a ga noqkuq dojaù nyi mù, zoshuq gám luí kyûdúng nyi ri.

³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkyáon luí, Yerusalem wà mó lé Garai Gasang hkyi yù rã gã é lé, myit lum to bang lhunglháng lé, zoshâng hau é hkyô taí kyô ri.

³⁹ Yosep eq Mariq gi, kut rã pé lé haù Yhumsíng é tarã joq é dông ban kut jáng, Galile mau mã é yhangmoq wà Nazaret shut dum taù ló bekò. ⁴⁰ Zoshâng haù gi, kò lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaù Má Zoshâng Yesuq Jé Nyi É Hkyô

⁴¹ Yhângnu yhângwã nhik gi, Lhoqlhai Poí jé hkangmó, zàn wui Yerusalem wà mó má ê ê kut akò. ⁴² Yesuq raxe í zân jé jáng, poí haù, ê bo lòm ra htúngli joq é eq rajung za, yhangme wuí yhanghpe wuí doq ló akò. ⁴³ Haù poí buinyi lai luí, dum taù lo é hkùn, zoshâng Yesuq gi, Yerusalem wà mó má nyi gyó tô ri; nghut kôlháng, yhângnu yhângwã nhik gi, a sé kó. ⁴⁴ Yesuq lé rahá lo é luzúm wui chyáng bò rã su ngàm kômù luí, Yosep eq Mariq gi, ra-nyí buigyum chap sô ló bê htâng má, mung moq wui eq, sê lhúm é buinùm ji-myi wui chyáng Yhang lé châng ho akò. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé e ló bekò. ⁴⁶ Ahkuí, sum nyí nghú rã nyí sheq, noqkuq yhúmhaù má, tarã sará pé é gung gúng má zùng to mù, yhangmoq é dang lé gyo yù luí, dum taù

myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tù taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhângnu gi, “Ngá zo ê, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê.” ga luí, Yhang lé taí ri.

⁴⁹ Yhang gi, “Haí mù luí, ngo lé châng ho akô lhú? mauhkung má é ngá Wá é yhúm má ngò nyi rà lhê le gi, nungnhik a sé kó lhú?” ga luí, yhangnhik lé tù taí ri. ⁵⁰ Nghut kôlhang, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taú jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut laí lò bê hkyô pé banshoq lé, yhâng é myit nhiklhum má matsîng tô ri. ⁵² Yesuq gi, hpaqchyí byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

3 Romaq hkoséng Kehtaq Tiberuq gi, hkô zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haú

hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haú mù, yhang gi, Yodan làng yàm jowò hkanmó má, sô jón wún luí, yubak mara hkyut pyám byí é hui rà matú myit lhîng mù, wui-myhup hkâm^{††} yù rà hkyô lé, hko kyô nyi ri. ⁴ Haú gi, myiqhtoi Esai-aq laiká má, “Haú yoso má, byù rayuq garú taí é htê gi,

Haú Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuîhkung langhkop hkanmó lé lhoq pyíng ra rà nghut lhê;

bùm eq wingkáng hkanmó lé hpyit pyám ra rà nghut lhê;

agoí aguq é hkyô hkat hkanmó lé lhoq nyhâng ra rà nghut lhê;

ahkung ahkop dut é hkyô hkat hkanmó lé lhoq rhá ra rà nghut lhê.

⁶ Haú hkûn, byù banshoq gi, Garai Gasâng é hkyi yù hkyô lé myàng rà nghut lhê.^{”x}

ga luí, kâ tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù rà ga luí htoq lé lô kôjáng, Yohan taí é gi, “Duq htan é lhangmuí amyù pé^{‡‡} ê, jé lô rà yubak dam mai wó hpanq lut kó sháng gaq ga, nungmoq lé ó yuq taí pûn é lhú? ⁸ Myit lhîng hkyô eq gingdán é ashi zui keq. Nga-nhúng gi, Abraham é yhangzo yhangshú pé nghut lhê.^{”¶¶} nghú luí, yhumsing é i-myyit ynghkaú má hkâ-taí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzò

^{††}3:3 *Wui-myhup hkâm gâ é gi, baptisma lé gâ é nghut lhê.*

^{‡‡}3:7 *Lhangmuí amyù pé gâ é gi, Lukaq 3:7-10 má bo é Hparishe eq Saduke pé lé taí é nghut ri.*

^{¶¶}3:8 *Nga-nhúng gi, Abraham é yhangzo yhangshú pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui rà ga, myit yu é hkyô nghut ri.*

^x3:6 *Esai 40:3-5*

pé wó hpan htoq kat lhê. ⁹Ahkuí lháng, Garai Gasang gi, Yhâng é wazung lé haú sikgâm wang pé má tô to bê nghut ri; haú mù, ge é ashi a zui é agàm hkangmó lé gi, htuq lhêng pyám mù, myi má dú kat pyám rà nghut lhê.” gâ ri.^{§§}

¹⁰Haú hkûn, shiwa byu pé gi, “Haú nghut le gi, ngamoq hkâsu kut le gè rà lhú?” ga luí, yhang lé myí akô.

¹¹Yhang gi, “Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq.” ga luí, yhangmoq lé tú taí kat ri.

¹²Kang guq bang le, wui-myhup hkâm yù rà ga lé lô mù, “Sarâ ê, ngamoq gi, hkâsu kut le ge rà lhú?” ga luí, yhang lé myí akô.

¹³Yhang gi, “Nungmoq hkyui yù rà masat tô é htoq lai shoq hkâyû kó.” ga luí, yhangmoq lé taí ri.

¹⁴Gyezô pé ra-am le, “Ngamoq gi, hkâsu kut le gè rà lhú?” ga luí, yhang lé lé myí akô.

Yohan gi, “Ó lé le hkâkyuq zo ko; a tara é đông mara le hkâhûn kó; nungmoq wó e aphaú èq gé bûn nyi keq.” ga luí, yhangmoq lé taí ri.

¹⁵Shiwa byu pé kúm gi, Hkrisduq lé myit láng nyi tô é bang nghut é yan-mai, Yohan lé haú yuq nghut lhê laq ga yhumsing é i-myt unghkaú má myit wú nyi bum akô. ¹⁶Haú hkûn, banshoq bang lé Yohan taí é gi, “Ngò gi, nungmoq lé, wui èq za wui-myhup hkâm byí lhê; nghut kôlháng, ngá htoq má wum-o a-tsam je bo é sù rayuq jé lé lô rà nghut lhê. Ngò gi, yhâng é hkyí-tsung tui lé hpyí rà lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi rà nghut lhê. ¹⁷Yhang gi, loq má byò chung to mù, guq chyârâng mâ é guq bùm lé

hik sân pyám luí, já é guq cham lé gi, guqchyí má tsing kat to mù, guqsóm lé kúm gi, hkâ-nhám le shi byuq a sê é myí èq nyhê hkyô pyám rà nghut lhê.” gâ ri.*

¹⁸Haú mù, Yohan gi, byù haú bang lé gotú dang myo myo èq lhoq pun lhoq kying mù, gabú danglù lé hko kyô nyi ri.

¹⁹Nghut kôlháng, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri. ²⁰Mara haú pé htoq agó, Herut dum kut jat yu é mara gi, Yohan lé htóng má lhúng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹Yohan lé htóng má a lhúng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyúdûng nyi le, mauhkûng bóng lô mù, ²²haú Chyoiyúng Woi-nyí gi, hpúngkyui gunghkyâng sù é đông mai Yhâng ahtoq má lé gyó nô ri. Haú hkûn, “Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê.” ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

²³Yesuq gi, Yhang mù zú hi é hkûn, asak sum xê zàn kô nghut bê; Yhang lé byù hkyam đông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵Yosep gi, Matahtiaq é

§§3:9 Bun zo shí lhûm é lichyúm gi, myit a lhîng bang lé, Garai Gasang jéyáng é buinyi jé rà nghut lhê ga naú é nghut ri.

*3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám rà nghut lhê.

yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷Yodaq gi, Yohan é yhangzo, Yoanani gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadani é yhangzo, Elamadani gi, Era é yhangzo, ²⁹Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonani é yhangzo, Yonani gi, Eliakim é yhangzo, ³¹Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtani é yhangzo, Nahtani gi, Dawiq é yhangzo, ³²Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³Nashon gi, Aminada é yhangzo, Aminada gi, Arni é yhangzo, Arni gi, Hesarun é yhangzo, Hesarun gi, Hparet é yhangzo, Hparet gi, Yudaq é yhangzo, ³⁴Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶Shela gi, Kainani é yhangzo, Kainani gi, Arhpaza é yhangzo, Arhpaza gi, Shem é yhangzo, Shem

gi, Noaq é yhangzo, Noaq gi, Lamek é yhangzo, ³⁷Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainani é yhangzo, ³⁸Kainani gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

Yesuq Lé Tsadán Gunglaú É Hkyô

Mht 4:1-11; Mrk 1:12-13

4 Yesuq gi, Chyoiyúng Woi-nyí èq byíng mù, Yodani làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. ²Haú má, Yesuq gi, buinyí myi xê nyí jé shoq, nat Tsadán èq gunglaú é huí ri. Buinyí haú gyoro má, Yesuq gi, haí le a zô é yanmai, zòmut hui bê nghut ri.

³Haú mù luí, nat Tsadán gi, “Nàng, Garai Gasâng é Yhangzo nghut le gi, luq-gok shí lé muk dut nhâng aq.” ga luí, Yhang lé taí ri.

⁴Haú hkûn, Yesuq gi, “Byù gi, muk èq za asak duí rã a nghut.’ ga luí, Chyúmdang má kã tô ri.”^y ga yhang lé tũ taí ri.

⁵Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tũn shit luí, ⁶“Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gã le, haú pé banshoq gi, ngo lé ap byí to bê nghut mù, ngò byí nau é sũ ó yuq lé nghut kôlhâng, byi rã nghut lhê.” ⁷Haú mù, Nàng, ngo lé noq é nghut jáng, shí pé banshoq Náng é dut rã nghut lhê.” ga, Yesuq lé taí ri.

⁸Haú hkûn, Yesuq gi, “Haú Yhumsîng náng é Garai Gasang lé za, nàng noqkuq dojaú ra rã nghut lhê.”^z ga luí, Chyúmdang

dang má kâ tô ri.” ga luí, yhang lé tú taí ri.

⁹Nat Tsadán gi, Yesuq lé Yerusalem và mó má shuí ê mù, noqkuq yhum je myhang é shùhtâng htoq má yap nhang to luí, “Nàng, Garai Gasâng é Yhangzo nghut le gi, shí mai byam gyó kat wú aq.

¹⁰Hkâsu mù gâ le,

'Nang lé upzúng byí nyí râ matú, Garai Gasang gi, Yhâng é maumang lagyô pé lé taí to râ nghut mù,

¹¹luqgok má náng é hkyí a ló htung shoq, yhangmoq é loq èq Nàng lé lhom bún yú kó râ nghut lhê.^a

ga luí, Chyúmdang má kâ tô ri.” ga taí ri.

¹²Nghut kôlhang, Yesuq gi, “Hau Yhumsing, nungmoq é Garai Gasang lé, wó chyam wú râ a nghut.^b ga luí, Chyúmdang má bo tô ri.” ga, yhang lé tú taí ri.

¹³Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Và Bang He-ngik Pyâm É Hkyô

Mht 4:12-17; 13:53-58;

Mrk 1:14-15; 6:1-6

¹⁴Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Hau mau jowò hkangmó má, Yhâng é hkyô lé taí pyo ló bùm bekô.

¹⁵Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkya-ôn nyi bum akô.

¹⁶Hau htâng má, Yhang nyi kô lo é Nazaret và má dum taú jé ló bê; Yhang gi, hkâ-nhám le kut nyi é eq rajung za, Bánno buinyì[†] lé tarajong má wang ê mù, laiká nghap râ ga toq yap é hkûn,

¹⁷Yhang lé myiqhtoi Esai-aq chyúmding byi kôjáng, Yhang chyúmding hau lé hpông kat le,

¹⁸“Yhumsing é Woi-nyí gi, ngá é ahtoq má nyi nyi ri;

hkâsu mù gâ le, asho awuí é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo luí é bang lé nhang kat nhâng râ eq,

¹⁹Yhumsing, Yhâng é byu pé lé hkyi yú râ ahkyíng zanwut lé hkô kyo râ matú le, Yhang, ngo lé nhang kat bê nghut ri.”^c

ga luí, kâ tô é jowò lé myang záng mù nghap ri.

²⁰Hau htâng, Yesuq gi, chyúmding hau lé ding mù, shuí-u sù lé tau byí pyám luí, dum zung tô ri; tarajong mâ é byù lhunglhâng bang gi, Yesuq lé chôm wú tô é hkûn, ²¹Yesuq gi, “Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê.” ga luí, yhangmoq lé taí hi kat ri.

²²Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, “Shí yuq gi, Yosep é yhangzo a nghut lúh?” ga taí bum akô.

²³Hau mù luí, Yesuq gi, “Nungmoq gè gè yhang, 'Chi sará ê, yhumsing gùng lé lhoq ge yù aq.[‡] gâ é sanghkyang èq le, 'Nàng, Kaperna-um và má kut shit wú é hkyô ngamoq wó gyo bê, hau eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê.” ga taí ri.

[†]4:16 Bánno buinyì gâ é gi, Yudaq byu pé nòmu é buinyì lé gâ lhê. Ahkui lhê é đông ga jáng, Bánno buinyì gi, bat htoq hkyuq nyí lé âng ri.

[‡]4:23 Chi sará ê, yhumsing gùng lé lhoq ge yù aq gâ é sanghkyang gi, “Mesaia nghut le gi, mauhpo mù wó tûn shit râ nghut lhê.” gâ é nghut lhê.

^a4:11 Hkya-on 91:11-12 ^b4:12 Tarâ Pun 6:16 ^c4:19 Esai 61:1-2

²⁴ Yhang dum xoq taí é gi, “Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za taí kôlé, Eliyaq é pyat lé, Israellaq ming má chuimó myo myo nyi bum akô. ²⁶ Nghut kôlhang, haú ming má súm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephtha wà mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israellaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê.” ga taí ri.

²⁸ Tarajong hkaù mâ é lhunghâng bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám rà ga shuí e ló akô. ³⁰ Nghut kôlhang, Yesuq kúm gi, byù hpûng haù mai so hkoq htoq ló byuq bê nghut ri.

**Agè Ashop É Nat Lé
Yesuq Hkat Htoq É Hkyô**

Mrk 1:21-28

³¹ Hau htâng, Yesuq gi, Galile mau mâ é Kaperna-um wà má jé ê mù, Bánno buinyì má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaù má mhoqshit byí nyi é hkûn, nat gang wang júng é byù rayuq htê mó o mó èq taí é gi, ³⁴ “Ê, Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten rà matú, Nàng jé lé é nghut lhê

lhú? Nàng gi, Garai Gasâng é Chyoiyúng Sù nghut é lé, ngò sê lhê.” gâ ri.

³⁵ Haù hkûn, Yesuq gi, “Hkâjop, yhâng chyáng mai htoq ló aq.” ga yhang lé tân kat jáng, nat gi, haù yuq le yhangmoq é gung gùng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haù mù luí, shiwa byù banshoq bang gi, gyai yhang maù byuq kômù, rayuq eq rayuq, “Shí yuq é dang gi, hkasù é dang wà nghut lhê lhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haù bang htoq ló byuq akô.” ga taí lhùm bum akô. ³⁷ Haù hkûn, haù mau mâ é awui ayàm jowò hkanmó má jàm shoq, Yhâng é hkyô lé taí pyo hú ló bùm bekò nghut ri.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

³⁸ Yesuq gi, haù tarajong mai toq ló mù, Simun é yhùm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byí rà matú, Yesuq lé garúm dung byí akô. ³⁹ Yesuq gi, Simun é yhâng-aumó nàm má yap to mù, nòhpyo haù lé tân kat jáng, Simun é yhâng-aumó gi, ge ló byuq bê; haù hkûn jáng, yhang gi, toq mù, yhangmoq lé gai tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhungháng lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, “Nàng gi, Garai Gasâng é Yhangzo nghut ri.” ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaù é jowò yoso hkaù má é nyi tò

ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkúm wú akô. ⁴³Nghut kôlhang, Yesuq gi, “Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê.” ga luí, yhangmoq lé taí ri. ⁴⁴Haú mù, Yesuq gi, Yuda mau má é tarajong pé má, hko kyô wún nyi ri.

Sâng-hi Ji Yù Huí É Chángzô Pé

Mht 4:18-22; Mrk 1:16-20

5 Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkún, ²nhông gin-gau yàm má lhai razúm joq tô é lé, Yhang myang kat ri. Ngogûn dú bang kúm gi, lhai mai htoq mù, yhangmoq é gùn pé lé chí nyi akô. ³Yesuq gi, Simûn é lhai má wàng mù gin-gau mai rachyit lhoq kang nhâng luí, haú lhai htoq má zung to mù, shiwa byu pé lé mhoqshit taí kyô nyi ri.

⁴Dang ban taí jáng, Yesuq gi, Simun lé, “Wuì nik é shut hui luí, ngozo wó kông yù râ matú, nungmoq é gùn pé lé dú hkyô kat keq.” ga taí ri.

⁵Simun gi, “Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê.” ga tú taí ri.

⁶Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai, ⁷lhai gó lhum mâ é luzúm wuí lé, lé garúm yù râ matú loq lik lik kat kôjáng, haú bang lé lô mù, haú lhai í lhum aluq myup ló shoq ngozo lé kat pying bekô.

⁸Simun Petruq gi, haú lé myàng jáng, Yesuq é hkyî wang má hkyihput htuq

mù, “Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê.” ga taí ri. ⁹Haí mù luí gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri. ¹⁰Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, “Hkâgyuq, ahkuí mai nàng gi, byù lé châng kông sù dut râ nghut lhê.” ga luí, Simun lé taí ri. ¹¹Yhangmoq gi, wuiyàm má jé jáng, lhai pé eq yhangmoq é zè banshoq lé tô pyàm to luí, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byî É Hkyô

Mht 8:1-4; Mrk 1:40-45

¹²Radàm lé, Yesuq gi, wà rawà má nyi tô lé, ragùndú é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, “Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê.” ga dúng wut ri.

¹³Yesuq gi, loq lhâm kat mù, haú yuq lé é záng luí, “Ngò dóng lhê, sân-yúng aq hkoi.” ga taí ri; haú hkún jáng, haú yuq é manggâm gi, ge byuq bê nghut ri.

¹⁴Yesuq gi, “Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq.” ga, yhang lé taí hkúm kat ri.

¹⁵Nghut kôlhang, Yesuq é hkyô gi, je riyhang taí pyo hù jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô.

¹⁶Yesuq kúm gi, Yhang baú tsik za yoso shut htoq ê mù, kyû é dung dung kut ri.

**Gùngjum Shî Sû Lé, Yesuq
Lhoq Gê Byî É Hkyô**

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsíng Garaí é wum-o a-tsam le nõhpyo lhoq gê rã matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shî sú rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lúm myô chyín chyap to mù, haú nõ sù lé hká dông le a wó shuí wàng kôluí, haú yhumhkûng htoq shut waq doq lô mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjínng myit lé byu myàng jáng, “Byù nàng ê! Náng é yubak mara lé hkyut pyám byi bê.” ga taí ri.

²¹ Haú hkûn, Hparishe pé eq tarâ sará pé gi, “Shî su ga luí, Garaí Gasang lé rhoí dang taí é sù gi, ó yuq wá nghut lhê lú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lú?” ga luí, myit són wuí nyi bum akô.

²² Yesuq gi, yhangmoq myit són wuí nyi é hkyô lé sé mù, “Nungmoq é i-myit hkaú má, haí mù shí pé lé myit són wuí nyi akô lú? ²³ Náng é yubak mara lé hkyut pyám byi bê. nghú taí rã eq, 'Toq luí, hkyô so aq.' nghú taí rã má, hká hkun je taí lui lhê lú? ²⁴ Nghut kôlhang, haú Byu Yhangzo¹ gi, mingkan htoq má, mara hkyut byi rã ahkáng wó

Sù nghut é lé, nungmoq lé sé nhâng nau lhê.” ga mù, haú gùngjum shî sù lé, “Ngò, nàng lé taí bá, toq aq, náng é taphkang yu chûng luí, yhûm taú lô aq hkoi.” ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm shut Garaí Gasang lé hkyá-on kungtôn uchyang lô byuq bê. ²⁶ Byù ban-shoq bang gi, gyai maú byuq kômù luí, Garaí Gasang lé hkyá-on kungton akô nghut ri. Yhangmoq gyai gyuq maú dik é èq le, “Hkú-nyí, nga-nhúng, mauhpo amú pé lé myàng bê.” ga taí nyi akô.

**Yesuq Gi, Lewiq É Yhûm Má Yubak
Dap Bang Eq Rahá Zo Shuq É Hkyô**

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, “Ngá htâng cháng aq.” ga taí ri. ²⁸ Lewiq gi, haú mâ é zè ban-shoq lé tô pyám to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhûm má Yesuq é matú zoshuq poí mó kut byî ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, “Nungmoq gi, haí mù luí kang guq bang eq yubak dap bang eq rahá zo shuq nyi akô lú?” ga, Yhâng é chángzô pé lé mara hún dang taí akô.

³¹ Yesuq gi, yhangmoq lé, “Wángzán bang chi sará a ra kó, nõhpyo hui bang za sheq ru rã lhê. ³² Ngò gi, dingmán bang lé wut yù rã matú jé lé é a nghut, yubak dap bang myit hîng rã matú sheq jé lé é ru nghut lhê.” ga tũ taí ri.

¹5:24 *Byu Yhangzo* gâ é gi, Yesuq Yhànggùng yhang lé le taí e nghut lhê, Mesaia lé le taí é nghut lhê.

**Zoshuq Gám Hkyô Eq Séng
Luí, Yesuq Taí É Hkyô**

Mht 9:14-17; Mrk 2:18-22

³³Dum, yhangmoq gi, “Yohan é chángzô pé gi, zoshuq gám mù kyûdung dung kut akô; Hparishe pê é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lúhú?” ga Yesuq lé taí akô.

³⁴Yesuq, yhangmoq lé tú taí é gi, “Bíng pé gi, lusik eq rahá nghut nyi to ashí hkûn, yhangmoq lé zo shuq wó gám nhâng râ lúhú? ³⁵Nghut kôlhang, lusik[§] lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.” gâ ri.

³⁶Dangtú dông mai le, Yesuq, yhangmoq lé taí é gi, “Mebu sik mâ é lêng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lêng cheq pyâm é dut mù, pán jap sik le mebu xau eq du lhum râ a nghut.

³⁷Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸Haú su a dut shoq gi, tsibiyiq wing asik lé, shokuq htûng asik má kat ra râ nghut lhê. ³⁹Tsibiyiq wing axau shuq nyí bê sù gi, asik lé a shuq naú nghut râ; hkâsu mù gâ le, 'Axau sheq je nghâm ri.' ga taí râ.” gâ ri.

**Bánno Buinyi Má, Yesuq É Chángzô
Pé Kyôshi Shap Zô É Hkyô**

Mht 12:1-8; Mrk 2:23-28

6 Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkûn, Yhâng é chángzô pé gi,

kyôshi ratsuí langshap yû mù, loq èq nè hpuq zô akô. ²Haú mù luí, Hparishe pé ra-am gi, “Bánno buinyi má a ge kut jung lé, nungmoq gi, haí mù luí haú su kut akô lúhú?” ga taí akô.

³Yesuq gi, yhangmoq lé, “Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lúhú? ⁴Dawiq gi, Garai Gasâng é yhûm** hkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lúhú?” ga tú taí ri. ⁵Hau htâng, Yhang gi, “Haú Byu Yhangzo gi, haú Bánno buinyi é Yhum-sîng nghut lhê.” ga yhangmoq lé taí ri.

**Loq Jum Shí Sù Lé Yesuq
Lhoq Gê Byí É Hkyô**

Mht 12:9-14; Mrk 3:1-6

⁶Gotú Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷Haú hkûn, tarâ sará pé eq Hparishe pé gi, Bánno buinyi má nôhpyo lhoq gê byi râ lúhú ga luí, Yhang lé mara wó hún shoq ga gyám wú nyi akô. ⁸Yesuq kúm gi, yhangmoq é i-myit lé sé sù nghut luí, loq jum shí sù lé, “Toq mù, banshoq bâng é hí má, yap shit aq.” ga taí kat ri. Haú yuq le, toq mù yap tô ri.

⁹Haú hkûn, Yesuq gi, “Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyí râ eq lhoq hten râ pé má hká lhum kut le sheq tarâ wang lhê lúhú?” ga luí, yhangmoq lé taí ri.

¹⁰Hau htâng má, yhangmoq banshoq lé lhing wú mù, haú loq jum shí sù lé “Náng é loq nyhang kat aq.” ga taí

[§]5:35 *Lusik* gâ é gi, Yesuq lé taí nau é nghut lhê.

**6:4 *Garai Gasâng é yhûm* nghu é gi, Yerusalem wà mó má joq é saksé zúm lé gâ é nghut lhê.

kat é hkûn lé, yhang le loq nyhang kat luí, yhang é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naü kômù luí, “Yesuq lé hkâsu wá kut pyám râ l hú?” ga luí, rayuq eq rayuq taí lhúm nyi akô.

**Raxe Í Yuq Lé Lagyo Ga
Myhîng Yu É Hkyô**

Mht 10:1-4; Mrk 3:13-19

¹² Haü yoq ra-nyí má, Yesuq gi, kyûdung râ ga bùm shut htoq e ló luí, ramyin mau Garai Gasang lé kyûdûng nyi ri. ¹³ Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyo pé ga myhîng to byí ri. ¹⁴ Haü bang gi, Yesuq èq Petruq ga myìng myhîng byí é Simun eq, yhanggu Andre, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe é yhangzo Yakuq eq Zelutuq^{††} dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

**Hkungso Wó É Hkyô Eq
Dingnyé Wó É Hkyô**

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aü ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô. ¹⁹ Yhâng é gùng mai htoq é

wum-ô èq byù banshoq lé lhoq gê byí nyi é yanmai shiwa byu pé le Yhang lé wó záng shoq ga, ho nyi akô.

²⁰ Haü hkûn, Yesuq gi, Yhâng é chángzô pé lé wú kat luí taí é gi, “Myùng bang nungmoq gi, hkungsô wó nyi ri, hkâsu mù gà le, Garai Gasang é mingdán^{‡‡} gi, nungmoq é mingdán nghut nyi ri.

²¹ Ahkuí, zòmut wuìshit huí nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó râ nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gà le, nungmoq myang wuì kó râ nghut lhê.

²² Haü Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

²³ Haü hkûn lé, gabú byam chyü nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gà le, yhangmoq é ìchyí îwa pé le myiqhtoí pé^{¶¶} lé haü su kut wú bekô.”

²⁴ Nghut kôlhang, sùt wó bang nungmoq gi, dingnyé wó râ, hkâsu mù gà le, nungmoq gi, yhumsing gùng má nhik shí nhik dik é hkyô lé huí yù bekô.

²⁵ Ahkuí, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gà le, nungmoq zòmut wuìshit é hui kó râ nghut lhê.

^{††}6:15 Zelutuq gà é lichyúm gi, yhumsing zui saí é hkyô má gyai yhang myit lòm shirong é sù lé ga lhê. Haü u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê.

^{‡‡}6:20 Garai Gasang é mingdán gà é gi, Garai Gasang up é lé gà lhê.

^{¶¶}6:23 Myiqhtoí pé le zing-ri huí é yanmai, yhangmoq chyunghuq wó nyi akô. Haü eq rajung za, jamjau huí é bang nga-nhúng le chyunghuq wó râ nghut lhê.

Ahkuí, wui nyi é bang nungmoq gi, dingnyé wó rã, hkãsu mù gã le, iyon yôn é eq ngaubyi ngau-nhap htoq é hui kó rã nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó rã,

hkãsu mù gã le, yhangmoq é îchyí îwã pé le, myiqhtoi pyoq pé^{§§} lé, haù su ga taí wú bekô.

Gye Pé Lé Chyitdap Rã Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; ²⁸ nungmoq lé nhîng é bang lé, shimân byi keq; nungmoq lé rhoi é bang lé kyúdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byí pyám aq; náng zè yu pyám byí é su chyáng mai le, hkâdúng yù lo. ³¹ Nungmoq ô nau é đông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyú bò kó rã lhú? Yubak dap bang le, yhumsîng lé chyitdap é bang lé gi, chyitdap nyi akô. ³³ Nungmoq lé ge é đông kut nyi é bang lé za, ge é đông kut nyí kô le gi, nungmoq é matú hai akyú bò kó rã lhú? Yubak dap bang le haù su kut nyi akô. ³⁴ Supé lé zè chyí byí le, dum wó tau byi rã su dut é bang lé za, chyí byí le gi, nungmoq é matú hai akyú bò kó rã lhú? Yubak dap bang lháng chyí byí é myhó dum wó yú shoq, yubak dap é bang lé chyí byí akô. ³⁵ Nghut kôlhang,

nungmoq gi, nungmoq é gye pé lé chyitdap mù, ge é đông kut byí nyi keq. Dum wó taù yù rã lé myoq a byu é za, chyí ngho byi keq; haù su kut jáng, nungmoq wó é chyunghuq ko rã eq, Myhang htáng htúm Su é yhangzô pé dut rã nghut lhê; hkãsu mù gã le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Îwa Garai Gasang shogyo nhikmyin sê é su, nungmoq le shogyo nhikmyîn nyi keq.

A Jéyáng Rã Hkyô

Mht 7:1-5

³⁷ A jéyáng é za nyi keq; haù jáng, nungmoq le jéyáng é a hui kó rã nghut lhê. A doqdân é za nyi keq; haù jáng, nungmoq le doqdân é a hui kó rã nghut lhê. Mara hkyut byi keq; haù jáng, nungmoq le mara hkyut byí é hui kó rã nghut lhê. ³⁸ Byi keq, haù jáng, nungmoq le dum byí é hui kó rã nghut lhê. Mán é búng mai byíng mui shún shoq nhún chyíng, dún chyíng kat mù, nungmoq é tanghkoí hkaù má lik kat byí é hui kó rã. Hkãsu mù gã le, nungmoq lik byí é bung eq, nungmoq lé dum lik byi rã nghut lhê.” gã ri.

³⁹ Hau htoq agó, Yhang dangtú ralhum đông yhangmoq lé dum taí é gi, “Myoqjit sù gi, myoqjit sù lé hkyô wó tân shit lhê lhú? Yhangnhik í yuq é donghkong má byit gyó kó rã nghut lhê, a nghut kó lhú? ⁴⁰ Jongzo gi, sará htoq gyaú rã a nghut; nghut kôlhang, gúm shoq mhoy yú bê sù ó nghut kôlhang, yhumsîng é sará su dut rã nghut lhê.

⁴¹ Yhumsîng myoq hkaù má lúng tô é siktúm* lé lháng a myit wú é nhîng, haí mù luí, nunggu nungmâng é myoqwàng† lé myang lhê lhú? ⁴² Yhumsîng é myoq má lúng tô é siktúm lé lháng a myàng sù

§§6:26 Myiqhtoi pyoq pé gi, Garai Gasang jéyáng é hui rã.

*6:41 Siktúm nghu e gi, yubak mara kô é lé taí lhê.

†6:41 Myoqwàng nghu e gi, yubak mara atiq azo lé taí é nghut lhê.

nhing, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó tái rã lúhú? Gegùn labyoq kut sũ ê, náng é myoq má lúng tô é siktúm lé hí choq pyám aq. Haú jáng sheq, nunggu nungmang é myoq má wang tô é myoqwàng lé choq pyám byi rã matú, nàng san za myàng rã nghut lhê.

Agàm Eq Ashi

Mht 7:17-20; 12:34-35

⁴³ A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. ⁴⁴ Haú mù luí, shigâm hkangmó lé, zuí é ashi lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. ⁴⁵ Ge é sũ gi, yhumsing é i-miyit unghkaú mã é sutdò mai ge é zè pé lé lhoq htoq shit lhê. Agè ashop é sũ gi, yhumsing é i-miyit unghkaú mã é agè ashop é sutdò mai, agè ashop é zè pé lé lhoq htoq shit lhê. Haí mù gà le, yhâng é i-miyit unghkaú mã byíng mui tô é lé za, yhâng é nhut mai tái htoq lo é nghut lhê.

Lughtân Htoq Má Yhûm Saí Sũ Eq Myi Chîn Dum Má Yhûm Saí Su É Hkyô

Mht 7:24-27

⁴⁶ Ngò tái é eq rajung za lháng a wó châng kut kô é nhing, haí mù luí, nungmoq Ngo lé 'Yhumsing ê, Yhumsing ê.' nghu nyi akô lúhú? ⁴⁷ Ngá chyáng lé mù, ngá dang gyô yù luí, châng kut é sũ ó nghut kôle, hkasû é sũ eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtân htoq mã apûn awang hi é sũ eq wuí lhê. Wuí jê lò luí wuibaù pê èq yhûm haú lé lo gùn kôlhâng, ging ting ting saí to bê nghut luí, haú lé a wó gun nhún. ⁴⁹ Ngá dang gyô yù mù, a cháng sũ gi, apûn awang a saí é za myi chîn dum mã wahpang yhûm saí sũ eq

wuí nyi ri. Wuibaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq rã nghut lhê." gâ ri.

Romaq Gyezau Rayuq É Lumj́ing Myit

Mht 8:5-13; Yhn 4:43-54

7 Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haú hkûn, Romaq gyezau rayuq é chyitdap dui-nhâng zoshâng gi, shí-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi rã matú, Yesuq lé ê ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyáng jé ê kô é hkûn, "Yhang gi, nàng shí hkyô kut byi rã matú gingdán é sũ, yhang nghut nyi ri; ⁵ hkâsu mù gà le, yhang gi, nga-nhûng amyû lé chyitdap é eq, ngamoq matú tarajong le kut byi sũ nghut ri." ga luí, Yhang lé zuq zuq dúng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé tái nhang kat é gi, "Yhumsing Yesuq ê, náng gûng lé hkálhoq hkyik lo. Nàng, ngá é laishîn-htâng má, lé nang rã lháng ngò mã a gingdán. ⁷ Haú mù, ngò, náng chyáng jé lé rã matú gingdán é sũ a nghut; Nàng, dang rahkun za tái kat laq, haú hkûn, ngá é dui-nhâng zoshâng ge ló rã nghut lhê. ⁸ Hkâsu mù gà le, ngò le ahkáng ayá wó é zau rayuq é a-ô mã é zau nghut lhê; ngá é a-ô mã le gyezô pé nyi lhê, rayuq lé 'É aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shí kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé tái kôlé, Israelaq amyû mã lháng, shí í lumj́ing é sũ lé, Ngò

a myang wú.” ga taí ri. ¹⁰Nhang kat é bang yhûm má dum taú jé jáng, no nyi é dui-nhâng zoshâng gi, ge to láng é lé lo myang akô.

Shí Sû Lé Dum Lhoq Tui É Hkyô

¹¹Hau htâng hkâ-myhâng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. ¹²Haú wà wàng hkum má jé lo é hkûn lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byù myo myo le, chuimó myhí haú eq rahá châng lé lo akô. ¹³Yhumsîng gi, haú chuimó myhí lé myàng jáng, yhang lé wú shogyo luí, “Hkâ-ngaú.” ga taí ri.

¹⁴Yesuq gi, gung shut huí ê mù, loq èq é záng kat ri. Haú hkûn, waq tô é bang le jâng yap to byí akô. Yhang gi, “Zorâm ê, ngò, nang lé taí lhê, toq aq.” ga taí ri. ¹⁵Haú hkûn, shí bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byí ri.

¹⁶Byù lhunglhâng bang gyuq maú bùm kôluí, Garai Gasang lé hkya-ôn é dang gi, “Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kúm wú nyi ri.” ga taí nyi akô.

¹⁷Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

Yesuq Eq Wui-myhup Sarâ Yohan É Hkyô

Mht 11:1-19

¹⁸Haú hkûn, wui-myhup sarâ Yohan é chángzô pé gi, haú hkyô banshoq yhang lé lo taí kyô akô. ¹⁹Haú mù luí, Yohan gi, yhâng é chángzo í yuq lé ji yù mù, haú Yhumsîng chyáng nhang kat luí, “Nàng gi, haú jé lé lô râ Sû nghut lhê lú? Haú

a nghut jáng, ngamoq, góyuq lé láng ra shirâ lú?” ga, myí nhang kat ri.

²⁰Haú nhik gi, Yesuq chyáng jé jáng, “Nàng gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu láng nyí ra shirâ lú?” ga luí, Wui-myhup Sarâ Yohan gi, ngá-nhik lé náng chyáng myí nhang kat ri.” ga taí akô.

²¹Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²²Haú hkûn, Yesuq gi, yhangnhik lé, “Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ²³Ngá é yan-mai, Ngo lé lum shut é hkyô a bò sù gi, hkungsô wó nyi ri.” ga taí ri.

²⁴Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, “Nungmoq gi, haí lé hpuq wú râ matú, haú yoso shut e akô lú? Lai èq hik nhûn é jamgàm lé wú râ matú nghut akô lú? ²⁵Haú a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶Haú nghut le gi, haí lé wú râ matú é kô é lú? Myiqhtoi rayuq lé lú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ²⁷Haú yuq é hkyô lé, Chyúm-dang má kê tô é gi,

'Wú aq, Náng é hkyô lajang láng râ matú,
Ngá é lagyo lé, Náng é hí má Ngò
nhang kat râ nghut lhê.^d

gâ ri. ²⁸ Ngò, nungmoq lé taí kôlé, myiwe wuì mai hku kat é bang má, Yohan htoq je kô é rayuq lháng a nyì, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyù lhunglhâng bang eq kang guq bang gi, dang haú pé lé wó gyo kôjáng, Yohan byì é baptisma lé hkâm yù kô é nghut mù luí, Garai Gasâng é dingmán é hkyô lé sé gyô yu akò. ³⁰ Hparishe pé eq tarâ sará pé kúm gi, Yohan byì é bapisma a hkam yù kômù luí, Garai Gasang hen lajang é hkyô lé yhumsing gung é matú he-ngik pyâm akò.

³¹ Yesuq dum taí é gi, "Haú mù luí, byù myù shí lé, Ngò, hai èq taí kê wú râ lhuú? Yhangmoq hai eq wuí akò lhuú?" ³² Yhangmoq gi,

'Nungmoq é matú, ngamoq sampyí mut byi kôlháng, nungmoq gi, a gó kó, ngamoq ngaù hkyangsâng kôlháng, nungmoq gi, a ngaù kó.'

ga luí, gai pé má zùng uchyang rayuq eq rayuq wut taí lhùm nyi é zoshâng wuì eq wuí akò. ³³ Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akò. ³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bang é buinùm hpó nghut ri.' ga dum taí akò. ³⁵ Nghut kôlháng, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkâm byì nyi akò."^g gâ ri.

Yubak Dap É Myiwe Rayuq, Yesuq Lé Xù But Byì É Hkyô

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri. ³⁷ Haú hkùn, wú keq, haú wâ mâ é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xù bo é luq hpyù bông yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyì èq záng lhoq teq byi jáng, úxam èq but sut pyám byì ri. Dum nghut jáng, nhut èq puq luí mura lé but byì ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htung é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luí, yhâng é unghkaù má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkùn, Yesuq gi, "Ngùn chyì zo sù rayuq chyáng, chyín dap é byù í yuq nyi ri. Rayuq gi, denari^f ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluí, chyín yhumsing gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhuú?" ga myì ri.

⁴³ Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e đông jô ri." ga taí ri.

⁴⁴ Haú hkùn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhuú? Ngò, nàng é yhùm

^g7:35 Nghut kôlháng, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkâm nyi akò.

^f7:41 Denari rachap gi, ra-nyí lhê é byù rayuq é zuihpau eq wuí ri.

má wang le, hkyî chi râ uchyam, nàng a byi, yhang kúm gi, ngaubyî èq ngá hkyî lé tik byi luî, yhâng é xam èq sut pyám byi bê. ⁴⁵Nàng gi, ngo lé nhut èq a puq nghut ri; yhang kúm gi, ngò yhúmhaú má wang é mai ngá hkyî má a no loshoq puq nyi râ. ⁴⁶Nàng gi, ngá ulhum má xú a but byi wú, yhang kúm gi, ngá é hkyî má nàm ngón é mura but byi bê nghut ri. ⁴⁷Haú su mù, ngò, nàng lé taí lé, haú myiwe gi, je chyitdap luî, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sù gi, shau za chyitdap sù nghut ri.” ga taí ri.

⁴⁸Yesuq gi, myiwe haú lé le, “Ngò, náng é yubak mara hkyut pyám byi bê.” ga taí ri.

⁴⁹Rahá zung tô é bang gi, “Yubak mara lháng wó hkyut pyám byi sù, shí yuq gi, ó wá nghut lhê lú?” ga luî, myit nyi bum akô.

⁵⁰Yesuq gi, “Náng é lumjíng myit èq nang lé hkyi yù bê, ngón za ló aq hkoi.” ga luî, myiwe haú lé taí kat ri.

Yesuq Htâng Châng É Myiwe Wui

8 Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ²Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mã é Mariq le, ³Herut é ikun zum sù Kuza é yhumsíng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsíng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴Wà hkang wà mó mã é bang gi, Yesuq chyáng zup zing lé lo bùm kômù shiwa byù moq mó zup ming tô é hkûn, Yesuq dangtú dông taí kyô é gi, ⁵“Kyô hkyô sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nàng p̄yeq pyám lhê, maulat nghoq p̄e èq hte zo pyám lhê dut ri. ⁶Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷Ra-am gi, zugyóm hkaú má gyó ang luî, zubyap eq rahá yuq htoq lô mù, wup pyám é hui bê nghut ri. ⁸Nghut kôlháng, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri.” ga taí ri.

Yhang haú su ga taí nyi é hkûn, “Gyô yù râ nohkyap dap sù gi, gyô yù sháng gaq!” ga le, htê mó èq taí kat ri.

⁹Haú hkûn, Yhâng é chángzò pé gi, dangtú shí hai lichyúm nghut lhê lú ga, Yhang lé myî akô. ¹⁰Yhang gi, “Garai Gasâng é mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byi to bê. Nghut kôlháng, góbàng matú gi,

‘Wú to kôlháng, a myàng kó sháng, gyô nyi kôlháng, a sê gyo kó sháng.’^e nghú, ngò dangtú dông taí lhê.

¹¹Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê. ¹²Hkyô má gyó âng é kyôshi gi, haí eq wuí lhê lú gâ le, haú mungdang lé byu pé wó gyô é htâng má, lumjíng é má le, hkyi yu é má le, a jé kó sháng gaq ga luî, yhangmoq é i-myt hkaú mai nat Tsadán èq mungdang haú lé, lé yu pyám é hui bang eq wuí lhê. ¹³Luqgok yò pé má gyó âng é kyôshi gi, haí eq wuí lhê lú

gâ le, haû mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjúng luí, gunglaú huí é nyí má, dum htak ló byuq é bang eq wuí lhê. ¹⁴Zugyóm má gyó âng é kyôshi gi, haî eq wuí lhê lú gâ le, haû mungdang lé gyô yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wuí lhê. ¹⁵Hpún bo é myigùn má gyó é kyôshi kúm gi, haî eq wuí lhê lú gâ le, haû mungdang lé lhumzui luí ge é i-myt eq ban gyô yù mù, ging títg shoq zuí zítg luí, wó jân é i-myt eq ashi zuí é bang eq wuí lhê.

Myibung Htún É Hkyô

Mrk 4:21-25

¹⁶Myibung lé tap mù, aû eq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷Hkâsu mù gâ le, a htoqzê loshoq haq tô é zè haî le a joq, a sé a byông htoq loshoq wó zaú tô é zè le haî a joq nghut ri. ¹⁸Haû mù luí, nungmoq hkâsu wó gyô yu é hkyô lé sidiq nyi keq, haî mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lháng, yu pyám byi shirâ nghut lhê.” ga taî ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kó nghut ri. ²⁰Haû hkûn, Yhang lé, “Náng nu eq nunggu pé gi, nang lé hui nâu luí, shinggan má lánq yap bum akô.” ga taî kyo akô.

²¹Yesuq gi, yhangmoq lé, “Garaí Gasâng é mungdang lé gyô yù luí, châng é bang gi, Ngá nu eq Ngá gû pé nghut akô.” ga luí, yhangmoq lé tú taî kat ri.

Laidun Mó Lé Yesuq Lhoq Zím É Hkyô

Mht 8:23-27; Mrk 4:35-41

²²Ra-nyí lé, Yesuq gi, Yhâng é chángzô pé lé, “Nga-nhúng nhông he hpoq shut dap e ló sháng.” ga taî luí, lhaî má wàng mù gû dap e ló akô. ²³Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhaî má wui byíng lò mù, yhangmoq myup shí râ su dut lò nyi bekô nghut ri.

²⁴Haû mù, yhangmoq gi, Yesuq chyáng huí ê luí, Yhang lé nhaû pun mù, “Yhumsîng ê, Yhumsîng ê, nga-nhúng myup ló nyi ri.” ga taî akô.

Haú hkûn, Yhang toq luí, laidun eq wuilhêng pé lé tân kat jáng, haú pé gi, zim za dut ló byuq bê. ²⁵Haû mù, Yesuq gi, “Nungmoq é lumjúng myit gi, hkâmá nghut akô lú?” ga luí, yhangmoq lé myî ri.

Yhangmoq kúm gi, gyuq maú byuq bùm kôluí, “Shí yuq gi, hkasú é byù nghut lhê lhà? Yhang hkunmó hkyó jáng, laî eq wuilhêng pé lháng gyo byi rinhung!” ga luí, rayuq eq rayuq myî lhûm bum akô nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶Hau htâng, yhangmoq gi, Galile mau tú tap mâ é Gerase byu pé é mau má jé dap e ló bekô. ²⁷Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri. ²⁸Haú yuq gi, Yesuq lé myàng jáng, wut garu luí, yhâng é hkyî wang má paî gop to mù, “Myhang htâng é Garaí Yhangzo Yesuq ê, Nàng gi, ngò

eq hái séng lê lú? Ngo lé a zing-ri rá matú, ngò nang lé dúng nyi lê.” ga luí, htê mó èq taí garú nyi ri. ²⁹Hkâsu mù gà le, Yesuq gi, agè ashop é nat lé háu yuq gùng mai htoq ló rá matú, tân pyâm é yanmai nghut ri. Byù háu yuq lé nat gâng èq adàm dàam wang júng hkangmó, loq eq hkyí má toqjâng tuí èq tuí shung, kyum xâng tô é eq, zúng tô é nghut kôlháng, nang hpyit pyám pyám kut é htoq ago, lát gâng èq yhang lé yoso hkaú shut lánghap yù yù kut nyi ri.

³⁰Yesuq gi, yhang lé, “Náng myíng hái gà lê?” ga myí kat é hkún, yhang gi, “Legio^s gà lê.” ga tú taí ri. Háu mù gà le, yhâng chyáng nat gang myo myo wang lúng tô é yanmai nghut ri. ³¹Nat jùm gi, yhangmoq lé nik dik htâm é Lasangdong shut a kôn kat rá matú, Yesuq lé chòm dúng nyi bum akô.

³²Háu u lé, waq rajùm mó gi, bùm yàm má dù but zô nyi bum akô nghut ri. Háu mù, yhangmoq gi, waq pè chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³Háu mù luí, nat gang jùm gi, byù háu yuq chyáng mai htoq ló kôluí, waq pè chyáng wàng byuq bekô nghut ri. Háu hkún, waq háu jùm gi, gampyoq mai nhông hkaú shut rut đin yán wang ló kôluí, myup shi byuq bekô nghut ri.

³⁴Waq zúng bang gi, háu su dut é lé myàng jáng, hfang đin ló kômù, myuq hkaú má é bang eq awui ayàm má é bang lé ló taí kyô akô nghut ri. ³⁵Háu mù, wó gyô é bang gi, háu hkyô lé wú rá matú htoq lé lo akô. Yhangmoq gi, Yesuq chyáng jé lé kô é hkún, nat gang htoq byuq hui sũ, Yesuq é hkyí wang má mebu wut to luí, byù gè rayuq su zúng to lánq é lé myàng kômù, gyuq dan bùm

bekô nghut ri. ³⁶Nat dap sũ lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri. ³⁷Háu hkún, Gerase byu pè é mau má é lhungl-hâng bang gi, gyuq dan dik kôluí, Yesuq lé yhangmoq é mau mai htoq ló byuq rá matú, chòm dúng tóngbán akô. Háu mù luí, Yesuq gi, taú ló byuq rá matú lhaí má wàng bê nghut ri.

³⁸Nat htoq byuq huí é sũ gi, Yesuq htâng cháng rá matú, Yesuq lé dúng tóngbán ri. ³⁹Nghut kôlháng, Yesuq gi, “Nàng, yhùm shut sheq ló mù, Garai Gasang, nang lé hkâ-í kut byi bê hkyô lé, ló taí kyo aq.” ga luí, yhang lé ló nhâng bê nghut ri. Háu hkún, yhang htoq ló mù, Yesuq yhang lé hkâ-í kut byi bê hkyô lé, háu wà rawà bang lé ló taí kyô ri.

**Ya-iruoq É Yhangzo Byizô É
Hkyô Eq, Yesuq É Bu Lé Lé
Záng É Myiwe Rayuq É Hkyô**

Mht 9:18-26; Mrk 5:21-43

⁴⁰Ahkuí, Galile byu pé gi, Yesuq dum taú lò rá lé lánq nyí kô é nghut mù, Yhang dum taú gũ dap lo é hkún gabú myit eq lhom te yu akô. ⁴¹Háu hkún, Ya-iruoq gà é tarajong má up sũ rayuq gi, jé lé lò mù, Yesuq é hkyí wang má hkyih-put htuq luí, yhâng yhùm má lé rá matú ji nyi ri. ⁴²Hkâsu mù gà le, raxe í zân bò bê é, yhangzo byizo te gi, shi ló nyi é yanmai nghut ri.

Háu mù, Yesuq cháng e ló le, shiwa byu pé gi, Yhang lé záng htùng lo bum akô. ⁴³Háu u lé, raxe í zân sui yuí luí ngunzè lhungl-háng ban pyám shoq chi sará pè chyáng yâ wú kôlháng, hká yuq le a wó yâ gè byi é** myiwe myhí rayuq le háu hkaú má bo tô ri. ⁴⁴Myiwe háu gi, Yesuq é nunghtáng má huí lé mù, Yhâng

^s8:30 *Legio* gà é lichyúm gi, gyezo 4000 eq 6000 gyoro bo é gyedap lé taí ri.

**8:43 *Ngunzè lhungl-háng ban pyám shoq chi sará pè chyáng yâ wú kôlháng, hká yuq le a wó yâ gè byi gà é, Chyúmdang ra-am má gi, bo lhê; ra-am má gi, a bò.*

é bushi htâng má ê záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, “Ngo lé, ó yuq záng bê lú?” ga luí myi jáng, lhungl-hâng bang gi, a sé ga he nyi bùm kô é hkûn lé, Petruq gi, “Yhumsíng ê, shiwa byu pé gi, náng é lhínhkyuq mai náng chyáng chyín chyap wang lo bùm kô é yanmai, nang lé záng bekô râ nghut lhê?” ga taí ri.

⁴⁶ Yesuq gi, “Byù rayuq ngo lé lé záng mù, ngá chyáng má é hpungwup a-tsam htoq ló é lé, ngò châng sé kat ri.” ga taí ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyí wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù ban-shoq bâng é hí má Yesuq lé taí kyô nyi ri. ⁴⁸ Yesuq gi, “Ngá zo ê, náng é lumjíng myit gi, nang lé lhoq gê byi bê nghut ri, ngón za ló aq hko!” ga luí, myiwe haú lé taí kat ri.

⁴⁹ Yesuq gi, dang ru taí nyi ashí hkûn, tarajong má up sù Ya-iruiq é yhúm mai byù rayuq jé lé lô luí, “Nung zo gi, shi byuq bê, haú sará lé hkálhoq hkyik nyí lo.” ga luí, Ya-iruiq lé taí kyô ri.

⁵⁰ Yesuq gi, dang haú lé wó gyo jáng, “Hkâgyuq, za lumjíng aq, haú jáng, yhang ge byuq râ nghut lhê.” ga luí, Ya-iruiq lé taí ri.

⁵¹ Yesuq gi, Ya-iruiq é yhúm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luí, yhúm haú má, ó lé le a wàng nhâng kut ri. ⁵² Haú u lé, lhunglhâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, “Hkâ-ngaú kó, yhang shi byuq é a nghut, yhup myhí tô é sheq ru nghut lhê.” ga luí, yhangmoq lé taí ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé

wuizui kut pyám byí akô. ⁵⁴ Yhang kúm gi, myiwe zo hau é loq má zuí to mù, “Zoshâng ê, toq aq.” ga taí kat ri. ⁵⁵ Haú mù luí, yhâng woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri. ⁵⁶ Haú myiwe zô é yhângnu eq yhângwa nhik gi, gyai maú byuq akô. Nghut kôlhâng, Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

9 Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byí ri. ² Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat ri. ³ Yesuq gi, yhangmoq lé, “Hkyowui é matú, dumbáng, etap, zoshuq, ngùn eq, bu htaí lháng hkâwûn hkâchúng kó. ⁴ Nungmoq hká yhúm má wàng kôlhâng, haú wâ mai dum htoq ló é buinyí jé shoq, haú yhúm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyám to keq.” ga taí kat ri. ⁶ Haú mù, yhangmoq gi, htoq é lô luí, wâ hkang wâ mó má haú gabú danglù hko kyo uchyang, hká jé hkámá nòhpyo lhoq gê byí wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yù luí myit wú nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haú mai,

ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹Herut gi, “Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wá nghut lhê lú?” ga luí, Yesuq lé myàng shoq ga ho nyi ri.

**Byù Ngo Hkyîng Lé Yesuq
Zoshuq Byi Tsô É Hkyô**

Mht 14:13-21; Mrk 6:30-44; Yhn 6:1-14

¹⁰Lagyô pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Bet-saida gâ é wà mó shut tsik za e ló byuq ri. ¹¹Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naù bang lé, lhoq gê byí ri.

¹²Buigyùm zó má, lagyo raxe í yuq gi, Yhâng chyáng huí ê mù, “Haú shiwa byu pé lé, awui ayàm má é yhûm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri.” ga luí, Yhang lé taí akô.

¹³Haú hkûn, Yesuq gi, “Nungmoq, yhangmoq lé rajung jung byi tso keq.” ga tú taí ri.

Yhangmoq gi, “Shí myhò bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri.” ga taí akô. (Hkâsu mù gâ le, yuqgè wui baú lhang ngo hkyîng kô nghut ri.)

¹⁴Nghut kôlhang, Yesuq gi, “Shí bang lé rahpúng má ngo xê xê kô kut luí, zùng nhang to keq.” ga luí, Yhâng e chángzô pé lé taí ri. ¹⁵Yhangmoq lé Yesuq taí é eq rajung za, banshoq bang lé zùng nhang to bekô. ¹⁶Haú hkûn, Yesuq gi,

haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri. ¹⁷Haú hkûn, yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

**Yesuq Gi, Hkrisduq Nghut
Lhê Ga Petruq Taí É Hkyô**

Mht 16:13-28; Mrk 8:27—9:1

¹⁸Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, “Shiwa byu pé gi, ngo lé ó yuq nghut lhê ga, taí akô lú?” ga myí ri.

¹⁹“Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô.” ga luí, yhangmoq tú taí akô.

²⁰Dum, Yhang gi, yhangmoq lé, “Nghut kôlhang, nungmoq gi, ngo lé ó yuq nghut lhê nghu akô lú?” ga myí ri.

Haú hkûn, Petruq gi, “Nàng gi, Garai Gasang nhâng byí é Hkrisduq nghut ri.” ga tú taí ri.

²¹Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri. ²²Haú mù, Yhang gi, “Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghù râ buinyì má, lhoq toq yu é hui râ nghut lhê.” ga taí ri.

²³Hau htâng, banshoq bang lé Yhang dum xoq taí é gi, “Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, nyí wuí

yhumsing é tapzîng lé waq chûng^{††} luí, cháng ra râ nghut lhê. ²⁴Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyû bò râ lúh? ²⁶Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shingkan eq, Yhâng Wâ é hpungwup shingkan, haú chyoyúng maumang lagyô pê é hpungwup shingkan eq jé lé é hkûn, hoq pyám râ nghut lhê. ²⁷Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó râ a nghut.” gâ ri.

**Mosheq Eq Eliyaq Yesuq
Lé Hui Nyo É Hkyô**

Mht 17:1-8; Mrk 9:2-8

²⁸Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹Kyû dúng nyí le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰Haú hkûn, wú keq, Mosheq eq Eliyaq gi, hpungwup shingkan eq htoq lé lô luí, Yesuq eq dâng nyo lhûm nyi akô. ³¹Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhûm nyi akô. ³²Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkan lé le, Yhang eq rahá yap to su nhik lé le, myang kat akô. ³³Haú nhik Yesuq chyáng mai gâng ló nyi é hkûn,

Petruq gi, Yesuq lé, “Yhumsing ê, shí jowò má nga-nhúng nyi le ge ri, haú mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq.” ga taí kat kôlhang, yhang haí taí nyi é lé, yhang a sé.

³⁴Petruq dang taí nyi ashî hkûn lé, mhut jé mù, yhangmoq lé htup zing lo nyi ri. Mhut haú htup lo nyi é yanmai, yhangmoq gi, gyuq byuq akô. ³⁵Haú mhut hkaú mai htoq lo é htê gi, “Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq.” gâ ri. ³⁶Dang htê haú zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taí kyô é zim za nyi byuq akô.

**Nat Gang Dap É Yuqgè Zo
Rayuq Lé Lhoq Gê Byí É Hkyô**

Mht 17:14-18; Mrk 9:14-27

³⁷Hau htâng nyí, yhangmoq bùm haú mai gyó ló kô le, byù moq mó gi, Yesuq lé lhom te yu akô. ³⁸Haú hkûn, byù hpúng haú mâ é byù rayuq wut garû htoq ló é gi, ³⁹“Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rí yù yù kut nyi ri. ⁴⁰Nat haú lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haú mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê.” gâ ri.

⁴¹Haú mù luí, Yesuq gi, “Lumjîng myit a bo é eq agè ashop é amyú pé ê, Ngò gi, hkâ-myhâng jé shoq nungmoq eq rahá nyi mù, wó jân nyi râ lúh? Nung zo lé, shí shut shuí lé lô aq.” ga tû taí ri.

^{††}9:23 *Tapzîng lé waq chûng* nghu é gi, Yesuq é yanmai jamjau huí é lé taí é nghut lhê.

⁴²Zoshâng haû, lé lo nyi le lhang, nat gang gi, yhang lé lhoq lhêng to mù langtân nhang ashî. Yesuq kúm gi, haû agè ashop é nat lé tân kat luî, zoshâng haû lé lhoq gê byi mù, yhang wa lé dum ap byi ri. ⁴³Nyi mi-nyî gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haû lé maú nyi bùm kô le, Yesuq gi, ⁴⁴“Haû Byu Yhangzo gi, byu pè é loq má ap pyâm é hui zo râ nghut lhê. Dang shî hkun lé nungmoq é no má rago gyô wun to keq.” ga luî, chángzô pé lé taí ri. ⁴⁵Yhangmoq kúm gi, dang haû lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luî, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶Hau htâng, lagyô pé gi, hká yuq sheq, kô dik sû nghut lhê lhú ga, rayuq eq rayuq taí myíng myô lhúm nyi akô. ⁴⁷Yesuq kúm gi, yhangmoq é unghkaû má myit nyi é hkyô lé sé byi luî, zoshâng rayuq lé shuí yù mù, Yhâng nam má shap to luî, ⁴⁸“Shî zoshâng lé Ngá é myíng mai hap sû ó yuq nghut kôle, Ngo lé hap yu é sû nghut bê; Ngo lé hap yù sû ó yuq nghut kôle, haû Ngo lé nhang kat é Sû lé hap yu é le nghut lhê. Haû mù luî, nungmoq banshoq má, je tiq sû gi, je ko sû nghut lhê.” ga luî, yhangmoq lé taí ri.

⁴⁹Haû hkún, Yohan gi, “Yhumsîng ê, Náng é myíng lánng luî, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lòm sû nghut é yanmai, yhang lé ngamoq hkúm pyâm é nghut lhê.” ga taí ri.

⁵⁰Yesuq kúm gi, “Yhang lé hkâhkúm kó, nungmoq é gyè hkyam shut a nyi sû gi, nungmoq é hkyam shut nyi sû nghut lhê.” ga luî, yhang lé taí ri.

Samariq Wà Bang Yesuq Lé A Lhom Hap Yu É Hkyô

⁵¹Ahkuî, Yesuq gi, Yhang lé mauhkung shut shuí toq yù râ buinyi chyâng lò bê nghut mù, Yerusalem wà mó shut ê râ lé myit hpyit to luî, Yhâng é hí má lagyo nhang kat ri. ⁵²Lagyo haû bang gi, Yhâng matú râ é hkyô lajang lánng râ ga, Samariq wà rawà má wang ló akô. ⁵³Nghut kôlhang, Yesuq gi, Yerusalem wà mó shut lai e ló é sû nghut é yanmai, haû wà bang gi, Yhang lé a lhom hap yù kó. ⁵⁴Haû hkún, lagyo Yakuq eq Yohan nhik gi, haû lé myàng jáng, “Yhumsîng ê, yhangmoq lé lhoq htên pyám râ matú, ngá-nhik mauhkung mai myi wut hkyó le, a gè lhú?” ga luî, Yesuq lé myí akô. ⁵⁵Yhang kúm gi, lhing wú luî yhangnhik lé, tân pyâm ri, ⁵⁶haû mù luî, yhangmoq gi, gô wà shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷Yhangmoq haû hkyô má e ló kô le, byù rayuq gi, “Nàng hká e le hká ngò cháng râ.” ga luî, Yesuq lé taí ri.

⁵⁸Yesuq gi, haû yuq lé, “Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haû Byu Yhangzo gi, ulhum to jang lhang a wó é nghut ri.” ga taí pyám ri.

⁵⁹Dum rayuq lé, “Ngá htâng cháng aq.” ga taí jáng, haû yuq gi, “Yhumsîng ê, ngá wa lé, ló yhúm pyám râ ahkáng hí byi shi laq.” ga taí ri.

⁶⁰Yesuq gi, yhang lé, “Shî bê bang^{‡‡} gi, shî bê bang yhangchang yhúm lhum

^{‡‡}9:60 Shî bê bang gâ é gi, woi-nyí má shi to bang lé gâ lhê.

kó sháng gaq; nghut kôlhang, nàng gi, Garai Gasâng é mingdán hkyô lé, é hko kyo aq.” ga tai ri.

⁶¹ Byù rayuq dum, Yhang lé, “Yhum-sing ê, ngò le náng htàng cháng rã, nghut kôlhang, ngá yhumbyù lé hí hkyang ló shit to rã ahkáng byi shi laq.” ga tai ri.

⁶² Yesuq gi, “Yò hpuq li zui mù htàng shut lhing wú sù ó yuq nghut kôlhang, Garai Gasâng é mingdán eq a gingdán.” ga luí, yhang lé tai ri.

Yesuq, Chángzò Pé Nyhit Xê Yuq Lé, Nhang Htoq Kat É Hkyô

10 Hau htàng má, Yhumsing gi, gotú chángzò pé nyhit xê yuq[¶] lé hkyin yù mù, Yhang e ló rã và eq jowò hkgámó shut í yuq razúm zúm kut luí, Yhàng é hí má ê nhang kat ri. ² Yesuq gi, yhangmoq lé, “Kyô^{§§} shù yù rã myo shoq joq kôlhang, mù zui rã byù gi, shaù nyi ri. Haù mù, haù kyô Yhumsing lé, Yhàng é kyô yò má, kyô shu byù* myo myo nhàng byi rã matú, dung keq. ³ Nungmoq e ló keq! Wamhkuí hpúng má nhang hâng kat é sau zò pé lé su, Ngò, nungmoq lé nhang kat é nghut lhê. ⁴ Ngùn htung eq, etap, hkyí-tsung pé hkâyú chùng kó, hkyô má ó lé le hkâshichyên kùn nyi kó.

⁵ Nungmoq gi, hká yhùm má wàng e ló kô le, 'Shi yhùm nguingón nyi sháng gaq.' nghù luí, hí tai keq. ⁶ Haù yhùm má nguingón hkyô eq gingdán sù nyi é nghut le gi, nguingón hkyô haù gi, haù yuq é ahtoq má joq to rã nghut lhê. Haù a nghut jáng, nguingón hkyô haù gi, nungmoq chyáng dum taù lo byuq rã nghut lhê. ⁷ Haù yhùm má nyi to mù, yhangmoq haí byi le haí zo haí shuq keq;

hkâsu mù gâ le, mù zui sù gi, zuihpau wó yù gíng lhê; haù mù, nungmoq rayhum htàng rayhùm hkâhtot nyi wún kó.

⁸ Nungmoq hká và má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byi é zoshuq lé, zo keq, shuq keq. ⁹ Haù má é nò bang lé lhoq gê byi mù, 'Garai Gasâng é mingdán gi, nungmoq eq chyáng lò bê nghut ri.' nghù luí, yhangmoq lé tai kyo keq. ¹⁰ Nghut kôlhang, nungmoq hká và má wang ló kô le, yhangmoq a lhom hap yu é nghut le gi, haù và má é hkyô mó má htoq é mù, ¹¹ Ngamoq é hkyí má dap tô é nungmoq và má é hpuilhaù lhang, nungmoq lé hkyang pù tsò nyi rã matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyáng lò bê hkyô lé, sé to keq.' nghù luí tai keq. ¹² Ngò, nungmoq lé tai kôlé, haù buinyi† lé, haù và gi, Sodom và htoq má je hpuzo rã nghut lhê.

¹³ Kurazin và mó ê! Nàng dingnyé wó ri! Bet-saida và mó ê! Nàng dingnyé wó ri! Nungmoq chyáng lé kut shit é lak-lái kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyün lhê kut zung ngung to bekô rã nghut lhê. ¹⁴ Haù mù, tarã jéyáng é nyi jé jáng, nungnhik gi, Turuq myuq eq Sidun myuq htoq má je hpuzo‡ kó rã nghut lhê. ¹⁵ Dum mù, Kaperna-um và nàng ê, nàng gi, mauhkung jé shoq waq toq é hui rã lú? A nghut, mosumhkung má sheq gyó rã nghut lhê.” ga tai ri.

¶**10:1** Chyúmdang ra-am má gi, chángzò nyhit xê í yuq ga le kâ tô ri.

§§**10:2** Kyô nghù é gi, Yesuq lé lumjng naù kôlhang tai kyo rã bang a nyi luí láng tô é bang nghut ri.

***10:2** Kyô shu byù nghu é gi, Yesuq é hkyô gabú danglù lé tai kyo bang nghut ri.

†**10:12** Haù buinyi gâ é gi, Garai Gasâng tarã jéyáng é buinyi lé gâ lhê.

‡**10:14** Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri.

¹⁶Hau htâng má, chángzô pé lé dum xoq taí é gi, “Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê.” gâ ri.

Nyhit Xê Yuq Dum Taù Jé Lo É Hkyô

¹⁷Hau htâng, haù chángzo nyhit xê yuq gi, gabú myit èq dum taù lò mù, “Yhumsíng ê, náng é myíng lé lang jáng, nat gâng pé lhang ngamoq é dang lé gyô bum akô.” ga taí akô.

¹⁸Haù su ga taí kôjáng, Yesuq tû taí é gi, “Tsadán gi, mauhkúng htoq mai lhap hpyat é su byit gyô lo é lé ngò myang kat bê. ¹⁹Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyè pê é wum-o a-tsam banshoq lé wó ùng râ ahko ahkáng lé byi bê nghut mù luí, hai èq le nungmoq lé wó lhoq hten râ a nghut lo. ²⁰Nghut kôlhang, nat pé nungmoq é dang gyô é lé za hkâgabú nyí kó, mauhkúng htoq mâ é asak jihpán laiká buk má nungmoq é myíng bo to bê lé sheq gabú nyí keq.” ga taí ri.

²¹Haù u lé, Yesuq gi, Chyoiyúng Woi-nyí má gabú é myit byíng lô mù, “Mauhkúng eq myigung é Yhumsíng, Áwa ê, Nàng gi, haù pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haù gi, Nàng ô nau é hkyô nghut ri.

²²Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haù Zo eq haù Zo mai sé nhâng râ matú hkyin yu é bang mai lai luí, ó a sé.” ga taí ri.

²³Hau htâng má, Yhâng é chángzô pé shut lhing wú luí, yhangmoq lé baù za

haq taí kat é gi, “Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴Hkâsu mù gâ le, Ngò, nungmoq lé taí kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng naù gyo naù kôlhang, a wó myàng, a wó gyo kó nghut ri.” ga taí ri.

Gé É Samariq Byù

²⁵Haù hkûn, wú keq, tarâ sará rayuq gi, toq luí, Yesuq lé, “Sarâ ê, ahtum abyuq é asak lé wó yú shoq, ngò hkâsu kut râ râ lhê lhú?” ga luí, Yhang lé myí chyam wú ri.

²⁶Yesuq gi, “Mosheq é tarâ má hkâsu ga kê tô ri lhú? Nàng haù lé hkâsu nghap yu nyi lhê lhú?” ga luí, yhang lé myí ri.

²⁷Haù yuq gi, “Haù Yhumsíng náng é Garai Gasang lé, náng é myit nhiklhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lhê;^f 'náng gûng lé nàng chyitdap é su, náng é chyangnâm mâ é bang lé le chyitdap aq.^g” ga tû taí ri.

²⁸Yesuq gi, “Nàng tû taí é dang jô ri; haù su yhang kut aq, haù jáng nàng gi, asak duì râ nghut lhê.” ga yhang lé taí ri.

²⁹Nghut kôlhang, haù yuq gi, yhâng gungdu dingmán é lé, tûn shit naù luí, “Ngá é chyangnâm mâ é sù gi, ó yuq nghut lhê lhú?” ga luí, Yesuq lé myí ri.

³⁰Yesuq tû taí é gi, “Byù rayuq gi, Yerusalem wà mó mai Yeriho wà shut gyó lô le, damyaq eq htùng huí ri. Damyaq haù bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyâm to kôluí lô byuq bekô. ³¹Haù u lé, hkyangjong rayuq gi, haù hkyô mai lai âng lô le, haù damyaq hui sù lé myàng jáng, koi lai lô byuq ri. ³²Haù eq rajung za, Lewiq rayuq le, haù mai lai lô é hkûn,

^f10:27 Tarâ Pun 6:5 ^g10:27 Nhung 19:18

haú yuq lé myàng jáng, koi laí ló byuq ri. ³³Nghut kôlhang, Samariq byù rayuq le, haú mai laí ló é hkûn, haú yuq leq tô é lé myàng jáng, wú shogyo luí yhâng chyáng huí ê mù, ³⁴yhâng é dàm má, xú eq tsibiyiq wing shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhûm má jé shoq shuí ló mù, gôn lajang byí ri. ³⁵Htang nyí lé, yhang gi, haú bing-yhûm yhumsíng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má nàng myo chung záng é banshoq lé ngò dum taú lò jáng, lo xap rà.' gâ ri." gâ ri.

³⁶Hau htàng, tarâ sará lé, "Nàng gi, byù haú bang sum yuq má damyaq huí sù é chyàngnâm mâ é dông nghut sù gi, hká yuq nghut rà su ngam ri lhú?" ga luí, Yesuq myí ri.

³⁷Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú dông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé Ê Hkyô

³⁸Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri. ³⁹Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsíng Yesuq é hkyí wang má zung to mù, Yhang mhoqshit é dang lé gyô nyi ri. ⁴⁰Mahtaq kúm gi, saí tso saí huq é amú myo luí, gyin bún nyi ri. Haú mù luí, yhang huí ê mù, "Yhumsíng ê, ngá gu gi, saí tso saí huq é amú má, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹Haú hkûn, Yhumsíng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri. ⁴²Nghut

kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi rà a nghut." ga luí, yhang lé tú taí ri.

Yesuq Mhoqshit É Kyûdung Dang

Mht 6:9-13; 7:7-11

11 Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsíng ê, Yohan gi, yhang é chángzô pé lé kyûdung rà hkyô mhoq byi é su, ngamoq lé le mhoq byi laq." ga Yhang lé taí ri.

²Haú hkûn, Yhang gi, "Nungmoq kyûdung le,

'Mauhking htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq.

Náng é mingdán jé lô sháng gaq.

³Ngamoq nyí wuí rà é zoshuq lé, ngamoq lé nyí wuí byi laq.

⁴Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshit ri.

⁵Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng é luí, 'Buinùm hpó ê, ngo lé muk sùm long byam chyí byí kat laq, ⁶haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso rà haí le a joq byam dut tô ri.' ga taí é hkûn, ⁷yhúmhaú shut mâ é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wui le ngò eq rahá yhupjang má yhup to bekò. Ngò, nang lé haí le a wó toq yù byi lo.' ga tu kat

ri. ⁸Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰Hkâsú mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹Nungmoq íwâ pé má, ó yuq wá, yhumsing yhangzo muk dúng le, luqgok byi kó râ lúhú? Ngozo dúng le, lhangmuì byi kó râ lúhú? ¹²Woq-ú dúng le, gogok byi kó râ lúhú? ¹³Agè ashop é bang nungmoq lháng gi, nungmoq é zo wuì lé, ge é chyunhuq dat byi kô le nhîng, mauhkûng htoq tsáng myhâng má é nungmoq é Íwa gi, Yhang lé dúng é bang lé, je riyhang haú Chyoiyúng Woiní byi râ nghut lhê.” ga taí ri.

**Mara Hûn É Dang Lé
Yesuq Tû Taí É Hkyô**

Mht 12:22-30, 43-45; Mrk 3:20-27

¹⁴Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htàng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵Nghut kôlhang, yhangmoq chyáng má é ra-am gi, “Yhang gi, nat gâng pê é zau Bezebulaq é wum-o a-tsam èq za, nat gâng pé lé wó hkat pyâm é nghut ri.” ga taí bum akô nghut ri. ¹⁶Ra-

am le, Yhang lé, mauhkûng má é kumlhá tûn shit wú laq ga dúng chyam wú akô.[¶]

¹⁷Yesuq kúm yhangmoq myit nyi é hkyô lé sé mù taí é gi, “Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhûm é yhûm htu gi, byoq gâng lhum râ za nghut lhê. ¹⁸Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsú kut wó gíng to râ lúhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. ¹⁹Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyâm kô é nghut lhê lúhú? Haú mù luí, yhangmoq gi, nungmoq lé jéyáng é bang dut bekô râ nghut lhê. ²⁰Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán[§] gi, nungmoq chyáng jé bè nghut ri.

²¹Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. ²²Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luí, yhâng é sutzè pé lé, gam yu pyâm byi râ nghut lhê.”*

²³Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

[¶]11:16 Byu pé gi, Yesuq lé Garai Gasang nhang kat é hkyô lé saksé myàng naù luí, mauhpo kumlhá dúng nyi akô.

[§]11:20 *Garai Gasâng é mingdán* gâ é gi, byù htoq má le, nat htoq má le, Garai Gasâng yhang uphkang é lé gâ é nghut lhê.

** 11:22 Haú eq rajung za, Yesuq gi, Tsadán lé zân ûng bè nghut é yanmai, agè ashop é nat pé lé byu pè chyáng maí, wó hkat pyâm bè nghut ri.

²⁴ Haû agè ashop é nat gi, byù rayuq chyáng mai htoq lô mù, kyuq huí é jowò pé má sô yông e lô luí, no râ jowò hkat ho wú le, a myang hô nghut ri. Haû hkûn, yhang gi, 'Ngò nyi lai lo é yhûm má dum taû lô wú râ.' ga taí ri. ²⁵ Yhang dum taû jé lô wú le, yhûm haû gi, shum pyám mù san za rago dut to láng é lé lô myang ri. ²⁶ Haû jáng, yhang gi, dum taû è mù, yhâng htoq je wuí é nat nyhit nat lé shuí lò luí, haû má lo wàng nyi to bekô. Haû mù, haû yuq é nyi yap sâmlai gi, hí lhê htoq má je wuí lò bê nghut ri." ga taí ri.

²⁷ Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

Mauhpo Kumlhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotû haí le tûn shit râ a nghut. ³⁰ Yonaq gi, Ninewe wà byù pê hí má kumlhá^{††} dut é su, haû Byu Yhangzo gi, shí pyat lhê é byu pê hí má, kumlhá dut râ nghut lhê. ³¹ Maupyí mâ é hkohkâm myhí gi, maumyí lô htàng é mai lé lô mù, Sholumon é hpaqchyí dang lé, lé gyô yù bê nghut mù, haû tarâ jéyáng é buinyi má, shí ipyat mâ é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê. ³² Ninewe wà byu

pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ³⁴ Náng é myoq gi, náng gungdú é myibung^{‡‡} nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haû mù, náng chyáng bo é maubó gi, mauchut byuq é, a chut byuq é lé wú nyi aq. Nàng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyi râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haû su ga ban taí é htàng má, Hparishe rayuq gi, yhang eq zang rahá zo râ matú, Yesuq lé ji ri. Haû mù, Yesuq gi, haû yhûm má wang è mù zang zo râ ga siboi nàm má zung tô ri. ³⁸ Nghut kôlhang, Hparishe wá gi, zang zo râ hí má

^{††}11:30 Kumlhá gi, Yonaq, ngozô wamdau má sum nyí lúng é su, Yesuq le, shí bê mai sum nyí nghù râ nyí má, dum dui toq lô râ hkyô lé taí nau é nghut ri.

^{‡‡}11:34 Myibung gâ é gi, tengmán é mungdang lé wó sê yu é a-tsam lé, taí é nghut ri.

Yesuq loq a chi é lé, myàng luí maú nyi ri.[¶]

³⁹ Haú mù luí, Yhumsing Yesuq yhang lé taí é gi, “Nungmoq Hparishe pé gi, góm eq zanghkoq lé ahtoq shut za chi yung nyí kômù, nungmoq é unghkaú má gi, lú zo lú shuq é eq agè ashop é hkyô pé bying zan tô ri. ⁴⁰ Byù bâm pé ê, ahte^{§§} lé le, ahtoq* lé le, saí sù gi, Garai Gasang rayuq za nghut é lé, a sé kó lhú? ⁴¹ Nghut kólhang, ahte má bo é zè pé lé, ra chà é bang lé byí pyám keq; haú hkûn, nungmoq é matú banshoq gi, sân-yung lô rà nghut lhê.

⁴² Hparishe pé ê, nungmoq gi, dingnyé wó ri, hkâsu mù gà le, nungmoq gi, gautsáng, shingtón pé eq zangxun mhan-haq ajù jù má é, xê gambùm ragambùm lé gi, Garai Gasang lé byi nyí kômù, tarâ dingmán é hkyô eq Garai Gasang chyitdap é hkyô lé gi, lhaí pyám tô akò. Xê gambùm ragambùm byí é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyí rà lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé má é ahkyak dik é zùng jang pé lé le, gài pé má hkunggâ é eq shichyên é dang lé le, nungmoq ô nau nyi bum akò.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtoq mai sô laí é lupdùng eq du akò.” ga taí ri.

⁴⁵ Haú hkûn, tarâ sará rayuq gi, “Sarâ ê, nàng haú su gà é gi, ngamoq lé le rhoi lhôm nyi é nghut bê.” ga Yhang lé tû taí ri.

⁴⁶ Haú su ga jáng, Yesuq gi, “Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq

râ wuí é noqkuq htung tarâ wòlai lé wùn nhâng luí, yhumsing yhang gi, wò haú lé loqnyhuí eq lhâng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é ichyí iwâ pé sat pyâm é myiqhtoí pé é lup lé luptsuq tsuq akò. ⁴⁸ Haú mù luí, nungmoq gi, nungmoq é ichyí iwâ pé é muzó lé, myit bo huí é bang nghut nyi akò. Hkâsu mù gà le, yhangmoq gi, myiqhtoí pé lé sat pyám mù, nungmoq gi, lup haú pé lé luptsuq tsuq akò. ⁴⁹ Haú mù luí, Garai Gasang, Yhâng é hpaqchyí byéng-yá mai taí é gi, 'Myiqhtoí pé eq lagyô pé lé, ngò yhangmoq chyáng nhang kat rà nghut lhê; haú bang má é ra-am lé gi, yhangmoq lhom sat pyám mù, ra-am lé gi, zing-ri kó rà nghut lhê.' gà ri. ⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhúm gyoro má sat pyám huí é Zahkariq é sui jé shoq, shun pyâm é myiqhtoí pé é sui banshoq bâng é manglat gi, shí pyat má é byu pé lé hùn rà nghut lhê. ⁵¹ Ngò, nungmoq lé taí kôlé, manglat haú pé lé gi, shí pyat má é byu pé lé, gè gè yhang hùn rà nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyám byi kômù, yhumsing yhang le a sé, sé naú bang lé le, hkûm zing tô akò nghut ri.” ga taí ri.

⁵³⁻⁵⁴ Yesuq haú mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akò nghut ri.

[¶]11:38 Yudaq htung tarâ má gi, zang a zo shi má loq chi rà lhê.

^{§§}11:40 Ahte gà é gi, i-myt unghkaú lé taí ri.

* 11:40 Ahtoq gà é gi, gungdu lé taí ri.

**Gegùn Labyoq Kut É
Bang Lé Sidiq Râ Hkyô**

Mht 10:28-33; 12:32; 10:19-20

12 Haû u, byù hkyîng mun zup zîng lò mù, rayuq eq rayuq lhang zang nang lhum shoq dut nyi é hkûn, Yesuq, Yhang é chángzô pé lé taí hi é gi, “Gegùn labyoq kut é Hparishe pê é múnchi lé koi sidiq pyâm keq. ²A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³Haû mù luí, nungmoq, mauchut hkaû má haq taí é dang ban-shoq lé, myoq myàng maubó má wó gyô bùm kó râ nghut lhê. Gok hkaû má, dangsoq soq é lé le, yhumhkûng htoq mai taí pyo bùm bekô râ nghut lhê.

⁴Ngá buinùm wuì ê, Ngò, nungmoq lé taí kôlé, gungdu lé za wó sat pyâm mù, woi-nyí lé haí le a wó kut é bang lé, hkâgyuq kó. ⁵Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haû yuq lé za, gyuq nyi keq. ⁶Johkyáng ngo du lé, gyi ht-ingchap í chap èq wó ûng pyâm lhê a nghut kó lú? Haû johkyáng radu lé lhang, Garai Gasang gi, tô-myhí pyâm é a nghut. ⁷Garai Gasang gi, nungmoq é ulhum mâ é xâm banshoq lé lhang, ng-hap to gù nghut lhê. Haû mù, hkâgyuq kó; nungmoq gi, haû johkyáng myo myô htoq má lhang gù je bo é bang nghut lhê.

⁸Ngò, nungmoq lé taí kôlé, byu pê hí má Ngo lé lhom yín yu é sù ó yuq nghut kôle, Garai Gasang é maumang lagyô pê é hí má, haû Byu Yhangzo gi, haû yuq lé lhom yín yû râ nghut lhê. ⁹Nghut kôlhang, byu pê é hí má Ngo lé he-ngik pyâm é sù lé chyaú gi, Garai Gasang é maumang lagyô pê é hí má, he-ngik pyâm râ nghut lhê. ¹⁰Haû Byu Yhangzo

lé dang đông shut é sù gi, mara hkyut byí é wó hui ra nghut lhê; nghut kôlhang, haû Chyoiyúng Woi-nyí lé rhoi dang taí pyâm é sù gi, mara hkyut byí é hui râ a nghut.

¹¹Byu pé nungmoq lé jéyáng râ matú tarajong pé má le, agyì suwún wuì eq ahkáng ayá wó bâng é hí má le, shuí é ló kô é hkûn, hkâsu kut râ lé le, hkâsu nghû tû taí râ lé le, hkâ-myit chiq kó. ¹²Hkâsu mù gâ le, haû u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê.” ga taí ri.

**Hpaqchyí A Bo É Sahtê Hpó
Lé Dangtú Yu É Hkyô**

¹³Haû hkûn, shiwa hpúng hkaû mai, byù rayuq gi, “Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq.” ga luí, Yesuq lé taí ri.

¹⁴Yesuq gi, “Byù nàng ê, nungnhik tang ahtoq má tarâ agyì kut luí, ikun zè gam byi râ gi, ngo lé ó hkyin tô é lú?” ga luí, yhang lé tû taí ri. ¹⁵Yesuq yhangmoq lé taí é gi, “Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut.” gâ ri.

¹⁶Dangtú ralhùm đông mai le, yhangmoq lé Yesuq taí é gi, “Sahtê rayuq gi, yhang é yò pé má guqzo muilhum gyaí já ri. ¹⁷Haû mù luí, yhang é unghkaû má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸Dum nghut jáng, yhang gi, 'Ngò îsu kut wú râ abe, ngá é chyí xau pé lé hpyoq pyâm luí, je kô é chyí pé lé saí râ nghut lhê. Chyí haû pé má ngá é guqzo muilhum pé eq sutzè banshoq lé, tsíng kat to luí, ¹⁹ngá é i-myt lé îsu nghû taí râ, “I-myt ê, zanwut myáng myáng é matú, zè gè myo myo ngò tsíng to bê. I-myt nàng

zim za kut nyi aq hkoi. Zo mù, shuq mù, ngón ngón nyi aq.” ga' gâ ri.

²⁰Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut râ lúhú? ga luí, yhang lé taí ri.

²¹Haú eq rajung za, yhumsing é matú sutzè hkong to mù luí, Garai Gasang é hí má myung nyi sú gi, haú yuq su nghut râ nghut lhê.” gâ ri.

Myit A Chiq É Za Garai Lé Lumjǐng Râ Hkyô

Mht 6:25-34, 19-21

²²Yesuq, Yhâng é chángzô pé lé dum taí é gi, “Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myit chiq kó. ²³Asak gi, zoshuq htoq má, gungdu gi, mebù htoq má, je ahkyak lhê.

²⁴Nghonoq pê é hkyô lé myit wú keq; yhangmoq gi, kyô hkyô kyô shu a kut kó; guqchyî eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pê htoq má je riyhang hpaudap nyi lhê a nghut kó lúhú? ²⁵Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lúhú? ²⁶Haú su mù luí, tiq dik é hkyô lé lháng, nungmoq a wó kut kô é nhing, haí mù luí gotú hkyô pé lé, myit myô nyi akò lúhú?

²⁷Htutbó ban† pé hkâsu kut kô lo é lé, myit wú keq. Haú pé gi, mù le a zui, hkying le a dui kó nghut ri. Nghut kôlhang, Ngò, nungmoq lé taí kyo kôlé, Hkohlâm Sholumon hpúng kô dik u lé wut é mebu lháng, ban haú rabó lé a hkyit nghut ri. ²⁸Lumjǐng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosò mhan pé lé za lháng, Garai Gasang haú su kut

hut é nghut le gi, nungmoq lé, je riyhang hut râ a nghut kó lúhú? ²⁹Nungmoq gi, haí zo haí shuq râ lé hkâho nyi kó; haú eq séng luí lé hkâ-myit chiq nyi kó.

³⁰Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akò; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byí nyi lhê. ³¹Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

³²Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byí nau nyi ri. ³³Nungmoq wó é zè pé lé úng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot èq le a wó zô é sutzè lé mauhkung htoq má hkong to keq. ³⁴Hkâsu mù gâ le, náng é sutzè joq jang má, náng é i-myit le jé nyi râ nghut lhê.

Yesuq Dum Jé Lé Lô Râ Hkying Lé Machya Nyi Râ Hkyô

Mht 24:45-51

³⁵Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù, ³⁶myiháng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, lánng tô é dui-nhâng zoshâng wui su kut nyi keq. ³⁷Haú yhumsing jé lo le, machya nyi lánng é dui-nhâng zoshâng wui gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸Gunggám yoq lé nghut kôlhang, woq tûn hkûn lé nghut kôlhang, haú su kut machya nyi é lé, yhumsing hpó lo

†12:27 Htutbó ban gi, yúng dik é yosò ban nghut lhê.

myang é nghut le gi, dui-nhâng zoshâng haú bang hkungsô wó nyi ri. ³⁹Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhâng yhâm lé a wó hput htong nhâng râ nghut é lé, bûn sê nyi keq. ⁴⁰Haú mù, nungmoq le rì rì nghut nyí keq; hkâsu mù gà le, haú Byu Yhangzo gi, a bûn nùng má jé lé lô râ nghut lhê.”
gâ ri.

⁴¹Haú hkûn, Petruq gi, “Yhumsing ê, dangtú shí gi, ngamoq lé za, taí é nghut lhê lú? Haú a nghut jáng, lhunglhâng bang lé taí é dông nghut lhê lú?” ga myí ri.

⁴²Haú jáng, Yesuq gi, “Lumging é eq hpaqchyí bo é sùt zum sù gi, hká yuq nghut lhê lú? Haú yuq gi, yhâng yhumsing é dui-nhâng zoshâng wuì lé ahkying jé jáng zoshuq gàm byi râ matú, yhumsing hpô èq hkyin to sù dut râ nghut lhê. ⁴³Yhumsing hpó dum taú lo é hkûn, haú su kut nyí láng é dui-nhâng zoshâng gi, hkungsô wó nyi ri. ⁴⁴Ngò, nungmoq lé teng za taí kôlé, yhumsing hpó haú gi, yhâng é sutzè ban-shoq, dui-nhâng zoshâng haú lé ap to râ nghut lhê. ⁴⁵Nghut kôlhâng, dui-nhâng zoshâng haú gi, yhâng é i-myt unghkaú má, 'Ngá é yhumsing hpó jé lô râ gyai myáng ashí.' ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê î shuq wut nyi é nghut jáng, ⁴⁶dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkying má jé lô mù, yhang lé jap pyám luí a lumjing bang eq rahá nyhi pyám râ nghut lhê.

⁴⁷Yhumsing hpô é i-myt lé sê to kôlhâng, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing èq nhuq bat é lé, myo myo hui zo râ nghut lhê. ⁴⁸Nghut kôl-

hang, a sé mù kut shut sù kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yú su chyáng mai, myo shoq dúng yú râ nghut lhê. Myo myo ap byí tô é hui su chyáng mai, je myo shoq dum dúng yú râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹Ngò jé lé é gi, myigùng htoq má, myi nyé nhâng râ matú nghut lhê. Myi haú dap to láng é nghut le gi, ngò ô nau é hkyô jup bying bê. ⁵⁰Nghut kôlhâng, ngò hkam yú râ é baptisma[‡] rajung joq ashí, haú a hkam yú yú gi, ngò gyai yhang hkâm zo wuì nyi ri. ⁵¹Ngò jé lé é gi, myidàm htoq má simsaq hkyô byi râ matú nghut nhô ngam akô lú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. ⁵²Haú su mù, ahkuí mai rayhâm za má é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. ⁵³Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê.” ga taí ri.

Dut Lò Râ Hkyo É Kumhá Lé Sê Gam Hkoq Râ Lhê

Mht 16:2-3; 5:25-26

⁵⁴Hau htâng shiwa byu pé lé, Yhang taí é gi, “Nungmoq gi, buiwàng hkyam shut mhut htup é lé myàng jáng, 'Maú wo lò berá.' ga radá dâm lhaq taí taí mu akô, haú eq rajung za le, dut lò lò mu

[‡]12:50 Shí má é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

ri. ⁵⁵ Dum nghut jáng, maupyi shut mâ é lai lo le, 'Bui htân berâ.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhing, haí mù luí, shí ipyat mâ é kumlhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsing yhang yhang a wó doqdân yù kô é lhú? ⁵⁸ Dangké, nang lé yui tsuq sù eq rahá, tarâ agyi wá chyáng e ló le, hkyô má yhang eq ngón shoq byin hpyé huí yù aq. Haú a nghut jáng, yui yhumsing gi, nang lé tarâ agyi chyáng é dé pyám luí, tarâ agyi gi, htóng hkyó su chyáng, nang lé ap pyám luí, yhang gi, nang lé htóng má lhung pyám râ nghut lhê. ⁵⁹ Ngò, nang lé taí lé, yuichyín haú a ban xap xap gi, htóng haú mai nàng wó htoq ló râ a nghut." ga taí ri.

Myit A Lhing Jáng Shi Hten Byuq Râ

13 Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nong jaú é hkungga lé nyhò pyâm é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotù Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé taí kôlé, nungmoq le, myit a lhing kô é nghut le gi, banshoq bang haú eq rajung za shi hten byuq kó râ nghut lhê. ⁴ Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? ⁵ Haú su a nghut! Ngò, nungmoq lé taí kôlé, nungmoq le, myit a lhing kô é nghut le gi, banshoq bang haú eq rajung

za shi hten byuq kó râ nghut lhê." ga taí ri.

⁶ Yesuq dangtú đông dum taí é gi, "Byù rayuq gi, yhâng é tsibiyiq hkyâm má, maihpáng gam ragàm hô tô ri. Yhang agàm haú má, ashi é ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gam haú má ashi é ho wú le, a myàng nghut ri; haú lé htuq pyám aq. Haí mù, maumyi aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsing ê, hkûzân za gi, yuq tô wú shi sháng gaq, shigàm hau é lhinghkyuq má ngò du lhing to mù, myihpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsing lé tû taí ri." gâ ri.

Bánno Buinyi Má Gùng Loq Hten Sù Lé, Lhoq Gê Byi É Hkyô

¹⁰ Bánno buinyi lé, Yesuq gi, tara-jong ralhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lhang a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí, ¹³ yhâng é ahtoq má loq ke byi ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nòhpyo lhoq gê byi é yanmai, tarajong má up sù gi, wú nhik-yo luí, "Mú wó zui é buinyi hkyuq nyi joq tô le, buinyi haú pé má, lé wó lhoq ge yù lhê. Haú mù, Bánno buinyi má gi, hkâkut kó." ga luí, shiwa byu pé lé taí kat ri.

¹⁵ Haú hkûn, Yhumsing Yesuq gi, "Gegùn labyoq kut bang ê, nungmoq yuq hkangmó gi, Bánno buinyi lé, yhumsing

é no, logúng pé lé, hkup mai hpông htoq yû mù uchyam byi huq huq kut akô a nghut lúhú? ¹⁶ Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyi má Tsadán loq mai, hkyut byi a gíng rã lúhú?” ga tú taí ri.

¹⁷ Haú su ga taí jáng, Yhang eq i-myyit shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amú banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haú hkûn, Yesuq taí é gi, “Garai Gasâng é mingdán gi, haí eq wuí lhê lúhú? Ngò hai eq taí kê wú rã lúhú? ¹⁹ Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô.” gâ ri.

²⁰ Yhang dum xoq taí é gi, “Garai Gasâng é mingdán lé, ngò hai eq taí kê wú rã lúhú? ²¹ Haú gi, myiwe zo rayuq èq sungso mún sum búng má yu nyhó luí, haú pé banshoq lé wó lhoq daú nhang é múnchi eq wuí ri.” gâ ri.

Chyap É Hkúmdong

Mht 7:13-14, 21-23

²² Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byí ri. ²³ Haú hkûn, byù rayuq gi, “Yhumsíng ê, hkyi yu é hui rã bang gi, shau za nghut rã lúhú?” ga luí, Yesuq lé myí ri.

²⁴ Yesuq gi, “Chyap é hkúmdong mai, Garai Gasâng é mingdán má wó wàng shoq shikut keq. Hkâsu mù gâ le, ngò, nungmoq lé taí kôlé, byù myo myo gi,

wó wàng shoq ga shikut wú kó rã. Nghut kôlhang, a wó wàng kó rã nghut lhê. ²⁵ Yhumsíng hpó,[†] hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsíng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí rã nghut lhê.

²⁶ Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô rã.

²⁷ Nghut kôlhang, yhumsíng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tú taí kat rã nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí, haú jowò má ngaubyi ngaú nhap eq zùi kyik kyik shoq hpuzô nyi bùm bekô rã nghut lhê. ²⁹ Hau hkûn, buihtoq, buiwàng, maupyí, maut-sùng mâ é mingdán myo myo mai byu pé lé luí, Garai Gasâng é mingdán zoshuq poí má myang zùng kó rã nghut lhê. ³⁰ Haú hkûn, ahkuí htâng gyó nyí bang gi, hí bekô rã; ahkuí hí to bang gi, htâng gyó bekô rã.” ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyô

³¹ Haú u lé, Hparishe pé ra-am gi, Yesuq chyáng lé luí, “Shí jowò mai htoq ló byuq aq. Hkâsu mù gâ le, Herut gi, nang lé sat rã hen nyi ri.” ga luí, Yhang lé taí akô.

[†]13:25 Yhumsíng hpó gi, Garai nghut lhê. Yhûm gi, Garaí é mingdán lé taí é nghut lhê.

³²Haú jáng, Yesuq gi, “Hkû-nyí, napmá,[§] ngò nat gang hkat pyám luí, nò zo hpyo zo lhoq gê byi rá nghut lhê; sum nyí nghû rá buinyí** má sheq, ngá mú bàn rá nghut lhê.’ nghû luí, agè ashop é wamhkui haú lé ló taí kyo keq.” ³³Haí wá dut kôlháng, hkû-nyí, napmá, sânghe nyí, ngò gi, e ló rá dut ashí. Hkâsu mù gâ le, myiqhtoí pé gi, Yerusalem wà mó mai lai luí gotú jowò má a shi wú kó nghut ri.

³⁴Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsíng lhúng yu é su, nungzô pé lé, Ngò hkâ-myhó dâm shuí tsíng yù nau kôlháng, nàng a dóng nghut ri. ³⁵Wú keq, nungmoq é yhúm gi, nungmoq é matú chamchyuiyui dut pyám to berá nghut lhê; Ngò, nungmoq lé taí kôlé; Yhumsíng é myìng mai jé lé lo é Sû gi, hkungsô wó nyí sháng gaq.^h nghû, nungmoq a taí taí gi, Ngo lé wó myâng kó rá a nghut lo.” ga luí, yhangmoq lé taí ri.

Hparishe Rayuq É Yhúm Má Yesuq Jé Nyí É Hkyô

14 Bánno buinyí ra-nyí má, Yesuq gi, zang zo rá ga Hparishe suwún rayuq é yhúm má, ê wang nyí tô le, haú má é bang gi, Yhang lé gyui gyui chòm wú nyí bum akô. ²Haú u lé, wui wam ana dut sù rayuq gi, Yesuq é hí má jé nyí tô ri. ³Haú mù, Yesuq gi, “Bánno buinyí má nòhpyo lé lhoq gê byí é gi, tarâ wang lhê lhú, a wang é lhú?” ga luí, tarâ sará pé eq Hparishe pé lé myí kat ri. ⁴Nghut kôlháng, yhangmoq gi, zim za dut byuq

akô. Haú hkûn, Yesuq gi, nòhpyo hui sù lé, zuí to mù, lhoq gê byi luí, nhang kat ri.

⁵Hau htâng, Yesuq gi, yhangmoq lé, “Nungmoq chyáng má é rayuq yuq gi, yhumsíng é yhangzo rayuq yuq, haú a nghut jáng, no myang radu du, Bánno buinyí má, wuihtung má byit gyó le, haú hkûn jáng, a xe htoq yu é za, wó nyí kó rá nghut lhê lhú?” ga myí kat ri. ⁶Yhangmoq kúm gi, dang haú hkun lé, haí le a wó tú taí kó nghut ri.

⁷Haú hkûn, Yesuq gi, ji tô é bang jé réng é zùng jowò pé hkyin yu nyí kó é lé myàng jáng, yhangmoq lé dangtú dông taí é gi, ⁸“Byù rayuq yuq nang lé, myiháng poi má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹Ji tô é nghut jáng gi, nungnhik lé ji tô é yhumsíng hpó lé lô mù, ‘Shí yuq lé jowò hui byi aq.’ ga luí, náng lé lé taí jáng, nàng hoq hpu luí, hkyí htâng shut huí zùng ra rá nghut lhê. ¹⁰Haú mù luí, supé nang lé ji le, hkyí htâng má è zùng aq; haú hkûn, nang lé jì sù lé mù luí, ‘Buinùm hpó ê, shí je réng é jowò má huí doq zùng aq.’ ga luí, nang lé taí jáng, nàng eq rahá zung tô é bíng lhunglhâng bâng é hí má, nàng gi, myoqdong wó rá nghut lhê. ¹¹Hkâsu mù gâ le, yhumsíng gùng lé waq toq é sù ó yuq nghut kôle, lhoq nyhum pyám é hui rá nghut lhê; yhumsíng gùng lé, lhoq nyhum é sù kúm gi, waq toq é hui rá nghut lhê.” ga taí ri. ¹²Hau htâng, Yesuq yhang lé ji é yhumsíng hpó lé taí é gi, “Napzang, a nghut jáng, myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo

[§]13:32 *Hkû-nyí, napmá* gâ é gi, Yesuq mingkan htoq má mú zui rá ahkýng lé taí é nghut lhê.

**13:32 *Sum nyí nghû rá buinyí* gâ é gi, Yesuq mingkan htoq má mú ban zuí é buinyí lé taí é nghut lhê.

^h13:35 Hkya-on 118:26

chang pé lé hkâjî tso. Haú bang lé jì tsò é nghut jáng gi, yhangmoq nang lé dum jì tsò é èq, jeju dum tau kó rà nghut lhê. ¹³Nghut kôlhang, nàng poi kut mù, byi tso byi huq nau é nghut le gi, myùng bang, hkyî gyui loq hten bang eq myoqjit é bang lé, jì tso aq. ¹⁴Haú su kut jáng, nàng hkungsô wó nyî rà nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyî má, hau é akyû lé, nàng wó hkam yù rà nghut lhê.” gâ ri.

Zoshuq Poi Mó Lé Dangtú Yu É Hkyô

Mht 22:1-10

¹⁵Yesuq eq rahá zô zung tô é byù rayuq gi, dang haú wó gyo jáng, “Garai Gasâng é mingdán mâ é zoshuq poi má wó zo rà sù gi, hkungsô wó nyî sù nghut rà.” ga luí, Yesuq lé taí ri.

¹⁶Yesuq haú yuq lé tú taí é gi, “Byù rayuq gi, myinzang byi tso rà ga, zoshuq poi mó ralhüm hen to mù, byù myo myo lé jì tô ri. ¹⁷Zang byi tso rà yàm jé jáng, yhâng é dui-nhâng zoshâng lé, jì tô é bâng chyáng 'Lé keq hkoi, zoshuq jin to bê.' ga é châng wut nhang ri.

¹⁸Nghut kôlhang, haú bang banshoq gi, zoshuq poi má a ê rà dông chyat he pyâm akô. Rayuq sù gi, 'Ngò yohtung rahkyang wui tô lhê; haú lé ê wú rà dut ri. Haú mù, ngo lé ahkáng byi shi laq.' ga yhang lé taí ri.

¹⁹Dum rayuq le, 'Ngò, nohtô ngo zúm wui tô lhê; haú pé lé dui nhang chyam wú rà dut ri; ngo lé ahkáng byi shi laq.' ga taí wó ho ri.

²⁰Dum rayuq le, 'Ngò myiwe hâng tô é a myáng shi mù, a wó lé.' ga taí wó ho ri.

²¹Haú jáng, dui-nhâng zoshâng taú lò mù, yhâng é yhumsing lé haú hkyô banshoq lò taí kyô ri. Haú hkün, yhumsing hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân é mù luí, myùng bang, hkyî gyui

loq hten bang eq myoqjit bang lé, ê jì lò aq.' ga luí, yhâng é dui-nhâng zoshâng lé nhang kat ri.

²²Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhang, zùng rà jowò gi, mân tô ashî.' ga taí ri.

²³Haú su ga jáng, yhumsing hpó gi, 'Ngá yhüm bying rà matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq. ²⁴Nang lé ngò taí lé, hí lé jì to huí é bang rayuq lháng, ngá é zoshuq poi lé wó chyim wú rà a nghut.' ga luí, yhâng é dui-nhâng zoshâng lé taí ri.” gâ ri.

Yesuq É Chángzo Wó Dut Râ Matú

Mht 10:37-38; 5:13; Mrk 9:50

²⁵Byù hpüng mó Yesuq eq rahá e ló kô é hkün, Yesuq gi, haú bang lé lhing wú luí, ²⁶“Ngá chyáng lé sù ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸Dangké, nungmoq chyáng mâ é byù rayuq yuq, tsehtung yhüm ralhüm saí nau le, yhang gi, yhüm haú ban saí rà matú, ngùn hkâ-myhó bàn rà eq yhang wó tô é ngùn luq a luq é lé, zùng mù luí, hí a sôn wú é byù nyi kó rà lúh? ²⁹Laqma mù, apün awang gi, saí hi to mù luí, a wó lhoq pân é nghut jáng, ³⁰myàng é bang banshoq èq, 'Shí yuq gi, apün awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rà nghut lhê.

³¹Dangké, hkohkâm rayuq gi, gye zan rà hen le, gyezo í mun eq lé sù hkohkâm lé, gyezo ramün eq za lhom wó zân üng rà, a wó zân üng rà lé, zùng mù luí, hí a

myit wú é nyì rã l hú? ³²A ùng rã dut le gi, gye pé we we má nyi tô ashî hkûn lé, lagyo suwún pé lé nhang kat luí, simsaq rã matú htingram pyám ra rã nghut lhê. ³³Haú eq rajung za, nungmoq chyáng mã é ó yuq nghut kôlhang, yhumsing wó é zè banshoq lé, a pyâm to sù gi, ngá é chángzo wó dut rã a nghut.

³⁴Xo gi, gè lhê. Nghut kôlhang, xomân kân byuq jáng gi, haú lé hai èq dum wó lhoq ngam yù rã l hú? ³⁵Haú gi, myigung matú le, myihpún kut rã matú le, akyû a bò lo. Haú mù luí, shinggan shut kúm gi, dú pyám sê akô.

Gyo rã nohkyap dap sù gi, gyô yù sháng gaq.” ga tai ri.

Byuq Byuq É Sau

Mht 18:12-14

15 Ra-nyì lé, Yesuq é dang gyo kó rã ga, kang guq bang eq yubak dap bang gi, Yhâng chyáng lé zing bum akô. ²Haú hkûn, Hparishe pé eq tarâ sará pé gi, “Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri.” ga tai put nyi bum akô.

³Haú mù, Yesuq yhangmoq lé dangtú dông tai é gi, ⁴“Nungmoq mã, sau rashô du wó luí radu byuq byuq é nghut le, gaú xe gaú du lé yoso mhan yô mã nyhi pyâm to mù, byuq byuq é sau haú lé, myàng shoq a châng ho yu é, ó yuq wá nyi kó rã l hú? ⁵Byuq byuq é sau haú lé myang hô jáng, gyai gau é i-miyit èq goqsân htoq mã bún kê chùng mù, ⁶yhûm mã jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga tai rã nghut lhê. ⁷Haú eq rajung za, Ngò, nungmoq lé tai kôlé, myit lêng a rã é dingmán bang gaú xe gau yuq lé gabú é htoq, myit lêng é yubak dap sù rayuq é yanmai, mauhkung htoq mã, je riyhang gabú jowò dut rã nghut lhê.

Byuq Byuq É Ngùn Chap

⁸Dum nghut jáng, dangtú ralhüm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú rã a nghut l hú? ⁹Haú lé ho myàng jáng le, yhâng é buinùm ji-myi wui eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga tai rã nghut lhê. ¹⁰Haú eq rajung za, Ngò, nungmoq lé tai kôlé, myit lêng é yubak dap sù rayuq é yanmai, Garai Gasâng é maumang lagyo pé hí má, gabú jowò dut rã nghut lhê.” gâ ri.

Byuq Byuq É Yuqzo

¹¹Yesuq xoq tai é gi, “Byù rayuq gi, yuqzo í yuq wó ri. ¹²Haú nhik mã é tiq sù yuq gi, yhâng wa lé, 'Áwa é, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byí kat ri.

¹³Hau htâng hkâ-myháng a myáng mã, yhangzo tiq sù yuq gi, sutzè banshoq hkyom yu chùng mù, mau we shut é luí, haú jowò mã, mingkan ngón hkyô châng é má yhang wó é ngunzè banshoq lé langsa pyám bê. ¹⁴Haú su kut ngunzè wó mi-wó lé ban langsa pyám é htâng mã, haú mau mã mutmó gyo é yanmai, yhang gi, asho awui dut lo nyi bê nghut ri. ¹⁵Haú mù, haú mau mã é byù rayuq chyáng, langchyáng é kut le, haú yuq gi, yhang lé waq rém jang shut nhang kat mù, waq lé lhom zúng nhang ri. ¹⁶Haú hkûn, yhang gi, waq jùm zô é shigyang cham pé lé lhang, zo naú shoq dut kôlhang, ó yuq le a byi zo kó nghut ri.

¹⁷Haú mù, yhang myit bün lo é gi, 'Ngá wã chyáng nyi é langchyâng pé gi, agùn agó myàng zô nyi kó rã nghut lhê. Nghut kôlhang, ngò gi, shí jowò mã, zo mut wuishit é eq shi ló rã dut bê.

¹⁸ Ahkuí, ngò toq mù, ngá wá chyáng taú ló luí, “Áwa ê, ngò gi, Garai Gasang lé le, nang lé le, shut bê. ¹⁹ Ahkuí mai ngò gi, nung zo nghú rã a gíng lo, hau é yanmai, náng é langchyáng rayuq dōng za ngo lé nyi nhâng laq.” nghú luí, ló taí rã. ²⁰ Hau htâng, yhang toq luí, yhâng wá chyáng ló le, yhang we we má ru nghut ashí hkún mai, yhâng wa gi, yhang lé lhom myàng jáng, wú shogyo luí, din ê mù, yhangzô é lingzing má ê po pyik dap to luí, bopuq puq byí ri.

²¹ Háu hkún, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghú rã a gíng lo.' ga luí, yhâng wa lé dūng tông-bán ri.

²² Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyí má le hkyí-tsung tsung byi keq. ²³ Tsô myum tô é nojūng zo le yu sat keq. Háu mù, nga-nhúng gi, zoshuq poí kut mù chòm ngón sháng. ²⁴ Háu mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Háu mù, yhangmoq gi, ngón ngón zo shuq ló bekô.

²⁵ Háu u lé, yhangzo ko sū yuq kúm gi, yò má nyi tô ri. Yhang gi, yò mai yhúm shut jé lo nyi é hkún, zing út bat luí gó nyi é htê lé lò wó gyô ri. ²⁶ Háu mù, langchyáng rayuq lé wut yù luí, háu hkyô lé yhang myí wú le, ²⁷ langchyáng háu gi, 'Nung gu dum taú jé lô bê. Háu mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojūng zo lé sat bê nghut ri.' ga taí kyô ri.

²⁸ Dang háu lé wó gyo jáng, yhang gi, gyô nhik-yo luí, yhúmhmaú shut a wàng lo kut ri. Háu mù, yhâng wa htoq ê luí, yhang lé ê chyuuq ri. ²⁹ Yhangzo kúm gi, 'Wú aq, ngò, shí-myháng shílo náng é jùn

dōng kut luí, hkâ-nhám le náng dang lé a lu laí wú. Nghut kôhang, ngò ngá é luzúm wuí eq ngón kún rã matú, bainám zo radu háng radám le nàng a byi wú shi. ³⁰ Shiwa myhí pé eq zum yap wún luí, náng é sutzè lé lhoq pân pyâm é sù nung zo háu dum taú jé lô jáng kúm gi, tsô myum tô é nojūng zo lé, yhâng é matú nàng sat byi bu-nhung!' ga luí, yhâng wa lé tú taí ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijjoq banshoq gi, náng é chyat nghut lhê. ³² Nghut kôhang, shí nung gu gi, shi byuq é mai ahkuí dum duì bê; byuq byuq é mai le, dum myàng bê. Háu mù, gabú hpo nghut bê.' ga luí, yhang lé taí ri.” gâ ri.

Hpaqchyí Ge Dâ É Sùt Zum Sù

16 Yesuq, Yhâng é chángzô pé lé taí é gi, “Sahtê rayuq chyáng sùt zum sù rayuq nyi ri. Háu yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. ² Háu hkún, sahtê hpó gi, yhang lé wut yù mù, 'Nàng é hkyô lé ngò wó gyo bê. Háu gi, hkâsu lúh? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo rã a nghut lo.' ga taí ri.

³ Háu jáng, sùt zum sù gi, 'Ahkuí, ngò hkâsu kut lo rã lúh? Ngá é yhumsing gi, ngo lé sùt zum ayá mai lhoq hkyô pyám bê. Myi du myi hkop zo rã le ngò wum a bò; dung zo dung shuq rã le ngò hoq ri. ⁴ Ngo lé sùt zúm é ayá mai hkyô pyâm htâng má, supé ngo lé yhangmoq é yhúm má lhom hap yù rã matú, hkâsu kut rã hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyín dap tô é bang rayuq htâng rayuq lé wut yù mù, sâng-hí yuq lé, 'Ngá yhumsing hpô chyáng nàng chyín hkâ-myhó dap

tô l   l  ?' ga myi j  ng, ⁶ ha   yuq gi, 'X   rash   p  ng dap l  .' ga t   ta   ri.

Ha   j  ng, s  t zum s   gi, 'N  ng    jihp  n y   lu  , h  n z  ng m  , ngo x   p  ng kut k   to aq.' ga yhang l   ta   ri.

⁷ Dum rayuq l  , 'N  ng hk  -myh   dap t   l   l  ?' ga myi j  ng, ha   yuq gi, 'Sungs   rash   b  ng dap l  .' ga t   ta   ri. Sutzum s   gi, ha   yuq l  , 'N  ng    jihp  n m   shit x   b  ng kut k   to aq.' ga ta   ri.

⁸ Ha   a dingm  n    s  t zum s   l  , yhums  ng hp   gi, hpaqchy   ge da s   nghut ri ga hky  -  n ri. Ng   sh   l   ta      gi, mingkan zo wu   gi, yhangmoq    mingkan eq s  ng    hky   p   m  , maub   gung    yhangzo p  ^{  } htoq hpaqchy   je b   k      yanmai nghut l  . ⁹ Ha   m   lu  , Ng   nungmoq l   ta   kyo k  le, a tara    sutz   p     q buin  m ho ny   keq, ha   m  , sutz   ha   ht  m byuq j  ng, nungmoq l  , ahtum abyuq joq t      yh  m m  , lhom hap yu    hui k   r   nghut l  .

¹⁰ Tiq    m   m   w   lum    s      yuq nghut k  lhang, m   m   m   le w   l  m r   nghut l  . Tiq    m   m   lhum a zu      s      yuq nghut k  lhang, m   m   m   le lhumzui r   a nghut. ¹¹ Ha   m  , mingkan sutz   m   l  ng nungmoq l   a w   l  m k      nghut le gi, ha   tengm  n    sutz   l  , nungmoq chy  ng    yuq w   k  m ap byi r   l  ? ¹² Sup      sutz   m  , nungmoq l   a w   l  m k      nghut le gi, nungmoq s  ng   ng    sutz   l  , nungmoq chy  ng    yuq w   k  m ap byi r   l  ?

¹³ Dui-nh  ng zosh  ng    yuq nghut k  lhang, yhums  ng    yuq l   w   doja   r   a nghut. Hk  su m   g   le, yhang gi, rayuq l   a j   kut m  , rayuq l  , chyitdap r   nghut l  ; ha   a nghut j  ng, rayuq l   gi, lhumzui m  , rayuq l   gi, hpau a tap kut r   nghut l  . Nungmoq gi, Garai Gasang

l   le, ngunz   l   le, rad   d  m w   doja   k   r   a nghut." ga ta   ri.

¹⁴ Ng  n myoqnoq    Hparishe p   gi, dang ha   banshoq l   w   gyo k  j  ng, Yesuq l   wuizui kut py  m byi ak  .

¹⁵ Ha   m   lu  , Yesuq gi, yhangmoq l  , "Nungmoq gi, byu p   h   m   yhumsing g  ng l   yhums  ng dingm  n bang su kut shit mha      bang nghut ak  ; nghut k  lhang, Garai Gasang gi, nungmoq    i-myt unghka   l   s   s   nghut l  . By      h   m   hpaudap    p   gi, Garai Gas  ng    h   m   achauq achyut    nghut nyi ri.

¹⁶ Jep    tar  ^{  } eq myiqhto   p      dang, ahko ahk  ng w   t      ahky  ng gi, wui-myhup sar   Yohan j   l      buinyi j   shoq nghut b  . Ha   hky  ng mai gi, Garai Gas  ng    mingd  n hky   gab   dangl   l  , hko ky   nyi m  , yuq du jup gi, ha   hky   m   ht  ng chy  ng wang l   bum ak  .

¹⁷ Jep    tar   m      tiq dik    dangji eq myihkyet zo ralhum l   w   lhoq hten r   htoq, mauhk  ng eq myig  ng hten r   gi, je lu   r   nghut l  .

¹⁸ Dangk  , yhumsing    yhangmyi l   k  ng py  m m  , myiwe got   dum h  ng yu    s      yuq nghut k  le, su-myi l      s   nghut b  ; yhumsing    yhangl  ng eq gang b   myiwe l   h  ng yu    s   le, su-myi l      s   dut b   nghut ri." ga ta   ri.

Saht   Hp   Eq Lazaruq

¹⁹ Yesuq dum xoq ta      gi, "Rad  m l  , saht   rayuq gi, n      eq n  -nh  m    mebu wut m   lu  , nyi nyi bui bui zo ng  n shuq ng  n nyi ri. ²⁰ Yh  ng    hk  mdong m   gi, rag  ngd      jeq byi t      Lazaruq g      dung zo s   rayuq l  , l   nyhi t   ak  .

²¹ Ha   yuq gi, saht   w      sibo   mai gy      agy   aht  ng l  , w   z   nau nyi ri. Hkui p   le yh  ng    d  m p   m  , l   yoq byi nyi ak  .

^{  }16:8 Maub   gung    yhangz   p   ng      gi, Garai Gas  ng    yhangz   p   l   ta      nghut l  .

^{  }16:16 Jep    tar   g      gi, Garai Gasang, Mosheq mai nga-nh  ng l   byi t      tar   l   g   l  .

²²Htâng má, haû dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhûm pyám bekô nghut ri. ²³Sahtê wá gi, ngaraî ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri. ²⁴Haû mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haû mù, Lazaruq gi, yhâng é loqnyhui ù êq wui má tik yù mù, ngá é shô má wui ra-poq zo hkâl-háng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵Haû hkûn, Abraham gi, 'Ngá zo é, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bún nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê. ²⁶Haû mai gotú gi, shí mai nungmoq chyáng dap lé naû bang a wó dap shoq le, haû mai ngamoq chyáng ó a wó dap lé rá matú le, ngamoq eq nungmoq é gyoro má, nik dik é langhkung mó êq kyo pyám to bê nghut ri.' ga tû taí ri.

²⁷Sahtê wá gi, 'Áwa ê, haû nghut le gi, ngò, nang lé dúng nau ri. Ngá gû pé ngo yuq nyi ashí; yhangmoq le ísu hpuzô é jowò má a jé sháng gaq, ²⁸yhangmoq myit lhîng shoq ló taí pun rá matú, Lazaruq lé ngá wâ yhûm shut nhang kat byi laq ô!' ga luí, dúng wut ngau nyi ri.

²⁹Abraham gi, 'Yhangmoq chyáng, Mosheq eq myiqhtoí pé nyi lhê; haû bâng dang lé gyô yù kó sháng gaq.' ga taí ri.

³⁰Sahtê wá gi, 'Áwa Abraham ê, haû su a nghut. Shi byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit lhîng kó rá nghut lhê.' ga taí ri.

³¹Abraham gi, 'Mosheq eq myiqhtoí pé é dang lé yhangmoq a gyo kô é nghut

le gi, shi byuq é bang má é rayuq yuq dum dui toq ló mù, ló taí kyo kôlhâng, kâm gyo kó rá a nghut.' ga luí, yhang lé tû taí ri." gâ ri.

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

17 Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô rá za nghut lhê. Nghut kôlhâng, mara kut shut nhang é hkyô lé lhoq htoq é sù gi, dingnyé wó rá. ²Zoshâng shí bang má é rayuq lé, mara kut shut nhang é sù gi, yhâng é lingzing má luquí long mó tuí hut byi luí, wuimau má é dú hkyô pyám é hui é nghut le gi, yhang é matú je gè rá nghut lhê. ³Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mho-qshit aq; yhang myit lhîng é nghut le gi, yhang lé mara hkyut pyám byi aq. ⁴Ra-nyí má za, yhang nang lé nyhit dàm shut mù, 'Ngò myit lhîng bê.' ga luí, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

⁵Haû hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

⁶Haû jáng, Yhumsîng gi, "Nungmoq é lumjîng myit angshi cham í za hkâl-háng bò kô é nghut le gi, shí hangwâ gàm lé, 'Sikgâm ê, amyit eq roq bún luí, wuishuq lung-aú má, é yuq to aq ô.' gâ le, nungmoq é dang lé sikgâm haû gyo byi rá nghut lhê.

⁷Dangké, nungmoq má é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haû yohtung pá mai jé lo é hkûn, yhang lé, 'Hân zùng mù zang zo aq.' ga luí, ó yuq wá taí kó rá lhú? ⁸Haû dui-nhâng zoshâng lé sheq, 'Ngò zo rá myinzang

lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo rà nghut lhê.' ga luí, taí rà a nghut kó lhú? ⁹Taí mitaí banshoq lé, dui-nhâng zoshâng ban zui saí byí é nghut kôlhâng, yhang lé jeju bôn é dang ó yuq wá taí wú akô lhú? ¹⁰Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut rà é mù lé za lhoq pân é bang nghut lhê.' nghú taí keq." ga taí ri.

Manggâm Dap Bang Raxê Yuq Lé, Yesuq Lhoq Gê Byí É Hkyô

¹¹Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai laí e ló ri. ¹²Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, ¹³"Yesuq, Zau ê, ngamoq lé shogyô yù laq ô." ga luí, wut garú bum akô.

¹⁴Yesuq gi, yhangmoq lé myàng jáng, "Nungmoq é gungdu lé, hkyangjông pê chyáng ló tûn shit keq." ga yhangmoq lé taí ri. Yhangmoq gi, hkyô má ru sô nyi ashí le lháng, sân-yúng ló byuq bekô.

¹⁵Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taú ê mù, htê mó èq Garai Gasang lé hkya-ôn é eq, ¹⁶Yesuq é hkyí wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.

¹⁷Haú mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô? ¹⁸Shí tûngbàu rayuq mai lai luí, dum taú lé mù Garai Gasang lé hkya-ôn é byù, rayuq le a nyi lo kó lhú?" ga taí ri. ¹⁹Hau htâng, Yesuq gi, haú yuq lé, "Toq mù ló aq, náng é lumjínng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰Radàm lé, Hparishe pé gi, Garai Gasâng é mingdán hkâ-nhám jé rà hkyô, Yesuq lé myí akô. Haú jáng, Yesuq gi, "Garai Gasâng é mingdán jé lé rà gi, myoq èq wú luí myàng rà a nghut. ²¹Garai Gasâng é mingdán gi, nungmoq yuq jup é ahkaú má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó rà a nghut." ga luí, yhangmoq lé tû taí ri.

²²Chángzô pé lé le Yesuq taí é gi, "Haú Byu Yhangzô é buinyi ra-nyí lé, nungmoq myàng nau dik é ahkýing jé rà. Nghut kôlhâng, nungmoq gi, Byu Yhangzo lé wó myàng kó rà a nghut.

²³Haú buinyi má, byu pé gi, nungmoq lé, 'Yhang shí má nyi ri.' haú a nghut jáng, 'Yhang hê má nyi ri.' ga taí kó rà nghut lhê. Nghut kôlhâng, hkâ-ê; hkâcháng kó.

²⁴Hkâsu mù gâ le, maumyí rahkyam má hpyat é maulhap gi, maumyí gó hkyam jé shoq duqbó é su, haú Byu Yhangzo dum jé lé é buinyi má le dut rà nghut lhê. ²⁵Nghut kôlhâng, haú su a dut htoq shimá, Yhang gi, zing-rí é myo myo lé le, ipyat shi mâ é byu pé èq he-ngik pyâm é lé le, hui shirâ nghut lhê.

²⁶Noaq é tsín pyat má dut é su, haú Byu Yhangzo jé lé é buinyi má le dut rà nghut lhê. ²⁷Byu pé gi, Noaq, wui-sanghpo mó hkaú má wang é hkûn jé shoq, zo zo shuq shuq, myi byi myi yú, myiháng kut luí, nyi nyi bum akô. Haú hkûn, dowuí dínng lô mù, yhangmoq banshoq lé lo lhoq htên pyám bê nghut ri.

²⁸Haú eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhúm kut luí nyi nyi akô. ²⁹Nghut kôlhâng, Sodom wà mai Lot htoq ló é buinyi má, mauhkúng mai, myi eq hang gi, mau su wò gyó lô luí,

lhunglháng lé lhoq htên pyám bê nghut ri.

³⁰Haû Byu Yhangzo, lé htoq shit é buinyì má le, haû eq rajung za dut râ nghut lhê. ³¹Haû buinyì má, yhumhkûng^{¶¶} htoq má nyi tô é sù gi, yhúmkaû má é zè lé, a ló gyó wang yù lo sháng gaq. Yò má nyi tô é sù gi, haû eq rajung za, yhúm shut a taû ló lo sháng gaq. ³²Lot é yhangmyi^{§§} lé bûn nyi keq. ³³Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. ³⁴Ngò, nungmoq lé taí kyo kôlé, haû myîn lé, yhupjang ralhúm má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lhê. ³⁵Myiwe í yuq luí má rahá za chô m luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê. ³⁶Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê.” gâ ri.

³⁷Haû hkûn, chángzô pé gi, “Yhumsing Yesuq ê, haû gi, hká gyo má dut râ lhú?” ga luí, Yesuq lé myi kôjáng, Yhang gi, “Màng leq é jang má, langdâ pé, lé zîng bùm râ nghut lhê.” ga luí, yhangmoq lé tû taí ri.

Chuimó Myhí Eq Tarâ Agyi É Hkyô Lé Dangtú Yù É Hkyô

18 Yesuq, Yhâng é chángzô pé lé, myit wum a gyuí é za, hkâ-nhám le kyûdûng nyi râ hkyô lé, dangtú dông mhoqshit é gi, ²“Wà rawà má, Garai Gasang lé le a gyuq hoq, byù lé le haí su a ngàm é tarâ agyì rayuq nyi ri. ³Haû wâ má chuimó myhí rayuq le nyi ri. Yhang gi, haû tarâ agyì wá chyáng ê luí, 'Ngò eq amù htoq sù lé, yhâng é mara eq ra-

jung za, jéyáng byi laq.' ga luí, ê dum taí taí kut nyi ri.

⁴Nghut kôlhang, tarâ agyì wá gi, ahkyíng rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amù lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haû mù, ngò yhâng é amù lé jéyáng byi rà.' ga, yhâng é unghkaû má myit yu ri.” gâ ri.

⁶Haû mù luí, Yhumsing Yesuq gi, “A ding a mán é tarâ agyì wá taí é dang mai mhoq yù keq. ⁷Garai Gasang gi, Yhang lé nyí myín wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lhú? ⁸Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haû Byu Yhangzo jé lé é buinyì má, lumjîng hkyô lé gi, mingkan htoq má myang wú shirâ lhú?” ga taí ri.

Hparishe Eq Kang Guq Sù Kyûdûng É Hkyô

⁹Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi, ¹⁰“Byù í yuq kyûdûng kó râ ga, noqkuq yhúm má doq e akò. Rayuq gi, Hparishe, rayuq gi, kang guq sù nghut ri. ¹¹Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! ¹²Ngò gi, rabat má zoshuq í dâm gám nyi lhê; ngò wó yu é gû má é xê gambùm

^{¶¶}17:31 Yudaq byu pè é yhumhkûng gi, rá é nghut lhê mù, nyi kún jang kut akò.

^{§§}17:32 Lot é yhangmyi gi, Sodom wâ shut dum taû lhing wú é yanmai, Garai Gasang lhoq hten pyâm é hui sù nghut lhê.

ragambùm le kat nyi lhê.' ga luí, yhang baú yhang gotú kut dúng nyi ri.

¹³Kang guq sù kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ô!' ga dúng ri.

¹⁴Ngò, nungmoq lé taí kôlé, kang guq sù kúm gi, Garai Gasâng é hí má mara hkyut san byí é lé wó yú luí, yhùm shut dum taú ló bê; nghut kôlháng, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui rá nghut lhê; yhumsing gùng lé lhoq nyhum é sù kúm gi, waq toq é hui rá nghut lhê." ga taí ri.

Zoshâng Wuí Lé Yesuq Shimân Byí É Hkyô

Mht 19:13-15; Mrk 10:13-16

¹⁵Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkùm akô nghut ri. ¹⁶Nghut kôlháng, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhangmoq lé hkâhkùm zing to kó; hkâsu mù gâ le, Garai Gasâng é mingdán gi, haú sù é bâng é mingdán ru nghut lhê. ¹⁷Ngò, nungmoq lé teng za taí kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haú má gè gè yhang wó wàng rá a nghut." ga taí ri.

Ayá Wó É Sahtê Hpô

Mht 19:16-30; Mrk 10:17-31

¹⁸Ayá wó é byù rayuq le, Yesuq lé, "Ge é Sará ê, ahtum abyuq é asak wó yú rá matú, ngò haí kut ra rá lú?" ga myí ri.

¹⁹Yesuq gi, "Haí mù, Ngo lé ge é Sará nghu lhê lú? Garai Gasang mai lai luí,

ge é ó yuq le a nyi. ²⁰Jep é tarâ má, 'Summy sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.ⁱ gâ é dang pé lé, nàng sé gú bê." ga luí, yhang lé tú taí ri.

²¹Haú yuq gi, "Haú pé banshoq lé, ngò, zoshâng hkùn mai cháng bê nghut lhê." ga taí ri.

²²Yesuq gi, dang haú lé wó gyo jáng, "Nàng kut rá rajung rá tô ashí; nàng wó miwó lé úng pyám luí, myùng bang lé byí pyám aq; haú jáng, nàng, mauhkúng htoq má sutzè wó rá nghut lhê; haú mù, Ngá htàng lé cháng aq." ga luí, yhang lé taí ri.

²³Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

²⁴Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng rá matú, haú-í yhang wuí ri-nhung! ²⁵Sutzè wó sù rayuq, Garai Gasâng é mingdán má wó wàng rá htoq, gola-uq radu âpno mai wó wang lai rá gi, je lui rá nghut lhê." ga taí ri.

²⁶Dang haú lé wó gyô é bang gi, "Haú su ru nghut le gi, ó yuq za hkyi yu é hui rá nghut lhê lú?" ga myí bum akô nghut ri.

²⁷Haú hkùn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

²⁸Haú hkùn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htàng cháng bê nghut lhê." ga taí jáng,

²⁹Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhùm, yhumsing é yhangmyi, yhumsing é âgu âmang, yhumsing é ìnu îwa, yhumsing é yhangzô pé lé, pyâm to sù ó yuq nghut kôle, ³⁰shí pyat má, akyù myo myo wó hkam yù rá htoq agó, htang pyat má le,

ⁱ18:20 Htoq Ló 20:12-16

ahtum abyuq é asak a wó yu é gi, a nyi râ nghut lhê.” ga luí, yhangmoq lé taí ri.

**Yesuq, Yhang Shí Hkám Râ
Lé Dum Taí É Hkyô**

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotú kut wut yù mù, “Gyô wú keq, nga-nhúng gi, Yerusalem wà mó shut doq lô nyi é nghut lhê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lhê. ³² Hkâsu mù gà le, Byu Yhangzo gi, tungbaú pé é loq má ap pyâm é hui luí, haú bâng èq Yhang lé, wuizui kut pyâm é, rhoi rip e, sôkan byé gyûn é, nhuq bat é kut yù mù, sat pyám kó râ nghut lhê. ³³ Hau htâng sum nyi nghû râ buinyi má, Yhang gi, dum dui toq lô râ nghut lhê.” ga luí, yhangmoq lé taí ri.

³⁴ Lagyo pé gi, dang haú pé rahkun lé lhang a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

**Dung Zo É Myoqjit Sû Lé, Yesuq,
Myoq Dum Myàng Nhang É Hkyô**

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô laí lô é htê lé wó gyo jáng, haú haí dut nyi é hkyô lé, myi kat ri. ³⁷ Haú hkûn, yhangmoq gi, “Nazaret wà byù Yesuq laí lô ri.” ga luí, yhang lé taí kyo akô.

³⁸ Haú su gà é lé wó gyo jáng, yhang gi, “Dawiq é Yhangzo Yesuq ê, ngo lé shogyo yù laq ô!” ga wut dúng kat ri.

³⁹ Hí má laí lô é bang gi, zim za nyi râ matú yhang lé tân hkûm akô; nghut kôlhang, yhang gi, “Dawiq é Yhangzo ê, ngo lé shogyo yù laq ô!” ga, je riyhang htê mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô

nhang kat ri. Myoqjit sù Yhâng nàm má jé lé jáng, Yesuq gi, ⁴¹ “Ngò, nàng lé haí kut byi râ ô nau ri lhú?” ga, yhang lé myi kat ri.

Haú yuq gi, “Yhumsíng ê, ngò myoq myàng nau ri.” ga tú taí ri.

⁴² Hau hkûn, Yesuq gi, “Náng myoq myàng sháng gaq! Náng é lumjínng myit gi, nang lé lhoq gê byi bê nghut ri.” ga, yhang lé taí ri. ⁴³ Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

Yesuq Eq Zake

19 Yesuq gi, Yerihko wà má wàng mù, sô laí lô nyi ri. ² Haú hkûn, haú wà má, Zake gà é kang guq agyi rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng naù kôlhang, nyhùm sù nghut é htoq agó, byù rajùm rayò chyín chyap tô é yanmai, a wó myàng nghut ri. ⁴ Haú mù, yhang gi, Yesuq lé wó myàng shoq ga, Yesuq laí lô râ hkyô hí shut din ê mù, hkohúm gâm htoq má é doq zung tô ri.

⁵ Yesuq gi, haú jowò má jé jáng, tu wú kat luí, “Zake ê, hân gyó lô aq; hkû-nyi ngò náng yhùm má bíng râ nghut lhê.” ga taí ri. ⁶ Haú jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, “Yhang gi, yubak dap sù rayuq chyáng bíng kut râ ga wang e lô bê.” ga luí, mara hún dang taí nyi bum akô.

⁸ Zake kúm gi, toq yap mù, “Yhumsíng Yesuq ê, ngò wó é sutzè rawuí gû myùng bang lé gàm byí pyám râ; ngò záng mop zô pyâm é byù rayuq yuq nyi le gi, myi tú dum tau byi râ.” ga Yhumsíng Yesuq lé taí ri.

⁹Haú hkûn, Yesuq gi, “Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê.” ga luí, Zake lé taí ri.

**Hkohkam É Dui-nhâng
Zoshâng Raxê Yuq**

Mht 25:14-30

¹¹Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhûm dông dum taí jat é gi, ¹²“Aróng wó sù byù rayuq gi, hkohkâm ayá ê hkam yù luí, dum taú lò râ ga, wê é ming shut ê râ matú hen nyi ri. ¹³Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴Yhâng é mingbyù wuì kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô nau.' ga luí, ê taí râ matú lagyo châng nhang kat akò.

¹⁵Nghut kôlhâng, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wuì lé, hpugá gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

¹⁶Haú hkûn, sâng-hî yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhâng wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shí nghut lhê. ²¹Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²²Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhîng, ²³ngá ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lúhú?' ga yhang lé taí ri.

²⁴Hau htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵Haú bang gi, 'Yhumsîng ê, yhang gi, raxê joí wó to bê lé nhîng.' ga akò.

²⁶Haú jáng, yhang gi, 'Ngò, nungmoq lé taí kôlé, wó sú† ó yuq le, jat byí é hui shirâ nghut lhê; a wó su chyáng mai kúm gi, yhang wó tô é lé lhâng, yu pyám byi shirâ nghut lhê. ²⁷Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí

*19:9 Abraham é yhangzo nghut é lichyúm gi, Abraham su Garai Gasang lé lumjîng é sù lé gâ lhê.

†19:26 Wó sú nghu é gi, yhumsîng a-tsam lé rago dat chúng sù lé taí é nghut lhê.

má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mà é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mà é wà má ê keq; wà haú má wang é hkûn jáng, ó le a jí wú shí é logúng zo tuí tô lánng é lé, ê myàng kó rã nghut lhê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsing rã ri gâ.' nghú tũ taí keq." ga pyíng luí, nhang kat ri.

³² Nhang kat é sũ nhik ê jé lé, Yesuq taí kat é dõng yang, dut to lánng é lé ê myang akô. ³³ Yhangnhik logúng zo haú lé hpyi nyi kô é hkûn, yhumsing wuì gi, "Haú logúng zo lé, haí mù hpyi nyi akô lhú?" ga luí, yangnhik lé myí akô.

³⁴ Haú jáng, yangnhik gi, "Shí du lé haú Yhumsing rã ri gâ." ga taí akô.

³⁵ Yangnhik gi, haú logúng zo lé Yesuq chyáng she lò mù, yangmoq é buhíng pé lé logúng ahtoq má buí luí, Yesuq lé doq ji nhang akô. ³⁶ Haú su kut, Yang ji e ló nyi le, byu pé gi, yangmoq é buhíng pé lé hkyô má hkang byí akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yangmoq myang é laklaí kumlhá pê é yanmai, gabú myit mai hté mó o mó èq Garai Gasang lé hkya-on kô é dang gi,

³⁸ "Haú Yhumsing é myíng mai jé lé lo é hkohkâm gi, hkungsô wó nyí sháng gaq ô!^l Mauhkûng htoq má, ngu-ingón nyí sháng gaq ô!

Htoq tsáng myhâng má, Garai Gasang gi, hpungwup shing kang bo nyí sháng gaq ô!" gâ akô.

³⁹ Haú mù luí, haú byù hpûng hkaú má bo é Hparishe pé ra-am gi, "Sará ê, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kólé, shí bang zim za nyí kó é nghut le gi, luqgok pé garú lô rã nghut lhê." ga tũ taí ri.

⁴¹ Ahkuí, Yesuq, Yerusalem wà mó eq chyáng lò luí, wà mó haú lé myàng jáng, haú wà mó é matú ngaù mù, taí é gi, ⁴² "Wà nàng ê! Hkû-nyí lhê é buinyi má, nguingón é hkyô lé nàng bûn sé tô é nghut le gi, gè rã wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhíng hkyuq mai nang lé lom tô é buinyi jé lô rã nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yang dũn nhê pyet sat pyám bekô rã; nàng gi, luqgok racham htoq má racham lháng a kê lhum loshoq, dut byuq rã nghut lhê." gâ ri.

Yesuq, Noqkuq Yhûm Lé Sêng Pyám É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyúdung yhûm dut rã nghut lhê.^k ga kâ to kôlháng, ⁴⁶ nungmoq gi, jowò shí lé 'damaq hkyûng'^l kut akô." ga taí uchyang, hkat htoq pyám ri.

⁴⁷ Yang gi, nyí wuì noqkuq yhûm má mhoqshit nyi ri. Hkyangjong agyí pé,

tarâ sará pé eq, byu pé é suwún wuí kúm gi, Yhang lé wó sat pyám râ hkyô ho nyi akô. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

**Yesuq É Ahko Ahkáng Lé Myí
Chyam Wú É Hkyô**

Mht 21:23-27; Mrk 11:27-33

20 Ra-nyí lé, Yesuq gi, noqkuq yhùm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuí eq rahá kut, Yhâng chyáng lé jé kômù, ² “Hai ahko ahkâng èq Nàng shí pé lé kut nyi lhê lú? Ahko ahkáng shí, Nang lé ó yuq byí é lú? Ng-amoq lé taí kyô wú aq.” ga Yhang lé myí akô.

³ Haú hkûn, Yhang gi, “Ngò le, nungmoq lé rajung myí wú kôlé; ⁴ Yohan byí é bapisma gi, mauhkûng mai lú? A nghut jáng, byu chyáng mai lú? Ngo lé taí kyô wú keq?” ga yhangmoq lé myí ri.

⁵ Haú hkûn, yhangmoq chôm hpyê lhum kô é gi, “Mauhkûng mai nghut lhê.’, nghú nga-nhúng taí jáng le, ‘Haí mù, yhang lé a lumjínng kô é lú?’ ga râ nghut; ⁶ ‘Byu chyáng mai nghut lhê.’ nghú jáng le, shiwa byù banshoq gi, Yohan lé, myiqhtoi rayuq ga lumjínng to kô é yanmai, yhangmoq, nga-nhúng lé luqgok èq dú sat kó râ nghut.” ga akô.

⁷ Haú mù, yhangmoq gi, “Hkâmai nghut é lé, ngamoq a sé.” ga tû taí akô.

⁸ Yesuq gi, “Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo.” ga, yhangmoq lé taí ri.

**Tsibiyiq Hkyâm Yhumsîng Eq
Hkyâm Saí Zo Bang**

Mht 21:3-46; Mrk 12:1-12

⁹ Byu pé lé, Yesuq dangtú dông xoq taí kyô é gi, “Byù rayuq gi, tsibiyiq

hkyâm ralhüm saí to mù, hkyâm saí zo bang chyáng ngho byí to luí, gó ming shut myáng myáng é nyi byuq ri. ¹⁰ Kyôshu yoq jé jáng, yhang gi, hkyâm saí zo bang èq, hkyâm mâ é tsi-biyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô. ¹¹ Gotù dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô. ¹² Sum yuq nghú râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, ‘Ngò hkâsu kut wú râ lú? Ngò chyt-dap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.’ ga taí ri.

¹⁴ Hkyâm saí zo bang gi, yhumsîng hpô é yhangzo lé myàng kôjáng, ‘Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yú shoq, yhang lé sat pyám sháng.’ ga rayuq eq rayuq taí lhum bum akô. ¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lú? ¹⁶ Yhang gi, é mù, haú hkyâm saí zo bang lé sat pyám luí, hkyâm haú lé góbang lé htot ngho byí pyám râ nghut lhê.” gâ ri.

Dang haú lé wó gyo bang gi, “Haú su gi, hkâ-nhám le a dut sháng gaq ô!” gâ akô.

¹⁷ Hau htâng, Yesuq gi, yhangmoq lé byu wú luí, “Haú jáng gi,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.^m

ga Chyúmdang má kâ tô é gi, haí gá nau é nghut lhê lhú? ¹⁸ Luqgok[‡] haú má gyó záng é sù ó yuq nghut kôle, gyuí gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kô é yanmai, haú hkûn jáng lhang Yhang lé chyup yû râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myí É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri.

²¹ Haú jowú bang gi, "Sarâ ê, nang gi, dǐng dǐng mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dǒng mhoqshit é sù nghut é lé, ngamoq sê lhê. ²² Hkoséng Kehtaq lé, ngamoq kang kat râ gi, tarâ wang lhê lhú? A wang é lhú?" ga luí, Yhang lé myí wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tǔn shit wú keq. Ó yuq é alhò eq masat laiká dap tô ri lhú?" ga myi jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pê hí má, Yhâng é dang má mara a wó ho myang é eq, Yhang tǔ taí é dǎng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myí É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byí ri. ²⁹ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahká yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Lô htáng má, myiwe myhí haú le châng shi ló byuq bê nghut ri. ³³ Haú mù luí, haú dum dui toq é buinyí má, myiwe myhí haú gi, haú nhiktâng wui mâ é hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myí wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yú kut nyi bum akô. ³⁵ Shi é mai dum dui toq râ eq, haú pyat má nyi râ gǐng bâng é matú gi, ikun kut é eq myi byi myi yú hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shí lo kô râ nghut lhê. Yhang-

[‡]20:18 Luqgok nghu é gi, Yesuq lé taí ri.

^m20:17 Hkya-on 118:22

moq gi, dum dui toq lô su é yhangzô pé⁴¹ nghut é yanmai, Garai Gasâng é yhangzô pé nghut bekô. ³⁷Haû nyé duq nyi é mhanpúng eq séng luí, Mosheq èq kâ tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.ⁿ ga bo tô é yanmai, shi é bang dum dui toq lô râ hkyô lé tân shit to bê nghut ri. ³⁸Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô.” ga yhangmoq lé tâ taí ri.

³⁹Haû hkûn, tarâ sará pé ra-am gi, “Sarâ ê, nàng taí é jô ri.” ga akô. ⁴⁰Haû mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹Hau htâng, Yesuq gi, yhangmoq lé, “Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lhú? ⁴²⁻⁴³Dawiq yhang yhang lháng gi, Hkya-on Kungtôn Laiká má, 'Haû Yhumsíng Garai gi, ngá é Yhumsíng lé, “Ngò, náng é gyè pé lé, náng é hkyí nang tanghkuq kut pyám byí é hkyíng jé shoq, Ngá é loqyo hkyam[§] shut zung nyi shi aq.” gâ ri.^o ga kâ tô ri. ⁴⁴Haû mù, Dawiq yhang lháng, Hkrisduq lé, Yhumsíng gâ é nghut le gi, Hkrisduq gi, yhangzo za hkâsu ge nghut râ lhú?” ga taí ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵Byù banshoq gyô nyi é u lé, Yesuq, Yhâng é chángzô pé lé taí é gi, ⁴⁶“Tarâ sará pé lé sidiq nyi keq. Yhangmoq gi, réng é buhíng wut chùng mù, sô yông wún luí, gâi pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi bum akô. ⁴⁷Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyú híng híng dúng shit mhaû é bang nghut akô. Haû sù é bang gi, je riyhang htan é dông dam byí é hui zo kó râ nghut lhê.” gâ ri.

Chuimó Myhí Kat É Alu

Mrk 12:41-44

21 Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ²Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. ³Haû mù, Yhang gi, “Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴Hkâsu mù gâ le, haû góbang banshoq gi, yhumsíng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri.” ga taí ri.

Ló Htûm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm

⁴¹20:36 Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê.

[§]20:42-43 Loqyo hkyam nghu é gi, ahko ahkáng wó é jowò nghut lhê.

ⁿ20:37 Htoq Ló 3:6 ^o20:42-43 Hkya-on 110:1

kôjáng, Yesuq gi, ⁶“Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyi jé râ nghut lhê.” ga tai ri.

⁷Haû su ga jáng, yhangmoq gi, “Sarâ ê, haû nghut le gi, haû hkyô pé gi, hkâ-nhâm dut lô râ lhu? Haû dut râ chyâng lò jáng, hkasû é kumlhá htoq lô râ nghut lhê lhu?” ga, Yhang lé myi akô.

⁸Haû hkûn, Yhang gi, “Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé láng é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htâng hkâcháng kó. ⁹Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haû hkyô pé hí dut lò râ nghut lhê. Nghut kôlhang, lô htâng é buinyi gi, haû hkûn jáng dut râ a nghut shi.” ga tai ri.

¹⁰Hau htâng, Yhang, yhangmoq lé dum tai é gi, “Ra-myû eq ra-myû, mingdán ralhüm eq ralhüm majan zân lhum lò kó râ nghut lhê. ¹¹Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lò râ nghut lhê.

¹²Nghut kôlhang, haû hkyô banshoq a dut shimá, Ngá myíng é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyâm kó râ nghut lhê, hau htoq agó, nungmoq gi, hkohkam pé eq zau pê chyáng ê ap byi é le, hui kó râ nghut lhê. ¹³Haû su é pé mai, nungmoq gi, ngò eq séng luí, saksé wó hkám râ hkyô htoq lô berâ nghut lhê. ¹⁴Nghut kôlhang, hkâsu nghû lhom tú tai râ hkyô lé, hí mai a myit wui nyi râ lé, nungmoq myit hpyit to

keq. ¹⁵Hkâsu mù gâ le, nungmoq é gye pé lhunglhang bang, haí le a wó lhom tú tai loshoq, ngò, nungmoq lé dang eq hpaqchyí byi râ nghut lhê. ¹⁶Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui èq lhang, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lhang, sat pyâm kó râ nghut lhê. ¹⁷Byù lhunglhang bang gi, Ngá é yanmai, nungmoq lé a nguì kut kó râ nghut lhê. ¹⁸Nghut kôlhang, nungmoq é xâm rahkat lhang wó htên byuq râ a nghut. ¹⁹Nungmoq gi, wó jân é hkyô mai, asak lé wó yû kó râ nghut lhê.

²⁰Yerusalem wà mó lé gye hpúng mó èq lóm tô é lé, nungmoq myàng jáng, wà mó haû htên byuq râ ahkyíng chyâng lò bê lé, bûn sê nyi keq. ²¹Haû hkûn lé, Yuda mau má nyi é bang gi, bùm pé shut hpang doq lô kó sháng gaq; haû wà hkaû má nyi é bang le, hpang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²²Hkâsu mù gâ le, Chyúmdang má kê to má kê to banshoq dik lò râ matú, buinyi haû pé gi, mara dam byi é buinyi pé dut râ nghut lhê. ²³Haû buinyi pé má, zogûng dut é myiwe wui eq naú huq ashî nghut é înu wui gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyû ahtoq má Garai Gasang nhikmó-yô é jé lô râ nghut lhê.

²⁴Yhangmoq gi, shâm lham èq sat pyâm hui lhê eq, ming hkang ming mó má chyup shuí lô é le hui kó râ nghut lhê. Tûngbau pé lé byi tô é buinyi ahkyíng htâng shoq, Yerusalem wà mó gi, tûngbau pé èq nâng zik tô é hui râ nghut lhê.

²⁵Haû hkûn, bui, kyí, lhamó pé má, kumlhá htoq shit râ nghut lhê. Wuishuq lung-aû mâ é wuîlheng pé é mying é htê mó é yanmai, myigùng htoq má, byù myû chângjup gi, hkâsu kut râ a

**21:18 Shí má gi, asak woi-nyí a shí râ hkyô lé tai é nghut lhê.

sé loshoq maú é eq myit wui myit hkê é hui bekô râ nghut lhê. ²⁶Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq lô bùm kô râ nghut lhê; hkâsu mù gà le, mauhkúng mâ é wum-o a-tsam pé gi, lhoq nhùn é huí bùm kô râ nghut lhê. ²⁷Haú hkùn, haú Byu Yhangzo gi, mhut ji mù, hpungwup a-tsam mó eq le, hpungwup shíngkang mó eq le, gyó lé lo é lé, yhangmoq byu-myàng kô râ nghut lhê. ²⁸Haú hkyô pé dut hi lò jáng, ulhum tû mù wú kat keq, hkâsu mù gà le, nungmoq lé hkyi yù râ buinyi gi, chyàng lò bé nghut ri.” gà ri.

²⁹Yhang, yhangmoq lé dangtú dông xoq taí é gi, “Maihpáng gâm eq siggâm banshoq lé wú wú keq. ³⁰Sikbu nyún lo é lé myàng jáng, bui nyé nám chyàng lò bê ga luí, nungmoq yhang dat wú sê akô. ³¹Haú eq rajung za, haú hkyô pé dut nyi é lé, nungmoq myàng kôjáng, Garai Gasàng é mingdán gi, chyàng bê nghut é hkyô lé, nungmoq sé lo keq.

³²Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³³Mauhkúng eq myigùng gi, a joq lo dut byuq râ nghut lhê; nghut kôlháng, Ngá é dang gi, ru joq nyi râ nghut lhê.

³⁴“Nghut kôlháng, zo myo shuq myô é, í shuq wut é, mingkan htoq mâ é myit wui myit hkê é pé èq, nungmoq é i-myit wò láf nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidíq nyi keq. ³⁵Hkâsu mù gà le, buinyi haú gi, mingkan htoq má nyi é byù banshoq bâng é ahtoq má, haú su jé lô râ nghut lhê. ³⁶Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkyíng hkangmó má machya nyi keq.” gà ri.

³⁷Yesuq gi, nyi wuí noqkuq yhùm má mhoqshit nyi luí, myìn wuí Tsanlun Bùm gà é bùm shut htoq ê mù, ê nyi to to kut ri. ³⁸Byù banshoq bang gi, Yhang mhoqshit é dang gyo râ ga, napsún noq noq mai noqkuq yhùm má jé lé bum akô nghut ri.

Yesuq Lé, Yudaq Èq Ung Zô É Hkyô

Mht 26:1-5, 14, 16; Mrk 14:1-2, 10-11; Yhn 11:45-53

22 Ahkuí, Lhoqlhai Poí gà é Azuma (múnchi a kat é Muk Zo Poí) jé râ chyàng lò bê. ²Haú mù, hkyangjong agyi pé eq tará sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gà le, yhangmoq gi, mingbyú wui lé gyuq bùm kô é yanmai nghut ri. ³Haú hkùn, lagyo raxe í yuq má bo é Iskarut gà é Yudaq chyáng Tsadán wàng mù luí, ⁴yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhùm zúng é gyezau pé eq, ê hpyê ri. ⁵Haú mù, yhangmoq gi, gyô nguí luí, Yudaq lé ngùn byi râ hkyô myit hui bekô. ⁶Yudaq le hap yù luí, byù hpúng má a nghut é hkùn, Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷Ahkuí, haú Lhoqlhai Poí mâ é sauzo shigu hkungga sat nhông byi râ é Azuma buinyi jé bê. ⁸Haú hkùn, Yesuq gi, Petruq eq Yohan lé, “Nga-nhúng zo râ matú Lhoqlhai Poí ê món láng keq.” ga luí, nhang kat ri.

⁹Haú nhik gi, “Hkâmá ê món to nhâng nau ri lúh?” ga luí, Yhang lé myí akô.

¹⁰Haú hkùn, Yesuq gi, “Nungnhik, myuq hkaú shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhùm má châng wàng mù, ¹¹yhumsíng lé, Ngò Ngá é chángzô pé eq

rahá, Lhoqlhai Poí zo râ bíng wap hkâmá nghut lhê lúh ga, Sará myí nhang kat ri.¹ nghũ táí keq. ¹²Haú hkûn, hen tô é ah-toq mâ é wap mó lé, nungnhik lé lhom tûn shit râ nghut lhê; wap haú má é món to keq.” ga taí kat ri.

¹³Haú chángzo nhik htoq e ló le, Yesuq taí kat é eq roq za é myâng kômù, Lhoqlhai Poí lé món to bekô nghut ri.

Yhumsing É Myinzang

¹⁴Ahkuí, ahkýng jé jáng, Yesuq eq Yhâng é chángzô pé rahá za zohpoq má zung tô akô. ¹⁵Haú hkûn, Yesuq gi, “Ngò wúhke jamjau hpuzô é a hui shi má, Lhoqlhai Poí shí lé nungmoq eq rahá zo râ lé, Ngò gyai ô nau nyi lhê. ¹⁶Hkâsu mù gâ le, ngò, nungmoq lé taí kôlé, Garai Gasâng é mingdán má poí shí a ló dik dik gi, ngò haú lé dum zo râ a nghut ló.” ga luí, yhangmoq lé taí ri.

¹⁷Hau htâng, Yesuq gi, góm lé yù mù jeju ban hkya-on jáng, “Góm shí lé yù luí, nungmoq yhangchang gàm shuq lhum keq. ¹⁸Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo.” ga taí ri.

¹⁹Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, “Shí gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shí su kut nyí keq.” ga taí ri.

²⁰Haú eq rajung za, myinzang ban zo jáng, góm lé le yù mù, “Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹Nghut kôlhang, wú keq, Ngo lé ap pyám râ sũ gi, zang bó shí má ngò eq rahá nyi tô ri. ²²Haú Byu Yhangzo gi, hkyin to huí é eq rajung za shí râ nghut lhê; nghut kôlhang, Yhang lé ap pyâm é sũ gi, dingnyé wó ri.” ga taí ri. ²³Haú su ga jáng, lagyô pé gi, yhangmoq má shí

hkyô kut râ sũ gi, hká yuq nghut râ lúh ga, rayuq eq rayuq myí lhum bum akô.

²⁴Haú htoq agó, yhangmoq mâ é hká yuq sheq je kô lhê lúh ga le, rayuq eq rayuq taí htíng lhũm bum akô.

²⁵Haú mù luí, Yesuq gi, “Túngbaù pé é hkohkam pé gi, yhangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhum-sing pé ga luí, taí hkungga nyi bum akô. ²⁶Nungmoq kúm gi, haú su hkâkut kó.

Nungmoq má je ko sũ gi, asak je tiq é sũ su, up é sũ le, dui-nhâng zoshâng su nghut nyi sháng gaq. ²⁷Hká yuq sheq je kô lhê lúh? Zô zung nyi sũ lúh? Haú a nghut jáng, saí tsô é sũ lúh? Zô zung nyi é sũ sheq nghut ri. Nghut kôlhang, ngò gi, nungmoq mâ é saí tso sũ su za nghut nyi lhê. ²⁸Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê. ³⁰Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

*Mht 26:31-35; Mrk
14:27-31; Yhn 13:36-38*

³¹Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê.

³²Nghut kôlhang, náng é lumjíng myit a hten sháng gaq nghũ, Ngò, náng é matú kyúdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq.” ga taí ri.

³³Haú hkûn, Simun gi, “Yhumsing ê, htóng wâng kôlhang, shí kôlhang, ngò gi, nàng eq rahá cháng râ matú myit hpyit to bê.” ga tũ taí ri.

³⁴ Yesuq gi, “Petruq ê, nang lé Ngò tái lé, hkû-nyí^{††} lhang woq a tân shi má, nang, Ngo lé a sé ga luí sum dâm he-ngik pyâm râ nghut lhê.” ga tái ri.

³⁵ Hau htâng, Yesuq, yhangmoq lé tái é gi, “Ngò, nungmoq lé ngunhtung, jihtung, hkyí-tsung a wùn a chùng nhang é za, nhang kat é nghut hkûn, nungmoq chyáng haí ra akô lhú?” ga myi jáng, yhangmoq gi, “Haí le a ra lo.” ga tái akô.

³⁶ Haú hkûn, Yhang gi, “Ahkuí kúm gi, ngunhtung wó sù gi, yù wun sháng gaq, jihtung wó sù le, yù wùn sháng gaq, shâm a wó sù gi, bumó ung luí wui sháng gaq.” ³⁷ Hkâsu mù gà le, Ngò, nungmoq lé tái kôlé, Ngò eq séng luí Chyúmdang má kâ tô é gi, dut lò berâ nghut lhê; ‘Haú yuq gi, yubak mara wó bang má nghap lhôm to bê.^p ga kâ tô é dang gi, Ngá chyáng dik lò râ nghut lhê.” ga luí, yhangmoq lé tái ri.

³⁸ Haú mù, lagyô pé gi, “Yhumsing ê, wú aq, shí má shâm í hkyam joq tô ri.” ga tái kôjáng, Yesuq gi, “Gé bê.” ga luí, yhangmoq lé tái ri.

Tsanlun Bùm Má Yesuq Kyúđung É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haú jowò má jé jáng, Yhang gi, “Nungmoq, gunglaú é a hui sháng gaq, kyúđung nyi keq.” ga luí, yhangmoq lé tái to mù, ⁴¹ chángzô pé nyi é mai luqgok radú we kô gâng e ló luí, hkyihput htuq mù, ⁴² “Áwa ê, Náng ô nau é nghut le gi, góm^{‡‡} shí lé Ngá chyáng mai lhai pyâm byi laq. Nghut kôlhâng, Ngò ô nau é

dông a nghut, Nàng ô é dông sheq nghut sháng gaq.” ga kyúđung ri. ⁴³ Haú hkûn, mauhkung mai maumang lagyo rayuq htoq lé luí, Yhang lé i-myyit nhik lé tái tưng ri. ⁴⁴ I-myyit hkaú má dik shoq hkâm zo wui é yanmai, Yhang je riyhang kyúđung wum kat nyi ri; Yhâng é buibù le, sui hkyí sui pat su myigùng má yui gyô ri.

⁴⁵ Haú mù, kyú ban dung jáng, Yhang toq luí, chángzô pé chyáng ló wú le, yhangmoq gi, myit yón mù luí, yhup myhí to kô é lé ló myàng mù, ⁴⁶ “Haí mù yhup nyi akô lhú? Toq keq! Gunglaú é a hui sháng gaq, kyúđung nyi keq.” ga luí, yhangmoq lé tái ri.

Yesuq Lé Chyup É Hkyô

Mht 26:47-56; Mrk

14:43-50; Yhn 18:3-11

⁴⁷ Haú su ga, ru tái nyi ashí le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri. ⁴⁸ Haú mù luí, Yesuq gi, “Yudaq ê, nang gi, haú Byu Yhangzo lé bopuq puq é èq gyè pé chyáng ap pyâm lhê lhú?” ga luí, yhang lé lhom myí ri.

⁴⁹ Haú hkûn, Yesuq htâng cháng bang gi, haí dut lò râ lé bûn sé kô é yanmai, “Yhumsing ê, ngamoq gi, sham èq zân le, gè râ lhú?” ga myí akô. ⁵⁰ Yhangmoq chyáng mã é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, “Gé bê. Yhangmoq ô nau é su nghut kó sháng gaq.” ga tú tái mù, haú yuq é nohkyap lé ê záng luí lhoq gê byí ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhúm

^{††}22:34 Yudaq byu pé é ra-nyí gi, myinhâng búi wang é mai, htang nyí búi wang é jé shoq nghut lhê. Shí mã é *hkû-nyí* gi, nga-nhung é matú myín àng ri.

^{‡‡}22:42 *góm* gà é gi, Yesuq jamjau hui râ hkyô eq shí râ hkyô lé, tái nau é nghut lhê.

zúng é zau pé eq agyi suwún wuî lé, “Nungmoq gi, damyaq rayuq lé chyup é su, shâm, dumbáng eq kut luî, lé lo akô lhú? ⁵³Ngò gi, nyí wuî, noqkuq yhûm má nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuî gi, mauchut èq up[¶] nyi bê yan-mai, nungmoq é ahkyíng nghut nyi ri.” ga taî ri.

**Yesuq Lé, Petruq Èq
He-ngik Pyâm É Hkyô**

*Mht 26:57-58, 67-75; Mrk 14:53-54,
66-72; Yhn 18:12-18, 25-27*

⁵⁴Haú hkûn, yhangmoq gi, Yhang lé chyup yû mù she ló luî, hkyangjong mó é yhûm shut shuí wang ló akô. Petruq le we we mai châng tô ri. ⁵⁵Ahkuî, yhangmoq gi, wàng hkaú má myi mut yû luî zung tô bum é hkûn, Petruq le yhangmoq é ahkaú má bo tô ri. ⁵⁶Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, “Shí yuq le Yesuq eq rahá nyi sù nghut ri.” ga taî ri.

⁵⁷Haú hkûn, Petruq gi, “Myiwe myhí ê, nàng taî é sù lé, ngò a sé.” ga he pyâm ri.

⁵⁸Hau htâng hkâ-myháng a myáng má, byù rayuq gi, yhang lé dum myàng luî, “Nàng le yhangmoq chyáng bo nyi sù nghut ri.” ga taî kat jáng, Petruq gi, “Byù hpó ê, ngò a nghut.” ga tû taî ri.

⁵⁹Hkyíng hkum rahkum kô myáng jáng, rayuq le, “Gè gè yhang, shí yuq gi, Yhang eq rahá nyi wún sù nghut ri; háf mù gà le, yhang gi, Galile byù le nghut ri.” ga zuq zuq taî ri.

⁶⁰Petruq gi, “Byù hpó ê, nàng taî nyi é hkyô lé, ngò a sé.” ga tû taî ri. Haú su ga ru taî nyi ashî le, woq tûn bê nghut ri. ⁶¹Haú hkûn, Yesuq gi, lhîng luî, Petruq lé wú kat ri. Haú mù, Petruq gi, “Hkû-nyí lháng, woq a tûn shi má, nàng Ngo lé

sum dâm he pyám râ nghut lhê.” ga luî, Yhumsîng yhang lé taî é dang lé bûn kat ri. ⁶²Haú mù, yhang gi, shinggan shut htoq é luî, gyai yhang é ngau nyi ri.

Gyezô Pé Yesuq Lé Rhoî É Hkyô

⁶³Yesuq lé zúng nyi é bang gi, Yhang lé rhoî luî nghap myíng nghap htê mu nyi akô. ⁶⁴Yhangmoq gi, Yhâng é myoqdong nghop pyám byi luî, “Nang lé bat sù gi, ó yuq nghut ri lhú? Myiqhtoi htoî wú aq.” ga myí akô. ⁶⁵Yhangmoq gi, Yhang lé nyhap é dang ajung jung dông taî rhoi nyi akô.

**Suwún Wui É Hí Má
Yesuq Jé Nyi É Hkyô**

*Mht 26:59-66; Mrk
14:55-64; Yhn 18:19-24*

⁶⁶Napkyô myoqmyàng jáng, ming-byû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê mù, ⁶⁷“Nàng Hkrisduq nghut é têng le gi, ngamoq lé taî kyo laq.” gâ akô.

Yesuq gi, “Ngò gi, Hkrisduq nghut lhê nghû taî kôlhang, nungmoq jíng kó râ a nghut. ⁶⁸Ngò, nungmoq lé myi kôlhang, nungmoq gi, tû taî kó râ a nghut. ⁶⁹Nghut kôlhang, ahkuî mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê.” ga luî, yhangmoq lé taî ri.

⁷⁰Haú hkûn, yhangmoq banshoq bang gi, “Haú nghut le gi, Nàng, Garai Gasâng é Yhangzo nghut lhê lhú?” ga myí akô.

Yesuq gi, “Nungmoq taî é eq rajung za Ngò nghut lhê.” ga luî, yhangmoq lé tû taî ri.

⁷¹Haú hkûn, yhangmoq gi, “Nga-nhúng háf jung saksé wá râ nyi ashî lhú? Yhâng é nhut mai yhang, taî htoq kat

[¶]22:53 Mauchut èq up gâ é gi, Tsadán èq up é lé gà ri.

é dang lé, nga-nhung wó gyo bê nghut lhê.” ga akô.

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

23 Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí, ²“Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhanggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri.” ga luí, Yhang lé mara hun akô.

³Haú hkûn, Pilat gi, Yesuq lé, “Nàng gi, Yudaq byu pê é hkohkâm nghut lhê lú?” ga myi jáng, Yesuq gi, “Nàng taí é eq rajung za nghut lhê.” ga tû taí ri.

⁴Pilat gi, “Shí yuq lé hûn râ mara ngò a myàng.” ga luí, hkyangjong agyi pé eq shiwa byu pé lé taí ri.

⁵Nghut kôlháng, haú bang gi, “Shí yuq gi, Yuda mau gón má yhang mhooqshit é dông mai, mingbyû wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri.” ga zuq zuq taí bum akô.

⁶Pilat gi, haú su ga kô é lé wó gyo jáng, Yesuq Galile byû nghut é, a nghut é hkyô lé myí wú ri. ⁷Yesuq gi, Herut up é mau mâ é byû nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

⁸Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhúm lhúm kut shit râ lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹Haú mù, yhang gi, Yesuq lé dangmyi myo myô èq myí wú kôlháng, Yesuq gi, dang rahkún lháng a tû taí byi nghut ri. ¹⁰Hkyangjong agyi pé eq tará sará pé gi, yap to mù,

Yhang lé mara gyai yhang chôm hun akô. ¹¹Herut eq yhâng é gyezô pé gi, Yesuq lé rhoi jhkyoi kut mù, atam é dông taí hpoi kô luí, réng é mebu hut byi mù, Pilat chyáng dum taú dé nhang kat akô. ¹²Haú nyi jáng, hí hpyang gyê dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39—19:16

¹³Haú hkûn, Pilat gi, hkyangjong agyi pé eq zau suwún wui, mingbyû wui lé wut tsing to mù, ¹⁴“Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵Hau htoq agó, Herut le, hai mara le a myàng mù, shí yuq lé nga-nhung chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri. ¹⁶Haú mù, ngò, Yhang lé dam byi luí, nhang pyám râ.” ga luí, yhangmoq lé taí ri.

¹⁷Nghut kôlháng, Lhoqlhai Poi hkangmó má, Pilat gi, mingbyû wui lé htongbyû rayuq yuq nhang kat byi byi kut é yanmai, ¹⁸yhangmoq banshoq bang gi, “Shí yuq lé gi, yu pyám aq; Barabaq lé kúm gi, nhang kat byi laq.” ga luí, chôm wut garu bum akô. ¹⁹Barabaq gi, wà htum má gumlau kut é eq byû sat é yanmai, htóng gyó nyi sù nghut ri.

²⁰Pilat gi, Yesuq lé nhang pyám nau é nghut mù luí, yhangmoq lé dum puq taí ri. ²¹Nghut kôlháng, yhangmoq gi, “Yhang lé tapzîng má jén tap pyám aq, jén tap pyám aq!” ga luí, wut taí garû nyi bum akô.

²²Haú mù luí, sum dâm nghû râ hkûn, Pilat dum taí é gi, “Haí mù luí lú? Yhang gi, hai mara kut shut bê lú?”

Yhang má shî gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám rà.” ga luí, yhangmoq lé taí ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yù bekô nghut ri. ²⁴ Haú mù luí, Pilat gi, yhangmoq dúng é eq rajung za myit hpyit doqdan byí ri. ²⁵ Haú su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq

Má Jén Tap É Hkyô

Mht 27:31-44; Mrk

15:21-32; Yhn 19:17-27

²⁶ Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má cháng nhang akô. ²⁷ Byù rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wui le haú má bo tô ri. ²⁸ Yesuq gi, yhangmoq shut lhîng wú luí, “Yerusalem byizo wui ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wui é matú sheq ngau nyi keq. ²⁹ Hkâsu mù gâ le, 'Zogûng a dut wú é eq naú a huq wú é baúdung myhí pé gi, hkungsô wó nyi ri.' ga luí, taí é buinyi gi, jé lô rà nghut lhê. ³⁰ Haú buinyi má, byu pé gi, bùm pé lé,

'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'^q

ga luí le, wut taí bùm bekô rà nghut lhê.

³¹ Byu pé gi, sîkgâm jûm tô ashê le isu

kut kô é nghut le gi, màn jáng gi, hkâsu wá dut lò rà lhú?” ga taí ri.

³² Haú hkûn, damyaq í yuq lé le, sat pyám rà ga, Yesuq eq rahá shuí htoq ló akô. ³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyô shut kut luí tapzîng má jén tap tô akô.

³⁴ Haú hkûn, Yesuq gi, “Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri.” ga taí ri. Gyezô pé gi, Yhâng é mebu pé lé lháng, hkyin shosé she é dông gam yu pyám byí akô.

³⁵ Mingbyû wui gi, yap to mù tu wú nyi akô. Zau suwún wui Yhang lé nyhap é gi, “Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq.” ga akô.

³⁶ Gyezô pé le, huí ê mù, rhoí nyaú nyaú akô. Yhangmoq gi, chyin wing lé yhun byi kôluí, ³⁷ “Nàng gi, Yudaq byu pé é hkohkâm nghut é nghut le gi, Náng gûng yhang nàng, hkyi yu wú aq.” ga Yhang lé taí akô.

³⁸ Yhâng é ulhum ahtoq má le, (Grik dông le, Latin dông le, Hebre dông le) “SHÍ YUQ GI, YUDAQ BYU PÊ É HKOHKÂM.” gâ é laiká kâ tap tô akô.

³⁹ Tapzîng htoq má bat tap lhâng to huí é damyaq rayuq gi, “Nàng gi, Hkrisduq nghut lhê, a nghut lhú? Haú Náng gûng nàng le, ngá-nhik lé le, hkyi yù aq.” ga luí, Yhang lé rhoí ri.

⁴⁰ Damyaq góyuq sù kúm gi, “Nàng le shî yuq eq rajung za jén tô é hui luí nhîng, Garai Gasang lé a gyuq lhú?

⁴¹ Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut.” ga luí, haú yuq lé tân kat ri.

⁴²Hau htâng, yhang Yesuq lé taí é gi, “Yesuq ê, Nàng, Náng é mingdán má jé ló jáng, ngo lé myit bun laq ô.” gâ ri.

⁴³Haú hkûn, Yesuq gi, “Ngò, nang lé teng za taí lé, hkû-nyí yhang nàng Ngò eq rahá hparadisú^{§§} má nyí rã nghut lhê.” ga luí, yhang lé tũ taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴Haú ahkyíng gi, nyí káng raxe í hkyíng nghut luí, myinhâng sum hkyíng jé shoq ramau gón mauchut tuq dut byuq bê nghut ri;* ⁴⁵hkâsu mù gâ le, builoq shum byuq é yanmai nghut ri. Noqkuq yhâm mâ é pán-gyang le, í hkyam byáng dut byuq bê nghut ri. ⁴⁶Haú hkûn, Yesuq gi, “Áwa ê, Ngò, Ngá é woi-nyí náng é loq má ap byí lhê.” ga htê mó èq garú kat ri. Haú su ga ban taí eq, Yhang kâng byit bê nghut ri.

⁴⁷Shô up gyezau hpó gi, haú su dut é lé myàng jáng, “Shí yuq gi, gè gè yhang, dǐngmán sũ nghut ri.” ga luí, Garai Gasang lé hkya-on kungton ri. ⁴⁸Haú hkyô lé wú rã ga, lé zǐng tô é byù lhunglhang bang le, haú su dut é hkyô pé lé myàng kójáng, myit yón kôluí, wàng-gàng bat mù, dum taú ló byuq bekô. ⁴⁹Nghut kôlhang, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰Haú hkûn, Yuda mau Aramahti gâ é myuq má, Yosep gâ é sũ rayuq nyi ri. Haú yuq gi, nhik bo é sũ eq dǐngmán

é sũ nghut é htoq agó, Garai Gasang é mingdán jé rã hkyô lé myit myoqbyu to sũ le, nghut mù luí, ⁵¹yhang gi, Yudaq uphkang hpúng mã é rayuq nghut kôlhang, hpýé lhâm é hkyô má le, zui saí é hkyô má le, myit a bo huí lom é sũ nghut ri. ⁵²Yhang gi, Pilat chyáng wàng luí, Yesuq é gungsôm lé dǐng yu ri. ⁵³Haú mù, gungsôm haú lé tapzǐng mai hkyut hkyô yù luí, pán yúng èq htup yup mù, ó lé lhang a kat wú shí é, luqgok lé kyǐng tô é luqgok lup hkaú má kat tô ri. ⁵⁴Haú nyí gi, Hên Lajang Buinyi nghut luí, Bánno buinyi jé rã za nghut bê.

⁵⁵Galile mau mai Yesuq eq rahá htoq lé lo é myiwe zo wui le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô. ⁵⁶Hau htâng, yhangmoq gi, yhâm shut taú lò mù, Yesuq é gǐng sôm lé but byi rã matú, namngón é jung eq mura xũ lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

24 Bánno buinyi htang napsún noq le, myiwe wui gi, yhangmoq hen tô é namngón jung pé lé yu chǐng mù, lup shut e ló akô. ²Yhangmoq gi, lup mã é luqhkum lǐng bǐng to lǎng é lé, ê myàng kômù, ³wang e wú kô le, haú Yhumsǐng Yesuq é gungsôm lé, a myàng lo kó nghut ri. ⁴Yhangmoq maú úng-àng nyi bǐm kô é hkûn, radá dǎm maulhap su duqbó é mebu wut é byù í yuq, yhangmoq é nǎm má yap tô akô. ⁵Haú mù, myiwe haú bang gi, gyuq dan bum kôluí, myigǐng shut myoqdong ngóm gop tô bum é u lé, haú nhik gi, “Nungmoq gi, dui sũ lé, shi to bǎng chyáng haí mù ho

§§23:43 Hparadisú nghu é gi, mauhkung mingdán lé taí ri.

*23:44 Nga-nhung é nyí káng raxe í hkyíng gi, Yudaq byù pé é napkyó hkyuq hkyíng nghut lhê; yhangmoq é gau hkyíng gi, nga-nhung é myinhâng sum hkyíng nghut bê.

nyi akô lhu? ⁶Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé, ⁷Haû Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí ngû é buinyì má lhoq dui toq yu é hui râ nghut lhê.' ga nungmoq lé taí tô é dang lé myit bun keq." ga luí, yhangmoq lé taí ri. ⁸Haû hkûn, yhangmoq gi, Yesuq é dang lé bún kat bekô nghut ri.

⁹Yhangmoq gi, lup mai dum taû lò mù, lagyo raxe rayuq eq gotû lhungl-hâng bang lé, haú hkyô banshoq lo taí kyô akô. ¹⁰Lagyo pé lé lo taí kyo bang gi, Magadalaq và mã é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹Lagyo pé kúm gi, yhangmoq é dang lé dangsôm su ngam pyám kôluí, a jîng byi kó nghut ri. ¹²Nghut kôlhâng, Petruq gi, toq luí lup má din jé ê mù ngóm wú kat le, màng htup é pán leq tô é lé za myàng mù luí, haú su dut é hkyô lé maú é èq, yhûm shut dum taû lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³Haû ra-nyí má za, Yesuq é chángzô pé mã é í yuq gi, Yerusalem và mó mai nyhit dêng kô wê é Ema-u gâ é và shut e ló akô. ¹⁴Yhangnhik gi, dut lai ló é hkyô pé banshoq lé, rayuq eq rayuq taí lhûm nyi akô. ¹⁵Yhangnhik gi, haú hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung và nghut akô lhu?" ga myi kat jáng, yhangnhik gi, myoq-

dong shûm kut luí, hkyîng yap tô akô. ¹⁸Yhangnhik mã é Hklupa gâ é sù gi, "Nàng gi, Yerusalem và mó mã lé bîng nyí luí nhîng, shí gyoro lé haú và mã dut lo é hkyô pé lé, a sê é bîng gi, Nàng baú za và nghut lhê lhu?" ga myi kat ri.

¹⁹Yhang gi, "Haí jung lhu?" ga dum myí é hkûn lé, yhangnhik gi, "Nazaret và byù Yesuq é hkyô nghut lhê; haú yuq gi, Garai Gasâng é hí má le, byù lhungl-hâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri. ²⁰Nghut kôlhâng, hkyangjong agyi pé eq ngamoq é zau suwún wui èq haú yuq lé sat pyám rà matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹Ngamoq kúm gi, haú yuq lé, Israelaq byù myû lé hkyi yù râ sù nghut lhê ngû luí, myit myoqbyu nyi bum lhê. Nghut kôlhâng, haú su dut lai ló é gi, hkû-nyí sum nyí lháng bò bê. ²²Hau htoq agó, hkû-nap noq le, lup má ê wú é, ngamoq hpúng mã é myiwe wui ra-am gi, ngamoq lé, lo lhoq maú akô. ²³Yhangmoq gi, Yesuq é gungsôm lé a myàng jáng dum taû lò mù, 'Haú Yhumsîng dui nyi ri.' ga luí, taí kyô é maumang lagyo htoq shit é shing-rán lé, myang é hkyô lé lo taí kyô akô. ²⁴Haû mù, ngamoq é luzúm wui ra-am gi, lup má ê wú kô le, myiwe wui taí é eq rajung za, dut to lánng é lé ê myàng akô. Nghut kôlhâng, haú yuq lé gi, yhangmoq a myàng kó gâ." ga luí, Yhang lé taí kyô akô.

²⁵Haú hkûn, Yhang gi, "Myiqhtoi pé taí é dang banshoq lé lumjîng râ matú, hpaqchyí a bo é eq ngha é sù nhik ê, ²⁶Hkrisduq gi, haú su é wuîhke jamjau hkâm zô yu é htâng má sheq, Yhâng é hpungwup shîngkang má wó wang nyi to râ, a nghut kó lhu?" ga luí, yhangnhik lé myí ri. ²⁷Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang

má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haú nhik e ló é wà má chyâng lò kôjáng, Yesuq gi, laí lò rã su kut ri. ²⁹ Haú hkûn, yhangnhik gi, “Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri.” ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo rã ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byí ri. ³¹ Haú hkûn, yhangnhik é myoq bóng lò luí, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, “Yhang gi, hkyô má ngá-nhik eq dang nyo lhúm é eq Chyúmdang é lichyúm taí hpông shit é hkûn, ngá-nhik gi, i-myt unghkaú má, achyí aku dut bê a nghut lú?” ga luí, yhangnhik yhangchang taí lhúm akô.

³³ Yhangnhik gi, toq mù, radá dâm Yerusalem wà mó shut dum taú lò kô le, lagyo raxe rayuq eq, yhangmoq eq rahá nyi é bang zup míng to kô é lé lò myang akô. ³⁴ Haú bang gi, “Haú Yhumsíng gi, teng za yhang dum dui toq lò bê; Simun lé lhang htoq shit bê nghut ri.” ga taí lhúm nyi bum akô. ³⁵ Haú hkûn, yhangnhik gi, hkyô má dut laí lò é hkyô pé eq, muk hpé é hkûn má Yesuq lé bûn sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

*Mht 28:16-20; Mrk 16:14-18; Yhn
20:19-23; Lagyo 1:6-8*

³⁶ Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agùng má yap to luí, “Nungmoq nguínón yuqyo nyi sháng gaq.” ga luí, yhangmoq lé taí ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, “Nungmoq gi, haí mù dan nyi bum akô lú? Haí mù nungmoq é i-myt unghkaú má úng-âng nyi bum akô lú? ³⁹ Ngá é loq eq Ngá é hkyí lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut.” ga luí, yhangmoq lé taí kyô ri.

⁴⁰ Yhang gi, haú su ga taí mù, Yhâng é hkyí loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, “Nungmoq shí má zôhpo rajung jung wó akô lú?” ga luí, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rahtung lé, byí akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, “Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kê to má kê to banshoq gi, dik rã chyat nghut lhê nghú luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê.” ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpông byí ri. ⁴⁶ Haú mù, Yhang gi, “Hkrisduq gi, wuîhke jamjau hui zo mù, sum nyí nghú rã buinyi má, shi é mai dum dui toq lò rã hkyô lé le, ⁴⁷ Yerusalem wà mó mai hí luí, byù myú chângjup lé, Yhâng é myìng lé lang luí yubak mara hkyut pyám byi rã hkyô eq myit lhang rã hkyô lé le, hko kyo rã hkyô lé, kê to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa

byî tô é danggidiq[†] lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq, Yerusalem wà mó má lág nyî keq.” ga luî, yhangmoq lé taî ri.

**Yesuq Mauhkûng Shut Shuí
Toq Yu Huî É Hkyô**

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù,

Yhâng é loq tu toq luî, shimân byî ri. ⁵¹ Hau su kut shimân byî nyi ashî le, Yhang gi, yhangmoq chyáng mai gâng ló byuq luî, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû ló akô. ⁵³ Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

[†]24:49 Ngá Wâ byi tô é danggidiq nghu é gi, Chyoiyúng é Woi-nyí lé taî ri.

YOHAN

é Gabú Danglù Laiká

(The Gospel of John)

Haù Mungdang, Xàngzo Byù Gùng Lé Dut É Hkyô

1 A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ²Yhang gi, a-nham sâng-hi má, Garai Gasang eq rahá nghut nyi ri.

³Nyì mi-nyì, joq mijoj gi, Yhang đông mai hpan tô é chyat nghut lhê; Yhang đông mai a hpan é gi, haí lhang a joq nghut ri. ⁴Asak chyxngxe gi, Yhang má nghut lhê mù, asak haù gi, byu pê é matú maubó nghut ri. ⁵Haù maubó gi, mauchut má duqbó byí nyì kôlhang, mauchut gi, haù lé a hap yù nghut ri. ⁶Garai Gasang mai nhang kat é, Yohan gâ é byù rayuq jé lé ri.

⁷Yhang gi, maubó haù eq sêng é hkyô lé, saksé hkám byi luí, yhang é yan-mai byù lhunglhang bang wó lumjng kó sháng gaq ga, saksé rayuq đông jé lé é sù nghut ri. ⁸Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê. ⁹Byù yuq jup lé duqbó byi é, maubó akying haù gi, mingkan htoq má jé nyi to bê.

¹⁰Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri.

¹¹Yhang gi, yhumsing mau má jé lé kôlhang, Yhâng é amyû pé gi, Yhang lé a lhom hap yù kó nghut ri. ¹²Nghut kôlhang, Yhang gi, Yhang lé lhom hap yù luí, Yhâng é mying lé lumjng é bang

lhunglhang lé, Garai Gasâng é yhangzô pé dut râ ahkáng byi bê nghut ri. ¹³Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴Haù Mungdang gi, xàngzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingakang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shingakang nghut ri.

¹⁵Wui-myhup Sará Yohan gi, Yhang eq sêng é hkyô lé saksé hkâm é hkún, garú taí é gi, “Ngá é htàng má jé lé é Sù gi, ngá é hí mai nyi to bê sù nghut é yan-mai, ngá htoq je gyaú sù nghut ri.”¹ nghú, ngò taí é sù gi, shí yuq nghut bê.” gâ ri. ¹⁶Yhâng é gumjup é jeju ahkaù mai, nga-nhúng banshoq bang gi, shimân jeju lé ralhúm htoq ralhúm myang yu nyi bê nghut lhê. ¹⁷Hkâsu mù gâ lé, haù jep é tará gi, Mosheq é loq đông mai byí é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸Garai Gasang lé, ó yuq eq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô

Mht 3:1-12; Mrk 1:1-8; Luk 3:15-17

¹⁹Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkún, Yohan saksé hkâm é gi, a-ô mâ é hkyô pé nghut ri. ²⁰Yhang gi,

a hê a zaú tô e za, “Ngò gi, Hkrisduq[‡] a nghut.” ga lhom taí kyô ri.

²¹ Haú hkûn, yhangmoq gi, “Haú nghut jáng, nàng gi, ó yuq nghut lhê lúhú? Nàng gi, Eliyaq lúhú?” ga myi kôjáng, yhang gi, “A nghut.” ga taí ri; “Nàng gi, haú Myiqhtoi nghut lhê lúhú?” ga dum myi kôjáng, yhang gi, “A nghut.” ga tú taí ri.

²² Haú mù, yhangmoq gi, “Ngamoq lé nhang kat bâng chyáng ló wó taí kyo rá matú, nàng gi, ó yuq nghut lhê lúhú? Náng gúng lé nàng hkâsu nghú lhê lúhú? Taí kyô wú laq.” ga dum myí akô.

²³ Haú hkûn, Yohan gi, myiqhtoi Esai-aq é dang eq rajung za, “Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê.”^r ga tú taí ri.

²⁴ Hparishe pé mai nhang kat é bang ra-am gi, yhang lé, ²⁵ “Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkám byi nyi lhê lúhú?” ga dangmyi myí akô.

²⁶ Haú hkûn, Yohan tú taí é gi, “Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htâng má lé é sù yuq nghut bê; ngò gi, Yhâng é hkyí-tsung tui lé hpyí rá lhang a gingdán é nghut ri.” gâ ri.

²⁸ Shí pé banshoq gi, Yohan wui-myhup hkám byi nyi é, Yodan làng hé hpoq má é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, “Mingkan byu pé é yubak mara lé yu

pyám byí é Garai Gasâng é Sauzo lé, wú keq!³⁰ Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yan-mai, ngá htoq je gyaú Sù nghut ri.' nghú, ngò taí é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israellaq byu pé wó sé kó sháng gaq nghú, ngò lé jé mù, wui èq wui-myhup hkám byi nyi é nghut lhê.” gâ ri.

³² Hau htang, Yohan saksé hkám é gi, “Haú Woi-nyí gi, mauhkûng mai hpûngkyui gunghkyàng sù é dông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi rá matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi rá sù nghut lhê.' gâ ri. ³⁴ Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghú, ngò saksé hkám lhê.” gâ ri.

Sâng-hi Lhê É Chángzo Pé

³⁵ Hau htang nyí, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq laí ló nyi é lé myang kat jáng, “Hê, Garai Gasâng é sauzo lé, wú keq!” ga taí kat ri.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luí, “Nungnhik haí o akô lúhú?” ga myi jáng, yhangnhik gi, “Rabai ê, Nàng hkâmá nyi lhê lúhú?” ga taú myí kat akô nghut ri. (Rabai gâ é gi, Sará gâ é lichyúm nghut lhê.)

[‡]1:20 Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong “Mesaia” gâ é eq rajung za nghut lhê.

³⁹ Haú hkûn, Yhang gi, “Lé keq, haú jáng, nungnhik myàng kó rã nghut lhê.” ga tũ taí ri.

(Haú-u gi, raxê hkyíng[†] kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyi buigyùm shoq, Yhang eq rahá é nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik má é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng luí, “Nga-nhik gi, Mesaia lé myàng bê.” ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, “Nàng gi, Yohan é yhangzo Simun nghut ri; Kehpa[§] gâ é myíng lé, nàng wó yú rã nghut lhê.” ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê rã matú, myit hpyit yú bê nghut ri. Yhang gi, Hpilip lé myàng jáng, “Ngá htâng cháng aq.” ga taí ri.

⁴⁴ Hpilip gi, Andre eq Petruq nhik nyi é Bet-saida và mó má é byù nghut ri. ⁴⁵ Yhang gi, Nahtanelaq lé myàng jáng, “Mosheq mai tarã laiká má kã tô é eq my-iqhtoí pé mai le lhoq ang luí kã tô é sũ, Yosep é yhangzo, Nazaret và byù Yesuq lé, ngamoq myàng bê.” ga yhang lé taí kyô ri.

⁴⁶ Haú hkûn, Nahtanelaq gi, “Nazaret và ô! Haú mai, ge é jung haí wa wó htoq lhê lú?” ga myi jáng, Hpilip gi, “Ru lé wú aq.” ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, “Wú keq, shí yuq gi, mhaú é myit a bo é sũ, Israelaq byù akying rayuq nghut ri.” ga taí ri.

⁴⁸ Haú hkûn, Nahtanelaq gi, “Nàng, ngo lé hkâsu kut sê é lú?” ga myi jáng, Yesuq gi, “Nang lé, Hpilip eq a wut yú shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê.” ga tũ taí ri.

⁴⁹ Haú mù, Nahtanelaq gi, “Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkôhkâm le nghut ri.” ga taí ri.

⁵⁰ Haú hkûn, Yesuq gi, “Ngò, nang lé, maihpáng gâm ô má myang é nghú taí kyô é yanmai, nàng lumjíng lhê a nghut lú? Hau htoq je kô é muzó pé lé, nàng myàng rã nghut lhê.” ga taí ri. ⁵¹ Hau htâng, Yesuq xoq taí é gi, “Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyô lô kut nyí kô é lé, nungmoq myàng kó rã nghut lhê.” gâ ri.

Wuì Lé Tsibiyiq Wing Dut Nhang É Hkyô

2 Hau htâng, í nyí nghú rã nyí má, Galile mau má é Hkanaq và mó má, myiháng poí ralhú joq ri. Haú má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poí haú má ji akô nghut ri. ³ Tsibiyiq wing jaú tũm to kô é hkûn, Yesuq é yhângnu gi, “Yhangmoq, tsibiyiq wing a wó lo kô nghut ri.” ga, Yesuq lé taí ri.

⁴ Haú hkûn, Yesuq gi, “Ânu ê,** haú, nàng gi, Ngò eq haí sêng lhê lú? Ngá é ahkyíng a jé shi é nghut lhê.” ga tũ taí ri.

[†]1:39 Raxê hkyíng gi, myinhtâng myi hkyíng záng ri.

[§]1:42 Aramaik dang đông *Kehpa* gâ é eq Grik dang đông “Petruq” gâ é lichyúm gi, luqgok gâ é nghut lhê.

**2:4 *Ânu ê* gâ é lé, Grik đông gi, “Myiwe myhí ê” ga bo tô é nghut lhê.

⁵ Nghut kôlhang, Yhâng nu gi, haû dui-nhâng zoshâng wuì lé, “Yhang haî taî lé, haî kut keq.” ga taî ri.

⁶ Haû nàm má, í sum xê galan kô wang é luqgok wúng hkyuq cham joq tô ri; haû gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haû dui-nhâng zoshâng wuì lé, “Wúng haû pé má wuì lhoq pyíng keq.” ga taî ri; haû mù, yhangmoq gi, wúng haû pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, “Ahkuí, ratsuí hkû yù mù, poí-up lé yu ló byi keq.” ga taî jáng, yhangmoq gi, yu ló byí akô nghut ri.

⁹ Poí-up hpó gi, wuì mai dut é tsibiyiq wing haû lé, shuq chyam wú ri; wuì hkam é dui-nhâng zoshâng wuì gi, tsi-biyiq wing haû hkâmai lo é hkyô lé sê to kôlhang, yhang gi, a sé nghut ri. Haû mù, yhang gi, lusik lé, ji yù luí, ¹⁰ “Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!” ga taî ri.

¹¹ Galile mau mâ é Hkanaq wà mó má, Yesuq tân shit é limik kumlhá gi, Yhang kut é limik kumlhá pé mâ é sâng-hî dàm nghut ri. Yhang gi, Yhâng é hpungwup shíngkang lé, haû dông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

Noqkuq Yhâm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri;

yhangmoq gi, haû má buinyì myi ngò nyí nyi akô nghut ri.

¹³ Yudaq byu pé é Lhoqlhai Poí jé rá nghut é hkûn, Yesuq gi, Yerusalem wà mó má doq ló ri. ¹⁴ Haû hkûn, noqkuq yhâm wàng má, nojúng, sau, hpúngkyui pé lé úng nyi é bang lé le, sibôí má ngùn htaí zô zung nyi é bang lé le, Yhang ló myàng ri. ¹⁵ Haû mù, Yhang gi, tui lé, nhuq rá wase saí yù mù, banshoq bang lé le, sau eq nojúng lé le, haû noqkuq yhâm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é sibôí lé gi, tu mhuq pyám byí ri; ¹⁶ haû hpúngkyui ung zô é bang lé le, “Zè shi pé lé yu htoq ló keq! Ngá Wá é yhâm lé, hpugá jowó hkâkut kó!” ga luí nhik-yô ri.

¹⁷ Haû mù, Yhâng é chángzô pé gi, “Ngò, Náng é yhâm lé chyitdap kâng tuí é hkyô gi, Ngo lé myi su nyhê jôm pyám rá nghut lhê.” ga kâ tô é lé, myit bûn kat akô nghut ri.

¹⁸ Yudaq byu pé gi, Yhang lé, “Nàng, shí pé kut rá ahko ahkáng wó é hkyô lé saksé tân shit rá matú, ngamoq lé, haî jung limik kumlhá wó tân shit rá lú?” ga chôm myí akô nghut ri.

¹⁹ Haû hkûn, Yesuq gi, “Noqkuq yhâm shí lé nungmoq hpýoq pyám keq, sum nyí gyoro má, Ngò, haû lé dum tu shap rá nghut lhê.” ga, yhangmoq lé tû taî ri.

²⁰ Haû Yudaq byu pé gi, “Noqkuq yhâm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap rá lú?” ga tu myí akô nghut ri. ²¹ Nghut kôlhang, Yesuq taî é noqkuq yhâm gi, Yhâng é gùng lé lhoq ang luí taî é nghut ri. ²² Haû mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haû su ga taî é dang lé myit bun kômù, Chyúmdang lé le, Yesuq taî é dang pé lé le, lumjíng akô nghut ri.

²³Haù Lhoqlhai Poì nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjúng bum akô nghut ri. ²⁴Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhànggùng lé a ap to nghut ri. ²⁵Yhang gi, byu é i-myit unghkaù má haì lúng tô é lé sê é yanmai, byù yhangchang saksé hkám byi é a ra nghut ri.

Nikodimu Lé, Yesuq Mhoqshit É Hkyô

3 Nikodimu gâ é Hparishe rayuq nyi ri; yhang gi, Yudaq byu pê é byin tú wapdoq má bo é sù nghut ri. ²Yhang gi, myín lé, Yesuq chyáng lé mù, “Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut.” ga taì ri.

³Haù hkûn, Yesuq gi, yhang lé, “Ngò, nàng lé teng za taì kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myàng râ a nghut.” ga tú taì ri.

⁴Haù jáng, Nikodimu gi, “Ipyat kó bê é byù gi, dum hkû é hkâsu kut wó hui râ lhú? Ínû é unghkaù má dum wàng mù, dum hku é hui râ gi, gè gè yhang wó dut râ a nghut!” ga taì ri.

⁵Haù hkûn, Yesuq gi, “Ngò, nàng lé teng za taì kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wàng râ a nghut. ⁶Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷Nungmoq gi, dum hku é hui râ lhê' nghû Ngò taì é dang lé, nàng hkâmaù nyí. ⁸Haù, lài gi, yhang nau é shut ló lhê. Lài lò htê lé nàng wó gyo kôlhang, lài hkâmai lo é eq, hká shut ló é lé, nàng sé râ a nghut; haù Woi-nyí mai hku kat

huí é sù, ó yuq nghut kôle, haù eq rajung za nghut lhê.” ga tú taì ri.

⁹Haù hkûn, Nikodimu gi, “Haù gi, hkâsu wó dut râ lhú?” ga myí ri.

¹⁰Yesuq tú taì é gi, “Nàng gi, Israelaq byu pê é sará rayuq nghut to luì nhing, haù hkyô pé lé a sê gyo lhú? ¹¹Ngò, nang lé teng za taì kyo lé, ngamoq gi, ngamoq sê é hkyô lé taì mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹²Ngò gi, nungmoq lé, mingkan eq sêng é hkyô lé taì kyô le lhang, a lumjúng kô é nghut le gi, mauhkûng mingdán eq sêng é hkyô lé taì kyô é nghut le gi, hkâsu kut wó lumjúng kó râ lhú? ¹³Mauhkûng mingdán mai gyó lo é sù, haù Byu Yhangzo mai lai luì, mauhkûng mingdán má ó yuq lhang wó doq ló wú é a nghut. ¹⁴Mosheq gi, yoso má lhangmuì lé tu shap tô é su, haù Byu Yhangzo le tu shap tô é hui ra râ nghut lhê. ¹⁵Haù mù, haù Byu Yhangzo lé lumjúng é yuq hkangmó gi, ahtum abyuq é asak wó yù râ nghut lhê.

¹⁶Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjúng é sù ó yuq nghut kôle, htên byoq é a huì e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri. ¹⁷Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê. ¹⁸Yhang lé lumjúng é sù gi, mara byi é hui râ a nghut; nghut kôlhang, Yhang lé a lumjúng é sù kúm gi, Garai Gasâng é Yhangzo zote lé a lumjúng é sù nghut é yanmai, mara byi é huì to gù bê nghut ri. ¹⁹Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaì, mauchut lé chyit akô nghut ri; haù gi,

mara byí é hui râ hkyô yhang nghut ri. ²⁰ Agè ashop hkyô kut é sù ó yuq nghut kôle, maubó lé a nguì nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut. ²¹ Nghut kôlhang, haú tengmán hkyô đông asak dui é sù ó yuq le, yhumsíng kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri.” gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang lô mù, haú má rayoq zo nyì luí, wui-myhup hkâm byí ri. ²³ Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byí nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htóng a lhoq hkyó shí é hkun lê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhùm bum akô nghut ri. ²⁶ Hau htâng, yhangmoq gi, Yohan chyáng lé luí, “Rabai ê, Yodan làng hé hpoq shut nàng eq rahá nyì luí, nàng èq saksé hkâm byí é Sù gi, ahkuí, wui-myhup hkâm byí nyi é nghut mù, yuq hkangmó gi, Yhâng chyáng e bum akô nghut ri mhaí.” ga, yhang lé taí akô.

²⁷ Haú eq séng luí, Yohan tú taí é gi, “Byù rayuq gi, mauhkúng mai byí é za a nghut jáng, haí le wó hap yù râ a nghut. ²⁸ Ngò gi, Hkrisduq a nghut, Yhang é hí má nhang kat huí é sù za nghut lhê.’ nghú, ngò taí é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyô gi, ngá é gabú hkyô nghut mù, ngò má byíng jup nyì bê nghut ri.

³⁰ Yhang gi, kô jat lò ra râ nghut lhê; ngò gi, yom lô ra râ nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é đông za taí ri; mauhkúng mai lé é Sù gi, lhunglhâng é ahtoq má nghut ri. ³² Yhang gi, wó myàng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasang èq nhang kat é hui Sù gi, Garai Gasang é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri. ³⁵ Haú Iwa gi, Zo lé chyit-dap luí, jung hkangmó lé Yhâng é loq má ap byi bê nghut ri. ³⁶ Haú Zo lé lumjíng é sù ó yuq nghut kôle, ahtum abyuq é asak wó lhê; nghut kôlhang, haú Zo lé he-ngik pyâm é sù ó yuq nghut kôle, asak haú lé myàng râ a nghut; hkâsu mù gâ le, Garai Gasang é nhikmo-yo hkyô gi, yhâng chyáng ru joq nyi ri.” gâ ri.

Yesuq Eq Samariq Myhí Huí É Hkyô

4 Yesuq gi, Yohan htoq má, chángzo je lhoq myô é eq wui-myhup hkâm byí nyi ri gâ é hkyô lé, haú Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkâm byí é a nghut, Yhâng é chángzô pé sheq ru nghut akô.) ³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú lô bê nghut ri.

⁴ Ahkuí, Yesuq gi, Samariq mau mai sô laí lô râ dut bê nghut ri. ⁵ Haú mù, Yhang gi, Yakup mai yhang zo Yosep lé byí é maumyí rajap eq chyâng lhùm é, Suhka ga myhíng é, Samariq mau mâ é wà mó ralhùm má lo jé ri. ⁶ Haú má, Yakup é wuihtung le joq to luí, Yesuq gi, hkyô sô nú é yanmai, wuihtung hau é nàm má

zung gyó tô ri. Haú u gi, nyí-káng raxe í hkyíng^{††} nghut bê nghut ri.

⁷Haú hkûn, Samariq myiwe myhí rayuq wuì lé hkam ri; Yesuq gi, yhang lé, “Ngo lé wuì byi shuq laq.” ga taí ri.

⁸(Haú u gi, Yhâng é chángzô pé, zoshuq wuì râ matú wà hkaú shut e byuq kô é ahkyíng nghut ri.)

⁹Haú Samariq myiwe myhí gi, Yhang lé, “Nàng gi, Yudaq byù rayuq nghut to luí nhîng, ngò Samariq myiwe myhí chyáng, haí mù shuq wuì dúng lhê lú?” ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰Haú hkûn, Yesuq gi, yhang lé, “Nàng gi, haú Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wuì byi berâ nghut lhê.” ga tû taí ri.

¹¹Myiwe myhí haú gi, “Yhumsîng ê, Nàng gi, wuì hkâm râ zè haí le a wó, wuìhtung le nik ri; haú asak-wuì lé, Nàng hkâmâ é wó yû râ lú? ¹²Ngamoq é îwa Yakup gi, ngamoq lé wuìhtung shí byí to bê nghut lhê; yhang yhang le, yhang zo pé le, yhang rém é dusak pé le, wuìhtung shí mâ é wuì shuq bekô nghut ri; Nàng gi, Yakup htoq je kô lhê lú?” ga Yhang lé taí ri.

¹³Yesuq gi, “Wuì shí lé shuq é sù ó yuq le, wuìshit é dum hui râ nghut lhê.

¹⁴Nghut kôlhang, Ngò byí é wuì lé shuq é sù ó yuq nghut kôle, wuìshit é hkâ-nhám a hui lo râ nghut lhê. Ngò byí é wuì haú gi, haú yuq má, ahtum abyuq é asak matú wuìbúm dut râ nghut lhê.” ga yhang lé tû taí ri.

¹⁵Myiwe myhí haú gi, Yhang lé, “Yhumsîng ê, ngò gi, wuì le a shit lo, shí

má wuì hkâm le a lé ra lo sháng gaq, wuì haú ngo lé byi laq.” ga taí ri.

¹⁶Haú hkûn, Yesuq gi, “Ló mù, nung làng lé ló wut lò aq.” ga, yhang lé taí ri.

¹⁷Yhang gi, “Ngò, làng a wó.” ga taí jáng, Yesuq gi, yhang lé, “Nàng, làng a wó gâ é gi, têng ri. ¹⁸Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri.” ga taí ri.

¹⁹Haú hkûn, myiwe myhí haú gi, “Yhumsîng ê, Nàng gi, myiqhtoi rayuq nghut é hkyô lé, ngò wú sé bê. ²⁰Ngamoq é îchyí îwâ pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri.” ga taí ri.

²¹Haú hkûn, Yesuq taí é gi, “Myiwe myhí ê, Ngo lé jíng aq; bùm shí má le a nghut, Yerusalem wà mó má le a nghut e za, haú Îwa lé noqkuq râ ahkyíng, jé lò nyi bê nghut ri. ²²Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.^{‡‡} ²³Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq râ ahkyíng gi, jé lo nyi bê nghut luí, ahkuí lháng jé to bê nghut ri; hkâsu mù gâ le, haú Îwa gi, haú su kut noqkuq é bang lé ô nau ri. ²⁴Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê.” ga taí ri.

²⁵Myiwe myhí haú gi, “Hkrisduq gâ é Mesaia jé lé râ nghut é lé gi, ngò sê lhê.

^{††}4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

^{‡‡}4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidíq byi to é nghut é lé taí nau é nghut ri.

Yhang jé lé jáng, nga-nhúng lé banshoq taí sâ n kyo râ nghut lhê." ga taí ri.

²⁶ Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

Hau Chángzô Pé Dum Taú Jé Lo É Hkún Lhê Hkyô

²⁷ Haú u lé, Yhâng é chángzô pé gi, dum taú jé lo bum akò; yhangmoq gi, Yesuq, myiwe rayuq eq dâng nyo nyi é lé lo myàng luí, máu byuq bum akò. Nghut kôlhang, "Nàng, haí ô ri lú?" ga le, "Haí mù Yhang eq dâng nyo nyi lhê lú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haú gi, yhâng é wui yambú lé tô pyâm to luí, wà shut taú wang ló mù, wà byù wui lé ló taí kyô é gi, ²⁹ "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. ³⁰ Haú mù, yhangmoq gi, wà mai htoq lé luí, Yesuq chyáng lé lo bum akò nghut ri.

³¹ Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akò.

³² Haú hkún, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga taí ri.

³³ Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhum bum akò.

³⁴ Haú hkún, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. ³⁵ 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haú kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haú kyô shu sù gi,

yhâng é zuihpau lé myang yù luí, ahtum abyuq é asak é matú, kyôshi shù tsíng to bê nghut ri. ³⁷ Haú su mù, 'Rayuq gi, sâ n hkyó, góyuq gi, shù yù.' gâ é sanghkyang gi, têng ri. ³⁸ Nungmoq a zui saí tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyù lé shu yù bekò nghut ri." gâ ri.

Samariq Byù Myo Myo Lumjínng Kô É Hkyô

³⁹ "Yhang gi, ngò kut lai lò bê hkyô lhunglhang lé, taí kyô ri." ga luí, myiwe myhí haú saksé hkâm é yanmai, haú wà mâ é Samariq byù myo myo gi, Yesuq lé lumjínng bùm bekò nghut ri. ⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyí bo nyi bê nghut ri. ⁴¹ Yhâng é dang pé é yanmai, byù myo myo gi, lumjínng bang dut jat lò bekò nghut ri.

⁴² Yhangmoq gi, myiwe myhí haú lé, "Ahkuí, ngamoq lumjínng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chôm taí akò nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyí lai jáng, Yesuq gi, haú mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkún, Galile byu pé gi, Yhang lé lhom hkulum yu akò; yhangmoq gi, Yerusalem wà mó má, Lhoqlhai Poí ê lòm kô é nghut é yanmai,

poì u lé, Yesuq kut é hkyô lhungháng lé, myàng kô é bang nghut ri.

⁴⁶ Yesuq gi, Yhang mai haù wuì lé tsi-biyiq wing dut nhang é, Galile mau má é Hkanaq wà mó má, ê dum kûm ri. Haù ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haù wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi rã matú, Yhang lé dúng tôngbán ri.

⁴⁸ Haù hkûn, Yesuq gi, yhang lé, “Byù nungmoq gi, limik kumlhá pé eq mauho muzó pé lé za a myàng kô é nghut le gi, hkâ-nhám lé lumjúng kó rã a nghut.” ga taì ri.

⁴⁹ Mingsuwún haù gi, “Yhumsîng ê, ngá zo a shî shimá gyó lé laq.” ga taì ri.

⁵⁰ Haù hkûn, Yesuq gi, “Nàng wó lô bê; nung zo byùn rã nghut lhê.” ga tù taì ri.

Suwún haù gi, Yesuq taì é dang haù lé gyô júng luì, tau lô bê nghut ri.

⁵¹ Yhang gi, hkyô má ru nghut nyi ashî hkûn, yhâng é dui-nhâng zoshâng wuì gi, yhang lé lé hui luì, zoshâng haù gè byuq é hkyô, lé taì kyô akô nghut ri.

⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, “A-nyí nap nyí hkyuí rahkyíng má, gùng nyé é chàm lô byuq bê nghut ri.” ga taì kyô akô.

⁵³ Haù hkûn, ahkyíng haù gi, “Nung zo byùn rã nghut lhê.” ga, yhang lé, Yesuq taì é ahkyíng nghut é lé, haù yhângwa bûn sé bê nghut ri. Haù mù, yhang eq yhâng yhumbyù banshoq bang gi, lumjúng bekô nghut ri.

⁵⁴ Haù gi, Yesuq, Yuda mau mai Galile mau má lé jé é htâng, í dâm nghû rã dá kut shit é limik kumlhá nghut ri.

Wuìhtum Yàm Má, Nòhpyo Lhoq Gê Byí É Hkyô

5 Hau htâng a myáng má, Yudaq byu pè é poì ralhum joq é yanmai, Yesuq gi, Yerusalem wà mó má doq lô ri. ² Ahkuí, haù Yerusalem wà mó é Sau Hkúmdong nàm má, Hebre myíng đông gi, Betzahta ga myhíng é wuìhtum ralhum joq ri; hau é lhíngkyuq má, jiropp ngo lhum joq tô ri. ³ Jiropp haù pé má, myoqjit bang, hkyí hten bang, gùngjum shí bang ajùm ayò leq tô bum akô. (Haù bang gi, wuì dui nún rã lé lánng tô é bang nghut akô. ⁴ Hkâsu mù gâ le, haù Yhum-sing é maumang lagyo gyó lé lé kut mù, wuì lé, lé lhu nhún jáng, wuìhtum haù má hí wó wang é sù gi, haì jung ana wa dap to kôlhang, ge byuq é hui é yanmai nghut ri.)⁵ Súm xe shit zân tup no nyi é byù rayuq le, haù má bo tô ri. ⁶ Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, “Nàng, gè nau ri lhu?” ga myí ri.

⁷ Nò sù haù yuq gi, “Yhumsîng ê, wuì dui nún lo é hkûn, wuìhtum má wàng rã matú, ngo lé garúm rã byù ó a nyi; ngò wàng rã nghû jáng, góyuq hí, ngá hí má wàng wàng dut ri.” ga tù taì ri.

⁸ Hau htâng, Yesuq gi, yhang lé, “Toq aq! Nàng é taphkang yu chùng luì, sô lô aq.” ga taì ri. ⁹ Haù yuq gi, radá dâm nò ge byuq bê nghut luì, yhâng é taphkang yù mù, sô lô bê nghut ri.

Haù nyí gi, Bánno buinyì nghut ri. ¹⁰ Haù mù, Yudaq byu pé gi, haù nò ge byuq é hui sù lé, “Hkû-nyí gi, Bánno buinyì nyí nghut é yanmai, nàng, taphkang waq é gi, tarã lu lai bê nghut ri.” ga taì akô.

¹¹ Nghut kôlhang, yhang tù taì é gi, “Haù ngo lé lhoq gê byi sù gi, ngo lé,

⁵5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

'Náng é taphkang yu chûng mù, sô lô aq.' ga taí é nghut lhê." gâ ri.

¹²Haû mù, yhangmoq gi, "Náng é taphkang yu chûng mù sô lô aq.' ga, nang lé taí é sù gi, ó yuq wá nghut ri lú?" ga myí akô.

¹³Nghut kôlhâng, haû ó yuq nghut é lé, nô ge byuq é hui sù gi, a châng sê kat nghut ri; hkâsu mù gâ le, Yesuq gi, haû mâ é byù moq mó má wang nyó lô byuq é yanmai nghut ri.

¹⁴Htâng má, Yesuq gi, haû yuq lé no-
qkuq yûm má myàng jáng, "Wú aq, nàng wángzán bê nghut ri; hí lhê htoq má je wuîhke é hkyô a hui zo sháng gaq, mara hkâkut shut lo." ga luí, yhang lé taí ri. ¹⁵Haû yuq gi, htoq lô mù, yhang lé lhoq gê byí é sù gi, Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶Haû mù, Yudaq byu pé gi, Bánno buinyì nyí má, Yesuq, haû hkyô kut é yanmai, Yhang lé gunjang lo akô nghut ri. ¹⁷Haû hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuí nyí é nghut mù, Ngò le mù zuí nyí lhê." ga taí ri. ¹⁸Haû mù luí, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é đông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám rà matú, je riyhang shikut lo akô nghut ri.

¹⁹Yesuq, yhangmoq lé tû taí é gi, "Ngò, nungmoq lé teng za taí kôlé, haû Zo gi, yhumsing é myit đông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê. ²⁰Hkâsu mù gâ le, haû Íwa gi, Zo lé chyitdap é nghut luí, Yhang kut é hkyô lunglhang, haû Zo lé tûn shit ri; nungmoq máu hông shoq, shí pé htoq je ko é hkyô pé lé lháng, haû Zo lé tûn shit shirâ nghut lhê. ²¹Haû Íwa gi,

shí bê bang lé lhoq dui toq mù, yhangmoq lé asak byí é eq rajung za, haû Zo le, Yhang byí nau é bang lé, asak byi rà nghut lhê. ²²Hau htoq agó, haû Íwa lé hkunggâ é eq rajung za, haû Zo lé le, lunglhang bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lunglhang, haû Zo lé lum to bê nghut ri. ²³Haû Zo lé a hkunggâ é sù gi, haû Yhang lé nhang kat é sù Íwa lé le, a hkunggâ é sù nghut ri.

²⁴Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjáng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haû yuq gi, shi é mai lut luí, asak dui bê sù nghut ri. ²⁵Ngò, nungmoq lé teng za taí kôlé, haû Garai Gasâng é Yhangzô é htê lé, shi byuq bê bang wó gyo rà ahkyíng gi, jé lo nyí bê nghut ri; ahkuí lháng jé to bê nghut ri. Htê haû lé gyô é bang gi, asak dui kó rà nghut lhê. ²⁶Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷Hau htoq agó, Yhang gi, haû Byu Yhangzo nghut é yanmai, Garai Gasang gi, tarâ jéyáng rà ahko ahkáng, Yhang lé byi bê nghut ri.

²⁸Shí hkyô lé hkâ-má hong nyí kó: lup pé má lúng tô é bang banshoq gi, Yhâng é htê lé wó gyo kôluí, htoq lô rà ahkyíng jé lò rà nghut lhê. ²⁹Ge é hkyô kut é bang gi, asak dui rà matú, dui toq kó rà nghut lhê; agè ashop hkyô kut é bang gi, mara byí é hui zo rà matú, dui toq kó rà nghut lhê. ³⁰Ngò gi, Ngá myit đông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sù ô nau é đông châng é sheq ru nghut lhê.

**Yesuq Eq Séng Luí,
Saksé Hkâm É Hkyô**

³¹ Ngá gûng lé ngò saksé hkâm é nghut jáng, ngò za saksé hkâm é hkyô gi, teng rá a nghut. ³² Ngá é hkyô lé saksé hkâm byí é Sû (Ngá Wa) góyuq nyi lhê; Ngò eq séng luí, haú yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan^{ss} chyáng byù nhang kat wú bekò nghut ri; yhang gi, haú tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi rá lé, ra luí a nghut, nghut kôlhang, nungmoq hkyi yu é wó hui rá matú sheq, haú su nghú taí é ru nghut lhê. ³⁵ Yohan gi, duq nyi é myi-bung su duqbó byí é nghut mù luí, nungmoq gi, haú duqbó é hkaú má, rayoq zo ngón nau nyi akò nghut ri.

³⁶ Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rá matú, haú Íwa, Ngo lé ap byí tô é nghut luí, haú Íwa, Ngo lé nhang kat é hkyô lé, saksé hkâm byí nyi ri. ³⁷ Hau htoq agó, haú Ngo lé nhang kat é sù Íwa le, Ngò eq séng luí saksé hkâm byí ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸ haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjínng kô é yanmai nghut ri. ³⁹ Nungmoq gi, haú Chyúmdang mai ahtum abyuq é asak wó yú rá nghut lhê ga myit yú kô é yanmai, haú Chyúmdang má ho wú akò nghut ri; nghut kôlhang, Chyúmdang haú gi, Ngò eq séng luí saksé hkâm byí ri; ⁴⁰ nghut kôlhang, asak wó yú rá matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê. ⁴² Nghut kôlhang, nung-

moq lé gi, Ngò sê lhê; nungmoq é i-myyit hkaú má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é mying mai jé lé é sù nghut kôlhang, nungmoq gi, Ngo lé a lhom hap yú kó; yhâng mying yhang lang é byù, gotú rayuq jé lé é ru nghut le gi, haú yuq lé, nungmoq lhom hap yú kó rá nghut lhê. ⁴⁴ Nungmoq gi, rayuq eq rayuq hkya-ôn lhúm é lé za hap yú luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhing, hkâsu kut wó lumjínng kó rá lú?

⁴⁵ Nghut kôlhang, haú Íwa é hí má, Ngò, nungmoq lé mara hún nhò hkângâm kó; nungmoq lé mara hun é sù gi, haú nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjínng kô é ru nghut le gi, Ngo lé le lumjínng kó rá nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjínng kô é nhing, Ngá dang lé, hkâsu kut wó lumjínng kó rá lú?" gâ ri.

**Byù Ngo Hkying Lé
Zoshuq Byi Tsô É Hkyô**

Mht 14:13-21; Mrk 6:30-44; Luk 9:10-17

6 Hau htâng a myáng má, Yesuq gi, Tiberi nhông le gâ é, Galile nhông he hpoq shut gú dap ló bê nghut ri. ² Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akò nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pê é Lhoql-hai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo rá muk, nga-nhúng, hkâmá è wó wuí rá lú?" ga taí ri. ⁶ Yesuq, haú su ga taí é gi, yhang

^{ss}5:33 Yohan shí yuq gi, Wui-myhup Sará Yohan nghut lhê.

lé chyam wú rã matú za nghut ri; hkâsu mù gâ le, hkâsu kut rã hkyô gi, Yhâng é myit má bo to gù bê nghut ri.

⁷Hpilip gi, Yhang lé, “Denari* í sho èq muk wui le lháng, rayuq ratsuí tsuí ngap rã a nghut.” ga tã taí ri.

⁸Haú hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹“Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlháng, byù shí myhò bang lé luq shoq, hkâsu kut wó gãm byi rã lúhú?” ga tã htoq kat ri.

¹⁰Yesuq gi, “Haú shiwa byu pé lé, zùng nhâng keq.” ga tã ri. Jowò haú gi, mhán htu é jang nghut mù, yuqgè wui baú lháng, ngo hkyîng kô zung tô bùm bekô nghut ri; ¹¹hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gãm byí ri. Haú eq rajung za, ngozo lé le haú su kut ri.

¹²Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, “Myit gyó tô é ajap azo pé lé châng guq tsîng yù keq. Haí le a langså pyám sháng gaq.” ga tã ri. ¹³Haú mù, yhangmoq gi, zô myhit tô é muk-yo muk ngo long mã é ajap azo pé lé châng guq tsîng le, raxe í mung byíng shoq wó guq tsîng yu akô nghut ri.

¹⁴Haú shiwa byu pé gi, Yesuq kut é limik kumlhá lé myàng kô é hkûn, “Shí yuq gi, mingkan htoq má jé lé lô rã gâ é, Myiqhtoi yhang nghut ri-nhung!” ga tã bum akô. ¹⁵Yesuq gi, yhangmoq lé mù, Yhang lé hkohkâm zik kut nhâng kó rã dâ é hkyô lé, sê é yanmai, Yhang baú tsik za bùm shut dum haq doq lô bê nghut ri.

Yesuq, Wuì Htoq Má Sô É Hkyô

Mht 14:22-27; Mrk 6:45-52

¹⁶Buigyum htâng, Yhâng é chángzô pé gi, haú nhông shut gyó lô mù, ¹⁷lhaí

má wang ji luí, nhông hé hpoq mã é Kaperna-um wà shut gù e lô akô; haú hkûn, mauchut bê nghut kôlháng, Yesuq gi, yhangmoq chyáng a jé gyó lo shi nghut ri. ¹⁸Haú u lé, laidun htan lo é yanmai, wuìlhêng toq lô bê nghut ri. ¹⁹Yhangmoq gi, sum myi déng kô lhaí kôn e lô kô é hkûn, Yesuq gi, nhông htoq mã so luí, haú lhaí shut chyâng lé lo nyi é lé myàng kômù, gyuq dan bùm bekô nghut ri. ²⁰Nghut kôlháng, Yesuq gi, “Hkâgyuq kó, Ngò ru nghut lhê.” ga yhangmoq lé tã ri. ²¹Haú mù, yhangmoq gi, Yesuq lé gabú myit èq lhaí hkaú má shuí hâng yù nau akô. Haú hkûn, lhaí haú gi, radá dâm yhangmoq jé nau é jang wuiyàm má jé bê nghut ri.

²²Nhông hé hpoq mã nyi tô é byù moq mó gi, haú má lhaí racham za joq laí lo é hkyô eq, lhaí haú má Yesuq a bo doq jì e za, chángzô pé baú ji htoq lô kô é hkyô lé, hau htang nyí, bûn sê kat akô nghut ri. ²³Haú hkûn, haú Yhum-sîng, jeju hkya-ôn é htâng, byu pé muk zô é jowò nãm mã, Tiberi myuq mã é lhaí pé jé lé bum ri. ²⁴Haú byù moq mó gi, Yesuq eq Yhâng é chángzô pé, haú mã a nyi lo kô é hkyô lé sé kô é yanmai, Yesuq lé châng hô rã matú lhaí haú pé má wang ji mù, Kaperna-um wà shut e lô akô nghut ri.

Yesuq, Asak Muk Nghut É Hkyô

²⁵Yhangmoq gi, nhông hé hpoq mã Yesuq lé myàng kôjáng, “Rabai ê, Nàng gi, shí má hkâ-nhám jé lé é lúhú?” ga, Yhang lé myí akô.

²⁶Haú hkûn, Yesuq gi, “Ngò, nungmoq lé teng za tã kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷Htên byuq sê é zoshuq é matú, hkâshikut kó; haú Byu Yhangzo byi rã

*6:7 Denari rachap gi, byù rayuq é ra-nyí é zuihpau eq wuí é nghut lhê.

nghut é ahtum abyuq é asak é matú, ru gîng nyi é zoshuq wó yû râ lé sheq shikut nyi keq. Yhâng chyáng gi, haû Íwa Garai Gasang mai Yhâng é saksé dizik tap to bê nghut lhê.” ga tâ ri.

²⁸ Haû mù, yhangmoq gi, “Garai Gasang ô nau é muzó pé zui saí râ matú, ngamoq haí kut ra râ lhú?” ga Yhang lé myí akô.

²⁹ Haû hkûn, Yesuq gi, “Garai Gasang nhang kat é Sû lé, lumjîng é gi, Garai Gasang ô nau é muzó nghut bê.” ga tâ ri.

³⁰ Haû mù luí, yhangmoq gi, Yhang lé, “Ngamoq myoq èq wó myâng luí, Nàng lé lumjîng râ matú, Nàng, haí jung limik kumlhá kut shit râ lhú? Nàng, haí jung kut shit râ lhú? ³¹ Haû Chyúmdang má, 'Yhang gi, yhangmoq zo râ matú, mauhkûng mai muk byí ri.'¹ ga kê tô é eq rajung za, ngamoq é îchyí îwa pé gi, haû yoso hkaû má mannaq muk zo bekô nghut lhê.” ga tâ akô.

³² Haû hkûn, Yesuq gi, yhangmoq lé, “Ngò, nungmoq lé teng za taí kôlé, nungmoq lé mauhkûng mai muk byí é Sû gi, Mosheq a nghut, haû Ngá Wa sheq, nungmoq lé mauhkûng mai tengmán é muk byí é Sû ru nghut lhê. ³³ Hkâsu mù gâ le, Garai Gasang byí é muk gi, mauhkûng mai gyó lé luí, haû mingkan lé asak byí é Sû nghut lhê.” ga tâ ri.

³⁴ Yhangmoq gi, “Yhumsîng ê, ahkuí mai, ngamoq lé muk haû hkâ-nhám le byí nyi laq.” ga chôm taí bum akô.

³⁵ Haû mù, Yesuq taí kyô é gi, “Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjîng é sù le, hkâ-nhám le wuîshit é hui râ a nghut. ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. ³⁷ Haû Íwa mai Ngo lé ap byí tô é

byû lunglhang bang gi, Ngá chyáng lé kó râ nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haû Ngo lé nhang kat Sû ô nau é hkyô gi, Yhang mai Ngo lé ap byí tô é bang mâ é rayuq lé lhang, Ngò, a lhoq hpyuq pyâm e za, jihtûm buinyi má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjîng é sù yuq hkanmó, ahtum abyuq é asak lé wó yû râ matú nghut lhê; Ngò le, jihtûm buinyi má haû bang lé lhoq dui toq râ nghut lhê.” gâ ri.

⁴¹ Haû mù, “Ngò gi, mauhkûng mai gyó lé é muk nghut lhê.” ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² “Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhú? Haû sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhú?” gâ bum akô.

⁴³ Haû hkûn, Yesuq gi, “Nungmoq ahkaû má hkâtaí put nyi kó. ⁴⁴ Haû Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jihtûm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lunglhang bang gi, Garai Gasang èq mhoq byí é hui kó râ nghut lhê.’¹¹ ga kê tô é eq rajung za, haû Íwâ chyáng mai gyo yù, mhoq yu é bang yuq hkanmó gi, Ngá chyáng lé kó râ nghut lhê. ⁴⁶ Haû gi, rayuq yuq mai, haû Íwa lé myang wú bê nghû nau é a nghut; Garai Gasang chyáng mâ é Sù za sheq, haû Íwa lé myang wú é Sù nghut lhê. ⁴⁷ Ngò, nung-

moq lé teng za taí kôlé, lumjínj é sù gi, ahtum abyuq é asak wó lhê. ⁴⁸Ngò gi, asak muk nghut lhê. ⁴⁹Nungmoq é íchýí îwâ pé gi, haù yoso hkaù má mannaq muk zo bekô nghut lhê; nghut kôle, shi byuq bekô nghut ri. ⁵⁰Nghut kôlhang, shí gi, mauhkúng mai gyó lé lo é muk nghut lhê; haù lé zô é sù gi, a shí lo rà nghut lhê. ⁵¹Ngò gi, mauhkúng mai gyó lé lo é, haù asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyì rà nghut lhê; muk shí gi, mingkan zô wui é asak matú, Ngò byi rà nghut é Ngá gungsho nghut lhê.” ga tũ taí ri.

⁵²Haù mù, haù Yudaq byu pé gi, “Byù shí yuq gi, nga-nhúng lé, Yhâng é gungsho hkâsu kut wó byi tso rà lú?” ga, yhangmoq yhangchang dang htíng htíng lhúm bum akô.

⁵³Haù hkún, Yesuq gi, yhangmoq lé, “Ngò, nungmoq lé teng za taí kôlé, haù Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rà a nghut. ⁵⁴Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jìhtúm buinyì má, haù yuq lé lhoq dui toq yù rà nghut lhê. ⁵⁵Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyì luí, Ngò le haù yuq má nghut nyì bê nghut lhê. ⁵⁷Haù rù dui nyì é Îwa gi, Ngo lé nhang kat luí, Ngò gi, haù Îwâ é yanmai, dui nyì é eq rajung za, Ngá é gungsho lé zô é sù gi, Ngá é yanmai, dui nyì rà nghut lhê. ⁵⁸Shí gi, mauhkúng mai gyó lé lo é muk nghut lhê. Nungmoq é íchýí îwâ pé gi, mannaq muk zo kôle, shi byuq bekô nghut ri; nghut kôlhang, muk shí lé zô é sù gi, ahtum abyuq dui nyì rà nghut lhê.” ga taí ri. ⁵⁹Dang haù pé gi, Yesuq,

Kaperna-um wà mâ é tarajong má mhoqshít nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰Yhâng é chángzô pé myo myo gi, haù lé wó gyo kôjáng, “Dang shí gi, gyaì wui ri. Ó yuq wá wó cháng rà lú?” ga taí bum akô.

⁶¹Yesuq gi, haù eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, “Dang shi é yanmai, nungmoq myit htên bum akô lú?” ⁶²Haù Byu Yhangzo gi, Yhang nyi laí lò bê jowò shut taù doq ló é lé, nungmoq myàng kô é nghut le gi, hkâsu nghú kó rà lú?” ⁶³Haù Woi-nyí gi, asak byí lhê; gungsho kúm gi, haì le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴Nghut kôle, nungmoq chyáng mâ é ra-am gi, a lumjínj kó nghut ri.” ga taí ri. Hkâsu mù gâ le, ô pé gi, a lumjínj kó rà eq, ó yuq gi, Yhang lé ap pyám rà nghut é hkyô lé, Yesuq gi, sâng-hi mai sê to gù bê nghut ri. ⁶⁵Yhang xoq taí é gi, “Haù su mù, haù Îwâ èq ahkáng byí é sù za a nghut le gi, ó yuq le Ngá chyáng wó lé rà a nghut nghú, Ngò, nungmoq lé taí kyo wú bê nghut lhê.” gâ ri.

⁶⁶Haù dàm mai, Yhâng é chángzô pé myo myo gi, Yhâng htàng a cháng lo kô e za, taù ló byuq bùm bekô nghut ri.

⁶⁷Haù su mù, Yesuq gi, haù chángzo raxe í yuq lé, “Nungmoq le, ló byuq nau akô, a nghut lú?” ga myí ri.

⁶⁸Haù hkún, Simun Petruq gi, “Yhum-sîng ê, Nàng gi, ahtum abyuq é asak mungdang wó Sù nghut to bê lé nhíng, ngamoq gi, ó yuq chyáng ê shirà lú?” ⁶⁹Nàng gi, Garai Gasâng é Chyoiyúng Sù nghut é lé, ngamoq, lumjínj lhê, sê nyi lhê.” ga, Yhang lé tũ taí ri.

⁷⁰Haù hkún, Yesuq gi, “Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mâ é rayuq gi, nat

nghut ri.” ga tũ taĩ ri. ⁷¹ (Yhang gi, haũ Simun Iskarut é yhangzo, Yudaq lé taĩ nau é nghut ri; haũ yuq gi, chángzo raxe í yuq má bò sũ nghut kôle, htâng má, Yhang lé ap pyám rà sũ nghut ri.)

Yesuq Eq Yhâng É Gumang Wui

7 Hau htâng má, Yesuq gi, Yhang lé sat rà matú, Yudaq byu pé ho nyi bùm kô é yanmai, Yuda mau má a kãm sô wún mù, Galile mau má sô lhing wún ri. ² Nghut kôlhang, haũ Yudaq byu pé é Saksé Zúm Poĩ chyâng lo nyi é hkũn, ³ Yesuq é yhanggu yuqzô pé gi, Yhang lé, “Nàng é chángzô pé gi, Nàng kut é laklaĩ kumlhá pé lé myàng kó sháng gaq, Nàng, shĩ mai htoq ló luĩ, Yuda mau shut e ló aq. ⁴ Mying hu nau é sũ gi, hkaũ zaũ luĩ haĩ le a kut wú é nghut lhê. Nàng gi, haũ pé lé kut nyĩ bê nghut é yanmai, mingkan lé, Nàng gũng tũn shit aq.” ga taĩ akô. ⁵ Hkãsu mù gâ le, yhanggu sing yuqzô pé lháng, Yhang lé a lumjing kó nghut ri.

⁶ Haũ mù luĩ, Yesuq gi, yhangmoq lé, “Ngá é ahkying gi, a jé shi nghut ri; nungmoq é ahkying kúm gi, hká hkũn le joq nyi ri. ⁷ Haũ mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haĩ mù gâ le, yhang kut é hkyô gi, agè ashop é nghut é lé, Ngò, saksé tũn shit é yanmai nghut ri. ⁸ Nungmoq gi, poĩ haũ shut doq ló keq. Ngò kúm gi, Ngá é ahkying a jé shi nghut é yanmai, poĩ haũ shut a doq ló shirã nghut lhê.” ga taĩ ri. ⁹ Haũ su ga taĩ luĩ, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haũ poĩ shut doq ló byuq é htâng má, Yhang gi, de de a nghut é đông, tsik za châng doq ló bê nghut ri. ¹¹ Yudaq byu pé gi, haũ poĩ má, Yhang lé châng hô kômù, “Haũ yuq gi, hkãmá nghut lhê lú?” ga, myi wún akô nghut ri.

¹² Haũ byũ hpũng hkaũ má, Yhang eq séng luĩ taĩ lhũm bùm kô é má, ra-am gi, “Yhang gi, byũ gè nghut ri.” ga taĩ kôjáng, ra-am gi, “A nghut, Yhang gi, byu pé lé hkyô shuĩ ngoq sũ nghut ri.” ga tũ taĩ akô. ¹³ Nghut kôlhang, haũ Yudaq suwún wuĩ lé gyuq kô é yanmai, ó yuq le, Yhang eq séng é hkyô lé de de a wám taĩ kó nghut ri.

Haũ Poĩ Má, Yesuq Mhoqshit É Hkyô

¹⁴ Haũ poĩ rawuĩ nghut ló é hkũn, Yesuq gi, noqkuq yhũm má doq ê luĩ, mhoqshit hi ló bê nghut ri. ¹⁵ Haũ hkũn, Yudaq byu pé gi, gyô maũ byuq kômù, “Shĩ yuq gi, mhoq yu é hkyô le a joq wú é wá, haũ-ĩ hkãsu mù sê lhê laq?” ga myi bum akô.

¹⁶ Haũ mù, Yesuq tũ taĩ é gi, “Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng mã é nghut a nghut é eq, Ngá é myit đông taĩ é dang nghut a nghut é lé, yhang sê gàm hkoq yũ rà nghut lhê. ¹⁸ Yhumsing é myit đông taĩ é sũ gi, yhumsing é matú aróng hô sũ nghut ri; nghut kôlhang, yhumsing lé nhang kat su é matú, aróng ho é sũ gi, tengmán é byũ nghut ri; yhang má, a tengmán é hkyô haĩ le a bò nghut ri. ¹⁹ Mosheq gi, nungmoq lé jep é tarã byĩ to bê, a nghut kó lú? Nghut kôlhang, nungmoq ó yuq le, jep é tarã haũ lé a cháng kó nghut ri. Haĩ mù luĩ, Ngo lé sat nau nyi akô lú?” gâ ri.

²⁰ Haũ hkũn, haũ byũ hpũng gi, “Nàng gi, nat gang wang to sũ nghut ri-nhung! Nang lé, ó yuq wá sat nau nyi ri lú?” ga tũ taĩ akô.

²¹ Yesuq gi, yhangmoq lé, “Ngò, laklaĩ kumlhá ralhũm kut jáng, nungmoq banshoq bang gi, maũ byuq bum akô. ²² Nghut kôlhang, nungmoq gi, ahpyo-kuq hpyit byĩ é hkyô lé, Mosheq byĩ

é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí íwâ pê chyáng mai lo é ru nghut lhê.). ²³ Haú, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byù rayuq é gùng gón lé, Ngò lhoq gê byí é yanmai, Ngo lé nhikjum yô akô lhú? ²⁴ Byù du lé wú luí hkájéyáng kó; tengmán é dông sheq jéyáng keq.” ga taí ri.

Yesuq Gi, Hkrisduq Nghut Lhê Lhú?

²⁵ Haú mù luí, Yerusalem wà mó má é byu pé ra-am gi, “Haú yhangmoq sat pyám nau nyi é sù gi, shí yuq a nghut lhi?

²⁶ Yhang gi, shí má de de dáng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haú ahkáng ayá wó bang gi, gè gè yhang, sê akô abe? ²⁷ Haú Hkrisduq jé lé é hkún gi, Yhang hkâmai lé lo é lé, ó yuq lhang sé rà a nghut.” ga taí bum akô. Nghut kôlhang, shí yuq gi, hkâmâ é sù nghut é lé, nga-nhúng sê lhê;

²⁸ Haú mù, Yesuq gi, noqkuq yhùm wàng má mhoqshit uchyang, htê mó èq taí kat é gi, “Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê.” gâ ri.

³⁰ Haú mù, yhangmoq gi, Yhang lé chyup rà dâ akô; nghut kôlhang, Yhâng é ahkýng a jé shí é yanmai, Yhang lé chyup rà matú, ó yuq le loq a jé kó nghut ri. ³¹ Nghut kôlhang, byù hpûng hkaú má é bang myo myo gi, Yhang lé lumjúng

bùm kôluí, “Haú Hkrisduq jé lé é hkún, Yhang gi, shí yuq htoq má, limik kumlhá pé je wó kut shit rà lhú?” ga taí bum akô nghut ri.

³² Haú Hparishe pé gi, haú byù hpûng hkaú má, Yesuq eq sêng é hkyô lé, haú su ga dangsoq soq lhùm nyi kô é hkyô lé wó gyô yu akô. Haú mù, haú hkyangjong agyi pé eq Hparishe pé gi, Yhang lé é chyup rà matú, noqkuq yhùm zúng é bang lé nhang kat akô.

³³ Haú hkún, Yesuq gi, “Ngò gi, nungmoq eq rahá rayoq zo za nyi rà nghut lhê; hau htâng, Ngo lé nhang kat Su chyáng taú ló rà nghut lhê. ³⁴ Haú hkún, nungmoq gi, Ngo lé hô kôlhang, myang hô kó rà a nghut; Ngò nyi é jang má, nungmoq wó jé kó rà a nghut.” ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, “Shí yuq gi, Yhang lé nga-nhúng a myang hô loshoq, hká shut e byuq rà dâ lhê lhú? Yhang gi, Grik byu pé má nyi byo myín tô é nga-nhúng é byu pé nyi é jowò má é mù, Grik byu pé lé, é mhoqshit rà dâ lhê lhú? ³⁶ Nungmoq gi, Ngo lé hô kôlhang, myang hô kó rà a nghut.’ gâ é eq, Ngò nyi é jang má, nungmoq wó jé kó rà a nghut.’ gâ é, Yhang taí é dang gi, haí jung wá gá naú é nghut lhê lhú?” gâ akô.

³⁷ Haú lô htâng é eq je ahkyak é Poí buinyì má, Yesuq toq yap luí, htê mó èq taí é gi, “Wuì shit sù gi, Ngá chyáng lé mù, shuq sháng gaq. ³⁸ Ngo lé lumjúng é sù ó yuq nghut kôle, haú Chyúmdang má taí tô é eq rajung za, Yhâng chyáng mai asak uchyâm é wuilàng yui htoq lô rà nghut lhê.” gâ ri. ³⁹ Yhang haú su gâ é gi, Yhang lé lumjúng é bang myang hap yù rà nghut é, haú Woi-nyí lé taí é nghut ri. Haú hkún jé shoq, haú Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hù é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, “Shí yuq gi, gè gè yhang, Myiqhtoi haù nghut ri.” ga taí akô.

⁴¹ Ra-am gi, “Shí yuq gi, Hkrisduq nghut ri.” ga taí akô. Góbang nghut jáng, “Hkrisduq wá Galile mau mai htoq lé rá nghut lhê lúhú? ⁴² Haù Chyúmdang má, Hkrisduq gi, Dawiq é awut ashín mã é nghut luí, Dawiq nyi lai lo é Betlehem wà mai htoq ló rá nghut lhê gâ é, a nghut lúhú?” ga myí bum akô nghut ri. ⁴³ Haù mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjínq Kô É Hkyô

⁴⁵ Hau htâng má, haù noqkuq yhùm zúng bang gi, haù hkyangjong agyi pé eq Hparishe pê chyáng taù ló kô é hkùn, haù bang gi, yhangmoq lé, “Nungmoq, haù mù luí, Yhang lé a shuí lo kô é lúhú?” ga lhom myí akô.

⁴⁶ Haù hkùn, haù noqkuq yhùm zúng bang gi, “Shí yuq su ga taí é byù gi, ó le a nyi wú é nghut lhê.” ga taí kyô akô.

⁴⁷ Haù mù, haù Hparishe pé gi, “Nungmoq lé le, Yhang èq mhoq hpyoq yù bekô lúhú? ⁴⁸ Haù zaù wui chyáng le, Hparishe pê chyáng le, Yhang lé lumjínq é byù bò akô lúhú? ⁴⁹ A bò! Nghut kôlhang, haù jep é tarâ lé a sê é byù moq mó shí gi, nhíng pyâm é hui bekô nghut ri.” ga nhik-yô é dông tú taí kat akô nghut ri.

⁵⁰ Nghut kôlhang, yhangmoq hpúng má bo é, hí hkùn Yesuq chyáng e wú bê sù nghut é, Nikodimu gi, ⁵¹ “Nga-nhúng é tarâ gi, byù rayuq lé, yhang é dang hí a gyô wú é eq, yhang haù kut é lé a sê e za, mara byi lhê lúhú?” ga, yhangmoq lé myí ri.

⁵² Haù hkùn, yhangmoq gi, “Nàng le, Galile mau byù nghut lhê lúhú? Galile mau mai myiqhtoi rayuq lháng a htoq é hkyô lé, nàng gon wú aq, haù jáng sé rá nghut lhê.” ga tú taí akô.

⁵³ Hau htâng, yuq hkangmó gi, ó le ô yhùm shut taù ló byuq bùm bekô nghut ri.†

Yesuq Lé, Lé Myí Chyam Wú Kô É Hkyô

8 Yesuq kúm gi, Tsanlun Bùm shut e ló bê nghut ri. ² Htang napkyó nap-sùn noq le, Yesuq gi, noqkuq yhùm wàng hkaù má dum ê luí, byu pé lhunglhang gi, Yhâng é lhinghkyuq má lé zíng bum akô; haù mù, Yhang gi, zung to luí, yhangmoq lé mhoqshit ri. ³ Haù hkùn, haù tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gûng má shap to kôluí, ⁴ Yesuq lé, “Sará ê, myiwe myhí shí lé, sulàng shut nyi é má myang chyup yu é nghut lhê. ⁵ Haù Mosheq é tarâ má gi, shí su é myiwe lé, luqgok èq dú sat pyám keq ga, nganhnúng lé hkunmó hkyô tô ri. Ahkuí, Nàng gi, hkâsu nghû rá lúhú?” ga myí akô. ⁶ Yhangmoq haù su ga myí é hkyô gi, Yhang lé mara wó hùn shoq ga, chyam wú rá matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaù kâ nyi ri. ⁷ Yhang lé, yhangmoq ru jang myí nyi kô é hkùn, Yhang gi, yap nyhang kat mù, yhangmoq lé, “Nungmoq mã é mara a wó é sù hí, myiwe myhí shí yuq lé luqgok èq dú sháng gaq.” ga taí ri. ⁸ Hau htâng, Yhang gi, dum ngóm luí, myigùng má kâ nyi ri.

⁹ Yhangmoq gi, haù su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí,

†7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

Yesuq baú za myit gyó tô é eq, myiwe myhí haú jâng yap nân tô ri. ¹⁰ Yesuq gi, yap nyhang kat luí, yhang lé, “Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?” ga myí ri.

¹¹ Yhang gi, “Yhumsíng ê, ó yuq le mara a byi kó nghut ri.” ga tú taí ri.

Haú hkún, Yesuq gi, “Ngò le, nàng lé mara a byi, ló aq hkoí, ahkuí mai mara hkádum kut shut lo.” ga taí kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkún, “Ngò gi, mingkân é maubó nghut lhê; Ngá htàng châng é sù ó yuq nghut kôle, mauchut hkaú má hkâ-nhám le so rã a nghut, asak maubó lé wó rã nghut lhê.” ga taí ri.

¹³ Haú mù, haú Hparishe pé gi, “Wú aq, Náng gûng Nàng saksé hkâm yu é nghut ri; Náng é saksé gi, teng rã a nghut.” ga taí akô.

¹⁴ Haú hkún, Yesuq gi, “Ngá gûng Ngò saksé hkám kôlhang, Ngá é saksé gi, têng lhê; hkâsu mù gâ le, Ngò gi, Ngò hkâ-mai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵ Nungmoq gi, byú hkyam dông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé nhang kat é sù Íwa eq rahá nghut nyi lhê. ¹⁷ Haú nungmoq é tará má yhang le, í yuq mai hkâm é saksé gi, têng lhê ga kâ tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haú Ngo lé nhang kat é sù Íwa le, Ngá é matú saksé hkám byí é nghut lhê.” ga tú taí ri.

¹⁹ Haú mù, yhangmoq gi, Yhang lé, “Náng Wa gi, hkâmá lhú?” ga myí kôjáng, Yhang gi, “Nungmoq gi, Ngo lé le, Ngá Wa lé le, a sé kó nghut ri; nung-

moq, Ngo lé sé kô é nghut le gi, Ngá Wa lé le, sé kó rã nghut lhê.” ga tú taí ri. ²⁰ Dang haú pé gi, haú noquq yhûm wàng hkaú mâ é alu kat jang nàm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

²¹ Haú mù luí, Yesuq gi, yhangmoq lé, “Ngò gi, ló byuq rã nghut lhê, haú hkún, nungmoq Ngo lé hô kó rã, yhumsing é mara má le shí kó rã nghut lhê. Ngò ló é jang má, nungmoq wó jé kó rã a nghut.” ga, radàm dum puq taí ri.

²² Hau é yanmai, haú Yudaq byu pé gi, “Ngò ló é jang má, nungmoq wó jé kó rã a nghut.’ gâ é gi, Yhânggûng yhang sat shí rã gâ é nghut lhê lhú?” ga myi bum akô.

²³ Nghut kôlhang, Yesuq xoq taí é gi, “Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shí eq sêng é bang nghut akô; Ngò kúm gi, mingkan shí eq sêng é sù a nghut. ²⁴ Haú mù, nungmoq gi, yhumsing é mara má shí kó rã nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shí kó rã nghut lhê.” gâ ri.

²⁵ Haú hkún, yhangmoq gi, “Nàng, ó yuq nghut lhê?” ga myí kôjáng, Yesuq gi, “Ngò ó yuq nghut é lé, Ngò, hkâ-nhám le taí nyi bê nghut lhê. ²⁶ Ngò gi, nungmoq eq séng luí, taí rã hkyô eq jéyáng rã hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyó yu é gû lé, Ngò, mingkan lé taí kyô lhê.” ga tú taí ri.

²⁷ Yesuq gi, yhangmoq lé, Yhâng Wa eq séng é hkyô taí kyô nyi é lé, yhangmoq gi, a sê gyo kó nghut ri. ²⁸ Haú mù luí, Yesuq gi, “Haú Byu Yhangzo lé nung-

moq tu shap[‡] kat é hkûn sheq, Ngò gi, haù Yuq nghut é hkyô lé le, yhum-sing myit dông haì le a kut e za, haù Ìwa mhoq byì é dông za taì é hkyô lé le, nungmoq sé kó rà nghut lhê. ²⁹ Haù Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yan-mai, Yhang gi, Ngo lé baù za a tô pyâm to nghut ri.” ga taì ri. ³⁰ Yhang, haù su taì nyi é u lé háng, byù myo myo gi, Yhang lé lumjng bùm bekô nghut ri.

Abraham É Awut Ashín Pê Hkyô

³¹ Haù mù, Yesuq gi, Yhang lé lumjng é Yudaq byu pé lé, “Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haù tengmán hkyô lé sé kó rà nghut luí, haù tengmán hkyô gi, nungmoq lé lhoq lhut kat rà nghut lhê.” ga taì ri.

³³ Haù hkûn, yhangmoq gi, “Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haù mù, 'nungmoq lé lhoq lhut kat rà' nghù Nang hkâsu kut wó taì lhê lú?” ga tũ taì akô.

³⁴ Yesuq dum tũ taì é gi, “Ngò, nungmoq lé teng za taì kôlé, mara kut shut é sù gi, marâ é jùn nghut lhê. ³⁵ Jùn gi, yhùm ikun eq hkâ-nhám le sêng nyi rà a nghut; zo kúm gi, ikun eq ahtum abyuq sêng lhê. ³⁶ Haù mù luí, haù Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat rà dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taì kyô nyi lhê; nungmoq le, nungmoq é Ìwa chyáng

mai wó gyô yu é eq rajung za kut nyi akô nghut ri.” gâ ri.

³⁹ Haù hkûn, yhangmoq gi, “Ngamoq é Ìwa gi, Abraham nghut lhê.” ga tũ taì kôjáng, Yesuq gi, “Nungmoq, Abraham é yhangzô pé nghut é nghut le gi, Abraham kut é su kut kó rà nghut lhê. ⁴⁰ Nghut kôlhang, nungmoq gi, haù Garai Gasâng chyáng mai wó gyô yu é tengmán hkyô lé taì kyo sù nghut é Ngo lé, sat pyám nau akô nghut ri. Haù sù é hkyô gi, Abraham a kut é nghut lhê. ⁴¹ Nungmoq gi, nungmoq é Ìwa kut é muzó lé yhang, kut nyi akô.” ga taì ri.

Haù hkûn, yhangmoq gi, “Ngamoq gi, dezo amyú a nghut; ngamoq gi, Ìwa rayuq za wó lhê; haù gi, Garai Gasâng nghut lhê.” ga taì he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, “Garai Gasâng gi, nungmoq é Ìwa nghut é nghut jáng, nungmoq gi, Ngo lé chyitdap kó rà nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haì mù Ngá é dang lé a sê gyo kô é lú gâ le, Ngò taì é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haù nungmoq é Ìwa nghut é nat Tsadán eq sêng é bang nghut luí, nungmoq é Ìwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haù tengmán hkyô má a yap gîng nyi nghut ri. Yhang gi, mhaù é hkûn, yhâng é myit má bo é dông taì ri; hkâsu mù gâ le, Yhang gi, byù mhaù nghut luí, mhaù hkyô pé é Ìwa nghut ri. ⁴⁵ Haù su mù, Ngò, nungmoq lé, haù tengmán hkyô taì kyô é yanmai,

[‡]8:28 Tu shap gâ é lichyúm gi, tapzng htoq má jén sat pyám rà gâ é nghut lhê.

nungmoq gi, Ngo lé a lumjúng kó nghut ri. ⁴⁶Nungmoq mâ é ó yuq wá, Ngo lé mara bo lhê nghũ saksé wó tũn shit akô lhú? Ngò gi, haũ tengmán hkyô lé taĩ nyi é nghut le nhĩng, nungmoq, Ngo lé haĩ mù a lumjúng kô é lhú? ⁴⁷Garai Gasang eq sêng é sũ gi, Garai Gasang taĩ é dang lé gyô lhê. Nungmoq a gyo kô é gi, nungmoq, Garai Gasang eq a sêng kô é yanmai nghut ri.” ga taĩ ri.

Yesuq Eq Abraham

⁴⁸Haũ hkũn, haũ Yudaq byu pé gi, Yhang lé, “Nàng gi, Samariq byũ nghut é htoq agó, nat gang wang júng to sũ nghut lhê nghũ, ngamoq taĩ é dang gi, jô lhê a nghut lhú?” ga myĩ akô.

⁴⁹Yesuq gi, “Ngò gi, nat gang wang júng é hui sũ a nghut; Ngò gi, Ngá Wa lé sheq hkunggá é ru nghut lhê; nungmoq kúm gi, Ngo lé taĩ hpoĩ nyi akô nghut ri. ⁵⁰Ngò gi, Ngá é matú aróng ho nyi é a nghut; nghut kôlhàng, hô byi Sũ rayuq nyi lhê, haũ yuq jéyáng sháng gaq. ⁵¹Ngò, nungmoq lé teng za taĩ kôlé, Ngá dang lé châng é sũ gi, hkâ-nhám le, shĩ rã a nghut.” ga taĩ ri.

⁵²Hau é yanmai, haũ Yudaq byu pé gi, “Nàng gi, nat gang wang júng to sũ nghut é lé, ahkuĩ, ngamoq sé bê! Abraham gi, shi byuq bê; haũ myiqhtoĩ pé le, shi byuq bekô nghut ri; nghut kôlhàng, Nàng gi, 'Ngá dang lé châng é sũ gi, hkâ-nhám le, shĩ rã a nghut.' ga taĩ ri. ⁵³Nàng gi, ngamoq é iwa Abraham htoq hkik lhê lhú? Yhang gi, shi byuq bê; haũ myiqhtoĩ pé le, shi byuq bekô nghut ri. Náng gũng nàng ó yuq su ngàm lhê lhú?” ga taĩ akô.

⁵⁴Yesuq gi, “Ngá gũng Ngò lhoq gyaũ yu é nghut jáng, Ngá é aróng gi, hai hpauđap é a nghut; nghut kôlhàng, haũ

nungmoq é Garai Gasang nghut lhê ga nungmoq taĩ é sũ, Ngá Wa gi, Ngo lé lhoq gyaũ é sũ ru nghut lhê. ⁵⁵Nungmoq gi, Yhang lé a sé kó nghut ri; nghut kôlhàng, Ngò gi, sê lhê. Yhang lé a sé nghũ Ngò taĩ é ru nghut le gi, Ngò le nungmoq su byũ mhaũ dut rã nghut lhê; nghut kôlhàng, Ngò gi, Yhang lé sé luĩ, Yhâng é dang gyo sũ nghut lhê. ⁵⁶Nungmoq é iwa Abraham gi, Ngo lé rã buinyĩ lé myoqbyu gabũ nyi é nghut luĩ, myàng mù, gabũ bê nghut ri.” ga tũ taĩ ri.

⁵⁷Haũ hkũn, haũ Yudaq byu pé gi, Yhang lé, “Nàng gi, asak ngo xê zàn lháng a nghut shĩ é nhĩng, Abraham lé myàng wú é nghut lhê lhú?” ga taĩ akô.

⁵⁸Yesuq gi, “Ngò, nungmoq lé teng za taĩ kôlé, Abraham lháng a hkũ shi má, Ngò nyi gũ bê nghut lhê.” ga tũ taĩ ri. ⁴

⁵⁹Haũ mù luĩ, yhangmoq gi, Yesuq lé, dú rã ga luqgok kui yu akô; nghut kôlhàng, Yesuq gi, haũ noqkuq yhũm mai haq htoq ló byuq bê nghut ri.

Myoqjit Sũ Lé Lhoq Gê Byĩ É Hkyô

9 Yesuq gi, sô yông ló nyi é u lé, hku lé é mai myoqjit to gũ nghut é byũ rayuq lé myang ri. ²Haũ hkũn, Yhâng é chángzô pé gi, Yhang lé, “Rabai ê, shĩ yuq, myoqjit gũ hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhâng nu yhâng wa kut shut é lhú?” ga myĩ akô.

³Yesuq tũ taĩ é gi, “Haũ gi, yhang kut shut é yanmai le a nghut, yhâng nu yhâng wa kut shut é yanmai le a nghut; haũ Garai Gasang é muzó lé, yhang má wó lhoq htoq shit rã matú, haũ dut é ru nghut lhê. ⁴Nga-nhũng gi, haũ Ngo lé nhang kat Su é muzó lé, nyĩ nghut tô ashĩ hkũn, zui saĩ nyi ra rã dut lhê, myĩn

¶8:58 Bun zo shĩ má, Yesuq gi, Yhânggũng yhang Garai Gasang nghut lhê gã nyi nghut ri.

¶8:58 Htoq Ló 3:14

jé jáng gi, ó yuq le, mô wó zui saí rã a nghut. ⁵Ngò gi, mingkan htoq má nyi tô é u lé, mingkân é maubó nghut lhê.” gã ri.

⁶Yhang gi, haû su ga taí luí, myigùng má sòkan byé hkyó mù, tse-nyhaq saí yù luí, haû yuq é myoqjí má but byí ri. ⁷Hau htàng, haû yuq lé, “Haû Siloam wuìhtum má ê chí pyám aq.” ga taí ri. (Siloam gã é gi, nhang é gã é lichyúm nghut lhê.). Haû mù, haû yuq gi, ê chí mù, myoq myàng luí, yhùm shut ló bê nghut ri.

⁸Haû yhâng é yhumkyo bang eq yhang dung zô wún é lé myang wú é bang gi, “Shí yuq gi, haû zung to mù, dung zo zo lhaq kut é sù, a nghut kó lhú?” ga myí bum akô. ⁹Ra-am gi, “Haû yuq nghut lhê.” gã bum akô.

Góbang gi, “A nghut, haû yuq su dut e za ru nghut lhê.” ga taí akô.

Nghut kôlhang, yhang gi, “Ngò, haû yuq yhang nghut lhê.” ga taí ri.

¹⁰Haû hkûn, yhangmoq gi, “Haû nghut le gi, náng myoq hkâsu kut wó myang é lhú?” ga myí akô.

¹¹Yhang gi, “Haû Yesuq gã é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuìhtum má ê chí pyám aq.' ga ngo lé taí ri; haû mù, ngò ê chí pyám é htàng má, ngá myoq wó myang é nghut lhê.” ga tú taí ri.

¹²Haû hkûn, yhangmoq gi, “Byù haû yuq gi, hkâmá nyi ri lhú?” ga, yhang lé myí akô.

Yhang gi, “Ngò a sé.” ga taí ri.

Myoq Dum Myang Byuq É Hkyô Lé, Hparishe Pé Gòn Wú É Hkyô

¹³Yhangmoq gi, haû myoqjit wú bê sù lé, Hparishe pê chyáng shuí lé akô.

¹⁴Yesuq, tse-nyhaq saí yù mù, haû yuq é myoq lé lhoq myàng byí é buinyi gi, Bánno buinyi nghut ri. ¹⁵Haû mù, yhang, myoq hkâsu kut wó myang é hkyô lé, haû Hparishe pé le dum myí

akô. Haû jáng, yhang gi, “Haû yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê.” ga tú taí ri.

¹⁶Haû Hparishe pé ra-am gi, “Shí yuq gi, Bánno buinyi é tarã lé a châng é sù nghut é yanmai, Garai Gasâng chyáng mai lé é sù a nghut.” ga taí akô.

Nghut kôlhang, ra-am gi, “Yubak dap sù rayuq gi, haû su é limik kumlhá pé lé, hkâsu wó kut htoq rã lhú?” ga myí akô. Haû mù, yhangmoq gi, myit a huí lhùm bùm lò kó nghut ri.

¹⁷Haû mù, yhangmoq gi, haû myoqjit wú sù shut lhing mù, “Nang lé myoq lhoq myàng byí é sù gi, hkâsú é byù nghut lhê nghú, nàng taí rã lhú?” ga dum myi kôjáng, “Yhang gi, myiqhtoi rayuq nghut ri.” ga, yhang tú taí ri.

¹⁸Haû Yudaq byu pé gi, haû yuq myoqjit wú é hkyô lé le, ahkuí myoq dum myàng bê nghut é hkyô lé le, haû yhâng nu eq yhâng wa lé, ê ji lò nhang é hkûn jé shoq, a lumjín kó nghut ri. ¹⁹Haû mù, Yhangmoq gi, haû yhâng nu eq yhâng wa lé, “Shí yuq gi, nungnhik é yhangzo nghut lhê lhú? Hku lé é hkûn mai, myoqjit gù nghut lhê lhú? Yhang, ahkuí, hkâsu kut wó myang é lhú?” ga myí akô.

²⁰Haû hkûn, yhâng nu eq yhâng wã nhik gi, “Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

²¹Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myàng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo rã nghut lhê.” ga tú taí akô.

²²Haû yhâng nu eq yhâng wã nhik gi, Yudaq byu pé lé gyuq kô é yanmai, haû su ga taí kô é nghut ri; hkâsu mù gã le, Yesuq gi, haû Hkrisduq nghut lhê ga yín yu é sù, ó yuq lé nghut kôle, haû tara-jong mai lhoq htoq pyám rã nghut lhê ga, haû Yudaq suwún wuí chôm myit hpýt

to bekô nghut é yanmai nghut ri. ²³Hau é yanmai, yhang nu eq yhang wâ nhik gi, “Yhang, asak wáng bê, yhang lé myí wú keq.” ga taí kô é nghut ri.

²⁴Haú Hparishe pé gi, myoqjit wú bê sù háu yuq lé dum ji yù mù, “Garai Gasang lé za hkya-on waq toq aq! Háu yuq gi, yubak dap sù rayuq nghut é lé ngamoq sê lhê.” ga taí akô.

²⁵Haú hkûn, yhang tû taí é gi, “Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê.” gâ ri.

²⁶Hau htâng, yhangmoq gi, “Yhang, nang lé haí kut byí ri lúhú? Náng é myoq lé, yhang, hkâsu kut lhoq myâng byí ri lúhú?” ga, yhang lé myí akô.

²⁷Haú hkûn, yhang gi, “Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lúhú? Nungmoq le, Yhâng é chángzô pé dut nau akô lúhú?” ga taú myí ri.

²⁸Haú mù, yhangmoq gi, yhang lé gyaí rhoí é đông mai, “Nàng gi, háu yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

²⁹Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, háu yuq eq séng luí, Yhang gi, hkâmai lé é sù nghut é lé lhang, ngamoq a sé.” ga taí akô.

³⁰Haú hkûn, háu yuq gi, “Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹Garai Gasang gi, yubak dap bâng é dang lé a gyo byí é hkyô lé, nganhúng sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo byí lhê. ³²Hku lé é hkûn mai myoqjit gù nghut é byù lé, ó yuq eq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. ³³Haú yuq gi,

Garai Gasâng chyáng mai lé é sù za a nghut le gi, haí le wó kut râ a nghut.” ga tû taí ri.

³⁴Haú su ga jáng, yhangmoq gi, “Nàng gi, yubak htui má hku lé é sù nghut to luí nhîng, ngamoq lé wám mhoqshit lhê lúhú?” ga tû taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵Yesuq gi, háu yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, “Nàng gi, háu Byu Yhangzo lé lumjîng lhê lúhú?” ga myí ri.

³⁶Haú hkûn, háu yuq gi, “Yhumsîng ê, háu gi, ó yuq nghut lhê lúhú? Yhang lé, ngò wó lumjîng sháng gaq, taí kyo laq.” ga myí ri.

³⁷Yesuq gi, “Nàng, háu yuq lé myàng wú bê nghut lhê; ahkuí, nàng eq dáng nyo nyi é sù gi, háu yuq yhang nghut lhê.” ga taí ri.

³⁸Haú mù, háu yuq gi, “Yhumsîng ê, ngò lumjîng lhê!” ga taí luí, Yhang lé noqkuq ri.

³⁹Haú hkûn, Yesuq gi, “Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shî má Ngò jé lé é nghut lhê.” ga taí ri.

⁴⁰Yhang eq rahá nghut nyi é Hparishe pé ra-am gi, Yhang háu su ga taí é lé wó gyo kôjáng, “Hkâsu htà? Ngamoq gi, myoqjit bang dut bê lúhú?” ga myí akô.

⁴¹Haú hkûn, Yesuq gi, “Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

Sau Zúng Sù Eq Sau Hpúng

10 Ngò, nungmoq lé teng za taí kôlé, háu sau hkup má, hkúmdong mai a wang e za, gó hkyô đông doq lut wang

é sũ gi, hkau sũ eq damyaq nghut ri. ²Haũ hkúmdong mai wang é sũ kúm gi, sau zúng sũ nghut ri. ³Haũ hkum zúng sũ gi, yhang lé hkum hpóng byí é htoq agó, haũ sau pé gi, yhang é htê lé gyo byí akô. Yhang gi, yhang é sau pé lé, mying lang luí wut yũ mù, yhangmoq lé shuí htoq htoq kut nyi ri. ⁴Yhang é sau pé banshoq lé hpóng htoq yũ mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htang má châng akô nghut ri. ⁵Nghut kôlhang, yhangmoq gi, byũ bíng é htang má, hkâ-nhám lhang cháng kó rà a nghut e za, yhang chyáng mai kúm hpang byuq kó rà nghut lhê; hkâsu mù gâ le, haũ byũ bíng é htê lé, yhangmoq a sê gyo kô é yanmai nghut ri.” ga taí ri. ⁶Yesuq gi, dangtũ haũ lé yũ mù, yhangmoq lé taí kyô ri; nghut kôlhang, yhangmoq gi, Yhang haĩ taí kyô nyi é lé, a sê gyo kó nghut ri.

⁷Haũ mù, Yesuq dum taí é gi, “Ngò, nungmoq lé teng za taí kôlé, Ngò gi, haũ sau pé wang é hkúmdong nghut lhê. ⁸Ngá é hí má lé é lhunglhang bang gi, hkau bang eq damyaq pé nghut akô; haũ sau pé kúm gi, yhangmoq é dang lé a lhom gyo byi kó nghut ri. ⁹Ngò gi, hkúmdong nghut lhê; Ngò mai wang é sũ ó yuq nghut kôle, hkyi yu é hui rà nghut lhê. Haũ yuq gi, htoq htoq wàng wàng wó kut rà eq mhan-yô myang hô rà nghut lhê. ¹⁰Haũ hkau sũ gi, hkau rà, sat rà eq lhoq htên pyám rà matú, lé e za nghut lhê. Ngo lé é gi, yhangmoq, asak wó yũ rà eq byíngjup é asak lé wó yũ rà matú sheq nghut lhê.

¹¹Ngò gi, ge é sau zúng sũ nghut lhê; haũ ge é sau zúng sũ gi, sau pé é matú, yhumsing é asak lé ap byi pyâm é nghut lhê. ¹²Haũ langchyáng kut sũ gi, sau pé lé sing é sau zúng sũ a nghut; haũ mù, yhang gi, haũ wamhkui lé lo

é lé myàng jáng, saũ pé lé pyâm to mù hpang ló byuq rà nghut lhê; haũ hkũn, wamhkui gi, sau hpúng lé é htim luí, lhoq pyo pyám rà nghut lhê. ¹³Yhang gi, langchyáng hpó nghut luí, haũ sau pé é matú haĩ le a myit chiq byí é yanmai, hpang é nghut ri.

¹⁴Ngò gi, haũ ge é sau zúng sũ nghut lhê; haũ Íwa gi, Ngo lé sê é nghut luí, Ngò le, haũ Íwa lé sê é eq rajung za, ¹⁵Ngá é sau pé lé, Ngò lé sê akô nghut ri; Ngò gi, haũ sau pé é matú, yhumsing é asak lé ap byí pyâm é nghut lhê. ¹⁶Ngò gi, sau hkup shĩ mã é a nghut é gotũ sau pé wó ashĩ; sau haũ pé lé le, Ngò, shuí yũ ra rà nghut lhê; sau haũ pé le, Ngá é htê lé gyo kó rà nghut lhê; haũ hkũn, sau hpúng rahpúng za dut luí, sau zúng sũ le rayuq za, nghut rà nghut lhê.^w ¹⁷Ngò gi, Ngá é asak lé dum wó taũ yũ sháng gaq nghũ, yhumsing é asak lé ap byí pyâm é yanmai, Ngá Wa gi, Ngo lé chyitdap é nghut lhê. ¹⁸Ngá é asak lé, ó yuq èq le wó yu pyâm é a nghut, Ngá é myit đông byi pyâm é ru nghut lhê. Ngò gi, yhumsing asak lé ap byi pyám rà ahko ahkáng eq haũ lé dum taũ yũ rà ahko ahkáng wó sũ nghut lhê. Haũ gi, Ngá Wâ chyáng mai Ngò wó yu é hkunmó nghut lhê.” gâ ri.

¹⁹Dang haũ pé é yanmai, haũ Yudaq byu pé gi, myit a huĩ lhum dum dut byuq bekô nghut ri. ²⁰Haũ mã é bang myo myo gi, “Yhang gi, nat gang wang júng to luí, nâ byuq bê nghut ri. Yhang é dang lé, haĩ mù gyô nyi akô lú?” ga taí bum akô.

²¹Nghut kôlhang, góbang gi, “Dang shi pé gi, nat gang wang júng tô é byũ taĩ é dang a nghut. Nat gang gi, myoqjit sũ lé, myoq wó lhoq myâng nhâng rà lú?” ga taí bum akô nghut ri.

Yudaq Byu Pé A Lumjínng Kô É Hkyô

²² Yerusalem wà mó má, Ap Nóng Poi[§] jé bê nghut ri. Haú gi, gyoqmyò nám nghut ri. ²³ Haú hkún, Yesuq gi, haú noqkuq yhùm wàng má é, Sholumon é Jirop má sô yông wún ri. ²⁴ Haú u lé, haú Yudaq byu pé gi, Yhâng é lhínghkyuq má lé zínng bùm kômù, “Nàng gi, ngamoq lé hkâ-myháng jé shoq úng-áng nhang nyi rã lúh? Nàng, Hkrisduq nghut le gi, ngamoq lé san za taí kyô pyám laq.” ga taí akô.

²⁵ Yesuq gi, “Ngò, nungmoq lé taí kyo bê nghut lhê; nghut kôlhang, nungmoq a lumjínng kó nghut ri. Ngá Wá é myíng mai, Ngò kut é laklaí kumlhá haú pé gi, Ngá é matú saksé hkám byí nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjínng kó nghut ri. ²⁷ Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri. ²⁸ Ngò gi, yhangmoq lé, ahtum abyuq é asak byí é nghut mù, yhangmoq gi, hkâ-nhám le htên byoq kó rã a nghut; ó yuq èq le, yhangmoq lé, Ngá é loq mai wó lú yú rã a nghut. ²⁹ Yhangmoq lé, Ngá é loq má ap byi tô é sù, haú Ngá Wa gi, lhunghâng htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yú rã a nghut. ³⁰ Ngò eq haú Íwa gi, rayuq za nghut lhê.” ga tũ taí ri.

³¹ Haú hkún, haú Yudaq byu pé gi, Yesuq lé, dú rã matú luqgok dum kui akô. ³² Nghut kôlhang, Yesuq gi, yhangmoq lé, “Haú Íwã chyáng má é laklaí kumlhá mó pé myo myo, Ngò, nungmoq lé tũn shit bê nghut lhê. Nungmoq, Ngo lé dú rã gi, hká lhùm é yanmai nghut akô lhú?” ga myí ri.

³³ Haú Yudaq byu pé gi, “Ngamoq, Nang lé dú rã gi, haú pé hká lhùm é yanmai le a nghut; Nàng gi, byù rayuq nghut to luí, Garai Gasang nghut é dông taí whuí luí, Yhang lé rhoí dang taí é yanmai, dú rã nghũ lhê.” ga tũ taí akô.

³⁴ Haú hkún, Yesuq gi, yhangmoq lé, “Nungmoq gi, garaí pé nghut akô nghũ, Ngò taí bê nghut lhê.^x ga nungmoq é tarã má kã to lhê a nghut kó lhú?

³⁵ Chyúmdang haú lé gi, a ge lhoq hpyoq pyám é nghut luí, haú Garai Gasang é mungdang lé wó yu é bang lé, 'garaí pé' gã é nghut le gi, ³⁶ haú Íwa mai, Yhang é matú hkyin htoq yú luí, mingkan má nhang é Sù eq séng luí gi, hká dông nghũ kó rã lúh? 'Ngò gi, Garai Gasang é Yhangzo nghut lhê.' nghũ taí é yanmai, Ngò gi, Garai Gasang lé taí hpoí ri nghũ, nungmoq, haú mù Ngo lé mara hũn akô lhú? ³⁷ Ngá Wá é muzó pé lé, Ngò kut é a nghut jáng, Ngo lé hká lumjínng kó.

³⁸ Nghut kôlhang, Ngò, haú pé lé kut é nghut le gi, nungmoq, Ngo lé a lumjínng kôlhang, haú muzó pé lé lumjínng keq; haú hkún, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sê gyo kó rã nghut lhê.” ga tũ taí ri. ³⁹ Yhangmoq gi, Yhang lé chyup rã dum hen akô; nghut kôlhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haú Yodan làng he hpoq má é, Yohan, wui-myhup hkám byí hi é jowò má ló jé ri. Haú má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akô. Yhangmoq gi, “Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lhungháng gi, têng ri.” ga taí bum akô. ⁴² Haú jowò má, byù

[§]10:22 Ap Nóng Poi gã é gi, Garai Gasang é yhùm lé ap nóng lé gã lhê.

^x10:34 Hkya-on 82:6

myo myo gi, Yesuq lé lumj́ing bùm bekô nghut ri.

Lazaruq Shi Byuq É Hkyô

11 Ahkuí, Lazaruq gâ é byù rayuq gi, no nyi ri. Yhang gi, haù Mariq eq yhanghá Mahtaq nhik nyi é Behtani wà mà é sù nghut lhê. ²Mariq haù gi, Yhumsing lé namgón-xù hut gyun luí, hkyí má yhang xam èq sùt byí é sù nghut ri; yhang gi, haù no nyi é Lazaruq é yhanghá nghut ri. ³Haù mù, haù yhanghá nhik gi, “Yhumsing ê, Nang chyitdap é sù gi, no nyi ri.” ga, Yesuq chyáng ê taí nhang akô.

⁴Yesuq gi, dang haù lé wó gyo jáng, “Nòhpyo haù gi, shí-nò a nghut. Haù Garai Gasâng é Yhangzo gi, hau é yan-mai, hpungwup shingkang wó dan hù é hui sháng gaq ga, Garai Gasâng é hpung-wup shingkang é matú dut é ru nghut lhê. ⁵Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶Haù su mù, Yhang gi, haù Lazaruq no nyi ri gâ é lé, wó gyô é hkùn, haù Yhang nyi é jowò má, í nyí nyi tô ashí nghut ri.

⁷Hau htâng, Yhang gi, Yhâng é chángzô pé lé, “Nga-nhúng gi, Yuda mau shut dum taù ló sháng.” ga taí ri.

⁸Haù hkùn, yhangmoq gi, “Rabai ê, hkú-yoq za, haù Yudaq byu pé, Nang lé luqgok èq dú sat râ da kô é nghut le nhing, ahkuí, haù shut dum taù ló râ lú?” ga Yhang lé myí akô.

⁹Yesuq gi, “Nyí gi, hkyíng hkum raxe í hkum bo lhê a nghut kó lú?”** Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut. ¹⁰Myín lé hkyô sô é sù kúm gi, maubó lé a wó é yanmai, lengbat lhê.” ga tũ taí ri.

¹¹Haù su ga taí é htâng má, Yhang, yhangmoq lé xoq taí kyô é gi, “Nga-

nhùng é luzúm Lazaruq yhup myhí byuq bê nghut ri; nghut kôlhang, Ngò gi, yhang lé é nhaù toq râ nghut lhê.” gâ ri.

¹²Haù hkùn, Yhâng é chángzô pé gi, “Yhumsing ê, yhang yhup myhí tô é nghut le gi, ge lò râ nghut lhê.” gâ taí akô. ¹³Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.

¹⁴Haù mù luí, Yesuq, yhangmoq lé san za jáng taí kyô é gi, “Lazaruq gi, shi byuq bê nghut lhê. ¹⁵Ngò haù má a nyi záng é gi, nungmoq wó lumj́ing râ matú nghut luí, nungmoq é matú Ngò gabú byí ri; yhang chyáng e ló sháng hkoí.” gâ ri.

¹⁶Haù mù, haù Zozúm le gâ é Htomaq gi, gotú chángzô pé lé, “Nga-nhúng le, Yhang eq rahá shí sháng gaq, châng e ló sháng.” ga taí ri.

Haù Í-nhà Nhik Lé, Yesuq Nhik Ting É Hkyô

¹⁷Yesuq gi, jé e é hkùn, haù Lazaruq lé lup má kat pyâm é myi nyí nghut bê hkyô lé, lhom taí kyô akô. ¹⁸Behtani wà gi, Yerusalem wà mó eq í déng kô za wê lhúm ri. ¹⁹Haù mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik ting byi kó râ ga lé jé nyi bum akô nghut ri. ²⁰Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlhang, Mariq gi, yhúm má nyi tô ri.

²¹Mahtaq gi, Yesuq lé, “Yhumsing ê, Nang, shí má nyi tô é ru nghut le gi, ngá gu shi byuq râ a nghut. ²²Nghut kôlhang, ahkuí le, Garai Gasâng chyáng Nang haí dung kôlhang, Yhang byi râ nghut é lé, ngò sê lhê.” ga taí ri.

²³Yesuq gi, yhang lé, “Nung gu, dum dui toq râ nghut lhê.” ga taí ri.

** 11:9 Nyí gi, hkyíng hkum raxe í hkum bo lhê a nghut kó lú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

²⁴ Haú hkûn, Mahtaq gi, “Haú jhtûm buinyì má dum dui toq é hkûn, yhang le dum dui toq râ nghut é lé, ngò sê lhê.” ga tâ ri.

²⁵ Haú hkûn, Yesuq gi, yhang lé, “Ngò gi, dum dui toq hkyô eq asak nghut lhê. Ngo lé lumj́ing é sù gi, shi byuq kôlhang, dum dui râ nghut lhê. ²⁶ Asak dui nyì luí, Ngo lé lumj́ing é sù ó yuq nghut kôle, hkâ-nhám le shi é hui râ a nghut. Nang gi, dang shí lé lumj́ing lhê lhú?” ga tâ ri.

²⁷ Haú hkûn, yhang gi, “Yhumsîng ê, ngò lumj́ing lhê. Nang gi, haú mingkan má jé lé lô râ nghut é, Garai Gasâng é Yhangzo, Hkrisduq^{††} nghut é lé, ngò lumj́ing lhê.” ga, Yhang lé tâ kyô ri.

²⁸ Yhang gi, haú su ga tâi é htâng má, taú lô mù, yhanggu Mariq lé, tsik za wut yù luí, “Haú Sará jé tô ri; Yhang gi, nang lé myí nyi ri.” ga tâ kyô ri. ²⁹ Mariq gi, haú lé wó gyo jáng, hân za toq mù, Yesuq chyáng ê bê nghut ri. ³⁰ Haú u lé, Yesuq gi, haú wâ hkaú má a wang lô shí e za, Mahtaq eq huí é jowò má ru nyi tô ashí nghut ri. ³¹ Haú yhúmhaú má, Mariq lé nhik tîng nyi é Yudaq byu pé gi, yhang hân za toq luí, htoq lô é lé myàng kôjáng, yhang, lup má é ngaú râ dâ lhê abe ga, myit yù kômù, yhang htâng châng e lô bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, “Yhumsîng ê, Nang, shí má nyi tô é ru nghut le gi, ngá gu shi byuq râ a nghut.” ga tâ ri.

³³ Yesuq gi, Mariq ngaú nyi é lé le, haú yhang eq rahá lé lo é Yudaq byu pé ngau nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri. ³⁴ Haú mù, Yhang gi, “Yhang lé, hkâmá tô tô akô lhú?” ga myi jáng, yhangmoq gi, “Yhumsîng ê, lé wú wú aq.” ga tâ akô.

³⁵ Yesuq gi, ngaú bê nghut ri.

³⁶ Haú mù, haú Yudaq byu pé gi, “Wú keq, Yhang gi, Lazaruq lé, haú-í yhang chyit ri-nhung!” ga tâ akô.

³⁷ Nghut kôlhang, ra-am gi, “Haú my-oqjit sù lé, myoq wó lhoq myâng byí é Sù gi, shí yuq lé le, a shí lo shoq a wó kut é lhú?” ga tá bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é èq, lup má lé jé ri. Lup haú gi, luqhkýung dong nghut luí, luqgok rachâm èq chí tô akô.

³⁹ Haú mù, Yhang gi, “Luqgok haú lé yu pyám keq.” ga tâ ri.

Haú hkûn, haú shi byuq su é yhângnhá Mahtaq gi, “Yhumsîng ê, yhang lé, haú má tô tô é myi nyí lháng nghut bê yan-mai, ahkuí gi, bup nàm berâ nghut lhê.” ga tâ ri.

⁴⁰ Haú mù, Yesuq gi, “Nang, lumj́ing é nghut le gi, haú Garai Gasâng é hpung-wup shingkang lé, wó myâng râ nghut lhê nghú, Ngò, nang lé tâ kyô wú bê a nghut lhú?” ga tâ ri.

⁴¹ Haú mù luí, yhangmoq gi, luqgok haú lé yu pyám akô. Hau htâng, Yesuq gi, mauhkûng shut tu wú luí, “Áwa ê, Nang, Ngá é dang lé gyo byí é yanmai, Ngò, Nang lé jeju hkya-ôn lhê. ⁴² Nang gi, hkâ-nhám le, Ngá é dang lé gyo byí nyi é lé, Ngò sê lhê; nghut kôlhang, Nang, Ngo lé nhang kat é hkyô lé, shí má yap tô é bang lumj́ing kó sháng gaq nghú, yhangmoq é matú, Ngò, isu nghú tâi é nghut lhê.” ga tâ ri.

⁴³ Yhang gi, haú su ga tâi luí, “Lazaruq ê, htoq lô aq.” ga htê mó èq wut kat ri. ⁴⁴ Haú hkûn, haú shi byuq bê sù gi, yhâng é loq hkyí pé má pân èq htup yup to gû eq, yhâng é myoqdong má hpajet èq htup to gû htoq lo ri.

^{††}11:27 Hkrisduq lé Mesaia le gâ lhê.

Haû mù, Yesuq gi, yhangmoq lé, “Yhang lé hpyi pyám byi mù, nhang kat keq.” ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haû mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjáng bum bekô nghut ri. ⁴⁶ Nghut kôlhang, yhangmoq chyáng mâ é ra-am gi, haû Hparishe pé chyáng lô mù, Yesuq kut é hkyô lé, lô taí kyô akô. ⁴⁷ Haû mù, haû hkyangjong agyi pé eq Hparishe pé gi, Yudaq byin tú wapdoq[‡] zuphpong lé ji tsing to mù, “Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lúhú? ⁴⁸ Nga-nhúng, Yhang lé haû su ru kut nyí nhang é nghut jáng, yuq hkangmó gi, Yhang lé lumjáng kó râ nghut lhê; haû hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê.” ga taí akô nghut ri.

⁴⁹ Haû hkûn, yhangmoq chyáng mâ é, haû zân má hkyangjong mó nghut nyi é sù, Kayahpaq gi, yhangmoq lé, “Nungmoq gi, haí lhang a sé kó nghut ri-nhung! ⁵⁰ Haû byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri.” ga taí kat ri.

⁵¹ Yhang haû su ga taí é gi, yhum-sing myit đông a nghut e za, haû zân má, yhang gi, hkyangjong mó nghut é eq rajung za, haû Yudaq byuhú é matú, Yesuq shí hkâm byi râ nghut é hkyô lé le, ⁵² byuhú hau é matú baú a nghut e za, haû byo myín tô é, Garai Gasâng é yhangzô pé lé, shuí tsing yù mù, rading rallhum za dut nhâng râ matú, shí hkâm byi râ nghut é hkyô lé le, myiqhtoi dang

taí é ru nghut lhê. ⁵³ Haû nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haû mai htoq luí, haû yoso eq chyâng lhúm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

⁵⁵ Haû Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking đông yhum-sing gùng lé lhoq sân-yúng yù râ matú, yosô wà pé mai, Yerusalem wà mó shut doq lô bum akô. ⁵⁶ Haû mù, yhangmoq gi, Yesuq lé ho nyí kô é nghut luí, haû noqkuq yhúm wàng má yap to uchyang, rayuq eq rayuq, “Nungmoq, hkâsu wó myit akô lúhú? Yhang gi, Poí má a lé lô râ gâ lhê lhà?” ga myí lhúm bum akô. ⁵⁷ Nghut kôlhang, haû hkyangjong agyi pé eq Hparishe pé gi, Yesuq lé wó chyup yù râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

Yesuq, Namngón-xú But Byi Huí É Hkyô

Mht 26:6-13; Mrk 14:3-9

12 Haû Lhoqlhai Poí jé râ hkyuq nyí râ ashí hkûn, Yesuq gi, Yhâng èq shí é mai lhoq duí toq yu é sù, Lazaruq nyi é Behtani wà má lô jé ri. ² Haû má, Yesuq lé hkunggâ é đông myinzang byi tsô akô; Mahtaq gi, zoshuq jaú ri; Lazaruq gi, haû Yesuq eq rahá siboí má zô zung nyi bang mâ é rayuq nghut ri. ³ Haû hkûn, Mariq gi, haû nardu amyit mai za saí yu é, gyai hpaú é namngón-xú raxe í rúng kô yu lé mù, Yesuq é hkyí má hut gyun byi luí, yhâng é uxam èq sùt

[‡]11:47 Yudaq byin tú wapdoq lé Grik đông gi, San-hedrin gâ lhê.

byî ri. Haû mù, yhûm haû gi, namngón-xû shôm byíng to bê nghut ri.

⁴Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵“Haû myùng bang lé byî pyám râ matú, haû namngón-xû lé denari sum sho èq haû mù a ùng pyâm é lhú?” ga taî ri. ⁶Yhang haû su ga taî é gi, myùng bang lé chiq byî é yanmai taî é a nghut, yhang gi, ngùn htúng chùng sù nghut luí, haû má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taî é nghut ri.

⁷Yesuq gi, “Nghut shang gaq; yhang gi, Ngo lé myhup yhum râ buinyi é matú, namngón-xû shí lé hkong to byî é nghut lhê. ⁸Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut.” ga tû taî ri.

⁹Haú u lé, Yudaq byu pé ajùm ayò gi, haû má Yesuq nyi é lé sé kôluí, lé lo akò; haû bang gi, Yesuq é yanmai za lé kô é a nghut, haû Yhâng èq shí bê mai lhoq dui toq yu é Lazaruq lé, lé myàng nàu kô é yanmai le nghut ri. ¹⁰Haû mù, haû hkyangjong agyi pé gi, Lazaruq lé le, sat pyám râ matú chòm hpyè lhûm akò. ¹¹Hkâsu mù gà le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjǐng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹²Hau htang nyí, haû Poí má lé jé é byù moq mó gi, Yerusalem wà mó shut

Yesuq jé doq ló é hkyô lé, wó gyô bum akò. ¹³Haû mù, yhangmoq gi, byùm-haq pé yu chùng mù, Yhang lé ê tê uchyang, “Hosana!”^f

Haû Yhumsing é myìng mai jé lé lô Sù gi, hkungsô wó nyí sháng gaq ô!

Haû Israelaq byu pé é Hkohlkâm gi, hkungsô wó nyí sháng gaq!”^y

ga, taî garû bum akò nghut ri. ¹⁴Haú hkûn, Yesuq gi, logúng zo radu lé myàng luí, doq jǐ ri;

¹⁵haû gi, “Zi-un byizo^{§§} ê, hkâgyuq; wú keq, nungmoq é hkohlkâm gi, logúng zo má ji mù lé lo nyi ri.”^z

ga, kâ tô é eq rajung za nghut ri.

¹⁶Haú pé banshoq lé, Yhâng é chángzo pé gi, sâng-hi lé a sê gyo kó; nghut kôlhang, Yesuq gi, hpungwup shingakang dan hu huí é htàng má za sheq, haú pé gi, Yhang eq séng luí kâ tô é hkyô lé le, haû eq rajung za, Yhang lé, yhangmoq mai kut bê hkyô lé le, bûn sê kat akò nghut ri.

¹⁷Haû Yesuq gi, lup hkaû mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haû hkyô lé, saksé hkâm byî nyi akò. ¹⁸Haû mù, byù myo myo gi, Yesuq tûn shit é limik kumlhá hau é hkyô lé, wó gyo kô é yanmai, Yhang lé huí râ matú htoq e akò. ¹⁹Hau é yanmai, haû Hparishe pé gi, “Wú keq, nganhúng, hkâsu yhang a ge kut lo nhung! Haû mingkan gón gi, Yhâng htàng châng bùm bekò.” ga, rayuq eq rayuq taí lhûm bum akò nghut ri.

^f**12:13** Hebre dang má, *hosana* gà é gi, “ahkuí hkyi yù aq” gà é nghut lhê. Nghut kôlhang, bun zo shí má gi, hkya-on dang đông chung é nghut lhê.

^{§§}**12:15** Hebre myíng đông *Zi-un byizo* gà é gi, Yerusalem mâ é byu pé lé gà é nghut lhê.

**Yesuq, Yhang Shí Râ
Hkyô Lé Te Taí É Hkyô**

²⁰ Haú hkûn, noqkuq râ matú Poí má doq ló é bang má, Grik pé ra-am le bo tô akô. ²¹ Yhangmoq gi, Galile mau, Bet-saida wà mó mâ é Hpilip chyáng lé jé kômù, “Âhkaú ê, ngamoq gi, Yesuq lé myàng nau ri.” ga, dung tôngbán akô. ²² Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haú mù, Yesuq gi, “Haú Byu Yhangzo gi, hpungwup shingkang dan hù é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyí râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê. ²⁵ Haú yhumsing é asak lé chyitdap é sù gi, asak sùm byuq râ nghut lhê. Míngkan shí má, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htàng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haú Ngo lé dojaú é sù lé, shi-gyaú râ nghut lhê.

²⁷ Ahkuí, Ngò, myit wuífke nyi ri; Ngò hkâsu nghú taí râ lhi? ‘Áwa ê, ahkyíng shí mai Ngo lé lhoq lhut yù laq.’ nghú taí râ lhú? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é myíng lé hpungwup shingkang dan hu nhâng aq hkoil!” ga taí ri.

Haú hkûn, “Ngò gi, Ngá é myíng lé hpungwup shingkang dan hu nhâng bê nghut luí, dum dan hu nhâng shirâ nghut lhê.” gâ é htê, mauhkúng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, “Maugum gum ri.” gâ bum akô; ra-am gi, “Yhang lé, mau-

mang lagyo rayuq nyo ri.” ga taí bum akô nghut ri.

³⁰ Haú hkûn, Yesuq gi, “Danghtê shí gi, Ngá é matú a nghut, nungmoq é matú ru nghut lhê. ³¹ Ahkuí gi, míngkan shí lé jéyáng râ ahkyíng nghut bê; míngkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é hui é hkûn, byù lhunglhang bang lé, Ngá chyáng shé yù râ nghut lhê.” ga taí ri. ³³ Yhang haú su ga taí é gi, Yhang hkâsu kut shí râ nghut é hkyô lé shit é nghut ri.

³⁴ Haú hkûn, haú byù moq mó gi, “Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhíng, ‘Haú Byu Yhangzo gi, tu shap é hui ra râ nghut lhê.’ nghú, Nàng hkâsu kut wó taí lhê lhú? Haú Byu Yhangzo gi, ó yuq nghut lhê lhú?” ga, myí akô.

³⁵ Haú mù, Yesuq gi, yhangmoq lé, “Nungmoq chyáng, haú maubó joq nyi râ ahkyíng gi, a lúm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashí hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashí hkûn, haú lé lumjíng keq.” ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

**Yudaq Byu Pé, A Lumjíng Ru
Dut Nyí Kô É Hkyô**

³⁷ Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjíng shi kó nghut ri. ³⁸ Haú gi, “Yhumsing ê, nga-nhúng é danglù lé, ó yuq wá lumjíng byí wú é lhú? Haú

Yhumsing é loq* gi, ó yuq lé htoq shit wú é lhú?"^a

ga, myiqhtoi Esai-aq taí tô é dang lo dik é nghut ri.

³⁹Yhangmoq a wó lumjínng kô é hkyô gi, Esai-aq taí é dang má,

⁴⁰"Yhang gi, yhangmoq é myoqjí lé lhoq chit byi luí, yhangmoq é i-myit lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myit èq a wó sê gyo, Ngò, yhangmoq lé yâ ge byi rã matú, a wó lhing taú lò kó dut rã nghut lhê."^b

ga le bo tô é yanmai nghut lhê. ⁴¹Esai-aq gi, Yesuq é hpungwup shingkanng lé myang é yanmai, Yhang eq sêng é hkyô lé, haú su ga taí é nghut ri.

⁴²Nghut kôlháng, haú uphkâng bang myo myo lháng gi, haú u má, Yesuq lé lumjínng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui rã lé, gyuq kô é yanmai, yhangmoq lumjínng bê hkyô lé a yín yu bùm kó nghut ri. ⁴³Hkâsu mù gâ le, yhangmoq gi, Garai Gasâng chyáng mã é aróng lé, ô nau é htoq má, byu pé chyáng mã é aróng lé, je ô nau kô é yanmai nghut ri.

⁴⁴Haú mù, Yesuq, htê mó èq taí é gi, "Ngo lé lumjínng é sù gi, Ngo lé baú lumjínng é a nghut; haú Ngo lé nhang kat é Sù lé le, lumjínng é nghut lhê. ⁴⁵Ngo lé myang é sù gi, haú Ngo lé nhang kat é Sù lé le myang é nghut lhê. ⁴⁶Ngò gi, Ngo lé lumjínng é sù ó yuq le, mauchut hkaú má a nyi sháng gaq nghú, maubó dòng mingkan má lé jé é nghut lhê.

⁴⁷Ngò gi, Ngá é dang lé wó gyo luí, a châng é sù ó yuq lé le, jéyáng rã a nghut; hkâsu mù gâ le, Ngò gi, mingkan lé jéyáng rã matú jé lé é a nghut; haú mingkan lé hkyi yù rã matú sheq, jé lé é ru nghut lhê. ⁴⁸Ngò lé he-ngik luí Ngá

é dang lé a hap yu é sù lé, jéyáng rã Sù rayuq nyi lhê; Ngò taí é danghkun haú gi, haú jihtúm buinyi má, haú yuq lé mara byi rã nghut lhê. ⁴⁹Hkâsu mù gâ le, Ngò gi, Ngá é myit dòng taí é a nghut; nghut kôlháng, Ngò haí taí rã eq hkâsu nghú taí rã lé gi, haú Ngo lé nhang kat é sù Íwa mai, Ngo lé hkunmó hkyô to bê nghut lhê. ⁵⁰Haú Yhâng é hkunmó gi, ahtum abyuq é asak nghut é lé, Ngò sê lhê. Haú mù luí, Ngò, haí taí kôlé, haú Íwa mai Ngo lé taí kyô é lé za, taí é nghut lhê." gâ ri.

Chángzô Pé É Hkyí Chi Byí É Hkyô

13 Haú Lhoqlhai Poí jé rã hí má za, Yesuq gi, Yhang, mingkan shí mai Yhâng Wã chyáng htot ló rã ahkýing jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtúm jé shoq Yhâng é chyitdap myit lé shit rã nghut lhê.

²Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám rã myit kat byí to gú nghut ri. ³Yesuq gi, haú lhunglháng lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló rã sù nghut é lé le, sê ri. ⁴Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhúm èq hpyihit hit tô ri. ⁵Hau htâng, Yhang gi, jirung má uchyam hut kat mù, Yhâng é chángzô pé é hkyí chi byi luí, haú Yhâng é hpyidum má hit tô é hpajet èq sut huí byí ri.

⁶Yhang gi, Simun Petruq chyáng jé jáng, Simun Petruq gi, "Yhumsing ê, Nàng gi, ngá hkyí lé chi byi rã nghut lhê lhú?" ga myí ri.

*12:38 Yhumsing é loq gâ é gi, Yhumsing é hpungwup a-tsam lé gâ é nghut lhê.

^a12:38 Esai 53:1 ^b12:40 Esai 6:10

⁷Haú hkûn, Yesuq gi, “Ngò, haí kut nyi é hkyô lé, ahkuí, nàng sê gyo rã a nghut; nghut kôlhang, htàng má sê gyo rã nghut lhê.” ga tú taí ri.

⁸Petruq gi, “Ngá hkyí lé, Nàng, hkâ-nhám le wó chi byi rã a nghut.” ga taí jáng, Yesuq gi, “Nang lé, Ngò a chi byí é nghut jáng, nàng gi, Ngò eq séng rã a nghut.” ga tú taí ri.

⁹Haú hkûn, Simun Petruq gi, “Yhumsîng ê, haú su nghut jáng gi, ngá é hkyí lé baú za a nghut, ngá é loq eq ulhum lé le chi byi laq!” ga tú taí ri.

¹⁰Yesuq gi, “Gùng chi bê sù gi, hkyí za chi jáng, ragùngdú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut.” ga tú taí ri. ¹¹Hkâsu mù gâ le, Yhang gi, Yhang lé ap pyám rã sù ó yuq nghut é lé, sê é yanmai, “Nungmoq gi, sanséng é bang chyat a nghut.” ga taí é nghut ri.

¹²Yesuq gi, yhangmoq é hkyí lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, “Nungmoq gi, ahkuí, ngò kut byí é hkyô lé, sê gyo akô lhú? ¹³Nungmoq, Ngo lé, 'Sará' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. ¹⁴Ngò, nungmoq é Sará eq Yhumsîng nghut sù lháng, nungmoq é hkyí lé chi byí é nghut le gi, nungmoq le, rayuq eq rayuq é hkyí lé chi byí lhum rã dut lhê. ¹⁵Nungmoq gi, Ngò, nungmoq lé kut byí é su kut kó sháng gaq nghú, Ngò, nungmoq lé alik kut shit tô é nghut lhê. ¹⁶Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷Ahkuí, nungmoq gi, haú pé lé sé bekô nghut luí, châng kut

kô é nghut jáng, hkungsô wó kó rã nghut lhê.

Yesuq Lé Ap Pyám Rã Lé, Te Taí É Hkyô

¹⁸Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik eq nàng htíng rã nghut lhê.’^c gâ é Chyúmdang lé, lhoq dik rã matú ru nghut lhê.

¹⁹Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq[†] nghut é lé, nungmoq wó lumjáng kó rã matú nghut lhê. ²⁰Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê.” gâ ri.

²¹Yesuq gi, haú su ga taí é htàng má, myit wuîhke nyi mù, saksé hkâm é gi, “Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám rã nghut lhê.” gâ ri.

²²Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhum bum akô nghut ri. ²³Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴Haú mù, Simun Petruq gi, chángzo haú yuq lé, loq lik kat mù, “Yhang, ó yuq lé lhoq ang luí, taí nyi é hkyô lé, myi wú aq.” ga taí ri.

²⁵Haú mù, chángzo haú gi, Yesuq é tanghkoí má saí leq nge zung mù, “Yhumsîng ê, haú gi, ó yuq nghut lhê lhú?” ga, Yhang lé myí ri.

²⁶Yesuq gi, “Ngò, muk jap zo shí lé jum yù mù, byí é sù gi, haú yuq nghut lhê.” ga tú taí luí, muk jap zo haú lé jum

[†]13:19 Haú Yuq gâ é gi, Hkrisduq lé gâ é nghut lhê.

^c13:18 Hkya-on 41:9

yù mù, Simun é yhangzo Yudaq Iskarut lé byí ri. ²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, “Nàng kut rã é hkyô lé, hân kut aq hkoi.” ga yhang lé taí kat ri. ²⁸ Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri. ²⁹ Haú Yudaq gi, ngùn zum sù nghut é yanmai, ra-am gi, haú Póí má rã é hkyô lé, ê wuí rã matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akò nghut ri. ³⁰ Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

**Petruq He-ngik Pyám Rã Lé,
Yesuq Te Taí É Hkyô**

*Mht 26:31-35; Mrk
14:27-31; Luk 22:31-34*

³¹ Haú yuq htoq ló byuq jáng, Yesuq taí é gi, “Ahkuí, haú Byu Yhangzo gi, hpungwup shingkang dan hũ é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haú Byu Yhangzô é yanmai, hpungwup shingkang dan hũ é nghut jáng, Yhang le, Yhang má haú Zo lé hpungwup shingkang dan hu nhâng rã nghut lhê; radá dâm dan hu nhâng rã nghut lhê.

³³ Ngá zo pé ê, Ngò, nungmoq eq rahá nyi rã gi, razup za ru nghut alô. Nungmoq gi, Ngo lé hô kó rã nghut lhê; nghut kôlhang, 'Ngò ló é jang má, nungmoq wó jé kó rã a nghut.' nghũ, haú Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum rã dut lhê. ³⁵ Nungmoq yhangchang chyitdap lhum kô é nghut jáng, nungmoq gi,

Ngá é chángzô pé nghut é hkyô lé, byù lhunglhang bang sé kó rã nghut lhê.” gã ri.

³⁶ Haú hkún, Simun Petruq gi, “Yhumsing ê, Nàng, hká shut ló rã l hú?” ga, Yhang lé myi jáng, Yhang gi, “Ngò ló é jang má, nungmoq, ahkuí a wó châng kó rã nghut lhê. Nghut kôlhang, htâng má gi, nungmoq châng ra kó rã nghut lhê.” ga tú taí ri.

³⁷ Petruq gi, “Yhumsing ê, haí mù luí, ahkuí ngò Nàng htâng a wó châng é l hú? Ngò gi, Nàng é matú, shí hkám rã rì ri nghut lhê.” ga taí ri.

³⁸ Haú mù, Yesuq taí é gi, “Nàng gi, gè gè yhang, Ngá é matú shí hkám rã l hú? Ngò, nàng lé teng za taí lé, woq a tũn shimá, nàng, Ngo lé sum dâm he-ngik pyám rã nghut lhê.

**Yesuq, Yhâng É Chángzô Pé
Lé Nhik Tĩng É Hkyô**

14 Nungmoq é i-myt nhiklhum lé, myit wui myit hké hkâdut nhâng kó. Garai Gasang lé lùm keq; Ngo lé le lùm keq. ² Ngá Wá é yhũm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo rã nghut lhê. Ngò, haú má ló é gi, nungmoq é nyi jowò ló hên lãng rã matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi rã matú, Ngò dum taú lé mù, nungmoq lé, lé shuí yù rã nghut lhê. ⁴ Ngò ló é jang má jé é hkyô lé, nungmoq sê lhê.” gã ri.

Yesuq Za Hkyô

⁵ Haú hkún, Htomaq gi, Yhang lé, “Yhumsing ê, Nàng hká shut ló é lé lhang, ngamoq a sê le nhĩng, hkyô haú lé, ngamoq hkãsu kut wó sé rã l hú?” ga myí ri.

⁶ Yesuq gi, “Ngò gi, hkyô nghut lhê; haú tengmán hkyô eq asak le nghut lhê.

Ngò mai za a nghut jáng, ó yuq le, Íwâ chyáng wó jé é a nghut. ⁷Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó rã nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekò nghut lhê.” ga tũ taí ri.

⁸Haú hkũn, Hpilip gi, “Yhumsing ê, nungmoq lé, háu Íwâ tũn shit laq, háu hkũn, nungmoq nhik shí rã nghut lhê.” ga taí ri.

⁹Yesuq tũ taí é gi, “Hpilip ê, Ngò, nungmoq eq shí myáng lhang nyi lò bê le nhing, nang, Ngo lé a sé lúh? Ngo lé myang é sũ gi, háu Íwâ lé myàng bê nghut ri; háu nghut le nhing, 'Nungmoq lé, háu Íwâ tũn shit laq.' nghũ, nang hkãsu wó taí lhê lúh? ¹⁰Ngò gi, háu Íwâ má nghut nyí luí, háu Íwâ gi, Ngò má nghut nyi é hkyô lé, nang a lumjng lúh? Ngò, nungmoq lé taí é dang háu pé gi, Ngá é myit mai taí é a nghut; háu Ngò má lúng nyi é Íwâ sheq, Yhang é mù zuí nyi é ru nghut lhê. ¹¹Ngò gi, háu Íwâ má nghut nyí luí, háu Íwâ gi, Ngò má nghut nyi lhê nghũ é lé lumjng keq; háu a nghut jáng, kut shit é limik kumlhá pé đông za lhang, lumjng keq. ¹²Ngò, nungmoq lé teng za taí kólé, Ngo lé lumjng é sũ gi, Ngò kut é muzó lé kut rã nghut lhê. Ngò gi, háu Íwâ chyáng ló rã nghut é yanmai, háu yuq gi, hau htoq je kô é muzó pé lé lhang kut rã nghut lhê. ¹³Haú Yhangzô é yanmai, Íwâ é hpungwup shingkan wó hũ ló shoq, Ngá é mying lé lang luí, nungmoq hái jung dung kólhang, Ngò gyo byi rã nghut lhê. ¹⁴Nungmoq gi, Ngá é mying lé lang luí, hái dung kólhang, Ngò gyo byi rã nghut lhê.

Chyoiyúng Woi-nyí Byi Rã Danggidiq

¹⁵Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rã nghut lhê. ¹⁶Haú Íwâ gi, nungmoq eq ahtum abyuq nyi nyi rã nghut é, hpaqchyí byi Sũ gotũ rayuq,

nungmoq lé byi rã matú, Ngò gi, háu Íwâ lé dung rã nghut lhê. ¹⁷Haú yuq gi, tengmán é Woi-nyí nghut lhê. Háu mingkan gi, Woi-nyí háu lé a myàng a sê é yanmai, Yhang lé a wó hap yu é nghut lhê. Nghut kólhang, Yhang gi, nungmoq eq rahá nyi nyi é nghut luí, nungmoq má nyi to rã Sũ nghut é yanmai, nungmoq gi, Yhang lé sê akô. ¹⁸Ngò gi, nungmoq lé, chuizô pé đông pyâm to rã a nghut; nungmoq chyáng Ngò dum jé lé rã nghut lhê. ¹⁹Adê myáng má, háu mingkan gi, Ngo lé a myàng lo rã nghut lhê; nghut kólhang, nungmoq gi, Ngo lé myàng kó rã nghut lhê. Hkãsu mù gã le, Ngò gi, asak dui nyi é nghut mù, nungmoq le dui kó rã nghut lhê. ²⁰Ngò gi, Ngá Wã chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, háu buinyi má, nungmoq sé kó rã nghut lhê. ²¹Ngá é hkunmó pé lé wó mù, chãng kut é sũ ó yuq nghut kôle, Ngo lé chyitdap é sũ nghut ri. Ngo lé chyitdap é sũ lé gi, Ngá Wa chyitdap rã nghut lhê; Ngò le, háu yuq lé chyitdap luí, Ngá gũng lé yhang, yhang lé shit rã nghut lhê.” gã ri.

²²Hau htãng, (Yudaq Iskarut a nghut sũ) Yudaq gi, “Yhumsing ê, Nang gi, háu mingkan lé Náng gũng a shit e za, nungmoq lé shit rã nghut é gi, hái mù nghut lhê lúh?” ga myí ri.

²³Haú hkũn, Yesuq tũ taí gi, “Rayuq yuq, Ngo lé chyitdap é nghut le gi, Ngá dang lé gyo rã nghut lhê. Ngá Wa le, háu yuq lé chyitdap rã nghut luí, Ngá hpe gi, háu yuq chyáng lé mù, yhang eq rahá nyi rã nghut lhê. ²⁴Ngò lé a chyitdap é sũ gi, Ngá dang lé gyo rã a nghut. Nang wó gyô é dang shí pé gi, Ngá myit mai taí é a nghut; dang háu pé gi, Ngo lé nhang kat é Sũ, háu Íwâ é ru nghut lhê.

²⁵Ngò gi, shí pé banshoq lé, nungmoq eq rahá nyi tô ashí u lé taí bê nghut lhê. ²⁶Nghut kólhang, Ngá é mying đông, háu Íwâ nhang kat rã nghut é, hpaqchyí

byi Sû nghû é, haû Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglhang, nungmoq lé lhoq pun râ nghut lhê. ²⁷Ngò gi, nungmoq chyáng, nguóngón hkyô tô to byi bê; Ngá é nguóngón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myt nhikhlum lé, myit wui myit hke é eq gyuq kyúm é hkâdut nhâng kó.

²⁸'Ngò gi, ló byuq luí, nungmoq chyáng dum taú lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haû Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haû Íwâ gi, Ngá htoq je ko Sû nghut lhê. ²⁹Haû dut é hkûn, nungmoq lumjúng kó sháng gaq nghû, ahkuí, haû a dut shimá, Ngò, nungmoq lé taí kyô é nghut lhê. ³⁰Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haû yuq gi, Ngo lé up râ ahkáng haí a wó é sù nghut ri. ³¹Nghut kôlhang, haû Íwâ lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

Tsibiyiq Nuí Eq Akoq Pé É Hkyô

15 Ngò gi, haû tsibiyiq nuí akyîng nghut lhê; Ngá Wa gi, tsibiyiq hkyâm yhumsing nghut lhê. ²Yhang gi, ashi a zuí é akoq hkangmó lé, Ngá chyáng mai kyik pyâm luí, ashi zuí é akoq hkangmó lé kúm gi, ashi je myo zui sháng gaq ga, shang pyám byí ri. ³Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri. ⁴Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashi wó zuí

é a nghut. Haû eq rajung za, nungmoq le, Ngò má nyi nyi e za a nghut jáng, ashi wó zui kó râ a nghut.

⁵Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haû yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê. ⁶Ngò má a nyi nyi é sù gi, haû dú pyâm é hui luí, kyuq shi byuq é akoq eq wuí ri; haû sù é akoq pé gi, byu pè èq guq yù mù, myihkyóm má dú kat pyâm é hui luí, nyé gyó byuq râ nghut lhê. ⁷Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haû hkûn, nungmoq lé byi râ nghut lhê. ⁸Nungmoq gi, haû ashi gamyhó zuí é dông, Ngá Wâ é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tûn shit nyi bekô nghut ri.

⁹Haû Íwâ gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq. ¹⁰Ngò gi, Ngá Wâ é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê. ¹²Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³Haû yhumsing é luzúm wui é matú, yhumsing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô. ¹⁵Ngò gi, Ngá

Wâ chyáng mai Ngò wó gyô yu é hkyô lhungháng, nungmoq lé sé nhâng bê nghut é yanmai, nungmoq lé, dui-nhâng zoshâng wuì nghû, a wut lô e za, luzúm wuì nghû wut é nghut lhê; hkâsu mù gâ le, dui-nhâng zoshâng gi, yhâng yhum-sîng hpô é muzó lé a châng sé nghut ri. ¹⁶Nungmoq, Ngo lé hkyin yu é a nghut, Ngò sheq, nungmoq lé, htoq e lô mù, gîng nyi é ashî zui râ matú hkyin masat tô é ru nghut lhê. Hau hkûn sheq, Ngá é mying lé lang mù, haù Íwâ chyáng nungmoq haí jung dung kôle, Yhang byi râ nghut lhê. ¹⁷Nungmoq yhangchang chyitdap lhum keq; haù gi, Ngá é hkunmó nghut lhê.

Haù Mingkan Gi, Chángzô Pé Lé A Jú É Hkyô

¹⁸Haù mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹Nungmoq gi, haù mingkan eq sêng é bang nghut é nghut jáng, haù mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haù mingkan mai hkyin htoq yû bê nghut luí, nungmoq gi, haù mingkan eq a séng lo kô é yanmai, mingkan gi, nungmoq lé a jú é nghut ri. ²⁰'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bún nyi keq. Ngo lé lhang, yhangmoq zing-rí yù bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. ²¹Nghut kôlhang, yhangmoq gi, Ngá é mying é yanmai, nungmoq lé haù su kut kó râ nghut lhê; hkâsu mù gâ le, haù Ngo lé nhang kat é Sû lé, yhangmoq a sé kôluí nghut ri. ²²Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut

kôlhang, ahkuí gi, yhangmoq mara wó taí hkyut râ a nghut lo. ²³Ngo lé a jú é sù gi, Ngá Wa lé le a jú é sù nghut ri. ²⁴Haù ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklaí kumlhá haù pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵Haù gi, 'Yhangmoq gi, junggúyô má Ngo lé a jú kut akô nghut ri.'^d ga, yhangmoq é tarâ má kâ tô é dang lé lhoq dik é nghut ri.

²⁶Haù Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haù hpaqchyí byi Sû jé lé é hkûn, Ngá é hkyô lé saksé hkám byi râ nghut lhê. ²⁷Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

16 Nungmoq gi, myit lingbat jowò a joq kó sháng gaq nghû, haù pé banshoq lé, Ngò, nungmoq lé taí kyo bê nghut lhê. ²Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haù dông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê. ³Yhangmoq gi, haù Íwa lé le, Ngo lé le, a sé kô é yanmai, haù su kut kó râ nghut lhê. ⁴Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bún nyi kó sháng gaq nghû, Ngò haù hkyô taí kyô é nghut lhê. Ngò gi, nungmoq eq rahá nghut nyi é yanmai, haù hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé

^d15:25 Hkya-on 35:19; 69:4

a myi kó nghut ri. ⁶Ngò, nungmoq lé, haú hkyô pé taí kyô é yanmai, nungmoq é i-myt unghkaú má iyon hkyô byíng to bekô nghut ri. ⁷Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè rã hkyô ru nghut lhê. Ngò ló byuq e za a nghut jáng, haú hpaqchyî byi Sû gi, nungmoq chyáng lé rã a nghut; Ngò ló jáng sheq, Yhang lé, Ngò, nungmoq chyáng nhang kat byi rã nghut lhê. ⁸Yhang jé lé é hkûn, Yhang gi, haú mara wó é eq séng luí le, dingmán hkyô eq séng luí le, tarã jéyáng hkyô eq séng luí le, haú mingkan lé tûn shit rã nghut lhê. ⁹Haú yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri. ¹⁰Haú dingmán hkyô eq séng luí ga jang, Ngò gi, haú Íwã chyáng ló rã nghut luí, nungmoq, Ngo lé a myàng lo kó rã nghut é yanmai nghut ri. ¹¹Haú tarã jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

¹²Ngò gi, nungmoq lé taí rã hkyô myo myo wó ashî; nghut kôlhang, ahkuí, nungmoq wó hkâm kó rã a nghut. ¹³Nghut kôlhang, haú tengmán é Woi-nyí jé lé é hkûn, Yhang gi, tengmán hkyô lhungháng lé shuí sé rã nghut lhê. Yhang gi, Yhâng myit đông taí rã a nghut; Yhang, wó gyô yu é hkyô lé za taí luí, dut lò rã hkyô pé lé le, nungmoq chyáng taí pyô rã nghut lhê. ¹⁴Yhang gi, Ngò wó é lé, yù mù, nungmoq lé taí kyô é eq sé nhang é đông, Ngá é hpungwup shingkan lé hú ló nhâng rã nghut lhê. ¹⁵Haú Íwã wó é lhungháng gi, Ngá é chyat nghut lhê. Hau é yanmai, haú Woi-nyí gi, Ngò wó é lé yù mù, nungmoq lé sé nhâng rã nghut lhê nghû, Ngò taí é nghut lhê.

¹⁶Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.” gã ri.

Changzô Pê Ê Iyon Hkyô Gi, Gabú Hkyô Taú Dut Rã

¹⁷Yhâng é chángzô pé ra-am gi, “Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.’ gã é eq ‘Ngò gi, Íwã chyáng ló rã nghut é yanmai nghut lhê.’ ga, Yhang taí é gi, haí jung gá nau é nghut lhê lú?” ga, rayuq eq rayuq myí lhum bum akô. ¹⁸Hau htoq agó, yhangmoq gi, “Adê myáng má,’ gã é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo.” ga, taí lhum bum akô nghut ri.

¹⁹Yesuq gi, yhangmoq myi naú kô é hkyô lé sê ri; haú mù, Yhang, yhangmoq lé taí é gi, “Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.’ nghû, Ngò taí é lé, haí jung gá nau lhê laq nghû, rayuq eq rayuq myi lhum nyi akô lú?”

²⁰Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaú é eq iyon yón é hui kó rã nghut lhê. Nungmoq gi, iyon yón é hui kó rã nghut lhê; nghut kôlhang, nungmoq é iyon hkyô gi, gabú hkyô taú dut rã nghut lhê. ²¹Myiwe gi, zoshâng hkû rã nghut jáng, zohkû-nò nò rã ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri. ²²Haú eq rajung za, ahkuí gi, nungmoq iyon yôn é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rã nghut lhê; nungmoq é gabú hkyô haú lé, nungmoq chyáng mai ó yuq eq le wó yu pyám byi rã a nghut. ²³Haú buinyi má, nungmoq gi, Ngo lé, haí le a dung lo kó rã nghut lhê. Ngò, nungmoq lé

teng za tái kôlé, nungmoq gi, Ngá myîng lang luí, Ngá Wâ chyáng hai dung kôle, Yhang byi râ nghut lhê. ²⁴Ahkuí jé shoq, nungmoq gi, Ngá myîng lé lang luí, hai le a dîng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵Ngò gi, nungmoq lé, dangtú dông haú pé tái kyo bê nghut lhê; nghut kôlhang, Ngò gi, dangtú a chûng lô e za, haú Íwa eq sêng é hkyô, nungmoq lé san za tái kyô é ahkyíng jé râ nghut lhê. ²⁶Haú buinyì má, nungmoq gi, Ngá é myîng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghut tái nyi é a nghut. ²⁷Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjîng kô é yanmai, haú Íwa yhang, nungmoq lé chyitdap é nghut lhê. ²⁸Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú lò râ nghut lhê.” gâ ri.

²⁹Haú hkûn, Yesuq é chángzô pé gi, “Ahkuí, Nàng gi, dangtú a chûng é dông, san za tái kyô nyi é nghut bê! ³⁰Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjîng lhê.” ga tái bum akò.

³¹Haú hkûn, Yesuq tû tái é gi, “Nungmoq, ahkuí lumjîng bekò lú? ³²Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut lò byuq râ ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³Nungmoq gi, Ngò má nguóngón hkyô wó kó sháng gaq nghû, Ngò gi, haú hkyô pé lé tái kyô é nghut lhê. Nungmoq gi, mingkan shí má, wuîhke hkyô hui kó râ nghut lhê; nghut kôlhang, myit wum lhoq kîng keq. Ngò gi, mingkan lé ung pyâm bê nghut lhê.” gâ ri.

Yesuq Kyûdûng É Hkyô

17 Yesuq gi, haú su ga tái é htâng má, mauhkûng shut tu wú luí, kyûdûng é gi, “Áwa ê, ahkyíng jé bê nghut ri; haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hú lò nhâng laq ô! ²Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up râ ahkáng, Yhang lé byi tô é yanmai nghut ri. ³Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴Ngò gi, Nàng, Ngo lé wûn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵Áwa ê, haú mingkan lhang a joq shí mai, Ngò, Nàng eq rahá chôm wó é hpungwup shingkang èq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdûng byi é hkyô

⁶Mingkan mai, Nàng, Ngo lé hkyin htoq yù byi é bang lé, Ngò gi, Náng é myîng lhoq htoq shit bê nghut lhê. Yhangmoq gi, Náng é byu pé nghut bekò; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekò nghut ri. ⁷Nàng, Ngo lé byi é lhunglhang gi, Náng chyáng mã é nghut é lé, ahkuí, yhangmoq sé bekò nghut ri. ⁸Hkâsu mù gâ le, Nàng, Ngo lé byi kat é mungdang pé lé, Ngò,

yangmoq lé byi bê nghut lui, yangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yangmoq hkyak sê akô; Nàng, Ngo lé nhang kat é hkyô lé le, yangmoq lumjínng bekô nghut ri. ⁹Ngò gi, yangmoq é matú kyûdung byí lhê. Ngò gi, haú mingkan byu pê é matú dung byi nyi é a nghut; Nàng, Ngo lé ap byi tô é bang é matú sheq dung byí nyi é ru nghut lhê; hkâsu mù gà le, yangmoq gi, Náng é byu pé nghut akô. ¹⁰Ngò wó é lunglhang gi, Náng é chyat nghut mù, Nàng wó é lunglhang le, Ngá é chyat nghut lhê. Haú mù, Ngò gi, yangmoq má hpungwup shingkang hù é hui bê nghut lhê. ¹¹Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yangmoq le ragùng za wó dut nyi kó sháng gaq, Nàng, Ngo lé byi é, haú Náng mying é a-tsam eq yangmoq lé upzúng nyi aq. ¹²Ngò gi, yangmoq eq rahá nghut nyi é u lé, yangmoq lé upzúng bê nghut lui, Nàng, Ngo lé byí é mying hau eq, yangmoq lé rago zúng bê nghut lhê. Haú Chyúmdang lhoq dik sháng gaq ga, haú bang mã é htên byoq hui râ sù mai lai lui, ó yuq le a byuq byuq é nghut lhê.

¹³Ngò gi, ahkuí, Náng chyáng lò râ nghut bê; nghut kôlhang, Ngá é gabú hkyô gi, yangmoq chyáng bying jup sháng gaq nghú, Ngò gi, haú pé lé mingkan má tai é nghut lhê. ¹⁴Ngò gi, yangmoq lé, Náng é mungdang byi bê nghut lhê; haú mingkan gi, yangmoq lé a jú nghut ri; hkâsu mù gà le, Ngò gi, mingkan mã é a nghut é su, yangmoq le, mingkan mã é a nghut kô é yanmai nghut ri. ¹⁵Ngò kyûdung é gi, Nàng, yangmoq lé mingkan mai shuí htoq yú râ matú dúng é a nghut, haú agè ashop su chyáng mai, yangmoq lé up-

zúng yú râ matú sheq dúng é ru nghut lhê. ¹⁶Ngò gi, mingkan mã é a nghut é su, yangmoq le, mingkan mã é a nghut kó. ¹⁷Yangmoq lé, haú tengmán hkyo eq lhoq sân-yúng yú laq; Náng é mungdang gi, tengmán hkyô nghut ri. ¹⁸Nàng, Ngo lé, mingkan mã nhang hâng kat é su, Ngò le, yangmoq lé, mingkan mã nhang hâng kat é nghut lhê. ¹⁹Yangmoq lé, tengmán hkyô má wó lhoq sân-yúng yú kó sháng gaq nghú, Ngò gi, yangmoq é matú, yhumsing gùng lé lhoq sân-yúng yu é nghut lhê.

Lumjínng Bang Lunglhang É Matú, Yesuq Kyûdung Byí É Hkyô

²⁰Ngò gi, yangmoq é matú baú za kyûdung byí é a nghut; Yangmoq é danglu é yanmai, Ngo lé lumjínng kó râ bang é matú le, Ngò kyûdung byí é nghut lhê. ²¹Haú mù, yangmoq banshoq bang gi, rading ralhüm za dut nyi kó sháng gaq. Haú mingkan gi, Nàng, Ngo lé nhang kat é hkyô lé wó lumjínng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yangmoq le, ngá hpe má nyi nyi kó sháng gaq. ²²Ngá hpe gi, ragùng za nghut é su, yangmoq le, rading ralhüm za dut nyi kó sháng gaq nghú, Ngò gi, Nàng, Ngo lé byí é hpungwup shingkang lé, yangmoq lé byi bê nghut lhê. ²³Nàng, Ngo lé nhang kat bê hkyô eq Nàng, Ngo lé chyitdap é su, yangmoq lé chyitdap é hkyô lé, haú mingkan wó sé râ matú, yangmoq gi, gumjup shoq rading ralhüm za wó dut kó sháng gaq nghú, Ngò gi, yangmoq má nyi nyi lui, Nàng gi, Ngò má nyi nyi é nghut lhê.

²⁴Áwa ê, haú mingkan lhang a joq shi mai, Nàng, Ngo lé chyitdap lui byi tô é hpungwup shingkang haú lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Áwa ê, haú mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akò nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirá nghut lhê.” ga ri.

Yesuq Chyup Yú Huí É Hkyô

Mht 26:47-56; Mrk

14:43-50; Luk 22:47-53

18 Yesuq gi, haú su ga kyúdüng é htâng má, Yhâng é chángzô pé eq rahá, Kedron wuikhung mai lai byit dap ló luí, haú hpoq má joq é hkyâm ralhüm má wang e akò nghut ri.

² Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám râ sù Yudaq le sê ri. ³ Haú mù, Yudaq gi, haú hkyangjong agyi pé eq Hparishe pê chyáng mai nhang kat é noqkuq yhüm zúng bang ra-am eq gyezo rajüm lé, haú jowò shut shuí wang lé lo ri. Haú bang gi, myihu, myibung eq shâm lhâm pé chung lé lo akò.

⁴ Yesuq gi, Yhang má dut lò râ hkyô lhunglháng lé sé gú nghut mù, htoq ê luí, yhangmoq lé, “Nungmoq, ó yuq lé ho akò lhú?” ga myí ri.

⁵ Haú hkûn, yhangmoq gi, “Nazaret wà byù Yesuq lé ho lhê.” ga tú tai kôjáng, Yesuq gi, “Ngò gi, haú yuq nghut lhê.” ga tai ri. (Yesuq lé ap pyám sù Yudaq le, yhangmoq eq rahá yap tô ri.) ⁶ “Ngò gi, haú yuq nghut lhê.” ga Yesuq tai kat é hkûn jáng, yhangmoq gi, nungzut zut mù, myigùng má lêng leq ló bum akò nghut ri.

⁷ Yhang gi, “Nungmoq, ó yuq lé ho akò lhú?” ga, yhangmoq lé dum myí kat jáng,

yhangmoq gi, “Nazaret wà byù Yesuq lé ho lhê.” ga tai akò.

⁸ Haú hkûn, Yesuq gi, “Ngò gi, haú yuq nghut lhê nghû, nungmoq lé tai kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq.” ga tú tai ri. ⁹ Haú gi, “Nàng, Ngo lé byí tô é bang rayuq le lháng, Ngò, a lhoq hpyuq pyám.” ga, Yhang tai tô é dang dik râ matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byí ri. (Dui-nhâng zoshâng haú yuq é mying gi, Malhku ga ri.)

¹¹ Haú mù, Yesuq gi, Petruq lé, “Náng é shâm lé, shambyâng má xâng pyám aq! Haú Íwa, Ngo lé byí é góm[‡] lé, Ngò a shuq é wó nyí râ lhú?” ga tai kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pê é ming-suwún wuí gi, Yesuq lé chyup yú mù, tú akò nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akò nghut ri. ¹⁴ Kayahpaq gi, byu pê é matú rayuq shí hkám byí le je gè râ nghut lhê ga, haú Yudaq byu pé lé hpaqchyí byí é sù yuq nghut ri.

Yesuq Lé, Petruq Sâng-hi Dam He-ngik Pyám É Hkyô

Mht 26:69-70; Mrk

14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akò nghut ri. Gotú chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló

[‡]18:11 Góm lé shuq gâ é gi, jamjau hui râ eq shí hkám râ lé, tai nau é nghut lhê.

ri. ¹⁶ Petruq kúm gi, hkúmdong shinggan má lánq yap tô ri. Haû hkyangjong mó lé rago sê é sũ, gotû chángzo haû yuq gi, taû htoq lô mù, hkum zúng é myiwe myhí lé taí luí, Petruq lé shuí hânq yu ri.

¹⁷ Haû hkûn, haû hkum zúng é myiwe myhí gi, Petruq lé, “Nànq gi, haû yuq é chángzô pé mâ é rayuq a nghut lú?” ga myi jánq, yhang gi, “Ngò a nghut.” ga tú taí ri.

¹⁸ Haû u lé, gyoq é yanmai, dui-nhânq zoshânq wuè eq noqkuq yhûm zúng bang gi, yhangmoq gyoq gânq râ matú myigyê èq mut tô é myihkýóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

**Yesuq Lé, Hkyangjong Mó
Myí Choq Wú É Hkýô**

*Mht 26:59-66; Mrk
14:55-64; Luk 22:66-71*

¹⁹ Haû u lé, haû hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

²⁰ Haû hkûn, Yesuq gi, “Haû mingkan htoq má, Ngò, de de taí bê nghut lhê. Ngò gi, haû Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq. ²¹ Nànq, haí mù Ngo lé myi lhê lú? Haû, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri.” ga tú taí ri.

²² Yesuq haû su ga taí jánq, haû nàm má nyi tô é noqkuq yhûm zúng sũ rayuq gi, Yhang lé pyuq kat luí, “Hkyangjong mó lé wá, Nànq, haû su nghû dang tú lhê lú?” ga taí ri.

²³ Haû hkûn, Yesuq gi, “Ngò taí shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é đông ru taí le nhîng, nânq, haí mù Ngo lé pyuq lhê lú?” ga tú taí ri. ²⁴ Hau htânq, Anna

gi, Yhang lé tuí to gù, haû hkyangjong mó Kayahpaq chyánq dé kat nhang ri.

**Yesuq Lé, Petruq Xoq
He-ngik Pyâm É Hkýô**

*Mht 26:71-75; Mrk
14:69-72; Luk 22:58-62*

²⁵ Haû Simun Petruq gyoq gang yap tô é hkûn, “Nànq gi, Yhâng é chángzô pé mâ é rayuq a nghut lú?” ga, yhang lé myi kôjânq, yhang gi, “Ngò a nghut.” ga, dum he pyâm ri.

²⁶ Haû Petruq èq nohkyap zân hpyit pyám byí é huí su é buinùm nghut é sũ, haû hkyangjong mó é dui-nhânq zoshânq rayuq gi, yhang lé, “Haû hkyâm má, nânq, Yhang eq rahá nghut nyi é lé, ngò a myang é su ngam lhê lú?” ga taí ri. ²⁷ Haû hkûn, Petruq gi, xoq he pyám ri; haû u yhang, woq tûn bê nghut ri.

**Pilat É Myoq Hí Má, Yesuq
Jé Nyi É Hkun Lhê Hkýô**

*Mht 27:1-2, 11-14; Mrk
15:1-5; Luk 23:1-5*

²⁸ Hau htânq, yhangmoq gi, Yesuq lé, Kayahpaq chyánq mai, haû mauzau hpô é yhûmwàng shut shuí e lô akô. Haû u gi, napsûn noq ashî nghut ri. Yhangmoq gi, agot a-û a dut e za, htûngli đông Lhoql-hai Poí lé wó zo râ matú, yhûmhkaû má a wàng kó nghut ri. ²⁹ Haû mù luí, mauzau Pilat gi, yhangmoq chyánq htoq ê mù, “Shí yuq lé, nungmoq hai mara hûn nau akô lú?” ga myí ri.

³⁰ Haû hkûn, yhangmoq gi, “Shí yuq, a ge é muzó kut é a nghut le gi, Yhang lé, nânq é loq má ngamoq lé ap byi râ a nghut.” ga tú taí akô.

³¹ Pilat gi, “Yhang lé, nungmoq yhang shuí lô mù, nungmoq é tarâ đông lô jéyánq keq.” ga taí jánq, haû Yudaq byu pé gi, “Nghut kôlhang, ngamoq gi, ó yuq lé sat râ ahkánq le a wó é nghut lhê.” ga tú taí akô nghut ri. ³² Haû su dut é hkyô

gi, Yesuq, Yhang hká đông shî râ ga tai é dang lé lhoq dik râ matú nghut lhê.

³³ Haú mù, Pilat gi, yhúmhkaú má taú wang ló mù, Yesuq lé wut yù luí, “Nàng gi, Yudaq byu pê é hkohkâm nghut lhê lhú?” ga myí ri.

³⁴ Haú hkún, Yesuq gi, “Haú gi, náng é myit đông tai é nghut lhê lhú? A nghut jáng, góbang mai, nang lé, Ngá é hkyô tai kyo luí nghut lhê lhú?” ga taú myí ri.

³⁵ Pilat gi, “Ngò gi, Yudaq byù nghut lhê lhú? Haú Nàng é byù myù eq Nàng é hkyangjong agyi pé sheq, Nang lé, ngá loq má ap byí é ru nghut lhê. Nàng gi, haí kut é nghut lhê lhú?” ga dum myí ri.

³⁶ Haú hkún, Yesuq gi, “Ngá é mingdán gi, mingkan shî eq a sêng. Mingkan shî eq sêng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chòm hung yù kó râ nghut lhê. Nghut kôlháng, Ngá é mingdán gi, mingkan shî eq a sêng é ru nghut lhê.” ga tai ri.

³⁷ Haú mù, Pilat gi, “Haú jáng, Nàng gi, hkohkâm nghut bê lhú?” ga myí jáng, Yesuq gi, “Ngo lé, hkohkâm nghut lhê ga, nàng tai nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq sêng é sù ó yuq le, Ngá é dang lé gyô ri.” ga tú tai ri.

³⁸ Haú hkún, Pilat gi, “Tengmán hkyô gá é gi, haí jung lhú?” ga myí ri. Yhang gi, haú su ga myí luí, haú Yudaq byu pê chyáng dum htoq ê mù, “Shí yuq chyáng mara hún râ hkyô, ngò a myàng nghut ri. ³⁹ Nghut kôlháng, haú Lhoqlhai Poí u lé, nungmoq é matú, ngò, htóng byú rayuq nhang htoq kat byi byi kut é htúng, nungmoq wó akô. Haú mù, 'Yudaq byu pê é hkohkâm' lé, nhang htoq kat byi râ lé, nungmoq ô nau akô lhú?” ga myí ri.

⁴⁰ Haú hkún, yhangmoq gi, “Haú yuq lé a nghut! Barabaq lé sheq nhâng byi aq.” ga, garú kat akô. Barabaq gi, damyaq nghut ri.

Yesuq Lé, Tapzîng Má Jén Sat Râ Matú Doqdân É Hkyô

*Mht 27:15-31; Mrk
15:6-20; Luk 23:13-25*

19 Haú mù luí, Yesuq lé lãng she yù mù, nhuq bat râ matú, Pilat hkunmó hkyô ri. ² Haú gyezô pé gi, zu-janmaú saí yù kôluí, Yesuq é ulhum má tsung byi kômù, Yhang lé, buhîng nè hut byí akô nghut ri. ³ Hau htàng, yhangmoq gi, Yhâng chyáng dum huí é ê kut luí, “Yudaq byu pê é hkohkâm ê! Chyung hîng xê hing nyi sháng gaq ô!” ga tai kômù, Yhâng é myoqdong má pyuq byí akô nghut ri.

⁴ Pilat gi, haú Yudaq byu pê chyáng radàm dum htoq ê mù, “Wú keq, shí yuq chyáng mara hún râ hkyô, ngò a myang é lé nungmoq sé sháng nghú, Yhang lé, ngò nungmoq chyáng shuí htoq lé byí lhê.” ga tai ri. ⁵ Yesuq gi, haú zumuq tsung tô é eq bu nè hîng wut to mù htoq lé jáng, Pilat gi, yhangmoq lé, “Wú keq, Yhang, shí yuq nghut lhê.” ga tai ri.

⁶ Haú hkyangjong agyi pé eq yhangmoq é noqkuq yhúm zúng bang gi, Yhang lé myang kat kôjáng, “Yhang lé tapzîng má jén sat pyám aq! Yhang lé tapzîng má jén sat pyám aq!” ga garú bum akô.

Nghut kôlháng, Pilat gi, “Nungmoq shuí yù mù, tapzîng má jén sat keq. Ngò gi, Yhâng chyáng mara hún râ hkyô a myàng.” ga tú tai ri.

⁷ Haú hkún, haú Yudaq byu pé gi, “Ngamoq chyáng tarâ rahkat joq lhê; tarâ haú đông ga jang, Yhang gi, shî gíng bê nghut ri; hkâsu mù gâ le, Yhang gi, Garai Gasâng é Yhangzo haú nghut lhê gâ ri.” ga xoq tai akô.

⁸Pilat gi, dang haû lé wó gyo jáng, je gyô gyuq luí, ⁹yhúmhkaû shut dum wang ló mù, Yesuq lé, “Nàng, hkâmâ é sù nghut lhê lú?” ga myí ri. Nghut kôh- hang, Yesuq gi, dang rahkun lhang a tú taí byi nghut ri. ¹⁰Haú hkûn, Pilat gi, “Nàng, ngo lé a tú taí kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?” ga myí ri.

¹¹Yesuq gi, “Nàng lé, haû ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haû mù luí, Ngo lé, náng é loq má ap byí é sù gi, mara je bo é nghut lhê.” ga tú taí ri.

¹²Haú hkûn mai, Pilat gi, Yesuq lé lhoq lhut kat byi nau nyì bê nghut ri. Nghut kôhlang, haû Yudaq byu pé gi, “Nàng, haû yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gà é sù gi, hkoséng Kehtaq eq shai lhûm é sù nghut lhê.” ga, ru jâng garû nyì bum akô nghut ri.

¹³Haú lé wó gyo jáng, Pilat gi, Yesuq lé shuí htoq ê mù, Hebre myíng đông Gabahta gà é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴Haú u gi, Lho- qlhai Poí é matú, Hên Lajâng é Buinyì nyí-káng raxe í hkyíng nghut ri.

Pilat gi, haû Yudaq byu pé lé, “Nung- moq é hkohkâm lé wú keq.” ga taí ri.

¹⁵Nghut kôhlang, yhangmoq gi, “Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!” ga garû bum akô.

Haú hkûn, Pilat gi, “Nungmoq é hkohkâm lé wá, ngò, tapzîng má jén sat pyám râ lú?” ga myí jáng, haû hkyangjong agyi pé gi, “Haú hkoséng Ke- htaq mai lai luí, gotú hkohkâm ngamoq a wó.” ga, tú taí akô nghut ri.

¹⁶Hau htâng má, Pilat gi, Yesuq lé tapzîng má jén sat pyám râ matú, yhang-

moq é loq má ap byí kat bê nghut ri. Haû mù luí, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô

*Mht 27:32-44; Mrk
15:21-32; Luk 23:26-43*

¹⁷Yesuq gi, yhumsing é tapzîng lé waq mù, Hebre myíng đông Golgahta gà é, Ugyap joq é Jowò gà é jang má htoq jé e ri. ¹⁸Yhangmoq gi, haû má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹Pilat le, masat laiká kê yù luí, haû tapzîng htoq má tap tô ri. Haû má gi, “YUDAQ BYU PÊ É HKOHKÂM, NAZARET WÀ BYÙ YESUQ” gà tô ri. ²⁰Yesuq lé jén tô é jowò gi, myuq eq chyâng lhûm é htoq agó, haû masat laiká gi, Hebre đông le, Latin đông le, Grik đông le, kê tô é yanmai, haû Yudaq byu pé myo myo gi, masat laiká haû lé nghap bum akô nghut ri. ²¹Haú Yudaq byu pé é hkyangjong agyi pé gi, Pilat lé, “Yudaq byu pé é hkohkâm' nghú hkâkâ, 'Ngò gi, Yudaq byu pé é hkohkâm nghut lhê ga, Yhang taí ri.' nghú luí sheq ká aq.” ga taí akô.

²²Haú hkûn, Pilat gi, “Ngò kê é đông, ngò kê to bê nghut lhê.” ga tú taí ri.

²³Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haû ahte bu lé le, gàm râ dê akô; nghut kôhlang, haû gi, hkyupshi a bo e za, awang mai ahpyo hpyot kut woq tô é nghut ri.

²⁴Haú mù, yhangmoq gi, “Bu shí lé gi, a lêng cheq e za, ó yuq myang yù ang râ laq, hkyîn shosé she wú sháng.” ga, rayuq eq rayuq taí lhum akô.

Haû gi,

“Yhangmoq, Ngá é mebu lé chôm gam yù kó râ; Ngá é ahtê bú é matú, hkyîn shosé shê kó râ nghut lhê.”^e gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà má é Mariq pé, yap tô bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, “Ânu ê^f nung zo lé wú aq.” ga taí mù, ²⁷ chángzo haû lé le, “Náng nu lé wú aq.” ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhûm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, “Ngò, wuì shit ri.” ga taí ri. ²⁹ Haû má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haû má jum yù luí, jàm-yang ahyo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wing chyîn haû lé shuq yù mù, “Mù bàn bê.” ga taí ri. Yhang, haû su ga taí eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyì nghut luí, haû nyí gi, Hên Lajang Buinyì nghut ri. Haû mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pi-

lat chyáng dúng tôngbán akô. ³² Haû mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánq bê nghut é lé myàng kômù, Yhâng é hkyí lé a bat hkyuí byi kó nghut ri. ³⁴ Nghut kôlhang, gyezo rayuq gi, Yesuq é namcham má lham èq htaù kat byi jáng, radám dâm sui eq wuì yui htoq lo ri. ³⁵ Haû lé myàng é sù gi, saksé hkám byí ri; yhâng saksé hkâm é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri. ³⁶ Haû hkyô pé dut é gi, “Yhâng é showui rahkat lháng a lhoq hkyuí râ nghut lhê.”^f gâ é Chyúmdang haû lhoq dik râ matú nghut lhê. ³⁷ Chyúmdang gotù ralhummá le, “Yhangmoq èq htaù htông é sù lé, yhangmoq tu wú kó râ nghut lhê.”^g gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byú Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byí kat jáng, yhang gi, gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé é huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum htông eq rajung za, namngón jung eq rahá, pán yúng èq htup yup to byí akô.

^f19:26 Ânu ê, gâ é lé, Grik đông gi, “myiwe myhí ê” ga bo tô é nghut lhê.

^e19:24 Hkya-on 22:18 ^f19:36 Htoq Ló 12:46; Gyung So 9:12; Hkya-on 34:20
^g19:37 Zhk 12:10

⁴¹ Haù Yesuq lé tapzîng má jén sat pyâm é jowò nàm má, hkyâm ralhùm joq ri; ó yuq lé le a lheq wú shî é, lup sik ralhùm hkyâm hkaù má joq tô ri. ⁴² Haù nyí gi, Yudaq byu pè é Hên Lajang Buinyì nghut é yanmai le, lup haù le chyâng é yanmai le, yhangnhik gi, Yesuq lé, haù má é lheq tô akò nghut ri.

Lup Akôm

Mht 28:1-10; Mrk 16:1-8; Luk 24:1-12

20 Bánno buinyì htâng, napsûn noq le mau a bó shimá, Magadalaq wà mâ é Mariq gi, haù lup má é jé le, lup hkum mâ é luqlong huí hpyuq to lánq é lé myang ri. ² Haù mù, yhang gi, Simun Petruq eq Yesuq chyitdap é chángzo góyuq chyáng dín jé ló mù, “Haù Yhumsîng lé, lup mai yu htoq ló byuq bekô; hkâmá ê kat to kô é lé, ng-amoq a sé.” ga taí ri.

³ Haù mù, Petruq eq chángzo haù gi, lup shut e ló akò. ⁴ Yhangnhik í yuq é dín akò; nghut kôlhàng, chángzo haù gi, Petruq htoq má wó dín luí, lup má hí dín jé e ri. ⁵ Haù mù, yhang gi, ahkaù shut ngóm wú kat é hkûn, haù pán yúng htui leq tô é lé myang ri; nghut kôlhàng, yhang gi, a wang é nghut ri. ⁶ Hau htâng, Simun Petruq gi, châng jé luí, lup hkaù shut wang e ri; haù hkûn, yhang gi, haù má pán yúng htui joq tô é lé le, ⁷ haù Yesuq é ullhum má htup é panchoq lé le, myang ri. Panchoq haù gi, pán yúng htui eq rahá a nghut e za htui jup leq tô ri. ⁸ Haù lup má hí jé é chángzo le, ahkaù má wang é luí, myàng jáng, lumjîng bê nghut ri. ⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haù chángzô nhik gi, yhùm taù ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhàng, Mariq gi, lup shing-gan má ngau yap tô ri. Yhang gi, ngaù uchyang lup hkaù má ngóm wú kat ri. ¹² Haù hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyí htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, “Myiwe myhí ê, nàng, haí mù ngau nyi lhê lhú?” ga myi kôjáng, yhang gi, “Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê.” ga tû taí ri. ¹⁴ Haù su ga luí, yhang, lhing wú kat é hkûn, Yesuq yap tô é lé myàng kôlhàng, Yesuq nghut é lé yhang a wú sé nghut ri.

¹⁵ Yesuq gi, “Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?” ga myi jáng, yhang gi, hkyâm saí zo sù su ngam pyám mù, “Sarà ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ.” ga taí ri.

¹⁶ Haù hkûn, Yesuq gi, yhang lé, “Mariq ê” ga wut kat ri.

Mariq gi, Yhâng shut lhîng mù, Hebre myíng dông, “Raboni!” ga wut kat ri. (Haù gi, “Sarà ê” gâ é lichyúm nghut ri.)

¹⁷ Yesuq gi, “Ngo lé hkâzáng shi; hkâsu mù gâ le, Ngò gi, haù Íwâ chyáng a taù doq ló shí é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló taí kyo aq.” ga, yhang lé taí kat ri.

¹⁸ Magadalaq wà mâ é Mariq gi, chángzô pè chyáng ló mù, “Yhumsîng lé,

ngò myàng bê!” ga tái luí, yhang lé shit kat é pé lé, tái kyô ri.

**Yesuq, Yhâng É Chángzô Pé
Lé Htoq Shit É Hkyô**

*Mht 28:16-20; Mrk
16:14-18; Luk 24:36-49*

¹⁹Haú nyí, Bánno buinyi htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, “Nungmoq nguingón yuqyo nyí sháng gaq!” ga tái ri. ²⁰Yhang gi, haú su ga tái é htâng má, yhangmoq lé, Yhâng é loq pé eq namcham lé tún shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

²¹Yesuq gi, “Nungmoq nguingón yuqyo nyí sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê.” ga dum tái ri. ²²Haú su ga tái mù, Yhang gi, yhangmoq é ahtôq má soq mut luí, “Haú Chyoiyúng Woi-nyí lé hap yù keq. ²³Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui rã nghut lhê; nungmoq a hkyut byí é nghut jáng, mara haú pé gi, hkyut pyâm é hui rã a nghut.” ga tái ri.

Htomaq Lé, Yesuq Htoq Shit É Hkyô

²⁴Haú chángzô raxe í yuq má bo é, Zozúm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. ²⁵Haú mù luí, gotú chángzô pé gi, yhang lé, “Haú Yhumsîng lé, ngamoq myàng bê.” ga tái kyô akô.

Nghut kôlhang, yhang gi, yhangmoq lé, “Ngò gi, Yhâng é loq pé mâ é shamtoq zuhkô lé myàng mù, ngá é loqnyhui èq joí wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjîng rã a nghut.” ga tái ri.

²⁶Rabat myáng jáng, chángzô pé gi, haú yhúmkaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhí to kôlhang, Yesuq gi, lé jé mù, yhangmoq é agùng má yap to luí, “Nungmoq nguingón yuqyo nyí sháng gaq!” ga tái ri. ²⁷Hau htâng, Yhang gi, Htomaq lé, “Náng é loqnyhui, shí má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq.” ga tái ri.

²⁸Haú hkûn, Htomaq gi, “Ngá é Yhumsîng, ngá é Garai Gasang é!” ga Yhang lé tái ri.

²⁹Yesuq gi, yhang lé, “Nàng gi, Ngo lé myang é yanmai, lumjîng é a nghut lhu? A myàng kôlhang, lumjîng é bang gi, hkungsô wó nyi ri.” ga tái ri.

³⁰Laiká buk shí má a kê tô é limik kumlhá pé gotú myo myo lé le, Yesuq gi, Yhâng é chángzô pê hí má kut shit bê nghut ri. ³¹Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng rã matú eq, lumjîng é yanmai, nungmoq Yhâng é myîng má asak wó kó rã matú, shí hkyô pé lé kê tô é nghut lhê.

Ngozo Wó Chyup Yu É Limik Kumlhá

21 Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri. ²Simun Petruq, Zozúm le gâ é Htomaq, Galile mau Hkanaq và mó mâ é Nahtanelaq, Zebedi é yhangzo nhik eq gotú chángzô í yuq pé gi, rahá nyi to bum akô. ³Haú hkûn, Simun Petruq gi, yhangmoq lé, “Ngò gi, ngozo kóng ê rã.” ga tái jáng, yhangmoq gi, “Ngamoq le châng lé rã.” ga tái akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lhang a wó kóng kó nghut ri.

⁴Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haû chángzô pé gi, Yesuq nghut é lé a wú sé kó nghut ri.

⁵Yesuq gi, yhangmoq lé, “Luzúm wui ê, nungmoq, ngozo wó akô lhú?” ga, wut myi kat jáng, yhangmoq gi, “A wó.” ga tû taí akô.

⁶Haû hkûn, Yhang gi, “Nungmoq é gùn lé, haû lhai é loqyo hkyam shut dú hkyô kat keq; haû jáng, nungmoq wó kông yù kó râ nghut lhê.” ga taí ri. Haû mù, yhangmoq gi, gùn dú hkyô kat é hkûn, ngozo lúm myô é yanmai, haû gùn lé lhang a wó llang yù lo kó nghut ri.

⁷Haû mù luí, haû Yesuq chyitdap é chángzo gi, Petruq lé, “Yhumsing ru nghut ri.” ga taí ri. Simun Petruq gi, “Yhumsing ru nghut ri.” gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhang é gùng má baíyup yù mù, wui hkaû má byam wang ló bê nghut ri. ⁸Haû chángzo góbang gi, wuiyàm eq ngo xê làm kô za wê é yanmai, ngozo bying tô é gùn lé, wuiyàm shut lhai mai she jé lo akô nghut ri. ⁹Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk rat-suí joq tô é lé le, myang akô.

¹⁰Yesuq gi, yhangmoq lé, “Haû, ahkúi za nungmoq wó kông yu é ngozo, ra-am yù lé keq.” ga taí ri.

¹¹Haû mù, Simun Petruq gi, lhai má doq ji luí, kô é ngozo rasha ngó xe sùm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri. ¹²Yesuq gi, yhangmoq lé, “Napzang lé zo keq.” ga taí ri. Chángzô pé gi, Yhang, haû Yhumsing nghut é lé sé kô é yanmai, ó yuq lhang, “Nàng, ó yuq nghut lhê?” ga, a wám myi kó nghut ri. ¹³Yesuq gi, lé mù, muk lé ê yù luí, yhangmoq lé byí ri; ngozo lé le,

haû su kut ri. ¹⁴Yesuq gi, shi é mai lhoq dui toq yù huí é htang, Yhang é chángzô pé lé htoq shit é má, shi gi, sum dâm nghut râ dâm nghut ri.

Yesuq Eq Petruq

¹⁵Yhangmoq bàn zô bùm kô é htang má, Yesuq gi, Simun Petruq lé, “Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhú?” ga myi jáng, yhang gi, “Nghut lhê; Yhumsing ê, ngò, Nàng lé chyitdap é hkyô lé, Nàng sê lhê.” ga tû taí ri. Haû hkûn, Yesuq gi, “Ngá é sau zô pé lé, baú aq.” ga, yhang lé taí ri.

¹⁶Hau htang, Yesuq gi, “Yohan é yhangzo Simun ê, nàng gi, Ngo lé teng za chyitdap lhê lhú?” ga dum myi jáng, yhang gi, “Nghut lhê; Yhumsing ê, ngò, Nàng lé chyitdap é hkyô lé, Nàng sê lhê.” ga tû taí ri. Haû hkûn, Yesuq gi, “Ngá é sau pé lé, rém aq.” ga taí ri.

¹⁷Dum radàm, Yesuq gi, yhang lé, “Yohan é yhangzo Simun ê, nàng gi, Ngo lé chyt lhê lhú?” ga myí ri.

Haû hkûn, Petruq gi, “Nàng gi, ngo lé chyitdap lhê lhú?” ga, yhang lé Yesuq eq sùm dam dâm taí é yanmai, yhang myit nò luí, “Yhumsing ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê.” ga taí ri.

Haû hkûn, Yesuq gi, “Ngá é sau pé lé, baú aq. ¹⁸Ngò, nàng lé teng za taí lé, nàng, zorâm nghut é hkûn gi, yhumsing gùng yhumsing hpyihit baíyup^s yù mù, ê nau é jowò hkanmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyup èq hpyihit baíyup byi mù, nàng a ê nau é jowò shut shuí ê râ nghut lhê.” ga taí ri.

¹⁹(Yesuq haû su ga taí é gi, haû Petruq, hkâsu kut shi é đông mai, Garai Gasang é hpungwup shingkan lé dan hu nhâng râ nghut é lé, taí nau é nghut ri.) Hau

^s21:18 *Hpyihit baíyup* gâ é lichyúm gi, mebu wut luí ri ri kut tô é lé gâ lhê.

htâng, Yesuq gi, yhang lé, “Ngá htâng cháng aq.” ga tâi ri.

²⁰ Haú hkûn, Petruq gi, lhîng wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, “Yhum-sîng ê, Nang lé ap pyám rã sũ gi, ó yuq lhú?” ga, myi wú é sũ nghut ri. ²¹ Petruq gi, haú yuq lé myàng jáng, Yesuq lé, “Yhumsîng ê, shí yuq gi, hkâsu dut rã lhú?” ga myí ri.

²² Yesuq gi, “Ngò jé lé é hkûn jé shoq, Ngò, yhang lé dui nyì nhâng nau é nghut le gi, nàng eq haí sêng lhê lhú? Nàng gi, Ngá htâng cháng aq.” ga tâi ri. ²³ Dang hau é yanmai, chángzo haú yuq a shí

rã nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí rã hkyô lé taí é a nghut, “Ngò jé lé é hkûn jé shoq, Ngò, yhang lé dui nyì nhâng nau é nghut le gi, nàng eq haí sêng lhê lhú?” ga, taí é ru nghut lhê.

²⁴ Shí pé lé saksé hkám mù, shí pé lé kê tô é sũ gi, chángzo haú yuq nghut lhê. Yhâng é saksé gi, têng é lé, ngamoq sé lhê.

²⁵ Yesuq gi, gotû muzó myo myo le kut ashí nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo rã a nghut nghú, ngò wó myit ri.

LAGYO

Laiká

(Acts)

Yesuq, Mauhkung Má
Shuí Yù Huí É Hkyô

1 Htohpilug ê, Yesuq yhang hkyin yu tô é lagyo pé lé, Chyoiyúng Woi-nyí wum-o èq dang ban pying tô é htàng má, Garai Gasang yhang lé mauhkung shut shuí yu é buinyí jé shoq, ²Yhang kut shit é hkyô pé eq, mhoqshit é hkyô pé ban-shoq lé, hí lhê é laiká buk má ngò kâ kat bê nghut lhê. ³Yesuq gi, shí hkâm é htàng má, Yhang dui toq bê hkyô lé, lumgíng é saksé myo myô èq yhangmoq lé tân shit mù, buinyí myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. ⁴Yhang, yhangmoq eq rahá zup tô é hkún, hkunmó hkyô é gi, “Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ é danggidiq byí tô é chyunghuq lé lánng nyí keq. ⁵Hkâsu mù gà le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyí hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê.” gà ri.

⁶Lagyo pé gi, Yhang eq rahá chôm zup míng tô é hkún, Yhang lé, “Yhumsíng ê, nàng, haú Israellaq byu pé lé mingdán dum xuq byi râ gi, ahkuí yhang nghut bê lhú?” ga myí akô.

⁷Yesuq gi, “Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú

mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksé pé dut kó râ nghut lhê.” ga luí, yhangmoq lé taí ri.

⁹Dang haú ban taí é htàng má, yhangmoq wú nyi le, Yhang gi, mauhkung shut shuí yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰Yesuq doq ló nyi é u lé, yhangmoq mauhkung shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹“Galile byu pé ê, haí mù luí mauhkung shut wú tsuq nyi akô lhú? Nungmoq é hí mai mauhkung shut shuí yù huí é, haú Yesuq mauhkung shut doq ló é u lé, nungmoq myang kat é su, Yhang dum jé lé râ nghut lhê.” ga taí akô.

Yudaq É Jowò Má, Mahtiaq
Lé Hkyin Kat É Hkyô

¹²Hau htàng má, yhangmoq gi, Tsanlun Bùm mai, Yerusalem wà mó shut taú ló bekô.** Haú gyoro gi, Bánno buinyí má ge sô é í za wê ri. ¹³Yhangmoq jé ló kôjáng, yhangmoq nyi nyi kô é yhùm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴Yhangmoq lhungl-hâng bang gi, myiwe wui le, Yesuq é yhângnu Mariq le, yhanggu pé le kut mù, i-myt rahkat za kyú chôm dung dung kut nyi akô.

¹⁵Buinyí haú yoq má, Petruq gi, lumjíng é gumang gu-nhá†† wui rasho í xê yuq kô zup zíng tô é gung gúng má, toq yap mù, ¹⁶“Gumang gu-nhá wui ê, Yesuq lé chyup é bang lé hkyô shuí hí é sù Yudaq eq séng luí, hí hpyang Dawiq

**1:12 Tsanlun bùm eq Yerusalem gyoro gi, déng rawuí hkup kô we ri.

††1:15 Gumang gu-nhá gà é lé, Grik má gi, gumang za gà to lhê.

é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhàng shí hkyô dut bê nghut ri.” ga taí ri.

¹⁸(Yudaq gi, yhang kut é agè ashop é muzò mai wó é ahaup èq myigùng ratóng wui yu é htàng, haú má yhang, a-nghop đông byit gyò mù wam buq goq luí, ù banshoq buq myín byuq bê nghut ri. ¹⁹Haú hkyô lé Yerusalem wà mó má nyi é lhunglhàng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akò; haú gi, 'Sui myigùng', gá é nghut ri.)

²⁰Petruq xoq taí é gi, “Hkâsu mù gâ le, Hkya-on Kungtôn Laiká má, 'Yhâng é jowò chamchyuiyui dut byuq sháng gaq; haú má ó le a nyi kó sháng gaq.^h

ga luí le, dum

'Yhang wó é ayá lé byù góyuq wó yu pyám byi sháng gaq.ⁱ

ga luí le, bo tô ri. ²¹⁻²²Haú mù luí, Yohan baptisma byí hi é hkûn mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê.” gâ ri.

²³Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akò. ²⁴⁻²⁵Haú mù, yhangmoq kyúdung kô é gi, “Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù

lé tún shit laq ò.” ga akò. ²⁶Hau htàng, yhangmoq, byù hkyin shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

Chyoiyúng Woi-nyí Jé Gyó Lo É Hkyô

2 Penteko-ti^{††} buinyi jé jáng, lumjúng bang banshoq gi, jowò rallum má za, chòm zup míng nyi tô akò. ²Haú hkûn, laidun mó lo é su gâ é htê gi, byodàn ratung, mauhkúng mai mying htoq lô mù luí, yhangmoq zing tô é yhùm byíng shoq dut to bê nghut ri. ³Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴Yhangmoq lhunglhàng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akò.

⁵Haú u lé, mauhkúng ô má joq é mingdán hkangmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akò. ⁶Haú mying é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-àng byuq bùm kôluí, ⁷maú bùm uchyang taí kô é gi, “Wú keq, ahkuí dang taí nyi é byù shí bang lhunglhàng gi, Galile byu pé chyat a nghut kó lú? ⁸Haú nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lú? ⁹Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰Hprugi eq Pamhpuli, Egotuq ming má nyi é bang eq Kuru ni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noquq htung má lhing wang lò bang, ¹¹Kreti zinlóng

^{††}2:1 Penteko-ti gâ é gi, Lhoqlhai Poi laí é htàng ngo xê nyí jé é buinyi má, kut é poi lé gâ lhê.

^h1:20 Hkya-on 69:25 ⁱ1:20 Hkya-on 109:8

eq Arabiq mau mâ é bang, nga-nhung gi, yhangmoq hko kyô é Garai Gasang é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung.” gâ ri. ¹²Yhangmoq banshoq bang gi, maú úng-âng byuq kômù, “Shí gi, haí wá nghut lhê l hú?” ga le, rayuq eq rayuq myí lhùm bum akô.

¹³Nghut kôlhang, byù ra-am gi, “Shí bang gi, î shuq wut é bang nghut akô.” ga luí, taí jihpoi bum akô nghut ri.

Petruq Hko Kyô É Mungdang

¹⁴Haú hkûn, Petruq gi, lagyo góbang raxe rayuq eq toq yap mù, htê mó èq byù háu bang lé taí é gi, “Yudaq byu pé eq Yerusalem wà mó má nyí nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé.

¹⁵Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶Shí hkyô kúm gi, myiqhtoi Yoe-laq taí tô é eq rajung za dut é nghut ri.

¹⁷Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun rá nghut lhê.

Haú mù, nungmoq é yuqzo byizô pé gi, myiqhtoi htoi kó rá; nungmoq é zorâm wuì gi, myoqwup shing-rán myàng kó rá; nungmoq é hpaú mâng pé gi, yhupmoq myàng kó rá nghut lhê.

¹⁸Buinyi háu pé má, Ngá é dui-nhâng zoshâng hpô pé eq dui-nhâng zoshâng myhî pé é ahtoq má lháng, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rá nghut lhê.

¹⁹Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumhá pé lé, sui eq, myi

eq, myihkau dùm pé èq kut mù tún shit rá.

²⁰Haú Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rá nghut lhê.

²¹Haú hkûn, Yhumsing é myíng lé lãng é bang yuq hksangmó gi, hkyi yu é hui kó rá nghut lhê.†

gâ ri.

²²Israellaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tún shit é, laklaí kumhá, mauhpo muzó eq kumhá pé gi, Yhang lé Garai Gasang nhang kat é saksé dut bê nghut ri. ²³Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzîng htoq má jén sat pyám nhâng bekô nghut ri. ²⁴Nghut kôlhang, háu shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri.

²⁵Dawiq gi, shí yuq eq séng luí taí é má, 'Haú Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún rá a nghut lo.

²⁶Haú mù, ngá i-myyit gi, nguingón nyi luí, ngá nhut shô gabú hkya-ôn nyi ri;

ngá é gungdu le myit myoqbyù jowó má nyi nyi rá nghut lhê.

²⁷Hkâsu mù gâ le, nàng, ngá é woi-nyí lé mosumhkung má tô pyâm to rá a nghut.

Nàng, náng é Chyoiyúng Sù lé bup byuq é hui nhâng rá a nghut.

²⁸Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi rá nghut lhê.^k gâ ri.

²⁹Gumang wui ê, nga-nhông é íchýi íkê Dawiq kâng byit mù, myhup pyám hui bê hkyô lé le, yhâng é lup gi, hkú-nyí jé shoq nga-nhông chyáng joq tô é lé le, ngò, nungmoq lé a gyuq a kyum wám tái lhê. ³⁰Dawiq gi, myiqhtoi rayuq nghut é yanmai, yhâng é awut ashín má é rayuq lé, yhâng é hkohkâm tanghkuq má zùng nhâng rá ga Garai Gasang byi tô é danggidiq lé sê to mù, ³¹'Hkrisduq'[¶] gi, mosumhkung má pyám to a hui rá eq, Yhâng é gungsho a bup byuq é za, dum dui toq ló rá nghut lhê.', gâ é hkyô lé te sê to luí tái tô ri. ³²Garai Gasang gi, haú Yesuq lé lhoq dui toq yù bê. Ngamoq banshoq bang gi, haú hkyô é saksê pé nghut nyi ri. ³³Haú mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. ³⁴⁻³⁵Hkâsu mù gâ le, Dawiq gi, mauhkúng htoq tsáng myhâng má a doq ló wú kôlhâng, yhang gi, 'Haú Yhumsing Garai gi, ngá é Yhumsing lé,

“Ngò, náng é gye pé lé, náng é hkyí nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq.” gâ ri.^l ga luí, tái ri.

³⁶Hau é yanmai, Garai Gasang gi, nungmoq èq tapzîng má jén sat pyám é

haú Yesuq lé, Yhumsing eq Hkrisduq dut nhang é hkyô, Israelaq byu pé lhungl-hâng bang hkyak sê nyi kó sháng gaq ô.” gâ ri.

Sâng-hi Lumjîng É Bang

³⁷Yhangmoq gi, haú lé wó gyô bùm kôjáng, yhangmoq é i-myt má záng kô é nghut mù luí, “Gumang wui ê, ngamoq hkâsu kut lo rá lhú?” ga luí, Petruq eq lagyo góbang lé myí akô.

³⁸Petruq gi, “Nungmoq yuq hkgamgô myit lhîng mù, Yesuq Hkrisduq é myîng mai wui-myhup hkâm yù keq; Haú jáng, nungmoq é yubak hkyut pyám byí é hui kó rá nghut lhê. Haú hkún, Chyoiyúng Woi-nyí gâ é chyunghuq lé, nungmoq wó yù kó rá nghut lhê. ³⁹Hkâsu mù gâ le, danggidiq haú gi, nga-nhông é Yhumsing Garai Gasang ji yù rá bang banshoq nghut é, nungmoq eq nungmoq é yhangzo yhangshú pé eq le, mau we má nyi é lhungl-hâng bang eq le, sêng lhê.” ga luí, yhangmoq lé tái kyô ri.

⁴⁰Yhang gi, dang gotû myo myô èq le saksé hkâm mù, “Shí agè ashop é amyú mai wó lut htoq lo keq ô!” ga luí, yhangmoq lé lhoq pun lhoq kyîng ri. ⁴¹Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴²Haú bang gi, lagyo pé mhooqshit é hkyô, zùm yap é hkyô, muk hpê gam é hkyô^{§§} eq akyú dúng é hkyô má, i-myt rahkat za chôm châng nyi akô.

⁴³Lagyo pé kut shit é mauhpo muzó eq limik kumlhá pé myo myô é yanmai, lhungl-hâng bang gi, gyuq maú nyi bum

^{¶¶}2:31 Grik dong *Hkrisduq* gâ é gi, xû but hui Sû gâ é lichyúm nghut mù, Hebre dong *Mesaia* gâ é eq rajung za nghut lhê.

^{§§}2:42 *Muk hpê gam hkyô* gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, *Poido* chôm zô é lé gâ lhê.

akô nghut ri. ⁴⁴Lumjîng é lhunglhâng bang gi, rawò má za zup zîng to mù, azîng zè banshoq lé chôm chung nyi akô. ⁴⁵Yhangmoq gi, yhumsing é sutzè pé lé, ûng pyám mù, yuq hkangmó lé, yhang râ tô é eq rajung za gàm byî akô. ⁴⁶Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, ⁴⁷Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsîng gi, nyí wuí yhangmoq chyáng hkyi yù hui bang jat lò nhang ri.

Hkyî Hten Sû Rayuq Lé, Petruq Lhoq Gê Byî É Hkyô

3 Ahkuí, Petruq eq Yohan gi, myin-htâng zó sum hkyíng lhê é kyûdung nám má, noqkuq yhûm shut doq e ló akô. ²Haú hkûn, înú unghkaú mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. ³Yhang gi, Petruq eq Yohan, noqkuq yhûm haú má wang e ló é lé, myàng luí, lhom dîng nyi ri. ⁴Petruq eq Yohan kúm gi, yhang lé chôm wú tsuq to mù, “Nga-nhik lé tu wú aq.” gâ akô. ⁵Haú mù, yhang, yhangnhik chyáng mai rajung jung wó yû râ lé myit myoqbyù luí, yhangnhik lé rago za saí wú tô ri.

⁶Petruq kúm gi, “Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq.” ga taí uchyang, ⁷yhâng é loqyo loq má zui mù lîng toq kat ri; haú hkûn jáng, yhâng é hkyî kochang-chap pé wúm bo lò bê nghut ri. ⁸Haú mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkya-on mù,

yhangnhik eq rahá noqkuq yhûm má wang ló ri. ⁹Yhang sô e ló nyi é eq Garai Gasang lé hkya-on kungton nyi é lé, lhunglhâng bang chôm myang akô. ¹⁰Haú yuq gi, noqkuq yhum é Yúnglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹Petruq eq Yohan chyáng haú dung zo sù byin châng tô é hkûn, shiwa byu pé gi, wú maú uchyang, Sholumon jirap shut, yhangmoq chyáng din yán wang lé lo bum akô. ¹²Petruq haú lé myàng jáng, shiwa byu pé lé taí é gi, “Israellaq byu pé ê, shí yuq é hkyô lé haí mù luí maú nyi akô lhú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lhú? Haú dông a nghut. ¹³Abraham, Isak eq Yakup pé é Garai Gasang, nga-nhûng é îchyí îwa pé é Garai Gasang gi, Yhâng é dui-nhâng zoshâng Yesuq lé hpungwup shîngkang lhoq htoq byî é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyâm akô nghut ri. ¹⁴Haú chyoiyúng dingmán é Sû lé nungmoq he-ngik pyám kômù, byù sat sù lé sheq dîng htoq yû kôluí, ¹⁵Asak Yhumsîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yû bê nghut ri; ngá-nhik gi, haú hkyo é saksé nghut nyi lhê. ¹⁶Yesuq é myîng lé lumjîng é yanmai, haú lumjîng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô lé ngò sê nyi lhê. ¹⁸ Nghut kôlhang, haú hkyô gi, Garai é Hkrisduq shí-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng mã é ngu-ingón é ahkyíng yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhing mù Garai Gasâng chyáng lhing lò keq. ²¹ Garai Gasang gi, a-nham pyat mai, Yhâng é chyoiyúng myiqhtoi pê é nhut mai, taí nhang to bê eq rajung za, nyi mi-nyí, joq mijoq lé asik dum saí é pyat jé shoq, Yesuq lé mauhkúng htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haú Yhumsing Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut lhê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myù mai chyung hpyit pyâm é hui râ nghut lhê.^m gâ ri.

²⁴ Gè gè yhang, Samuelaq mai, yhâng é htang má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, haú myiqhtoi pé é dang silí wunlí eq, Garai Gasang mai, Abraham lé, 'Náng é awut ashín é yanmai, mingkan htoq mã é byù myú chângjup hkungsô wó kó râ nghut lhê!^m gâ é eq rajung za, nungmoq é íchyí iwâ pé eq tô tô é danggidiq lé wó hkam yù râ bang nghut akô. ²⁶ Garai Gasang gi, nungmoq yuq hkanmó lé yhumsing agè

ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

Petruq Eq Yohan Nhik Chyup Huí É Hkyô

4 Hkyangjông pé, noqkuq yhúm zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkûn, htoq lé lô kômù, ² yhangnhik, shiwa byu pé lé mhqshít é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Haú mù, yhangmoq gi, yhangnhik lé chyup yú luí, myinhâng mauchut lô bê nghut é yanmai, htang napkyó jé shoq htóng má lhung tô akô. ⁴ Nghut kôlhang, mungdang lé wó gyô yu é bang myo myo gi, lumjúng kômù luí, yuqgè ngo hkyíng kô jé shoq myô jat lô bekô nghut ri.

Yudaq Byin Tú Wapdoq Má, Yhangnhik Lé Myí Jep Wú É Hkyô

⁵ Htang nyí, yhangmoq é zau wui, suwún wui eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gung má nyhi to luí, "Nungnhik gi, haí a-tsam, ó yuq é myíng mai mù shí lé kut akô lhu?" ga myí akô.

⁸ Haú hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyú wui é zaugun suwún wui ê, ⁹ hkyí hten sù shí yuq lé lhoq gè byí é jeju yanmai, yhang hkâsu kut lhoq ge yù huí é hkyô lé, hkû-nyí

nungmoq ngá-nhik lé myí gôn wú naú kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq èq tapzîng má jén sat pyám mù, Garai Gasâng èq shi é mai lhoq dui toq yu é, Nazaret và byù Yesuq Hkrisduq é myîng mai, shî yuq gi, nungmoq é hí má isu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyám é luqgok gi, htungchyûn mã é ahkyak dik é luqgok dut bê.^o

gâ é gi, Yesuq lé taí é dông nghut ri.

¹² Hkyi yù hkyô gi, Yhang mai lai luí gotú a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myîng mai lai luí, xângzo byu pé lé byí tô é myîng gotú a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bún kat akô nghut ri. ¹⁴ Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. ¹⁵ Haú mù, yhangnhik lé, haú Yudaq byìn tú wapdoq* mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shî nhik lé hkâsu kut lé gè râ lúh? Yhangnhik kut shit e laklaí kumlhá gi, Yerusalem và mó má nyi é lhunglhâng bang é hí má de za dut bê nghut é yanmai, nga-nhúng haú lé a wó hê lo nghut ri. ¹⁷ Nghut kôlhang, mingbyú wui má shí hkyô je riyhang a byo myín ló sháng gaq, ahkuí mai myîng haú lé lang mù ó lé le a taí kyo lo râ matú, yhangn-

hik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yù luí, Yesuq é myîng lé lang mù, haí le hkâtaí, hkâ-mhoqshit kó ga chôm hkúm akô. ¹⁹ Petruq eq Yohan kúm gi, "Garai Gasâng é mungdang lé gyo rá htoq má, nungmoq é dang gyo le gi, Garai Gasâng é hí má gè rá, a gè rá lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

²¹ Haú hkún, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kó ê nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haú laklaí kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjîng Bâng É Kyûdung Dang

²³ Yhangnhik gi, nhang kat pyám é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui èq yhangnhik lé hkyîm é dang banshoq lé, ló taí kyo akô nghut ri. ²⁴ Haú hkyô lé wó gyo kôjáng, yhangmoq gi, myit rahkat zâ èq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigùng, wuîshuq lung-aú eq, haú pé má, nyi mi-nyí lé hpan tô é, ahko ahkáng lhunglhâng wó é Yhumsing ê, ²⁵ Nàng, náng é dui-nhâng zoshâng, ngamoq é îchyí îké Dawiq é nhut mai, Chyoiyúng Woi-nyí èq taí tô é gi,

Haí mù luí, tûngbaù amyú pé gi, nhikjum yô akô? haí mù luí, byu pé gi, akôm dâ pyám akô lúh?

* 4:15 Yudaq byìn tú wapdoq lé Grik dông gi, San-hedrin gâ lhê.

²⁶ Haû Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuî eq rahá zup zîng bum akô.^p

gâ ri. ²⁷ Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shî má chôm zîng to kôluî, nàng xû but byi é sù, † náng é Chyoiyúng dui-nhâng zoshâng Yesuq lé gumlau toq râ dâ nyi akô. ²⁸ Náng é wum-o a-tsam eq nàng ô nau é đông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsîng ê, ahkuî yhangmoq taî kyuq nyi é dang lé myàng byi laq ô! Náng é dui-nhâng zoshâng wuî, a gyuq a kyum é myit èq náng é dang lé taî râ matú wum-o byi laq! ³⁰ Náng é wum-o bo é loq lhâm kat luî, noli nojàng lé lhoq gê byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!” gâ akô.

³¹ Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyí byíng lô luî, Garai Gasâng é mungdang lé a gyuq a kyum é za taî bùm bekô nghut ri.

Azîng Zê Lé Chôm Gam Chûng Kô É Hkyô

³² Haû lumjîng é lhunglhâng bang gi, i-myt rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô.

³³ Lagyo pé le, haû Yhumsîng Yesuq dum dui toq é hkyô lé a-tsam mó èq saksé hkâm nyi kô é nghut mù luî, yhangmoq banshoq bâng é ahtôq má jeju myo myo joq nyi ri. ³⁴ Yhangmoq chyáng a wó a

lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhâng, haû pé lé adàm dàm ûng pyám luî wó yu é ngùn le gi, ³⁵ lagyo pé é hkyî wang má lé to byi akô. Haû mù luî, a wó a lòm sù ó yuq lé le ra tô é eq rajung za gàm byi akô nghut ri.

³⁶ Haû hkûn, Barnaba ga luî lagyo pé èq myhíng byi é, Kupru ming mâ é Lewiq byu Yosep le, yhang wó é maumyî ratóng lé ung luî, wó yu é ngùn lé lagyo pé é hkyî wang má, lé to byi ri. ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

Anani Eq Sahpira Nhik É Hkyô

5 Nghut kôlhâng, Anani ga sù gi, yhangmyi Sahpira eq rahá, yháng nhâm wó é maumyî ratóng lé ûng pyám luî, ² yhangmyi le bo sê é đông, ngùn haû ra-am lé gi, haq myhit yu to mù, ra-am lé za lagyo pé é hkyî wang má lé to byi akô.

³ Haû mù luî, Petruq gi, “Anani ê, Chyoiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haû mù luî, náng é myit má Tsadán le byíng nhang tô lhê lhú?

⁴ Maumyî haû joq tô le, náng é zè nghut lhê a nghut lhú? Wó ung é ngùn le náng é zè nghut ashî, a nghut lhú? Haû mù luî, nàng haû đông dâ lhê lhú? Byù lé mhaû é a nghut, Garai Gasang lé mhaû pyám bê nghut ri.” ga taî ri.

⁵ Anani gi, dang haû lé wó gyo jáng, lêng mù, shi byuq bê nghut ri. Haû hkyô lé wó gyô é bang banshoq le, gyai yhang gyuq bùm bekô nghut ri. ⁶ Haû hkûn, zorâm wuî gi, toq mù, yhâng é màng lé htup luî, ê waq myhup pyám akô.

†4:27 Xû but é hkyô gi, Yudaq byu pé htûng đông xû but byi jáng, rajung jung kut râ matú hkyin masat yu é hkyô nghut lhê. Xû but byi é sù gi, Grik đông Mesaia gâ é nghut lhê.

⁷Hau htâng, sum hkyíng kô myáng jáng, yhangmyi le, wang lé lo ri. Haú su dut é hkyô lé gi, yhang a sé nghut ri.

⁸Haú hkún, Petruq gi, “Ngo lé taí kyô wú aq. Nungnhik úng é maumyí hpau gi, shí gú za nghut lhê lú?” ga myi jáng, yhang gi, “Nghut lhê, haú gú za nghut bê.” ga tú taí ri.

⁹Petruq gi, “Nungnhik gi, haú Yhumsing é Woi-nyí lé isu kut chyam wú rá matú, hkâsu mù chôm myit huí akô lú? Wú aq, náng é yhumsing hpó lé é myhup pyám bang gi, haú hkúmdong má jé bê; yhangmoq gi, nang lé le waq htoq pyám kô rá nghut lhê.” ga taí ri.

¹⁰Radá dâm, yhang le lagyo hpô é hkyí wang má lêng shi byuq bê. Zorâm wui le wang lo wú le, myiwe haú shi to lánng é lé myàng kôluí, waq ê mù, yhanglang é nàm má, ê myhup pyám bekô. ¹¹Hau é yanmai, haú hkun lhê é hpúng byù banshoq bang eq, haú su dut é hkyô lé wó gyo má wó gyo é bang gi, gyai yhang gyuq bùm bekô nghut ri.

Byù Myo Myo Lé, Lagyo Pé Lhoq Gê Byí É Hkyô

¹²Ahkuí, lagyo pé gi, mingbyù wui é hí má limik kumlhá eq mauhpo muzó myo myo lé, kut shit nyi akô. Haú lumjíng bang gi, i-myit rahkat zâ èq, Sholumon jiróp má chôm hui hui kut bum akô. ¹³Shiwa byu pé gi, yhangmoq lé hkunggâ nyi bùm kôlháng, yhangmoq lé a wám ê zum bùm kô. ¹⁴Nghut kôlháng, haú Yhumsing lé lumjíng é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri. ¹⁵Haú mù luí, byu pé gi, Petruq lai lo é hkún, yhâng é wupzo za lánng rayuq yuq é ahtoq má zang sháng gaq ga, nòhpyo huí é bang lé, wà mà é hkyô yàm má waq htoq ê mù, yhuphú pé eq taphkang pé má lheq tô akô. ¹⁶Hau htoq agó, Yerusalem awui ayàm mà é wà pé mai le, byù ajùm ayò gi, no é bang eq agè ashop

é nat wang zing-ri huí é bang lé shuí jé lé bum akô; haú bang lhunglháng gi, lhoq gê lhoq yò byí é huí bum akô nghut ri.

Lagyo Pé Zing-ri Huí É Hkyô

¹⁷Hkyangjong mó eq yhâng é luzúm wui, Saduke hpúng mà é byu pé kúm gi, gyai yhang wú manon bùm kôluí, toq mù, ¹⁸lagyo pé lé chyup yù luí, wà mà é htóng má lhúng tô akô. ¹⁹Nghut kôlháng, haú myín lé, Yhumsing é mau-mang lagyo rayuq gi, htóng hkum pé lé hpông pyám mù, yhangmoq lé shuí htoq yù uchyang, ²⁰“Nungmoq htoq lò mù, noqkuq yhùm má ê yap to luí, dui é asak hkyô sik eq sêng é danglù banshoq, shiwa byu pé lé taí kyo keq.” ga taí ri.

²¹Napsùn myoqmyàng zó lé, yhangmoq gi, noqkuq yhùm má wàng mù yhangmoq wó gyo yu é eq rajung za, shiwa byu pé lé, mhoqshit hi lò akô.

Haú u lé, hkyangjong mó eq yhâng é luzúm wui gi, Israelaq byu pé é suwún wui lhunglháng bang lé ji yù mù, Yudaq byìn tú wapdoq chôm zung yù luí, lagyo pé lé é shuí yù rá matú htóng shut byù nhang kat akô. ²²Haú bang kúm gi, htong má jé é hkún, lagyo pé lé a myàng kôjáng, dum taù lò mù lo taí kyo kô é gi, ²³“Htóng hkum le ging ging myhí to lánng ri, htóng zúng bang le hkum yàm má yap tô akô. Nghut kôlháng, hpông wú le, ahkaù má ó le a nyi to lo nghut ri.” gâ ri. ²⁴Noqkuq yhùm zúng é zau hpó eq hkyangjong agyí wui gi, dang haú lé wó gyo kôjáng, “Shí hkyô haí dut lò rá lú?” ga, gyai gyuq maú bum akô.

²⁵Haú hkún, byù rayuq wang lé lò mù, “Wú keq, nungmoq èq htóng má lhúng tô é bang gi, noqkuq yhùm má yap to mù byu pé lé mhoqshit nyi bum akô.” ga luí, yhangmoq lé taí kyô ri. ²⁶Haú mù luí, zau hpó haú gi, yhâng é a-ô mà é bang eq ê mù, lagyo pé lé é shuí yu akô. Nghut kôlháng, shiwa byu pé luqgok èq

dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haú hkún, hkyangjong mó gi, ²⁸ “Yesuq é myìng lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô.” ga luí, yhangmoq lé taí akô.

²⁹ Haú hkún, Petruq eq gotú lagyô pé tú taí kô é gi, “Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhông é îchyi îwâ pê é Garai Gasang gi, nungmoq eq tapzîng má lhâng sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq[‡] má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê.” ga akô.

Gamalelaq Hpaqchyî Byî É Hkyô

³³ Yhangmoq gi, dang haú lé wó gyo kôjáng, lúm gyo nhik-yo naú kômù, lagyô pé lé sat pyám râ lháng myit akô. ³⁴ Nghut kôlhâng, mingbyù ban-shoq bâng é hí má aróng wó é tarâ sará Gamalelaq gâ é Hparishe rayuq, haú Yudaq byìn tú wapdoq má toq yap mù, lagyô pé lé razup zo lhoq htoq to nhâng luí, ³⁵ yhang taí é gi, “Israelaq byu pé ê, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô

htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kômù, haí le a wó kut dut byuq akô nghut ri. ³⁷ Hau htâng, myìng jihpán guq yu é buinyi má, Yudaq gâ é Galile byù rayuq pô htoq mù, mingbyù wuì lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri. ³⁸ Ahkuí le, shí bang lé haí le hkágon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jáng, htên byoq byuq râ za nghut lhê. ³⁹ Nghut kôlhâng, Garai Gasâng chyáng mâ é nghut le gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê.” gâ ri.

⁴⁰ Dang haú lé yhangmoq gyô htuk bum akô. Haú mù, lagyô pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyô pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haú mai gabú myit eq htoq lô bekô.

⁴² Hau htâng, yhangmoq gi, nyí wuì làng noqkuq yhúm má le, rayhúm htâng rayhúm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

Garúm Râ Byù Nyhit Yuq Lé Hkyin Yu É Hkyô

6 Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é

[‡]5:31 *Garai é loqyo loq gâ é gi, hpautap hkungga gíng é jowò lé taí nau é nghut lhê.*

hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô. ²Haú hkûn, lagyo raxe í yuq gi, chángzô pé lhunglhâng bang lé wut yù mù, “Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³Haú mù luí, gumang wui ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mã é hkyin to keq. Haú bang lé muzó shí lhum hun to râ nghut lhê. ⁴Ngamoq kúm gi, kyúđung é hkyô eq mungdang hkô é hkyô lé za, noqzuq tung kut nyí râ nghut lhê.” ga taí akô.

⁵Dang haú lé shiwa byù lhunglhâng bang gyô htuk kômù luí, lumjíng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htung má lhing wang lò bê sù Antioku wà mó mã é Nikolaq pé lé hkyin yù mù, ⁶lagyô pé chyáng shuí ló akô; lagyô pé gi, kyúđung byi kômù, yhangmoq lé loq ke byí akô nghut ri.

⁷Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjíng hkyô má châng nyi bum akô.

Stehpan Chyup Yú Huí É Hkyô

⁸Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tún shit ri. ⁹Haú hkûn, luthkyô ga bâng é tara-jong eq sêng é Kuruni, Alesander eq Kiliki, Asia mau mã é bang ra-am gi, toq mù, Stehpan eq dang chyin chyin lhûm akô. ¹⁰Nghut kôlhâng, Stehpân é dang gi, Chyoiyúng Woi-nyí lom é hpaqchyí

dang nghut é yanmai, yhangmoq a úng kó nghut ri.

¹¹Haú mù, yhangmoq gi, “Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri.” ga luí, mhaú taí nhâng râ byù haq lung tô akô.

¹²Haú mù, yhangmoq gi, mingbyú wui eq nhik bô suwún wuí, tarâ sará pé lé, chun htaw mù, Stehpan lé chyup yú nhâng luí, Yudaq byin tú wapdoq má shuí nyhi tô akô. ¹³Mhaú é saksé byu pé lé le lhoq hâng kat luí, haú bang gi, “Shí yuq, shí chyoiyúng jowò^f eq jep é tarâ lé shut shai é dang ru taí nyi ri. ¹⁴Nazaret wà byù Yesuq ga sù gi, jowò shí lé hpoyq pyám mù, nga-nhúng lé Mosheq èq byí tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê.” ga taí akô.

¹⁵Haú Yudaq byin tú wapdoq má zung to bang banshoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

Stehpan Taí É Dang

7 Haú hkûn, hkyangjong mó gi, “Dang haú pé têng lhê lú?” ga luí, yhang lé myi jáng,

²Stehpan tú taí é gi, “Gumang wui eq íwa wui ê, gyô wú keq, nga-nhúng lhunglhâng bâng é íchyí Abraham gi, Haran wà mã a ló nyí shi lé, Mesopotamiaq mau mã nyi tô ashí hkûn, hpungwup shingkang bo é Garai Gasang gi, yhâng chyáng lé htoq shit mù, ³Náng é ming eq náng é amyù mai htoq ló luí, ngò tún shit râ ming shut e ló aq.^q ga luí, yhang lé taí ri.

⁴Haú mù, yhang gi, Hkaldea byu pé é mau mai htoq ló luí, Haran wà mã ló nyi nyi ri. Yhâng wa shi byuq é htâng mã, Garai Gasang gi, ahkuí, nungmoq nyi nyi

^f6:13 Shí chyoiyúng jowò gi, Yerusalem noqkuq yhûm lé gâ lhê.

é ming shí má yhang lé htot lô nhâng bê nghut ri. ⁵Garai Gasang gi, shí ming má yhang lé silí wunlí nghû rã, hkyî rahkô nang î é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shí byi rã ga danggidiq byî to bê nghut ri. ⁶Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbau ming má bíng nyí mù, haú ming bâng èq myi shô zàn jùn zô é eq zing-rí é lé hui kó rã. ⁷Nghut kôlhâng, yhangmoq lé jùn zô é amyû lé le, ngò jéyáng rã nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó rã nghut lhê.'r ga le, Garai Gasang taí ri. ⁸Hau htâng, yhang lé ahyo-kuq hpyit byi rã hkyô eq sêng é dangshikaq le, byî ri. Haú mù, Abraham gi, Isak lé hku é htâng shit nyí buinyi má ahyo-kuq hpyit byî ri; Isak gi, Yakup lé hkû mù, Yakup gi, îchyí îwa achyûng raxe í yuq lé hku kat bê nghut ri.

⁹Haú îchyí îwâ pé gi, Yosep lé manôn kôluí, Egutuq ming shut jùn đông ûng kat akô. Nghut kôlhâng, Garai Gasang gi, yhang eq rahá nghut nyi mù luí, ¹⁰wuîhke jamjau banshoq mai yhang lé lhoq lhut yû mù, Egutuq hkohkâm Hpara-uoq é hí má le myoqdong wó, hpaqchyí byéng-yá le bò nhang é yan-mai, hkohkâm haú gi, Egutuq ming eq, yhâng é hkohkâm-wâng banshoq lé up nhang ri.

¹¹Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhûng é îchyí îwâ pé le zoshuq a myang hô zo lo dut byuq bekô nghut ri. ¹²Ahkuí, Yakup gi, Egutuq ming má guqzo joq é hkyô lé wó gyo jáng, nga-nhûng é îchyí îwâ pé lé sâng-hî dâm ê nhang ri. ¹³Htang dâm dum ê é hkûn, Yosep gi, yhanggu

yhangmâng pé lé yhang ó nghut é hkyô taí kyô ri. Hpara-uoq le Yosep é yhum-byù ikun hkyô lé sê yù byi bê nghut ri. ¹⁴Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵Yakup le Egutuq ming má jé gyó lô luí, yhang eq nga-nhûng é îchyí îwâ pé gi, banshoq haú ming má shí lô byuq bekô nghut ri. ¹⁶Yhangmoq é mâng lé gi, Shehkem wà má yu taú lô mù, Shehkem wà mã é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.

¹⁷Abraham lé Garai Gasang byî tô é danggidiq dik rã ahkyíng jé lo nyi é u lé, ¹⁸nga-nhûng é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. ¹⁹Hkohkâm hpó haú gi, nga-nhûng é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é đông mai nga-nhûng é îchyí îwâ pé lé zing-ri bê nghut lhê.

²⁰Haú u má, Mosheq lé hkû to bê. Yhang gi, Garai Gasang é hí má gyai yúnglô é sù nghut ri; yhang gi, yhângwâ é yhûm má lhamó sum hkyap baú tô é hui mù, ²¹htot tô tô é hui jáng, yhang lé Hpara-uoq é byizô èq xe yù mù, zosíng kut yû luí, hku kô ri. ²²Mosheq gi, Egutuq ming mã é hpaqchyí byéng-yá banshoq lé mhooq yû luí, nhut shô a-tsam eq hkyí loq a-tsam gyai bò sù nghut ri.

²³Yhang asak myi xê zàn jé lò jáng, yhâng é gumang Israelaq byu pé chyáng ê kûm wú rã matú wó myit htoq kat ri. ²⁴Ê jé jáng, zing-ri hui nyi é sù rayuq lé ê myâng luí, haú yuq lé búng mù, zing-rí nyi é Egutuq byù lé, loqchoq hpuq é đông sat pyâm ri. ²⁵Mosheq gi, yhâng é byu pé lé yhâng é loq đông Garai Gasang hkyi yù hkyô byi nyi é lé, yhâng é amyû

pé sê gyo byi nhô ngàm kôlhang, yhang-moq a sê gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahkaù nhik ê, gumang yhangchang sheq ru nghut lhê nhîng, haí mù rayuq eq rayuq byoq lhum nyi akô lhú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyi kut râ matú, nàng lé ó yuq hkyin tô é lhú?' ²⁸ A-nyí nap Egutuq byù lé sat pyâm é su, ngo lé le sat pyâm nau ri lhú?'^s ga luí, tú taí uchyang yhang lé dún chyùn pyâm ri. ²⁹ Mosheq gi, dang hau é yanmai, hpâng luí Midian ming má ê nyi byuq ri. Haù má yuqzo í yuq ê wó ri.

³⁰ Haù ming má myi xê zàn lai jáng, Sinaq Bùm yàm, yoso hkaù mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

³¹ Mosheq gi, haù lé myàng jáng, hau é yanmai maú luí, wú wú râ ga huí e ló le, Yhumsíng é htê htoq lo é gi, ³² Ngò gi, náng íchyí iwâ pê é Garai Gasang, Abraham, Isak, Yakup é Garai Gasang nghut nyi lhê.^t gâ ri. Mosheq kúm gi, gyuq nán luí, a wám tu wú nghut ri.

³³ Haù Yhumsíng gi, 'Náng é hkyí-tsung hkyut pyám aq, nàng yap tô é jowò gi, chyoiyúng é myigùng nghut lhê.

³⁴ Egutuq ming má ngá é amyú pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taú kat râ.^u ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyi kut râ matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é maumang lagyo dông mai, Garai Gasang gi, yhang-

moq é zau eq hkyi yù sù kut nhâng luí, taù nhang kat é nghut ri. ³⁶ Haù Mosheq yhang, Egutuq ming má le, Nhông Nè má le, yoso hkaù pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhâng é byù myú pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.^v ga luí, taí tô é sù le Mosheq yhang nghut ri. ³⁸ Yoso hkaù má nghut nyi ashí hkûn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhúng é íchyí iwâ pé eq le rahá nghut sù gi, yhang yhang nghut nyi ri; nga-nhúng lé ap byi râ asak dui é mung-dang lé lom yu é sù le, yhang nghut nyi ri.

³⁹ Nghut kôlhang, nga-nhúng é íchyí iwâ pé kúm gi, yhâng é dang lé a kâm gyo kômù, yhang lé he pyám luí, Egutuq ming shut taú nau é myit bo bum akô.

⁴⁰ Haù mù, Arun lé, 'Egutuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haù mù, nga-nhúng hí má so byi râ hparà lhô pé saí byi aq.^w ga taí akô. ⁴¹ Haù buinyi pé má, yhangmoq gi, nojûng zo lhô saí mù, alhò haù lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô.

⁴² Haù mù luí, myiqhtoi pê é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lhú?

⁴³ Nungmoq gi, nungmoq noq râ matú saí yu é alhò, Molak é zúm eq Rehpan hpara é kyí lé sheq, waq lhing wún ko é yanmai,

^{97:28} Htoq Ló 2:14 ^{7:32} Htoq Ló 3:6 ^{7:34} Htoq Ló 3:5, 7-8,10

^{7:37} Tarâ Pun 18:15 ^{7:40} Htoq Ló 32:1

Babelon lai shoq ngò nungmoq lé lhoq lham pyám rã nghut lhê.^x
ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq mã é bui, kyí, lhamó pé lé noqkuq rã matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é dõng saí tô é saksé zúm lé, haú yoso má nga-nhúng é ìchyí íwã pé wó yú bekò nghut ri. ⁴⁵ Haú mù, nga-nhúng é ìchyí íwã pé gi, yhangmoq é myoq hí mai Garai Gasang èq hkat htoq pyám byí é byù myú pé é mau má, Yoshuq eq rahá wang nyi ló kô é hkùn, saksé zúm haú lé yu wang ló akò. Haú gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasâng hí má myoqdong wó sũ nghut mù luí, Yakup é Garai Gasâng matú nyi jowò saí rã ahkáng dung kôlhang, ⁴⁷ Sholumon èq sheq saí bê nghut ri.

⁴⁸ Nghut kôlhang, Myhang htáng htum Sũ gi, byu é loq èq za saí é yhũm má nyi é a nghut, haú hkyô eq séng luí myiqhtoi wá taí tô é gi,

⁴⁹ 'Mauhkúng gi, ngá é zùng tanghkuq, myigùng gi, ngá é hkyí nang jang nghut nyi lhê;

ngá é matú hkasú é yhũm saí byi shi kó rã lhú? Ngò nô yù rã jang gi, hkâmá nghut kó rã lhú?

⁵⁰ Haú banshoq lé ngá é loq èq baú saí tô é a nghut kó lhú? ga luí, haú Yhum-sing taí ri.^y

gã ri.

⁵¹ I-myt htân mù, i-myt eq nohkyap má aphyo-kuq a hpyit é bang^z ê, nungmoq gi, nungmoq é ìchyí íwã pé su, Chyoiyúng Woi-nyí lé hkã-nhám le lhom he-

ngik pyám nyi akò; ⁵² Nungmoq é ìchyí íwã pé èq a zing-rí wú é myiqhtoi, ó yuq wá nyi lhê lhú? Haú Dingmán Sũ pô htoq rã hkyô lé hko kyô é bang lé, yhangmoq sat pyám é chyat nghut akò; ahkuí, nungmoq le, haú Dingmán Sũ lé ap pyám é bang eq sat pyám é bang nghut nyi akò. ⁵³ Maumang lagyô èq shit kyo byí é tarã lé nungmoq wó yú kôlhang, haú lé a cháng kó nghut ri.” gã ri.

Stephan Lé Luqgok Èq Dú Sat É Hkyô

⁵⁴ Haú hkyô lé yhangmoq wó gyo kôjáng, yhangmoq é nhiklhum má lùm htaú záng kô é yanmai, Stephan lé, zui wang ngat kyáng shoq wú nhik-yô nyi akò. ⁵⁵ Stephan kúm gi, Chyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shingkaung lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, “Wú keq, mauhkúng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri.” ga taí kat ri.

⁵⁷ Haú hkùn, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang lé chòm htim kômù, ⁵⁸ yhang lé wà mai she htoq ló kôluí, luqgok èq chòm dú ló bekò nghut ri; saksé kut é bang gi, Sholuq gã é zoram é hkyí wang má yhangmoq é buhng pé lé hkyut bum tô akò.

⁵⁹ Luqgok èq dú nyi bùm kô é u lé, Stephan gi, “Yhumsing Yesuq ê, ngá é woi-nyí lé hap yù laq.” ga kyúdùng ri.

⁶⁰ Hau htàng, yhang gi, hkyihput htuoq mù, “Yhumsing ê, yhangmoq kut é mara haú lé hkyut pyám byi laq.” ga luí, htê mó èq wut dúng ri; haú ban taí jáng, yhang kàng byit byuq bê nghut ri.

§7:51 *I-myt eq nohkyap má aphyo-kuq a hpyit é bang gã é gi, Garaí dang lé a lùm a châng é bang lé gã lhê.*

Hpúng Byú Lé Sholuq Zing-rí É Hkyô

8 Sholuq gi, haú má nyi to mù, Stehpan lé sat pyâm é muzò má myit bo huí ri.

Haú nyí mai, Yerusalem wà mó má é noqkuq hpúng gi, zing-ri mó huí lo é nghut mù luí, lagyô pé mai lai luí, lumjáng bang lhunglhang gi, Yuda mau eq Samariq mau jowò hkgámó má byo myín ló bekò. ²Nghut kôlhang, tarâ hkgungâ é bang gi, Stehpan lé yhum pyâm é htâng má, yhang é yanmai iyon mó huí nyi akò nghut ri. ³Sholuq kúm gi, rayhum htâng rayhúm wàng mù, myiwe yuqgè lé she hkyut htoq yú luí, htóng má lhung tô é dông mai, noqkuq hpúng haú lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴Byo htoq ló é bang kúm gi, jé é jowò hkgámó má mungdang lé hkô kyô ló akò. ⁵Haú hkún, Hpilip gi, Samariq mau má é myuq ra-myuq shut e ló mù, Hkrisduq é hkyô lé hkô kyô ri. ⁶Byù ajùm ayò gi, Hpilip taí kyô é hkyô lé wó gyô é eq, yhang tún shit é limik kumlhá lé myàng kôjáng, i-myit rahkat za eq yhang é dang chôm gyô nyi bum akò. ⁷Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akò; gùngjum shi é bang eq hkyí htên é bang myo myo le, ge ló byuq bum akò. ⁸Haú mù luí, haú myuq má gabú hkyô gyai yhang wó bekò nghut ri.

Myoqheq Sará Simun É Hkyô

⁹Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhang gùng lé yhang, laklaí sù nghut lhê gâ ri. ¹⁰Byù tiq ko banshoq le, “Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yú sù

nghut ri.” ga luí, yhang é dang lé gyô bum akò. ¹¹Haú yuq gi, myáng myáng yhang é myoqheq hpaqchyí èq yhangmoq lé lhoq maú lo é yanmai, yhang dang lé chôm lum bum akò. ¹²Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é mying eq sêng é gabú danglù hkyô lé, lumjáng kôjáng, myiwe yuqgè wui-myhup hkâm yu bum akò. ¹³Simun yhang yhang le lumjáng mù luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akò. ¹⁵Yhangnhik gi, lé jé jáng, byù haú bang Chyoiyúng Woi-nyí wó yú rà matú kyúdung byí akò. ¹⁶Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyô lô shi; Yhumsing Yesuq é mying mai wui-myhup hkâm yu é za ru nghut bùm ashí. ¹⁷Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekò nghut ri.

¹⁸Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn è byi wú mù, ¹⁹“Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yú rà matú, haú su é a-tsam ngo lé le byi kò laq.” ga dung ri.

²⁰Petruq kúm gi, “Garaí Gasâng é chyunghuq lé ngun èq wó wui yù rà nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹Nàng gi, Garaí Gasâng é hí má myit a dítng sù nghut é yanmai, shí hkyô má nàng wó bo lhom rà a nghut.

²² Haû mù luí, shí agè ashop é hkyô mai myit lêng mù, Yhumsîng Garaí chyáng dúng tóngbán aq. Haú hkûn, náng é unghkaú má myit pyâm é hkyô lé, mara hkyut pyâm byi abe. ²³ Nàng gi, ladu lai shoq nhikhko zo mù, yubak marâ èq tú zing to huí é lé, ngò myàng ri.” ga yhang lé taí ri.

²⁴ Haú hkûn, Simun gi, “Nungnhik taí é hkyô haí le ngá chyáng a jé sháng gaq, ngá é matú haú Yhumsîng chyáng kyûdung byi kó laq.” ga tú taí ri.

²⁵ Yhangnhik kúm gi, haú Yhumsîng é mungdang lé saksé hkám mù ban hko kyo jáng, Samariq byu pê é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsîng é maumang lagyo gi, Hpilip lé, “Toq aq, Yerusalem wà mó mai Gaza shut lò é hkyô jé shoq, maupyí shut nyâng za e lò aq. Hkyô haú gi, yoso hkyô nghut lhê.” ga taí ri.

²⁷ Haú hkûn, yhang toq mù e lò ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zúm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taú lo é hkûn, yhâng é myanglêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, “Myanglêng shut chyâng e lò aq.” ga taí ri.

³⁰ Haú mù, Hpilip gi, din é mù, myiqhtoi Esai-aq laiká nghap nyi é lé wó gyo jáng, “Nàng nghap nyi é hkyô lé sê gyo ri lú?” ga luí, yhang lé myí ri.

³¹ Haú yuq gi, “Mhoqshit sù yuq a nyi le, ngò hkâsu kut sê gyo râ lú?” ga tú taí mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, “Sat râ sau lé su, Yhang lé she e lò bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkûn, Yhang lé a tara é đông doqdân pyâm bekô;

Yhâng é asak lé myigùng htoq mai yù pyâm bekô nghut mù luí, Yhâng é awut ashín lé ó yuq wó gôn kyo râ lú?”^z

gâ ri.

³⁴ Haú hkûn, haú u-nuk wa gi, Hpilip lé, “Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lú? Yhânggùng lé taí é nghut lhê lú? Haú a nghut jáng, góyuq é hkyô lé taí é nghut lhê lú?” ga myí ri.

³⁵ Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e lò kô le, wuì joq é má jé jáng, haú u-nuk hpó gi, “Wú aq, shí má wuì joq tô ri, wui-myhup hkâm yù râ matú ngo lé hkúm râ jang haí joq ashí lú?” ga taí ri. ³⁷ Hpilip gi, “Náng i-myt banshoq èq, nàng lumjîng bê nghut le gi, hkâm yu le ge lhê.” ga taí ri; yhang le, “Yesuq Hkrisduq gi, Garaí Gasâng é Yhangzo nghut é lé, ngò lumjîng bê.” ga tú taí ri.^{**} ³⁸ Haú hkûn, yhâng é myanglêng hkying nhâng mù, yhangnhik wuì má gyó wâng luí, Hpilip gi, u-nuk hpó le wui-myhup hkâm byí ri. ³⁹ Wuì hkaú mai htoq lò kô é hkûn, haú Yhumsîng é Woi-nyí gi, Hpilip lé myhik za shuí lò byuq mù, u-nuk hpó le Hpilip lé dum a myàng lo; nghut kôlhâng, yhang gi, e lò é hkyô shut gabú myit èq xoq sô e lò bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú

^{**}8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

mau mâ é myuq pé wà pé hkgámó má gabú danglù hkô kyô wún ri.

Sholuq Lhik Wang Lo É Hkyô

9 Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó chyáng é mù, ² Yhumsing é Hkyô lé lumjínj é myiwe yuqgè myàng mi-myàng lé chyup yú luí, Yerusalem wà mó shut wò she ló râ matú, Damaskuq myuq mâ é tarajong pé má byi râ laiká pé lé dúng chúng ri. ³ Yhang e ló le, Damaskuq myuq eq chyáng ló nyi é hkún, yhang é lhínghkyuq má mauhkúng mai dàn loq tung duqbó htoq ló ri. ⁴ Yhang myigùng má lêng ngop tô é u lé, “Sholuq, Sholuq, nàng ngo lé haí mù zing-rí nyi lhê lú?” ga luí, yhang lé taí é htê wó gyô ri.

⁵ Haú hkún, yhang gi, “Yhumsing ê, nàng gi, ó yuq nghut lhê lú?” ga myi jáng, haú Yhumsing gi, “Nàng zing-rí nyi é Yesuq nghut lhê, ⁶ toq aq, myuq shut wang ló aq. Nàng zui saí râ hkyô lé lhom taí kyo râ nghut lhê.” ga tũ taí ri.

⁷ Yhang eq rahá e ló é luzúm wuí gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, “Anani ê.” ga shing-rán đông wut ri.

Yhang gi, “Yhumsing ê, shí má nyi lhê.” ga tũ taí ri.

¹¹ Haú Yhumsing dum taí é gi, “Toq aq, Hkyô-Nyàng gâ é wà hkyô shut ê mù, Yudaq é yhúm má, Tarshu byù Sholuq lé ê hô aq, yhang gi, kyúdúng nyi ri. ¹² Yhang gi, Anani ga sũ wang lé lô mù,

yhang é myoq dum myàng sháng gaq ga, yhang é ahtoq má loq ke byí é lé, shing-rán đông myàng bê nghut ri.” gâ ri.

¹³ Anani kúm gi, “Yhumsing ê, shí yuq gi, Yerusalem wà mó má, náng é sân-yúng bang lé a ge é đông hkâ-myhó kut laí lo é hkyanglù lé ngò myo myo wó gyô wú bê; ¹⁴ Shí pé má le, náng é mying lé llang é bang banshoq lé chyup râ ga, hkyangjong agyi pé chyáng mâ é ahko ahkáng wó yu to sũ nghut ri.” ga tũ taí ri.

¹⁵ Nghut kôlhang, Yhumsing gi, “Ru é aq, shí yuq gi, tũngbàu pé eq yhangmoq é hkohkam pé é hí má le, Israelaq byu pé é hí má le, ngá é mying lé wún waq râ matú, ngò chúng râ ngú luí hkyin to sũ nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tũn shit râ nghut lhê.” ga taí ri.

¹⁷ Hau htàng, Anani gi, jé ê mù, yhúm haú má wàng luí, Sholuq é ahtoq má loq kê to mù, “Gumang Sholuq ê, náng myoq dum wó myàng mù, Choyiúng Woi-nyí bying sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê.” ga taí ri. ¹⁸ Haú hkún jáng, Sholuq é myoq mai akyap sũ é wuí gyó byuq mù, yhang myoq dum wó myàng bê. Haú hkún, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pying yù bê nghut ri.

Sholuq, Damaskuq Myuq Má Mungdang Hko É Hkyô

Hau htàng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasàng é Yhangzo nghut é hkyô, haú hkún jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhang bang gi, maú byuq bùm kômù, “Shí yuq gi, Yerusalem wà mó má mying haú llang é bang lé lhoq hten lhoq hpyoq sũ nghut lhê, a nghut kó lú?”

Ahkuí, shí má le, haú su é bang lé chyup yù mù, hkyangjong agyi pè chyáng ló ap rã da luí jé lé é sũ a nghut kó lúhú?" ga myi bum akô. ²²Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tũn shit ri.

²³Buinyí tsómra myáng é htâng má, Yudaq byu pé gi, yhang lé sat pyám rã matú haq dã akô. ²⁴Nghut kôlhang, yhangmoq dã é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

²⁶Hau htâng, yhang gi, Yerusalem wà mó má jé lo é hkũn, chángzô pé eq zùm yap rã matú shikut wú kôlhang, yhang gi, chángzo dut bê hkyô lé a jing kô é yanmai, lhunglhang bang gi, yhang lé gyuq bum akô. ²⁷Barnaba kúm gi, Sholuq lé lagyo pè chyáng shuí lò mù, Sholuq, hkyô má Yesuq eq hkãsu kut huí é hkyô lé le, Yesuq èq yhang lé taí é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkãsu kut hko kyô é hkyô lé le, yhangmoq lé taí kyô ri. ²⁸Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsing é mying mai a gyuq a kyum é za hko kyô nyi ri. ²⁹Grik dang nyo é Yudaq byu pé eq le, taí he lhũm nyi akô; nghut kôlhang, yhangmoq gi, yhang lé sat pyám rã dã akô. ³⁰Haú hkyô lé, gumang wui sé kôjáng, yhang lé Kesare wà

mó má jé shoq dé mù, Tarshu myuq shut nhang kat akô nghut ri.

³¹Yuda mau, Galile mau eq Samariq mau jowò hkangmó mã é noquq hpúng gi, haú yoq pé má, lhoq ging lhoq títng é hkyô wó yù mù, nguingón nyi akô; haú Yhumsing lé gyuq hkunggã é hkyô má le, Chyoiyúng Woi-nyí èq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

³²Haú hkũn, Petruq gi, haú mau pé má hkat kúm wún uchyang, Ludaq wà mó má nyi é sãn-yúng bâng chyáng ê jé ri. ³³Haú wà mã, gùngjum shí luí shit zân tup yhupjang mai a wó toq é Ainea gã é byù rayuq lé ê myang ri. ³⁴Haú mù, Petruq gi, "Ainea ê, Yesuq Hkrisduq, nang lé lhoq gẽ byi bê nghut ri, toq mù, náng é yhupphú hen yù aq." ga luí, yhang lé taí ri. Haú hkũn jáng, Ainea wó toq yap bê nghut ri. ³⁵Ludaq eq Sharon pá má nyi é lhunglhang bang gi, haú yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sũ Dum Dui Lo É Hkyô

³⁶Ahkuí, Yopa myuq má Tabihita gã é chángzo myiwe rayuq nyi ri; mying haú lé Grik dang đông gi, Dorka^{††} gã é nghut lhê. Myiwe haú gi, ge é muzó kut nyi é sũ eq, asho awuí bang lé alu byí nyi é sũ nghut ri. ³⁷Haú u lé, yhang gi, nòhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. ³⁸Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹Haú hkũn, Petruq gi, toq mù, haú nhik htâng châng e ló ri. Yhang jé jáng,

^{††}9:36 Dorka gã é lichyúm gi, "chochí" gã é nghut lhê.

ahtoq pyâm gok má shuí hâng yu akô. Chuimó myhî pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashî hkûn Dorka hkyup é buhâng eq gotû mebu pé lé tûn shit nyi akô.

⁴⁰ Petruq kúm gi, lhunglhâng bang lé htoq lô nhâng mù, hkyihput htuq luí, kyûdung mù, mâng shut lhing wú luí, “Tabihtha ê, toq aq!” ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé láng toq yù luí, lumjínq bang eq chuimó myhî pé lé wut yù mù, ùi gû ap byí ri. ⁴² Haú hkyô lé, Yopa myuq mâ é bang banshoq wó gyô lô kômù luí, byù myo myo gi, haú Yhum-síng Yesuq lé lumjínq bum akô nghut ri. ⁴³ Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

Koneli É Shing-rán

10 Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyûdung nyi ri. ³ Ra-nyí lé, myinhâng sum hkyíng kô má, Garai Gasâng é mau-mang lagyo rayuq gi, yhâng chyáng jé mù, “Koneli ê.” ga luí, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, “Yhumsíng ê, hai hkyô nghut lhê lú?” ga gyuq myit eq myí ri.

Maumang kúm gi, “Náng é kyûdung dang eq alu byí é hkyô gi, Garai Gasâng é hí má, hkungga masat dông hkyâng bê nghut ri. ⁵ Ahkuí, Yopa myuq shut byù nhang kat mù, Petruq gâ é sù Simun lé

é shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri.” ga taí ri.

⁷ Koneli gi, yhang eq dang taí é mau-mang lagyo lô byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, ⁸ dut laí lo é hkyô banshoq, yhangmoq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé lô yâm má, Petruq gi, kyûdung râ ga, yhumhkung shut doq lô ri. ¹⁰ Haú hkûn, yhang gi, zòmut luí rajung jung zô nau nyi ri; nghut kôlhâng, zoshuq ru gaí nyi ashí le, yhang moq byuq lô mù myoqwup shing-rán myang é gi, ¹¹ mauhkung bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri. ¹² Haú hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ “Petruq ê, toq mù, sat zo aq.” gâ é danghtê le myíng htoq lo ri.

¹⁴ Petruq kúm gi, “Yhumsíng ê, haú gi, a wó dut, achau achyut é eq a sanséng é zè lé, ngò hkâ-nhám le a zô wú.” ga tú taí ri.^a

¹⁵ Haú hkûn, “Garai Gasang lhoq san lhoq séng bê zè lé, a sanséng hkâ-nghú.” ga luí, yhang lé dum taí kat ri.

¹⁶ Haú su ga sum dân taí é htàng má, zè haú lé radá dân mauhkung shut wup yu lô bê nghut ri.

¹⁷ Ahkuí, Petruq gi, yhang myang é shing-rán lé haí wá nghut lhê lú ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí, ¹⁸ Petruq

^a10:14 Nhang 11 lé wú aq.

gâ é sũ Simun, yhũm haú má nyi a nyi é lé, wut myi wú akô.

¹⁹ Petruq gi, shing-rán haú lé ru myit wú nyi ashĩ le, Woi-nyí gi, “Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haĩ a úng-âng é za, yhangmoq eq rahá bo ló aq.” ga taĩ ri.

²¹ Haú mù, Petruq gi, haú bãng chyáng gyó ló luĩ, “Nungmoq hô nyi é sũ gi, ngò nghut lhê, haĩ ra luĩ lé kô é lhú?” ga myi ri.

²² Yhangmoq taĩ é gi, “Dingmán é, Garai Gasang lé gyuq hkunggâ é, Yudaq amyũ lunglhang bãng é hí má myoqdong wó é, shô up gyezau Koneli gi, nang lé yhang é yhũm má ji hâng yù mù, nàng taĩ é dang gyo yù rà matú, yhang lé chyoiyung maumang lagyô èq taĩ shit kyô é hkyô lé wó yũ luĩ, ngamoq lé nhang kat é nghut lhê.” ga akô. ²³ Haú mù luĩ, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mã é gumang wuĩ ra-am le chãng akô nghut ri.

Koneli Lé Petruq Huĩ É Hkyô

²⁴ Hau htang nyi, yhangmoq gi, Kesare wà mó shut wang ló akô. Koneli gi, yhang é gumang wuĩ eq buinũm ji-myi wuĩ lé ji tsĩng to mù, yhangmoq lé lãng nyi ri. ²⁵ Petruq wang ló jãng, Koneli gi, te yù mù, yhang é hkyĩ wang má paĩ gop noqkuq ri. ²⁶ Petruq kúm gi, “Toq aq, ngò le byù ru nghut lhê.” ga luĩ, taĩ uchyang yhang lé tu toq ri.

²⁷ Haú mù, Petruq gi, yhang eq dang nyô uchyang wang ló wú le, byù myo myo zup zĩng tô bum é lé myang ri. ²⁸ Haú hkũn, yhang gi, yhangmoq lé, “Yudaq byù rayuq gi, noqkuq htũng dông tũngbaũ rayuq eq a wó zũm yap é, htoq htoq wàng wàng a wó kut é hkyô lé, nungmoq sé lugũ nghut akô. Nghut kôl-

hang, ó yuq lé le achãq achyut dut ri, a sanséng dut ri ngũ a ge taĩ é hkyô lé gi, Garai Gasang, ngo lé tũn shit bê. ²⁹ Hau é yanmai, nungmoq ngo lé ji kat é hkũn, ngò a he pyãm é za chãng lé lo é nghut lhê. Haú mù luĩ, haĩ ra kô é yanmai, ngo lé ji akô ngũ ngò myi nau ri.” ga taĩ ri.

³⁰ Haú hkũn, Koneli gi, “Lãi lò bê myi nyi nyi, myinhãng sum hkying mã, ngá é yhũm mã, ngò kyũdũng nyi le, danso loq, duqbó é mebu wut é byù rayuq ngá é hí má yap htoq shit mù, ³¹ 'Koneli è, Garai Gasang gi, nãng é kyũdung danghtê lé le gyo byi bê; nãng alu byi é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhãng aq. Haú yuq gi, wuimau yãm mã é shokuq hkyup zô é Simun yhũm mã bíng nyi ri.’ ga taĩ ri. ³³ Haú mù luĩ, haú hkũn jãng ngò nãng chyáng byù nhang kat bê nghut lhê. Ahkuĩ, nãng jé é gi, gyai gê bê nghut ri. Yhumsĩng yhang nang lé taĩ nhang é gũ banshoq gyô yù rà matú, ahkuĩ ngamoq lunglhang bang Garai Gasang é hí má nghut nyi lhê.” ga taĩ ri.

Petruq Hko Kyô É Mungdang

³⁴ Haú hkũn, Petruq dang-hi hpông é gi, “Garai Gasang, myoqdong a hkyin é hkyô lé, ahkuĩ ngò gè gè yhang sé bê. ³⁵ Byù myũ chãngjup mã, Yhang lé gyuq hkunggâ é eq tengmán é muzó jizó saĩ é sũ gi, Yhang é hí má myoqdong wó nyi ri. ³⁶ Nyi mi-nyĩ, joq mijoq é Yhumsĩng, Yesuq Hkrisduq é yanmai, nguĩngón hkyô eq sêng é gabú danglũ lé hko kyo shãng gaq ga, Israelaq byu pè chyáng Garai Gasang hun kat é mungdang eq rajung za, ³⁷ bap̄tisma hkyô lé, Yohan hko é htãng, Galile mau mai Yuda mau banshoq mã taĩ pyo ló é hkyô lé, nungmoq sé gũ nghut nyi lhê. ³⁸ Haú gi, Garai Gasang èq Chyoiyung Woi-nyĩ eq wum-o a-tsam byĩ to bê sũ, Nazaret wà byù Yesuq é hkyô nghut nyi ri. Garai

Gasang yhang eq rahá nghut nyi é yan-mai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

³⁹Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ng-amog nghut nyi lhê. Haú yuq lé yhang, yhangmoq sik zing má jén sat pyám bekò nghut ri. ⁴⁰Garai Gasang kúm gi, sum nyí ngú rã buynì má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut rã matú Garai Gasang hkyin to gù nghut é bang ngamoq é hí má za htoq shit bê nghut ri.

⁴¹Yhang shi é mai dum dui toq ló é htàng má, ngamoq yhang, Yhang eq rahá razo rashuq wó kut yu é nghut lhê. ⁴²Yhang gi, asak dui é bang eq shí bê bâng é tarâ agyí kut rã matú, Garai Gasâng èq Yhang lé hkyin tô é sù nghut é hkyô lé, byu pé lé hko kyo rã eq, saksé hkám rã matú, ngamoq lé hkunmó hkyô to bê nghut ri. ⁴³Yhang lé lumjínq é bang yuq hkangmó gi, Yhâng é mying é yanmai, yubak hkyut pyám byí é hui kó rã nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴Petruq gi, haú hkyô lé ru taí nyi ashí le, dang haú wó gyó é banshoq bâng ahtoq má Chyoiyúng Woi-nyí gyó jé lo ri. ⁴⁵Tungbaù pé é htoq má lháng Chyoiyúng Woi-nyí gá é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjínq bang Yudaq byu pé gi, maú bum akô. ⁴⁶Hkâsu mù gá le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

⁴⁷Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng rã gi, wuì lé

ó yuq wó hkâm to rã lhú?" ga taí ri. ⁴⁸Hau htàng, yhang gi, yhangmoq lé Yesuq Hkrisduq é mying lang luí wui-myhup hkâm yù rã matú pying tô ri. Haú hkâm, yhangmoq gi, Petruq lé buynì ra-í nyí, nyi gyó shi aq ga chòm hkâm akô.

Petruq, Yhang Kut É Muzó Lé Shit Kyô É Hkyô

11 Tungbaù pé le, Garai Gasâng é mungdang lhom yù bê gá é hkyô lé, lagyô pé eq Yuda mau pé má é gumang wui wó gyô akô. ²Haú mù, Petruq, Yerusalem wà mó má doq ló é hkâm, ahpyo-kuq hpyit hkyô lé myit zuq é lumjínq bang gi, ³"Nàng gi, ahpyo-kuq a hpyit é bâng é yhâm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

⁴Haú hkâm, Petruq gi, haú dut lò bê hkyô lé awang mai ahpyo hpyot, yhangmoq lé taí sán kyô hi kat é má, ⁵"Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri. ⁶Haú lé rago za saí wú le, myigùng htoq má hkyî myi hkyî dap é jung dusak, yosò zè, dô yê é jung eq, maulat nghoqzò pé bo tô é lé, ngò myàng luí, myit wú nyi é hkâm, ⁷Petruq ê, toq mù, sat zo aq.' gá é danghtê lé, ngò wó gyô ri.

⁸Ngò kúm gi, 'Yhumsing ê, haú gi, a wó dut, achauq achyut é eq a sansêng é zè, ngá é nhut má hkâ-nhám le a wang wú.' ngú taí kat é nghut lhê.

⁹Haú hkâm, 'Garai Gasang lhoq san lhoq yúng bê zè lé, a sansêng hkâ-ngú.' ga luí, mauhkûng mai dum taí kat ri. ¹⁰Haú su ga sum dâm taí é htàng má, haú pé banshoq lé mauhkûng shut dum wup yu ló bê nghut ri.

¹¹Haú hkâm jáng, Kesare wà mó mai, ngá chyáng nhang kat é byù sum yuq gi, ngò nyi é yhâm hkumtot má jé nyi

tô akô. ¹²Chyoiyúng Woi-nyí gi, ngo lé myit a úng-âng é za, yhangmoq htâng châng é aq ga taí ri; shí gumang hkyuq yuq le ngò eq rahá ê mù, Koneli é yhùm má ngamoq wang é. ¹³Haú hkún, haú yuq gi, yhâng é yhùm má maumang lagyo lé htoq shit é hkún, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé ê jì nhâng aq; ¹⁴nàng eq náng yhumbyù lhungl-hâng bang hkyi yù hui rà danglù, yhang, náng chyáng wun lé lô byi rà nghut lhê.' ga taí é hkyô lé le, ngamoq lé taí kyô ri.

¹⁵Ngò dang taí hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶Haú hkún sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó rà nghut lhê.' ga luí, Yhumsing taí é dang lé bún kat ri. ¹⁷Haú mù luí, Yhumsing Yesuq Hkrisduq lé lumjíng é hkún, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasú é byù nghut luí, Garai Gasang lé wó lhom hkúm pyám rà lúh?" ga taí ri.

¹⁸Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak duì rà matú myit lhíng hkyô byi bu-nhung!" ga luí, Garai Gasang lé chòm hkya-ôn akô nghut ri.

Antioku Wà Mã É Noqkuq Hpúng

¹⁹Ahkuí, Stehpan lé sat pyám kô é htâng má, zing-ri hui kô é yanmai, byo myín lô é bang gi, Hpinisi mau, Kupru zinlóng eq Antioku và mó jé shoq byo lô kômù, Yudaq byu pé lé baú za, mung-dang haú hko kyô akô nghut ri. ²⁰Nghut kôlhang, yhangmoq mã é Kupru byù eq Kuruni byù ra-am gi, Antioku và mó

má châng jé lô kômù, Yhumsing Yesuq é gabú danglù lé, Grik pé lé le taí kyô bum akô. ²¹Haú Yhumsing é loq gi, yhangmoq eq rahá nghut nyi mù luí, byù myo myo gi, lumjíng mù, Yhumsing chyáng lhing wang lo bùm bekô nghut ri.

²²Haú bâng é hkyô lé, Yerusalem noqkuq hpúng é no má hkyang jé lô é nghut mù luí, yhangmoq gi, Barnaba lé Antioku và mó jé shoq nhang kat akô. ²³Yhang jé é hkún, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhikhum ban-shoq èq haú Yhumsing má lhumzuí nyi rà matú, lhunglhang bang lé myit wum byí ri. ²⁴Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjíng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.

²⁵Hau htâng, Barnaba gi, Sholuq lé ê hô rà ga Tarshu myuq shut ê mù, yhang lé myàng jáng, Antioku và mó má shuí lo ri. ²⁶Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myíng lé, Antioku và mó má sâng-hi wó yù bekô nghut ri.

²⁷Haú u lé, myiqhtoí pé ra-am gi, Yerusalem và mó mai, Antioku và mó má lé jé bum akô. ²⁸Haú bang mã é Agabu gâ é sù gi, toq yap mù, Romaq mingkan títg má mutmó gyó lô rà nghut é hkyô lé, Woi-nyí èq tûn shit é đông taí kyô ri; (Haú gi, hkohkâm Klodi é pyat má dut bê nghut lhê.) ²⁹Haú mù luí, chángzô pé gi, Yuda mau mã é gumang wui lé, ó le ó wó dut é myhó garum kat rà ga, myit hpyit yu bum akô. ³⁰Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pè chyáng hun kat bekô nghut ri.

**Petruq, Htóng Mai Wó
Lut Htoq Lo É Hkyô**

12 Haú u lé, Herut hkohkâm gi, hpúng byû ra-am lé chyup yû mù, zing-ri rà ga ngantsâ nyi ri. ²Haú mù, Yohan é yhangmang Yakuq lé sham èq sat pyám nhang ri. ³Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poí u lé nghut ri. ⁴Herut gi, Lhoqlhai Poí lai jáng sheq, mingbyû wui hí má jéyáng rà ga myit tô é yanmai, yhang lé chyup yu é htàng má, htóng má lhúng to mù, yhang lé zúng rà matú, gyè myi yuq yuq kut myi hpúng lé ap tô ri.

⁵Haú mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byi nyi akô nghut ri.

⁶Petruq gi, Herut èq yhang lé jéyáng rà matú she htoq yû rà hí myìn lé, shamtoq-tui í hkat èq tui é hui luí, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. ⁷Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má ê hpuk kat mù, “Myap toq wú aq.” ga nhaú ri; haú hkûn, Petruq é loq mâ é toqjâng tui pé le gyut gyó ló bê nghut ri.

⁸Maumang dum taí é gi, “Hpyihit hit mù, hkyí-tsung tsung aq.” gà ri; Petruq le taí é eq rajung za kut ri. “Náng é bumó wut mù ngá htâng cháng aq.” ga yhang lé maumang lagyo dum taí ri. ⁹Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰Ahkuí, yhangnhik gi, zúng tô é jowò í wô lai mù, wà má htoq é shamtoq hkum má

jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô lô le, maumang lagyo gi, haú hkûn jáng, yhâng chyáng mai gâng lô byuq bê nghut ri.

¹¹Ahkuí, Petruq gi, dum bûn gyíng lò jáng, “Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyû tô é hkyô banshoq mai, ngo lé hkyi yù bê nghut é lé, ahkuí ngò gè gè sê bê.” ga taí ri.

¹²Haú hkyô lé myit sê kat jáng, yhang gi, byû myo myo zing mù, kyúdûng nyi é jowò, Markuq gà é Yohan é yhângnu Mariq é yhúm má jé ló ri. ¹³Haú mù, yhang gi, yhúm wàng hkum lé ló bat é hkûn, Roda gà é dui-nhâng zoshâng myiwe zo rayuq gi, gyô wú rà ga htoq lé lo ri. ¹⁴Yhang gi, Petruq é htê nghut é lé sê gyô kat jáng, lúm gabú luí hkum a hpóng byi shí é za, yhúmhaú shut din wang ló mù, “Petruq gi, hkum mhó lut má lo yap tô ri.” ga ló taí kyô ri.

¹⁵Yhangmoq kúm gi, “Nàng na bê nghut ri.” ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, “Yhâng é maumang lagyo nghut âng ri.” ga taí akô.

¹⁶Nghut kôlhang, Petruq gi, hkum ru bat nyí mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷Yhang gi, yhangmoq lé zim za nyi keq ga loq lik shit mù, yhang lé Yhumsing èq htóng mai hkâsu kut shuí htoq yu é hkyô lé taí kyo luí, “Shí hkyô lé Yakuq eq gumang wui lé taí kyô kat keq.” ga taí ri. Hau htâng, yhang htoq ló luí, jowò gó shut e ló bê nghut ri.

¹⁸Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám rà matú hkunmó hkyô ri.

Herut Hkohlâm Shi Byuq É Hkyô

Hau htâng, yhang gi, Yuda mau mai Kesare và mó má gyó ló mù ló nyi nyi ri. ²⁰Haú gyoro má, Herut hkohlâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ êq yhâng chyáng ê mù, Blastu gâ é, hkohlâm wa lum tô é suwún hpó lé é lùm hkaú mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaú nyi kô é yanmai nghut ri.

²¹Haú hkûn, ding lhum tô é buinyi má, Herut gi, hkohlâm hking wut chùng mù, hkohlâm tanghkuq má zùng luí, yhangmoq lé hkohlâm mungdang byi ri.

²²Haú jáng, mingbyû wuì gi, “Htê shí gi, waxâng byu é htê a nghut, garai wá é htê sheq nghut ri.” ga garû bum akô. ²³Radá dâm, Herut gi, Garai Gasâng é hpungwup shingkang lé a tê byi é yanmai, Yhumsing é maumang lagyo gi, yhang lé dâm byi luí, yhang gi, luq êq hkê é hui mù, shi byuq bê nghut ri.

²⁴Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵Barnaba eq Sholuq nhik gi, Yerusalem và mó má yhangnhik saí tùm nyi é muzó ban saí jáng, Markuq gâ é Yohan lé shuí chùng mù, Antioku và mó shut taú ló bekô nghut ri.

Barnaba Eq Sholuq, Hkyin Nhang Kat Huí É Hkyô

13 Ahkuí, Antioku và mó má é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger^{††} gâ é Simeon, Kuruni byû Luki, (Herut zau hpó eq zum kô lò sù) Manaen eq Sholuq pé nghut akô. ²Yhangmoq gi, zoshuq gám luí Yhumsing lé noqkuq dojaú nyi é hkûn, Chy-

oiyúng Woi-nyí gi, “Ngá é mù wùn waq râ matú ji tô é Barnaba eq Sholuq nhik lé, hkyin to keq.” ga taí ri. ³Haú mù luí, yhangmoq gi, zoshuq gám luí kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴Haú mù, yhangnhik gi, Chyoiyúng Woi-nyí êq nhang kat é eq rajung za, Seluki và shut gyó ló mù, haú má é lhai ji luí, Kupru zinlóng má jé ló luí, ⁵Salami và mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶Yhangmoq gi, haú zinlóng mai lai byit e ló mù Pahpu và mó jé ló kô é hkûn, myiqhtoí pyoq nghut sù Bara-Yesuq gâ é Yudaq byû myoqheq sará rayuq eq htung hui akô. ⁷Haú yuq gi, Sergi Poluq gâ é, myit hpaqchyí kung é ginwáng zau hpó é byû rayuq nghut lhê. Minggyi hpó haú gi, Garai Gasâng é mungdang gyô yù naù mù, Barnaba eq Sholuq nhik lé ji yu ri. ⁸Haú hkûn, myoqheq sará gâ é lichyúm đông myhîng é Eluma le gâ é Bara-Yesuq kúm gi, ginwáng zau hpó lé haú lumjîng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹Haú hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí, ¹⁰“Myit goí é hkyô eq hpuq lô lhiik é hkyô banshoq byíng tô é, nat é yhangzo nghut sù, tengmán hkyô hkangmó é gyê hpó ê, Yhumsing é tengmán hkyô lé a lhoq hpyoq é a wó nyí lhu? ¹¹Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê.” ga taí ri.

††13:1 Grik dong Niger gâ é gi, byû noq gâ é nghut lhê.

Haú hkûn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yhang lé shê râ byù ho sop lhîng wún ri. ¹² Haú hkyô lé ginwáng zau hpó myàng jáng, Yhumsîng eq sêng é mhoqshit é hkyô lé wú maú luí lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wuí gi, Pahpu wà mó mai lhai ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luí, Yerusalem wà mó shut taú lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyì má, yhangmoq gi, tara-jong má wang zung tô akô. ¹⁵ Haú hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, “Gumang wui ê, mingbyû wui lé myit wum byi dang joq kô é nghut le gi, ahkuí taí lo keq.” ga luí, yhangmoq chyáng taí nhang kat ri.

¹⁶ Haú hkûn, Poluq gi, toq yap mù, zîm byuq kó sháng gaq ga loq tû luí, “Israellaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israellaq byu pé é Garai Gasang gi, ngamoq é îchýí îkê pé lé hkyin yù bê nghut mù luí, Egotuq ming má byùbîng dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyì pé lé to byí ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin

amyû mâ é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggidiq joq é eq rajung za, Israellaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. ²⁴ Yesuq a jé lé shimá, Yohan gi, Israellaq byu pé banshoq lé myit lhîng hkyô eq sêng é bapstisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyí râ lháng ngò a gíng.' ga taí ri.

²⁶ Abraham é yhangzo yhangshû pé eq Garai Gasang lé gyuq hkunggâ é tûng-baù, gumang wui ê, shî hkyi yù hkyô mungdang lé, nga-nhûng chyáng byi kat bê nghut ri. ²⁷ Yerusalem wà mó mâ é bang eq, yhangmoq é zau suwún wuí gi, Yhang hkyi yù sù nghut é lé le, Bánno buinyì hkangmó nghap é myiqhtoi pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoi pé é dang lé lhoq dik pyám bekô nghut ri. ²⁸ Yhâng chyáng shí gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹ Yhangmoq gi, yhang eq sêng luí, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yû bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyì tsómra myáng shoq htoq shit shit kut ri. Haú bang gi,

ahkuí, nga-nhúng Israelaq byu pé é hí má, Yhâng é saksé dut bekô nghut ri.

³²Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.^b

ga luí, kâ tô é eq rajung za, ³³Garai Gasang gi, íchyí íwâ pé lé byi tô é dang-

gidiq lé, Yesuq lé lhoq dui toq byí é đông, yhangmoq é yhangzo yhangshu ngamoq

é matú, lhoq dik byí é gabú danglù lé, nungmoq chyáng ngamoq wun lé byi bê.

³⁴Hau htoq agó, Yhang htên byoq é hkâ-nhám a hui shoq, shi é mai lhoq dui toq

yú rá hkyô eq séng luí, Garai Gasang taí é gi,

'Dawiq lé byí tô é danggidiq eq rajung za, chyoiyúng é eq lumgíng é jeju lé,

ngò nungmoq lé byi rá nghut lhê.^c gâ ri. ³⁵Hkya-on Kungtôn Laiká gó wô

má le, 'Náng é Chyoiyúng Sû lé, Nàng htên byoq nhâng naù rá a nghut.^d

ga taí tô ri.

³⁶Ahkuí, Dawiq gi, yhâng é pyat ban-shoq má Garai Gasang ô nau é đông ban

wùn waq jáng, shi byuq luí, íchyí íwâ pé eq rahá myhup pyám hui mù, htên byoq

byuq é hui bê nghut ri. ³⁷Garai Gasang lhoq dui toq yu é sù kúm gi, htên byoq

huí é a nghut.

³⁸Haú nghut é yanmai, gumang wui ê, haú yuq mai yubak wó hkyut pyám

byí é hkyô lé, nungmoq lé hko kyô nyi é nghut é le, sê nyi keq. ³⁹Hau htoq agó,

Mosheq é tarâ èq mara hkyut san byí é a hui kôlháng, haú yuq lé lumjíng é bang

gi, hkyô lhumjup má mara hkyut san byí é hui rá nghut lhê. ⁴⁰Hau é yanmai,

'Wú keq, jìhpoí é bang ê, maú mù luí htum byuq keq;

nungmoq é buinyì pé má ngò rajung jung kut htoq rá nghut lhê;

⁴¹haú hkyô lé, rayuq yuq, nungmoq lé hkaí kyo kôlháng, jíng kó rá a nghut.^e

ga luí, myiqhtoi pé taí é dang, nungmoq má a ang sháng gaq, sidiq nyi keq.” ga

hko kyô nyi ri.

⁴²Ahkuí, Poluq eq Barnaba nhik tara-jong mai htoq ló le, htàng lhê é Bánno

buinyì má le, haú pé lé dum hkaí kyo rá matú yhangmoq chôm đùng akô.

⁴³Chôm byo htoq ló kô é hkûn, Yudaq byu pé eq Yudaq noquq htung má lhing

wang lo é tarâ hkunggâ é byù myo myo gi, yhangnhik é htàng má châng bùm kô

é nghut mù luí, Garai Gasâng jeju má gíng nyi rá matú, yhangnhik gi, yhang-

moq lé lhoq pun lhoq kyíng akô nghut ri.

Tungbaù Pé Chyáng Lhing Lo É Hkyô

⁴⁴Hau htang lhê é Bánno buinyì má, Garai Gasâng é mungdang gyô yù rá

matú, rawa bang aluq shoí ban-shoq, lé zup zíng to bum akô. ⁴⁵Yudaq byu pé

kúm gi, byù moq mó haú lé myàng jáng, manon myit baú byíng bùm kômù luí,

Poluq taí é dang lé taí htíng é eq nhíng pyám akô.

⁴⁶Poluq eq Barnaba le gyuq myit a bo é đông taí é gi, “Garai Gasâng é mung-

dang lé, nungmoq lé hí taí kyo rá dut é yanmai, ngá-nhik taí bê nghut lhê.

Nghut kôlháng, nungmoq gi, haú lé lhom he-ngik pyám kômù, ahtum abyuq é asak

eq gíngdán é đông yhumsing gùng lé a myit yù kô é yanmai, wú keq, ahkuí, ngá-

nhik gi, tungbaù pé shut lhing ló berá nghut lhê. ⁴⁷Hkâsu mù gâ le, haú Yhum-

síng gi, 'Hkyi yù hkyô lé maumyí htum shoq wó

chúng jé rá matú, Ngò, nàng lé tungbaù pé é maubó dut nhâng bê.^f

^b13:32 Hkya-on 2:7 ^c13:34 Esai 55:3

^e13:41 Hbk 1:5 ^f13:47 Esai 49:6

^d13:35 Hkya-on 16:10

ga luí, ngamoq lé hkunmó hkyó kat bê.”
gâ ri.

⁴⁸Tûngbaù pé gi, dang haù lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é lhunglhâng bang le, lumjínq bum akô nghut ri.

⁴⁹Yhumsing é mungdang gi, haù ming gón jam lò bê nghut ri. ⁵⁰Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wui mâ é tarâ hkungga bang eq, haù wà mâ é suwún wui lé, nhik lhoq yo kôluí, yhangnhik lé maukyo mai chôm hkat htoq pyâm akô. ⁵¹Yhangnhik gi, yhangmoq lé a nau é hkyô tún shit é dông, yhumsing é hkyô mâ é hpuilhaù lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. ⁵²Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyó

14 Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjínq bùm kó shoq, wum kat hko kyô akô. ²Nghut kôlhâng, a lumjínq é Yudaq byu pé gi, lumjínq é gumang wui lé a ngui râ dông tûngbaù pé lé mhoq hpyoq yù mù, shuí gumlaù akô. ³Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byí nyi ri. ⁴Haù wà mâ é bang kúm gi, myit byo ló bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akô. ⁵Ahkuí, tûngbaù pé le, Yudaq byù eq yhangmoq

é uphkâng bang le, yhangnhik lé rhoí mù luqgok èq dú sat râ ga htím lo bum akô. ⁶Nghut kôlhâng, yhangnhik gi, haù hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpang e ló akô. ⁷Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyó

⁸Ahkuí, Lustra wà mó má, înu unghkaù mai hkyô hten mù luí, hkâ-nhám le hkyô a wó sô wú é sù rayuq zung tô ri. ⁹Yhang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gê byi hui râ nghut lhê gâ é lumjínq myit yhâng chyáng bo tô é lé, myàng byí ri. ¹⁰Haù mù, Poluq gi, “Toq yap aq!” ga luí, htê mó èq yhang lé taí kat jáng, yhang gi, byam toq kat mù, wó so bê nghut ri.

¹¹Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, “Nat hparà pé gi, byù gùng dông kut luí ngamoq chyáng gyó lô bekô nghut ri.” ga luí, wut garu bum akô. ¹²Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byí akô. ¹³Haù wà yàm mâ é Zeu hparà noqkuq yhûm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi râ hen akô.

¹⁴Nghut kôlhâng, lagyo nhik Barnaba eq Poluq gi, haù lé wó gyo kôjáng, yhumsing é mebu lâng cheq pyám kôluí, shiwa hpong gung gung shut din wang ê kômù, garú taí kô é gi, ¹⁵“Hkaù pé ê, haí mù haù su kut lo akô lhú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyâm to mù, mauhkûng eq myigùng, wuìshuq lung-aù eq haù pé má nyi mi-nyí, joq mijoq lé hpan to sù, rû dui nyi é Garai

Gasâng chyáng lhing wang lò kó sháng gaq nghû luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myû chângjup lé hí hpyang lhê é pyat bán má ó le ó kâm é đông kut nhâng bê nghut ri. ¹⁷ Nghut kôlhang, Yhang gi, mauhkûng mai mau wô nhâng luí, kyôshi zuí nhang é ahkyíng yamyoq byi mù, nungmoq lé zoshuq agùn agó byí é eq, nungmoq lé i-mytit ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri.” ga akô. ¹⁸ Haú su ga tái kô le lhang, yhangnhik lé shiwa byu pé mai hkungga nhông byi rã hkyô lé, yhangnhik gi, gyai wuihke luí sheq wó hkûm pyâm akô nghut ri.

¹⁹ Hau htâng, Antioku và mó eq Ikoni và mó pé mâ é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok èq chôm dú kômù, yhang lé shi byuq bê su ngàm kô é yanmai, và shinggan shut shê hkyut htoq pyâm akô. ²⁰ Nghut kôlhang, Poluq gi, yhâng é lhinghkyuq má chángzô pé yap tô kô é hkûn, toq mù và shut tau wang lô ri. Hau htang nyí, yhang gi, Barnaba eq rahá Derbe và mó shut e lô bekô nghut ri.

Antioku Và Mó Má Taú Jé Lô É Hkyô

²¹ Haú wã má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku và mó hkyô dum taú lô kômù, ²² chángzô pé lé myit lhoq ging byi uchyang, haú lumjíng hkyô má ru gíng nyi rã matú myit wum byí akô. “Nga-nhúng gi, Garai Gasâng é mingdán má wàng rã matú, wuihke jamjau myo myo hui ra rã nghut lhê.” ga le, mhoqshit akô. ²³ Yhangnhik gi, noquq hpúng hkangmó má, hpúng suwún kut rã bang lé hkyin yù mù, zoshuq gám luí kyúdung mù, yhangmoq lumjíng nyi é Yhumsíng Garaí chyáng

ap byi tô akô. ²⁴ Hau htâng, yhangnhik gi, Pesidi ginwáng mai lai byit lô mù, Pamhpuli ginwáng má jé lô akô nghut ri. ²⁵ Haú ginwáng mã é Perga và mó má mungdang hko kyo luí, Atali và mó shut lai gyó lô akô nghut ri.

²⁶ Haú mai, lhai ji mù, ahkuí yhangnhik wùn waq lai lô bê muzó é matú, Garai Gasâng jeju má ap luí yhangnhik lé nhang kat é Antioku và mó má dum jé lò bekô nghut ri. ²⁷ Jé lo é hkûn, yhangnhik gi, hpúng byú wui lé wut tsíng yù mù, yhangnhik đông mai Garaí Gasang kut é hkyô banshoq lé le, tûngbaù pé lé haú lumjíng hkyô hkum hpóng byí é hkyô lé le, shit kyô akô. ²⁸ Haú mù, yhangnhik gi, haú wã má chángzô pé eq tsómra myang shoq nyi nyi akô nghut ri.

Ahpyo-kuq Hpyit Hkyô Eq Sêng É Manghkáng

15 Ahkuí, Yuda mau mã é byù ra-am gi, Antioku và mó má lé jé mù, gumang wui lé, “Nungmoq gi, Mosheq é htúngtarã eq rajung za, ahpyo-kuq a hpyit é nghut jáng, hkyi yu é hui rã a nghut.” ga luí, mhoqshit bum akô. ² Hau é yanmai, myit a huí lhùm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhùm akô; haú mù luí, gumang wui gi, Yerusalem và mó má nyi é lagyo pé eq suwún wui chyáng, haú hkyô lé lô hpyê lhum rã matú, Poluq, Barnaba nhik eq rahá, yhangmoq chyáng mã é ra-am lé, nhang kat rã ga hkyin tô akô. ³ Haú mù, hpúng byú wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô lai lô uchyang, tûngbaù pé lhing wang lò bê hkyô lé tái kyô akô. Haú mã é gumang wui lé gyai yhang gabú nhang akô nghut ri. ⁴ Yhangmoq, Yerusalem và mó má jé kô é hkûn, hpúng byú wui, lagyo pé eq suwún wui gi, yhangmoq lé lhom hkûlum yù kô é nghut mù luí, yhangmoq gi, yhang-

moq đông mai Garai Gasang kut é hkyô lunglhang lé, haú bang lé shit kyô akô.

⁵Haú hkûn, Hparishe hpúng mã é lumjúng bang ra-am gi, toq mù luí, “Túngbaù pé lé, ahpyo-kuq hpyit nhâng rã eq, Mosheq é tarã đông cháng nhâng rã gi, ra yhang rã lhê.” ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶Ahkuí, lagyo pé eq hpúng suwún wuí gi, shí hkyô lé chôm myit wú rã ga, zup tô bum akô. ⁷Shí hkyô lé gyai yhang dang rhâng lhúm bùm kô é htàng mã, Petruq gi, toq mù luí, “Gumang wui ê, Garai Gasang gi, ngá nhut mai taí é, haú gabú danglù lé, túngbaù pé gyô yù mù lumjúng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugú nghut bê. ⁸Haú mù, myit nhiklhum lé sé byi sũ Garai Gasang gi, nga-nhúng lé byí é eq rajung za, yhangmoq lé le Choyiýung Woi-nyí byí é đông, yhangmoq lé hap yù bê hkyô lé saksé tũn shit bê nghut ri. ⁹Garai Gasang gi, yhangmoq lumjúng luí, yhangmoq é myit nhiklhum lé lhoq san lhoq yúng byi bê nghut é yanmai, nga-nhúng eq yhangmoq é gyoro mã gamhkuí é hkyô a joq nhâng lo nghut ri. ¹⁰Haú nghut le gi, íchyí íwã pê èq le, nga-nhúng èq le a ung é wòlai lé, haú chángzô pê é lingzing mã ke byí é đông mai, haí mù, ahkuí Garai Gasang lé chyam wú nyi akô lhu? ¹¹Nghut kôlhang, ngamoq gi, yhangmoq eq rajung za, Yhumsing Yesuq é jeju mai za hkyi yu é huí é hkyô lé lumjúng é bang nghut lhê.” ga luí, yhangmoq lé taí ri.

¹²Haú hkûn, zup míng tô é bang lunglhang gi, zim za kut luí, Barnaba

eq Poluq nhik mai, túngbaù pê chyáng, Garai Gasang eq yhangnhik é loq đông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. ¹³Yhangnhik dang ban taí kôjáng, Yakuq gi, “Gumang wui ê, ngá dang lé gyô wú keq. ¹⁴Garai Gasang gi, túngbaù pê chyáng mai Yhâng mying é matú byù ra-myú hkyin yù rã ga, yhangmoq lé sâng-hi mai hkâsu kut lé kũm nyi é hkyô lé, Simun taí kyo bê nghut ri. ¹⁵⁻¹⁶Shí hkyô gi,

‘Hau é htàng mã gi, ngò dum taú lò mù luí, lêng gyop byuq bê Dawiq é yhúm[¶] lé dum saí rã nghut lhê.

Haú byoq htên tô é pé lé saí saí mù, haú lé dum lhoq toq rã nghut lhê.

¹⁷Haú hkûn sheq, ngá mying mai ji yu é túngbaù pé eq, myit gyo tô é byù lunglhang bang gi, Yhumsing Garai lé hô kó rã nghut lhê ga,

¹⁸a-nham mau htoq xâng hkun mai, shí hkyô pé lé sé nhang é Yhumsing Garai taí ri.[¶]

ga myiqhtoí pé kã tô é dang eq rajung za nghut ri.

¹⁹Haú mù luí, ngò taí nau é gi, túngbaù pê chyáng mai Garai Gasang shut lhing lo é bang lé, gotú haí le a lhoq wuí é za, ²⁰hparà lhô pé lé kyáng byí é a sansêng é zoshuq pé lé le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rã matú za, yhangmoq lé, nga-nhúng laiká mai wó shit kat lhê. ²¹Hkâsu mù gã le, gó hkûn mai yhang, Mosheq é tarã lé wã hkgámó mã hko kyô ló kômù, Bánno buinyì hkgámó tarajong pé mã nghap kyo kyo kut bùm kô é nghut lhê.” ga taí ri.

[¶]15:15-16 Dawiq é yhúm gã é gi, Dawiq eq yhâng é awut ashin pé up é hkyô lé gã é nghut lhê.

**Lumjîng É Tûngbàu Pê
Chyáng Hun Kat É Laiká**

²² Haú hkûn, lagyô pé, suwún wuî eq, hpúng byû wuî lhunglhâng bang gi, Poluq, Barnaba nhik eq rahá Antioku wà mó shut nhang kat râ byû lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wuî chyáng mà é nhik bô suwún nhik Barsabaq gâ é Yudaq eq Sila lé hkyin yu akô nghut ri. ²³ Yhangnhik é loq má, hun kat kô é laiká gi,

“Antioku wà mó, Suriq mau eq Kili mau pé má nyi é, tûngbàu gumang wuî ê, nungmoq é gumang wuî nghut é, ngamoq lagyô pé eq suwún wuî gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luî, nungmoq é myit lé lhoq nhúng byî nyi é hkyô lé, ngamoq wó gyo bê. ²⁵ Haú mù, ngamoq lhunglhâng bang gi, byû ram lé hkyin yù mù, ²⁶ nga-nhúng é Yhumsîng Yesuq Hkrisduq é matú, yhumsing asak lé lhang a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê. ²⁷ Haú mù luî, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yang taî kyo kô râ nghut lhê. ²⁸ Nungmoq é matú gi, hparà lhô pé lé tîng byî é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám râ hkyô mai lai luî, gotú wòwùn hùn râ hkyô a joq nghû luî, Chyoiyúng Woi-nyî le, ngamoq le, myit huî to

bê. ²⁹ Nungmoq haú pé lé koi pyám nyî kôjáng gi, gè râ nghut lhê.

Nguingón wángzán nyî kô sháng gaq ô!” ga kâ tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wuî lé ji tsîng to kôluî, haú hùn kat é laiká lé ap byî akô nghut ri. ³¹ Hpúng byû wuî gi, laiká haú lé ban nghap kôjáng, wum-o byî é danglù hau é yanmai, gabú nyi bum akô. ³² Yudaq eq Sila gi, myiqhtoî nhik le nghut kômù luî, gumang wuî lé mungdang myo myô èq lhoq pun lhoq kyîng kômù, wum-o lhoq gîng to byî akô. ³³ Rayoq zo haú má nyi nyî kô é htàng má, gumang wuî gi, yhangmoq lé nhang kat é bâng chyáng, ngui ngui gón gón dum tau ló nhâng bekô nghut ri. ³⁴ (Sila kúm gi, yang ô nau é đông nyi gyó tô ri.)^{§§} ³⁵ Poluq eq Barnaba kúm gi, Antioku wà mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

**Poluq Eq Barnaba Nhik
Gâng Lhum É Hkyô**

³⁶ Hau htàng, buinyî tsómra myáng jáng, Poluq gi, Barnaba lé, “Yhumsing é mungdang hko kyô lai lo wú bê, wà hkyap hkangmó mà é gumang wuî chyáng taû lò luî, yhangmoq hkâsu dut nyi é hkyô lé, ló dum kùm wú lo goq.” ga taî ri. ³⁷ Barnaba gi, Markuq gâ é Yohan lé le shuí chûng nau ri. ³⁸ Nghut kôlhang, Poluq gi, haú yuq lé a kâm shuí chûng nau nghut ri; hkâsu mù gâ le, yang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yang taî shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luî, lhai ji mù

§§15:34 Bun zo shí lhum gi, Grik Chyúmlaiká myo myo má a bô nghut lhê.

Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsíng Garai é jeju má ap kat kô é htâng má, yhangnhik gi, htoq e ló byuq bekô. ⁴¹ Haù mù, Poluq gi, Suriq mau eq Kiliki mau mai sô lai ló uchyang, haù mâ é noqkuq hpúng pé lé wum-o lhoq ging byí wún bê nghut ri.

Poluq Eq Sila Nhik Chyáng Timohti Châng É Hkyô

16 Poluq gi, Derbe wà mó má jé é htâng, Lustra wà mó má dum jé ri. Haù wà má, Timohti gâ é chángzo rayuq nyi ri. Yhâng nu gi, Yesuq lé lumjíng é Yudaq myiwe myhí nghut ri; yhâng wa kúm gi, Grik amyú nghut ri. ² Timohti gi, Lustra wà mó eq Ikoni wà mó má nyi é gumang wui èq hkyâ-ôn é hui sù nghut ri. ³ Poluq gi, hkyowuì má yhang lé shuí chûng naù mù luí, ahpyokuq hpyit byí ri. Hkâsu mù gâ le, yhâng wa gi, Grik nghut é hkyô lé haù mâ é Yudaq byu pé lhunglhâng bang sé kômù, haù bang lé myit tê byí é yanmai nghut ri. ⁴ Haù mù, yhangmoq gi, rawa htâng rawà mai lai ló uchyang, Yerusalem wà mó mâ é lagyô pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haù mù luí, hpúng byú wui gi, lumjíng hkyô má wum-o bo lò kômù, ra-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang ê hko kyo râ hkyô lé Chyoyíung Woi-nyí èq yhangmoq lé hkùm pyâm é yanmai, Hprugi mau eq Galatiq mau đông sô lai ló mù, ⁷ Musi mau kyo má jé ló kôjáng, Bihtuni mau shut wang ló râ dâ akô; nghut kôlhâng, Yesuq é Woi-nyí gi, yhangmoq lé ahkáng a byi nghut ri. ⁸ Haù mù, yhangmoq gi, Musi

mau mai sô lai ló luí, Troa myuq má gyó jé ló akô. ⁹ Haù má, myín lé, Poluq gi, Makedoni byù rayuq lé yap to mù, “Makedoni mau shut dap lé luí, ngamoq lé le garúm yú laq.” ga luí, yhang lé dung wut nyi é shing-rán myang ri. ¹⁰ Shing-rán haù lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghú myit yù luí, haù hkùn yhang, ngamoq gi, Makedoni mau shut dap ê râ matú ri ri kut ló bê nghut lhê.

Ludia Gâ É Myiwe Myhí Hpúng Byù Dut Lo É Hkyô

¹¹ Haù mù luí, ngamoq gi, Troa myuq mau Samohtake zinlóng ang ang shut lhai ji é mù luí, htang nyí gi, Neapoli wà má jé bê nghut lhê. ¹² Haù mai lai jáng, Makedoni mau má, Romaq byu pé xuq tô é, haù ginwáng mâ é ahkyak wà mó nghut é, Hpilipi myuq má ngamoq jé mù, haù má rayoq zo nyi nyi é nghut lhê.

¹³ Bánno buinyí jé jáng, ngamoq gi, kyúdung jowò joq nhô ngam mù, wà hkum shinggan mâ é, wuìlàng yàm shut htoq ê luí, haù má zíng to láng é myiwe wui lé, zung gyó mù nyo hi é nghut lhê. ¹⁴ Haù dang gyo nyi é bang má, Garai Gasang lé noqkuq é, Htuatira myuq byú, pán nê ung zo sù Ludia gâ é myiwe myhí rayuq bo ri; Yhumsíng Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyù wui wui-myhup ban hkâm yù kôjáng, “Nungmoq gi, ngo lé haù Yhumsíng Yesuq má lumjíng bê sù nghut é đông, myit yù byi kô é nghut jáng, ngá yhùm má lé bíng keq.” ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haù kyúdung é jowò shut e ló nyi le, nat wang júng

luí gumhpân hpan é jùnmyhí rayuq ngamoq lé lhom huí ri. Háu yuq gi, gumhpân hpan é đông yhâng yhumsing wui lé ngunzè gyai yhang hô byí é sù nghut lhê. ¹⁷ Myiwe hau gi, Poluq eq ngamoq htâng má châng to mù, “Shí bang gi, nungmoq lé hkyi yù hkyô taí kyô wún é, Myhang Htâng é Garai Gasâng é dui-nhâng zoshâng wui nghut bum akô ô!” ga wut garú ri. ¹⁸ Buinyì myo myo hau su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat hau lé, “Yesuq Hkrisduq é mying lang luí ngò nang lé hkunmó hkyô kat lhê, yhâng chyáng mai htoq ló byuq aq.” ga luí, nat hau lé, nhik-yô kat ri. Háu hkûn jáng, nat hau gi, yhâng chyáng mai htoq ló byuq bê nghut ri.

¹⁹ Ahkuí, myiwe hau é yhumsing wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gài mâ é suwún wui chyáng she hkyut e akô. ²⁰ Dum, yhangmoq gi, yhangnhik lé tarâ agyi pé chyáng shuí ê mù, “Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é đông, ²¹ nga-nhùng é myuq lé gunjâng nyi akô nghut ri.” ga taí akô.

²² Háu mù luí, shiwa byu pé gi, yhangnhik lé chôm hfm akô. Tarâ agyi pé gi, yhangnhik é mebu lé lãng hkyut pyám luí, wumchûm hkat èq bat râ matú, hkunmó hkyô kat akô. ²³ Yhangmoq gi, yhangnhik lé gyai yhang nhuq bat yu é htâng, htong má lhung kat mù, rago za wú zúng râ matú htóng suwún lé hkunmó hkyô tô akô. ²⁴ Htóng suwún hpó gi, hau sù é hkunmó lé wó jáng, yhangnhik lé hkyí kyum hut luí, htóng má é, je ahtê gok má lhung tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyúdung luí, Garai Gasang lé mahkôn hkya-ôn nyi kô é hkûn, htóng byù góbang gi, yhangnhik é htê lé chôm gyô nyi bum akô. ²⁶ Háu hkûn, byodàn ratung layàng mó nún lô mù htóng yhùm gôn le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkangmó mâ é toqjâng tui pé le gyut gyô byuq bê nghut ri. ²⁷ Htóng suwún hpó gi, yhup bún lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luí, shâm shê mù, yhanggùng yhang sat shí râ dâ ri. ²⁸ Nghut kôlhang, Poluq gi, “Ê, náng gùng yhang nàng hau su hkâkut, ngamoq banshoq shí má nyi tô lhê.” ga luí, htê mó èq wut garu taí kat ri.

²⁹ Háu hkûn, yhang gi, duq é myibung lé dúng yù mù, ahkaû shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yhang gi, yhangnhik lé shuí htoq yù luí, “Sarâ nhik ê, ngò hkyi yu é huí râ matú, haí kut ra râ lú?” ga myi kat ri.

³¹ Háu hkûn, yhangnhik gi, “Yhum-sing Yesuq lé lumjng jáng, nàng eq náng yhumbyù lhunglhâng bang hkyi yu é huí râ nghut lhê.” ga taí akô. ³² Hau htâng, yhangnhik gi, hau htóng suwún hpó eq yhâng yhumbyù lhunglhâng lé, Yhum-sing é mungdang hko kyô akô. ³³ Háu myin hau u lé yhang, htóng suwún hpó gi, yhangnhik lé shuí ê mù, yhangnhik é dâm pé lé tsing chî pyám byi luí, hau htâng, yhang eq yhâng yhumbyù banshoq bang wui-myhup hkâm yù bekô nghut ri. ³⁴ Hau htâng, yhang gi, yhangnhik lé, yhâng é yhúmhaû má shuí wang ló mù, zoshuq hkang byí ri. Yhang eq yhâng yhumbyù banshoq bang

gi, Garai Gasang lé wó lumjáng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyì wuì gi, “Haú nhik lé nhang pyám aq.” ga, htóng suwún hpô chyáng pyata pé lé taí nhang kat akô. ³⁶ Haú hkûn, htóng suwún hpô gi, “Nungnhik lé nhang pyám aq ga, tarâ agyì wuì mai byù nhang kat ri; haú mù, ahkuí, nungnhik gi, ngón za htoq ló lo keq.” ga luí, Poluq lé taí ri.

³⁷ Poluq kúm gi, “Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhîng, ahkuí tsik za haq nhang pyám râ dâ akô nhưng lhi? A wó dut, yhangmoq yhang sheq lé shuí htoq yú kó sháng gaq.” ga luí, yhangmoq lé tú taí kat ri.

³⁸ Pyata pé gi, tarâ agyì wuì lé dang haú pé ló taí kyo kôjáng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yú mù, wà haú mai htoq ló byuq râ matú chôm dîng akô. ⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhûm má wang ló akô; haú má, gumang wuì eq le hui kômù, yhangmoq lé wum-o byi luí, htoq ló bekô nghut ri.

Htesaloni Wà Mó Má Mungdang Hko Kyô É Hkyô

17 Hau htâng, yhangmoq gi, Amh-pipoli wà mó eq Apolon wà mó mai sô laí ló mù, Htesaloni wà mó má jé akô. Haú wà má gi, Yudaq byu pé é tarajong ralhú joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyì sum nyí yhang, Chyúmdang má bo é eq séng mù,

yhangmoq eq chôm mîng lhum uchyang, ³ Hkrisduq wuîhke jamjau hui mù, shí bê mai dum dui toq lô râ hkyô lé taí hkoq san kyo luí, “Nungmoq lé, ngò hko kyô nyi é haú Yesuq gi, Hkrisduq nghut lhê.” ga taí ri. ⁴ Yudaq byu pé mã é ram gi, gyô jîng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuì tsómra myo shoq le, gyô jîng kômù, lé xoq yu akô.

⁵ Nghut kôlhang, a gyô jîng é Yudaq byu pé gi, manôn kôluí, gai mã é byù-gang jùm ra-am lé lung yù mù, byù moq mó tsîng yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhûm má htîm e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wuì ra-am lé, yhangmoq é wà suwún wuì chyáng lâng she é kômù, “Mîngkan gón lé atau ahú kut é byù shí nhik, ahkuí shí má jé jáng, Yason gi, yhâng é yhûm má lhom hkûlum yu ri. ⁷ Yhangmoq lhunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é dông kut é bang nghut akô.” ga taí garú bum akô. ⁸ Shiwa byu pé eq wà suwún wuì gi, dang haú lé wó gyo kôjáng, myit wuì myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pé htoq má je riyhang nhik bo bum

akô; haû mù, danglù haû lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuí Chyúmdang lé chôm nghap wú nyi akô nghut ri. ¹² Haû mù luí, Yudaq byu pé myo myo gi, lumjínq bum akô, haû eq rajung za, aróng wó é Grik myiwe wuí eq yuqgè wuí myo myo le, lumjínq bùm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuí lé mhoq hpyoq luí, gabyông lò nhang akô. ¹⁴ Haú hkûn, gumang wuí gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chùng mù, dum taù lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haú nhik lé láng nyi tô é u lé, haú wà má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gai pé má hui mihui bang eq le, nyí wuí taí sâh kyô lhûm nyi akô nghut ri. ¹⁸ Haû mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, “Byù pyok shí yuq gi, haí wá taí nyi

lhê lhú?” ga; ra-am gi, “Góming hparà pé é hkyô lé taí kyo sù nghut sam ri.” ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, “Nang mhoqshít é hkyô asik, ngamoq lé sé nhang le a gè lhú? ²⁰ Nang èq taí é maú nhô za gâ é hkyô lé ngamoq wó gyô ri; haú é dang kyíng lé ngamoq sé nau ri.” ga taí bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, “Ahten byu pé ê, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhûm lé myang záng ri; haú nungmoq a sé é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsíng le nghut lhê mù luí, byu loq èq saí é noqkuq yhûm má nyi râ a nghut. ²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung râ é sù lé su, byu loq èq dojaú râ sù a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowô masat to byi bê nghut ri. ²⁷ Yhang gi, nga-nhúng yuq hkangmó eq a we to kôle,

* **17:18** *Epikuri hpaqchyí* gi, htang pyat a joq, ahkuí ngón yú râ za ahkyak gâ é nghut lhê. *Sto-i hpaqchyí* gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.

byu pé yang lé châng hô mù, myang hô kó sháng gaq ga shí hkyô lé kut é nghut ri. ²⁸Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹Haù mù, nga-nhúng gi, Garai Gasâng é yangzô pé nghut nyi é yanmai, Garaí gùng gi, byu é hpaqchyí loq èq kyúng kâ tô é hng, ngùn, luqgok pé eq púng lhê nghú luí hkâ-myt yù kó. ³⁰Laí lò bê haù myoq a bóng shí é pyat lé, Garai Gasang gi, haí le a ga lhaí pyâm to kôlhang, ahkuí gi, jowò hkangmó mâ é byù lhunglhang bang lé, myit lhng keq ga hkunmó hkyô to bê nghut ri. ³¹Hkâsu mù gâ le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lhunglhang bâng é hí má wó lum é saksé dut sháng gaq ga, Yhang haú yuq lé shí é mai lhoq dui toq yù bê nghut ri." ga taí ri.

³²Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³Hau htâng, Poluq gi, haù zuphpong mai htoq ló byuq bê nghut ri. ³⁴Nghut kôlhang, byù ra-am gi, Poluq é htâng cháng kômù, lumjng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotú byu pé le, bo bum akô nghut ri.

Poluq, Korinhtuq Myuq Má Nyi É U Lhê Hkyô

18 Hau htâng má, Poluq gi, Ahten myuq mai htoq luí, Korinhtuq myuq má jé lo ri. ²Haù má, yang gi, Romaq myuq mai Yudaq byù lhunglhang bang htoq ló byuq râ dut lhê ga, hkohkâm Klodi èq hkunmó hkyô é yan-

mai, a myáng shí lé Itali ming mai yangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yangnhik chyáng é ri. ³Yhangmoq gi, jonghpang saí zo bang chyat nghut kô é yanmai, muzó púng kôluí, Poluq gi, yangnhik eq rahá nyi nyi mù, muzó chôm saí akô. ⁴Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyng yu ri.

⁵Ahkuí, Sila eq Timohti nhik Make-doni mau mai châng jé jáng, Poluq gi, mungdang hkô hkyô má za wum kat luí, haù Yesuq gi, Hkrisduq yang nghut lhê ga, Yudaq byu pé lé saksé hkâm kyô ri. ⁶Nghut kôlhang, Yudaq byu pé gi, lhom he-ngik pyám kômù, yang lé rhoí dang taí pyâm akô; haù mù, Poluq gi, yhâng mebu ko shit é dông yangmoq lé a nau é hkyô tûn shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbaù pé chyáng e ló berâ nghut lhê." ga luí, yangmoq lé taí ri.

⁷Hau htâng, yang gi, tarajong mai htoq luí, jong haù eq yhep nghut é, Garai Gasang lé noqkuq é Titu Yustu ga su é yhúm má wang ló ri. ⁸Krispu gâ é tarajong má up sù gi, yhâng yhumbyù lhunglhang bang eq rahá, Yhumsing lé lumjng akô. Korinhtuq myuq byu pé myo myo le, Poluq é dang lé gyô yù mù, lumjng luí, wui-myhup hkâm yu bum akô nghut ri.

⁹Ra-myìn lé, shing-rán ralhúm má Yhumsing mai Poluq lé taí é gi, "Hkâ-gyuq, taí aq, zim za hkâ-nyí. ¹⁰Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shí má, ngá é byù myo myo nyi bum lhê." gâ ri. ¹¹Haù mù luí, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yang, haú myuq má nyi nyi ri.

¹²Galio ga sũ, Ahkaia mau mã é gin-wáng zau kut nyi é u lé, Yudaq byu pé gi, myit rahkat zâ eq Poluq lé chôm chyup yũ kôluí, tarâ hpyit wap má she háng kômù, ¹³“Byù shí yuq gi, jep é tarâ eq shai lhũm é dông, Garai Gasang lé no-kuq râ matú, byu pé lé mhoq hpyoq wún ri.” ga mara hũn akô.

¹⁴Haũ hkũn, Poluq tũ taí râ dâ lò jáng, Galio gi, Yudaq byu pé lé, “Yudaq byu pé è, muzó shí gi, tarâ lu laí é muzó, haũ a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. ¹⁵Nghut kôlhang, muzó shí gi, nungmoq é tarâ eq séng luí, dang eq séng luí, myìng eq séng luí, taí lhũm kô é hkyô nghut é yanmai, nungmoq yhang ru ló hpyit lhũm keq. Haũ sũ é muzó má, ngò gi, tarâ agyì kut byi râ a nghut.” ga taí mù, ¹⁶tarâ hpyit wap mai yhangmoq lé hkat htoq pyám nhang ri. ¹⁷Haũ hkũn, yhangmoq lhunglhang bang gi, tarajong má up sũ Sositeni lé chyup yũ mù, tarâ hpyit wap hí má chôm bat akô. Galio kúm gi, haũ hkyô lé hai gùn a kut byi nghut ri.

Poluq, Antioku Wà Mó Má Dum Taũ Jé É hkyô

¹⁸Poluq gi, Korinhtuq myuq má buinyì tsómra myáng shoq lumjìng bang eq nyi nyi ri. Hau htàng, yhang gi, haũ bang lé shi-kyâm to luí, Priskila eq Akula nhik lé byinzũm kut mù, lhaí ji luí Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà mã xãm nyhãm pyâm ri.† ¹⁹Yhangmoq Ehpesu myuq má jé kô é hkũn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sãn kyo byi ri. ²⁰Haũ mã é bang gi, yhangmoq eq rahá rayoq zo nyi shi râ

dông yhang lé dung kô é nghut kôlhang, yhang gi, a nhô lo nghut ri. ²¹Haũ mù, yhang gi, Ehpesu myuq mai lhaí ji mù htoq ló uchyang, “Garai Gasang ô nau é hkyô nghut le gi, ngò nungmoq chyáng dum jé lé râ nghut lhê.” ga, yhangmoq lé danggidiq byi tô ri. ²²Ahkuí, Poluq gi, Kesare wà mó má ló jé dap jáng, Yerusalem wà mó shut doq é ló, noqkuq hpúng lé ló huí tò é htàng, Antioku wà mó má dum gyó ló ri.

²³Yhang gi, haũ wà mã rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawà mã é chángzô pé lé wum-o lhoq ging byi ri.

Apolo Zui Saí É Muzó

²⁴Ahkuí, Alesandru myuq byù nghut é sũ, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sũ nghut é htoq agó, Chyúmdang le gyai kũng é sũ nghut ri. ²⁵Yhang gi, Yohan é baptisma hkyô lé za sé sũ nghut kôlhang, Yhumsing é hkyô lé mhoq yũ bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byi ri. ²⁶Ahkuí, yhang gi, gyuq kyúm myit a bo é za tarajong má taí hi ló ri. Haũ hkũn, Priskila eq Akula nhik gi, haũ lé wó gyo kôjáng, yhang lé ji yù mù, Garai Gasang é mungdang hkyô lé azó tung taí sãn kyo byi akô nghut ri.

²⁷Apolo gi, Ahkaia mau shut dap e ló nau é hkũn, gumang wuì gi, yhang lé wum saí byi mù, yhang lé lhom hkũlum yũ râ matú, chángzô pê chyáng laiká ká byi kat akô; yhang gi, jé jáng, Garai Gasang jeju mai lumjìng bê bang lé, gyai yhang wó garúm sũ dut bê nghut ri. ²⁸Hkâsu mù gâ le, yhang mai, Yesuq gi, Hkrisduq yhang nghut nyi ri ga luí

†18:18 Xãm nyhãm pyâm é gi, Yudaq htũng dông rajung jung kut râ matú danggidiq to luí, haũ lé ban kut jáng, yhumsing xãm lé nyhãm pyâm é nghut lhê.

Chyúmdang má tún shit uchyang, byu pê hí má Yudaq byu pé lé, wum kat wó taí ung pyâm é yanmai nghut ri.

**Poluq, Ehpesu Myuq
Má Nyi U Lhê Hkyô**

19 Ahkuí, Apolo gi, Korinhutq myuq má nyi tô é hkûn, Poluq gi, mau káng mai sô lai lô mù, Ehpesu myuq má jé ri. Haú má, yhang gi, chángzô pé ra-am eq hui luí, ²yhangmoq lé, “Nungmoq gi, lumjínq é hkûn, Chyoiyúng Woi-nyí lé, wó yú bekô lhú?” ga myí ri.

Haú hkûn, yhangmoq gi, “Chyoiyúng Woi-nyí nyi lhê gâ é lhang, ngamoq a wó gyô wú.” ga tú taí akô.

³Haú mù, Poluq gi, “Haú nghut jáng, nungmoq gi, haí jung baptisma hkam yù kô é lhú?” ga luí, yhangmoq lé myi jáng, yhangmoq gi, “Yohan é baptisma hkam yu é nghut lhê.” ga tú taí akô.

⁴Haú hkûn, Poluq gi, “Yohan é baptisma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjínq râ lhê ga shiwa byu pé lé taí ri.” ga taí ri. ⁵Yhangmoq gi, dang haú lé wó gyo kôjáng, Yesuq é myîng lang luí baptisma byí é lé, hkam yu bum akô. ⁶Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoí lo bum akô. ⁷Haú bang lhunglhang gi, yuqgè raxe í yuq kó nghut ri.

⁸Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyîng yu ri. ⁹Nghut kôlhang, ra-am gi, myit htan lo bùm kôluí a kâm lumjínq kô é htoq agó, haú Yhumsing é Hkyô lé byu pê hí má lhoq hpoi pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù,

Turanu gá su é hpaqchyí mhoq jong má, nyí wuí taí sân kyô lhûm nyi akô. ¹⁰Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglhang bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹Garai Gasang gi, Poluq é loq đông laklai kumlhá kut ri. ¹²Haú mù, Poluq chyáng mâ é hpajet eq hpyihit rajung jung lé, nò bang chyáng yu lô mù, lô záng byi jáng lhang, yhangmoq é nòh-pyo ge lô byuq é eq, agè ashop é nat pé lé yhangmoq chyáng mai htoq lô byuq bum akô.

¹³Haú u lé, nat hkat htoq wun é Yudaq byu pé ra-am gi, agè ashop é nat pé lé, “Poluq hko taí é Yesuq é myîng mai, ngò, nungmoq lé hkat htoq lhê.” ga, agè ashop é nat wang júng to bang é ahtoq má, Yhumsing Yesuq é myîng lé lang luí, hkat chyam wú akô. ¹⁴Skewa gâ é, Yudaq hkyangjong agyí rayuq é yuqzo nyhit yuq le haú su kut wun akô. ¹⁵Ra-nyí lé, agè ashop é nat gi, yhangmoq lé, “Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?” ga tú taí mù, ¹⁶agè ashop é nat haú wang júng é byù gi, yhangmoq htoq má byam doq jî to luí, nhuq bat yú mù yhangmoq lé ung pyâm ri. Yhangmoq gi, yhûm haú mai gùngchîn sui nê yang yang hpanq htoq lô bekô nghut ri.

¹⁷Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chôm gyô gyuq bum akô. Yhumsing Yesuq é myîng gi, hkya-on lhoq toq é hui bê nghut ri. ¹⁸Lumjínq bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô. ¹⁹Myoqheq hpaqchyí kut zô é bang le, yhangmoq é laiká lé yu lé kôluí, shiwa

byu pê hí má nyhê hkyô pyâm akô. Mausau haú pê é ahpau lé sôn wú le, ngùn chap ngo mun záng ri. ²⁰ Haú đông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut laí htâng má, Poluq gi, Makedoni mau eq Ahkaia mau đông sô laí lò mù, Yerusalem và mó má lò jé rã ga myit hpyit yú luí, “Haú má lò jé tô é htâng má, ngò, Romaq myuq má le, jé wú rã dut ashí.” ga taí ri. ²² Haú mù, yhang lé htuqbang garúm é Timohi eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

²³ Haú yoq lé, haú Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sũ rayuq gi, Artemi hpara é ngùn yhũm zòng zo saí luí, mũ saí luzúm wuí lé wó sùt nhang nyi ri. ²⁵ Yhang gi, yhâng é ngùn bat zo luzúm wuí eq haú jung amũ kut é góbang lé le jì tsing to mù, taí é gi, “Luzúm wuí ê, muzó shí lhũm é yanmai, nga-nhũng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lháng aluq jam shoq, byu loq èq saí é zè lé, garaí pé a nghut ga, shí Poluq ga sũ mai byù myo myo lé mhoq hpyoq yú mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Haú mù luí, nga-nhũng é muzó shí gi, hpoi byuq rã lé chiq rã é za a nghut, hparà myhí mó Artemi é noqkuq yhũm gi, haí a dut byuq luí, Asia mau gón eq mingkan gón mai noq é hparà myhí é shingkang hpoi byuq rã lé le myit chiq rã dut bê.” gâ ri.

²⁸ Yhangmoq gi, dang haú lé wó gyô bùm kôjáng, nhik mó gyô yo kôluí, “Ehpesu myuq byu pê é Artemi gi, kô nyi sháng gaq ô!” ga chòm garũ bum akô.

²⁹ Hkã-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aris-takuq nhik lé chyup she yù mù, yhangmoq é poi wàng mó shut radá dãm chýn chyap wang lò bum akô. ³⁰ Poluq gi, moq hpúng hau hí má htoq shit naũ kôlhang, chángzô pé gi, yhang lé a wàng nhâng kô nghut ri. ³¹ Poluq é luzúm wuí nghut é, haú mau mã é suwún wuí ra-am lháng, yhang lé poi wàng hkaũ má a ê rã matú, hkũm pyám nhang akô nghut ri.

³² Zing tô é bang gi, hai hũ háng le a sé lo dut byuq kômũ luí, ra-am rajung ga garũ bum akô. Myo mi-myo gi, hai mù luí yhangmoq haú má nyi tô é lé lháng a sê bùm kô nghut ri. ³³ Yudaq byu pé gi, Alesander lé hí má chòm chýn htoq kat kôluí, shiwa hpong mai ra-am gi, yhang hkã đông taí rã hkyô lé mhoq byi kat akô. Alesander le shiwa hpong lé taí san kyo naũ luí, zim byuq rã matú loq tu ri.

³⁴ Nghut kôlhang, Alesander, Yudaq byù nghut é lé sé kôjáng, yhangmoq lhungl-hâng bang gi, rahtê za kut kôluí, “Ehpesu myuq byu pê é Artemi gi, kô nyi sháng gaq ô!” ga hkyíng hkum í hkum kô garũ bum akô.

³⁵ Haú, myuq chyare hpó gi, shiwa moq mó lé lhoq zim luí taí é gi, “Ehpesu myuq byu pé ê, Ehpesu myuq shí gi, Artemi myhí mó é noqkuq yhũm eq mauhkũng mai byit gyó lo é yhâng é alhò lé, wú zúng nyi é và nghut é hkyô lé, mingkan má a sê é ó yuq wa nyi lhê lhú? ³⁶ Haú mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkãkut ko.

³⁷ Shí nhik gi, noqkuq yhũm lé hpyoq zo su nhik le a nghut, nga-nhũng é hparà myhí lé lhoq hpoi su nhik le a nghut kô é le nhĩng, nungmoq shuí lé bekô nghut ri.

³⁸ Demetri eq yhâng é ngùn bat zo luzúm wuí gi, rayuq yuq é ahtoq má mara hũn rã hkyô joq kô é nghut jáng, tarã rùng pé hpông tô lhê. Tarã agyì pé nyi lhê. Haú

má yhangmoq ê kó sháng gaq. ³⁹Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lhê. ⁴⁰Hkû-nyí gabyông é mú shí má, mú htoq wang a bo é yanmai, nga-nhúng lé mara hûn râ chiq râ ri. Shí su kut chôm míng é hkyô lé, hai é yanmai nghut lhê nghú, nga-nhúng a wó taí kyo nghut ri.” gâ ri. ⁴¹Shí pé ban taí é htâng má, yhang gi, shiwa moq mó lé lhoq pyo kat bê nghut ri.

Makedoni Mau Éq Grik Mau Đông Lai Ló É U Lhê Hkyô

20 Haú gabyông é hkyô zím byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri. ²Yhang gi, haú mau mai sô lai ló uchyang, byu pé lé wum byí é dang myo myo taí luí, Grik mau má ló jé bê. ³Yhang haú má lhamó sum hkyap nyi yù mù, lhai ji luí Suriq mau shut ê râ hen nyi é hkûn, Yudaq byu pé gi, yhang lé gyám nyí kô é yanmai, yhang gi, Makedoni mau đông tau lò râ lé myit hpyit bê nghut ri. ⁴Yhang eq rabyìn za châng é bang gi, Beria và mó mã é Purú yhangzo Sopata, Htesaloni và mó mã é Aristakuq eq Sekundu nhik, Derbe và mó mã é Ge-u, Timohiti, Asia mau mã é Tuhkiku eq Trohpimu nhik pé nghut akô. ⁵Yhangmoq gi, hí so lánng luí, ngá-nhik lé Troa myuq má ló lánng nyi akô. ⁶Nghut kôlháng, ngá-nhik gi, Azuma Poí[‡] lai é htâng má, Hpilipi và mó mai lhai ji ló le, ngo nyí nghú jáng, Troa myuq má yhangmoq lé hui luí, haú má nyhit nyí chôm nyi é nghut lhê.

Troa Và Má, Utuhku Ga Sú Lhoq Tui Toq Hui É Hkyô

⁷Rabat é sâng-hi nyí lé, ngamoq gi, muk hpê gâm râ matú lé chôm zup zing tô é hkûn, Poluq gi, htang nyí ló byuq râ ga hen tô é yanmai, chángzô pé lé gung-gâm jé shoq hko kyô nyi ri. ⁸Ngamoq zup zing nyi é haú ahtoq pyâm wap má, myibung myo myo le duq tô ri. ⁹Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhûm sum tsáng mai byit gyó mù, yhang lé bún toq wú le shi byuq bê nghut ri. ¹⁰Haú hkûn, Poluq gi, gyó ló mù, po ngop to luí, “Hkâdân ko, yhang soq bo ashí.” ga taí ri. ¹¹Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. ¹²Zorâm zo haú lé duì gù shuí ló kômù, nhik tîng é gyai yhang hui bekô nghut ri.

Troa Và Eq Melitu Và Gyoro Mã É Hkyowui

¹³Poluq gi, myí hkyô ló râ matú hen tô é yanmai, yhang lajang byí é eq rajung za, yhang lé Asu và má lhai lhom shuí ji râ matú, ngamoq gi, lhai ji mù hí ló lánng bê nghut lhê. ¹⁴Haú mù, yhang gi, Asu và má ngamoq eq hui luí, ngamoq gi, yhang lé lhai má shuí ji chûng mù, Mitulene myuq shut e ló bê. ¹⁵Htang nyi, ngamoq gi, haú mai lhai ji mù, Kiu zinlóng yâm mai lai ló luí, hau htang nyi gi, Samu zinlóng má lai dap ló luí, htang nyí gi, Melitu và mó má jé ló bê nghut lhê. ¹⁶Poluq gi, wó dut é nghut jáng, Penteko-ti buinyì lé Yerusalem và mó má wó jé shoq gâ é yanmai, Asia mau má buinyì a kâm lhoq htum naù mù luí, Ehpesu myuq lé lhai pyâm to râ matú, myit hpyit to bê nghut ri.

[‡]20:6 Múnchi a bo é Muk zo Poí lé, Azuma Poí le gâ lhê.

**Ehpesu Hpúng Suwún Wuí Lé,
Poluq Shi-kyâm Tô É Dang**

¹⁷ Poluq gi, Melitu wà mó mai Ehpesu shut byù nhang kat luí, hpúng suwún wuí lé ê jî nhang ri. ¹⁸ Haú bang jé lé kôjáng, yhang yhangmoq lé taí é gi, “Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkyíng banshoq lé le; ¹⁹ Yudaq byu pé jeq hô luí, ngò wuíhke jamjau hui zo kôlhang, haú Yhumsing é muzó lé, ngò myit gyai lhoq nyhâm é eq ngaubyi ngau nhap é èq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhâm htâng rayhâm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhîng mù Garai Gasâng chyáng lhing lò ra eq, nga-nhûng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

²² Ahkuí, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut rà lé kúm gi, a sé nghut ri. ²³ Ngò gi, htóng eq wuíhke jamjau hkyô ngo lé láng tô ri ga, wà hkangmó má Chyoiyúng Woi-nyí èq lhoq pûn é hkyô lé za sê nyi lhê. ²⁴ Nghut kôlhang, ngò gi, òn rà hkyô ban òn rà eq, Garai Gasâng jeju eq sêng é gabú danglù lé saksé hkâm rà matú, Yhumsîng Yesuq ngo lé byi tô é muzó lé ban wùn waq rà za nghut jáng, ngá asak lé ratsú le a myit ha lò é nghut lhê.

²⁵ Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhang bang gi, htâng nùng má ngo lé a myàng lo kó rà nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má

a dap lô é hkyô lé, hkû-nyí, ngò saksé hkâm tô lhê. ²⁷ Hkâsu mù gà le, Garai Gasâng ô nau é hkyô banshoq nungmoq lé hko kyo rà matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng[†] lhunglhang lé le, zúng nyí keq. Garai Gasâng Yhâng suí èq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkuí gi, nungmoq chyáng jé rà nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yû shoq ga, shut é òng taí é byu pé lhang nungmoq chyáng mai htoq lò rà nghut lhê. ³¹ Haú mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyi keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a myoqnoq wú. ³⁴ Ngá é loq shí í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. ³⁵ Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhûng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyi sháng.” gà ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhang bang eq rahá za kyúdûng ri. ³⁷ Yhangmoq lhunglhang bang gi, yhang lé po to luí, bopuq puq mù, chôm ngau

[†]20:28 Sau hpúng gà é gi, lumjîng é bang lé gà lhê.

akô. ³⁸Htâng nùng má, yhang lé dum myàng rã a nghut lo gã é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

Yerusalem Wà Mó Shut Doq Ló Nyi É U Lhê Hkyô

21 Ngamoq gi, yhangmoq lé kang pyâm to luí, lhaí jì chùng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. ²Haú wã má Hpinisi mau shut dap ló é lhaí lé, ngamoq myàng luí, haú mai chôm jì chùng bê. ³Haú hkûn, ngamoq gi, Kupru zinlóng lé myàng jáng, hau é loqyo hkyam đông laí ló luí, Suriq mau shut e ló le, hpugá zê lé hkyó rã matú, Turuq myuq má nô é nghut lhê. ⁴Haú wã má, chángzô pé lé myang hô luí, yhangmoq chyáng nyhit nyí bing yu é. Chángzo haú bang gi, Chyoiyúng Woi-nyí èq lhoq pûn é đông Poluq lé Yerusalem wà mó shut a ló rã matú, chôm hkûm akô. ⁵Nghut kôlhâng, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lunglhang bang gi, yhangmoq é myi zo wuì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyû chôm dung bê nghut lhê. ⁶Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhùm shut dum tau ló byuq bekô nghut ri.

⁷Ngamoq gi, Turuq myuq mai lhaí jì chùng mù, Toleme wà má jé ló bê. Ngamoq gi, haú wã mã é gumang wuì lé shichyên yù mù, yhangmoq eq rahá ranyí chôm nyi kûn é nghut lhê. ⁸Htang nyí gi, ngamoq haú wã mai htoq ló mù, Kesare wà mó má dum jé bê. Haú wã má,

haú htuqluq htuqbang nyhit yuq⁸ má bò sũ, gabú danglù hko taí é Hpilip gá su é yhùm má, ngamoq wang bing bê nghut lhê. ⁹Yhang gi, yhang hku tô é byizo zomyi myiqhtoi myi yuq wó ri.

¹⁰Ngamoq gi, haú yhùm má rayoq zo nyi é htâng má, Agabu gã é myiqhtoi rayuq, Yuda mau mai jé lé ri. ¹¹Yhang gi, ngamoq chyáng jé lé luí, Poluq é hpyihit lé yù mù, yhânggung yhang loq eq hkyí pé má tui mù luí, taí é gi, “Shí hpyihit yhumsing lé, Yerusalem wà mó mã é Yudaq byu pé mai shí su kut lhom tui luí, tûngbaù pé é loq má ap pyám kó rã nghut lhê;’ ga luí, Chyoiyúng Woi-nyí taí ri.” gã ri.

¹²Dang haú lé wó gyo jáng, haú mã é bang eq ngamoq gi, Poluq lé Yerusalem wà mó mã a doq ló rã matú, gyai yhang chôm hkûm bê nghut lhê. ¹³Nghut kôlhâng, Poluq gi, “Nungmoq gi, haí mù luí ngaubyi ngau-nhap kut é eq, ngo lé myit wum gyui rã đông kut nyi akô lú? Ngò gi, Yhumsing Yesuq é yanmai, Yerusalem wà mó mã, tuí é hui rã za a nghut, shí hkâm rã matú le rì rì nghut lhê.” ga tũ taí pyâm ri. ¹⁴Yhang lé wó taí hkûm rã su a dut lo jáng, ngamoq gi, “Garai Gasang ô nau é đông nghut sháng gaq.” nghu luí, zim za chôm nyi bùm bê.

¹⁵Hau htâng má, ngamoq gi, zè món chùng mù Yerusalem wà mó shut doq ló bê nghut lhê. ¹⁶Kesare wà mó mã é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sũ, hí hí lhê é chángzo rayuq é yhùm má shuí ló mù, yhâng chyáng bing nhang akô.

Yerusalem Wà Mó Mã, Yakuq Lé Ê Huí É Hkyô

¹⁷Yerusalem wà mó mã ngamoq jé é hkûn, gumang wuì gi, ngamoq lé gabú tung lhom hkûlum yu akô. ¹⁸Htang nyí,

Poluq eq ngamoq gi, Yakuq lé ê huí le, hpúng suwún wuí le zing nyi to lánq akô. ¹⁹ Poluq gi, yhangmoq eq ban shichyen jáng, yhang wún waq láf lo é hpúng mú dông mai, Garai Gasâng eq tũngbaù pè chyáng kut byi bê hkyô pé lé, jihkúm nuqguq shit kyô ri.

²⁰ Yhangmoq gi, haù lé wó gyo kôjáng, Garai Gasâng lé hkya-ôn akô. Hau htâng, Poluq lé taí kô é gi, “Âmang ê, Yudaq byu pé má lumjínq é bang hká-myhó hkyíng mun nghut bê lé, nàng sê lhê. Haù bang lunglhang gi, jep é tarâ má myit zuq to bê bang chyat nghut bum akô. ²¹ Nghut kôlhang, yhangmoq lunglhang bang gi, tũngbaù pè chyáng nyó lúng tô é Yudaq byù banshoq bang lé, nàng, yhumsing yhangzo yhangshú pè é matú ahpyo-kuq hpyit a ra nghu é eq nga-nhúng é htung tarâ lé châng nyi a ra nghú luí, Mosheq é tarâ lé tô pyám rà dông mhòqshit ri gâ é dang lé, wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo rá lhú? ²³ Haù mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haù bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù rá matú, ahpau le htoq byi aq. Haù hkún sheq, byù lunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó rá nghut lhê. ²⁵ Lumjínq é tũngbaù pè é matú kúm gi, hparà lhô pé lé tĩng byi é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám rà matú, ngamoq chòm doqdan luí, kâ hùn kat bê nghut lhê.” ga akô.

²⁶ Haù mù luí, Poluq gi, hau htang nyi haù bang lé ji yù luí, yhangmoq eq rahá, lhoq san lhoq yúng yù mù, noqkuq yhùm má wàng luí, yhangmoq yuq hkanqmó é

matú hkanqga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yù Huí É Hkyô

²⁷ Buinyi nyhit nyi haù ngap rà yàm má, Asia mau má é Yudaq byu pé ram gi, noqkuq yhùm má Poluq lé myàng kômù, shiwa byu pé lé shuí gabyong luí, yhang lé chyup yù mù, garú taí kô é dang gi, ²⁸ “Israellaq byu pé ê, garúm yù keq, shí yuq gi, nga-nhúng byuhú lé le, jep é tarâ lé le, jowò shí lé le, shut shai é dông jowò hkanqmó má é byù banshoq lé mhòqshit sù nghut ri. Hau htoq agó, noqkuq yhùm má Grik pé lé shuí háng é eq, chyoyúng jowò shí lé achay chyt kut é sù nghut ri.” gâ akô. ²⁹ (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaù má rahá nghut kô é lé, myàng kômù, haù yuq lé noqkuq yhùm shut shuí háng nhò ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhnghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haù hkún jáng, hkum pé lé myhí pyám akô nghut ri. ³¹ Poluq lé yhangmoq sat rà dâ nyi kô é hkún, Yerusalem wà gón gabyông nyi akô gâ é hkyô lé, Romaq dap up zaù é no má, lò jé ri. ³² Haù mù, yhang gi, radá dâm shò up gyezau ram eq gyezò pé lé shuí chùng mù, byù hpúng shut, din yán gyó ló akô. Yhangmoq gi, gyezau eq gyezò pé lé lhom myàng kôjáng, Poluq lé nhuq nyi é mai hkyíng byuq akô nghut ri.

³³ Haù hkún, dap up zau hpó gi, Poluq chyáng ê jé mù, yhang lé chyup yù luí, toqjàng tui í hkat eq tui to nhang ri; hau htâng, yhang ó yuq nghut é hkyô lé le, haí kut shut é hkyô lé le myi wú ri. ³⁴ Shiwa byu pé kúm gi, rayuq rajung ga garú bum akô. Haù mù, gyezau hpó gi, lùm garu kô é yanmai, têng é hkyô

lé rago a wó sê yù jáng, Poluq lé gye-wap má shuí ló nhang ri. ³⁵Poluq gi, zumhtâng wang má jé lo é hkún, byù moq mó lûm htim chyîn chyap lô kô é yanmai, gyezô pé gi, yhang lé waq doq lô akô. ³⁶Shiwa byu pé gi, “Yhang lé sat pyâm keq.” ga châng garû nyi akô nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

³⁷Gyezô pé gi, Poluq lé gyewap má shuí wàng rà za nghut é hkún, Poluq gi, dap up zau hpó lé, “Ngò nàng lé dang wó nyô rà lú?” ga myi jáng, dap up zau hpó gi, “Nàng, Grik myíng dat mu lê lú?” ³⁸Nàng gi, hí hkún gumlau kut mù, byù sat wún bang myi hkyîng lé, yoso shut shuí htoq lô é sù, Egotuq byû a nghut lú?” ga tau myî ri.

³⁹Haú hkún, Poluq gi, “Ngò gi, Kiliki mau Tarshu myuq mâ é Yudaq byû nghut lê; ngò nyi é wà gi, wà chyap wà zo za a nghut, jeju mai, byù shí bang lé ngò dang tái rà ahkáng byi laq.” ga dúng ri.

⁴⁰Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkún, yhang-moq lhunglhang bang zim byuq kômù, Poluq, yhangmoq lé Hebre myíng đông tái é gi,

22 “Gumang wui eq îwa pé ê, ahkuí, ngò mara a bò nghu tái é dang lé gyô wú shi keq.” gâ ri.

²Yhangmoq gi, yhang Hebre myíng đông tái é dang lé wó gyô bùm kôjáng, gyai yhang zim byuq bekô. Haú mù, Poluq xoq tái é gi, ³“Ngò gi, Yudaq byù rayuq nghut lê. Kiliki mau Tarshu myuq má choq hpyit kôlhang, wà mó shí má nyi kô lò sù nghut lê. Ngò gi, nga-nhùng îchyí îwa pé é jep é tarâ lé, Gamalelaq é loq má jikhúm nuqguq mhoq yû luí, hkû-nyí lê é nungmoq lhunglhang bang su, Garai Gasang lé

gyai myit zing zuq é sù nghut lê. ⁴Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yû mù htóng má lhung pyâm wú bê sù nghut lê. ⁵Hkyangjong mó eq byin tú wap suwún wui lhunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi rà laiká yhangmoq chyáng mai wó yu chùng luí, haú mà é bang lé le Yerusalem wà mó má dam byi rà matú, chyup tuí lô rà nghú, Damaskuq myuq shut e é nghut lê.

⁶Nyigûng tú zó lé, ngò Damaskuq myuq shut sô chyâng lô nyi é hkún, maubó gi, ngá é lêngkhyuq má mauhkung mai byodàn tung duqbó to bê nghut ri. ⁷Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lê lú?’ gâ ri.

⁸Ngò le, 'Yhumsing ê, nàng ó nghut lê lú?’ nghu myî kat jáng, 'Ngò gi, nàng zing-rí wún é sù, Nazaret wà byù Yesuq nghut lê.' ga luí, Yhang tái tái kat ri. ⁹Ngò eq rahá e lô é bang kúm gi, maubó lé myàng kôlhang, ngo lé tái é danghtê lé a sê gyo kó nghut ri.

¹⁰Dum, ngò gi, 'Yhumsing ê, ngò haí kut ra rà lú?’ nghu myi jáng, haú Yhumsing gi, 'Toq mù, Damaskuq myuq má wang lô aq, nàng kut rà matú wò byí tô é hkyô pé lhunglhang, nang lé haú má lhom tái kyo berâ nghut lê.' ga ngo lé dum tái ri. ¹¹Haú maubó é shingkáng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang lô akô.

¹²Haú hkún, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggá é eq, haú má nyi é Yudaq byù lhunglhang bâng é hí má myoq-dong gyai wó é sù nghut ri. ¹³Yhang gi, ngá nâm má yap to luí, 'Gumang Sholuq ê, náng myoq myàng aq hkoi!' ga tái ri.

Haú hkún jáng yhang, yhang lé ngò wó myang kat bê nghut lhê.

¹⁴Yhang dum xoq taí é gi, 'Nga-nhung íchyí íwa pè é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sû lé wó myâng luí, Yhâng é nhut má é mungdang lé wó gyo sháng gaq ga luí le, hkyin to bê nghut ri. ¹⁵Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhâng é matú saksé hkám byi rã su dut rã nghut lhê. ¹⁶Ahkuí, nàng haí lé lánng nyi ashí lhú? Toq aq, Yhâng é myìng lé lang luí wui-myhup hkâm yu é eq, náng é yubak mara pé lé chí sãn pyám aq.' gâ ri.

¹⁷Hau htâng, ngò gi, Yerusalem wà mó má dum taú jé ló mù, noqkuq yhùm má kyû ê dũng nyi le, moq byuq ló mù, ¹⁸'Nàng, ngá é hkyô lé saksé hkám rã dang lé, yhangmoq a lhom hap yù kó rã rã nghut é yanmai, Yerusalem wà mó mai hân htoq ló aq.' ga Yhumsing ngo lé taí nyi é lé, myoqwup shing-rán dõng myang ri.

¹⁹Haú mù, ngò gi, 'Yhumsing ê, tara-jong ralhùm htâng ralhùm má nang lé lumjìng bang lé, htóng má chyup lhung pyâm é eq, hkat bat lhing wún é hkyô lé, yhangmoq sê bum akô. ²⁰Náng é saksé Stehpan sat hui luí suí shun u lé, ngò nàm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghú tú taí bê.

²¹Haú hkún, Yhumsing gi, 'Ê aq, ngò, nang lé, wê gâng é tũngbaù pé chyáng nhang kat rã.' ga, ngo lé taí ri." gâ ri.

Poluq, Romaq Mingdán Byù Nghut É Hkyô

²²Shiwa byu pé gi, dang haú hkun jé za gyô yù kômù, "Shí sù é byù gi, myigùng htoq má nyi a gíng, sat pyám keq." ga, htê mó èq garú bum akô.

²³Yhangmoq gi, haú su garu uchyang, yhumsing buhìng lé hkyut dú pyâm lhê, hpuilhup lé mauhkung shut kyaq tâng lhê, kut nyí kôjáng, ²⁴dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garú bùm kô é hkyô lé wó sé shoq ga, nhuq bat nhâng luí, myí choq nhang ri. ²⁵Nhuq bat rã matú shokuq tuí eq tui kôjáng, Poluq gi, nàm má yap tô é shô up gyezau lé, "Romaq mingdán byù ru nghut sù lé nhing, lháng a jéyáng shimá, nungmoq nhuq bat le gi, tarã wang akô lhú?" ga taí ri.

²⁶Rashô up gyezau gi, dang haú lé wó gyo jáng, dap up zau chyáng ló mù, "Nàng haí kut rã dâ nyi lhê lhú? Shí yuq gi, Romaq mingdán byù sheq ru nghut ri." ga luí, yhang lé ló taí kyô ri.

²⁷Haú mù, dap up zau gi, Poluq chyáng ê mù, "Nàng gi, Romaq mingdán byù nghut lhê lhú? Taí kyô wú laq." ga myí ri.

Poluq gi, "Ngò, Romaq mingdán byù nghut lhê." ga tú taí ri.

²⁸Haú hkún, dap up zau hpó gi, "Ngò lháng ahpau myo myo byí pyám luí sheq, Romaq mingdán byù ru wó dut é nghut lhê." ga tú taí jáng, Poluq gi, "Ngò kúm gi, Romaq mingdán byù dut gù hku lé ló é sù nghut lhê." ga taí ri.

²⁹Yhang lé myí choq wú rã gâ é bang gi, haú hkún jáng, yhâng chyáng mai hui zut ló bùm bekô. Gyedap up zau hpó le, Poluq gi, Romaq mingdán byù nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

³⁰Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglháng lé ji

tsîng to luî, yhangmoq é gung gûng má Poluq lé shuí wàng mù, shap to bê nghut ri.

23 Haú hkûn, Poluq gi, Yudaq byìn tú wapdoq suwún wuí lé wú tsuq to mù, “Ngá gumang wuî ê, ngò gi, hkûnyí jé shoq Garai Gasâng é hí má sansêng é i-myt êq asak dui nyî bê nghut lhê.” ga taî ri. ²Haú mù luî, hkyangjong mó Anani gi, Poluq nâm má yap to bang lé, yhâng nhut má bat byi keq gà ri. ³Haú hkûn, Poluq gi, yhang lé, “But hpyu tô é xewâm** nàng ê, nàng lé sheq Garai Gasâng êq bat râ nghut lhê. Nàng gi, tarâ eq rajung za ngo lé jéyáng râ matú shí má zung to luî nhîng, haî mù tarâ eq shut shai é dông ngo lé bat nhang lhê lú?” ga taî ri.

⁴Poluq nâm má yap tô é bang gi, yhang lé, “Nàng gi, Garai Gasâng é hkyangjong mó lé wám rhoi lhê lú?” ga luî, chòm taî akô.

⁵Poluq gi, “Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, Náng amyú lé up é sù lé wó rhoi râ a nghut.^h ga le kê tô é nghut lhê.” ga tú taî ri.

⁶Hau htâng, haú zîng tô é bang má é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuí lé, “Gumang wuî ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri.” ga luî, garû taî kat ri. ⁷Yhang haú su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byìn tú wapdoq hpong gi, gam hkoq ló byuq bekô nghut ri. ⁸(Hkâsu mù gà le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum

akô. Hparishe pé kúm gi, haú pé joq lhê ga, lumjîng bang nghut akô.)

⁹Haú mù luî, gyai yhang taî garû bum akô. Haú hkûn, Hparishe hpúng mâ é tarâ sará pé ra-am gi, toq mù, “Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taî bê nghut jáng gi, hkâsu nghû kó râ lú?” ga luî, zuq zuq taî htîng lhûm akô nghut ri.

¹⁰Haú su kut gyai yhang taî htîng lhûm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

¹¹Haú myîn, Yhumsîng gi, Poluq é nàm má yap to luî, “Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê.” ga, yhang lé taî ri.

Poluq Lé Sat Râ Haq Dâ É Hkyô

¹²Htâng napkyó, Yudaq byu pé gi, Poluq lé sat râ hpaqchyî chòm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. ¹³Hpaqchyî shí lé chòm dâ é bang gi, myi xê yuq chyân nghut bum akô. ¹⁴Yhangmoq gi, hkyangjong agyi pé eq suwún wui chyáng ê kômù, “Poluq lé a wó sat sat gi, ngamoq haî le a zo nghû, chòm dakam yu to bê nghut lhê. ¹⁵Hau é yanmai, ahkuî nungmoq gi, Yudaq byìn tú wapdoq suwún wuí eq rahá kut luî, Poluq é hkyô lé rago za myî gon wú râ nghu mhaú é dông, yhang lé nungmoq chyáng wut yù râ matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê.” ga taî akô.

**23:3 But hpyu tô é xewâm gà é gi, gegùn labyoq kut bang lé gà lhê.

^h23:5 Htoq Ló 22:28

¹⁶ Nghut kôlhang, haû lhom haq sat kó rã gâ é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang ê mù, Poluq lé é taí kyô ri.

¹⁷ Haû hkûn, Poluq gi, shô up gyezau rayuq lé ji yù mù, “Zorâm shí lé dap up zaû chyáng shuí ê aq, yhang, yhang lé shit kyo rã hkyô rajung joq lhê ga.” ga taí ri. ¹⁸ Haû mù luí, shô up gyezau hpó gi, zorâm haû lé dap up zaû chyáng shuí ê mù, “Zorâm shí nang lé shit kyo rã hkyô rajung joq lhê gâ ri ga, yhang lé náng chyáng shuí lé rã matú, htóng byû Poluq gi, ngo lé ji yù mù taí ri.” ga, yhang lé taí ri.

¹⁹ Haû jáng, dap up zau hpó gi, jauwò má zorâm haû lé yhâng loq mai she ê mù, “Nàng ngo lé haí jung shit kyô nau ri lhú?” ga, yhang lé baú tsik za myí ri.

²⁰ Haû hkûn, zorâm haû gi, “Yudaq byu pé gi, Poluq lé rago za saí myí wú rã su kut mhaú mù, napmá, Yudaq byìn tú wapdoq má shuí yù rã matú, náng chyáng dung kó rã ga, myit chôm huí to bekô nghut ri. ²¹ Haû mù luí, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, haí le a zo a shuq rã nghut lhê ga, byù myí xê yuq chyân yhang, ó le ó dakam yù bekô nghut ri. Haû bang gi, yhang lé lhom chyup yú rã matú haq lhom to lánq kó rã nghut lhê. Ahkuí lhang, yhangmoq gi, mù haû kut rã matú rì rì nghut bùm bekô; náng é ahkáng lé za lánq nyi bum akô nghut ri.” ga shit kyô ri.

²² Haû hkûn, dap up zau hpó gi, zorâm haû lé, “Nàng, ngo lé shí hkyô shit kyo bê hkyô lé, ó yuq lé le hkâtaí kyo.” ga, sidiq byi mù, taû nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, “Hkû-myîn sum hkyíng^{††} má Kesare wà mó shut ê rã matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat rã matú, yhang ji rã myang pé le lajang byi keq.” ga, yhangnhik lé pying kat ri.

²⁵ Laiká hun kat é le:

²⁶ “Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pé eq chyup yù mù sat pyám rã dâ nyí bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haû su mù, haí mù yhang lé mara hûn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byí wú bê nghut lhê. ²⁹ Haû hkûn, yhangmoq é tará hkyô eq séng luí za mara hun bùm kô é lé ngò myang ri. Nghut kôlhang, shí gíng é eq htóng lhúng gíng é mara haí le a bò nghut ri. ³⁰ Shí yuq lé sat pyám rã hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq ngû pying kat bê nghut lhê.” gâ ri.

³¹ Haû mù luí, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyí, myang ji

^{††}23:23 Myín sum hkyíng gi, nga-nhùng é myín gau hkyíng nghut lhê.

bang lé ê châng dé nhâng kômù, yhang-moq gi, gyewap shut dum taû lò bekô nghut ri. ³³Myang jî é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴Haû hkûn, mauzau hpó gi, laiká haû lé ban nghap jâng, Poluq hká mau mâ é byù nghut é hkyô lé myí wú luí, Kiliki mau mâ é byù nghut é lé sé jâng, ³⁵“Nang lé mara hûn bang jé jâng sheq, náng mù lé ngò gôn wú rà.” ga taí ri. Hau htâng, yhang gi, Poluq lé Herut é khokhâm-wâng má byam zúng byi keq ga hkunmó hkyô tô ri.

Poluq, Mara Hûn Huí É Hkyô

24 Hau htâng, ngo nyí lai jâng, hkyangjong mó Anani gi, suwún wuí ra-am eq tarâ sé sù Tertulu lé shuí gyó lò mù, mauzau hpô hí má Poluq lé mara lé taí hun bum akô. ²Haû hkûn, Poluq lé hí má ji hâng tô é nghut mù, Tertulu, yhang lé mara hûn dang taí hi é gi, “Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkang é jeju lé, byù myû shí wó hkâm zô nyi é yanmai, ³ngamoq gi, haû lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê. ⁴Nghut kôlhang, ngò nang lé lhoq hkyik é đông a dut sháng gaq, taí rà dang ratot zo lé, myit hîng hîng to mù gyo byi laq nghú đùng tôngbán lhê ô!

⁵Shí yuq gi, byù lé gunjang sù, mingkan gón mâ é Yudaq byu pé lhungl-háng lé shuí gabyong sù eq, haû Nazaret hpúng mâ é hkyô-u shê sù nghut é lé, ngamoq myang ri. ⁶Hau htoq agó, yhang gi, noqkuq yhûm lé achayut kut rà dâ nyi luí, yhang lé ngamoq chyup yû mù, (ngamoq é tarâ đông jéyáng rà hen nyi é hkûn, ⁷dap up zau Lusi gi, lé lô mù, ngamoq é loq mai yhang lé lé lú shuí yù luí, yhang lé mara hûn bang lé,

náng chyáng jé keq ga hkunmó hkyô tô é nghut lhê.) ⁸Haû mù, nàng, yhang lé myí wú jâng, ngamoq yhang lé hun é mara banshoq têng é hkyô lé, nàng wó sé rà nghut lhê.” gâ ri.

⁹Yudaq byu pé le, haû pé gi, têng lhê ga bo chôm taí akô nghut ri.

Poluq, Mara A Bò É Lé Taí Hung É Hkyô

¹⁰Mingzau hpó gi, Poluq lé dang taí rà đông loq lik kat jâng, Poluq taí é gi, “Zau ê, shí mau bâng é ahtoaq má, nàng zanwut myo myo jéyáng byí nyi é hkyô lé, ngò sê é yanmai, ngò gabú myit eq yhumsing matú, mara a bo é hkyô taí bá.

¹¹Ngò, Yerusalem wà mó má noqkuq rà matú doq e é buinyi raxe í nyi lháng a chyân shi é gi, nàng lui za wó sé rà nghut lhê. ¹²Noqkuq yhûm má ngò ó yuq eq taí htîng lhûm é lé lhang, tarajong, a nghut jâng, wà hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³Ahkuí, ngo lé yhangmoq hun é mara pé lé, náng hí má yhangmoq saksé lháng a wó tûn shit kó nghut ri. ¹⁴Nghut kôlhang, náng hí má ngò yín yû rà hkyô rahkat gi, yhangmoq eq shut shaí hkyô ga myhîng tô é Hkyô lé cháng luí, ngamoq é íchýí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. ¹⁵Ngò gi, dîngmán é bang eq a dîngmán bâng é dum dui toq lò rà hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶Haû mù luí, Garai Gasang eq byu é hí má, ngò gi, rà é hkyô a bo é za, myit é hkyô san za wó dut nyi shoq, shikut nyi lhê.

¹⁷Zanwut tsómra lai é htâng má, ngò gi, ngá é byù myû mâ é myùng bang lé chyunghuq byi rà eq alu kat rà matú, Yerusalem wà mó shut lò jé bê nghut lhê. ¹⁸Haû su kut nyi é hkûn, ngò eq rahá hai byù moq mó le a nyi, haí jung

gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. ¹⁹Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shí náng é hí má yhangmoq lé jé kó ra nghut lhê. ²⁰⁻²¹Haú a nghut jáng, shí má nyi tô é bang gi, ngò Yudaq byùn tú wapdoq hí má yap to mù, 'Shi byuq bâng é dum dui toq râ hkyô é yan-mai, hkû-nyí nungmoq ngo lé jéyáng nyi akô.' nghû luí, garú é dang hkûn mai lai luí, ngò má gotú mara myàng shi kô é nghut le gi, yhangmoq yhang taí kyo kó sháng gaq." gâ ri.

²²Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkyíng htot kat byí ri. ²³Poluq lé le, zúng za zúng to mù, yhâng é buinùm ji-myi wui mai yhang ra châ é hkyô la-jang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

²⁴Buinyì rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjíng hkyô taí kyô é le gyô yu ri. ²⁵Poluq gi, dingmán hkyô, yhumsing gùng lé hkang é hkyô eq, jé lò râ tarâ dara hkyô lé mhòqshit jáng, Hpilik gi, gyô gyuq mù, "Nàng ahkuí wó lò bê, ngò jìn jáng sheq nang lé dum ji yù râ nghut lhê." ga taí ri. ²⁶Hpilik kúm gi, Poluq eq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pè é hí má myoqdong wó nau

é yanmai, Poluq lé htóng má jáng lhùng pyâm to bê nghut ri.

Poluq, Kehtaq Chyáng Jé Râ Matú Dúng È Hkyô

25 Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq lò ri. ²Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³yhangmoq gi, Poluq lé hkyolat má lhom haq sat pyám râ dà to kômù luí, jeju ralthum kut byí é dông Poluq lé Yerusalem wà mó shut dé kat byi râ matú, Hpestu lé lhom dúng akô. ⁴Nghut kôlhang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má, ngò yhang le haú má dum taú lò râ nghut lhê. ⁵Haú mù, nungmoq mâ é hkyô-u shê bang ra-am, ngò eq rahá gyó lò mù, haú yuq kut shut é hkyô bo é nghut jáng gi, yhang lé mara lé hûn kó sháng gaq." ga tú taí ri.

⁶Hau htâng, yhang gi, shit nyi, raxé nyí kô yhangmoq chyáng nyi yù luí, Kesare wà mó má taú lò mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri. ⁷Poluq jé jáng, Yerusalem wà mó mai gyó lo é Yudaq byu pé gi, yhâng é lhíngghkyuq má yap to kôluí, saksé a wó tûn shit é mara mó myo myo lé, yhâng é ahtoq má chôm taí hun akô nghut ri.

⁸Haú hkûn, Poluq gi, "Yudaq byu pè é jep é tarâ eq shai é dông le, noqkuq yhûm lé shut é dông le, Kehtaq^{††} lé shut é dông le, ngò a kut wú." ga luí, mara a bo é hkyô taí ri.

⁹Nghut kôlhang, Hpestu gi, Yudaq byu pè é hí má myoqdong wó naú mù, Poluq lé, "Nàng, Yerusalem wà mó má doq lò luí, shí hkyô pé lé ngò haú má

††25:8 Kehtaq gâ é gi, "hkoséng" gâ é nghut lhê.

doqdan byi râ matú, nàng dóng lê lú?” ga myí ri.

¹⁰ Poluq kúm gi, “Ngò gi, doqdan hui râ nghut jáng, shí doqdân é jowò, Kehta q é tarâ hpyit wap má ahkuí yap to bê nghut lê. Nàng sê é eq rajung za, ngò gi, Yudaq byu pé lé haí lhang a shut wú sù nghut lê. ¹¹ Laqmá mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kólhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehta q chyáng wang taí râ nghut lê.” ga tû taí ri.

¹² Haú hkún, Hpestu gi, yhâng é byìn tú wap bang eq ban hpyê lhum jáng, “Nàng Kehta q chyáng wang taí râ ga bê nghut lê, Kehta q chyáng wang ló aq hkoi!” ga taí kat ri.

Poluq Lé, Hkohlâm Agripa Hí Má Shuí Hâng Yu É Hkyô

¹³ Hau htâng, buinyì hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akò nghut ri. ¹⁴ Haú mù, yhangnhik tâng gi, buinyì tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq taí kyô lhúm é gi, “Hpilik, lhúng to lánng é htóng byú rayuq nyi ri. ¹⁵ Ngò Yerusalem wà mó má nyi tô é hkún, hkyangjong agyi pé eq Yudaq byu pé é suwún wú gi, haú yuq é hkyô lé taí kyo kôluí, haú yuq lé mara byi râ matú ngo lé chóm dúng akò.

¹⁶ Haú hkún, ngò gi, mara hun é hui sù, mara hun é bang eq chyung chyoy yuq kut luí, yhangmoq hun é mara lé yhumsing matú mara a bo é hkyô a wó taí shí lé, ó yuq lé ap byi pyám râ le, Romaq htung a joq nghú luí yhangmoq lé taí kyo bê nghut lê. ¹⁷ Yhangmoq ngá htâng châng gyó lô kô é hkún, ngò gi, a

nô yu é za, htang nyí jáng tarâ tanghkuq má zúng luí, haú yuq lé shuí wang lò râ matú hkunmó hkyô kat é. ¹⁸ Haú hkún, haú yuq lé yhangmoq mara chóm hun bùm kôle, ngò myit ngàm tô é su mara ralhum le a hun htoq lô kó nghut ri. ¹⁹ Yhangmoq é noqkuq htung hkyô eq, haú dui nyi ri ga Poluq èq taí é, shi byuq bê Yesuq é hkyô lé za dang jet jet lhúm bum akò. ²⁰ Haú mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem wà mó má doqdân é ló hkam yù râ matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé râ ga taí é yanmai, Kehta q chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lê.” gâ ri.

²² Haú hkún, Agripa gi, “Ngò le haú yuq é dang gyô wú nau ri.” ga, Hpestu lé taí jáng, yhang gi, “Napmá, nàng wó myang gyo râ nghut lê.” ga tû taí ri.

²³ Htâng nyí, Agripa eq Bernike nhik-tâng gi, shingkang bò bò za lé lô mù, dap up zau wú eq wà mà é agyi suwún wú eq rahá, rúng gok mó má wang zung tô bùm kô é hkún, Hpestu hkunmó hkyô kat jáng, Poluq lé shuí hâng tô akò. ²⁴ Haú hkún, Hpestu taí é gi, “Hkohlâm Agripa eq ahkuí shí má zup zing tô é lhunglhang bang ê, Yerusalem wà mó eq shí wà mà é Yudaq byu pé banshoq bang, ngá chyáng lé taí kôluí, shí yuq lé asak a wó dui nhang to lo ga garú bùm é gi, ahkuí nungmoq myang é shí yuq yhang nghut bê. ²⁵ Nghut kólhang, shí yuq zui sai é má shí gíng é mara haí lé lhang ngò a myàng nghut ri. Yhang gi, Hkosêng chyáng wâng râ ga taí é yanmai, yhang lé Romaq myuq shut dé kat râ matú ngò myit hpyit to bê. ²⁶ Dé kat bá nghú jáng le, ngá é yhumsing Hkosêng chyáng yhang é hkyô jihkúm nuquq kâ hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkálhang ngò myàng

abe nghũ, nungmoq banshoq bãng é hí má le, je riyhang nàng Hkòhkâm Agripa é hí má le, yhang lé ngò lhoq htoq shit é nghut lhê. ²⁷Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tân shit lé gi, a htuk nghũ luí, ngò myit lhê.” gâ ri.

Poluq É Hí Hpyang Lhê É Nyi Yap Hkyô

26 Haú hkûn, Agripa gi, Poluq lé, “Nàng, náng matú dang tai rá ahkáng wó bê.” ga tái ri.

Haú mù luí, Poluq loq tũ kat mù mara a bo é hkyô tái é gi, ²⁻³“Hkòhkâm Agripa ê, nàng gi, Yudaq byu pê é htunghking banshoq eq tái htíng lhũm é hkyô hkat hkgámó lé, gyai sê to sũ nghut é yanmai, Yudaq byu pé ngo lé hun é mara hkat hkgámó lé, ngò hkũ-nyí náng é hí má mara a bò é hkyô myang tái é gi, ngá matú gabú hpo yhang nghut ri nghũ myit yu nyi lhê; haú mù luí, ngá dang lé myit hing é èq gyô yũ byi laq nghũ, dũng tóngbán kat lhê.

⁴Ngò gi, zoshâng hkũn mai, ngá amyũ má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gũ nghut akô.

⁵Yhangmoq gi, ngo lé hí hkũn mai sé kô é yanmai, ngò, ngamoq é noqkuq htũng mã é tarâ htan dik é hpúng mã bo é Hparishe rayuq nghut é hkyô lé, saksé hkám naũ kô é nghut jáng, yhangmoq wó hkâm lhê. ⁶Nghut kôlhâng, doqdân é hui zo rá matú, ahkuí ngò shí má yap tô é gi, Garai Gasang èq ngamoq é íchyí iwa pé lé byí tô é danggidiq lé myit myoqbyũ nyi é yanmai nghut lhê. ⁷Ngamoq é byũ myũ raxe í hú gi, danggidiq jeju haú lé wó hkam yũ shoq ga, Garai Gasang lé nyí myín noqkuq dojaũ shikut nyi bum akô; Hkòhkâm wa ê, myit myoqbyũ hkyô hau é yanmai, ngo lé Yudaq byu pé mara hun bum akô nghut ri. ⁸Garai Gasang gi, shí

bê bang lé dum lhoq tui lhê gâ é hkyô lé, a wó lũm nghũ, haí mù myit yu akô lhú?

⁹Ngò le, Nazaret wà byũ Yesuq é myiing eq shai lhũm é dông myo myo wó kut rá nghut lhê nghũ, gè gè yhang myit yu wú bê nghut lhê. ¹⁰Gè gè haú dông le Yerusalem wà mó má kut wú bê nghut lhê; hkyangjong agyi pê chyáng mã é ahkáng wó yũ luí, ngò gi, sân-yúng bang myo myo lé htóng mã kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹Ngò gi, tarajong banshoq mã a lhing lhing yhangmoq lé dam byi luí, Yesuq lé rhoi dang tái kó shoq shikut wú bê nghut lhê; nhik mó góng yo luí, gó mau mã é wà pé lháng jé shoq, yhangmoq lé châng zing-rí wú bê nghut lhê.

Poluq Hpúng Byũ Dut Lo É Hkyô

¹²Haú hkũn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chũng mù, Damaskuq myuq shut e ló nyi le, ¹³Hkòhkâm wa ê, nyigũng tu ló zó lé, bui htoq mã je duq é maubó gi, haú hkyô mã, ngò eq ngá é luzúm wui é lhinghkyuq mã, mauhkũng mai duq bó htoq lo é lé myang ri. ¹⁴Haú hkũn, ngamoq banshoq bang myigũng mã lêng gop tô bum le, Hebre myíng dông, 'Sholuq, Sholuq, nàng, ngo lé haí mù zing-rí nyi lhê lhú? Zuchũn lé pik le gi, náng é matú gyai yhang wuí lhê.' ga luí, ngo lé tái é danghtê lé ngò wó gyô kat ri.

¹⁵Haú mù, ngò gi, 'Yhumsíng ê, nàng gi, ó yuq nghut lhê lhú?' nghũ luí, myi jáng, haú Yhumsíng tũ tái é gi, 'Nàng zing-rí nyi é Yesuq nghut lhê. ¹⁶Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tân shit shirâ nghut é hkyô pê é matú, ngá é mũ wùn rá byũ eq saksé dut nhâng rá dông nang lé hkyin to rá nghũ, ngò náng chyáng lé htoq shit é nghut lhê.

¹⁷Náng é amyû pê é loq mai le, tung-baù pê é loq mai le, ngò, nang lé hkyi yù nyi râ nghut lhê. ¹⁸Yhangmoq, yubak hkyut pyám byî é jeju wó yù râ eq, ngo lé lumjínj é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaù mai maubó shut, Tsadán é a-tsam hkaù mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyó

¹⁹Haù mù luí, hkohkâm Agripa ê, ngò gi, mauhkúng mà é myoqwup shing-rán haù lé a gyô é a wó é nyi nghut lhê. ²⁰Ngò gi, yhangmoq myit lhing luí, Garai Gasang shut lhing taù lò mù, myit lhing bê hkyô lé, hkyi zó loq zó dòng mai tân shit kó sháng gaq nghû, sân-hi má Damaskuq myuq má nyi é băng chyáng mai hí luí, Yerusalem wà mó mà é băng chyáng má le, Yuda mau gón mà é băng chyáng má le, tungbaù pê chyáng má le, hkô kyo bê nghut lhê. ²¹Hau é yanmai, Yudaq byu pé gi, ngo lé noqkuq yhùm má chyup yù luí, sat pyám râ da kô é nghut lhê. ²²Nghut kôlhang, ngò gi, hkû-nyí jé shoq Garai Gasâng èq garúm é lé wó yù luí, ahkuí shí má yap to mù, tiq ko banshoq bang lé saksé wó hkâm kyô é nghut lhê. ²³Ngò taí é má, Hkrisduq gi, hpuzo luí, shí bê bang mai sân-hi duí toq lô mù, Yhâng é amyû eq tung-baù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotú haí le a taí é nghut lhê." gâ ri.

²⁴Yhang haù su ga mara a bo é hkyô taí é lé, Hpestu gi, "Poluq ê, nàng na bê! Lùm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê. ²⁶Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê. ²⁷Hkohkâm Agripa ê, nàng gi, myiqhtoí pê é dang lé lumjínj lhê lhú? Nàng lumjínj é hkyô lé ngò sê lhê." ga tú taí ri.

²⁸Haù hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lhú?" ga taí ri.

²⁹Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lunglhang bang, ngò su dut râ matú, ngò gi, Garai Gasang lé kyûdùng nyi lhê." ga tú taí ri.

³⁰Haù hkûn, hkohkâm wa gi, ginwáng zau hpó eq Bernike le mù, haù má zùng tô é bang eq rahá toq yap ri. ³¹Yhangmoq htoq ló kô é hkûn, "Shí yuq gi, sat gíng é mara eq htóng lhung gíng é mara haí le a kut shut nghut ri." ga, rayuq eq rayuq taí lhum bum akò nghut ri.

³²Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

Poluq, Romaq Myuq Shut Wuì-sanghpo Mai E Ló É Hkyó

27 Ahkuí, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluí, yhangmoq gi, Poluq eq htongbyú góbang ra-am lé, Augustuq Hkosêng é gyewap mó mà é, Yuliu gâ é shô up gyezaù é loq má ap byî kat akò. ²Haù

hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng rà é hkyô lé yhâng é buinùm wuì mai lhom lajang byí kó sháng gaq ga, yhangmoq eq é hui rà matú ahkáng byí kat ri. ⁴Haù mai dum toq ló é hkûn, lài tau mut é yanmai, Kupru zinlóng lé lai hkaù uchyang jî lài ló mù, ⁵Kiliki eq Pamhpuli mau mâ é wuimau dông lài byit ló le, Laiki mau mâ é Mura myuq má jé bê nghut lhê. ⁶Haù má, shô up gyezau hpó gi, Itali ming shut dap e ló é, Alesandru myuq mâ é wuì-sanghpo lé myang hkyup luí, ngamoq lé haù má ji nhâng bê nghut ri. ⁷Haù mai buinyì myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, lài tau mut é yanmai, hí shut a wó lài ló lo mù, ngamoq gi, lài lé cháng luí, Kreti zinlóng lé lai hkaù mù, Salamone kongzô é tû tap âng é mai lài ló é nghut lhê. ⁸Haù mâ é wuiyàm mai awui ahke ji ló lé, Lasea wà eq a wê lhùm é Yuqyo é Guhkan gâ é jowò má jé ri.

⁹Ahkuí, buinyì tsómra lhoq lhai pyám luí, haù Zoshuq gám poi lai bê nghut é yanmai, wuì-sanghpo mai sô wún le gi, gyuq chiq rà nám jé bê nghut ri. Haù mù, yhangmoq lé Poluq tai pun tai kyíng é gi, ¹⁰“Áhkaù pé ê, shí dâm lhê é wui hkyô gi, wuìhke mó hui luí, wuì-sanghpo eq zè pé sùm pyám rà htoq agó, nga-nhúng é asak lháng sum rà dut é hkyô lé, ngò byu myang ri.” gâ ri. ¹¹Nghut kôlháng, shô up gyezau hpó gi, Poluq é dang lé gyo rà malaí, wuì-sanghpo hkâng sù eq

wuì-sanghpo yhumsing é dang lé, je lum ri. ¹²Guhkan haù gi, gyoqmyò[¶] wó lhoq lhai rà su a dut é yanmai, myo hpyang gi, Hponik guhkan má wó jé le jé mù, haù má gyoqmyò ló nyi lhai rà matú chòm myit hui akô. Guhkan haù gi, Kreti zinlóng má maupyí buiwàng hkyam eq mautsúng buiwàng hkyam shut hu tô é jowò nghut ri.

Wuimau Má, Laidun Mó Htàng Huí É Hkyô

¹³Maupyí shut mâ é lài yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yú kômù, Kreti zinlóng yâm dông jî e ló bê nghut lhê. ¹⁴Nghut kôlháng, hkâ-myháng a myáng má, Buihtoq mautsúng lài gâ é laidun mó gi, haù zinlóng mai mut lò luí, ¹⁵wuì-sanghpo lé lo mut htung é yanmai, hí shut a wó ló lo jáng, ngamoq gi, lài mut ló é shut châng yông ló bê nghut lhê. ¹⁶Ngamoq gi, Koda gâ é zinlóng zo lé lai hkaù uchyang yông ló nyi é hkûn, haù sakhkyílhai lé gyai shikut é èq wó lêng yù luí, ¹⁷wuì-sanghpo ahtoq má lêng toq to bê. Wuì-sanghpo lé gi, a byoq lo shoq tuí èq tuí kíng to bê nghut lhê. Dum, yhangmoq gi, Surti gâ é semuí bùm má ló kê gyám to rà lé chiq kô é yanmai, wuì-sanghpo mâ é panlong pé lé lhoq nyhum hkyô yù mù, châng yông ló bekò nghut ri. ¹⁸Laidun mó lúm htan é yanmai, htang nyí yhangmoq gi, hpugá zè pé lé hkyom dú hkyó pyám bekò nghut ri. ¹⁹Sum nyí nghu é nyí má, yhangmoq gi, wuì-sanghpo zè pé lé yhumsing é loq èq yhang hkyô pyám bekò. ²⁰Buinyì myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut rà nghu myit myoqbyu tô é hkyô lé, ngamoq tô pyám bê nghut lhê.

[¶]27:12 Gyoqmyò lé, haù mau má laidun mó lò lò dut mù, yông wún le gyuq chiq nám nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gûng má yap to mù, “Âhkaú pé ê, nungmoq ngá é dang gyo luí, Kreti zinlóng mai a htoq lô é nghut le gi, shí su htên byoq é marop hui zo rá a nghut. ²² Ahkuí nghut kôlháng, ngò taí é dang lé gyô yù mù myit wum yù keq; nungmoq mâ é hká yuq lé asak sum rá a nghut, wui-sanghpo za sheq htên byoq byuq rá nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi, ²⁴ 'Poluq ê, hkâgyuq, Kehtaq é hí má nàng wó yap rá nghut lhê. Wui-sanghpo shí má nàng eq rahá ji tô é lhunglháng bâng é asak lé, Garai Gasang gi, náng é yanmai, láí láí byi rá nghut lhê.' gâ ri. ²⁵ Hau é yanmai, âhkaú pé ê, myit wum yù keq, ngo lé taí kyô é eq rajung za dut lò rá nghut lhê nghú luí, Garai Gasang lé ngò lumjín nyi lhê. ²⁶ Nghut kôlháng, nga-nhúng gi, zinlóng ralhú lhum má ló htung chyap to rá nghut lhê.” ga luí, yhangmoq lé i-myt taí tîng ri.

²⁷ Buinyi raxe myi nyí myín má, gung-gâm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. ²⁸ Haú su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haú mù luí, luqmó má ló záng htung rá lé chiq kômù, yhangmoq gi, wui-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum akô nghut ri. ³⁰ Wui-sanghpo hkâng bang gi, wui-sanghpo lé tô pyâm to luí hpâng rá dâ é myit eq, wui sanghpo-u shut mâ é shamtoq goknghe pé lé lhoq hkyô rá su kut mhaú luí, sakhkyílhaí lé wui má lhoq hkyô nyi bum akô. ³¹ Haú mù, Poluq gi,

shô up gyezau eq gyezô pé lé, “Shí bang wui-sanghpo má a nyi le gi, nungmoq wó lut rá a nghut.” ga taí ri. ³² Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo rá matú myit wum byí é gi, “Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê. ³⁴ Haú mù luí, zoshuq rajung jung zo keq! Haú gi, nungmoq wó lut rá matú nghut lhê. Nungmoq chyâng mâ é ó yuq é xâm rahkat lháng byuq rá a nghut.” gâ ri. ³⁵ Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri. ³⁶ Haú hkûn sheq, banshoq bang gi, myit wum wó yú kômù, zoshuq zô bùm bekô nghut ri. ³⁷ Wui-sanghpo haú mâ é byù lhunglháng gi, í sho nyhit xe hkyuq yuq nghut lhê. ³⁸ Yuq hkangmó bàn zô gyí é htâng má, wui-sanghpo sóm rá matú, sungso pé lé wui má dú kat pyâm akô nghut ri.

Wui-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlháng, semuif-jàng chyûn ralhú lé byu myàng kôluí, wó dut é nghut jáng, haú má sanghpo lé kôn gyam rá matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wui-sanghpo ulhum mâ é panlong lé lhoq toq yù mù, lài hkyô cháng luí wuiyàm shut mut ló bê nghut ri. ⁴¹ Nghut kôlháng, semuif lo bum tô é jowò ralhú má, wui-sanghpo ló htung chyap byuq luí, sanghpo u gi, a wó dú lo mù, sanghpo htâng lé gi, wuillheng èq lò bat hkyop myha pyâm bê nghut ri.

⁴² Haú hkûn, gyezô pé gi, htongbyú pé wuili lí hpang byuq kó rá lé gyuq

kô é yanmai, yhangmoq lé sat pyám râ chôm dâ akô. ⁴³ Nghut kôlhang, shô up gyezau hpô gi, Poluq lé hkyi yù naù luí, yhangmoq dâ é hkyô lé hkúm pyám mù, wuili dat li bang gi, wui má byam gyó luí wuiyàm shut hí li dap ló kó sháng ga luí le, ⁴⁴ góbang gi, siklong eq wui-sanghpo mâ é gotû zè pé má zui mù, gu dap ló sháng ga le, hkunmô hkyô kat ri. Haù dông mai lhunglhang bang gi, wuiyàm shut rago wó jé dap ló bekô nghut ri.

Malata Zinlóng Má Jé Nyi Tô É U Lhê Hkyô

28 Ngamoq wó lut dap ló jáng sheq, zinlóng haù gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkúlum yu akô. ³ Haù hkún, Poluq gi, htang rawaq guq tsing yù mù, myihkyóm má kat kat é hkún, myi soq htan lò jáng, duq htân lhangmuì radu gi, htoq ló mù, yhang é loq má htê zing tô ri. ⁴ Zinlóng byu pé gi, Poluq é loq má lhangmuì haù htê lhang tô é lé myàng kôjáng, “Shí yuq gi, gè gè yhang byù sat é sù teng râ dut ri; wui mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!” ga luí, rayuq eq rayuq taí lhum bum akô nghut ri. ⁵ Poluq kúm gi, lhangmuì haù lé myihkyóm má ko hkyô kat luí, haí le a dut é za nyi tô ri. ⁶ Yhangmoq gi, yhanggùng wâm lò berâ, haù a nghut jáng, byodàn ratung shi hkyaq lêng lò berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haí le a dut lo é lé myàng kôjáng, yhangmoq é i-myt dum htaí pyám kôluí, shí yuq gi, hparâ rayuq sheq nghut ri ga dum taí bum akô nghut ri.

⁷ Hau é nàm má, zinlóng agyì hpô Popli sing é maumyí pé joq tô ri. Haù yuq gi, ngamoq lé lhom te yù mù, yhang

yhùm má sum nyí yhang lalúm la-nye lhom hkúlum yu ri. ⁸ Haù u lé, Popli é yhangwa gi, aì nyé no nyi é eq wuiwam shun leq tô ri. Poluq gi, haù yuq chyáng wàng mù, kyúdung byi luí, yhang é ah-toq má loq ke byi mù, yhang lé lhoq gè byí ri. ⁹ Haù su dut é yanmai, zinlóng mâ é nò byù góbang banshoq le, lé luí lhoq gè byí é hui bekô nghut ri. ¹⁰ Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo ji mù, dum toq ló râ hkún, ngamoq râ é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, “Hparâ zozúm nhik-tâng” gâ é alhò dap é wui-sanghpo má, ngamoq wang jì htoq ló bê nghut lhê. Wui-sanghpo haù gi, gyoqmyò lé zinlóng haù má joq laí é nghut ri. ¹² Surakusa wà mó má jé jáng, haù má ngamoq sum nyí nô yu é nghut lhê. ¹³ Haù mai jì xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴ Haù mâ é gumang wui ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htàng, Romaq myuq má jé lô bê nghut lhê. ¹⁵ Haù mâ é gumang wui gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bìng Yhùm Sùm Lhum gâ é wà jé shoq lé akô. Poluq gi, haù bang lé lhom myàng jáng, Garai Gasang lé hkyá-on kungtôn mù, myit wum wó yú bê nghut ri. ¹⁶ Ngamoq, Romaq myuq má jé wang ló é hkún, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyì sum nyí laí é htàng má, Poluq gi, haù mâ é Yudaq suwún wui lé ji yu

ri. Yhangmoq jé lé bûm kôjáng, yhang gi, “Gumang wuì ê, ngò gi, nga-nhûng é amyù lé le, íchýí îwa pê é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byí kat é hui bê nghut lhê. ¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akò nghut ri. ¹⁹ Nghut kôlhang, haú lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haú nghut kôle, ngá amyù lé mara hûn râ jowò joq é yanmai gi, a nghut. ²⁰ Haú mù luí, Israelaq amyù é myit myoqbyù hkyô^{§§} é yanmai, shí shamtoq-tuí èq tuí é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê.” ga luí, yhangmoq lé taí ri.

²¹ Haú hkûn, yhangmoq gi, “Náng é hkyô eq séng luí Yuda mau mâ é laiká ngamoq a wó yû nghut ri. Haú mai lé é gumang wuì ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shí nàng lom é hpúng gi, jowò hkangmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri.” ga tû taí akò.

²³ Yhangmoq gi, yhang eq huí kún râ buinyi dîng to kôluí, yhang bíng é yhûm má byù myo myo lé zîng bum akò. Haú hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pê é dang má cháng mù, yhangmoq lé shikut luí, Yesuq é hkyô taí pun taí kyîng ri. ²⁴ Yhang taí é hkyô lé, ra-am gi, lumjîng bum akò; ra-am kúm gi, a lumjîng kó nghut ri. ²⁵ Yhangmoq

rayuq eq rayuq haú su myit a huí lhûm bûm kô é yanmai, Poluq gi, yhangmoq lé, “Chyoiyúng Woi-nyí, Myiqhtoi Esai-aq é nhut mai nungmoq é íchýí îwâ pé lé taí é dang gi, gyai yhang têng ri. Dang haú gi,

²⁶ Byù haú hú chyáng ê mù,

“Nungmoq gyô tsuq to kôlhang, sê gyo kó râ a nghut;

wú tsuq to kôlhang, wú sé kó râ a nghut.”; nghû ê taí aq.

²⁷ Hkâsu mù gâ le, amyù shi é i-myt gi, htan byuq luí,

yhangmoq é nohkyap gi, htu byuq bê nghut ri;

yhangmoq é myoq gi, chûm byuq bê nghut ri;

haú a nghut le gi, yhangmoq é myoq èq myàng mù,

yhangmoq é nohkyap èq wó gyo luí,

yhangmoq é i-myt má sê hkyâng kômù, ngá chyáng lhing lò kôluí, ngò yhangmoq lé lhoq gê byi berâ nghut lhê.[¶]

gâ ri.

²⁸ Haú mù luí, shí Garai Gasâng é hkyi yù hkyô lé, tûngbaù pê chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyí keq ô!” ga luí, danghkun haú taí kat é htâng má, yhangmoq gi, htoq ló byuq bùm bekò nghut ri. ²⁹ (Poluq haú su ga taí é htâng má, Yudaq byu pé gi, yhangmoq yhangchang dang jet jet lhum uchyang ló byuq bekò nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.

³¹ Haú mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq séng é hkyô lé mhoqshit byí ri; yhang lé, ó le a hkûm zing to kó nghut ri.

§§28:20 Israelaq amyù é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

¶28:27 Esai 6:9,10

ROMAQ

Pê Chyáng Hun Kat é Laiká

(Romans)

1 Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má, ²Garai Gasang gi, hí hí mai Yhâng é myiqhtoí pé đông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú jì yu é bang banshoq lé, dang kyô kat lhê. ³Yhâng é Yuqzo haú gi, byù hkyam đông ga jáng, Dawiq é awut ashín nghut ri; ⁴Yhang gi, shi é mai dum dui toq é đông, Garai Gasâng é Yhangzo nghut é hkyô lé, chyoiyúng hkyo é Woi-nyí đông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri. ⁵Yhang đông mai le, Yhâng myíng é matú le, ngamoq gi, byù myú chângjup mai byù ji yù mù, lumjíng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

⁷Nga-nhúng é Íwa Garai Gasang eq Yhumsing Yesuq Hkrisduq chyáng mã é jeju eq nguóngon hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸Nungmoq é lumjíng hkyô lé, mingkan gón má tai pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai

Gasang lé, jeju hkya-on lhê. ⁹Ngá é kyúdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq eq dojaú é Garai Gasang gi, ngá é saksé nghut lhê; ¹⁰Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹²Haú su nghu é gi, nga-nhúng rayuq eq rayuq é lumjíng hkyô đông mai, nungmoq eq ngò, myit wum byí é hui râ matú nghut lhê. ¹³Gumang wui ê, ngò gi, haú tungbaù pê chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghu adàm dàm dà wú é nghut kôlhang, ahkuí jé shoq hkùm tang pyám huí é hkyô lé, nungmoq lé sé nhâng nau ri.

¹⁴Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵Haú nghut é yanmai, ngò gi, Romaq myuq mã é bang nungmoq lé le, haú gabú danglù gyai yhang hko kyo nau nyi é nghut lhê.

¹⁶Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sân-hi má Yudaq byu pé, hau htâng tungbaù pé má, lumjíng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsam nghut lhê. ¹⁷Hkâsu mù gâ le, lumjíng myit mai wó yú luí, lumjíng myit má gíng nyi é, Garai Gasâng chyáng mã é dingmán hkyô lé gi, gabú danglù haú má hpông shit bê nghut ri. Haú gi, “Haú dingmán sù gi, lumjíng myit mai

asak duì rã nghut lhê.¹⁸ ga kã tô é eq rajung za nghut ri.

Xângzo Byu Pê Htoq Má Garai Nhikmo-yô É Hkyô

¹⁸ Haù tengmán hkyô lé, yhumsing é agè ashop hkyô èq zik hkùm pyâm é byu pê é agè ashop hkyô eq garai a bo é hkyô pé banshoq htoq má, mauhkung mai Garai Gasâng é nhikmo-yo hkyô lé hpông shít bê nghut ri. ¹⁹ Haù mù gã le, Garai Gasang gi, Yhang eq sêng é hkyô, yhangmoq lé san za tũn shít bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkãsu mù gã le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sãmlai lé gi, san za wó myâng, wó sê gyô é nghut lhê. Haù mù luí, byu pé gi, mara mai wó he lut rã hkyô a joq lo nghut ri.

²¹ Haù mù gã le, yhangmoq gi, Garai Gasang lé sê to kôlhang, Yhang lé Garai dông a shigyáu kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri. ²³ Haù mù, htên byoq a sê é Garai Gasâng é hpungwup shing kang lé, htên byoq sê é byù zông, nghoq lhô, dusak lhô eq yê jung dusak lhô pê èq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó rã matú, a san-sêng é gungsho zùm-yap hkyô kut rã nghut é, yhangmoq é yut yut ô nau é i-myit má, yhangmoq lé ap pyám bê nghut ri. ²⁵ Yhangmoq gi, haù Garai Gasâng é

tengmán hkyô lé, mhaù é hkyô èq htaí lhik pyám kômù, hpân Sù lé noqkuq do-jaú rã malaí, mhaù hkyô nghut é hpan tô é zè pé lé noqkuq mù, dojaú akô nghut ri. Hpân Sù haù gi, ahtum abyuq hkya-on hui sù nghut ri. Amen.

²⁶ Haù nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyám bê nghut ri. Yhangmoq é myiwe wui lháng gi, htũng akying lé tô pyám kômù, haù eq shai é dông htaí lhik pyám nyi akô nghut ri. ²⁷ Haù eq rajung za, yuqgè wui le, myiwe wui eq zum é htũng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haù Garai Gasang lé sê é hkyô gi, akyù bo é a nghut ga yhangmoq myit yù kô é yanmai, a kut âng é hkyô kut nhâng rã matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agaù hkyô ajung jung, agè ashop hkyô, myoqnoq hkyô eq a jú lhùm é hkyô pé byíng jup tô é bang dut bekô nghut ri; manon é, byù sat é, mabyoq jishùm htoq é, mhaù zô é eq myit goí bo é pé le byíng bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut rã hkyô lhoq htoq é bang, mó wui é jìno a gyô é bang nghut akô. ³¹ Yhangmoq gi, a gying a hâng é bang, gidìq a zung é bang, chyit myit a bo é bang, shogyo nhikmyin a sê é bang nghut akô. ³² Haù pé lé kut é bang gi, shí gíng lhê gã é, Garai Gasâng é dingmán tarã joq é lé, yhangmoq sê to kôlhang, haù pé lé, yhangmoq xoq kut nyi kô é

htoq agó, haú hkyô lé kut é bang lé le, hkya-on waq toq akô nghut ri.

Garai Gasang Tarâ Jéyáng É Hkyô

2 Haú mù luí, góyuq lé tarâ jéyáng é sù nàng ê, nàng gi, mara mai wó he lut rà hkyô a joq lo; hkâsu mù gà le, nàng yhang jéyáng nyí luí, mù haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byí nyi bê nghut ri. ² Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sù nàng ê, nàng gi, Garai Gasang é tarâ jéyáng hkyô mai wó h pang lut rà su ngam nyi lhê lú? ⁴ Haú a nghut jáng, nàng gi, Garai Gasang é ge é hkyo èq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lú?

⁵ Nghut kôlhang, náng é myit htân hkyô eq myit a lhing é nhiklhûm é yanmai, haú Garai Gasang dingmán é dông tarâ jéyáng shit rà nghut é, Yhâng é nhikmo-yô é buinyi má hkâm zo rà nhikmo-yo hkyô lé, yhumsing gûng yhang hkong tô nyi bê nghut ri. ⁶ Garai Gasang gi, yuq hkangmó lé, ó le ó kut é má châng luí, hkâm zo nhâng rà nghut lhê. ⁷ Jân shirâng mù, ge é hkyô kut nyi é dông, hpungwup shing kang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi rà nghut lhê. ⁸ Nghut kôlhang, haú yhumsing wuízat hkyô za hô luí, tengmán hkyô lé he-ngik pyâm mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé rà nghut lhê. ⁹ Wuíhke hkyô eq iyon yon hkyô gi, agè ashop kut é xângzo byù yuq

hkan gmó chyáng jé rà nghut lhê; sâng-hi má Yudaq byu pê chyáng jé mù, tûngbaù pê chyáng le jé rà nghut lhê. ¹⁰ Nghut kôlhang, hpungwup shing kang, aróng eq nguín gón hkyô gi, haú ge é hkyô kut é bang yuq hkangmó chyáng jé rà nghut lhê: sâng-hi má Yudaq byu pê chyáng jé mù, tûngbaù pê chyáng le jé rà nghut lhê. ¹¹ Hkâsu mù gà le, Garai Gasang gi, myoqdong a hkyin é Sù nghut lhê.

¹² Haú jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó rà nghut lhê. Haú jep é tarâ hkaú má mara kut shut é bang lhunglhang gi, jep é tarâ dông jéyáng é hui zo kó rà nghut lhê.*

¹³ Hkâsu mù gà le, haú jep é tarâ lé wó gyô é bang lé, Garai Gasang é hí má dingmán bang gà é a nghut é za, jep é tarâ lé châng kut é bang za sheq, dingmán bang gà é hui rà nghut lhê. ¹⁴ Haú jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gûng yhumsing é matú tarâ dut bekô nghut ri. ¹⁵ Yhangmoq gi, haú jep é tarâ hkyô pé lé, yhangmoq é i-myit unghkaú má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byí nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri.

¹⁶ Haú hkyô gi, ngò taí pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasang èq tarâ jéyáng é buinyi má dut rà nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haú jep é tarâ lé lumhkau nyi é eq Garai Gasang lé xoq é hkyô má nghutbûn nyi

*2:12 Haú jep é tarâ lé a sê bang gà é gi, tûngbaù pé lé gà é nghut luí, haú jep é tarâ hkaú má é bang gà é gi, Yudaq byu pé lé gà é nghut lhê.

é sù; ¹⁸Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gâm hkoq é sù; ¹⁹haû jep é tarâ má, hpaqchyî eq tengmán hkyô é alik wó sù nghut é yanmai, haû myoqjit bâng é matú hkyô-u shê sù eq mauchut hkaû mâ é bâng é matú maubó nghut sù; ²⁰byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹nàng, góbang lé mhoq byi sù nhîng, yhumsing gùng yhumsîng a mhoq yû lú? A wó hkau ga hko taí luí nhîng, nàng gi, hkaû lhê a nghut lú? ²²Su-myi sulàng lú hkyô a wó kut ga byu pé lé taí luí nhîng, nàng gi, su-myi sulàng lú hkyô kut lhê a nghut lú? Hpara lhô lé a jú dik sù nàng gi, no-qquq yhûm lé hpoyoq zo hpoyoq shuq nyi lhê a nghut lú? ²³Jep é tarâ eq séng luí nghutbun sù nàng gi, haû jep é tarâ lé lu laí é dông, Garai Gasang lé a hkungga kut lhê a nghut lú? ²⁴Haû gi, “Garai Gasâng é myîng gi, nungmoq é yanmai, tûngbaù pê chyáng lhoq hpoî pyâm é huí ri.”^k ga kê tô é eq rajung za nghut ri.

²⁵Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri. ²⁶Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lhê a nghut kó lú? ²⁷Kâ tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

²⁸Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹Ahte myit hkaû má Yudaq byù nghut

sù za, Yudaq byù kyîng nghut lhê. Kâ tô é tarâ dông a nghut é za, Woi-nyî eq myit má ahpyo-kuq hpyit é gi, ahpyo-kuq hpyit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

Garai Ê Lhumzui Hkyô

3 Haû dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú? ²Hkyô hkangmó má gyai akyû bò lhê! Je hí má gi, haû Garai Gasâng é mungdang lé yhang, yhangmoq lé ap byi bê nghut ri.

³Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú? ⁴Hká dông le a wó dut!

“Haû mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ûng râ nghut lhê.”¹

ga kê tô é eq rajung za, byù yuq hkangmó gi, byù-mhaû dut kôlhang, Garai Gasang gi, tengmán nyî sháng gaq.

⁵Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dông taí htîng é nghut lhê.) ⁶Rat-suí lháng a nghut! Haû su ru nghut le gi, haû mingkan lé, Garai Gasang hkâsu wó jéyáng râ lú? ⁷Rayuq yuq, “Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhîng, haí mù luí, ngò, yubak byù rayuq dông mara byí é hui zô nyi ra

shirâ l hú?" ga taí dang-rháng râ nghut lhê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghú haí mù a taí kô é l hú? Dang haú lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

Dingmán Byù A Nyì

⁹ Haú jáng, hkâsu nghú lo râ l hú? Nga-nhúng gi, je gè bang nghut lhê l hú? Ratsuí l háng a nghut. Yudaq byù nghut nghut, túngbaù pé nghut nghut, yubak mara hkaú mâ é bang chyat nghut lhê nghú, ngamoq taí san kyô wú bê nghut lhê. ¹⁰ Chyúmdang má kâ tô é le,

"Dingmán é byù a nyì, rayuq l háng a nyì nghut ri;

¹¹ Sê gyô é byù rayuq le a nyì, Garai Gasang lé ho é byù le a nyì nghut ri;

¹² Lhungl háng bang gi, l hing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyì, rayuq l háng a nyì nghut ri."^m

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaú akô."ⁿ

"Yhangmoq é nhutwuí pé má gi, shíduq bò lhangmuí é duq dap bum ri."^o

gâ tô ri.

¹⁴ "Yhangmoq é nhut pé gi, nhing myíng nhing htê eq myit nò danghko baú byíng zan tô ri."^p

gâ tô ri.

¹⁵ "Yhangmoq é hkyí pé gi, byù sat sui lhoq htoq râ matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuíhkê é ahkô tông tô é nghut mù,

¹⁷ nguóngón é hkyô lé gi, yhangmoq a sé kó nghut ri."^q

gâ tô ri.

¹⁸ "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."^r

gâ tô ri.

¹⁹ Byù yuq hkgangmó é nhut gi, tú taí jang a joq dut byuq mù, mingkan gón gi, Garai Gasâng é hí má mara bo é bang dut nyì sháng gaq ga, haú jep é tarâ má taí é lhungl háng gi, jep é tarâ ô má nyi é bang lé taí é nghut é hkyô lé, nga-nhúng sê lhê. ²⁰ Haú mù luí, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

Lumjínng Jáng, Dingmán Sù Wó Dut É Hkyô

²¹ Ahkuí kúm gi, jep é tarâ dông a nghut é za, haú jep é tarâ eq myiqh-toi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. ²² Garai Gasâng chyáng mâ é dingmán hkyô haú gi, Yesuq Hkrisduq lé lumjínng é dông mai nghut mù, lumjínng bang banshoq htoq má jé é nghut lhê. Gamhkuí é hkyô a joq. ²³ Hkâsu mù gâ le, lhungl háng bang gi, yubak mara kut shut bê bang chyat nghut mù, Garai Gasâng é hpung-wup shíngkang lé a hkyit hkap byuq lo kó nghut ri. ²⁴ Ahkuí kúm gi, Hkrisduq Yesuq mai lo é hkyi yù hkyô dông, Garai Gasâng é jéjú èq, mara hkyut san byí é laí laí wó hui bê nghut ri. ²⁵ Garai Gasang gi, Yesuq é sui lé lumjínng bâng matú, shíhtaí gunglik hkungga ralhúmdông, Yesuq lé byí pyám bê nghut ri. Haú gi, laí lò bê yubak mara lé lhut pyám byi shoq, Garai Gasang myit hîng byi bê nghut é

^m3:12 Hkya-on 14:1-3 ⁿ3:13 Hkya-on 5:9 ^o3:13 Hkya-on 140:3

^p3:14 Hkya-on 10:7 ^q3:17 Esai 59:7-8 ^r3:18 Hkya-on 36:1

yanmai, Yhâng é tengmán hkyô lé tûn shit é nghut ri. ²⁶ Garai Gasang haû su kut é gi, Yhânggùng yhang dingmán Sû nghut é eq, Yesuq lé lumjîng é sù lé mara hkyut san byî é Sû nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

²⁷ Haû su nghut jáng, nghutbun jowò joq ri lúhú? A joq. Hai tarâ mai a joq dut byuq é lúhú? Haû jep é tarâ châng é yanmai nghut lhê lúhú? A nghut, lumjîng hkyo é yanmai sheq a joq dut byuq é nghut lhê. ²⁸ Hkâsu mù gâ le, byù gi, haû jep é tarâ châng é đông a nghut é za, lumjîng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pê é Garai Gasang za nghut lhê lúhú? Tungbaù pê é Garai Gasang le a nghut lúhú? Nghut lhê, tungbaù pê é Garai Gasang le nghut lhê. ³⁰ Hkâsu mù gâ le, Garai Gasang gi, rayuq za nghut é yanmai, rajung za lumjîng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jáng, nga-nhúng gi, lumjîng myit hau eq, jep é tarâ lé lhoq hpoí pyám râ lúhú? Ratsuí lháng a nghut! Nga-nhúng gi, jep é tarâ haû lé lhoq ging tîng é bang ru nghut lhê.

Abraham, Mara Hkyut San Huí É Hkyô

4 Haû su nghut jáng, nga-nhúng é ichyí iwa Abraham gi, haû hkyô mai haí wó sê yu ri nghú, taí râ lúhú? ² Abraham gi, zui saí é đông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhang, Garai Gasâng é hí má gi, yhang haû đông a nghut. ³ Chyúmdang má hkâsu gâ tô ri lúhú gâ le, “Abraham gi, Garai Gasang lé lumjîng bê nghut mù,

yhang lé, dingmán sù ga són byi bê nghut ri.”^s gâ ri.

⁴ Zui saí é sù gi, yhâng é zuihpau lé, chyunghuq đông wó yu é a nghut é za, wó yù gíng luí, wó yu é ru nghut lhê. ⁵ Nghut kôlhang, zui saí é hkyô đông a nghut é za, haû agè ashop hkyô lé mara hkyut san byî é Garai Gasang lé lumhkau é sù gi, yhâng é lumjîng myit é yanmai, dingmán sù ga són byi huí é nghut lhê. ⁶ Haû eq rajung za, yhang zui saí é hkyô đông a nghut é za, Garai Gasâng eq dingmán sù ga són byi huí é, Garai Gasâng chyáng mã é shimân jeju wó é sù eq séng luí, Dawiq taí é gi,

⁷ “Tarâ lu lai é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri. ⁸ Bo tô é mara lé, Yhumsing eq mara a són byî é hui sù gi, hkungsô wó nyi ri.”^t gâ ri.

⁹ Haû sù é jeju gi, ahpyo-kuq hpyit hkâm bâng é matú za nghut lhê lúhú? Ahpyo-kuq a hpyit bâng é matú le nghut lhê lúhú? Hkâsu mù gâ le, Abraham é lumjîng myit lé, dingmán sù ga són byi bê nghut lhê nghú, ngamoq taí nyi bê nghut lhê. ¹⁰ Haû su són byî é gi, hkânhám nghut lhê lúhú? Ahpyo-kuq hpyit hkâm é htâng má lúhú? A nghut jáng, hí má lúhú? Haû gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkún mai, lumjîng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjîng é lhungl-hâng bang lé dingmán bang ga són byi é wó hui râ matú, haû bâng é iwa dut bê nghut ri. ¹² Haû ahpyo-kuq hpyit hkâm é za a nghut, nga-nhúng é iwa Abraham,

ahpyo-kuq hpyit a hkam yù shi má wó é lumj́ing hkyo é hkyî-kám lé cháng luí ahpyo-kuq hpyit bâng é îwa le, yhang nghut ri.

¹³ Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumj́ing hkyô mai lo é dingmán hkyô dông ru nghut lhê. ¹⁴ Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumj́ing hkyô gi, akyû a bo é eq, danggidiq gi, hpau a dap é dut byuq lhê. ¹⁵ Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haû mù luí, danggidiq gi, Abraham é awut ashín lhunglhang bâng chyáng, jeju mai za lo é eq gingt́ing nyi é dut sháng gaq ga, lumj́ing hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumj́ing hkyô má lòm bâng é matú le nghut lhê. Abraham gi, nga-nhúng lhunglhang bâng é îwa nghut ri. ¹⁷ “Ngò gi, nang lé, byù myû myo myô é îwa dut nhang bê.”^u ga kâ tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumj́ing é sù Garai Gasâng hí má, Abraham gi, nga-nhúng é îwa nghut lhê.

¹⁸ “Náng é awut ashín pé le, haû eq rajung za myô lò râ nghut lhê.”^v ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumj́ing luí myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumj́ing myit a yom byuq nghut ri. ²⁰ Hau htoq agó, Garai Gasâng é danggidiq eq séng

luí, a lumj́ing a dut é eq hê myit mhô myit a dut é za, yhâng é lumj́ing myit lé saí lhoq ging t́ing mù, Garai Gasang lé hkya-on kungtôn luí, ²¹ Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, “Yhang lé, dingmán sù ga són byi bê nghut ri.”^w gâ tô é nghut lhê. ²³ “Yhang lé, són byi bê.” ga, kâ tô é dang gi, yhang é matú za a nghut, ²⁴ nga-nhúng é Yhum-sing Yesuq lé, shi é mai lhoq dui toq yû sù Garai Gasang lé lumj́ing luí, Yhang èq dingmán bang ga són byi râ nghut é, nga-nhúng é matú le nghut lhê. ²⁵ Yhum-sing Yesuq gi, nga-nhúng é yubak marâ é matú, shî hkám byi râ dông ap pyâm é hui luí, nga-nhúng, mara hkyut san byî é hui râ matú, lhoq dui toq é hui bê nghut ri.

Nguingón Hkyô Eq Gabú Hkyô

5 Haû mù luí, nga-nhúng gi, lumj́ing é dông mai mara hkyut san byî é hui bê nghut é yanmai, nga-nhúng é Yhum-sing Yesuq Hkrisduq dông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuí wó yu to bê jeju shî má, lumj́ing luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê. ³ Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byî tô é Chyoiyúng Woi-

nyí dông, nga-nhúng é i-myyit unghkaú má hut kat byi bê nghut ri.

⁶Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri. ⁷Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlháng, byù gè rayuq é matú kúm gi, wám shî hkám é byù nyi sê lhê. ⁸Nghut kôlháng, nga-nhúng gi, yubak dap bang nghut nyi ashî hkún, nga-nhúng é matú Hkrisduq shî hkám byí é má, Garai Gasang gi, Yhâng é chyyit-dap myit, nga-nhúng lé shit byi bê nghut ri.

⁹Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. ¹⁰Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byí é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lhê. ¹¹Haú su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹²Byù rayuq dông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú dông mai, byù lhunglhâng bang gi, yubak dap bang chyat nghut byuq mù, shî-nò hkyô gi, byù lhunglháng bâng chyáng jé bê nghut ri. ¹³Hkâsu mù gâ le, haú jep é tarâ lé a byi shimá, yubak mara gi, mingkan má joq to bê nghut lhê. Nghut kôlháng, jep

é tarâ a joq shî é hkún gi, yubak mara lé mara su a ngàm shî é nghut lhê. ¹⁴Haú su ga kôlháng, Adam su hkunmó lé lu lai é dông mara a kut shut bâng é ahtoq má lháng, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵Nghut kôlháng, jeju chyunghuq gi, haú mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung!

¹⁶Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlháng, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷Hau htoq agó, byù rayuq tarâ lu lai luí, haú rayuq é yanmai, shî-nò hkyô up nyi bê nghut lhê, ahkuí kúm, haú Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duí hkyô má uphkanq nyi kó râ nghut lhê.

¹⁸Haú mù luí, tarâ lu lai é hkyô ral-hûm é yanmai, byù lhunglhâng bang gi, mara dam byí é hui zo kô é su, dingmán hkyo é muzó ralhûm é yanmai, byù lhunglhâng bang gi, asak duí hkyô eq sêng é mara hkyut san byi hkyô lé wó bê nghut ri. ¹⁹Hkâsu mù gâ le, byù rayuq jîno a gyô é yanmai, myo myo gi, yubak dap bang dut byuq é su, byù rayuq jîno gyô é yanmai, myo myo gi, dingmán bang gâ é hui kó râ nghut lhê.

²⁰Haú jep é tarâ jat é gi, tarâ lu lai hkyô je myo râ matú nghut lhê. Nghut kôlháng, yubak mara myô jat é hkún,

jeju gi, je riyhang myô jat lo é nghut lê.
²¹Haû mù, yubak mara gi, shî-nò hkyô
 dông uphkâng bê su, jeju gi, nga-nhúng
 é Yhumsîng Yesuq Hkrisduq é yanmai,
 ahtum abyuq é asak wó byí é dingmán
 hkyô dông up râ nghut lê.

Hkrisduq Eq Rading Ralhum

6 Haû nghut jáng, nga-nhúng gi, hkâsu
 nghû taí râ lú? Jeju myô jat lò
 sháng gaq nghû, nga-nhúng, yubak mara
 kut xoq nyí râ lú? ²Haû su a nghut
 sháng gaq! Nga-nhúng gi, yubak mara eq
 shi gang bê bang nghut lê; hkâsu mù
 haú má wó dui nyi lo râ lú? ³Hkrisduq
 Yesuq eq rading ralhum za dut râ matú,
 wui-myhup hkâm yù bê bang nga-nhúng
 banshoq gi, Yhâng é shî hkám hkyô má
 le rading ralhum za dut râ matú, wui-
 myhup hkâm yù bê nghut é lé, nungmoq
 a sé kó lú? ⁴Haû mù luí, Hkrisduq gi,
 Íwâ é hpungwup shingkâng eq, shî bê
 mai lhoq dui toq huí é su, nga-nhúng
 le, asak asik dông wó dui nyí sháng gaq
 nghû, nga-nhúng gi, wui-myhup hkâm é
 dông, Yhang eq rahá, shî hkâm é eq my-
 hup yhum é hui bê nghut lê.

⁵Nga-nhúng gi, Yhang shî hkám é
 hkyô má, Yhang eq rading ralhum za dut
 bê nghut jáng, Yhâng é dum dui toq hkyô
 má le, Yhang eq rading ralhum za hkyak
 dut râ nghut lê. ⁶⁻⁷Hkâsu mù gâ le, shí
 bê sù gi, yubak mara mai lhoq lhut é hui
 bê nghut é yanmai, nga-nhúng gi, yubak
 marâ é jùn dut nó a ra lo mù luí, yubak
 mara gùng gi, lhoq htên pyâm é hui râ
 matú, nga-nhúng é byù xau gi, Yhang eq
 rahá jén sat pyâm é hui bê nghut é hkyô
 lé, nga-nhúng sê lê.

⁸Haû mù, nga-nhúng gi, Yhang eq
 rahá shî hkám bê nghut jáng, Yhang eq
 rahá dui nyí râ nghut lê nghû, lumjúng
 lê. ⁹Hkâsu mù gâ le, Hkrisduq gi, shî
 bê mai lhoq dui toq é hui bê nghut mù,
 Yhang gi, dum wó shi lo râ a nghut é lé,
 nga-nhúng sê lê; shî-nò hkyô gi, Yhang

lé hkâ-nhám le wó sing to râ a nghut lo.
¹⁰Yhang shî hkâm é shî-nò hkyô gi, ban-
 shoq bâng é matú, yubak mara eq séng
 luí radâm za shî hkám byi bê nghut ri;
 nghut kôlhâng, Yhang dui nyi é asak gi,
 Garai Gasâng hí má dui nyi é nghut lê.

¹¹Haû eq rajung za, nungmoq gi,
 yubak mara eq shi gang luí, Hkrisduq
 Yesuq dông Garai Gasâng é matú asak
 dui nyi lê nghû, sôn yù keq. ¹²Haû mù
 luí, nungmoq é htên byoq sê é gungđu
 má, yubak mara lé hkâ-uphkâng nhâng,
 uphkâng nhâng kô é nghut jáng, gungđu
 yut yut ô nau é agè ashop hkyô lé,
 nungmoq châng é nghut bê. ¹³Nungmoq
 é gungđu showui showang pé lé, agè
 ashop hkyo é chùng zè pé dông yubak
 mara má hkâ-ap byí pyâm kó, shí bê mai
 lhoq dui toq yù huí é bang su, yhumsing
 gùng yhumsîng, Garai Gasâng chyáng
 kúm ap byi keq; nungmoq é gungđu
 showui showang pé lé, dingmán hkyo é
 chùng zè pé dông, Garai Gasâng chyáng
 ap byi keq. ¹⁴Hkâsu mù gâ le, nungmoq
 gi, jep é tarâ hkaû má a nghut lô é za, jeju
 hkaû má nghut nyí bekô yanmai, yubak
 mara gi, nungmoq lé sîng sù wó dut râ a
 nghut lo.

Dingmán Hkyo É Jùn Pé

¹⁵Haû jáng gi, hkâsu kó lú? Nga-
 nhúng gi, jep é tarâ hkaû má a nghut lo
 é za, jeju hkaû má nghut nyí bekô yan-
 mai, mara wó kut shut kó râ lú? Haû
 su a wó kut! ¹⁶Nungmoq gi, rayuq yuq é
 jîno gyo râ matú, yhumsing gùng lé jùn
 pé dông ap pyâm é hkún, shî-nò hui râ
 nghut é yubak marâ é jùn dông nghut
 kôlhâng, dingmán hkyô wó râ nghut é
 jîno gyo hkyô nghut kôlhâng, nungmoq
 châng nyi é nghut le gi, nungmoq, haû
 é jùn dut bê lé, a sé kó lú? ¹⁷Nung-
 moq gi, yubak marâ é jùn dut wú bê
 bang nghut kôlhâng, nungmoq hkam yu
 to bê mhoqshit hkyô lé, nungmoq é myit
 nihklhum banshoq eq cháng bekô nghut

é yanmai, Garai Gasang lé jeju hkya-on sháng. ¹⁸Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ đông ngò táí râ ga jáng: nungmoq gi, nungmoq é gungdu showui showang pé lé, a sansêng é hkyô eq agê ashop hkyô myô jat nhang é má jùn đông lhang ap byí wú bekô nghut é su, ahkuí gi, chyoiyúng hkyô wó yú râ matú, haú pé lé, dingmán hkyô má jùn đông ap byi keq. ²⁰Nungmoq gi, yubak marâ é jùn dut nyi kô é hkún, dingmán hkyo èq uphkan é mai lut nyi kô é nghut lhê. ²¹Ahkuí, nungmoq hojung nghú wú htoq é pé gi, haú u lé, hai akyú wó yú kô é l hú? Hau pé gi, shi byuq é má htúm é chyat nghut ri. ²²Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyú gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhung é Yhumsing Hkrisduq Yesuq é yanmai, ahtum abyuq é asak nghut ri.

Tarâ Mai Lut É Hkyô

7 Gumang wui ê, ngò gi, tarâ lé sê é bang nungmoq lé táí nyi lhê: haú tarâ gi, byu rayuq lé, yhang, asak dui nyi é u lé za wó uphkan é lé, nungmoq a sé kó l hú? ²Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkying má, tarâ èq up zing tô é hui ri; nghut kôlhang, yhang é yhumsing hpó shi byuq é nghut jáng gi, haú ikun wàng tarâ mai, yhang wó lut bê nghut ri. ³Haú nghut é yanmai, yhang é yhumsing hpó asak dui nyi ashí u lé,

yuqgè góyuq eq hâng lhôm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haú mai lut bê nghut luí, yuqgè góyuq eq hâng lhum kôlhang, sulàng lú sù a nghut lo.

⁴Haú mù luí, ngá é gumang wui ê, nungmoq le, haú shi byuq é mai lhoq dui toq yú hui bê sù Yuqgè chyáng wó xoq mù, nga-nhung gi, Garai Gasang lé ashí wó zui byi sháng gaq ga, Hkrisduq é gungdu đông mai, jep é tarâ eq shi gang bê nghut lhê. ⁵Hkâsu mù gâ le, nga-nhung, yubak gungsho má nghut nyi é hkún, nga-nhung gi, shí-nò hkyo é ashí zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhung é gungdu pé má mù zui nyi é nghut lhê. ⁶Nghut kôlhang, ahkuí gi, nga-nhung lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau đông a nghut é za, Woi-nyí é hkyô sik đông nga-nhung dojaú nyi é nghut lhê.

Jep É Tarâ Eq Yubak Mara

⁷Haú jáng, nga-nhung hkâsu táí râ l hú? Jep é tarâ gi, yubak mara nghut lhê l hú? Ratsuí lhang a nghut! Gè gè ga jáng, haú jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, “myoqnoq myit hkâbô”^x ga jep é tarâ má a táí tô é nghut jáng, myoqnoq é hkyô lé, ngò sé râ a nghut. ⁸Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkanmó lhoq htoq byí ri; hkâsu mù gâ le, jep é tarâ hkaú má a nghut jáng, yubak mara gi, shi é za nghut lhê. ⁹Ngò gi, tarâ hkaú má a nghut é za asak dui wú bê nghut lhê; nghut kôlhang, haú hkunmó htoq lô jáng, yubak mara gi, dui lò mù, ngò gi, shí bê nghut

^x7:7 Htoq Ló 20:17

lhê. ¹⁰Haû mù luí, asak ùi nhâng rá matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹Hkâsu mù gà le, yubak mara gi, hkunmó é ahkáng lé chùng mù, ngo lé mhaû yù luí, hau èq ngo lé shî nhang ri. ¹²Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dúngmán é eq ge é nghut ri.

¹³Haû nghut jáng, ge é hkyô haû gi, ngá é matú shî-nò hkyô dut byuq bê lhú? Haú òng a nghut! Nghut kôlhang, yubak mara lé gi, yubak mara òng hkyak wó lhoq htoq shit rá matú, haû ge é hkyô òng mai, yubak mara gi, ngò má shî-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó òng mai tân shit é nghut lhê.

¹⁴Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn òng ung zô é hui bê nghut lhê. ¹⁵Ngò hái kut nyi é hkyô lé, ngò a sé. Hkâsu mù gà le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸Ngò má, nghut bê, ngá é yubak gungsho má ge é hkyô hái le a bo é lé, ngò sê lhê. Hkâsu mù gà le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹Haû mù, ge é hkyô lé ngò kut nau é hkûn, ngò má agè ashop hkyô htoq lô

lô mù é tarâ lé, ngò myang ri. ²²Hkâsu mù gà le, ngò gi, Garai Gasâng é tarâ lé, ngá é i-myt unghkaû má myit nguì gabú nyi lhê. ²³Nghut kôlhang, ngá é gungdu showui showang pé má bo é gotú tarâ gi, ngá é i-myt tarâ eq majan zân lhum é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyú dut nhang é lé, ngò myang ri. ²⁴Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù rá lhú? ²⁵Nga-nhúng é Yhumsing Yesuq Hkrisduq òng mai wó lut bê nghut mù, Garai Gasang lé jeju hkyá-ôn nyi lhê!

Haû mù luí, ngò yhang, myit é òng gi, Garai Gasâng é tarâ lé châng lhê, nghut kôlhang, yubak gungsho òng gi, yubak é tarâ lé châng lhê.

Haû Woi-nyí Mai Asak Dui É Hkyô

8 Haû mù luí, ahkuí, Hkrisduq Yesuq má nghut nyí bang é matú gi, mara byí é hkyô a joq lô é nghut lhê. ²Hkâsu mù gà le, asak ùi hkyô eq sêng é Woi-nyí é tarâ gi, Hkrisduq Yesuq òng, yubak mara eq shî-nò hkyô é tarâ mai, ngo lé lhoq lhut yù bê nghut lhê. ³Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng rá matú, yubak byu é gunghkyâng òng, Yhang Zo sîng lé nhang kat é òng kut pyám bê nghut ri. ⁴Haû mù, Garai Gasang gi, yubak gungsho òng asak a dui é za Woi-nyí òng asak ùi bang nghut é nga-nhúng má, haû jep é tarâ má bo é hkyô pé lé, wó lhoq dik rá matú, gungsho ralhúm má, mara lé do-qdân pyám bê nghut ri.

⁵Haû yubak gungsho òng asak ùi é bang gi, gungsho yut yut ô nau é hkyô pé lé myit zuq nyi akò; haû Woi-nyí òng asak ùi é bang kúm gi, Woi-nyí ô nau é hkyô pé lé myit zuq nyi akò nghut ri. ⁶Haû yubak byu é myit gi, shi é hkyô

nghut ri; haû Woi-nyí èq hkang to huí su é myit kúm gi, asak eq nguingón hkyô nghut ri. ⁷Haû yubak myit gi, Garaí é tarâ ô má a nyi é htoq agó, haû lé a wó cháng kut é yanmai, Garaí é gyè nghut ri. ⁸Haû yubak gungshô èq hkang tô é hui bang gi, Garaí Gasang lé a wó gabú nhâng kó nghut ri.

⁹Nghut kôle, Garaí Gasang é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shí kôlhang, náng é woi-nyí gi, dingmán hkyo é yanmai dui nyi ri. ¹¹Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí đông mai, nungmoq é, shí sê é gungdu pé lé le, asak dui nhâng rã nghut lhê.

¹²Haû mù luí, Gumang wuì ê, nga-nhúng gi, yubak gungsho đông asak dui rã matú, wò wó é bang a nghut. ¹³Hkâsu mù gâ le, haû yubak gungsho đông asak dui kô é nghut jáng, nungmoq gi, shí rã nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak dui rã nghut lhê. ¹⁴Garaí Gasang é Woi-nyí èq shuí u é hui bang gi, Garaí Gasang é yhangzô pé nghut lhê. ¹⁵Hkâsu mù gâ le, nungmoq gi, gyuq rã matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang

ru nghut lhê; haû mù, nga-nhúng gi, Yhang é yanmai, “Aba,[†] Áwa ê” nghú wut é nghut lhê. ¹⁶Nga-nhúng gi, Garaí Gasang é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri. ¹⁷Ahkuí, nga-nhúng gi, zo wuí nghut bê yanmai, Hkrisduq eq rahá, Garaí Gasang é amyû hkúngxoq pé wó dut é nghut lhê. Nga-nhúng gi, Hkrisduq é wuífke jamjau pé lé, gè gè yhang bo hui zô é nghut jáng, Yhâng é hpungwup shinggang lé le, bo myang hkam yû rã nghut lhê.

Htàngnùng Lhê É Hpungwup Shinggang

¹⁸Nga-nhúng é ahkuí lhê é wuífke jamjau hkyô pé gi, nga-nhúng lé shit rã nghut é hpungwup shinggang eq whuí rã a gingdán nghú, ngò wó myit ri. ¹⁹Haû hpan to huí é lhunglhang gi, Garaí Gasang é yhangzô pé lé lhoq htoq shit byi rã lé, gyai yhang myit lánng nyi akô nghut ri. ²⁰Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é đông a nghut é za, haû su dut nhâng Sû ô nau é đông kut é nghut ri. ²¹Haû hpan to huí é lhunglhang gi, htên byoq byuq rã matú shúm dut é mai lhoq lhut é hui luí, Garaí Gasang é yhangzo pé é hpungwup bo é luthkyô má wó wàng rã matú, myoqbyu tô é nghut lhê.

²²Haû hpan to huí é lhunglhang gi, ahkuí hkying jé shoq, zohkú-nò no é su nò-kying kyíng nyi kô é lé, nga-nhúng sê lhê. ²³Haû pé za a nghut, Woi-nyí é sâng-hi ashi[‡] lé wó yû bê bang nga-nhúng le, zo pé đông yín yu é jeju lé lánng uchyang, i-myt unghkaû má nò-kying kyíng é nghut lhê. Zo pé đông yín yu é

[†]8:15 *Aba* gâ é gi, Aramaik dang đông “áwa” gâ é lichyúm nghut lhê.

[‡]8:23 *Woi-nyí é sâng-hi ashi* gâ é gi, Woi-nyí gi, Garaí Gasang byí é chyunghuq pé mã é sâng-hi lhum nghut lhê.

jeju haû gi, nga-nhûng é gungdu hkyi xe yù hkyô nghut lhê. ²⁴Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyù shirâ lhú? ²⁵Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut láng é nghut lhê.

²⁶Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haí dung rá é lé a sé kôlhang, haû Woi-nyí yhang gi, dang mai a wó taí htoq é nò-kying htê dông, nga-nhûng é matú bo dúng xoq byí ri. ²⁷Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

Banshoq Lé Je Wó Ung Pyám Râ Hkyô

²⁸Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lunglhang lé ge é dông chyat kut é hkyô lé, nga-nhúng sê lhê. ²⁹Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng rá matú, hí mai masat to bê nghut ri. ³⁰Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shing kang bò nhang ri.

³¹Haû jáng gi, shí hkyô eq séng luí, nga-nhúng haí taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut rá lhú? ³²Yhumsing é Yhangzo lé lhang a ha bûn é za, nga-nhúng banshoq

bâng é matú ap byí pyâm é Sû gi, Yhang lé le, lunglhang lé le, rahá láí láí byi rá a nghut lhú? ³³Garai Gasang eq hkyin yu to bê bang lé, ó yuq wá mara wó hûn rá lhú? Garai Gasang gi, mara hkyut san byí Sû nghut ri. ³⁴Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi rá lhú? ³⁵Hkrisduq é chyitdap myit mai, nga-nhúng lé, hai eq wá wó lhoq kang rá lhú? Gunjang huí é hkyo eq luq? Wuíhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chin dut huí é hkyo eq luq? Gyuq jung eq luq? Sham eq luq? ³⁶Haû gi, “Náng é yanmai, ngamoq, nyí wui sat pyâm é huí nyi ri;

sat rá matú nyhi tô é sau pé lé su, ngamoq lé myit pyâm akô.”^y ga kê tô é eq rajung za nghut ri. ³⁷A wó lhoq kang; nga-nhúng lé chyitdap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haí jung a-tsam pé nghut kôlhang, ³⁹htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú haí nghut kôlhang, nga-nhúng é Yhumsing Hkrisduq Yesuq má bo é Garai Gasang é chyitdap myit mai, nga-nhúng lé wó lhoq kang pyám rá a nghut nghú, ngò gi, hkyak wó sê yu ri.

Garai Gasang Hkyin Yu É Israelaq Byu Pé

9 Ahkuí, ngò gi, Hkrisduq má tengmán é dang taí rá; ngò a mhaû é lé, haû Chyoiyúng Woi-nyí gi, ngá é unghkaû

myit má hkyak saksé hkâm nyi ri. ²Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê. ³Hkâsu mù gâ le, ngò gi, ngá é byuhú, ngá é gumang wui é matú, nhîng é hui luí Hkrisduq eq gang le lhang gè rã su gâ ri. ⁴Haú bang gi, Israellaq byu pé nghut lhê. Zo yín yû huí é hkyô le, hpungwup shing kang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri. ⁵Haú mying hú é íchyí íwâ pé gi, yhangmoq é íchyí íwâ pé nghut luí, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhungl-háng lé up é, ahtum abyuq hkya-on huí é Garai Gasang nghut ri! Amen.

⁶Haú gi, Garai Gasang é danggidiq akôm dut byuq bê nghû nau é a nghut. Hkâsu mù gâ le, Israellaq byu pé ban-shoq bang gi, Israellaq byù akying chyat a nghut kó nghut ri. ⁷Abraham é awut ashín ban-shoq bang gi, yhâng é zo wuî akying chyat nghû a wó taí é nghut lhê. Hau é malaí, “Isak dông mai lo é lé, náng é awut ashín nghû són byi rã nghut lhê.”^z gâ tô ri. ⁸Radông taí sháng ga jáng, gungsho mai hku é zo wuî gi, Garai Gasang é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông són byí é nghut lhê. ⁹Hkâsu mù gâ le, “Masat tô é ahkýing má, ngò dum taú lé mù, Sarah gi, yuqzo hkú rã nghut lhê.”^a ga taí tô é danggidiq é yanmai nghut lhê.

¹⁰Haú za a nghut, Rebeka é yhangzô nhiktang é íwa gi, nga-nhúng é íwa nghut su Isak rayuq za nghut lhê. ¹¹⁻¹²Nghut kôlháng, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yan-mai nghut é lé, wó gîng nyi sháng gaq

ga, haú zozûm nhik a hku lé shí é htoq agó, ge é eq a ge é muzó haí lhang a kut shimá, “Haú ko sù yuq gi, tiq sù yuq lé dojaú rã nghut lhê.”^b ga, Rebeka lé taí kyô tô é nghut lhê. ¹³Haú gi, “Yakup lé, ngò chyitdap lhê, nghut kôlháng, Eso lé gi, a ngui é nghut lhê.”^c ga kâ tô é eq rajung za nghut ri.

¹⁴Haú nghut é yanmai, nga-nhúng hkâsu nghû taí rã? Garai Gasang gi, a tarâ é sù nghut lhê lhuí? Ratsuí lhang a nghut! ¹⁵Hkâsu mù gâ le, “Ngò, shogyo nhikmyin naù sù lé, shogyo nhikmyin rã nghut lhê; Ngò, jeju byi naù sù lé, jeju byi rã nghut lhê.”^d

ga, Mosheq lé Yhang taí ri. ¹⁶Haú mù luí, haú hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê. ¹⁷Hkâsu mù gâ le, Chyúmdang má, “Náng chyáng Ngá é a-tsam wó tûn shit rã eq mingkan gón má Ngá é mying lhoq pyo é hui rã matú sheq, Ngò, nang lé lhoq toq kat é nghut lhê.”^e ga, Hpara-uq lé taí ri. ¹⁸Haú mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byí ri.

¹⁹Nungmoq mâ é rayuq yuq, “Haú jáng, Garai Gasang gi, ngamoq lé haí mù mara hun nyi ashí lhuí? Yhang ô nau é hkyô lé, ó yuq wá wó hkûm pyâm lhê lhuí?” ga, ngo lé taí kó rã nghut lhê. ²⁰Nghut kôlháng, Garai Gasang lé dang tu sù byù nàng gi, ó yuq wá nghut lhê lhuí? Saí to hui bê é zè pé gi, “Nàng, haí mù ngo lé shí su kut saí tô lhê lhuí?” nghû saí é Sù lé wó taí rã lhuí? ²¹Tso-au saí sù gi, tsohtung ralhûm mai za, hkik é tso-au pé eq a hkik é tso-au pé saí rã ahkáng wó lhê a nghut kô lhuí?

^z9:7 Apûn 21:12 ^a9:9 Apûn 18:10,14
^c9:13 Mal 1:2-3 ^d9:15 Htoq Ló 33:19

^b9:11-12 Apûn 25:32
^e9:17 Htoq Ló 9:16

²² Garai Gasang gi, Yhâng é nhikmo-
yo hkyô tûn shit luí, Yhang é a-tsam
lé sé nhâng naù kôlhang, htên byoq râ
matú hen tô é, nhikmo-yo gíng é tso-au
pé lé, myit hîng hîng shirang pyâm nyi
é hkyô lé, taí râ jang haí joq ashî lúh?

²³ Hpungwup shíngkâng é matú noq mai
hen to bang nghut é, Yhang shogyo nhik-
myin huí é bang lé, Yhâng é agùn agó
é hpungwup shíngkang lé sé nhâng naù
mù, Yhang haù su kut é nghut jáng, taí
râ haí joq ashî lúh? ²⁴ Haù bang gi, Yu-
daq byu pé mai za a nghut, túngbaù pé
mai le ji yù huí é bang nga-nhúng nghut
lhê. ²⁵ Haù eq rajung za, Hosea laiká má
Yhang taí tô é gi,

“Ngá é byù myû a nghut é bang lé, 'Ngá
é byù myû' nghû;
Ngò a chyt é byizo lé 'Ngò chyt sù' nghû
wut râ nghut lhê.”^f

gâ ri. ²⁶ Haù mù,

“Nungmoq gi, ngá é byù myû pé a
nghut. ' nghû yhangmoq lé taí é jowò
má yhang,
yhangmoq gi, 'Rû dui nyi é Garai Gasâng
yhangzô pé' ga wut é hui kó râ nghut
lhê.”^g

gâ ri.

²⁷ Esai-aq le, Israellaq byu pé eq séng
luí garu taí é gi,

“Israellaq yhangzo yhangshû pé gi,
wuishuq lung-au yàm mà é semuí su
myo kôlhang,
myit gyó tô é bang za sheq hkyi yu é hui
kó râ nghut lhê.

²⁸ Hkâsu mù gâ le, haù Yhumsîng gi,
myidàm htoq má Yhâng é tarâ
jéyáng hkyô lé hân hân lhoq dik
lhoq htâm pyám râ nghut lhê.”^h

gâ ri.

²⁹ Haù eq rajung za, hí lé Esai-aq taí tô
é gi,

“A-tsam dik shoq bò sù haù Yhumsîng
za, nga-nhúng lé, awut ashín a my-
hit to byí é nghut jáng,

nga-nhúng gi, Sodom wà su dut byuq
luí, Gomoraq myuq eq pung byuq râ
nghut lhê.”ⁱ

gâ ri.

Israellaq Byu Pé A Lumjîng Kô É Hkyô

³⁰ Haù mù, nga-nhúng hkâsu nghû taí
râ lúh? Dingmán hkyô lé a châng hkat é
túngbaù pé gi, haù lé wó yù bekô; haù gi,
lumjîng hkyô é yanmai wó yu é dingmán
hkyô nghut ri. ³¹ Nghut kôlhang, tarâ eq
sêng é dingmán hkyô lé châng hkat é Is-
raellaq byu pé gi, haù lé a wó yù kó nghut
ri. ³² Haí mù a wó yù kô é lúh? Yhang-
moq gi, lumjîng myit èq châng hkat kô é
a nghut é za, muzó pé èq châng hkat kô
é yanmai, a wó yù kô é nghut ri. Yhang-
moq gi, “htung htê râ luqgok” má htung
leng bekô nghut ri. ³³ Haù,

“Wú keq, htung leng râ luqgok eq myit
leqbat nhâng râ luqmó cham lé,
Ngò, Zi-un bùm má lheq to luí,
Yhang lé lumhkaù sù gi, hkâ-nhám le
hoq hpu é hui râ a nghut.”^j

ga kâ tô é eq rajung za nghut ri.

10 Gumang wui ê, ngò gi, haù Israe-
laq byu pé hkyi yu é hui kó sháng
gaq nghû, gyai yhang myit shirông luí,
Garai Gasâng chyáng yhangmoq é matú
kyûdung byí nyi lhê. ² Hkâsu mù gâ le,
yhangmoq gi, Garai Gasâng é hkyô lé
gyai yhang myit zuq é bang nghut é
lé, ngò saksé hkâm lhê; nghut kôlhang,
yhangmoq myit zuq é hkyô gi, hpaqchyí
bo é dông a nghut kó. ³ Yhangmoq gi,
Garai Gasâng chyáng mai jé lé é ding-
mán hkyô lé a sé kômù, yhumsîng ding-
mán bûn é hkyô lé za ho shikut nyi kô
é yanmai, Garai Gasâng é dingmán hkyô
hkaù má a nyi kó nghut ri. ⁴ Hkrisduq gi,

^f9:25 Hos 2:23 ^g9:26 Hos 1:10 ^h9:28 Esai 10:22-23 ⁱ9:29 Esai 1:9

^j9:33 Esai 8:14; 28:16

lumj́ing bang yuq h́kangmó, dingmán é má wó jé kó sháng gaq ga, jep é tarâ ló htúm jang dut bê nghut ri.

⁵Mosheq gi, “Haú pé đồng châng é sũ gi, haú pé mai asak duì rã nghut lhê.”^k ga, jep é tarâ eq sêng é dingmán hkyô lé kã sân kyô tô é nghut lhê. ⁶Nghut kôlhang, lumj́ing hkyô eq sêng é dingmán hkyô gi, “Náng é myit nhiklhum má, 'Mauhking má, ó yuq doq ló rã lhú?’^l (Haú gi, Hkrisduq lé shuí gyó lò rã gá nau é nghut lhê), ⁷haú a nghut jáng, 'Nik é jang má, ó yuq gyó wàng rã lhú?’^m (Haú gi, Hkrisduq lé, shi é mai dui toq nhâng rã gá nau é nghut lhê.), nghũ hkã-tã kó.” gã tô ri. ⁸Haú jáng, hkãsu gã tô ri lhú? “Haú mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri.”ⁿ gã tô ri. Haú gi, ngamoq hko tã é lumj́ing hkyô eq sêng é mungdang nghut lhê. ⁹Haú mù, “Yesuq gi, Yhumsing nghut ri.” nghũ náng é nhut èq yín yũ mù, Garai Gasang gi, Yhang lé, shi é mai dui toq nhâng bê nghut lhê nghũ, náng é myit nhiklhum má lumj́ing é nghut jáng, nàng gi, hkyi yu é hui rã nghut lhê. ¹⁰Hkãsu mù gã le, byù gi, myit nhiklhum má lumj́ing jáng, mara hkyut san byí é hui mù, nhut mai yín yũ jáng, hkyi yù huí é nghut lhê. ¹¹Haú Chyúmdang tã é gi, “Yhang lé lumhkau é sũ ó yuq le, hkã-nhám lhang hoq hpũ é hui rã a nghut.”^o gã ri. ¹²Hkãsu mù gã le, Yudaq byù eq tũng-baù pé é gyoro má gam hkoq é hkyô haí le a joq é za, haú Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byí ri. ¹³Hkãsu mù gã le, “Haú Yhumsing é myìng lé lãng é bang yuq h́kangmó gi, hkyi yu é hui rã nghut lhê.”^p gã tô ri.

¹⁴Haú nghut lé gi, yhangmoq a lumj́ing é sũ lé nhing, hkãsu wó wut dung kó rã lhú? Yhangmoq a wó gyô wú é sũ lé nhing, hkãsu wó lumj́ing kó rã lhú? Hko kyô é sũ a nyi le nhing, hkãsu wó gyo kó rã lhú? ¹⁵Nhang kat é a hui le gi, yhangmoq hkãsu kut wó hko kyo kó rã lhú? Haú eq rajung za, “Gábú danglù pé hko kyô bâng é hkyi-kám pé gi, hkã-i yhang yung ri myhi-nhung!”^q gã kã tô ri.

¹⁶Nghut kôlhang, Israelaq byu pé banshoq bang gi, gábú danglù lé hap yù kô é a nghut. Hkãsu mù gã le, Esai-aq gi, “Yhumsing è, ngamoq é danglù lé ó yuq wá lumj́ing é lhú?”^r gã tã ri. ¹⁷Haú nghut mù luí, lumj́ing myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸Nghut kôlhang, ngò myi kó lé: yhangmoq gi, a wó gyô wú kô é nghut lhê lhú? Yhangmoq gi, wó gyo gù za nghut lhê, haú eq rajung za, “Yhangmoq é htê gi, myidàm htoq banshoq má jãm bê nghut ri; yhangmoq é mungdang pé gi, mingkan htungchyün h́kangmó má jé bê nghut ri.”^s

gã tô ri. ¹⁹Ngò dum myi kó lé: Israelaq byu pé gi, a sê gyo kô é nghut lhê lhú? Mosheq sâng-hi má tã é gi,

“Byù rahú lhang a nghut bang èq, Ngò, nungmoq lé manôn nhâng rã;

sê gyo nyan a bo é amyù èq, Ngò, nungmoq lé wú nhik-yo nhâng rã nghut lhê.”^t

gã ri. ²⁰Hau htoq agó, Esai-aq a gyuq a wàm tã é gi,

“Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê.”^u

^k10:5 Nhung 18:5 ^l10:6 Tarâ Pun 30:12 ^m10:7 Tarâ Pun 30:13 ⁿ10:8 Tarâ Pun 30:14 ^o10:11 Esai 28:16 ^p10:13 Yol 2:32 ^q10:15 Esai 52:7 ^r10:16 Esai 53:1 ^s10:18 Hkya-on 19:4 ^t10:19 Tarâ Pun 32:21 ^u10:20 Esai 65:1

gâ ri. ²¹ Nghut kôlhang, Israelaq byu pé eq séng luí, Yhang taí é gi,
 “Ngò gi, jino a gyô é eq ngegáng-htu é byù myû lé, nyí wuí Ngá loq lham mù ji nyi lhê.”^v
 gâ ri.

Israelaq Byu Pé Lé A He-ngik Pyám

11 Haú mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lúhú? Ratsuí lhang a nghut! Ngò yhang le, Israelaq byù myû nghut luí, Abraham é awut ashín eq Ben-yamyin hú má é sú nghut lhê. ² Garai Gasang gi, Yhang te sê to gû nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lúhú? Garai Gasang é hí má, yhang, Israelaq byu pé lé mara hún é gi, ³ “Yhum-sîng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akò nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akò nghut ri.”^w gâ ri. ⁴ Garai Gasang gi, yhang lé, hkâsu ga tû taí é nghut lhê lúhú? Haú gi, “Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê.”^x gâ é nghut lhê. ⁵ Haú eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó đông ru nghut le gi, jeju gi, jeju a nghut lo.

⁷ Haú nghut jáng, hkâsu lúhú? Israelaq byu pé gyai ho shikut kôlhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é hui akò nghut ri; ⁸ haú gi, “Garai Gasang gi, hkû-nyí jé shoq, yhangmoq lé nhikshi jit é woi-nyí lé

le, a wó myang é myoqjí lé le, a wó gyô é nohkyap lé le, byí to bê nghut ri.”^y

ga kâ tô é eq rajung za nghut ri. ⁹ Dawiq taí é le,

“Yhangmoq é zangbó gi, yhangmoq é matú, dumzo eq lhaí, myit leqbat jowó eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkúng gi,ayang wòlai wun goí nhang é hui sháng gaq.”^z

gâ ri.

Túngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè rà í leqbat byuq bekô lúhú? Ratsuí lhang a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, túngbaù pê chyáng jé byuq é nghut lhê. ¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyám é hkyô gi, túngbaù pê é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut rà nghut ri-nhung!

¹³ Nungmoq túngbaù pé lé ngò taí nyi lhê: ngò gi, túngbaù pê é lagyo nghut nyi é u má, ngá é hpungmû lé hpautap nyi lhê. ¹⁴ Haú gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù rà lé myit myoqbyu é hkyô nghut lhê. ¹⁵ Hkâsu mù gâ le, yhangmoq lé he-ngik pyám é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi? ¹⁶ Hau htoq agó, sâng-hi ashí đông nhông byí é mún ra-am gi,

^v10:21 Esai 65:2 ^w11:3 1 Hko 19:10,14 ^x11:4 1 Hko 19:18

^y11:8 Tarâ Pun 29:4 ^z11:10 Hkya-on 69:22-23

chyoiyúng é nghut jáng, muk htung gón gi, chyoiyúng é nghut lhê; haû amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haû tsanlun akoq pé^f ra-am gi, lhoq hkyui pyâm é hui luí, yosô tsanlun a-nyuq[§] nghut sù nàng gi, haú pé má xoq é hui mù, haû tsanlun amyit é xù lé bo shuq lom é nghut jáng, ¹⁸ akoq haú pé lé hkâwú tiq pyám kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, “Ngò, haú má xoq é hui râ matú sheq, akoq haú pé gi, lhoq hkyui pyâm é huí é ru nghut lhê.” ga taí râ nghut lhê. ²⁰ Haû su gi, nghut lhê. Nghut kôlhang, yhangmoq gi, a lumjúng é yanmai, lhoq hkyui pyâm é hui kômù, nungmoq kúm gi, lumjúng é yanmai, wó ging tîng nyi é nghut lhê. Hká gumrong nyì, gyuq kyum nyì keq. ²¹ Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé le ha bun râ a nghut.

²² Haû mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyì râ nghut lhê. Haû a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjúng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû nghut lhê. ²⁴ Haí mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é dông, hô é tsanlun agàm má xoq é nghut le gi, haû akoq akying pé

nghut é yhangmoq gi, ó le ó é tsanlun-
ngut akying má xoq yu é lé je riyhang
hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haû mù, gumang wui ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê. ²⁶ Hau htâng sheq, Israelaq amyú banshoq bang hkyi yu é hui râ nghut lhê. Haû gi,

“Hkyi yû Sû gi, Zi-un bùm mai htoq lô râ
nghut lhê;

Yhang gi, Garai lé nunghtáng tô pyâm é
hkyô lé, Yakup é awut ashín mai huí
sêng pyám byi râ nghut lhê.

²⁷ Ngò, yhangmoq é yubak mara lé huí
sêng pyám byi jáng,

haû gi, yhangmoq lé Ngò byí tô é Ngá é
dangshikaq nghut lhê.”^a

ga kê tô é eq rajung za nghut ri.

²⁸ Haû gabú danglù eq séng luí ga
jang, yhangmoq gi, nungmoq é matú gyè
nghut akò; nghut kôlhang, hkyin htoq
yû hkyô eq séng luí ga jang, yhangmoq
gi, myíng hû é îchyí îwa pê é yanmai,
chyitdap é huí akò nghut ri; ²⁹ hkâsu mù
gâ le, Garai Gasâng é chyunghuq pé eq
Yhang ji yu é hkyô lé gi, wó htaí lhik
pyâm é a nghut. ³⁰ Nungmoq gi, Garai
Gasâng é jino a gyô é bang radàm dut
wú kô é nghut kôlhang, yhangmoq jino
a gyô é yanmai, ahkuí kúm, shogyo nhik-
myin hkyô wó hkam yû bekô nghut é
su, ³¹ ahkuí, yhangmoq gi, nungmoq wó
hkam yu é Garai Gasâng é shogyo nhik-
myin hkyô é yanmai, shogyo nhikmyin
hkyô lé wó hkam yû kó sháng gaq ga,

^f11:17 Tsanlun akoq pé gi, Israelaq byu pé lé taí nau é nghut lhê.

[§]11:17 Yosô tsanlun a-nyuq gi, tûngbaù pé lé taí nau é nghut lhê.

^a11:27 Esai 59:20-21; 27:9

yhangmoq le, ahkuí, jìno a gyo bang dut bekô nghut ri. ³²Hkâsu mù gà le, Garai Gasang gi, byù lhunglhang bang lé, shogyo nhikmyin hkyô wó tún shit shoq ga, lhunglhang bang lé, jìno a gyo hkyô é shúm dut nhang to bê nghut ri.

Hkya-on Kungtôn Dang

³³Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wú jung nghut ri-nhung!

³⁴“Haú Yhumsing é myit lé, ó yuq wá ung sê lhê l hú? Yhâng é hpaqchyí byi sù gi, ó yuq wá dut wú é l hú?”^b gà ri.

³⁵“Garai Gasâng èq jeju dum tau byi râ dut shoq, ó yuq wá, Garai Gasang lé byi wú é l hú?”^c gà ri.

³⁶Hkâsu mù gà le, joq mijog gi, Yhâng chyáng mai nghut mù, Yhang đông mai nghut luí,

Yhâng é matú chyat nghut ri. Haú hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

Dui É Hkungga Pé Dut Râ Hkyô

12 Haú mù luí, gumang wui é, nungmoq é gungdu pé lé, Garai Gasang myit nguí ô nau é eq chyoiyúng é, dui é hkungga đông nhông byi keq nghú, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haú gi, woi-nyí hkyô đông nungmoq noqkuq dojaú é hkyô nghut lhê. ²Mingkan shí lhum é sâmlai đông a cháng lo é za, myit sik wó yú râ đông nungmoq é a-kyang lé htaí pyám

byi nhâng keq. Haú hkûn sheq, Garai Gasâng é ge é, myit nguí é eq gumjup é ô nau hkyô lé, nungmoq wó chyâm, wó sê gàm hkoq yú kó rá nghut lhê.

³Hkâsu mù gà le, ngo lé byí tô é jeju yanmai, nungmoq yuq hkangmó lé ngò taí kôlé: nungmoq gi, yhumsing gùng lé lai shoq a nghutbùn é za, ó le ó lé, Garai Gasâng èq lumjúng myit tsing gàm byí to bê eq rajung za, myit yú gíng é í za myit yú keq. ⁴Nga-nhung yuq hkangmó é gungdu ralhum má gi, gungdu showui showang pé myo myo bo é nghut luí, gungdu showui showang haú pé banshoq gi, jai chùng jang a pung é nghut lhê. ⁵Haú eq rajung za, myo myo nghut é nga-nhung le, Hkrisduq má gungdu ralhum za dut luí, yuq hkangmó gi, rayuq eq rayuq gungsho sêng lhum é bang chyat nghut lhê. ⁶Nga-nhung lé byí tô é jeju yanmai, nga-nhung wó é chyunghuq gi, gotú tû nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjúng hkyô eq rajung za htoi sháng gaq; ⁷dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸myit wum byí é nghut jáng, myit wum byi sháng gaq; ra châ é bang lé garúm byí é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyí keq. ¹⁰Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haú

^b11:34 Esai 40:13 ^c11:35 Yob 41:11

Yhumsing lé dojaú nyí keq. ¹² Myit myoqbyù hkyô má gabú keq; wuîhke hkyô má hkam jan keq; kyúdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkânhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyi keq. A nghutbûn é za, nyi yap hkyô nyhúm bang eq zùm yap keq. Hpaqchyí bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkgangmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkgangmó eq nguingón shoq nyi keq. ¹⁹ Ngá é buinùm wuì ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gâ le, “Ngò sheq lató hpuq râ sù nghut lhê; ngò lató hpuq râ.”^d ga, haú Yhumsing taí ri ga kê tô ri. ²⁰ Haú mù, “Nungmoq lé gyè kut sù zòmút é nghut le gi, byi tso keq; yhang wuîshit é nghut le gi, rajung jung byi huq keq. Haú dông kut jáng, nàng, yhâng é ulhum htoq má gyúng é myigye bum to byí é nghut lhê.”^e

ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

Ahkáng Ayá Wó Bâng Ô Má Nyi Râ É Hkyô

13 Yuq hkgangmó gi, up é ahkáng ayá wó bâng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byí tô é chyat nghut lhê. ² Hau é yanmai, up é ahkáng ayá lé

gumlau toq é sù gi, Garai Gasang byí tô é up é ahkáng ayá lé gumlau toq é sù nghut ri; haú su kut é bang gi, tarâ jéyáng é hui zo râ hkyô lé ho yù nyi é bang nghut akò. ³ Hkâsu mù gâ le, uphâng é bang gi, ge é hkyô kut bâng é matú gyuq nán hpo a dut é za, shut shaí hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut líhí? Haú jáng, ge é hkyô kut aq, haú hkûn, yhang, nang lé hkya-on râ nghut lhê. ⁴ Hkâsu mù gâ le, yhang gi, náng é matú ge é akyú kut byi râ nghut é, Garai Gasâng é dui-nhâng zoshâng nghut lhê. Nghut kôhang, nàng, shut shaí hkyô kut é nghut le gi, gyuq nán nyi aq; haí mù gâ le, yhang gi, sâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê. ⁵ Haú mù luí, dam byi râ lé chiq é yanmai za a nghut, yhum-sing nhik bô râ é yanmai le, haú up é ahkáng ayá wó bâng é a-ô má nyi râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haú up é ahkáng ayá wó bang gi, Garai Gasâng é dui-nhâng zoshâng wuì nghut lhê mù, uphâng é mù lé, ahkýing byíng shoq wùn waq nyi akò nghut ri. ⁷ Yuq hkgangmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhúm é chyín mai lai luí, hai chyín le hkâdap lhum kó; hkâsu mù gâ le, góyuq lé chyitdap é sù gi, haú jep é tarâ lé lhoq

^d12:19 Tarâ Pun 32:35 ^e12:20 Sânghkyang 25:21-22

dik bê sù nghut ri. ⁹“Su-myi sulàng lú hkyô hkâkut,” “Byù hkâsat,” “Hkâhkau,” “Hkâ-myonoq,”^f gâ tô é hkunmó pé eq gotú hkunmó haí nghut nghut, “Náng gûng lé nàng chytđap é su, náng é chyangnâm mâ é bang lé le chytđap aq.”⁸ gâ é tarâ má lo jup to bê nghut lhê. ¹⁰Chytđap myit gi, chyangnâm mâ é byù lé a ge é haí le a kut é nghut lhê. Haù mù luí, chytđap myit gi, haù jep é tarâ lé lhoq dik é hkyô nghut ri.

¹¹Haù mù, ahkuí lhê é ahkyíng yàm-yoq lé sê gyo luí, haù hkyô lé kut keq. Nungmoq yhup mui é mai bûn gying rá ahkyíng jé bê; haí mù gâ le, nga-nhúng é hkyi yù hkyô gi, lumjíng hi é hkun lhê htoq má ahkuí je chyáng bê nghut ri. ¹²Haù myín ahkyíng gi, lai byuq ló rá za nghut bê; nyí ahkyíng gi, jé lô berâ nghut lhê. Haù mù luí, mauchut é muzó lé tô pyám mù, maubó é gyehking lé wut to sháng. ¹³Ye lhaí é eq shuq wut é, ashop é dông gungsho zùm yap é eq shut é dông nyí zô lhúm nau é myit bo é, mabyoq jishúm htoq é eq manon é pé a kut é za, nyí-káng lhê su, ge é a-kyang dông nyí yap sháng. ¹⁴Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik rá matú hkâ-myit kó.

Gumang Wuí Lé A Jéyáng Râ Hkyô

14 Lumjíng myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. ²Byù rayuq é lumjíng myit gi, jung hkangmó zô ri; nghut kôhang, lumjíng myit nyhóm sù gotú rayuq gi, mhan-haq hpoqnoq za zô ri. ³Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴Nàng gi, ó yuq wá nghut mù, góyúq é dui-nhâng zoshâng

lé jéyáng lhê lhú? Yhang, yap ging kôhang, leqbat kôhang, yhâng é yhumsing myit za nghut lhê. Yhang gi, wó yap ging rá nghut lhê; hkâsu mù gâ le, haù Yhumsíng gi, yhang lé wó yap ging nhâng Sù nghut lhê.

⁵Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsíng myit yu é lé a úng-âng nyí sháng gaq. ⁶Buinyi ra-nyí lé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkya-ôn é yan-mai, haù Yhumsíng lé bun luí zô nyi ri; a zo sù le, haù Yhumsíng lé bun luí Garai Gasang lé jeju hkya-ôn nyi ri. ⁷Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸Nga-nhúng asak dui nyi le gi, haù Yhumsing é matú dui é ru nghut lhê; nga-nhúng shi byuq le gi, haù Yhumsing é matú shi é ru nghut lhê. Haù mù, asak dui nyí kôhang, shi byuq kôhang, nga-nhúng gi, haù Yhumsíng eq sêng é bang nghut lhê.

⁹Haù su mù, Hkrisduq gi, shi byuq bang eq asak dui bâng é Yhumsíng dut sháng gaq ga, shí hkám mù dum dui toq é nghut lhê. ¹⁰Haù mù, nàng gi, haí mù náng é gumang hpó lé jéyáng nyi lhê lhú? Haí mù náng é gumang hpó lé wú tiq nyi lhê lhú? Nga-nhúng lhungl-hâng bang gi, Garai Gasang é tarâ jéyáng tanghkuq hí má yap rá bang chyat nghut lhê. ¹¹Hkâsu mù gâ le, “Haù Yhumsíng gi, ‘Ngò rú dui nyi é eq rajung za, Ngá é hí má hkyihput hkangmó htuq rá nghut lhê; Garai Gasang lé, shô hkangmó èq yín yú kó rá nghut lhê.’ ga taí ri.”^h ga kâ tô ri. ¹²Haù mù luí, nga-nhúng yuq hkangmó gi, yhumsíng kut lai lo é hkyô

^f13:9 Htoq Ló 20:13-15 ⁸13:9 Nhong 19:18 ^h14:11 Esai 45:23

lé, Garai Gasâng chyáng shit ra râ nghut lhê.

¹³ Haû nghut mù, nga-nhúng gi, rayuq eq rayuq tarâ jéyáng lhùm é hkyô lé tô pyám sháng. Ó yuq nghut kôlhang, yhumsing é gumâng é hkyowuì má, myit leqbat jowò eq htung htê jowò a to byi râ matú, myit sidiq keq. ¹⁴ Haû Yhumsing Yesuq má nghut nyi é sù ngò gi, haí jung zoshuq nghut kôlhang, yang baú yang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yang é matú, zè haú gi, a sansêng é nghut lhê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, náng é gumang hpó lé, nàng zoshuq é dông mai hkâlhoq hten pyám. ¹⁶ Nàng, ge ri nghu myit yu é hkyô lé, agè ashop é dông hkâtaí pyám nhâng. ¹⁷ Hkâsu mù gà le, Garai Gasâng é mingdán gi, zo zo shuq shuq hkyô a nghut é za, dingmán hkyô, ngu-ingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haí mù gà le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pè èq hkya-ôn é hui sù nghut ri.

¹⁹ Haû mù luí, nguingón hkyô má nyi râ eq, rayuq eq rayuq wum byí lhum râ hkyô lé, shikut nyi keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lhunglháng gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsiyiq wing shuq é eq sho zô é hkyô má nghut kôlhang, gotú haí jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haû mù, haú pé eq séng luí, nàng lumjing é haí nghut kôle, nàng eq Garai

Gasâng gyoro má za joq nyi sháng gaq. Yhumsing ge lhê gà é èq, yhumsing gùng yhumsing mara byi jang a joq é sù gi, hkungsô wó nyi ri. ²³ Nghut kôlhang, úng-âng é myit èq zô é nghut le gi, mara byí é hui ri, haí mù gà le, yang zô é gi, lumjing myit mai a nghut; lumjing myit mai a kut é haí nghut kôlhang, mara nghut ri.

Góyuq Lé Myit Ngón Nhâng Râ Hkyô

15 Lumjing hkyô má wum-o bo é nga-nhúng gi, yhumsing myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byí nyi râ dut lhê. ² Nga-nhúng yuq hkangmó gi, yhumsing é chyangnâm mâ é su é ge é hkyô dut râ matú, yang wó kô myhang lò shoq, yang lé lhoq ngón byí nyi sháng. ³ Hkâsu mù gà le, Hkrisduq lháng gi, Yhânggùng yang lhoq ngón é a nghut; haú gi, “Nang lé rhoi bâng é dang gi, Ngá chyáng gyó ke bê nghut ri.”¹ ga, kâ tô é eq rajung za nghut ri. ⁴ Hkâsu mù gà le, laí lò bê hkún kâ tô é lhunglháng gi, nga-nhúng lé mhoq byi râ matú chyat kâ tô é nghut lhê; haú gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyú hkyô wó râ matú nghut lhê.

⁵ Haú hkam jan hkyô eq myit wum byi hkyô lé byí é Garai Gasang gi, nungmoq, Hkrisduq Yesuq é htâng châng nyi é u lé, nungmoq yangchang rading ralhúum za dut é woi-nyí byi sháng gaq; ⁶ haú jáng sheq, nungmoq gi, i-myt rahkat eq nhut htê ralhúum èq za, nga-nhúng é Yhumsing Yesuq Hkrisduq é Yhângwa nghut Sù, Garai Gasang lé, wó hkya-on kungtôn kó râ nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shing kang lé lhoq htoq shit

râ matú, nungmoq le, rayuq eq rayuq hap yu lhum keq. ⁸Hkâsu mù gâ le, ngò, nungmoq lé taí kôlé, haú mying hû é íchýí íwâ pé lé byí tô é danggidiq pé lé lhoq ging râ matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri. ⁹Haú mù, Garai Gasâng é shogyo nhikmyin hkyo é yanmai, haú tungbaù pé, Garai Gasang lé wó hkyo-on kungtôn kó râ nghut lhê. Haú hkyô gi, “Haú mù luí, tungbaù pé chyáng má, Nang lé, ngò hkyo-on râ nghut lhê; Náng é mying lé, ngò hkyo-on mahkôn râ nghut lhê.”^j

ga kâ tô é eq rajung za nghut ri. ¹⁰Dum, “Tungbaù pé ê, Yhâng é byu pé eq rahá gabú nyí keq.”^k gâ tô ri. ¹¹Dum,

“Nungmoq tungbaù pé lhunglhâng bang ê, haú Yhumsing lé hkyo-on keq, byù myú lhunglhâng bang ê, Yhang lé hkyo-on mahkôn hkôn keq.”^l

gâ tô ashí nghut ri. ¹²Hau htoq agó, Esai-aq taí é gi,

“Yese é Amyit gi, yuq htoq lô luí, Yhang gi, byù myú chângjup é ahtóq má up râ sú nghut lhê;

tungbaù pé gi, Yhang má myit myoqbyù kó râ nghut lhê.”^m

gâ ri.

¹³Haú myit myoqbyù hkyô byí é Garai Gasang gi, Yhang lé lumhkau nyí é bang nungmoq lé, gabú hkyô banshoq eq ngu-ingón hkyô lhoq pyíng byi sháng gaq; haú jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyí kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴Ngá é gumang wuì ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshít lhùm é má kúng é bang nghut é lé, ngá gúng ngò yhang hkyak lumjúng lhê. ¹⁵Ngò gi, nungmoq lé dum lhoq pún é dông, ahkyak é pé ra-am lé a gyuq a wàm kâ kat bê nghut lhê. ¹⁶Hkâsu mù gâ le, tungbaù pé gi, Chyoiyúng Woi-nyí dông mai lhoq sán-yúng é hui luí, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tungbaù pé chyáng, Hkrisduq Yesuq é hpungmú wùn sú dut râ matú, Garai Gasang, ngo lé jeju byí é yanmai nghut lhê.

¹⁷Haú mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbún nyi lhê. ¹⁸Ngò gi, ngò taí é eq zui saí é muzó dông le, haú Woi-nyí é a-tsam chùng mù, kumlhá pé eq laklaí kumlhá pé dông le, tungbaù pé lé, Garai Gasâng é jino gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí é a nghut. ¹⁹Haú mù luí, ngò gi, Yerusalem wà mó mai Ilurihkam mau jé shoq é hkyô awui ayám jam shoq, Hkrisduq é gabú danglù lé hko kyo bê nghut lhê. ²⁰Ngò hkâ-nhám le myit tuí nyi é hkyô gi, góyuq hi tô é apún awang má dum a puq saí pyám é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹Haú gi, “Yhâng é hkyô lé, taí kyô é a hui shí é bang, myàng kó râ nghut luí, a wó gyo wú é bang, sê gyo kó râ nghut lhê.”ⁿ

^j15:9 Hkyo-on 18:49 ^k15:10 Hkyo-on 32:43 ^l15:11 Hkyo-on 117:1

^m15:12 Esai 11:10 ⁿ15:21 Esai 52:15

ga kâ tô é eq rajung za nghut ri. ²²Haû mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn Ē Hkyô

²³Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htàng má sheq, ngá é hkyowui matú, nungmoq haû mai htuqbang kat râ lé, ngò myoqbyu tô lhê. ²⁵Ahkuí, ngò kúm gi, Yerusalem wà mó má é sân-yúng bang lé dojaú râ matú, haû wâ shut e ló é hkyolat má nghut nyi lhê. ²⁶Hkâsu mù gâ le, Makedoni eq Ahkaia mau má é bang gi, Yerusalem wà mó má é sân-yúng bâng chyáng má é myùng bâng é matú, garúm chyunghuq hkyui tsing nau bùm bekô nghut ri. ²⁷Yhangmoq gi, haû su kut nau bùm bekô nghut ri, gè gè ga jáng, haû gi, yhangmoq chyín dap tô é đông ru nghut lhê. Hkâsu mù gâ le, haû Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyín dap tô é đông nghut lhê. ²⁸Haû mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htàng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰Gumang wui ê, ngá é matú Garai Gasâng chyáng kyúdung byí é đông, ngò wum kat yhang shikut é hkyô má nung-

moq bo wàng lòm râ matú, nga-nhûng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê. ³¹Yuda mau má é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haû má é sân-yúng bang hap yù gíng é wó dut râ matú kyú bo dung byi keq. ³²Haû jáng sheq, ngò gi, Garai Gasang ô nau é đông mai, gabú myit èq nungmoq chyáng wó jé lé mù, nungmoq eq rahá wum-o wó yù râ nghut lhê. ³³Haû nguingón hkyo é Garai Gasang gi, nungmoq banshoq bang eq rahá rú nyi nyi sháng gaq ô. Amen.

Shi-kyám Dang

16 Ngò gi, Kenhkrea noqkuq hpúng má é hpungtê, nga-nhûng é gu-nhá Hpobe lé, nungmoq chyáng shichyen byí kat lhê. ²Nungmoq gi, sân-yúng bang kut gíng é eq rajung za, haû Yhumsîng má yhang lé hap yù luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pê é noqkuq hpúng pé banshoq le, yhangnhik lé jeju bûn lhê.

⁵Yhangnhik é yhúm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

⁶Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik

gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyì shi le nyì bê sù nhik nghut akò.

⁸Haù Yhumsing má, ngò chytidap é sù, Ampliatu lé bo shi-kyám byi keq.

⁹Hkrisduq má, ngamoq é mù zui luzúm nghut é Orban eq ngá é chytidap luzúm Staku lé, bo shi-kyám byi keq.

¹⁰Hkrisduq má chyam é hui mù, wó lùm bê sù, Apele lé bo shi-kyám byi keq.

Aristobulu eq sêng é yhumbyù wùi lé bo shi-kyám byi keq.

¹¹Ngá é buinùm Herudion lé bo shi-kyám byi keq.

Haù Yhumsing má nghut nyì bê bang, Narkiso é yhumbyù wùi lé bo shi-kyám byi keq.

¹²Haù Yhumsing má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsing má mù zui gyai yhang shikut é myiwe góyuy, ngá é chytidap luzúm Persi lé bo shi-kyám byi keq.

¹³Haù Yhumsing má hkyin yu é hui bê sù, Ruhpu lé le, ngá nu dông nghut wú bê nghut é Ruhpù é yhangnu lé le, bo shi-kyám byi keq.

¹⁴Asunkritu, Hpelegon, Herme, Patroba, Herma eq yhangmoq eq rahá nyi é gumang wùi lé, bo shi-kyám byi keq.

¹⁵Hpilologu, Yulia, Nerea eq yhang é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akò nghut ri.

¹⁷Gumang wùi ê, nungmoq é lumjúng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô

pé lhoq htoq é bang lé sidiq keq nghù, wum taì tsuq kat lhê. Yhangmoq lé koi pyám keq. ¹⁸Hkâsu mù gâ le, haù sù é bang gi, nga-nhông é Yhumsing Hkrisduq lé dojaù é bang a nghut é za, yhumsing é wamdaù matù dojaù é bang nghut akò. Yhangmoq gi, myit nú-nhâm é bang lé, dang ngón dang nguì dông mhaù zò akò nghut ri. ¹⁹Nungmoq, jino gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matù gyai yhang gabú nyi lhê; nghut kôlhâng, ge é hkyô eq séng luí gi, nungmoq hpaqchyí bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhông é Yhumsing Yesuq é jeju gi, nungmoq eq rahá nghut nyì sháng gaq ô.

²¹Ngá é mù zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wùi Luki, Yason eq Sosipata pé le, shi-kyám dang sang kat akò nghut ri.

²²Laiká shì lé bo ká sù ngò Tertiu gi, haù Yhumsing má nungmoq lé shi-kyám kat lhê.

²³Ngo lé le, noqkuq hpúng gón lé le, bing hkulum é sù Ge-u gi, nungmoq lé shi-kyám dang sang kat ri.

Haù wa mâ é ngúnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akò.

²⁴Nga-nhông é Yhumsing Yesuq Hkrisduq é jeju gi, nungmoq lunglhang bang eq rahá nghut nyì sháng gaq. Amen. **

²⁵Byù myù chângjup bang lumjúng luí, Yhang é jino gyo sháng gaq ga, a-nham pyat mai haq tô é hui kôlhâng, ²⁶ahkuí, ahtum abyuq é Garai Gasang é hkunmó é yanmai, myiqhtoi laiká pé dông hpông shit é eq sé nhâng bê nghut é, sè gyo wùi

**16:24 Chyúmding ra-am má chyumbun 24 shì a bo é nghut lhê.

é hkyo é shing-rán má cháng luí, ngá é gabú danglù eq Yesuq Hkrisduq é hkyô taí pyo é dông, nungmoq lé wó lhoq ging títg byî é, ²⁷ rayuq za é hpaqchyî bo sô

Garai Gasâng chyáng, Yesuq Hkrisduq dông mai, hpungwup shingkang gi, ah-tum abyuq ru joq nyî sháng gaq ô! Amen.

KORINHTUQ

Pê Chyáng Hĩ Dàm Hun Kat é Laiká

(1 Corinthians)

1 Garai Gasang ô nau é eq rajung za, Hkrisduq Yesuq é lagyo dut rá matú ji yù huí é sù ngò Poluq eq, ngamoq é gumang hpó Sositeni gi, ²jowò hkangmó má nga-nhúng é Yhumsíng Yesuq Hkrisduq é myíng lé lêng é bang eq rahá, chyoiyúng bang dut rá matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mã é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsíng nghut lhê.

³Nga-nhúng é Íwa Garai Gasang eq Yhumsíng Yesuq Hkrisduq chyáng mã é jeju eq nguóngon hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵Hkâsu mù gâ le, nungmoq gi, Hkrisduq đông mai, nungmoq dang taí é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷Haú mù, nga-nhúng é Yhumsíng Yesuq Hkrisduq dum htoq shit rá lé, nungmoq gyai myoqbyu láng nyi é u má, nungmoq gi, woi-nyí hkyô eq sêng é chyunghuq hái lé le langhpyut kó rá a nghut. ⁸Nga-nhúng é Yhumsíng Yesuq Hkrisduq é buinyi má, nungmoq lé mara hún rá hkyô a bò shoq, Hkrisduq gi, nungmoq lé, htáng shoq gingtíng nhang nyi rá nghut lhê. ⁹Nga-nhúng é Yhumsíng nghut é Yhang Zo Yesuq Hkrisduq

eq rahá zùm yap rá matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰Gumang wui ê, nungmoq hkaú má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralthum za dut nyi sháng gaq, nungmoq lhungl-hâng bang rayuq eq rayuq byin hpyé gohut huí nyi keq nghú, ngò, nungmoq lé, nga-nhúng é Yhumsíng Yesuq Hkrisduq é myíng mai dúng tôngbán kat lhê. ¹¹Ngá é gumang wui ê, Hkloe é yhúm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. ¹²Ngò haú su nghú taí é gi, nungmoq mã é rayuq yuq gi, “Ngò gi, Poluq htáng châng lhê.” ga, góyuq gi, “Ngò gi, Apolo htáng châng lhê.” ga, dum rayuq gi, “Ngò gi, Kehpa htáng châng lhê.” ga, dum góyuq gi, “Ngò gi, Hkrisduq htáng châng lhê.” ga, taí bùm kô é yanmai nghut lhê.

¹³Hkrisduq gi, gam hkoq é hui bê lúhú? Ngò Poluq gi, nungmoq é matú tapzîng má jén sat é hui bê lúhú? Nungmoq gi, ngá é myíng mai wui-myhup hkâm yù kô é lúhú? ¹⁴Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵nungmoq ó yuq le, ngá é myíng mai wui-myhup hkâm yù bê nghú a wó taí é nghut mù, ngò, Garai lé jeju hkya-ôn lhê. ¹⁶(Stephana é yhumbyù wui lé le, ngò wui-myhup hkâm byí é nghut lhê, haú mai lai luí gotú ó lé hkâm byí záng ashí laq, ngò a myit bun lo nghut ri.) ¹⁷Hkâsu mù gâ le, Hkrisduq, ngo lé nhang kat é gi, wui-myhup hkâm byi rá matú a nghut, gabú danglù hko kyo rá matú sheq nhang kat é ru nghut lhê; nghut kôlhang, waxâng zô wui é hpaqchyí byéng-yá dang đông hko kyô é a nghut mù, Hkrisduq é tapz-

ing é a-tsam gi, akôm a dut byuq é nghut lhê.

**Garai É A-tsam Eq Hpaqchyî
Byéng-yá Gi, Hkrisduq**

¹⁸ Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhâng, hkyi yu é hui nýi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gâ le, Chyúmdang má kâ tô é gi, “Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê.”^o

ga ri.

²⁰ Hpaqchyî byéng-yá bò bang gi, hkâmá lú? Hpaqchyî laiká kung bang gi, hkâmá lú? Ipyat shi é dang tái kung bang gi, hkâmá lú? Garai Gasang gi, mingkân é hpaqchyî byéng-yá lé lhoq ngok pyám bê a nghut lú? ²¹ Hkâsu mù gâ le, Garai Gasâng é hpaqchyî byéng-yá mai ga jang, mingkân zo wuí gi, yhumsing é hpaqchyî byéng-yá đông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é đông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé đung akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhâng, ngamoq gi, tapzîng má jén sat hui é Hkrisduq é hkyô lé hko kyô lhê. Haú gi, Yudaq byu pé é matú myit leqbat jowé eq tûngbàu pé é matú danggang dut byuq ri. ²⁴ Nghut kôlhâng, Garai Gasâng èq jì yù hui é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq

má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wuí ê, Garai Gasang, nungmoq lé jì yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyî byéng-yá bo é bang, ahkáng ayá wó é bang, zaugun suwún amyû mã é bang a myô é nghut lhê. ²⁷ Nghut kôlhâng, Garai Gasang gi, hpaqchyî byéng-yá bò bang lé hoq lhoq hpu râ matú, mingkân mã é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkân mã é wum nyhóm bang gâ é lé hkyin yu é nghut lhê. ²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkân mã é aróng a bo é eq wú tiq pyám hui é lé le, hkyin yu é nghut lhê. ²⁹ Haú gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nýi bekô nghut ri; Hkrisduq gi, nga-nhông é matú, Garai Gasâng chyáng mã é hpaqchyî byéng-yá dut bê nghut ri. Haú gi, nga-nhông é dingmán hkyô, chyoiyúng hkyô eq hkyi yù hkyô nghut ri. ³¹ Haú mù luí, “Gumrong é sù gi, haú Yhumsing má gumrông sháng gaq.”^p ga kâ tô é eq rajung za nghut ri.

**Woi-nyí Mai Lo É Garai Gasâng É
Hpaqchyî Byéng-yá**

2 Gumang wuí ê, ngò gi, Garai Gasang eq sêng é saksé hkyô lé nungmoq chyáng tái pyô râ matú jé lé é hkûn, dang tái kung é eq hpaqchyî byéng-yá mó bo é đông lé é a nghut. ² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat hui é hkyô mai lai luí, jung hkangmó lé tô-myhí pyám râ ngô myit hpyit yù bê

nghut lhê. ³Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê. ⁴Ngá é danglù eq ngò hko kyô é hkyô gi, hpaqchyí bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵nungmoq é lumjng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

⁶Nghut kôlhang, ngamoq gi, myit dng bē bang lé hpaqchyí byéng-yá dông nyo lhê; shí pyat lhê é hpaqchyí byéng-yá eq htên byoq nyi huí é shí pyat mà é záu wui é hpaqchyí byéng-yá dông kúm a nghut. ⁷Ngamoq taí é gi, haq tô é eq, ahkyíng nghu é lháng a joq shi mai nga-nhúng é hpungwup shingkang é matú Garai Gasang tô to byí é hpaqchyí byéng-yá nghut é, Garai Gasâng é záu tô é hpaqchyí byéng-yá lé taí é ru nghut lhê. ⁸Shí pyat lhê é zau wui gi, hpaqchyí byéng-yá haú lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsing lé tapzng má jén sat pyám kó rá a nghut. ⁹Nghut kôlhang, Chyúmdang má,

“Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyttdap bāng é matú la-jiang to byi bē nghut ri.”^q

ga kâ tô é eq rajung za nghut ri. ¹⁰Nghut kôlhang, Garai Gasang gi, haú hkyô lé, Yhâng é Woi-nyí dông nga-nhúng lé hpông shit bē nghut ri.

Woi-nyí haú gi, jung hkangmó lé ho gôn wú é nghut lui, Garai Gasâng é záu tô é hkyô lé lháng ho gôn wú é sù nghut ri. ¹¹Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhu? Haú eq rajung za,

Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹²Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byí to bē jeju lé, ngamoq wó sê gyo rá matú, Garai Gasâng chyáng mà é Woi-nyí lé sheq hap yu tô é ru nghut lhê. ¹³Haú mù lui, ngamoq gi, waxāng zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sēng é tengmān hkyô lé woi-nyí eq sēng é dang dông taí sán kyô é nghut lhê. ¹⁴Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haí mù gā le, haú pé gi, yhāng é matú ngok é hkyô nghut lui, woi-nyí hkyô dông mai haú hkyô lé a wú é yanmai, yhang gi, haú pé lé a wó sē gyo nghut ri. ¹⁵Woi-nyí eq sēng é byù gi, lunglhāng lé wó jéyāng lhê, nghut kôlhang, yhang lé kúm gi, ó yuq èq le wó jéyāng é a nghut. ¹⁶Chyúmdang má, “Hkāsū mù gā le, ó yuq wá, haú Yhumsing é myit lé sé mù, Yhang lé wó mhoqshit wú é lhu?”^r

ga kâ tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

Noqkuq Hpúng Má Gam Hkoq Lhûm É Hkyô

3 Gumang wui ê, hí hkûn, ngò gi, nungmoq lé, Woi-nyí eq sēng é bang lé dông wó taí é a nghut; mingkan eq sēng é bang dông nghut kômù, Hkrisduq má zonú su dut bang lé dông sheq taí wú é nghut lhê. ²Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.^{††} Ahkuí lháng, nungmoq gi, zoshuq apat lé a wó zo shi kó nghut ri. ³Nungmoq

^{††}3:2 Nungmoq lé naú byi huq é, gā é gi, lui é hkyô pé lé hí mhoq byí é lé gā lhê.

gi, mingkan eq sêng é bang ru nghut nyi ashî kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuí su nyi yap bum lhê a nghut kó luq? ⁴Rayuq gi, “Ngò gi, Poluq htâng châng lhê.” ga, góyuq gi, “Ngò gi, Apolo htâng châng lhê.” ga taí nyi bùm kô é nghut jáng, nungmoq gi, mingkan zo wuí nghut nyi bum lhê a nghut kó luq?

⁵Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut luí, ó le ó lé, haú Yhumsing èq hun tô é muzó eq rajung za wùn waq é nghut luí, nungmoq gi, ngá-nhik đông mai wó lumjáng kô é ru nghut lhê. ⁶Ngò gi, gabú danglù amyui lé hô kat, Apolo gi, wuí hpyun byi, nghut kôlhang, yuq kô lò nhang é gi, Garaí Gasang za ru nghut lhê. ⁷Haú mù, amyui hô kat sù eq wuí hpyun byi sù gi, ahkyak mó a nghut, yuq kô lò nhang é Garaí Gasang za sheq ahkyak ru nghut lhê. ⁸Amyui hô kat sù eq wuí hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó rá nghut lhê. ⁹Hkâsu mù gâ le, ngamoq gi, Garaí Gasâng é mù zui luzúm wuí nghut lhê; nungmoq gi, Garaí Gasâng é yò, Garaí Gasâng é yhùm nghut nyi akô.

¹⁰Garaí Gasang, ngo lé byí to bê jeju eq rajung za, yhùm saí kung sù rayuq đông, ngò gi, yhùm apùn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhang, yuq hkanmó gi, yhumsing saí é má rago sidiq rá lhê. ¹¹Hkâsu mù gâ le, hi to gù nghut é, Yesuq Hkrisduq nghu é yhùm apùn awang mai lai luí, ó yuq le, gotû yhùm apùn awang lé wó saí é

a nghut. ¹²Yhùm apùn awang hau é ahtoq má, hng, ngùn, hpaudap luqgok pé, sik, mhan, hkowá pé lé chùng mù saí jat kô é nghut jáng, ¹³yuq hkanmó é muzó hkâsu nghut é hkyô lé lhoq htoq shit é hui rá nghut lhê. Haí mù luí gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí èq lhoq htoq shit rá nghut lhê. Haú myi gi, yuq hkanmó saí é muzó hkasú é nghut é lé chyâm rá nghut lhê. ¹⁴Rayuq yuq saí é yhùm gi, ru gng nyi é nghut jáng, haú yuq gi, yhang é shigyaú chyunghuq wó yú rá nghut lhê. ¹⁵Nghut kôlhang, yhùm haú nyé gyó byuq é nghut jáng, yhang gi, yhùm sùm byuq é hui zo rá nghut lhê; yhang gi, asak lut kôlhang, myishâm mai wó lut é byù su dut rá nghut lhê.

¹⁶Nungmoq gi, Garaí Gasâng é noqkuq yhùm nghut luí, Garaí Gasâng é Woi-nyí gi, nungmoq má lúng nyí bê hkyô lé a sé kó lú? ¹⁷Rayuq yuq, Garaí Gasâng é noqkuq yhùm lé lhoq htên é nghut jáng, Garaí Gasang gi, haú yuq lé lhoq htên pyám rá nghut lhê. Hkâsu mù gâ le, Garaí Gasâng é noqkuq yhùm gi, choyiýung lhê; nungmoq gi, noqkuq yhùm haú nghut akô.

¹⁸Nungmoq gi, yhumsing gùng yhumsing hkálhoq nghoq kó. Nungmoq mâ é rayuq yuq, shí ipyat mâ é byù nyi a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut rá lhê. ¹⁹Hkâsu mù gâ le, mingkan shí mâ é hpaqchyí byéng-yá gi, Garaí Gasâng é hí má ngok é hkyô nghut ri. Haú gi, “Garaí Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri.”^s ga kâ tô é eq rajung za nghut ri. ²⁰Hau htoq agó, “Haú Yhumsing gi, hpaqchyí byéng-yá bò bang myit é hkyô pé akôm nghut é lé sê lhê.”^t ga le kâ tô

ri. ²¹Haù mù luí, ó yuq le, byù eq sêng é hkyô má gyáng é dang a tái kó sháng gaq! Lhunglhang gi, nungmoq é chyat nghut lhê. ²²Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng mã é hkyô le, banshoq gi, nungmoq é chyat nghut ri. ²³Nungmoq gi, Hkrisduq é nghut akô; Hkrisduq gi, Garai Gasâng é nghut ri.

Hkrisduq É Lagyô Pé

4 Haù mù luí, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é záu tô é hkyô pé lé tái pyô râ matú ap byí tô é hui bang dông sôn yù râ lhê. ²Haù dông nghut jáng, ap byí tô é hui bang gi, yhumsing lhumzui hkyô lé saksé shit râ dut lhê. ³Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. ⁴Haù mù gâ le, ngá gûng ngò mara a bò bûn é nghut kôlhang, haù gi, ngo lé wó lhoq sân-yúng byí é a nghut. Ngo lé jéyáng é sũ gi, haù Yhumsing nghut lhê. ⁵Haù mù, masat tô é ahkyíng a jé shimá haù lé le a jéyáng é za, haù Yhumsing jé lé shoq, láng nyí keq. Yhang gi, mauchut hkaù mã haq tô é pé lé byu-myàng nhâng mù, byu pé é myit nhikhlum mã lúng é hkyô lé lhoq htoq shit râ nghut lhê. Haù hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶Gumang wui ê, ngò gi, “Kâ tô é gũ mai hkâlai.” gâ é sanghkyâng é lichyúm lé, ngamoq chyáng mai nungmoq wó mhoy yù sháng gaq nghũ, nungmoq é akyu é matú, ngò eq Apolo mã haù pé lé yù mù dangtú kut é nghut lhê. Haù hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. ⁷Ó yuq wá, nang lé, góyuq

eq shaí shoq kut lhê lú? Nàng hap yu é a nghut le gi, wó râ lú? Nàng, hap yu é nghut le gi, a hap yu é dông haù mù nghutbûn nyi lhê lú?

⁸Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹Nghut kôlhang, sat râ matú doqdan huí é shúm byù pé lé su, Garai Gasang gi, lagyô pé nghut é ngamoq lé de de kut htoq shit bê nghũ, ngò wó myit ri. Ngamoq gi, nyi mi-nyí, joq mijoq, maumang lagyô pé eq waxâng zô wui é hí má, wú kûn jung dông dut nhang é huí nyi gù bê nghut lhê. ¹⁰Ngamoq gi, Hkrisduq é yanmai ngok é bang dông sôn yu é hui kôlhang, nungmoq kúm gi, Hkrisduq mã hpaqchyí gyaí bo é bang dông dut bekô hung! Ngamoq gi, wum nyhôm é bang dông sôn yu é hui kôlhang, nungmoq kúm gi, wúm bo é bang dông dut bekô hung! Nungmoq gi, hkunggâ é huí akô; ngamoq kúm gi, hkunggâ é a hui hung!

¹¹Shí hkyíng shí u jé shoq, ngamoq gi, zòmút wuìshit huí é, mebu ajeq amyhá dut huí é, nhuq bat huí é, yhumsing é nyi jowò a wó é bang nghut nyi lhê.

¹²Ngamoq gi, yhumsing loq eq yhang mù zui wum kat nyi lhê. Ngamoq gi, nhing pyâm é hui jáng, shimân byi, zing-rí é huí jáng, jân pyâm kut lhê. ¹³Ngamoq gi, lumù gansang é hui jáng, dang ngón dang nguí tú nyo lhê. Ngamoq gi, ahkuí jé shoq, myidàm htoq mã é hpoqkyuq hpoqpyâng eq mingkân é buzaq pé dông sôn yu é huí nyi lhê.

¹⁴Ngò gi, nungmoq lé hoq lhoq hpu râ matú haù pé lé kâ é a nghut, ngá é chyitdap zo wui lé dông lhoq pûn ky-ing râ matú ru nghut lhê. ¹⁵Nungmoq

gi, Hkrisduq má mhoqshit bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haû gabú danglù dông mai, Hkrisduq Yesuq má nungmoq é îwa dut é nghut lhê. ¹⁶Haû mù luí, ngò kut é su cháng keq nghû, ngò, nungmoq lé lung kat lhê. ¹⁷Hau é yanmai, ngò gi, haû Yhumsing má lhumzui sù nghut é, ngò chytidap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq má é ngá é asak duì hkyô lé, jowð hkangmó má é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lhê.

¹⁸Nungmoq má é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri. ¹⁹Nghut kôlhang, haû Yhumsing gyô é nghut jáng, ngò gi, nungmoq chyáng hân za jé lé râ nghut lhê; haû hkûn, ngò gi, nghutbùn é byù haû bang haî taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. ²⁰Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹Nungmoq hká dông ô nau akô lúhú? Ngò gi, nungmoq chyáng, nuichûm hkat èq, a nghut jáng, chytidap é eq nú-nhâm é myit mai lé lô ra râ lúhú?

Ashop É Dông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô

5 Nungmoq chyáng, ashop é dông gungsho zùm yap é hkyô joq é lé, hkyak taí hû lò bekô; haû gi, a lumjúng bâng chyáng lhang a dut wú é hkyô nghut é, yuqgè rayuq gi, yhangwâ é

myiwe eq nyì zô lhum nyi é hkyô nghut ri. ²Nghut kôle, nungmoq gi, nghutbùn nyi bum akô nhung! Haû dông a nghut é za, nungmoq gi, yón é myit tûn shit mù, haû su kut é byù lé, nungmoq é hpúng mai lhoq htoq pyâm le, a gè kó lúhú? ³Ngò gi, ngá gungdu, nungmoq eq rahá a nyi to kôlhang, ngá é i-mytit gi, nungmoq eq rahá nghut nyí luí, gungdu jé nyi tó é dông mai, haû hkyô kut é sù lé jéyáng doqdan gù nghut lhê. ⁴Nungmoq gi, nga-nhung é Yhumsing Yesuq é mying mai zup zing mù, ngá é i-mytit gi, nungmoq eq rahá nghut nyí luí, nga-nhung é Yhumsing Yesuq é a-tsam le, nungmoq eq rahá nghut nyi é hkûn, ⁵byù haû yuq lé, Tsadán é loq má ap byí pyám keq.^{††} Haû jáng, Yhumsing é buinyì má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyâm é hui râ nghut lhê.

⁶Nungmoq é nghutbun hkyô gi, ge é a nghut. Mún^{†††} ra tsuí zo gi, muk long gón lé wó lhoq daú nhang é lé, nungmoq a sé kó lúhú? ⁷Nungmoq gi, múnchi a bo é bang nghut nyí kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhung é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸Haû mù luí, nga-nhung gi, agè agaú hkyô eq hpuzo nhâng hkyô nghut é múnchi axau bo é dông a nghut é za, lhumzui hkyô eq tengmán hkyo é muk nghut é, múnchi a bo é muk èq, Poí haû lé kut nyí sháng.

⁹Ashop é dông gungsho zùm yap é bang eq hkâzûm kó nghû, ngò, nungmoq lé, ngá é laiká má kê kat byi bê nghut lhê. ¹⁰Nghut kôlhang, mingkan shí eq sêng é, ashop é dông gungsho zùm yap é

^{††}5:5 *Tsadán é loq má ap byí pyám keq* gâ é gi, hpúng byû wuè eq a zùm yap nhâng lo râ lé taí é nghut lhê.

^{†††}5:6 *Mún* gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê.

bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haú su ru nghut le gi, mingkan htoq shî mai nungmoq htoq ló byuq ra kô râ nghut lhê. ¹¹ Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuí, ngò, nungmoq lé kâ kat nau é nghut lhê. Haú sù é byù eq gi, rahá lhang hkâzo kó.

¹² Haú noqkuq hpúng shinggan mâ é bang lé jéyáng rà gi, ngò eq haí sêng lhê lú? Nghut kôlhang, hpúng ahkaú mâ é bang lé nungmoq jéyáng rà dut lhê.

¹³ Hpúng shinggan mâ é bang lé gi, Garai Gasang jéyáng rà nghut lhê. Nghut kôlhang, “Haú agè agáu é sù lé, nungmoq chyáng mai lhoq htoq pyám keq.”^u gâ tô ri.

Lumjínng Bàng Hkaú Má Jéyáng Lhùm É Hkyô

6 Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haú hkyô lé jéyáng nhâng rà matú, haú sân-yúng bâng é hí má taí rà malaí, Garai a wó bâng é hí má wám taí rà lú? ² Haú sân-yúng bang gi, mingkan lé jéyáng rà nghut é hkyô lé, nungmoq a sé kó lú? Nungmoq gi, mingkan lé jéyáng rà bang nghut kôle nhíng, tiq é mú pé lé wó jéyáng é bang a nghut kó lú? ³ Nga-nhúng gi, maumâng pé lé jéyáng rà nghut é hkyô lé, nungmoq a sé kó lú? Haú mù, shí pyat mâ é hkyô pé lé, gè gè yhang wó jéyáng kô râ nghut lhê ô! ⁴ Haú mù luí, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kô râ lú? ⁵ Ngò, haú su nghû taí é gi, nungmoq lé hoq hpu nhâng rà matú nghut lhê. Lumjínng bâng

chyáng dang-rhâng lhùm é hkyô lé wó jéyáng rà hpaqchyí luq shoq bo é byù, nungmoq chyáng rayuq lhang a nyì dut kô râ lú? ⁶ Nghut kôlhang, nungmoq gi, gumang yhangchang rayuq eq rayuq, a lumjínng bâng é hí má lhang rùng shok lhùm akò nhung!

⁷ Nungmoq hkaú má mù jéyáng lhùm é hkyô joq é nghut jáng, nungmoq gi, sum lugù nghut bê. Góyuq èq shut le lhang rú ge lhê a nghut kô lú? Mhaú zô é huí le lhang rú gè lhê a nghut kô lú? ⁸ Nghut kôle, nungmoq yhang gi, mhaú zo kô é eq shut kô é nghut luí, haú gi, nungmoq é gumang wuì lé kut é nghut lhê.

⁹ Agè agáu é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyì kó. Ashop é đông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhùm é mara kut shut é bang le, ¹⁰ hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut.

¹¹ Nungmoq mâ é ra-am gi, haú su kut kô é bang nghut akò. Nghut kôlhang, nungmoq gi, nga-nhúng é Garai Gasâng é Woi-nyí eq Yhumsíng Yesuq Hkrisduq é myìng mai, mara hkyut san byí é, lhoq sân-yúng é eq chí sân pyám byí é hui bekò nghut ri.

Ashop É Đông Gungsho Zùm Yap É Hkyô

¹² “Jung hkangmó kut rà ahkáng ngò wó lhê.” Nghut kôlhang, jung hkangmó gi, akyù byí é a nghut. “Jung hkangmó kut rà ahkáng ngò wó lhê.” Nghut kôlhang, haí jùng èq le ngo lé wó sing pyám rà a nghut. ¹³ “Zoshuq gi, wamdaú

é matú nghut mù, wamdau gi, zoshuq é matú nghut ri.” ga nungmoq ra-am taí kó rã nghut lhê. Nghut kôlhang, Garai Gasang gi, haù í jung é lé lhoq htên pyám rã nghut lhê. Gungdu gi, ashop é đông gungsho zùm yap hkyo é matú a nghut é za, haù Yhumsing é matú nghut mù, haù Yhumsing gi, gungdú é matú nghut ri. ¹⁴Garai Gasang gi, Yhâng é a-tsâm èq, haù Yhumsing lé, shi é mai lhoq dui toq yù bê nghut mù, nga-nhúng lé le lhoq dui toq yù rã nghut lhê. ¹⁵Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haù nghut le nhing, Hkrisduq é gungsho showui showang pé lé yù mù, shiwa myhí pé eq rading ralhú za kut pyám nhâng kô rã lú? Hkã-nhám le a ge dut nhâng! ¹⁶Shiwa myhí eq gungsho zum é sù gi, yhang eq gungsho ralhú za dut bê hkyô lé, nungmoq a sé kô lú? Hkãsu mù gã le, “Yhangnhik gi, gungsho ralhú za dut kô rã nghut lhê.”^v ga taí tô ri. ¹⁷Nghut kôlhang, haù Yhumsing eq rading ralhú za dut é sù gi, woi-nyí má Yhang eq ralhú za dut bekô nghut ri.

¹⁸Ashop é đông gungsho zùm yap é hkyô lé koi pyám keq. Byù rayuq kut shut é gotú mara pé banshoq gi, yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹Nungmoq é gungdu gi, Garai Gasang chyáng mai nungmoq wó yù bê nghut é, nungmoq má lúng nyi é Chyoiyúng Woi-nyí é no-qkuq yhúm nghut é lé, nungmoq a sé kô lú? Nungmoq gi, yhumsing gùng lé sing é bang a nghut. ²⁰Hkãsu mù gã le, nungmoq gi, ahpau ralhú byi mù wui hpyit tô é hui bê bang nghut akô. Haù mù luí, nungmoq é gungdú èq, Garai Gasang lé, hkunggã é hkyô shit nyí keq.

Myí Yu É Eq Sêng É Hkyô

7 Ahkuí, nungmoq kã kat é hkyô pé eq séng luí ga jang, yuqgè rayuq gi, myi a yu le gè ri. ²Nghut kôlhang, ashop é đông gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó rã lhê; myiwe hkangmó gi, yhumsing é yuqgè wó rã lhê. ³Haù yhumsing hpó gi, wò joq é eq rajung za, yhâng yhumsing myhí eq zùm sháng gaq; haù đông za, yhumsing myhí le, yhâng yhumsing hpó eq zùm sháng gaq. ⁴Haù yhumsing myhí é gungdu gi, yhânggùng yhang za sêng é a nghut, yhâng é yhumsing hpó eq le sêng lhê. Haù eq rajung za, yhumsing hpó é gungdu gi, yhânggùng yhang za sêng é a nghut, yhâng é yhumsing myhí eq le sêng lhê. ⁵Nungmoq myit huí lhum luí, kyúdung é má rago ap nóng rã ahkyíng ayoq za a nghut jáng gi, rayuq eq rayuq hkãhe lhum kó. Nungmoq yhumsing gùng lé a wó hkang é yanmai, Tsadán èq gunlaú é a hui kô sháng gaq, ahkyíng ayoq haù lai jáng, rahá dum zùm keq. ⁶Ngò, haù su nghú taí é gi, hkunmó hkyô é đông a nghut, ahkáng byí kat é đông ru nghut lhê. ⁷Byù banshoq bang gi, ngò su nyi rã lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasang chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸Ahkuí, myiwe a yù lô é bang eq chuimó pé lé ngò taí kôlé, ngò su, haù đông jâng nyi pyám kô é nghut le, yhangmoq é matú ge é hkyô nghut ri. ⁹Nghut kôlhang, yhumsing gùng lé a wó hkang kô é nghut le gi, yhangmoq, myi yù myi ló rã lhê; hkãsu mù gã le, myi su nyé luí ô nau nyi rã malaí, myi yu myi ló le je ge lhê.

¹⁰Myi yû bê bang lé, ngò, hkunmó hkyô kôlé, shî gi, ngò đông hkyô é a nghut, Yhumsing chyáng mã é ru nghut lhê: Yhumsing myhí gi, yhâng é yhumsing hpô chyáng mai a ge gang rã nghut lhê. ¹¹Nghut kôlhang, yhang gâng é nghut jáng, myi a dum ló é za nyi rã lhê, haû a nghut jáng, yhâng é yhumsing hpó eq dum xoq yû rã lhê. Yhumsing hpó le, yhâng é yhumsing myhí lé a ge kâng pyám rã nghut lhê.

¹²Góbang lé ngò shî su nghû taí kôlé, shî gi, Yhumsing chyáng mã é a nghut, ngò đông mai taí é ru nghut lhê. Gumang rayuq yuq gi, lumjínng sũ a nghut é yhumsing myhí wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám rã nghut lhê.

¹³Myiwe rayuq gi, lumjínng sũ a nghut é yhumsing hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang rã nghut lhê.

¹⁴Hkâsu mù gâ le, haû a lumjínng sũ yhumsing hpó gi, yhâng yhumsing myhí đông mai lhoq sân-yúng é hui bê nghut mù, a lumjínng sũ yhumsing myhí le, lumjínng sũ nghut é yhâng é yhumsing hpó đông mai lhoq san lhoq yúng é hui bê nghut ri. Haû a nghut jáng, nungmoq é zo wuí gi, a sanséng dut kô rã nghut lhê; nghut kôlhang, yhangmoq gi, haû đông mai, chyoiyúng bekô nghut ri.

¹⁵Nghut kôlhang, haû a lumjínng sũ gâng ló naû jáng gi, gâng ló sháng gaq. Lumjínng é yuqgè nghut nghut, myiwe nghut nghut, haû sũ é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nguingón shoq nyi sháng gaq ga ji yû bê nghut lhê.

¹⁶Yhumsing myhí ê, náng é yhumsing hpó lé wó hkyi yû rã nghû, hkâsu wó sé rã lhú? Yhumsing hpó ê, náng é yhumsing myhí lé wó hkyi yû rã nghû, hkâsu wó sé rã lhú?

¹⁷Hká đông nghut kôlhang, yuq hkangmó gi, Garai Gasang, yhang lé ji

yu tô é hkûn, haû Yhumsing mai yhang lé nyi nhang tô é đông asak dui nyi rã lhê. Haû gi, noqkuq hpúng pé banshoq má ngò tô to byi é tarã nghut lhê. ¹⁸Byû rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sũ đông a dut byuq sháng gaq. Byû rayuq gi, ji yu é huí é hkûn, ahpyo-kuq hpyit a hkam yu to shî é nghut jáng, ahpyo-kuq hpyit a hkam yu sháng gaq. ¹⁹Ahpyo-kuq hpyit hkâm hkyô gi, haû ahkyak a nghut; ahpyo-kuq hpyit a hkâm hkyô gi, haû ahkyak a nghut. Garai Gasâng é hkunmó pé lé châng nyi é za sheq ahkyak nghut lhê. ²⁰Yuq hkangmó gi, yhang lé Garai Gasâng èq ji yu é hkûn lhê su xoq nyi nyi rã lhê. ²¹Nàng gi, ji yû huí é hkûn jùn dut nyi é lhú? Haû hkyô lé hkâ-myt chiq. Nghut kôlhang, nàng gi, luthkyô wó yu é nghut jáng, haû đông nyi aq. ²²Hkâsu mù gâ le, haû Yhumsing èq ji yu é huí é hkûn, jùn dut nyi é sũ gi, haû Yhumsing èq lhoq lhut yu é byû nghut bê. Haû eq rajung za, ji yu é huí é hkûn, luthkyô wó é sũ gi, Hkrisduq é jùn nghut ri. ²³Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haû mù, byu pé é jùn hkâdut kó. ²⁴Gumang wui ê, yuq hkangmó gi, yhumsing lé Garai Gasâng èq ji yu é huí to bê đông, Yhâng é hí má xoq nyi nyi rã lhê.

²⁵Ahkuí, zomyi zorâm wui é hkyô taí kôlé. Haû Yhumsing chyáng mã é hkunmó gi, ngò a wó; nghut kôlhang, Yhumsing é shogyo nhikmyin é yanmai, lumjínng sũ rayuq nghut nyi é đông, ngò, nungmoq lé hkyô shit rã nghut lhê. ²⁶Ahkuí hui zô é wuîhke hkyo é yanmai, nungmoq gi, yhumsing nyi to é su xoq nyi nyi le je ge ri nghû, ngò wó myit ri. ²⁷Nàng, myiháng bê a nghut lhi? Lhoq kang rã hkâda lo. Nàng, myi a háng shi a nghut lhi? Myi hkâhò lo. ²⁸Nghut kôlhang, nàng, myihâng é nghut le gi, mara

a nghut. Zomyi gi, myi ló é nghut jáng, mara a nghut. Nghut kôlhâng, myihâng é bang gi, shí pyat má wuífke hkyô pé myo myo hui kó rá nghut mù, ngò, nungmoq lé haû mai hkyi yù nau ri.

²⁹Gumang wuì ê, ngò taí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang đông nyì kó sháng gaq.^{§§} ³⁰Yón ngaû huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹haû mingkan zè pé lé chung é bang gi, haû pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lhê é azòng isâm gi, laí ló nyi é nghut lhê.

³²Ngò gi, nungmoq lé a myit myo nhâng naù. Myi a yù shí é sù gi, haû Yhumsíng lé hkâsu wó gabú nhâng rá matú, haû Yhumsíng é muzó lé myit chiq nyi ri. ³³Nghut kôlhâng, myi yù bê sù gi, yhâng é yhumsíng myhí lé hkâsu wó gabú nhâng rá matú, mingkan shi é muzó eq séng luí myit chiq nyi ri. ³⁴Haû mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haû Yhumsíng lé rago wó ap nóng rá matú, Yhumsíng é muzó pé eq séng luí myit chiq nyi ri. Nghut kôlhâng, myi ló bê myiwe gi, yhâng é yhumsíng hpó lé hkâsu wó gabú nhâng rá matú, mingkan shi é muzó eq séng luí myit chiq nyi ri. ³⁵Ngò, haû su nghú taí é gi, nungmoq é matú ge é hkyô nghut lhê; nungmoq lé tara èq zú zing é a nghut é za, myit a byò lo shoq Yhumsíng lé wó ap nóng rá matú, jô é đông asak wó duí kô sháng gaq nghu é hkyô ru nghut lhê.

³⁶Nghut kôlhâng, rayuq yuq gi, yhang dùng tô é zomyi gyíng lé a htuk é đông

kut nyi é su wó myit ngàm jáng, myiwe haû asak kô lo nyi mù, hâng yù rá dut bê nghú myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum rá lhê. ³⁷Nghut kôlhâng, yhang gi, haû hkyô lé yhâng é myit mai wó lhoq zím pyâm é nghut mù, yut yut ô nau hkyo é ahkaû má a nghut é za, yhumsíng ô nau é hkyô lé wó hkúm zing pyâm é sù nghut luí, haû zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸Haû mù luí, zomyi gyíng haû lé hâng yu é sù gi, jô é hkyô kut bê nghut ri; nghut kôlhâng, zomyi gyíng haû lé a hâng yu é sù gi, je ge é hkyô kut bê nghut ri.

³⁹Myiwe rayuq gi, yhâng é yhumsíng hpó rú dui nyi nyì, yhang eq xoq tô ashí nghut lhê. Nghut kôlhâng, yhâng é yhumsíng hpó shi byuq é nghut jáng, yhang gi, myi ló rá ahkáng dum wó bê nghut lhê, nghut kôle, haû yuq gi, Yhumsíng eq séng é sù dut rá lhê. ⁴⁰Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut rá nghut lhê. Ngò le, Garai Gasâng é Woi-nyí wó sù nghú wó myit ri.

Hparà Lhò Lé Tíng Byí É Zoshuq

8 Ahkuí, hparà lhò pé lé tíng byí é zoshuq hkyô: nga-nhúng banshoq bang gi, haû hkyô eq séng luí sê lhê. Sê é hkyô gi, nghutbun sê lhê; nghut kôlhâng, chyitdap myit gi, lhoq kô myhang lhê. ²Byù rayuq yuq gi, rajung jung lé sé bûn é nghut le, yhang sé âng é lé hláng a sé shi nghut ri. ³Nghut kôlhâng, Garai Gasang lé chyitdap é sù gi, Garai Gasâng èq sê é sù nghut ri.

⁴Haû mù luí, hparà lhò pé lé tíng byí é zoshuq lé zô é eq séng luí gi: hparà lhò gi,

§§7:29 A wó é bang đông nyì kó sháng gaq gâ é gi, Garaí mù lé je myit zuq nyì sháng gá naù é nghut lhê.

mingkan má hái lháng a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê. ⁵Hkâsu mù gâ le, mauhkúng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, “hparà pé” myo myo eq “yhumsing pé” myo myo nyi kôlhang ⁶nga-nhúng é matú gi, Íwa nghut é Garai Gasang rayuq za nyi é nghut mù, lhungl-háng gi, Yhang mai hpan é nghut luí, nga-nhúng gi, Yháng é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhungl-háng gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷Nghut kôlhang, yuq hkanmó gi, háu hkyô lé sê gam hkoq yu é a nghut. Ra-am gi, ahkuí jé shoq hparà lô pé má mán byuq kô é yanmai, háu sù é zoshuq lé yhangmoq zô é hkún, hparà lô lé tìng byi é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bôn akô nghut ri. ⁸Nghut kôlhang, zoshuq gi, nga-nhúng lé, Garai Gasang shut shuí chyâng e é a nghut. Nga-nhúng a zô é nghut le gi, je sùm byuq lô é a nghut, zô é nghut le gi, je ge lo é a nghut.

⁹Háu su ga kôlhang, nungmoq a htung a htê zô é hkyô gi, lumjìng myit wum nyhóm bâng é matú myit leqbat jowò a dut shoq sidiq keq. ¹⁰Hkâsu mù gâ le, sumsé hpaqchyí wó é bang nungmoq gi, hparà lho é noqkuq yhùm má zô nyi kô é lé, háu myit sôn sê é hkyô má wum nyhôm é sù rayuq yuq myang é nghut jáng, hparà lô pé lé tìng byi é zoshuq lé, yhang wám zo rã lé wum byi é a dut kó rã lú? ¹¹Háu mù, Hkrisduq shí hkám byi bê nghut é, wum nyhôm é gumang hpó háu yuq gi, nungmoq é sumsé hpaqchyí èq lhoq htên pyâm é hui berà nghut lhê. ¹²Nungmoq

gi, háu hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkún, Hkrisduq lé mara kut shut é nghut bekô. ¹³Háu mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo rã nghut lhê.

Lagyo Rayuq É Ahko Ahkáng

9 Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhúng é Yhumsing Yesuq lé myang wú bê sù, a nghut lú? Nungmoq gi, háu Yhumsing má, ngò zui saí é muzó é ashi pé chyat, a nghut kô lú? ²Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, háu Yhumsing má, ngò lagyo nghut é hkyô saksé dizik nghut bum akô.

³Ngá ahtoq má jéyáng bang lé, ngá gùng ngò taí hung kat kôlé. ⁴Ngamoq gi, zo rã shuq rã ahko ahkáng a wó é bang nghut lhê lú? ⁵Gotú lagyo pé eq Yesuq é yhanggu yuqzô pé eq Kehpa kut é su, lumjìng sù nghut é yhumsing myhí shuí chùng rã, ngamoq, ahko ahkáng a wó é nghut lhê lú? ⁶Ngò eq Barnaba baú za, asak dui hkyo é matú mù zui ra rã lú?

⁷Ó yuq wá, yhumsing zoshuq wùn luí, gyè mù wùn waq rã lú? Ó yuq wá, tsi-biyiq hkyâm saí mù, háu mà é tsi-biyiq shi a zo kut rã lú? Ó yuq wá, sau rém mù, sau naú a shuq kut rã lú? ⁸Ngò gi, shí hkyô pé lé xângzo hkyam đông za taí é nghut lhê lú? Háu tarâ má le, rajung za taí tô lhê, a nghut lú? ⁹Hkâsu mù gâ le, háu Mosheq é tarâ má, “Guq nâng nyi é no lé nhuttsung hkâ-tsùng to byi.”^w ga kâ tô ri. Garai Gasang gi, no eq séng luí za chiq é nghut lhê lú? ¹⁰Gè gè yhang, yhang gi, nga-nhúng é matú taí é a nghut

kô lúh? Nghut lhê, haû gi, nga-nhûng é matú kâ to byî é nghut lhê. Haû mù gâ le, yò hpuq sù, yò hpuq é eq, guq bat sù, guq bat é gi, kyô chòm sù yù rà lé my-oqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng má é mingkan zè lé sù yu é nghut jáng, lùm myô é dut byuq bekô lúh? ¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó rà lhê a nghut kó lúh?

Nghut kôlhang, ngamoq gi, ahko ahkáng haú lé a yu é nghut lhê. Haû yù rà malaí, Hkrisduq é gabú danglù gi, hkûm zing pyâm é a hui rà matú sheq, jung hkanmó lé ngamoq hkam jân nyi lhê. ¹³ Haû noqkuq yhûm má mù zuí é bang gi, yhangmoq é zoshuq lé haû no-qkuq yhûm mai wó é hkyô eq, hkungga gyap má dojaú é bang gi, hkungga gyap má nhông byî é ra-am lé myàng zô é hkyô lé, nungmoq a sé kô lúh? ¹⁴ Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú rà lhê ga, haû Yhumsing hkunmó hkyô to bê nghut ri.

¹⁵ Nghut kôlhang, ngò gi, ahko ahkáng haú pé haí lé le a yu é nghut lhê. Nungmoq, ngo lé haû su lhom kut byi rà lé my-oqbyù mù, ngò, shí hkyô lé kâ é a nghut. Hkâsu mù gâ le, ngò haû su gumrong é hkyô lé, rayuq yuq lhoq htên pyám byi rà htoq má, ngò shi byuq le lhang je ge ri. ¹⁶ Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò dínnyé wó rà nghut lhê. ¹⁷ Yhumsing nau é myit mai ngò hko é nghut jáng, shigyau chyunghuq wó rà nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut rà nghut lhê. ¹⁸ Haû mù luí, ngá é shigyau chyunghuq gi, haí nghut

lhê lúh ga jang, haû gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô má é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù rà matú, ngá gûng ngò, yuq hkanmó é jùn kut nyi lhê. ²⁰ Ngò gi, Yudaq byu pé lé shuí lhing yù rà matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlhang, tarâ hkaú má é bang lé shuí lhing yù rà matú, tarâ hkaú má nyi bâng chyáng nghut nyi é hkûn, tarâ hkaú má é byù rayuq đông dut nyi lhê. ²¹ Ngò gi, tarâ a wó bang lé shuí lhing yù rà matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaú má nyi sù nghut lhê. ²² Ngò gi, wum nyhóm bang lé shuí lhing yù rà matú, wum nyhóm bâng chyáng nghut nyi é hkûn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyí sháng gaq nghú, byù lhunglhang bâng chyáng, byù ajà jà đông nyi nyi lhê. ²³ Ngò gi, gabú danglù mai wó é shimân jeju pé lé wó chòm hkam yù sháng gaq nghú, gabú danglù é yanmai haú pé banshoq lé kut é nghut lhê.

²⁴ Din shingjóng poí má đin rà bang banshoq đin kôlhang, rayuq za shigyau chyunghuq wó é hkyô lé, nungmoq a sé kô lúh? Chyunghuq wó rà matú đin keq. ²⁵ Sup poí má shingjóng lhùm é bang yuq hkanmó gi, yhumsing gùng yhumsing tarâ htan é đông lhoq mhân yù rà lhê. Yhangmoq gi, gîng nyi rà a nghut é janmaú wó rà matú, haû su kut é nghut akô; nghut kôlhang, nga-nhúng gi, ah-tum abyuq gîngtîng nyi rà nghut é janmaú wó rà matú shikut é nghut lhê.

²⁶ Haû mù luí, ngò gi, jum đĩn đĩn é byù rayuq su đĩn é sũ a nghut. Ngò gi, lai lé bat é byù rayuq su, akôm má bat é sũ le a nghut. ²⁷ Ngò gi, góbãng chyáng mungdang hko é htâng má, ngá gũng ngò, shigyaú chyunghuq eq a gingdán sũ a dut sháng gaq nghũ, ngá gũng lé gyai yhang lhoq mɦn yù mù, ngá gung lé jùn kut yu nyi lhê.

Israellaq Pê É Labaû Mai Sidiq Byí É Hkyô

10 Gumang wuì ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkũn, nga-nhũng é íchyí iwa pé banshoq bang gi, mhutdũm ô má nyi mù, Nɦng Nè mai wó lai byit kô é nghut lhê.* ² Yhangmoq banshoq bang gi, mhutdũm eq Nɦng Nè má, Mosheq é chángzô pé đông baptisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wuì shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haû gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gũng sôm lé yoso pé má myhĩn so san kut pyâm é hui bekô nghut ri.

⁶ Haû hkyô pé dut htoq é gi, agè ashop hkyô má yhangmoq myit tuí bũm é su, nga-nhũng a myit tuí nyi rã matú nga-nhũng é azòng dut bê nghut ri. ⁷ “Byu pé gi, zũng mù, zo luí shuq luí, a lumjĩng bang kut é đông, toq mù, ye bum akô.”^x ga kã tô é eq rajung za, yhangmoq mã é ra-am hparà noq é bang dut byuq é su, nungmoq hkãdut kó. ⁸ Yhangmoq mã é

ra-am gi, ashop é đông gungsho zũm yap é hkyô shut kômù, ra-nyí má za í mũn sum hkyĩng yuq shi byuq é su, ashop é đông gungsho zũm yap é hkyô le, nga-nhũng gi, a ge kut shut rã nghut lhê. ⁹ Yhangmoq mã é ra-am gi, haû Yhum-sĩng lé chyâm luí, lhangmuì pè eq hte sat é huì bũm kô é su, haû Yhumsĩng lé, nga-nhũng gi, a ge chyâm rã nghut lhê. ¹⁰ Yhangmoq mã é ra-am gi, nhutluq shô-myo kôluí, lhoq htên é maumãng eq sat pyâm é huì kô é su, nungmoq gi, nhutluq shô-myo hkãkut kó.

¹¹ Yhangmoq chyáng wú yù rã azòng đông haû pé dut htoq luí, ló htáng rã ipyat pé má nyi ɦng to bang nga-nhũng é matú sidiq byi rã đông kã to bê nghut ri. ¹² Haû mù luí, nungmoq gi, yap gĩng nyi bê su ngàm kô é nghut jáng, a leqbat rã matú sidiq nyi keq! ¹³ Byu chyáng htoq sê é gunglaú hkyô za nungmoq hui rã nghut lhê. Garai Gasang gi, lhumzui sũ nghut lhê mù, nungmoq a wó jãn é gunglaú hkyô lé hui nhâng rã a nghut. Nghut kôlhang, nungmoq gunglaú huì é hkũn, Yhang gi, haû lé nungmoq wó jan rã matú, hkyô htong byi rã nghut lhê.

Hparà Lhò Noq Hkyô Lé Koi Pyâm Rã Hkyô

¹⁴ Haû mù luí, ngò chyitdap é luzúm wuì ê, hparà lhò noq hkyô lé koi pyâm keq. ¹⁵ Nɦik gying bang lé ngò taí lhê; ngò haí taí nyi é hkyô lé nungmoq gũng myit sôn yù keq. ¹⁶ Nga-nhũng, jeju bũn nyi é jeju góm lé shuq é hkũn, Hkrisduq é sui má chôm zũm bê a nghut kó lhú? Nga-nhũng, myhik hpê é muk lé zô é hkũn, Hkrisduq é gungdu má chôm zũm bê a nghut kô lhú? ¹⁷ Haí mù gâ le, muk htung ralhũm za nghut mù, nga-nhũng gi, myo myo nghut kôle ragũng za nghut

***10:1** Bun zo ralhũm mai raxê lhum gi, Htoq Ló Laiká má bo é Mosheq htâng cháng bãng é hkyô lé kã tô é nghut lhê.

^x**10:7** Htoq Ló 32:6

nyi lhê. Hkâsu mù gâ le, nga-nhúng ban-shoq bang gi, haû rahtung zâ é muk lé chôm gâm zô é bang chyat nghut lhê.

¹⁸ Israelaq byu pê é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lú? ¹⁹ Hparà lhô, a nghut jáng, hparà lhô lé títng byi é hkungga gi, rajung jung nghut lhê nghú, ngò taí é lú? ²⁰ Haû su taí é a nghut, a lumjínng bâng é hkungga gi, Garai Gasang lé nhông byi é a nghut, nat gâng pé lé títng byi é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹ Nungmoq gi, haû Yhumsing é góm lé le, nat gâng pê é góm lé le, ge shuq râ a nghut; nungmoq gi, haû Yhumsing é zangbó má le, nat gâng pê é zangbó má le, rahá ge bo lòm râ a nghut. ²² Nga-nhúng gi, haû Yhumsing lé manôn nhâng nau é bang dut râ a nghut kó lú? Nga-nhúng gi, Yhâng htoq je wúm bo é bang nghut lhê lú?

Lumjínng Su É Luthkyô

²³ “Jung hkangmó kut râ ahkáng wó lhê.” nghut kôlhâng, jung hkangmó gi, akyû wó é a nghut. “Jung hkangmó kut râ ahkáng wó lhê.” nghut kôlhâng, jung hkangmó gi, byù lé wó kô làm nhang é a nghut.† ²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

²⁵ Sho úng gai má úng é haí lé lé, úng-âng é myit èq a myi gôn é za zo keq. ²⁶ Hkâsu mù gâ le, “Myidàm htoq eq haú má joq é jung hkangmó gi, Yhumsing é chyat nghut lhê.”y gâ tô ri.

²⁷ A lumjínng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myi gôn é za, nungmoq hí má to byi é gû lé zo keq.

²⁸ Nghut kôlhâng, rayuq yuq, nungmoq lé, “Shi gi, hparà lhô lé títng byi bê nghut lhê.” ga taí kyô é nghut jáng, nungmoq lé taí kyo su é yanmai le, myit úng-âng é yanmai le, haû lé hkâzo kó. ²⁹ Úng-âng é myit haû gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haí mù góyuq é úng-âng é myit èq jéyáng é huí nhang lhê lú? ³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haí mù lumu pyâm é ngò hui râ lú?

³¹ Haû mù luí, nungmoq zo kôlhâng, shuq kôlhâng, haí kut kôlhâng, Garai Gasâng é hpungwup shingkâng é matú chyat kut keq. ³² Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghú, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11 Ngò gi, Hkrisduq é alik châng é su, nungmoq gi, ngá é alik châng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bún nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang

†10:23 Bun zo 23 mâ é dangngho gi, Korinhtuq byu pé lhaq taí é dang nghut lhê.

y10:26 Hkya-on 24:1

nghut ri. ⁴ Yuqgè hkanmó gi, kyúdúng le nghut nghut, myiqhtoi htoi le nghut nghut, yhâng é ulhum lé nghop tô é nghut jáng, yhâng é ulhúm é aróng lé lhoq hpoi pyâm é nghut bê. ⁵ Myiwe hkanmó gi, kyúdúng le nghut nghut, myiqhtoi htoi le nghut nghut, yhâng é ulhum lé a nghop tô é nghut jáng, yhâng é ulhúm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyám ra rá nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra rá nghut lhê. ⁷ Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop rá é nghut lhê. Myiwe kúm gi, yuqge é hpungwup shingkang nghut ri. ⁸ Hkâsu mù gâ le, anham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.^z ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. ¹⁰ Haú nghut é yanmai le, maumang lagyo pè é yanmai le, myiwe gi, ahko ahkáng kumlhá đông yhâng é ulhum lé nghop rá dut lhê.

¹¹ Nghut kôlhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkanmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyúdúng é gi, htuk kô rá lhú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng,

yhâng é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htúnglí èq nungmoq lé mhoqshit lhê, a nghut kô lhú? Hkâsu mù gâ le, xâm hîng tô é gi, nghop rá zè đông yhang lé byí tô é nghut lhê. ¹⁶ Rayuq yuq, haú hkyô lé taí dang-rháng nau é nghut jáng, ngamoq chyáng le, Garai Gasâng é noquq hpung pè chyáng le, gotú htúnglí a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut rá htoq má akyú a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noquq hpúng ralhúm đông nungmoq zup zîng é hkún, nungmoq hkaú má gam hkoq hkyô joq é lé wó gyô é nghut luí, têng é le bò rá nghú, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit rá matú, nungmoq ahkaú má gam hkoq lhum hkyô joq rá dut lhê. ²⁰ Nungmoq rahá zup zîng kô é hkún, nungmoq gi, haú Yhumsing é myinzang zô é a nghut kó. ²¹ Hkâsu mù gâ le, nungmoq zô é hkún, góyuq lé le a lánng é za, ó le ó hí yù zô akô. Haú mù, rayuq gi, zo mut huí nyì, góyuq gi, shuq wut to dut akô nghut ri. ²² Nungmoq gi, zo jang shuq jang yhâm a wó bang nghut akô lhú? Garai Gasâng é noquq hpúng lé wú tiq pyâm kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghú taí kó rá lhú? Haú pè é yanmai, ngò, nungmoq lé hkya-on rá lhú? Ratsuí lháng a wó dut!

²³ Hkâsu mù gâ le, haú Yhumsing chyáng mai ngò wó hap yu é gú lé, nungmoq lé lhai byi bê nghut lhê: Haú Yhumsing Yesuq gi, Yhang lé ap pyám huí é

myìn má, muk lé yù mù, ²⁴ jeju hkya-ôn é htâng má, haù lé myhik hpé mù, taí é gi, “Shî gi, nungmoq é matú Ngá é gungsho nghut lhê; Ngo lé bûn nyì râ matú, shî su kut nyí keq.” gâ ri. ²⁵ Haù eq rajung za, myinzang bàn zô é htâng má, Yhang gi, góm lé le yù mù, “Góm shî gi, Ngá é sui mà é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyì râ matú shî su kut keq.” gâ taí ri. ²⁶ Hkâsu mù gâ le, nungmoq gi, muk shî lé zo luí, góm shî lé shuq é hkangmó, haù Yhumsing shî hkâm é hkyô lé, Yhang jé lé shoq, shit kyô nyì râ lhê.

²⁷ Haù mù luí, ó yuq nghut kôle, a gingdán é dông Yhumsing é muk haù lé zo mù, góm haù lé shuq é nghut jáng, haù Yhumsing é gungdu eq sui lé shut é mara wó bê nghut lhê. ²⁸ Haù mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haù Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê. ³⁰ Haù nghut é yan-mai, nungmoq mà é byù myo myo gi, wum nyhôm é, nõhpyo huí é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haù Yhumsing èq jéyáng é hkûn, nga-nhúng gi, mhoqshit é huí nyì gù bê nghut lhê.

³³ Haù mù luí, ngá é gumang wui ê, nungmoq gi, zo râ nghû rahá zup zîng é hkûn, rayuq eq rayuq lánghum keq. ³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhùm má zô chûng râ lhê.

Gotú myit tô é hkyô pé gi, ngò jé lé é hkûn sheq shit kyo râ nghut lhê.

Woi-nyí Hkyô Eq Sêng É Chyunghuq Pé

12 Gumang wui ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. ² Nungmoq gi, a lumjîng bang nghut nyí kô é hkûn lé, dang a nyo é hparâ lhô noq râ matú hkyô shuí nghoq é hui kô é hkyô lé, nungmoq sê lhê. ³ Haù mù luí, “Yesuq gi, nhîng pyâm é hui sháng gaq.” ga, Garai Gasâng é Woi-nyí mai taí é byù ó yuq le a nyi é eq, haù Chyoiyúng Woi-nyí mai za a nghut jáng, “Yesuq gi, Yhumsing nghut lhê.” ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haù pé ban-shoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. ⁸ Rayuq lé gi, Woi-nyí haù mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjîng myit byí é nghut ri; dum góyuq lé gi, Woi-nyí hau èq, nõ lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haù pé é lichyúm taí sân kyô é ahkáng, byí é nghut ri. ¹¹ Chyunghuq haù pé banshoq gi, Woi-nyí hau èq za kut é loqmú chyat nghut mù, Yhang myit

hpyit é dōng yuq hkangmó lé haú pé tsing gàm byí é nghut ri.

Gungbun Myo Kôlhang, Ra Gùng Za

¹²Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú dōng nghut ri. ¹³Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

¹⁵Haú hkyí gi, “Ngò, loq a nghut é yanmai, gungdu eq a sêng é nghut lhê.” gâ é nghut jáng, hau é yanmai, gungdu eq a séng wó dut é a nghut. ¹⁶Dum, haú nohkyap gi, “Ngò, myoqjí a nghut é yanmai, gungdu eq a sêng é nghut lhê.” gâ é nghut jáng, hau é yanmai, gungdu eq a séng wó dut é a nghut. ¹⁷Ragùng dù é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? ¹⁸Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹Gungsho showui showang gi, ra bun za nghut é nghut jáng, gungdu gi, hkâmá nghut râ lhú? ²⁰Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹Haú myoqjí gi, loq lé, “Ngò, nang lé a ra!” nghú a ge taí. Haú ulhum gi, hkyí lé, “Ngò, nang lé a ra!” nghú a ge taí.

²²Haú za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lhê. Haú a shit é jung gungsho pé lé, nga-nhúng hpautap é dōng rago nghop râ lhê. ²⁴Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdú é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵Haú mù, gungdu má gamhkuí lhúm é hkyô a bo é za, gungsho showui showang pé ralhú eq ralhú, rajung za kut wó myit tê byí lhum kó râ nghut lhê. ²⁶Haú gungsho showui showang ralhú jamjau huí é nghut jáng, lhum hkangmó bo jamjau râ nghut lhê. Ralhú hpautap huí é nghut jáng, lhum hkangmó bo gabú é nghut lhê.

²⁷Ahkuí, nungmoq gi, Hkrisduq é gungdu nghut kôluí, nungmoq yuq hkangmó gi, haú é gungsho showui showang pé nghut akô. ²⁸Garai Gasang gi, noqkuq hpúng má, sâng-hi lé, lagyô pé, í lhum nghú râ má, myiqhtoí pé, sùm lhum nghú râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri. ²⁹Banshoq bang gi, lagyô pé nghut lhê lhú? Banshoq bang gi, myiqhtoí pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? ³⁰Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pê é lichyúm ge taí sân kyô lhê lhú? ³¹Nghut kôlhang, nungmoq gi, je gyaú é chyunghuq lé gyai yhang ô nau nyí keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhúm shit kólé.

13 Ngò gi, byu pê é eq maumang lagyô pê é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. ²Ngò gi, myiqhtoi htoí é chyunghuq, zaú tô é hkyô pé ban-shoq lé sê gyô é nyan, sumsé hpaqchyí ban-shoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê. ³Ngò gi, wó é sutzè ban-shoq myùng bang lé byí pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyú a bò nghut ri.

⁴Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbún é nghut lhê. ⁵Chyitdap myit gi, hpau a dap é hkyô a kut, yhumsing é akyú baú za a hô, luì za nhikjum a yo, shut é mara a matsíng é nghut lhê. ⁶Chyitdap myit gi, agè ashop é má a gabú é za, haú tengmán hkyô má gabú nyi ri. ⁷Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸Chyitdap myit gi, hkâ-nhám le htùm byuq é a nghut. Myiqhtoi htoí é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, laí ló byuq râ nghut lhê. ⁹Hkâsú mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoí é gi, ra-am rahtâng ru nghut lhê. ¹⁰Nghut kôlhang, gumjup hkyô jé lé é hkún, a gumjup hkyô gi, byuq byuq râ nghut lhê. ¹¹Ngò, zoshâng nghut ashí hkún gi, zoshâng đông dang taí, zoshâng đông

myit, zoshâng đông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹²Ahkuí, nga-nhúng gi, myoqjàm hkaú má é rago a sân é wupzo lé za myàng é nghut lhê; nghut kôlhang, htâng má, myoqdong hkyúm wó myâng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³Ahkuí, lumjíng myit, myit myoqbyu hkyô, chyitdap myit shi sùm lhum myit tô ri. Nghut kôlhang, haú pé má é kô dik é gi, chyitdap myit nghut ri.

Myiqhtoi Htoí É Chyunghuq Pé Eq Laklaí Dang Nyo É Chyunghuq Pé

14 Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoí é chyunghuq lé je riyhang myit o nyi keq. ²Hkâsú mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí èq nyo htoq é nghut ri. ³Nghut kôlhang, myiqhtoi htoí é sù yuq hkanmó gi, byu pé lé wum byi dang eq nhik tít dang taí ri. ⁴Laklaí dang rahú nyo é sù gi, yhumsing gùng lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri. ⁵Ngò gi, nungmoq yuq hkanmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoí râ lé je ô nau é nghut lhê. Hkâsú mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoí sù gi, yhang htoq je gyaú é nghut lhê.

⁶Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi

dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lúhú? ⁷Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lúhú? ⁸Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lúhú? ⁹Nungmoq chyáng le haú đông nghut lhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lúhú? Nungmoq gi, maulat má za taí hâng pyâm nyi kó râ nghut lhê. ¹⁰Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê. ¹²Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung râ dut lhê. ¹⁴Hkâsu mù gâ le, laklaí dang ahú hú đông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyàn é matú, hai akyû a wó nghut ri. ¹⁵Haú mù, ngò hkâsu kut râ lúhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶Nungmoq gi, nungmoq é woi-nyí mai

za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, “Amen” ga hkâsu wó taí râ lúhú? ¹⁷Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

¹⁸Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹Nghut kôlhang, noqkuq hpúng má, laklaí dang rahú đông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

²⁰Gumang wui ê, zoshâng wui su myit nyi é lé nô pyám keq. Agè ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq. ²¹Haú jep é tarâ má kâ tô é gi,

“A wó gyô wú é dang đông mai le, góming byu pê é nhutwui đông mai le, byù shí bang lé ngò taí râ nghut lhê;

nghut kôlhang, yhangmoq gi, ngá dang gyô kó râ a nghut.’

ga Yhumsíng taí ri.”^a

gâ ri.

²²Haú mù, laklaí dang ahú hú nyo é hkyô gi, lumjínng bâng matú kumlhá a nghut é za, a lumjínng bâng matú sheq ru nghut lhê. Myiqhtoi dang kúm gi, a lumjínng bâng matú a nghut é za, lumjínng bâng matú sheq ru nghut lhê. ²³Haú nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjínng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lúhú? ²⁴Nghut kôlhang, yuq hkangmó, myiqhtoi dang taí nyi é u má,

^a14:21 Esai 28:11-12

a lumj́ng sũ nghut nghut, a sê gyô é sũ nghut nghut, wang lé é nghut j́ng, yhang gi, yubak dap sũ rayuq nghut é lé, banshoq èq lhoq pũn kýng é hui râ eq, banshoq èq jéyáng é hui râ nghut é htoq agó, ²⁵ yhâng é i-myit má zaú tô é hkyô pé lé de de lhoq htoq shit é hui râ nghut lhê. Haũ mù, yhang gi, ngóm gop luí, Garai Gasang lé noqkuq mù, “Garai Gasang gi, gè gè yhang, nungmoq chyáng rahá nghut nyi ri!” ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haũ j́ng, gumang wui ê, nga-nhúng haĩ taĩ râ lhú? Nungmoq rahá lé chôm źng é hkũn, yuq hkanmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaĩ dang ahú hú nyo é hkyô nghut nghut, taĩ sân kyô é nghut nghut pé lé, wó le ge ri. Haũ pé banshoq gi, noqkuq hpúng lé wum-o byi râ matú chyat kut é dut râ lhê. ²⁷ Rayuq yuq, laklaĩ dang ahú hú nyo é nghut j́ng, í yuq eq myô htum sum yuq mai a laĩ é za, rayuq htáng rayuq nyò râ dut é htoq agó, rayuq yuq haũ lé taĩ sân kyo ra râ dut lhê. ²⁸ Taĩ san kyô é sũ a nyi é nghut j́ng, laklaĩ dang ahú hú nyo é sũ gi, noqkuq hpúng má zim za nyi râ dut mù, yhâng-gùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taĩ kyo râ dut lhê; góbang gi, haĩ taĩ é lé rago gyô chyam wú râ dut lhê. ³⁰ Nghut kôlhang, zung tô é sũ rayuq yuq chyáng shing-rán jé é nghut j́ng, hí taĩ nyi é sũ gi, nô byuq râ dut lhê. ³¹ Hkâsu mù gâ le, yuq hkanmó gi, mhoqshit é eq myit wum byĩ é wó hui kó sháng gaq, nungmoq banshoq bang gi, rayuq htáng rayuq myiqhtoi wó htoĩ é nghut lhê. ³² Haũ myiqhtoi pé é woi-nyĩ pé gi, myiqhtoi pé uphkan é a-ô má

nghut nyi ri. ³³ Hkâsu mù gâ le, Garai Gasang gi, atau ahũ dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng b́ng zing tô é hpúng banshoq mã é eq rajung za, ³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang taĩ ahkáng a wó é nghut mù, haũ jep é tarã mã bo é eq rajung za a-ô mã nyi kó sháng gaq. ³⁵ Yhangmoq gi, rajung jung sé naũ kô é nghut j́ng, yhũm má yhangmoq é yhumsing hpô pè chyáng myi kó sháng gaq; hkâsu mù gâ le, myiwe rayuq noqkuq hpúng má dang taĩ é gi, ahoq ahĩ hkyô nghut ri.

³⁶ Haũ Garai Gasang é mungdang gi, nungmoq chyáng mai htoq lo é nghut lhê lhú? Haũ gi, nungmoq chyáng za lé jé bê nghut lhê lhú? ³⁷ Rayuq yuq, yhang gi, myiqhtoi, a nghut j́ng, woi-nyĩ chyunghuq byĩ é hui sũ nghut lhê ga myit é nghut j́ng, ngò, nungmoq lé ká byĩ é pé gi, haũ Yhumsing é hkunmó nghut é lé, yhang sê yù sháng gaq. ³⁸ Yhang gi, haũ lé haĩ su a ngàm kut é nghut j́ng, yhânggùng le, haĩ su a ngàm kut é hui zo râ nghut lhê.

³⁹ Haũ mù luí, ngá é gumang wui ê, myiqhtoi htoi râ lé ô nau nyi mù, laklaĩ dang ahú hú nyo é lé hkâhkũm pyám kó. ⁴⁰ Nghut kôlhang, jung hkanmó gi, htuk é òng eq shuq shuq tap tap zâ é hkyô òng kut é dut râ lhê.

Hkrisduq É Dui Toq Hkyô

15 Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap ǵng tô é jowò nghut é gabú danglù hkyô lé, ahkuí, ngò, nungmoq lé lhoq pũn kat nau ri. ² Ngò, nungmoq lé hko kyo bê é mungdang lé, nungmoq ǵng ǵng myhik zing nyi kô é nghut j́ng, nungmoq gi, gabú danglù hau é yanmai hkyi yù huĩ é

nghut akô. Haû a nghut jáng, nungmoq lumj́ing é gi, akôm dut bê nghut lhê.

³Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haú pé gi: Chyúmdang eq rajung za, Hkrisduq gi, nga-nhùng é yubak marâ é matú shí hkám byi bê gâ é nghut ri; ⁴Yhang gi, myhup yhûm é hui luí, Chyúmdang eq rajung za sum nyí ngu é nyí má lhoq dui toq é hui bê nghut mù, ⁵Petruq lé htoq shit luí, haû lagyo raxe í yuq lé le htoq shit ri. ⁶Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haú bang má é myo hpyang gi, ahkuí jé shoq asak dui nyí bum akô; ra-am kúm gi, shi ló byuq bekô nghut ri. ⁷Hau htâng, Yhang gi, Yakuq lé htoq shit mù lagyô pé ban-shoq bang lé htoq shit ri. ⁸Ló htâng má, Yhang gi, hkû buinyi a jé shí é má hku é dông nghut sù ngo lé le htoq shit bê nghut ri.

⁹Hkâsu mù gâ le, ngò gi, lagyô pé má é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû rá lhang a gingdán é sù nghut lhê. ¹⁰Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹Haû mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumj́ing é le, haú hkyô nghut ri.

Shi Byuq Bâng É Dui Toq Hkyô

¹²Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ram gi, shi byuq bâng é dui toq hkyô a joq nghû, hkâsu wó tái kó rá lúh? ¹³Shi byuq

bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumj́ing hkyô gi, akôm dut byuq rá nghut lhê. ¹⁵Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq rá za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat rá a nghut. ¹⁶Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷Hkrisduq gi, lhoq dui toq é a huí é nghut jáng, nungmoq é lumj́ing hkyô gi, akôm dut luí, nungmoq gi, nungmoq é yubak mara hkaû má ru nyi nyi shi kó rá nghut lhê. ¹⁸Haû nghut jáng, Hkrisduq má shi ló byuq bê bang le, htên byoq byuq rá za nghut lhê. ¹⁹Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó rá nghut lhê.

²⁰Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹Hkâsu mù gâ le, shí-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê. ²²Hkâsu mù gâ le, lhungl-hâng bang gi, Adam é yanmai shi byuq é su, lhungl-hâng bang gi, Hkrisduq eq rading ralhûm za nghut é yanmai lhoq dui toq é hui rá nghut lhê. ²³Nghut kôlhang, yuq hkangmó gi, ó le ó âng é hkûn lhoq dui toq é hui rá nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é

hui rã nghut lhê. ²⁴ Hau htâng, jihâm jé rã nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Iwa nghut sũ Garai Gasang lé mingdán ap byi rã nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra rã nghut lhê. ²⁶ Haú lhoq htên pyâm é hui rã nghut é lô htâng é gye gi, shî-nò hkyô nghut ri. ²⁷ Hkâsu mù gâ le, “Garai Gasang gi, jung hkgangmó lé, Yhâng é hkyî wang ô má tô pyám bê nghut ri.”^b gâ Chyúmdang má kê tô ri. “Jung hkgangmó lé” Yhâng é a-ô má tô pyám bê ga taí é hkûn, jung hkgangmó lé Hkrisduq é a-ô má tô pyám bê sũ Garai Gasang yhang kúm a lom é hkyô, san za nghut nyi ri. ²⁸ Yhang gi, haú hkyô ban kut é htâng má, haú Zo yhang le, jung hkgangmó lé Yhâng é a-ô má to byi bê sũ Garai Gasang é a-ô má nyi sũ dut nhang é hui rã nghut mù, Garai Gasang gi, lunglhang htoq má gyaú sũ nghut luí, lunglhang lé sîng sũ nghut rã nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kê é gi, hai akyû bò kó rã lhú? Haú shi byuq bang lhoq dui toq é a hui kê é ru nghut le gi, yhangmoq matú haí mù byu pé wui-myhup hkâm yù kó rã lhú? ³⁰ Ngamoq gi, ngamoq é matú, hkyíng hkgangmó haí mù chiq rã jowò má nyi rã lhê lhú? ³¹ Gumang wui ê, ngò gi, nyi wuí aluq shoí shoí shi é hui zô é nghut lhê. Haú su nghú é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò rã lhú? Shi byuq

bang lhoq dui toq é a hui é ru nghut le gi,
 “Nga-nhúng gi, napmá shî rã nghut é yanmai,
 zo sháng, shuq sháng.”^c
 nghú rã za nghut lhê.[‡] ³³ “A ge é zùm yap luzúm wui gi, ge é nyi yap sâmlai lé hten nhang é nghut lhê.” gâ é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akò. Ngò haú su nghú taí é gi, nungmoq hoq bun rã matú nghut lhê.

Dui Toq É Gungdu

³⁵ Nghut kôlhang, rayuq yuq gi, “Haú shi byuq bê bang, hkâsu kut lhoq dui toq é hui kó rã lhú? Yhangmoq gi, hkasú é gungdu nghut kó rã lhú?” ga myi rã nghut lhê. ³⁶ Haú-í nghá sũ ê! Nang hô hkyô kat é pé gi, shi byuq é za a nghut jáng, yuq htoq lò rã a nghut mhaí. ³⁷ Nang, kyô hkyô é hkûn, yuq lò rã nghut é agàm lé hô hkat e a nghut é za, sungso amyui nghut nghut, gotú amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haú lé gungdu ralhüm byi mù, kyôshi myui hkgangmó lé, ó le ô é gungdu byi ri. ³⁹ Gungsho lunglhang gi, rajung za a nghut. Byù pê é gungsho gi, rajung, dusak pê é gi, gó jung, nghoq pê é gi, gó jung, ngozo pê é gi, gó jung ru nghut lhê. ⁴⁰ Mauhkúng gùng pé le joq é nghut luí, myidam gùng pé le joq ri; nghut kôlhang, mauhkúng gùng pê é shingkanq gi, rajung, myidam gùng pê é shingkanq gi, gó jung ru nghut lhê. ⁴¹ Haú buí má bo é shingkanq gi, rajung, lhamó mã é gi, gó jung, kyî pé mã é gi, gó jung ru nghut

[‡]15:32 Dang ngho shî gi, a lumjîng bang taí é dang nghut lhê.

^b15:27 Hkya-on 8:6 ^c15:32 Esai 22:13

lhê; kyî racham eq rachâm é shing kang le gotû tû shai lhum lhê.

⁴² Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê.

⁴⁵ Haû nghut mù, “Haû sâng-hi yuq byù Adam gi, asak dui é xângzo dut bê nghut ri.”^d ga kê tô ri. Haû ló htâng é Adam kúm gi, asak byî é woi-nyí nghut ri.^f

⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidàm mã é tseyûn lé saí é nghut mù, htang lhê yuq byù gi, mauhkûng htoq mã é nghut ri. ⁴⁸ Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mã é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mã é byu é gunghkyâng isâm lé le myang hkam yù rà nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yû rà a nghut, htên byoq sê é le, htên byoq a sê é silí wunlí lé wó yû rà a nghut. ⁵¹ Gyo to keq, zaú tô é hkyô lé, ngò, nungmoq lé tái kyo kôlé: Nga-nhúng banshoq bang gi, shi byuq rà a nghut é za, htaí lhik é

hui rà ru nghut lhê. ⁵² Haû gi, ló htâng é tut htê mying é hkûn, rallhap za, myoqkuq ralap má dut rà nghut lhê. Hkâsu mù gâ le, tut htê mying rà nghut lhê, haû hkûn, shi byuq bê bang gi, htên byoq a sê é shut lhoq dui toq yu é hui rà nghut mù, nga-nhúng gi, htaí lhik é hui rà nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù rá dut é nghut lhê. ⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, “Shî-nò hkyô gi, ùng budâng èq myui pyâm é hui bê nghut ri.”^e ga kê tô é eq,

⁵⁵ “Shî-nò hkyô ê, náng é ùng budang gi, hkâmá lú? Shî-nò hkyô ê, náng é nyin gi, hkâmá lú?”^f

gâ tô é sanghkyang gi, dik rà nghut lhê.

⁵⁶ Haû shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsing Yesuq Hkrisduq đông mai, nga-nhúng lé ùng budang byî é nghut ri.

⁵⁸ Haû mù luí, ngá é chyitdap gumang wui ê, yap gingtng nyi keq. Hai èq le, nungmoq lé hkâlhoq dui nún nhâng kó. Nungmoq gi, haû Yhumsing má nungmoq wùn waq é muzó akóm a nghut é lé sé kô é nghut lhê yanmai, haû Yhumsing é muzó lé ayang wùn waq shikut nyi keq.

Yerusalem Wà Mó Mã É Lumjng Bang É Matú Alu Hkyuí Râ Hkyô

16 Ahkuí, Garai Gasâng é byu pê é matú alu hkyuí rà hkyô eq séng luí gi, haû Galatiq mau mã é noqkuq hpûng pé lé ngò kut nhang é su kut keq. ² Ngò jé lé é hkûn, alu hkyuí rà hkyô a

^d15:45 Ló htâng é Adam gi, Yesuq lé tái nau é nghut lhê.

^d15:45 Apûn 2:7

^e15:54 Esai 25:8

^f15:55 Hos 13:14

kut ra rã đông, bat hkgangmó mã é sâng-hi nyí mã, yuq hkgangmó gi, yhumsing wó ho é mã cháng mù, gam tô to láng keq. ³Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã ê dé nhâng rã nghut lhê. ⁴Ngò le ê ang rã dut é nghut jáng, yhangmoq gi, ngá é byinzùm kut rã nghut lhê.

Poluq Lum Kat É Hkyô Pé

⁵Ngò gi, Makedoni mau laí byit é htâng, nungmoq chyáng jé lé rã nghut lhê. Hkâsu mù gã le, ngò gi, Makedoni mau laí byit rã za nghut lhê. ⁶Ngò hkâmá ê kôhlang, ngá é hkyowui mã nungmoq wó garúm kat kó rã matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyi abe. ⁷Ngò gi, laí ló uchyang za nungmoq lé lé kum rã nghut mù, ahkuí wó myâng rã lé a nau é nghut lhê; ngò gi, haú Yhumsing dóng é nghut jáng, nungmoq eq rahá rayoq nyi rã lé myit myoqbyu lhê. ⁸Nghut kôhlang, ngò gi, Penteko-ti poí buinyi jé shoq Ehpesu myuq mã nyi rã nghut lhê. ⁹Haí mù gã le, ngo lé htuq htíng é bang myo myo nyi é nghut kôhlang, akyû htoq é muzó é matú hkum mó ngo lé hpông to byí é yanmai nghut lhê.

¹⁰Timohti jé lé jáng, yhang, nungmoq eq rahá nyi é u mã, gyuq é hkyô haí le a joq rã matú wú byi keq; hkâsu mù gã le, yhang gi, haú Yhumsing é muzó lé, ngò su wùn waq wún é sù nghut lhê. ¹¹Haú mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhang é hkyowui mã nguínón é đông nhang kat keq. Haú gumang wui eq rahá lò kó rã lé, ngò myit láng nyi lhê.

¹²Ahkuí, nga-nhông é gumang Apolo é hkyô eq séng lui ga jang; yhang gi, haú gumang wui eq rahá nungmoq chyáng lé

rã lé, ngò, gyai yhang wum taí tsuq lhê. Yhang kúm gi, ahkuí lé nau é myit a dé bò shi, nghut kôhlang, yuqyo é ahkyíng wó jáng, yhang lé lò rã nghut lhê.

¹³Machya nyi keq; lumjáng hkyô mã ging ging tíng tíng yap nyi keq; gyuq kyum myit hkâbô kó; wum bo nyi keq. ¹⁴Jung hkgangmó lé, chyitdap myit eq zui saí keq.

¹⁵Stehpana eq yhang é yhumbyù wui gi, Ahkaia ming mã sâng-hi hpúng wâng bang nghut lui, yhangmoq gi, yhumsing gùng lé, haú sãn-yúng bãng é dojaú hkyô mã ap nóng bekô lé, nungmoq sê akò nghut ri. Gumang wui ê, ngò, nungmoq lé wum taí tsuq kat kôlé, ¹⁶haú sù é bãng é a-ô mã le, haú muzó mã bo wang lòm mù, mù zui shikut bang yuq hkgangmó é a-ô mã le, nyi keq. ¹⁷Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haí mù gã le, yhangmoq gi, nungmoq a kut byí é hkyô lé, lhoq pyíng byi bekô nghut ri. ¹⁸Hkâsu mù gã le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haú sù é bang lé, hpautap nyi keq.

Ló Htâng É Shi-kyâm Dang

¹⁹Asia mau mã é noqkuq hpúng pé gi, nungmoq lé shi-kyâm kat akò. Akula eq Priskila nhik le, yhangnhik é yhum mã chòm huí é noqkuq hpúng lé, haú Yhumsing mã nungmoq lé gyai yhang shi-kyâm kat akò. ²⁰Shí mã nyi é gumang wui banshoq bang gi, nungmoq lé shi-kyâm kat akò. Rayuq eq rayuq chyoiyúng é chyitpuq eq shi-kyâm lhum keq.

²¹Ngò, Poluq gi, shi-kyâm dang shí lé, ngá é loq eq yhang ká é nghut lhê.

²²Rayuq yuq, haú Yhumsing lé a chyitdap é nghut jáng, haú yuq gi, nhing pyâm é hui sháng gaq. Yhumsing ê, jé lé aq hkoi!

²³Haû Yhumsîng Yesuq é jeju gi,
nungmoq eq rahá nghut nyî sháng gaq.

²⁴Ngá é chytđap myit gi, Hkris-
đuq Yesuq má nungmoq banshoq bâng
chýáng joq nyî sháng gaq. Amen.

KORINHTUQ

Pê Chyáng Htang Dàm Hun Kat é Laiká

(2 Corinthians)

1 Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhúng é gumang Tim-ohti le kut, Korinhtuq myuq mã é, Garai Gasâng é noqkuq hpúng lé le, Ahkaia mau gón mã é sán-yúng bang banshoq chyáng le, dang kyô kat lhê: ²Nga-nhúng é Íwa nghut é Garai Gasang eq haù Yhumsing Yesuq Hkrisduq chyáng mã é jeju eq ngingón hkyô gi, nungmoq chyáng ru joq nyí sháng gaq.

Nhik tíng hkyô banshoq é Garai Gasang

³Nga-nhúng é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tíng hkyô banshoq é Garai Gasang gi, hkya-on kungton é huí nyí sháng gaq. ⁴Garai Gasâng chyáng mai ngamoq wó yù bê nghut é nhik tíng hkyo èq, hkasù é wuífke hkyô hui bang lé le nga-nhúng wó nhik tíng byi sháng gaq ga, Yhang gi, ngamoq é wuífke hkyô banshoq má nhik tíng byí ri. ⁵Hkâsu mù gà le, Hkrisduq hui zô é jamjau hkyô myo myo lé ngamoq bo hui zô é su, Hkrisduq đông mai, ngamoq é nhik tíng hkyô le byíng mui nyi é nghut lhê. ⁶Ngamoq, myit myo uhkyí é huí é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é huí é nghut jáng, nungmoq é nhik tíng hkyo é matú nghut luí, haù gi, ngamoq jamjaù é eq rajung za nghut é jamjau hkyô lé, myit hing é đông mai wó jân pyám rà a-tsam, nungmoq chyáng lhoq htoq byí é nghut lhê. ⁷Haù mù, ngamoq é jamjau hkyô pé mã nungmoq bo lòm bekô nghut é su, ngamoq é nhik tíng hkyô

má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸Gumang wuì ê, Asia mau mã, wuífke jamjaù é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luí, ngamoq gi, asak ùi lo rà lhang a myit myoqbyù lô é nghut lhê. ⁹Gè gè yhang, ngamoq gi, sat hui berâ nghú, ngamoq é i-myt mã lumjing pyâm é nghut lhê. Nghut kôlhang, haù gi, ngamoq gùng ngamoq a lumhkau é za, shí bê bang lé lhoq ùi toq sù Garai Gasang lé lumhkaù rà matú dut é nghut lhê. ¹⁰Garai Gasang gi, haù sù é shí rà hkyô mai hkyi yù bê nghut mù, ngamoq lé hkyi yù rà za nghut lhê. Yhang gi, ngamoq é matú nungmoq kyûdung byí nyi é u mã, xoq luí ngamoq lé hkyi yù rà za nghut lhê nghú, ngamoq gi, Yhang lé myit myoqbyu to bê nghut luí, ¹¹myo myo kyûdung byí é lé gyo byí é mã ngamoq shimân jeju wó mù, byù myo myo gi, ngamoq wó é shimân jejú é yanmai Garai Gasang lé jeju hkya-on kô rà nghut lhê.

Poluq, Hen Tô É Muzó Htaí Pyâm É Lé Tai Hung É Hkyô

¹²Ngamoq nghutbùn é gi, Garai Gasâng chyáng mã é chyoiyúng hkyô eq lhumzui hkyô mã, mingkan zo wuì eq ngamoq asak ùi bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byí é hkyô nghut lhê. Ngamoq haù su kut é gi, mingkan hpaqchyí byéng-yá đông mai kut é a nghut é za, Garai Gasâng é jeju đông mai kut é ru nghut lhê. ¹³Hkâsu mù gà le, ngamoq gi, nungmoq a dat nghap é eq a sê gyô é haí le a ká byí kat é nghut lhê. Ngò, myit myoqbyu kat é gi, ¹⁴nungmoq gi, ngamoq é hkyô ra-am lé wó sê gyô yù

bê eq rajung za, haû Yhumsîng Yesuq é buinyì má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taû lò luí, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haû hkyô hen é hkûn, agon za hen hkyut é nghut lhê lú? Haû a nghut jáng, ngò hen é pé gi, ra-u má za, “Nghut lhê, nghut lhê.” nghû é eq, “A nghut, a nghut.” nghu é wó taí râ matú, mingkan myit đông hen é nghut lhê lú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng “Nghut lhê” lé, “A nghut” nghu é a nghut. ¹⁹ Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, “Nghut lhê” nghu é eq “A nghut” nghu é sù a nghut é za, Yhang má gi, hkâ-nhám le “Nghut lhê” nghu é za joq lhê. ²⁰ Hkâsu mù gà le, Garai Gasang gi, danggidiq hkâ-myhó to kôle, haû pé gi, Hkrisduq má “Nghut lhê” chyat nghut lhê. Haû mù, Garai Gasâng é hpungwup shingkâng é matú, Yhâng đông mai, nga-nhúng gi, “Amen” nghû taí é nghut lhê. ²¹ Ngamoq eq nungmoq lé Hkrisduq má yap gíngtíng nhang é sù gi, Garai Gasang nghut ri. Yhang gi, nga-nhúng lé masat é xù but byi mù, ²² Yhang sing lhê gà é dizik, nga-nhúng lé htúng tap byi luí, jé lô râ hkyô pé hkyak joq lhê nghu é masat

zè đông, Yhâng é Woi-nyí lé nga-nhúng é i-myt unghkaû má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taû lé é hkyô têng é lé, ngá é saksé dut râ đông Garai Gasang lé wut dúng lhê. ²⁴ Haû gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haí mù gà le, lumjíng myit mai za nungmoq wó yap gíng nyi bùm kô é ru nghut lhê.

2 Haû mù luí, ngò gi, nungmoq lé myit nò nhâng é dut râ đông, lé dum kùm é a kut râ nghû, myit hpyit to bê nghut lhê. ² Hkâsu mù gà le, nungmoq lé ngò yón kuq nhang é nghut le gi, ngò yón kuq nhang bê bang nungmoq mai lai luí, ó yuq wá ngo lé wó gabú nhâng râ lú? ³ Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kê kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. ⁴ Hkâsu mù gà le, ngò gi, nungmoq lé laiká kê é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kê kat bê nghut lhê. Haû gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haû hkyô eq séng luí, ngò gyai wá yhang zuq zuq a taí nau é nghut lhê. ⁶ Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri. ⁷ Nghut kôlhang, ahkuí, nungmoq gi, yhang a wó jan loshoq myit yón é a hui

zo râ matú, yhang lé mara hkyut pyám byi mù, nhik tíng byi keq. ⁸Haû mù luí, nungmoq é chyitdap myit gi, yhang é ah-toq má dum lhoq gíng shit nyí keq nghû, nungmoq lé ngò wum taí tsuq kat lhê. ⁹Ngò, nungmoq lé haí mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkanngmó má jino gyo hkyô bò a bo é lé, wó sé râ matú le nghut lhê. ¹⁰Nungmoq, rayuq yuq lé mara hkyut byí é nghut le gi, ngò le, haû yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nganhúng lé a wó úng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹Hkâsu mù gâ le, Tsadán hen é hkyô pé lé nganhúng a sê é a nghut.

Dangshikaq Asik Mã É Hpungmú Wùn Bang

¹²Ngò gi, Hkrisduq é gabú danglù hko kyo râ matú, Troa myuq má é jé é hkûn, haû Yhumsing gi, ngo lé hkum hpóng byí é lé, ngò myang ri. ¹³Nghut kôlhang, ngò gi, ngá é gumang Tituq lé haû má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴Nghut kôlhang, Hkrisduq má, ngamoq lé hkâ-nhám le úng budang hkyô shut shuí-û yù mù, Hkrisduq lé sê é sumsé hpaqchyí é nam ngón shôm lé, ngamoq dông mai jowò hkanngmó má taí pyo é sù, Garai Gasang gi, jeju hkya-ôn é huí nyí sháng gaq. ¹⁵Hkâsu mù gâ le, ngamoq gi, hkyi yu é huí nyí băng chyáng le, htên byoq ló é huí nyí băng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶Ngamoq gi, htên byoq nyí băng é matú shí-nò hkyo é shôm dut mù, hkyi yù huí nyí băng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó shí eq htuk râ lúh? ¹⁷Ngamoq gi,

amyat wó râ matú Garai Gasâng é mung-dang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taí é nghut lhê.

3 Ngamoq gi, yhumsing gùng yhum-sing dum owaq hi ló é nghut lhê lúh? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ²Nungmoq gùng yhang gi, ngamoq é myit nhiklhum má ká tô é, yuq hkanngmó èq nghap luí sê yu é laiká gúng pé nghut akô. ³Nungmoq gi, nungmoq chyáng ngamoq hpungmú wùn waq é yanmai, Hkrisduq chyáng mã é laiká nghut kô é hkyô lé shit nyi akô. Haû gi, ká jung chí èq ká tô é dông a nghut é za, rú dui nyi é Garai Gasâng é Woi-nyí èq ká tô é nghut é htoq agó, luqlong pé má ká tô é dông a nghut é za, xângzo byu é myit nhiklhum long pé má ká tô é ru nghut lhê.

⁴Haû su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê. ⁵Ngamoq gi, yhumsing gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shí dàm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shing kang

⁷Ahkuí, haû Mosheq é myoqdong mã é hpungwup shing kang é yanmai, haû Israelaq byu pé gi, yhang é myoqdong lé a wó wú tsuq to kó nghut ri. Hpungwup shing kang haû shúm lo byuq sê é

nghut kôlhang, luqlong má dok kê tô é, shî-nò hkyô lhoq htoq é tarâ muzó gi, hpungwup shing kang eq rahá jé lé é nggut lhê. ⁸Haû su nggut jáng, haû Woi-nyí é muzó gi, hpungwup shing kang je riyhang dut rá a nggut kó lú? ⁹Gè gè yhang, haû byù lé mara byí é tarâ muzó lháng, hpungwup shing kang bo é nggut le gi, dingmán nhang é hkyô sik gi, je riyhang hpungwup shing kang bo é nggut lhê ô! ¹⁰Hkâsu mù gâ le, hpungwup shing kang bo é tarâ muzó gi, hpungwup shing kang je bo é dangshikaq asik eq whuí é hkûn, hpungwup shing kang a bò lo dut byuq bê nggut ri. ¹¹Shum byuq ló é tarâ lháng gi, hpungwup shing kang eq rahá lé jé bê nggut le gi, ru gîng nyi é dangshikaq asik é hpungwup shing kang gi, je riyhang gyaú rá nggut lhê ô!

¹²Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nggut lhê. ¹³Ngamoq gi, Mosheq su a nggut. Yhang gi, duqbang é hkyô shûm byuq ló é hkûn, haû Israelaq byu pé haú lé a wú tsuq rá matú, yhang é myoqdong lé myoqgo èq nghop pyâm é sù nggut ri. ¹⁴Nggut kôlhang, yhangmoq é myit gi, lhoq chut byí é hui bekô nggut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nggut ri. Haû gi, huí sêng pyâm é a hui shi, haí mù gâ le, Hkrisduq dong za haû lé wó yu pyâm é nggut lhê. ¹⁵Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò èq nghop tô é nggut ri. ¹⁶Nggut kôlhang, ó yuq le, Yhumsîng chyáng hká u lîng lò kôlhang, haú hkûn jáng, myoqgò gi, hî pyâm byí é hui rá nggut lhê. ¹⁷Yhumsîng gi, haû Woi-nyí nggut mù, Yhumsîng é Woi-nyí nyi é jowò má, luthkyô

le joq lhê. ¹⁸Haû Yhumsîng é hpungwup shing kang lé lhoq htoq shit é bang ban-shoq nggut é myoqdong má myoqgò a nghop é bang nga-nhúng gi, ru myo jat nyi é hpungwup shing kang lhoq htoq byi hkyô nggut é, Yhâng é isâm shut htaí lhik wang é huí nyi bê nggut lhê. Haû hkyô gi, haû Woi-nyí nggut sù Yhumsîng chyáng mai lo é nggut lhê.

Tseyam Pé Má Bo É Sutzé

4 Ngamoq gi, Garai Gasâng jeju mai muzó hkyô haû wó é nggut mù, myit wum a gyuí é nggut lhê. ²Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nggut lhê. Haû su kut rá malaí, ngamoq gi, haû tengmán hkyô lé san za lhoq htoq shit é dong, Garai Gasâng é hí má yuq hkanmó é myit sôn sê é hkyô má, yhumsîng gùng yhumsîng htuk shoq nyi lhê. ³Ngamoq é gabú danglù gi, myoqgo èq nghop pyâm é huí é nggut jáng, haû gi, htên byoq nyi bâng chyáng za nghop pyám huí é ru nggut lhê. ⁴Haû Garai Gasâng é azòng isâm nggut sù, Hkrisduq é hpungwup shing kang bo é gabú danglu é maubó lé, a lumjîng bang a wó myâng kó sháng gaq ga, ipyat shi é garai[§] gi, yhangmoq é myit lé lhoq chit byi bê nggut ri. ⁵Haû nggut é yanmai, ngamoq gi, yhumsîng gùng eq séng luí hko kyô é a nggut é za, Yesuq Hkrisduq gi, Yhumsîng nggut é hkyô lé le, Yesuq é matú, ngamoq gùng yhang gi, nungmoq é jùn pé nggut é hkyô lé le, hko kyô é ru nggut lhê! ⁶Hkâsu mù gâ le, “Mauchut hkaú mai maubó htoq lô sháng gaq.”^g ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shing kang é maubó lé sê gyô é nyan

§4:4 Ipyat shi é garai gâ é gi, Tsadán lé gâ é nggut lhê.

lé, nga-nhúng lé byí é dông, Yhâng é maubó lé, nga-nhúng é i-myt unghkaú má duqbó nhâng bê nghut ri.

⁷Nghut kôlhang, ngamoq gi, sutzè haú bo é tseyam pé** nghut nyi lhê. Haú gi, gyaú dik é a-tsam mó gi, ngamoq chyáng mã é a nghut é za Garai Gasâng chyáng mã é nghut é hkyô lé tûn shit râ matú nghut lhê. ⁸Ngamoq gi, wuîhke hkyo èq lînhghyuuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a htûm byuq é nghut lhê; ⁹zing-rî é hui kôlhang, kâng pyám huí é a nghut; bat lêng pyâm é hui kôlhang, htên byoq huí é a nghut. ¹⁰Haú Yesuq é asak ùi hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê.

¹¹Hkâsu mù gâ le, Yesuq é asak ùi hkyô gi, nga-nhúng é shí sê é gungdu má lhoq htoq shit é hui sháng gaq nghû, asak ùi nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyi ri. ¹²Haú mù luí, shi byuq hkyô gi, ngamoq má mù zuí nyi ri; asak ùi hkyô kúm gi, nungmoq má mù zuí nyi é nghut ri.

¹³“Ngò gi, lumjîng bê nghut lhê, haú mù, ngò taí é nghut lhê.”^h ga kâ tô é eq rajung za, ngamoq le, lumjîng hkyô hau èq yhang, lumjîng bê nghut mù taí é nghut lhê. ¹⁴Haí mù gâ le, haú Yhum-sîng Yesuq lé shi é mai lhoq ùi toq é Sû gi, ngamoq lé le, Yesuq eq rahá lhoq ùi toq mù, nungmoq eq rahá, ngamoq lé Yhâng é hí má shuí jé râ nghut é lé, ngamoq sê lhê. ¹⁵Haú jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-

ôn é hkyô gi, byíng mui nyi sháng gaq ga, haú pé banshoq gi, nungmoq é akyu é matú nghut nyi ri.

¹⁶Haú mù luí, ngamoq gi, myit wum a gyuî é nghut lhê. Ngamoq é shinggan gungdu gi, htên byoq lô nyi kôlhang, i-myt unghkaú gi, ra-nyí eq ra-nyí asik dut nhang é huí nyi ri. ¹⁷Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haú pé htoq gyai hkik é ahtum abyuq é hpungwup shingkang lé, wó yû nhang ri. ¹⁸Haú mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

Mauhkûng Htoq Mã É Yhûm

5 Haú myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq èq saí é a nghut é za, mauhkûng htoq má joq é ahtum abyuq é yhûm^{††} nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê. ²Nghut kôlhang, ahkuí, nga-nhúng gi, nga-nhúng é mauhkûng yhûm lé tû hut byí é lé gyai yhang hui naú mù, nò-kying su kyîng nyi lhê. ³Haí mù gâ le, nga-nhúng gi, hut byí é hui jáng, gungdu a bò bang a dut lo râ nghut lhê. ⁴Hkâsu mù gâ le, nga-nhúng gi, zúm shí má lúng nyi é u lé, wòlai wùn mù, nò-kying su kyîng nyi lhê; haú gi, shí byuq sê é lé, asak ùi é èq wó htaí lhik pyám sháng gaq nghû, nga-nhúng gi, a hut byí é hui râ lé a ô nau é za, nga-nhúng é mauhkûng yhûm lé tû hut byí é hui râ lé ô nau é yanmai nghut lhê. ⁵Ahkuí kúm, jeju haú hkam

**4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê.

††5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

yù rã matú, nga-nhúng lé lajãng to byí é sũ gi, Garai Gasang nghut mù, jé lô rã hkyô gi, hkyak joq lhê nghũ é masat zè dông, nga-nhúng lé haũ Woi-nyí byi bê nghut ri.

⁶ Haũ mù luí, ngamoq gi, hkã-nhám le hkyak lum tô lhê. Gungdu shí má yhũm dông ru lúng nyí nyí gi, haũ Yhumsing eq wê gãng nyí ashĩ nghut é lé ngamoq sê nyí lhê. ⁷ Ngamoq gi, byu-myang é dông mai a nghut é za, lumjĩng myit mai asak dui é ru nghut lhê. ⁸ Ngamoq gi, hkyak myit lum tô lhê nghũ, ngò táĩ lhê, haũ mù, gungdu shí mai wê gang luí, haũ Yhumsing eq rahá nyí rã lé ngamoq je riyhang ô nau é nghut lhê. ⁹ Haũ mù, ngamoq gi, gungdu shí má yhũm dông lúng nyí é nghut nghut, haũ mai wê gãng é nghut nghut, ngamoq myit myoqbyu tô é jowò gi, Yhang lé gabú nhãng rã matú nghut lhê. ¹⁰ Hkãsu mù gã le, yuq hkangmó gi, gungdu shí má yhũm dông lúng nyí é u lé, ge é nghut nghut, a ge é nghut nghut, kut é eq rajung za hkam yù rã matú, Hkrisduq é tarã jéyáng tanghkuq hí má, nga-nhúng banshoq bang htoq shit ra rã nghut lhê.

Nguingón Hkyô Xoq É Muzó

¹¹ Haũ mù, Yhumsing lé gyuq hkungga rã hkyô haĩ nghut é lé ngamoq sê é nghut luí, ngamoq gi, byu pé lé táĩ pũn kyĩng shikut lhê. Ngamoq haĩ nghut é gi, Garai Gasang chyáng san za nghut nyí mù, nungmoq é myit sôn sê é hkyô má le san za nghut rã lé, ngò myit lum lhê. ¹² Haũ myit nhikhlum má bo é lé gumrông rã malaĩ, byu-myang é lé gumrong é bang lé, nungmoq wó tũ táĩ kó sháng gaq nghũ, ngamoq gi, nungmoq chyáng yhumsing gũng lé dum owaq shikut é a nghut é za, ngamoq é hkyô lé, nungmoq wó gumrông rã ahkáng, nungmoq lé byí é ru nghut lhê. ¹³ Ngamoq a gyĩng é dông nghut le gi, Garai Gasang é matú a gyĩng é nghut lhê; ngamoq gyĩng é dông nghut

le gi, nungmoq é matú gyĩng é nghut lhê. ¹⁴ Hkãsu mù gã le, Hkrisduq é chyitdap myit eq ngamoq lé kut nhang nyí é nghut lhê. Haũ gi, banshoq bang é matú rayuq shĩ hkám byi bê nghut mù, banshoq bang shi é dông nghut bê nghũ, ngamoq hkyak sê gyô é yanmai nghut lhê. ¹⁵ Yhang gi, asak dui nyí é bang, yhangmoq yhumsing gung é matú a dui lô é za, yhangmoq é matú shĩ hkám byi luí, lhoq dui toq é huí Su é matú dui kó sháng gaq ga, banshoq bang é matú shĩ hkám byi bê nghut ri.

¹⁶ Haũ mù, ngamoq gi, ahkuĩ mai, ó yuq eq séng luí le, mingkan hkyam dông mai a wú lô é nghut lhê. Ngamoq gi, hí hkũn Hkrisduq lé haũ dông wú é nghut kôlhãng, haũ su hkã-nhám le a kut lô é nghut lhê. ¹⁷ Haũ nghut mù luí, rayuq yuq gi, Hkrisduq má nghut nyí é nghut jáng, yhang gi, asik hpãn hui sũ dut bê nghut ri; haũ axau gi, byuq byuq mù, lhunglháng asik dut bu-nhung! ¹⁸ Haũ pé banshoq gi, Garai Gasang chyáng mã é chyat nghut lhê. Yhang gi, Hkrisduq dông mai nga-nhúng lé Yhãnggũng eq nguĩngón hkyô xoq yũ luí, nguĩngón hkyô xoq é muzó ngamoq lé byi bê nghut ri. ¹⁹ Haũ gi, Garai Gasang gi, byu pé é mara lé a matsing byí é za, Hkrisduq dông mingkan lé Yhãnggũng eq nguĩngón hkyô xoq yũ bê nghut luí, Yhang gi, nguĩngón hkyô xoq yu é mungdang haũ lé, ngamoq lé ap byí to bê nghũ nau é nghut lhê. ²⁰ Haũ mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pũn kyĩng nyí é nghut lhê. Garai Gasang eq nguĩngón hkyô xoq yũ keq nghũ, ngamoq gi, Hkrisduq é gunglik dông nungmoq lé dũng tũngbán nyí lhê. ²¹ Nga-nhúng gi, Hkrisduq dông mai Garai Gasang é dingmán bang wó dut kó sháng gaq ga, Garai Gasang gi, yubak mara a bò Sũ lé, nga-

nhùng é matú yubak mara hkungga dut nhâng bê nghut ri.

6 Ngamoq gi, Garai Gasâng é mû zui byinzùm wui nghut nyi é eq rajung za, Garai Gasâng jeju lé akyû a bo é đông hkâhap yù kó nghû, nungmoq lé wum taí tsuq kat lhê. ² Hkâsu mù gâ le, “Ngò ô nau é ahkyíng má, nang lé ngò gyo byi bê nghut mù, hkyi yù hui rà buinyi má, nang lé ngò garúm bê nghut lhê.”¹

ga luí, Yhang taí ri. Ngò, nungmoq lé taí kyo kôlé, ahkuí gi, Garai Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuíhke Hkyô Pé

³Ngamoq é hpungmû gi, taí hpoí pyâm é a hui sháng gaq nghû, ngamoq gi, ó yuq é hkyô má le, leqbat jung a to byí é nghut lhê. ⁴Haú kut rá malaí, ngamoq gi, Garai Gasâng é dui-nhâng zoshâng wui nghut é hkyô lé, hkyô hkangmó má yhumsing gùng yhumsîng shit nyi lhê. Gyai hkam jân é hkyô má le, jamjau hkyô pé má le, wuíhke hkyô pé má le, myit myo uhkyí hkyô pé má le shit nyi lhê. ⁵Nhuq bat huí é pé má le, htóng lhúng huí é eq toq gabyông é má hím é huí é má le, mû zui shikut é má le, a myang yhup é myín pé má le, zò-mut huí é má le, shit nyi lhê. ⁶Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le, ⁷tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é lakkak pé đông le, shit nyi lhê. ⁸Hpungwup shingkang byí é hui kô é đông eq a hkunggâ é hui kô é đông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlhang, mhaú zo

bang đông sôn yu akô nghut ri. ⁹Ngamoq lé sé kôlhang, a sê é đông kut akô nghut ri; shi ló nyí kôlhang, rû dui nyi é bang nghut lhê; nhuq bat é hui kôlhang, sat pyâm é a hui shí é bang nghut lhê. ¹⁰Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haí le a wó kôlhang, jung hkangmó lé sing é đông nghut lhê.

¹¹Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklhum lé, nungmoq é matú làm shoq hpông to byi bê nghut lhê. ¹²Ngamoq gi, ngamoq é chyitdap myit lé, nungmoq chyáng mai lêng taú yu nyi é a nghut, nungmoq sheq, ngamoq chyáng mai lêng taú yu nyi kô é ru nghut lhê. ¹³Nungmoq le, myit nhiklhum lé làm shoq dum taú hpóng keq nghû, ngò gi, ngá zô pé lé đông taí lhê.

A Lumjîng Bang Eq A Nhunghkut Râ Hkyô

¹⁴A lumjîng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haí sêng lhum lhê lúh? Maubó eq mauchut gi, hkâsu wó zùm yap kó râ lúh? ¹⁵Hkrisduq eq Beliala^{††} gi, hkâsu kut myit wó huí lhum kó râ lúh? Lumjîng sù rayuq eq a lumjîng sù gi, hkâsu wó pung lhum kó râ lúh? ¹⁶Garai Gasâng é noqkuq yhûm eq hparà lhô pé gi, hkâsu wó hím râ lúh? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haú gi, “Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê.”^{††} ga Garai Gasang taí tô é eq rajung za nghut ri.

^{††}6:15 Beliala gâ é gi, Tsadán é myìng rajà nghut lhê.

[†]6:2 Esai 49:8 [†]6:16 Nhung 26:12; Yer 32:38; Ezk 37:27

¹⁷“Haû mù luí, yhangmoq chyáng mai htoq lô mù, gotû san za nyi keq. A sansêng é zè lé hkázáng kó, haû hkûn, Ngò, nungmoq lé lhom hap yù rà nghut lhê.”^k

ga haû Yhumsing taí ri.

¹⁸“Ngò gi, nungmoq é Íwa dut mù, nungmoq gi, Ngá é byizo yuqzò pé dut kó rà nghut lhê.”^l

ga haû wum-o a-tsam dik shoq bò Sû Yhumsing taí ri.

7 Chyitdap é luzúm wui ê, nga-nhúng gi, danggidiq haû pé lé wó tô é bang nghut é yanmai, gungdu eq woi-nyí lé agot a-û dut nhang é jung hkgangmó mai, yhumsing gùng yhumsing lhoq sân-yúng yû luí, Garai Gasang lé gyuq hkunggâ é myit èq chyoiyúng hkyô má lhoq gumjup yu nyi sháng.

Poluq É Gabú Hkyô

²Nungmoq é i-myit unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

³Ngò gi, nungmoq lé mara byi rà matú haû su taí é a nghut. Ngamoq gi, asak ùi kôle, shí kôle, nungmoq eq rahá wó dut shoq, nungmoq gi, ngamoq é i-myit unghkaû má lúng nyi é nghut lhê nghû, hí hkûn ngò taí wú bê nghut lhê. ⁴Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵Hkâsu mù gâ le, ngamoq gi, Make-doni mau má jé é hkûn, ngamoq é gungdu gi, zim za a myang nyi é htoq agó, hkyô hkgangmó má ngamoq wuihke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê. ⁶Nghut kôlhang,

nhik ngê bang lé nhik tîng é Garai Gasang gi, Tituq lé jé lé nhang é đông mai, ngamoq lé nhik tîng byi bê nghut ri. ⁷Yhang jé lé é đông mai za a nghut, yhang lé nungmoq nhik tîng byí é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

⁸Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹Nghut kôlhang, ngò gi, ahkuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyô èq, nungmoq lé myit lêng nhang é yanmai ru nghut lhê. Nungmoq gi, Garai Gasang ô nau é đông yón huí é bang dut bekô nghut mù, nungmoq lé, ngamoq èq hai akyû le a lhoq yôm byí é nghut lhê. ¹⁰Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lêng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹Garai o é đông, nungmoq chyáng akyû lhoq htoq byí é yón kuq hkyô lé wú wú keq! Haû gi, gyai yhang myit zuq é hkyô, yhumsing gùng mara a bo é lé tûn shit rà lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut rà rì rì nghut é hkyô pé nghut lhê. Nungmoq gi, haû hkyô má mara a bo é lé hkat hkgangmó má saksé tûn shit bekô nghut ri. ¹²Haû mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é hui

zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasâng hí má nungmoq gùng nungmoq wó myâng râ matú kâ kat é sheq ru nghut lhê. ¹³Haú pé banshoq dông mai, ngamoq gi, myit wum byî é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguínón byi kô é yanmai nghut ri. ¹⁴Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhungl-háng gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵Nungmoq banshoq bang jino gyo kômù, gyuq nán é myit mai yhang lé lhom hap yù kô é lé, yhang myitbùn é hkûn, yhang nungmoq lé chyitdap é myit gi, je riyhang kô dik nyi ri. ¹⁶Ngò gi, nungmoq lé banshoq wó lum to bê lé sê é yanmai, gabú nyi lhê.

Byî É Hkyô

8 Gumang wui ê, ahkuí, ngamoq gi, Makedoni mau mâ é noqkuq hpúng pé lé Garai Gasang byî é jeju eq sêng é hkyô, nungmoq lé sé nhâng nau ri. ²Yhangmoq gi, wuífhe jamjau hkyô myo myô èq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaú mai yhang haú su kut kô é nghut ri. ⁴Yhangmoq gi, haú sân-yúng bang lé wó bo dojaú râ matú, ngamoq lé gyai yhang ahkáng dung kô é nghut

ri. ⁵Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é dông, yhangmoq gùng lé hí haú Yhumsing lé ap byî pyám kômù, hau htâng sheq ngamoq lé ap kô é nghut ri. ⁶Haú mù luí, Tituq yhang hí kut hi nyi bê nghut é yanmai, ngamoq gi, jeju haú lé nungmoq chyáng le shuí lhoq byíng jup byi râ matú, yhang lé wum byi bê nghut lhê. ⁷Nungmoq gi, lumjínng myit má, dang nyo é hkyô má le, sumpsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkanngmó má agùn agó dut bekò eq rajung za, nungmoq gi, byí nau é jeju shí má le agùn agó dut râ lé, bûn nyi keq.

⁸Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú nau luí sheq ru nghut lhê. ⁹Hkâsu mù gâ le, nungmoq gi, nga-nhûng é Yhumsing Yesuq Hkrisduq é jeju lé sê akò nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkanngmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sânng-hi, byí hí kô é za a nghut, haú su kut nau é myit bo é bang le nghut akò. ¹¹Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pán keq. ¹²Hkâsu mù gâ le, byí nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³Nungmoq é matú gi, wòlai dut, góbâng gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. ¹⁴Nung-

moq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkui lhê é ahkýing má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê. ¹⁵Haû gi, “Myo myo tsing yu é sù gi, lûm myo shoq wó é a nghut, shau za tsing yu é sù gi, lûm shau shoq wó é a nghut.”^m ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶Nungmoq é matú ngò myit chiq byi é eq rajung zâ é myit lé, Tituq é i-myyit má kat byí é Garai Gasang lé, ngò jeju hkya-ôn lhê. ¹⁷Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhanggùng yhang myit hpyit yû luí, nungmoq chyáng lé lô gù za nghut ri. ¹⁸Ngamoq gi, haû gabú danglù lé dojaú é má noqkuq hpúng pé banshoq èq hkya-on huí é gumang hpó haû lé le, yhang eq rahá nhang kat lhê. ¹⁹Hau htoq agó, ngamoq garúm rà myit bo nyi é hkyô lé tún shit mù, haû Yhumsing lé hkungga rà matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut rà matú, noqkuq hpúng pé èq hkyin yu é sù le yhang nghut lhê. ²⁰Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô rà hkyô a htoq shoq sidiq nyi lhê. ²¹Hkâsu mù gâ le, jô é hkyô kut rà matú ngamoq shikut nyi é gi, haû Yhumsing é myoq hí má za a nghut, byu pé é myoq hí má le nghut lhê.

²²Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le

yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri. ²³Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhúng é gumâng nhik é hkyô ga jáng, yhangnhik gi, noqkuq hpúng pé é gunglik eq Hkrisduq é arông nghut akò. ²⁴Haû mù luí, haû noqkuq hpúng pé wó myâng kó sháng gaq, nungmoq má ngamoq haî mù gumrong é hkyô eq nungmoq é chyitdap myit é saksé lé, haû bang lé tún shit keq.

9 Ngò gi, haû sân-yúng bang lé htuqbang rà hkyô eq séng luí, nungmoq lé kâ kat rà a ra nghut ri. ²Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haû hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaû toq byi bê nghut ri. ³Nghut kôlhang, shí hkyô má nungmoq eq séng luí ngamoq gumrong é gi, hká đông le dangsóm a dut byuq sháng gaq, ngò taí bê eq rajung za nungmoq rì rì wó hen to rà matú, ngò gi, gumang wuí lé nhang kat é nghut lhê. ⁴Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu rà a nghut, ngamoq le, nungmoq lé lûm yhang lum pyâm é yanmai, hoq bo hpu rà nghut lhê. ⁵Haû mù luí, nungmoq danggidiq byi to bê nghut é, chyunghuq lé rago wó lajâng pân to rà matú, gumang wuí lé wum taí tsuq mù, nungmoq lé hí, lé kum nhâng rà gi, ra yhang rà lhê nghû ngò wó myit ri. Haû hkûn sheq, a nau é đông byí é a

nghut é za, byí nau é chyunghuq đông hen tô é dut rã nghut lhê.

Agùn Agó Byí É Hkyô

⁶Shau za sân hkyô sũ gi, shau za shũ yũ rã nghut mù, agùn agó sân hkyô sũ gi, agùn agó shũ yũ rã nghut lhê gâ é dang lé, myitbũn nyi keq. ⁷Yuq hkgangmó gi, a kãm byí é eq yí nhang é đông a nghut é za, yhumsing myit má byí nau é myhó lé myit hpyit yũ mù byí é đông dut rã lhê. Hkãsũ mù gâ le, Garai Gasang gi, gabú myit eq byi sũ lé chyitdap ri. ⁸Haũ mù, ahkyíng hkgangmó jung hkgangmó má, nungmoq rã é banshoq wó mù, ge é muzó hkgangmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byí é sũ nghut lhê. ⁹Haũ gi,

“Yhang gi, a ha bũn é za myùng bang lé yhang é chyunghuq tsing gãm byi bê nghut ri; Yhâng é dingmán hkyô gi, ahtum abyuq gĩng nyi ri.”^m

ga kã to eq rajung za nghut ri. ¹⁰Kyô hkyô sũ lé kyôshi, zoshuq matú muk byí é Sũ gi, nungmoq lé kyôshi byi mù, lhoq myô jat byi rã eq, nungmoq é dingmán hkyô é ashi lé myô lò nhang rã nghut lhê. ¹¹Nungmoq gi, ayoq abun hkgangmó má agùn agó byí é bang wó dut kó rã matú, hkyô hkgangmó má sũt wó é bang dut é hui kó rã nghut lhê. Nungmoq agùn agó byí é hkyô lé, ngamoq hai byi mù, Garai Gasang lé jeju hkyô-ôn é hkyô dut rã nghut lhê.

¹²Nungmoq dojaú é hkyô shi gi, Garai Gasang é byu pé rã é hkyô lé lajang byí é za a nghut, Garai Gasang lé jeju bũn é dang byíng mui nyi nhang é le nghut lhê. ¹³Dojaú hkyô hau é yanmai, nungmoq lhumzui hkyô saksé tũn shit bekô nghut mù, byu pé gi, Hkrisduq é gabú danglũ lé nungmoq yín yũ luĩ jĩno gyo kô é yanmai le, yhangmoq eq yuq hkgangmó

lé, nungmoq é a ha bũn é myit mai shũ gam chũng kô é yanmai le, Garai Gasang lé hkyô-on kó rã nghut lhê. ¹⁴Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyũdung byí é u má, yhangmoq é myit nhikhlum gi, nungmoq chyáng htoq jé rã nghut lhê. ¹⁵A ung htoq tai é Garai Gasang é chyunghuq é yanmai, jeju hkyô-on hkyô gi, Yhâng chyáng ru nghut nyi sháng gaq ô!

Poluq, Yhâng É Hpungmũ Lé Tai Hung É Hkyô

10 Nungmoq eq myoqdong hkyũm nghut é hkũn gi, gyuq kyũm myit bo ri ga, wê gãng é hkũn gi, a gyuq a wãm dut ri ga kô é sũ, ngò Poluq gi, Hkrisduq é nũm é hkyô eq nú-nhãm é hkyô đông mai, nungmoq lé pying kat lhê. ²Shi mingkãn é nyi yap a-tsang đông ngamoq asak dui ri ga myit ngam é byũ ra-am lé, ngò a gyuq a wãm é myit lé shit rã dã tô lhê. Ngò jé lé é hkũn, nungmoq lé haũ sũ é myit a shit ra sháng gaq, ngò nungmoq lé dũng tông-bán kat lhê. ³Hkãsũ mù gâ le, ngamoq gi, mingkan shi má asak dui nyi kũlhang mingkan byu pé kut é đông majan zãn é a nghut. ⁴Ngamoq majan zãn é laknak gi, mingkan shi é laknak a nghut é za, shut shai é đông dang-rháng hkyô nghut é, gĩngtĩng é gyedap pé lé lhoq htên pyám rã matú Garaí é a-tsam byíng é laknak ru nghut lhê. ⁵Ngamoq gi, dang-rháng rhâng lhũm é hkyô pé eq Garai Gasang lé sê é hkyô lé shut shai shoq yhumsing gũng yhumsing lhoq myhang mhaũ é hkyô hkgangmó lé lhoq htên pyám mù, Hkrisduq é jĩno gyo rã matú, myit sôn é hkyô hkat hkgangmó lé shũm kut yu é nghut lhê. ⁶Nungmoq é jĩno gyo hkyô gi, gumjup é hkũn, jĩno a gyô é hkyô

hkanqmó lé ngamoq dam byi râ rì rì dut râ nghut lhê.

⁷Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸Hkâsu mù gâ le, nungmoq lé láng hkyô râ nó gi, nungmoq lé kô myhâng nhâng râ matú, ngamoq lé haú Yhumsing byí é ahko ahkáng lé gyai gumrong le lháng, ngò gi, hoq hpú é hui râ a nghut. ⁹Ngò gi, ngá é laiká pé èq nungmoq lé kyuq é su a dut nhâng nau é nghut lhê. ¹⁰Hkâsu mù gâ le, ra-am gi, “Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut.” ga taí akô.

¹¹Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haú sù é bang sê gyo râ dut lhê.

¹²Ngamoq gi, haú yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chín lhûm wú é eq yhangmoq gùng yhangmoq whuí lhûm wú kô é hkûn, hpaqchyí a bo é bang dut bekô nghut ri. ¹³Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byí é, nungmoq chyáng lháng hkyit jé shoq nghut é maukyo hkaú má za gumrông râ nghut lhê. ¹⁴Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut

lhê. ¹⁵Dum, ngamoq gi, góbang kut é muzó lé le, âng é mai lai luí gumrong lai é a nghut. Ngamoq myoqbyu é hkyô gi, nungmoq é lumjúng myit kô myhang jat nyi jáng sheq, nungmoq chyáng ngamoq zui saí é jowò gyai wó lhoq lâm râ nghut lhê. ¹⁶Haú gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng luí, gumrông nau é a nghut. ¹⁷Nghut kôlhang, “Gumrong é sù gi, haú Yhumsing má gumrông sháng gaq.”^o ga kê tô ri. ¹⁸Hkâsu mù gâ le, yhumsing gùng yhumsing owaq é sù gi, hap yù hui é a nghut é za, haú Yhumsing èq owaq byí é sù sheq, hap yù hui é ru nghut lhê.

Lagyo Apyoq Pé Eq Poluq

11 Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haú su kut nyí gù nghut bekô. ²Haí mù gâ le, ngò gi, Garai Gasang mai nungmoq lé magum é myit èq, nungmoq é matú magúm byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsing hpô chyáng za nungmoq lé byi zo râ nghû, danggidiq byí to bê nghut lhê. ³Nghut kôlhang, Ewaq gi, lhangmuí hpaqchyí dâ é èq mhaú zô é hui é su, nungmoq myit é hkyô pé gi, Hkrisduq chyáng nungmoq é lhumzúí é eq sansêng é i-myit ap nóng é hkyô mai shuí nghoq ló byuq é hui râ lé, ngò myit chiq ri. ⁴Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu

to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri. ⁵Nghut kôlhang, ngò gi, “Ahkyak-lagyô pé” ga bâng é htoq má ratsuí lhang gyamgyi gyó sù a nghut nghut myit ngam é nghut lhê. ⁶Ngò gi, dang tái hpaqchyí kung sù rayuq a nghut kôlhang, sumpsé hpaqchyí bò sù nghut lhê. Ngamoq gi, hkyô hkangmó má, nungmoq lé haú hkyô hkyâng shoq sé nhâng bê nghut lhê.

⁷Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq rã matú, ngá gùng ngò lhoq nyhum é gi, ngá é mara dut byuq bê lhu? ⁸Ngò, nungmoq lé dojaú rã matú, gotú noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê. ⁹Ngò gi, nungmoq eq rahá nyi mù, rajung jung rã é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí rã é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq lui le haú đông kut nyí rã nghut lhê. ¹⁰Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mã é bang ó yuq lhang, ngò haú su gumrong é hkyô lé wó hkúm zìng rã a nghut. ¹¹Haí mù lhu? Ngò, nungmoq lé a chytidap é yanmai nghut lhê lhu? Ngò, nungmoq lé chytidap é hkyô lé, Garai Gasang sê lhê. ¹²Ngò gi, yhangmoq zui saí é lé gumrong é hkyô pé má ngamoq eq rawuí za sòn byi rã ahko ahkáng ô nau é bang lé ahkáng a byi rã matú, ngò kut nyi é su xoq lui kut shi rã nghut lhê.

¹³Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyô pé đông kut mhaú é bang nghut akô. ¹⁴Haú gi, maú ra hkyô

a joq, hkâsu mù gâ le, Tsadán lhang gi, maubó é maumang lagyo rayuq đông kut mhaú é sù nghut lhê. ¹⁵Haú mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaú é nghut jáng, maú dân rã hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó rã nghut lhê.

Yhâng É Wuíhke Jamjau Hkyô Eq Séng Lui, Poluq Gumrong É Hkyô

¹⁶Ngò puq tái kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷Ngò, haú su gumrong é hkyô gi, haú Yhumsîng o é đông ngò tái nyi é a nghut, byù gò rayuq đông tái nyi é ru nghut lhê. ¹⁸Byù myo myo gi, mingkân é hkyô đông gumrong nyi bum lhê nghut mù, ngò le gumrông rã nghut lhê. ¹⁹Nungmoq gi, hpaqchyí lûm bo kô é nghut mù, byù go pé lé gabú myit eq jân nyi akô nhung! ²⁰Gè gè yhang, nungmoq gi, nungmoq lé jùn kut é sù lé le, nungmoq lé rhoí zô é sù lé le, nungmoq chyáng akyú hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹Ngamoq gi, nungmoq lé haú hkyô kut rã má wum gyai nyhôm lhê nghú yín yù rã lé, ngò, hoq ri!

Rayuq yuq, haí lé wám gumrong é nghut jáng, ngò le, haú lé wám gumrong lhê nghú, byù gò rayuq đông ngò tái nyi é nghut lhê. ²²Yhangmoq gi, Hebre byu pé nghut akô lhu? Ngò le nghut lhê. Yhangmoq gi, Israelaq byu pé nghut akô lhu? Ngò le nghut lhê. Yhangmoq gi, Abraham é awut ashîn pé nghut akô lhu? Ngò le nghut lhê. ²³Yhangmoq gi, Hkrisduq é dui-nhâng zoshâng wui nghut akô lhu? (Ngò gi, myit a gyîng é sù đông haú su tái é nghut lhê.) Ngò gi, je nghut

lhê. Ngò gi, mû zui je shikut bê, htóng anum num je lúng wú bê, je riyhang bat é huí wú bê, shí rã í é adàm dàm huí wú bê nghut lhê. ²⁴Ngò gi, Yudaq byu pé nuichum eq bat é myi xê dàm byíng rã radàm ra ra dut é, ngo lêng huí zô wú é nghut lhê. ²⁵Ngò gi, dumbáng eq nhuq huí é sum dàm, shí sháng gaq ga luqgok eq dú huí é radàm, wui-sanghpo byoq huí é sum dàm, wuimau má myù byôm é ra-nyí ra-myín huí zô wú bê nghut lhê. ²⁶Ngò gi, xoq xoq hkyowuì htoq e ló é hkún, wui gú é gyuq chiq jung, damyaq huí é gyuq chiq jung, ngá é amyù wui chyáng mã é gyuq chiq jung, tûngbàu pè chyáng mã é gyuq chiq jung, myuq hkaú pé mã é gyuq chiq jung, yoso pé mã é gyuq chiq jung, wuimau mã é gyuq chiq jung eq gumang apyoq pè chyáng mã é gyuq chiq jung pé huí zô wú bê nghut lhê. ²⁷Ngò gi, mû lé zui nú zui hkyik mù, anum num a myang yhup shoq dut wú bê nghut lhê. Ngò gi, zòmút wui shit huí é eq zoshuq a wó é anum num huí lã lo wú bê nghut lhê. Ngò gi, gyoq hpû é eq gùngchín dut é huí wú bê nghut lhê. ²⁸Haú pé lhunglhang htoq má, noqkuq hpûng pé banshoq é matú ngò myit chiq byí é hkyô gi, nyí wui ngò má wòlai dut nyí ri. ²⁹Rayuq yuq wum nyhóm le, ngò le wum a nyhóm rã lhú? Rayuq yuq mara shuí kut shut é hui le, ngò myit a nyé rã lhú?

³⁰Ngò gumrông rã dut é nghut le gi, ngò wum nyhóm é hkyô lé tûn shit é pé lé gumrông rã nghut lhê. ³¹Ngò a mhaú nyí é hkyô lé pyat dedu hkya-on huí é sù, haú Yhumsing Yesuq é Íwa eq Garai Gasang sê lhê. ³²Damaskuq myuq má, Hkohlkâm Areta é a-ô mã é mauzau gi, ngo lé chyup rã matú, myuq lé zúng nhang é nghut lhê. ³³Nghut kôlhang, ngò gi, manghkoq má lúng mù, myuq

xêwâm mã é hkohot dong mai lhoq hkyô kat é hui luí, yhang é loq mai wó lut é nghut lhê.

Poluq É Myoqwup Shing-rán Pé

12 Ngò gi, rû gumrông nyí rã za nghut lhê. Akyù wó rã a nghut kôlhang, haú Yhumsing chyáng mai lo é myoqwup shing-rán pé eq hpông shit é shing-rán pé lé gumrông rã nghut lhê. ²Ngò gi, lã ló bê raxe myi zân hkûn, mauhkung sum tsáng nghu é má shuí toq yu huí é, Hkrisduq mã é byù rayuq[¶] é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³Yhang hparadisú má shuí toq yú huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴Yhang gi, byu pé taí kyô htoq rã ahkáng a wó é hkyô pé nghut é, a wó taí sân kyô é hkyô pé lé wó gyô ri. ⁵Ngò gi, haú yuq sù é byu é hkyô eq séng luí gumrông rã nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gûng ngò gumrông rã a nghut. ⁶Ngò gi, gumrông hkyô lé hkyin yù rã dut é nghut jáng lhang, byù gò dut rã a nghut, haí mù gâ le, ngò gi, tengmán hkyô taí nyí rã nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghú, ngò a gumrông kut pyâm nyí lhê.

⁷Haú laklaí dik é dông ngo lé hpông shit é shing-rán mó pè é yanmai, ngò a nghutbûn byuq sháng gaq ga, ngo lé gungjang rã matú, Tsadán é lagyo nghut é zu lé, ngá é gungsho má kat byí to bê nghut ri. ⁸Haú lé ngá chyáng mai yu pyám byi rã matú, ngò, Yhumsing lé sum dàm dúng tóngbán wú bê nghut lhê. ⁹Nghut

[¶]12:2 Hkrisduq mã é byù rayuq gâ é gi, Poluq yhanggùng yhang lé taí nyí é nghut lhê.

kôlhang, Yhang gi, “Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri.” ga luí, ngo lé taí ri. Haú mù luí, Hkrisduq é a-tsam gi, ngò má wó joq nyi sháng gaq nghú, ngò gi, ngá é wum nyhôm é hkyô pé eq séng luí, gabú myit mai je riyhang gumrông rá nghut lhê. ¹⁰ Haú nghut mù luí, ngò gi, Hkrisduq é yanmai, wum nyhôm é hkyô pé má le, rhoi huí é hkyô pé má le, wuífke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byí É Hkyô

¹¹ Ngò gi, ngá gûng ngò byù gò lhoq kut yú bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, “Ahkyak lagyô pé” ga bâng é htoq má ratsuí lháng gyamgyi gyó sù a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpûng pé htoq má gyamgyi gyó nyi akô lú? Ngò, haú hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhing nghú rá dâm, lé kum rá rì rì nghut bê mù, nungmoq é matú wòlai gi, a dut rá nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wuí gi, mó wui é matú sutzè hkong to byi rá dut é a nghut, mó wuí sheq, zô wuí é matú hkong to byi rá dut é nghut lhê. ¹⁵ Haú mù luí, ngò gi, gyai yhang gabú é myit mai, ngò wó é jung

hkanmó lé nungmoq é matú chung jai rá nghut mù, ngá gûng lé lháng chûng jai rá nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó rá lú? ¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é đông nungmoq lé chyup yú sù dut byuq bê ga nungmoq ra-am myit akô myhi-nhung! ¹⁷ Ngò gi, nungmoq chyáng nhang kat byí é byù đông, nungmoq chyáng amyat kut zô yú bê nghut lhê lú? ¹⁸ Ngò gi, Tituq lé nungmoq chyáng lé rá matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lú?

¹⁹ Ngamoq gi, nungmoq hí má ngamoq gùng ngamoq taí hung yu nyi ri nghú, ahkuí jé shoq myit nyi akô lú? Ngamoq gi, Hkrisduq mâ é byu pé đông, Garai Gasâng hí má taí nyi é nghut lhê. Chyitdap é gumang wui ê, ngamoq kut é jung hkanmó gi, nungmoq é akyu matú chyat nghut lhê. ²⁰ Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó rá eq, nungmoq, ngo lé dut nhâng nau é su, ngò a wó dut rá lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbún é eq atau ahú dut é hkyô pé joq rá lé gyuq ri. ²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é đông nyi zô lúum nau é i-myit, gungsho zùm yap é yubak mara eq a sân-yúng é hkyô kut shut é mai myit a lhing bang myo myô é yanmai, yón kuq é hui zo rá lé, ngò myit chiq ri.

Ló Htáng Má Sidiq Byî É Dang Pé

13 Ahkuí, ngò, nungmoq chyáng lé kum râ gi, sum lǎng nghû râ dàm nghut lhê. Haû gi, “Mara hun é hkyô hkangmó lé, í yuq sum yuq saksé hkâm é èq lhoq teng ra râ nghut lhê.”^p ga kê tô é eq rajung za nghut lhê.² Ngò gi, í lǎng nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê.³ Haû gi, ngò dông mai Hkrisduq dang taí nyi é hkyô saksé shit râ lé, nungmoq dǔng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri.⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haû eq rajung za, ngamoq gi, Yhang su wum nyhôm kôlhang, nungmoq lé do-jaú râ matú, Garai Gasâng é a-tsâm èq, Yhang eq rahá dui nyi râ nghut lhê.

⁵Nungmoq gi, lumjǎng hkyô má nghut nyi lhê luq, yhumsǎng gùng yhumsǎng myí wú keq. Yhumsǎng gùng yhumsǎng chyam wú keq. Nungmoq gi, chyam é má sǔm byuq é za a nghut jǎng, nungmoq chyáng Hkrisduq Yesuq lǔng nyí bê hkyô lé sé kó râ nghut lhê.⁶ Ngamoq gi, chyam é má a sǔm é hkyô lé, nungmoq wó sé kó râ nghut lhê nghû, ngò hkyak lum tô lhê.⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyúdung byi lhê.

Haû gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sǔm é su dut kôlhang, nungmoq ge é hkyô kut kó râ lé myàng râ matú nghut lhê.⁸ Hkâsu mù gâ le, ngamoq gi, haû tengmán hkyô eq shaí é dông haí le a ge kut é za, tengmán hkyo é matú za kut râ dut é nghut lhê.⁹ Ngamoq wum nyhôm kôlhang, nungmoq wúm bo é hkûn, ngamoq gabú é nghut lhê; ngamoq kyúdtǔng é gi, nungmoq gumjup râ matú nghut lhê.¹⁰ Ngò gi, wê gâng tô é hkûn, haû hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsǎng ngo lé byí é sheq ru nghut lhê.

Ló Htáng É Shi-kyâm Dang

¹¹Ló htáng má ngò taí nau é gi, gumang wui ê, nguóngon yuqyo nyi keq. Gumjup hkyô shut sô nyi keq, ngò dǔng tǔngbán é dang lé gyo keq, myit rahkat za dut nyi keq, nguóngon shoq asak dui nyi keq. Haû hkûn, chyitdap hkyô eq nguóngon hkyo é Garai Gasang gi, nungmoq eq rahá nyi nyi râ nghut lhê.

¹²Chyoiyúng é bopuq puq é èq, rayuq eq rayuq shi-kyâm lhum keq.¹³ Sǎnyúng bang banshoq gi, nungmoq lé shi-kyâm kat akô.

¹⁴Haû Yhumsǎng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zǔm yap hkyô gi, nungmoq banshoq bǎng chyáng ru joq nyí shǎng gaq ô.

GALATIQ

Mau Bâng Chyáng Hun Kat é Laiká (Galatians)

1 Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shî bê mai dum lhoq dui toq yu é sủ Ấwa Garai Gasang eq Yesuq Hkrisduq chyáng mai nhang kat é lagyo rayuq nghut sủ, ngò Poluq gi, ²ngò eq rahá nyi é gumang wui banshoq bang le mủ, Galatiq mau mâ é noqkuq hpúng pê chyáng dang kyô kat lê.

³Nga-nhúng é Ấwa Garai Gasang eq Yhumsing Yesuq Hkrisduq chyáng mâ é, jeju eq ngingón hkyô gi, nungmoq chyáng ru joq nyi sháng gaq ô. ⁴Haù Hkrisduq gi, nga-nhúng é Ấwa Garai Gasang ô nau é eq rajung za, agè ashop é ipyat shî mai, nga-nhúng lé xe yù rã ga, nga-nhúng é yubak marã é matú yhanggùng lé Yhang byi pyám bê nghut ri. ⁵Haù hpungwup shingkang gi, Garai Gasang chyáng pyat dedu ahtum abyuq ru joq nyi sháng gaq ô. Amen.

Gotú Gabú Danglù A Joq É Hkyô

⁶Ngò gi, haù Hkrisduq é jeju mai nungmoq lé ji yù Sủ lé, nungmoq haù í han kâng pyâm to kôluí, shaí é gabú danglù shut lhing ló nyi kô é hkyô lé, gyaí yhang maú nyi ri. ⁷Danglù haù gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyâm nyi kô é hkyô za nghut lê. ⁸Nghut kôlhàng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkung htoq mâ é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq dam byi é hui zo sháng gaq ô! ⁹Ngamoq taí wú bê eq rajung za, ahkuí

le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byi é hui zo sháng gaq ô!

¹⁰Haù su nghu taí é gi, ahkuí, ngò, byù é hí má myoqdong wó rã matú shikut nyi é nghut lhê lú? Haù a nghut jáng, Garai Gasang é hí má myoqdong wó rã matú shikut nyi é nghut lhê lú? Byù lé gabú nhâng rã matú, ngò shikut nyi é nghut lhê lú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut rã a nghut.

Poluq Lé, Garai Gasang Ji Yu É Hkyô

¹¹Gumang wui ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹²Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é đồng wó hap yu é ru nghut lhê.

¹³Ngò, Yudaq noqkuq htung má nghut nyi ashî hkún, Garai Gasang é noqkuq hpúng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak duì hkyô lé, nungmoq wó gyô wú bekô rã nghut lhê. ¹⁴Ngò gi, ngò eq ra-kyam zã é Yudaq byu pé myo myô é htoq má, Yudaq noqkuq htung lé je cháng sủ nghut é htoq agó, ngá é íchyí íwa pê é htungli lé ladu lai shoq myit zing zuq sủ nghut lhê. ¹⁵Nghut kôlhàng, ngá nú é unghkaú mai yhang hkyin to luí, Yhang é jeju yan-mai ngo lé ji yu é Garai Gasang gi, ¹⁶haù Yhang Zô é hkyô gabú danglù lé, ngò mai tungbaù pê chyáng hko kyo sháng gaq ga, Yhang Zo lé ngá chyáng htoq shit nhâng rã matú myit hpyit yu é hkún, ngò gi, ó yuq eq le a hpyê yù, ¹⁷Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taí ló bê nghut lhê.

¹⁸Sum zân lai é htâng má, ngò gi, Yerusalem wà mó má doq ló mù, Petruq^{§§} lé ló hui luí, yhang eq raxe ngo nyí, ló nyi nyi é nghut lhê. ¹⁹Haú má, Yhumsing é yhanggu Yakuq mai lai luí, lagyo góbang lé ngò a myàng nghut ri. ²⁰Nungmoq lé ngò ká byí kat é má, mhaú é hkyô a bò nghu luí, Garai Gasang hí má, hkyak, ngò tai lhê. ²¹Hau htâng má, ngò gi, Suriq mau eq Kiliki mau má é jé é nghut lhê. ²²Haú hkûn, haú Hkrisduq má nghut é, Yuda mau má é no-qluq hpúng byú wui gi, ngo lé myoqno a shú kó nghut ri. ²³Yhangmoq gi, “Hí hkûn, nga-nhúng lé zing-ri sù gi, yhang mai lhoq hten rá matú radàm shikut wú é lumjíngh hkyô haú lé, ahkuí hko nyi ri.” gâ é hkyanglù lé wó gyô wú kôluí za, ²⁴ngá é yanmai, Garai Gasang lé hkya-ôn bum akô nghut ri.

Poluq Lé Lagyô Pé Lhom Hap Yu É Hkyô

2 Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ²Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tûngbaù pè chyáng ngò hko kyô nyi é gabú danglù lé, haú suwún dut băng é hí má za shap kyô é nghut lhê. ³Nghut kôlhang, ngò eq rahá nghut é Tituq gi, Grik byú nghut kôle, yhang lé ahpyokuq a hpyit nhâng kó nghut ri. ⁴Haú hkaú wang lo é mhaú é gumang wui gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng rá dâ kô é yanmai, haú hkyô

gabyông htoq lo é nghut ri. ⁵Nghut kôlhang, haú gabú danglù é tengmán hkyô gi, nungmoq chyáng joq gîng nyi sháng gaq nghú, razup za lháng, yhangmoq é dang lé ngamoq gyo byí é a nghut.

⁶Ahkyak é byú su dut é bang gi, yhangmoq haí jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byú haú bang gi, ngá é mungdang má haí le a jat kat e za, ⁷Petruq gi, Yudaq byu pé[†] lé, haú gabú danglù hko kyo rá mù má lum tô é hui bê eq rajung za, ngò gi, tûngbaù pé[‡] lé, haú gabú danglù hko kyo rá mù má lum tô é hui bê hkyô lé za, yhangmoq myang akô nghut ri. ⁸Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tûngbaù pè matú ngo lé le lagyo ayá dâng byi bê nghut lhê. ⁹Haú hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq èq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pè shut é rá lhê ga, myit hui bekô nghut ri. ¹⁰Yhangmoq gi, ngá-nhik mai myùng bang lé ru bún nyi rá matú za pying kat akô; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹Antioku wà mó má Petruq jé lé é hkûn, yhang lé mara hûn rá hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹²Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haú bang jé é hkûn, yhang gi,

§§1:18 Petruq lé Kehpa le gâ lhê.

*2:4 Yudaq byu pé ra-am gi, hpúng asik wang é bang lé Yudaq htûng tarâ cháng nhâng nau akô nghut ri.

†2:7 Grik má ahpyo-kuq hpyit hkam é bang ga bo tô ri.

‡2:7 Grik má ahpyo-kuq hpyit a hkam é bang ga bo tô ri.

ahpyo-kuq hpyit rã lhê gã é hpúng má lom é bang lé gyuq é yanmai, tũngbaù pẽ chyang mai htoq gang luí, yhang baù nyi tô ri. ¹³Yhang, gegùn labyoq kut é hkyô má, gotũ Yudaq byu pé le bo chãng kut akô nghut mù luí, Barnaba lháng yhangmoq kut é gegùn labyoq hkyô má bo chãng nghoq lô bê nghut ri. ¹⁴Haũ gabú danglu é tengmán hkyô eq rajung za, yhangmoq a chãng kô é lé myàng jáng, ngò gi, yhangmoq banshoq bãng é hí má, Petruq lé, “Nàng gi, Yudaq byu nghut to mù luí, Yudaq byu rayuq đông a nyi e za, tũngbaù rayuq đông nyi luí nhĩng, tũngbaù pé lé Yudaq byu pẽ é htũngli hkãsu kut wó chãng nhãng rã lhu?”

¹⁵Ngamoq gi, yubak dap bang gã é tũngbaù pé a nghut e za, hkũ é buinyi mai yhang, Yudaq byũ nghut gũ bê nghut lhê. ¹⁶Byũ gi, jep é tarã lé chãng luí mara hkyut san byi huí é a nghut e za, Yesuq Hkrisduq lé lumjĩng é yanmai sheq mara hkyut san byi huí é hkyô lé, ngamoq sê lhê. Haũ mù luí, ngamoq gi, jep é tarã lé chãng luí a nghut e za, Yesuq Hkrisduq lé lumjĩng é yanmai, mara hkyut sãn pyám byí é hui sháng gaq nghũ, Yesuq Hkrisduq lé lumjĩng bê nghut lhê; hkãsu mù gã le, ó yuq le, jep é tarã lé chãng é yanmai, mara hkyut san byí é hui rã a nghut.

¹⁷Ngamoq gi, Hkrisduq má ngamoq é mara hkyut san byí é hui rã hkyô ho nyi é hkũn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lhu? Ratsuí le a nghut. ¹⁸Ngò gi, ngò hpyoq pyám bê hkyô lé dum saĩ kut é nghut jáng, tarã lu laĩ é byũ ngò nghut é lé tũn shit ri. ¹⁹Ngò gi, jep é tarã eq sêng é má, jep é tarã é yanmai shĩ jáng sheq, Garai Gasang é matú wó dui nyi rã nghut lhê. ²⁰Ngò gi, Hkrisduq eq rahá jén sat é hui bê nghut mù luí, ngá gũng

ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuĩ, ngò gungsho má asak dui nyi é gi, ngo lé chytidap luí, ngá é matú yhanggũng lé Yhang byĩ pyám é, haũ Garai Gasang é Yhangzo lé lumjĩng é yanmai ru nghut lhê. ²¹Ngò gi, Garai Gasang é jeju lé tô pyám é a nghut, hkãsu mù gã le, dingmán é hkyô lé, jep é tarã đông wó yu é ru nghut le gi, Hkrisduq shĩ hkãm é gi, akôm dut byuq rã nghut lhê.” nghũ taĩ é nghut lhê.

Lumjĩng Myit Lhu? Jep É Tarã Lhu?

3 Galatiq mau mã é byũbãm pé é! Yesuq Hkrisduq gi, tapzĩng mã jén sat hui bê hkyô lé, nungmoq é myoq má bò nhang to bê le nhĩng, ó yuq eq wá nungmoq lé lãng nghoq yũ bekô lhu? ²Nungmoq gi, haũ Woi-nyĩ lé, jep é tarã chãng luí wó yũ kô é nghut lhê lhu? A nghut jáng, nungmoq wó gyô yu é gabú danglũ lé lumjĩng luí wó yũ kô é nghut lhê lhu? Haũ rahkat lé za, ngò sê yũ nau ri. ³Nungmoq gi, haũ-ĩ yhang bãm akô lhu? Haũ Woi-nyĩ lé lumhkaũ mù kut hĩ kôluĩ nhĩng, ahkuĩ, gungsho wum-o lé lumhkaũ mù, yhumsĩng myit tô é hkyô lé lhoq pãn rã matú shikut nyi akô lhu? ⁴Nungmoq, myo myo hpuzô pyám é gi, akôm nghut akô lhu? Gè gè yhang, haũ gi, akôm nghut byuq bekô lhu? ⁵Garai Gasang, nungmoq lé Yhang é Woi-nyĩ byĩ é htoq agó, nungmoq chyang laklaĩ kumlhá kut é gi, jep é tarã lé nungmoq chãng é yanmai nghut akô lhu? A nghut jáng, nungmoq wó gyô é gabú danglũ lé, nungmoq lumjĩng é yanmai nghut akô lhu?

⁶“Abraham gi, Garai Gasang lé lumjĩng luí, yhang lé dingmán sũ ga sôn yu é hui bê nghut ri.”^q ga, Abraham eq séng luí taĩ tô é lé myit wú keq. ⁷Haũ mù luí, lumjĩng myit bo é bang

gi, Abraham é yhangzô pé^f yhang dut bê nghut é hkyô lé sé keq. ⁸Lumj́ng myit é yanmai, tungbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, “Nang é yanmai, byuhú chângjup gi, shimân jeju wó yú kó râ nghut lhê.”^r gâ ri. ⁹Haù mù luí, lumj́ng myit bo é bang gi, lumj́ng myit bo é Abraham eq rahá, shimân jeju lé myang hkam yù kó râ nghut lhê.

¹⁰Jep é tarâ châng é hkyô má ngè hkau é lhunglhang bang gi, nhing pyâm é hui bang chyat nghut lhê. Hkâsu mù gâ le, “Tarâ laiká má kâ tô é lhunglhang lé a xoq kut é sù, ó yuq nghut kôle, nhing pyâm é hui kó râ nghut lhê.”^s ga luí, kâ tô ri. ¹¹Hau htoq agó, “Haù dingmán sù gi, lumj́ng myit mai asak duì râ nghut lhê.”^t ga kâ tô é yanmai, ó yuq nghut kôle, Garai Gasang é hí má jep é tarâ lé cháng luí, mara hkyut san byí é a huí é hkyô gi, san za nghut bê nghut ri. ¹²Haù jep é tarâ gi, lumj́ng myit eq haí a sêng é nghut luí, “Haù pé dông châng é sù gi, haù pé mai asak duì râ nghut lhê.”^u ga kâ tô ri. ¹³Haù Chyúmdang má, “Sik zing má jén lhang to huí é sù ó yuq nghut kôle, nhing pyâm é hui sù nghut ri.”^v ga kâ tô é eq rajung za, Hkrisduq gi, nga-nhung é matú nhing pyâm é hui sù dut bê nghut é yanmai, jep é tarâ má é nhing é hkyô mai nga-nhung lé hkyi yù bê nghut ri. ¹⁴Haù Abraham lé byí tô é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhung lé hkyi yu é nghut ri; haù mù, nga-nhung gi, danggidiq byí tô é Woi-nyí haù lé, lumj́ng myit mai wó yú râ nghut lhê.

Jep E Tarâ Eq Danggidiq

¹⁵Gumang wui ê, nyí wui é asak duì hkyô má é lé dangtú yù mù, ngò nungmoq lé taí kólé, byù mai chòm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haù má wó jat kat râ a nghut. ¹⁶Abraham eq yhang é awut ashín lé byi tô é danggidiq le haù eq rajung za nghut ri. “Awut ashín pé lé” gâ é dang gi, byù myo myo lé gâ lhê; nghut kôlhang, haù Chyúmdang má, haù lé taí nau é a nghut e za, “náng é awut ashín lé”^w ga taí nau é ru nghut lhê, haù é lichyúm gi, byù rayuq lé za taí é nghut lhê, haù gi, Hkrisduq nghut ri; ¹⁷haù mù luí, ngò taí nau é gi, Garai Gasang, dangshikaq tô tô é htàng, myí sho sum xê zàn má lé joq é tarâ gi, dangshikaq haù lé le wó lhoq hpyoq pyám râ a nghut, danggidiq lé le wó lhoq htên pyám râ a nghut. ¹⁸Hkâsu mù gâ le, haù silí wunlí gi, jep é tarâ eq séng lhúm é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhang é jeju yanmai, Abraham lé danggidiq dông silí wunlí haù byí to bê nghut ri.

¹⁹Haù su nghut jáng, haù jep é tarâ gi, hai akyú bò râ lú? Haù gi, danggidiq dông lhoq àng tô é Awut ashín nghut é sù jé lé é hkún jé shoq, mara kut shut nyi bùm kô é yanmai, jat kat tô é nghut lhê; jep é tarâ haù gi, maumang lagyô pé mai gyoro sô xoq byi sù⁸ é loq dông byí tô é ru nghut lhê. ²⁰Gyoro sô xoq byi sù gi, rahkyam shut má é bang eq baú séng é a nghut, nghut kôlhang, Garai Gasang gi, rayuq za nghut lhê.

²¹Haù mù luí, jep é tarâ gi, Garai Gasang é danggidiq pé eq htúq htíng

^f3:7 Abraham é yhangzô pé gâ é gi, Garai Gasang é yhangzô pé lé gâ é nghut lhê.

^r3:19 Gyoro so xoq byi sù gi, Mosheq nghut ri.

^t3:8 Apún 12:3 ^s3:10 Tarâ Pun 27:26 ^u3:11 Hbk 2:4 ^v3:12 Nhung 18:5

^w3:13 Tarâ Pun 21:23 ^x3:16 Apún 12:7; 13:15; 24:7

lhâm lhê lúh? Ratsuí le a nghut. Hkâsu mù gà le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò rà nghut lhê. ²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haú mù luí, haú byí to bê dangidiq lé gi, Yesuq Hkrisduq lé lumjínq é bang lé byi rà nghut lhê.

²³ Lumjínq hkyô haú a jé shimá, nga-nhúng gi, haú jep é tara èq htongbyú dông lhung tô é hui luí, lumjínq hkyô haú htoq shit é hkún jé shoq myhí lhung tô é hui wú bê nghut lhê. ²⁴ Haú mù luí, nga-nhúng gi, lumjínq é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí ê rà matú, nga-nhúng é hkyô-u shê sũ dut bê nghut ri. ²⁵ Ahkuí kúm gi, haú lumjínq hkyô jé bê nghut é yanmai, nga-nhúng gi, haú jep é tarâ mai hkyô-u shê é loq hkaú má a nghut lo.

Garai Gasâng É Yhangzô Pé

²⁶ Nungmoq lhunglhang bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhang bang gi, Hkrisduq Yesuq má rading ralhum za nghut é yanmai, Yudaq byù nghú é eq Grik nghu é, jùn nghu é eq luthkyô nghu é, yuggè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haú danggidiq eq rajung za silí wunlí hkam yù bang le, nghut akô nghut ri.

4 Ngò taí nau é lichyúm gi, haú amyú hkúng xoq dut rà sũ gi, ikun sutzè

banshoq lé sîng ang sũ nghut kôlhang, yhang, zoshâng nghut ashí hkún gi, jùn hpó eq haí a shaí nghut ri. ² Yhang gi, yhâng wa masat tô é ahkyíng jé shoq, yhang lé zúng é sũ eq yhâm lé up su é a-ô má ru lúng nyi ashí nghut ri. ³ Haú eq rajung za, nga-nhúng le zoshâng** nghut é hkún gi, mingkan uphkang tarâ ô má jùn dut nyi é bang nghut lhê. ⁴ Nghut kôlhang, ahkyíng lo ngap jáng, zo dut rà ahkáng lé byíng shoq, nga-nhúng wó yú sháng gaq ga, Garai Gasang gi, jep é tarâ hkaú mâ é byu pé lé hkyi yù rà matú, ⁵ jep é tarâ hkaú má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gà le, nungmoq le, zo wuí nghut bê yanmai, “Aba, Áwa ê.” ga dat wut é, Yhang Zô é Woinyí lé, Garai Gasang gi, nga-nhúng é imyit unghkaú má kat byi bê nghut ri. ⁷ Haú mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkún, Garai Gasang lé nungmoq a sé shí é u lé, nungmoq gi, nat hparà lhang a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhíng, nungmoq gi, hkâsu mù, haú wum nyhôm é eq akyú a byí é, mingkan uphkang é tarâ shut dum lhing taú ló nyi akô lúh? Nungmoq gi, haú pé èq jùn zô é dum hui zó nau akô lúh? ¹⁰ Nungmoq gi, buinyí wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung! ¹¹ Nungmoq chyáng ngò wum kat pyâm

** 4:3 Bun zo shí má, zoshâng gà é lichyúm gi, Yesuq lé a lumjínq shí é bang lé gà lhê.

é hkyô gi, akôm dut bê abe nghû, nungmoq é matú ngò myit chiq nyi ri.

¹²Gumang wuì ê, ngò gi, nungmoq su dut bê nghut é yanmai, nungmoq le ngò su dut keq^{††} nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê. ¹³Sâng-hí dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê. ¹⁴Ngá é nòhpyo gi, nungmoq é matú wuífke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵Haú sù é nhing, nungmoq é gabú hkyô banshoq gi, haí dut byuq bekô lúhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byí pyám kó rã í dut laí lò bê hkyô lé, ngò saksé wó hkâm lhê. ¹⁶Ahkuí, ngò gi, nungmoq lé haú tengmán hkyô taí kyô é yanmai, nungmoq é gyè dut to bê nghut lhê lúhú?

¹⁷Haú byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haí a bô; yhangmoq ô nau é hkyô gi, yhangmoq lé nungmoq taú shirông kó abe ga, nungmoq lé ngamoq chyáng mai lhoq kâng yù rã matú ru nghut lhê. ¹⁸Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haú su shirong le ge lhê. ¹⁹Ngò chyitdap é zo wuì ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí, ²⁰nungmoq é hkyô lé myit wuífkê tô é yanmai, ahkuí, nungmoq eq rahá myang nyi mù, ngò taí é

danghtê wó htaí rã matú, gyai yhang myoqbyu nyi lhê ô.

Hagara eq Sarah Nhik É Hkyô

²¹Haú jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lúhú? Ngo lé taí kyô wú kó laq. ²²Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kã tô ri. ²³Haú jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴Haú hkyô pé gi, dangtú ru nghut lhê, myiwe haú í yuq gi, dangshikaq í lhum eq wuí lhê; dangshikaq ralhú gi, Sinaq Bùm mâ é^{‡‡} nghut luí, jùn dut rã nghut é zo wuí lé hku kat é Hagara lé taí nau é nghut ri. ²⁵Hagara haú gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuí nyi ri. Hkâsu mù gâ le, Yerusalem haú gi, yhang zô pé eq rahá, jep é tara é jùn dut nyi kô é yanmai nghut lhê. ²⁶Nghut kôlhang, ah-toq mâ é Yerusalem gi, jùn myhí a nghut sù nghut luí, nga-nhông é înu nghut ri. ²⁷Hkâsu mù gâ le,

“Zoshâng a hku é baùdung myhí ê, gabú nyí aq. Zo hkû nò a no wú shí é myiwe gi, gabú luí, gabú garú nyi aq;

hkâsu mù gâ le, haú chamchyuyiui dut é myiwe myhí gi, làng wó é myiwê htoq má zo wuí je myô wó bê nghut ri.”

ga kã tô ri.^x

²⁸Gumang wuì ê, ahkuí, nungmoq gi, Isak su, danggidiq byí tô é zo wuí nghut bê nghut ri. ²⁹Haú hkûn lé, haú gungsho

^{††}4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gá nau é nghut lhê.

^{‡‡}4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê.

^x4:27 Esai 54:1

dông hku lé lo é sũ gi, Woi-nyí wum-o dông hku lé lo é sũ lé zing-rí ri. Haũ eq rajung za, ahkuí le dut nyi ri. ³⁰Nghut kôlhang, Chyúmdang má hkâsu ga kâ tô ri lúhú gâ le, “Haũ jùn myhí eq yhangzo yuqzo lé hkat htoq pyám aq; hkâsu mù gâ le, haũ jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chòm hkam yù rá a nghut.”^y gâ ri. ³¹Haũ mù luí, gumang wuè ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

Hkrisduq Mã É Luthkyô

5 Nga-nhúng luthkyô wó rá matú, Hkrisduq gi, nga-nhúng lé lhoq lhut kat bê nghut ri. Haũ mù luí, haũ má ru gíng nyí mù, yhumsing gùng lé jun é wòlai hkaũ má hkâtaũ bainaí nyí kó.

²Ngá dang lé matsing yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyú le bò kó rá a nghut. ³Hau htoq agó, ahpyo-kuq hpyit hkam yu é sũ ó yuq lé nghut kôle, ahpyo-kuq hpyit é sũ gi, jep é tarâ lhunglhang lé châng kut rá lhê nghũ, ngò kyô kat lhê. ⁴Jep é tarâ châng shikut é dông mara hkyut san byí é hui naũ bang, nungmoq gi, Hkrisduq eq gâng lhum to bekô nghut luí, haũ Garaí jeju mai le byit gyó byuq bekô nghut ri. ⁵Ngamoq kúm gi, myit myoqbyu tô é dingmán hkyô lé, haũ Woi-nyí é yanmai lumjǐng myit èq gyai yhang lánng nyí é bang nghut lhê. ⁶Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyú a bò nghut ri; chy-

itdap myit mai htoq lo é lumjǐng myit za sheq, akyú bo lhê.

⁷Nungmoq gi, rago din wú bekô[¶] nghut é wá, haũ tengmán hkyô lé a cháng sháng gaq ga, nungmoq lé ó yuq èq hkúm zing pyám kô é lúhú? ⁸Haũ su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹“Mún ratsuí zo gi, muk long gón lé wó lhoq daũ lhê.”^{§§} gâ é dang joq lhê. ¹⁰Nghut kôlhang, nungmoq gi, gotú hkyô dông a lhom yù kó rá nghut lhê nghũ, Hkrisduq má hkyak ngò myit lum nyi lhê. Nungmoq lé lhoq byok byí é sũ, ó yuq nghut kôle, yhumsing é mara eq rajung za dam byí é hui zo rá nghut lhê. ¹¹Gumang wuè ê, ahpyo-kuq hpyit é hkyô lé, ngò rú hko nyi ashí nghut le gi, haĩ mù luí, zing-rí é lé ngò hui zô nyi rá lúhú? Haũ su kut é nghut jáng, haũ tapzǐng eq séng luí, manghkáng joq rá a nghut lo. ¹²Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghũ, ngò wó myit ri.

¹³Gumang wuè ê, nungmoq gi, luthkyô wó rá matú ji yù huí é bang nghut akó; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaũ lhum nyi keq. ¹⁴Hkâsu mù gâ le, “Náng gũng lé nàng chyitdap é su, náng é chyangnám mã é bang lé le chyitdap aq.”^z gâ é hkunmó má za, jep é tarâ banshoq lo bo to bê nghut lhê. ¹⁵Nungmoq, rayuq eq rayuq ngat lhum myui lhum nyi kô é nghut le gi, rayuq eq rayuq lhoq htên pyâm lhum kó rá nghut é lé, sidiq nyi keq.

[¶]5:7 Rago din wú bekô gâ é gi, woi-nyí hkyô má kô myhang lai lò bê lé taí nau é nghut lhê.

^{§§}5:9 Shut é dông mhoqshit é hkyô ratsuí gi, muk long gón lé mún èq wó lhoq daũ é su, nungmoq banshoq lé wó lhoq nghoq yu pyâm lhê.

Woi-nyí Èq Asak Dui Râ Hkyô

¹⁶Nghut kôlhang, ngò táí kôlé, Woi-nyí shuí ù é đông asak dui nyí keq; haú hkûn, nungmoq gi, yubak gungsho ô nau é hkyô cháng kó râ a nghut. ¹⁷Hkâsu mù gâ le, yubak gungsho ô nau hkyô gi, Woi-nyí eq shai lhûm nyí; Woi-nyí gi, yubak gungsho ô nau hkyô eq shai lhûm nyí, dut ri. Haú í lhum gi, gyè dut lhûm ri; haú mù, nungmoq gi, yhumsing ô nau é đông hkâkut kó. ¹⁸Nghut kôlhang, nungmoq lé Woi-nyí èq hkyô hí é nghut jáng, nungmoq gi, jep é tarâ ô má a nghut lo nghut ri.

¹⁹Yubak gungsho é muzó gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyí zô lhúm nau é myit, ²⁰hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuízat é hkyô, gâng lhum sê é hkyô, hpúng gam é hkyô, ²¹ningsú é hkyô, í shuq wut é hkyô, zo yê shuq yê mù achaq achyut kut é hkyô pé eq haú pé su kut é gotú hkyô pé nghut ri; haú su kut nyí yap é bang gi, Garai Gasâng mingdán é silí wunlí lé wó hkam yù râ a nghut nghú, ngò, hí hkûn nungmoq lé táí wú bê eq rajung za, ahkuí lé, nungmoq lé ngò sidiq byí nyí lhê.

²²Nghut kôlhang, Woi-nyí é ashi gi, chyitdap hkyô, gabú hkyô, nguingón hkyô, myit húng hkyô, nhik-u nú é hkyô, ge é hkyô, lhumzui hkyô, ²³núm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyám râ tarâ haí le a joq nghut ri. ²⁴Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzîng má jén sat pyám bekô nghut ri. ²⁵Nga-nhúng gi, Woi-nyí mai asak dui bê nghut mù, haú Woi-nyí htâng châng nyí sháng. ²⁶Nga-nhúng gi,

akôm gyáng dang táí luí, rayuq eq rayuq jeq ho lhûm é eq manon lhûm é bang, a dut nyí sháng gaq.

Lhunglhang Bang Lé, Ge É Hkyô Kut Byi Râ Hkyô

6 Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nùm é myit èq haú yuq lé lhoq pun lhoq kyíng yù keq. Nghut kôlhang, nàng gi, gunglaú é a hui sháng gaq, sidiq nyí aq. ²Rayuq eq rayuq é wòlai lé tê byí lhûm nyí keq; haú đông mai, nungmoq gi, Hkrisduq é tarâ lé wó lhoq dik kó râ nghut lhê. ³Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴Yuq hkangmó gi, yhumsing nyí yap é hkyô lé taú myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê. ⁵Hkâsu mù gâ le, yuq hkangmó gi, ó le ô wò lé wùn waq ra râ dut lhê.

⁶Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byú gi, hô kat é eq rajung za, shú yù râ nghut lhê.

⁸Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê. ⁹Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyú myang hkam yù râ nghut lhê. ¹⁰Haú mù luí, nga-nhúng gi, kut râ ahkyíng wó

tô é u lé, byù lhunghâng bang lé ge é hkyô kut byi sháng, haù lumjíngh hkyô eq séng é ikun byu pé lé, je riyhang kut byi sháng.

**Ahpyo-kuq Hpyit É Hkyô A Nghut E
Za, Byù Sik Hpân Huí É Hkyô**

¹¹ Ngò, nungmoq lé, ngá é loq èq hkâ-í kô é laiká cham kâ kat byi é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haù su kut é hkyô gi, Hkrisduq é tapzing é yanmai zing-ri huí é hkyô lé, koi pyám rà matú za nghut ri. ¹³ Hkâsu mù gâ le, haù ahpyo-kuq hpyit é bang lháng jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhûng é Yhum-

sîng Yesuq Hkrisduq é tapzing eq séng luí gumrông é mai lai luí, haù má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê. ¹⁶ Tarâ haù lé châng é lhungháng bâng é ahtoq má le, haù Garai Gasâng é Israelaq byu pé* é ahtoq má le, nguínghón hkyô eq shogyo nhikmyin hkyô gi, ru joq nyí sháng gaq ô.

¹⁷ Ahkuí mai gi, ó yuq le ngo lé jam-jau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸ Gumang wui ê, nga-nhûng é Yhum-sîng Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

*6:16 Bun zo shí lhum mâ é Israelaq byu pé gâ é gi, hpúng byù wui banshoq lé tai nau é nghut lhê.

EHPEU

Pê Chyáng Hun Kat é Laiká

(Ephesians)

1 Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sân-yúng bâng chyáng nguingón dang shit kyô kat lhê.

²Nga-nhúng é Íwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyí sháng gaq ô!

**Hkrisduq Mã É, Woi-nyí
Hkyô Shimân Jeju Pé**

³Mauhking htoq tsáng myhâng má, woi-nyí hkyô eq sêng é shimân jeju jung hkingmó lé, Hkrisduq má nga-nhúng lé shimân byi sù, nga-nhúng é Yhumsing Yesuq Hkrisduq é Yhângwa, Garai Gasang gi, hkungsô wó nyí sháng gaq. ⁴Hkâsu mù gà le, nga-nhúng gi, Garai Gasang é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. ⁵Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri. ⁶Haù mù, Yhang chyitdap é Sù† má, nga-nhúng lé láí láí byi bê nghut é, hpungwup shingkan bo é jeju chyunghuq lé, chôm hkya-on sháng. ⁷Garai Gasang é agùn agó é jeju yanmai, nga-nhúng mara hkyut byí é hui lui, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê. ⁸Jeju haù lé gi, hpaqchyí byéng-yá

eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹Garai Gasang gi, Yhang myit ngui é eq rajung za, Hkrisduq đông mai kut râ matú hen to bê nghut é, Yhâng é zaù tô é hkyô lé, nga-nhúng lé shit bê nghut ri. ¹⁰Sê gyo wui é hkyô haù gi, lhoq dik râ ahkying jé jáng, mauhkung htoq eq myigùng htoq mã é lhunglhang lé, Hkrisduq má rading ralhūm za kut râ nghut é hkyô nghut lhê.

¹¹Hkrisduq má sân-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga, ¹²Garai Gasang gi, Yhang myit sôn tô é lhunglhang lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³Hau htoq agó, nungmoq le, nungmoq é hkyi yù hkyô é gabú danglù gà é tengmán mungdang lé wó gyo kô é hkūn, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haù gidid byí tô é Chyoiyúng Woi-nyí dizik htung tap byí é hui bekô nghut ri. ¹⁴Garai Gasang é hpungwup shingkan lé hkya-on râ matú, Yhang eq sêng é byu pé hkyi xe yù huí é hkying jé shoq, Chyoiyúng Woi-nyí haù gi, nga-nhúng é muizè lé hkyak wó yù râ nghu é masat nghut ri.

Poluq Kyûdung Byí É Hkyô

¹⁵Haù mù lui, Yhumsing Yesuq lé nungmoq lumjing é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai, ¹⁶ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê. ¹⁷Nga-nhúng é Yhumsing Yesuq Hkrisduq é Garai Gasang nghut é, hpungwup

†1:6 Yhang chyitdap é Sù gà é gi, Yesuq lé tai nau é nghut lhê.

shingkang bò sù haù Íwa gi, Yhang lé nungmoq je sé rã matú, hpaqchyí byéng-yá wó byí é eq san za wó sé nhang é Woinyí, nungmoq lé byi sháng gaq nghú, ngò, Yhâng chyáng dúng nyi lhê. ¹⁸Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkang bo é muizé gi, sân-yúng bâng chyáng agùn agó joq nyi é hkyô lé le, Yhâng é kò dik é a-tsam mó gi, lumjúng bang nga-nhúng é matú nghut é lé le, ¹⁹nungmoq wó sé rã matú, nungmoq é myit myoqjí lhoq gyeng byí é hui sháng gaq nghú, ngò kyúdung byí nyi lhê. A-tsam mó haù gi, Garai Gasang, Hkrisduq lé shi é mai lhoq dui toq yù mù, ²⁰mauhkúng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. ²¹Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhâng é myìng lhunglhâng é htoq má le, je gyaú é sù nghut lhê. ²²Hau htoq agó, Garai Gasang gi, lhunglháng lé Yhâng é hkyiwa ô má tô to luí, haù noqkuq hpúng é matú, Yhang lé, jung hkanqmó é ushuq dut rã đông masat to bê nghut ri. ²³Noqkuq hpúng haù gi, Hkrisduq é gungdu nghut luí, hkyô hkanqmó má jung hkanqmó lhoq byíng Jup é Hkrisduq byíng nyi é nghut ri.

Hkrisduq Má Asak Dui É Hkyô

2 Laí ló bê hkûn, nungmoq gi, tarã lu laí é eq mara kut shut é hkyô pé é yanmai, shi tô é bang dut kô é nghut lhê. ²Haù hkûn, nungmoq gi, mingkan ngón hkyô pé má lhaq châng nyi kô é htoq agó, haù tarã a cháng bâng é myit má ahkuí mù zui nyi é sobyô nghut é, maulat lé up sù htâng châng nyi kô é bang nghut lhê. ³Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô

naù gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haù mù, góbang eq rajung za, nga-nhúng gi, Garai Gasang é nhikmo-yo hkyô eq gíngdán wú é bang chyat nghut lhê. ⁴Nghut kôlháng, shogyo nhikmyin myit gyaí bo é Garai Gasang gi, nga-nhúng, tarã lu lai luí shi byuq bê bang dut kôlháng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵Haù mù, nungmoq gi, Garaí jejú èq za hkyi yu é hui bekô nghut ri. ⁶Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷nga-nhúng lé, Hkrisduq eq rahá lhoq dui toq yù mù, mauhkúng htoq tsáng myhâng má, Yhang eq rahá zùng nhang to bê nghut ri. ⁸Hkâsu mù gà le, nungmoq gi, lumjúng é đông mai Garaí jejú èq za hkyi yu é hui bekô nghut ri. Haù gi, nungmoq chyáng má é a nghut, Garai Gasang jeju chyunghuq za ru nghut lhê. ⁹Haù gi, yhumsing é muzó mai wó é a nghut é yanmai, ó yuq le nghutbun rã hkyô a joq. ¹⁰Hkâsu mù gà le, nga-nhúng gi, Garai Gasang é loqmú pé nghut mù, nga-nhúng zui saí rã matú, hí hí mai, Garai Gasang hen lajàng tô é ge é muzó pé lé zui saí rã matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹Haù mù luí, nungmoq gi, hí hkûn, hku lé lo é mai yhang tưngbaù pé nghut é hkyô lé le, byu loq èq za gungsho má kut é, “ahpyo-kuq hpyit hkâm bang” gà é bang mai, nungmoq lé, “ahpyo-kuq hpyit a hkâm bang” ga byi kô é hkyô lé le, myitbun eq. ¹²Haù u lé, nungmoq gi, Hkrisduq eq gâng lhùm tô é bang; Israelaq mingbyù a nghut é bang; dang-gidiq eq sêng é dangshikaq pé má gó

ming byù nghut é bang; mingkan htoq má, myoqbyù jowò a joq é eq Garai a wò é bang nghut é lé, myitbun keq.¹³ Nungmoq gi, hí hkún wê gâng nyi é bang nghut kôlhang, ahkuí kúm, Hkrisduq é sui đông mai Hkrisduq Yesuq má shuí chyang htep é hui bekô nghut ri.

¹⁴Hkâsu mù gâ le, Yhânggùng yhang gi, nga-nhúng é nguóngon hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haù í myû[‡] dut nyi é lé, rahú za dut nhâng bê nghut ri. ¹⁵Haù hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htúm pyám bê nghut ri. Haù mù, Yhang ô nau é hkyô gi, haù í myû dut tô é lé, Yhânggùng má yhang, byù sik ra-myû za hpan to râ matú nghut ri; haù đông, simsaq hkyô kut byi bê nghut ri. ¹⁶Yhang gi, a naù a wôm lhúm é hkyô lé, haù tapzîng má lhoq htúm pyám byi mù, haù tapzîng đông mai, byù myu í myu é lé ragùng za kut luí, Garai Gasang eq xoq byi bê nghut ri. ¹⁷Yhang gi, wê gâng nyi é bang[¶] nungmoq lé le, chyang htep nyi é bang[§] lé le, simsaq hkyo é danglù lé hko kyo bê nghut ri. ¹⁸Hkâsu mù gâ le, nga-nhúng í myû gi, Yhang đông mai, Woi-nyí ralhú zâ èq, haù Íwâ chyang wàng râ hkyô dong bê nghut ri.

¹⁹Hau é yanmai, nungmoq gi, tungbaù pé eq byù bíng pé a nghut lô é za, Garaí é byu pé eq rahá, mingbyú wuì eq yhumbyù wuì chyat nghut bekô nghut luí, ²⁰haù lagyô pé eq myiqhtoí pé, hi tô é apún awang htoq má xuq tô é bang chyat nghut akô; Hkrisduq Yesuq yhang, haù mâ é ahkyak é htungchyûn luqgok dut bê nghut ri. ²¹Yhang má, wahpang lhum gón xoq lhúm bùm é nghut mù, haù Yhumsîng má chyoiyúng noqkuq yhúm

ralhum dut lò bê nghut ri. ²²Woi-nyí đông mai, Garaí Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

Poluq, Tungbaù Pê É Tarâ Hkô Sará

3 Haù su nghut mù, Hkrisduq Yesuq é hkyô lé, nungmoq tungbaù pé chyang hko kyô é yanmai, htongbyù dut sú, ngò Poluq gi, nungmoq é matú kyûdung byi lhê.

²Nungmoq lé dojaù râ é matú, ngo lé byi tô é Garaí Gasâng jeju ayá shí lé, nungmoq gè gè wó gyô wú bekô râ nghut lhê. ³Haù gi, hí hkún, ngò, tot é đông kê tô wú bê eq rajung za, haù zaù tô é hkyô lé, shing-rán đông ngo lé sé nhang é nghut ri. ⁴Haù hkyô lé, nungmoq ng-hap wú é hkún, Hkrisduq eq sêng é zaù tô é hkyô, ngò rago sê é lé, nungmoq wó sé kó râ nghut lhê. ⁵Haù lé, lai lò bê ipyat pé mâ é byu pé lé a sé nhang é nghut kôlhang, ahkuí gi, Garaí Gasâng é chyoiyúng é, lagyô pé eq myiqhtoí pé lé, haù Woi-nyí èq hpông shit bê nghut ri. ⁶Zaù tô é hkyô haù gi, gabú danglù đông mai, Hkrisduq Yesuq má, Israelaq byu pé eq rahá, tungbaù pé le, hkûng xoq bang wó dut luí, gungdu ralhúm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷Yhâng é hpungwup a-tsam mai, ngo lé byi tô é Garaí Gasâng jeju chyunghuq é yanmai, ngò gi, gabú danglù shí tái râ dui-nhâng zoshâng dut é nghut lhê. ⁸Ngò gi, haù Garaí Gasâng é byu pé mâ é tiq dik sú htoq má lhang je tiq sú nghut kôlhang, haù Hkrisduq é a ung htoq tái é wó sùt hkyô lé, tungbaù pé chyang hko kyo râ matú le, ⁹haù lunglhang lé

[‡]2:14 *I myû gâ é gi, Israelaq byu pé eq tungbaù pé lé gâ lhê.*

[¶]2:17 *Wê gâng nyi é bang gâ é gi, tungbaù pé lé gâ lhê.*

[§]2:17 *Chyang htep nyi é bang gâ é gi, Israelaq byu pé lé gâ lhê.*

hpan é Garai Gasang má, laî lò bê ipyat pé má zaú tô é, zaú tô é hkyô haû lé hkâsu kut tô é lé, yuq hkangmó lé taî sân kyo râ matú le, jeju shî, ngo lé byi bê nghut ri. ¹⁰Haû gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹haû Garai Gasâng é hpaqchyí mó góng lé, noqkuq hpúng dông mauhkúng htoq tsáng myhâng mâ é uphkâng bang eq ahkáng ayá wó bang lé, ahkuí sé nhâng râ matú nghut lhê. ¹²Nga-nhúng gi, nga-nhúng é Yhumsîng Hkrisduq Yesuq eq rading ralhú za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wám é myit èq wó htep è é nghut lhê. ¹³Haû mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myt hkâgyui kó; haû gi, nungmoq é matú akyû bò râ hkyô nghut lhê.

Ehpesu Myuq Byu Pé Lé Kyúdung Byí É Hkyô

¹⁴Haû pé é yanmai, ngò gi, haû Îwâ é hí má hkyihput htuq luí kyúdung é nghut lhê. ¹⁵Mauhkúng eq myigùng htoq mâ é Yhâng é ikun byù lhunglháng gi, Yhâng chyáng mai myîng wó yu é chyat nghut lhê. ¹⁶Nungmoq é lumjîng myit mai, nungmoq é i-myt unghkaû má Hkrisduq wó nyi nyi sháng gaq nghû, ¹⁷Yhang é hpungwup shinggang bo é agùn agó wó sùt é mai, nungmoq é i-myt unghkaû mâ é sù lé, Yhâng é Woi-nyí dông, hpungwup a-tsâm èq wum-o lhoq kîng byi râ matú, ngò kyúdung byi lhê. Hau htoq agó, nungmoq gi, chyitdap myit má amyit chin to luí, awang hi to mù, ¹⁸sân-yúng bang eq rahá, hau é apyî, a-tsûng, myhâng, nik, hkâ-í nghut é lé, rago wó sé kôluí, ¹⁹Garai Gasâng é gumjup é hkyô lhunglháng èq wó lhoq gumjup yù kó

sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyúdung byi lhê.

²⁰Ahkuí, nga-nhúng é hkaû má mù zuí nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglháng htoq je wó kut byí é Su chyáng, ²¹haû noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shinggang rû bo nyi sháng gaq ô! Amen.

Hkrisduq É Gungdu Má Rading Ralhú Za

4 Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak ùi keq nghû, haû Yhumsîng é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ²Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq. ³Haû Woi-nyí èq byí é myit hui hkyô lé, nguínón hkyô dông mai châng nyi râ matú, wó dut é í shikut nyi keq. ⁴Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhú eq Woi-nyí ralhú za nghut nyi ri. ⁵Yhumsîng rayuq za, lumjîng hkyô rahkat za, bapisma ralhú za nghut nyi ri. ⁶Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglháng dông mai mù kut é eq lhunglháng é ahkaû má lúng nyí sù nghut ri.

⁷Nghut kôlháng, nga-nhúng yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê. ⁸Hau é yanmai,

“Yhang gi, myhang é jowò shut doq ló é hkûn, shúm zung é bang lé gi, shuí

chûng mù, byu pé lé gi, chyunghuq tsing gàm byî ri.”^a

ga, Chyúmdang má taí tô é nghut lhê.

⁹Haû “doq ló” gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi? ¹⁰Haû gyó lé é Sû gi, junghkang jungmó lé lhoq byíng jup rá matú, mauhkûng banshoq é ahtoq má doq ló é Sû yhang nghut lhê.

¹¹Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo rá bang, ra-am lé, hpúng-up pé eq sará pé kut tsing byî to bê nghut ri.

¹²Haú bang gi, Garai Gasâng é byu pé lé wùn waq âng é muzó pê é matú, hen lajâng é bang nghut ri. Haú hkûn sheq, Hkrisduq é gungdu gi, ¹³haû lumjúng hkyô eq Garai Gasâng é Yhangzo lé sê é hkyô má, nga-nhúng banshoq bang rad-íng ralhúum za wó dut mù, kô dîng bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyi rá nghut lhê.

¹⁴Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyî pé eq mhoqshít hkyô laidun hkangmó èq, shí shut hé shut mut tâng é su dut é lé hui zô é zoshâng wuì su a nghut lô é za, ¹⁵chyitdap myit mai tengmán é dang lé taí nyi jáng, Hkrisduq nghu é ulhúum má hkyô hkangmó kô myhang lò rá nghut lhê. ¹⁶Yhang dông mai, gungdu gón gi, ralhúum eq ralhúum htuqbâng é gungsho showui showang pé lé xoq byî to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haû gi, chyitdap myit má, yhânggùng yhang kô lò myhang lò rá nghut lhê.

Byù Sik Đông Asak Dui Râ Hkyô

¹⁷Haû mù luí, haû Yhumsing é ahko ahkáng mai ngò nungmoq lé taí nau é hkyô gi, haû tûngbaù pé gi, akyû a bo é lé myit mù, asak dui kô é su, nungmoq gi, hkâkut kó. ¹⁸Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byî é asak eq wê gâng byuq bekô nghut ri. ¹⁹Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

²⁰Nungmoq kúm gi, Hkrisduq é hkyô lé haú dông mhoq yû kô é a nghut.

²¹Nungmoq gi, Yesuq chyáng mã é tengmán hkyô dông, Yhâng é hkyô lé wó gyó wú é eq mhoq yu wú bekô nghut lhê.

²²Haû mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luí, yhumsing gùng yhumsing mhaû pyám é dông htên byoq ló nyi é nungmoq é byù xau lé tô pyám rá matú mhoq yû bê eq rajung za, ²³nungmoq é i-myit lé asik htaí pyám nhâng keq; ²⁴hau htoq agó, nungmoq gi, tengmán é eq sêng é dîngmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵Haû mù, nga-nhúng banshoq bang gi, gungdu ralhúum é gungsho showui showang pé chyat nghut é yanmai, nungmoq yuq hkangmó gi, mhaû é hkyô lé tô pyám luí, yhumsing é chyangnâm mã é sù lé, tengmán é dang taí ra rá nghut lhê.

²⁶“Nungmoq nhikjum yô é hkûn, mara hkâkut kó.”^b nungmoq gi, buì wàng shoq nhikjum hkâyô nyi kó. ²⁷Nat Tsadán lé le, jowò hkâbyi kó. ²⁸Hkau sù gi, a dum

^a4:8 Hkya-on 68:18 ^b4:26 Hkya-on 4:4

hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

²⁹Nungmoq é nhut mai agè agaú é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq. ³⁰Haú hkyi yù râ buinyi é matú, dizik đông nungmoq lé tap to byí é Garai Gasâng é Chyoiyúng Woi-nyí lé hkâlhoq yón kó. ³¹Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé ban-shoq lé, nungmoq tô pyám keq. ³²Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhâm nyi keq.

5 Haú mù, nungmoq gi, chyitdap dik é zoshâng wuì nghut é yanmai, Garai Gasang lé alik yu é bang kut keq. ²Hkrisduq gi, Yhânggùng lé namngón jung hkungga eq shigu hkungga đông, nganhùng é matú Garai Gasâng chyáng Yhânggùng yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

³Hau htoq agó, ashop é đông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lháng hkâtaí kó; hkâsu mù gâ le, nungmoq gi, Garai Gasâng é chyoiyúng byu pé nghut lhê. ⁴Haú eq rajung za, a taí gíng é, ahoq ahí dang, dangsôm eq hkunchoq đông gyâ é dang pé lé a taí é za, jeju hkya-on dang za taí nyi keq. ⁵Hkâsu mù gâ le, ashop é đông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù

ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq. ⁶Ó yuq nghut kôle, dangsôm** đông mai nungmoq lé a wó mhaú kó sháng gaq; hkâsu mù gâ le, haú hkyô pê é yanmai, Garai Gasâng é nhikmo-yo hkyô gi, haú jìno a gyo bang é ahtoq má jé râ nghut lhê. ⁷Haú mù luí, haú bang chyáng hkâbo wang lom kó.

⁸Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsing má maubó pé nghut bekô nghut ri. ⁹Haú Yhumsing ô nau é hkyô haí nghut é lé ho htoq yú mù, maubó é yhangzò pé đông asak dui keq. ¹⁰Hkâsu mù gâ le, haú maubó é ashi gi, ge é hkyô ban-shoq, dingmán é hkyô eq tengmán hkyô chyat nghut ri. ¹¹Haú ashi a zuí é mauchut tuq muzó má a bo wang lom é za, yhangmoq é mara lé tân shit keq. ¹²Hkâsu mù gâ le, haú jìno a gyo bang haq zaú kut é hkyô lé gi, taí htoq le lháng hoq hpo nghut ri. ¹³Nghut kôlhang, junghkang jungmó lé, haú maubó èq tân shit jáng gi, wó byu-myang é chyat dut râ nghut lhê. ¹⁴Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai,

“Yhup ngón nyi sù ê, toq aq, haú shi é mai dui toq aq hkoi; haú jáng, Hkrisduq gi, nang lé duqbó byi râ nghut lhê.”††

ga luí taí tô é nghut lhê.

¹⁵Haú mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶Buinyi ahkyíng shí pé gi, agè ashop é yanmai, wó é ahko ahkáng ban-shoq lé ge dik é đông chung jài keq. ¹⁷Hau é yanmai, byù ngok pé a dut é za, haú Yhum-

**5:6 Dang sôm gâ é gi, Garai Gasâng é nhikmo-yo hkyô a jé râ ga taí é dang nghut lhê.

††5:14 Dang ngho shí gi, hí lhê é noqkuq hpúng pé taí gyó lo é dang nghut lhê.

sîng ô nau é hkyô gi, haî nghut é lé, sê gyô yu nyî keq. ¹⁸Haû achâq achyut é yubak hkyô lhoq htoq é î lé hkâshuq wut kó; Woi-nyî lé kúm byíng nhang nyî keq. ¹⁹Nungmoq gi, hkya-on kungtôn dang dông le, hkya-on mahkôn dang dông le, woi-nyî eq sêng é mahkôn dông le, rayuq eq rayuq dang nyo lhum luí, nungmoq é i-myt ungkhaû mai, haû Yhumsîng lé mahkôn hkôn mù, lhoq ngón nyî keq. ²⁰Nga-nhúng é Yhumsîng Yesuq Hkrisduq é myíng lé lang luí, jung hkanqmó é matú, haû Íwa Garai Gasang lé, hkâ-nhám le jeju hkya-ôn nyî keq.

²¹Hkrisduq lé hkungga hpautap é myit eq, rayuq eq rayuq hpautap lhûm nyî keq.

Myi Eq Làng

²²Ikun myhî pé ê, haû Yhumsîng uphkanq é dông châng é su, nungmoq é ikun hpô pé uphkanq é dông châng nyî keq. ²³Hkâsu mù gâ le, Hkrisduq gi, haû noqkuq hpúng é ulhum nghut é su, haû ikun hpô gi, ikun myhî é ulhum nghut nyî ri; Hkrisduq gi, haû Yhâng gungdu nghut é noqkuq hpúng lé hkyi yû Sû nghut ri. ²⁴Haû noqkuq hpúng gi, Hkrisduq uphkanq é dông châng é su, ikun myhî pé le, hkyô hkat hkanqmó má, yhangmoq é ikun hpô pé uphkanq é dông châng nyî râ lhê.

²⁵Ikun hpô pé ê, Hkrisduq gi, haû noqkuq hpúng lé chyitdap luí, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyî keq. ²⁶Yhang haû su kut é gi, haû noqkuq hpúng lé, mungdang dông wui má chí pyâm luí, lhoq sân-yúng yû râ eq, ²⁷haû noqkuq hpúng gi, agè agau é eq a-ká akông é hkyô haî le a bo é za, mara hûn râ hkyô a bo é eq chyoiyúng é, hpungwup shinkang bo é noqkuq hpúng dông, Yhânggùng lé wó ap

byi râ matú nghut lhê. ²⁸Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lhê. Yhumsing é ikun myhî lé chyitdap é sù gi, yhumsing gùng lé le, chyitdap é sù nghut bê. ²⁹Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyi é su, yhumsing gùng lé byi tso byi huq luí, rago wú zúng nyi é nghut lhê. ³⁰Hkâsu mù gâ le, nga-nhúng gi, Yhâng é gungdû é gungsho showui showang pé chyat nghut lhê. ³¹Haû mù, “Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhûm za dut kó râ nghut lhê.”^c gâ tô ri. ³²Haû hkyô gi, gyai yhang zaú tô é hkyô nghut ri. Nghut kôlhang, ngò gi, haû Hkrisduq é hkyô eq noqkuq hpúng é hkyô lé taí nyi é nghut lhê. ³³Haû mù, nungmoq yuq hkanqmó gi, yhumsing gùng lé chyitdap é su, yhumsing é ikun myhî lé le chyitdap râ dut lhê; haû ikun myhî le, yhâng é ikun hpô lé hkungga râ dut lhê.

Zo Wuí Eq Mó Wui É Hkyô

6 Zoshâng wui é, haû Yhumsîng má, nungmoq é mó wui é jìno gyo keq; hkâsu mù gâ le, haû gi, kut gíng é hkyô nghut ri. ²“Náng é înu îwa lé hkungga aq. ³Haû jáng, nàng, nyî ngón yuqyò mù, myidàm htoq má náng é asak chyungxe hing nyi râ nghut lhê.”^d gâ é dang gi, danggidiq lom é sâng-hí lhum hkunmó nghut ri.

⁴Íwa pé ê, nungmoq é zo wui lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyî keq.

Jùn Pé Eq Junsing Pê É Hkyô

⁵Jùn pé ê, nungmoq gi, Hkrisduq é jìno gyô é su, gyuq hkunggâ é eq

lhumsuzi é myit mai, nungmoq é myidàm htoq mã é junsing pé é jino gyo keq. ⁶Nungmoq gi, yhangmoq é hí mã za, myoqdong ho é đông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaú mai châng kut nyi keq. ⁷Byù lé za dojaú é đông a nghut é za, haú Yhumsing lé dojaú nyi é đông le, shirông myit èq dojaú nyi keq. ⁸Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haú Yhumsing gi, yuq hkangmó lé shigyaú râ nghut é lé, nungmoq sê nyi lhê.

⁹Junsing pé ê, nungmoq le, nungmoq é jùn pé lé haú eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkung htoq mã nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasang É Gyè Hking

¹⁰Ló htâng mã, taí nau é hkyô gi, haú Yhumsing eq Yhâng é hpungwup a-tsam mó mã wum-o bo nyi keq. ¹¹Haú nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haú Garai Gasang é gyè hking banshoq lé wut to keq. ¹²Hkâsu mù gâ le, nga-nhung gi, gungsho eq sui lé htuq htíng é bang a nghut é za, haú uphkang bang, ahkáng ayá wó bang, mauchut tuq dut é mingkan shi é a-tsam pé eq mauhkung htoq tsáng myhâng mã é agè ashop é byò eq sêng é wum-o pé lé, htuq htíng é bang ru nghut lhê. ¹³Haú mù luí, Garai Gasang é gyè hking banshoq lé wut to keq; haú hkûn sheq, nungmoq gi, agè ashop hkyô jé é buinyi mã, yhumsing jowò mã wó yap gíng to mù, hkyô hkat hkangmó lé ban kut jáng, wó yap ging títng nyi kó râ nghut lhê. ¹⁴Haú mù, nungmoq é hpyidum mã tengmán hkyô hpyihit hit mù, dingmán hkyô wànggò-long lé gò luí, ¹⁵nungmoq é hkyi mã

gi, haú simsaq hkyô byi é gabú danglù hkô râ rì rì kut to mù, ging ging yap nyi keq. ¹⁶Hau htoq agó, haú agè ashop su é myiduoq é myoshi lhunglhang lé wó sat ung pyám râ matú, lumjítng hkyô nghu é golong lé chung to keq. ¹⁷Hkyi yù hkyô shamtoq muq lé tsung to luí, Garai Gasang é mungdang nghut é, haú Woi-nyí é shâm lé wun chùng keq. ¹⁸Ahkyítng hkangmó mã, kyúdung dang eq dítng tôngbán é dang ajung jítng èq, haú Woi-nyí mã kyúdung nyi luí, machya nyi uchyang, sâ-n-yúng bang banshoq é matú, hkâ-nhám le, xoq xoq kyúdung byi nyi keq.

¹⁹Haú gabú danglu é yanmai, shamtoq-tui hut huí é lagyo rayuq ngò nghut nyi kôlhang, haú gabú danglù nghut é zaú tô é hkyô lé, a gyuq a wàm wó taí kyo luí, ²⁰ngò taí râ dut é lé, a gyuq a wàm wó taí sâ-n kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyú bo dung byi nyi keq.

Shi-kyám Dang

²¹Haú Yhumsing mã, chyitdap é gumang eq lhumsuzi é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ nghut lhê. ²²Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.

²³Íwa Garai Gasang eq Yhumsing Yesuq Hkrisduq chyáng mã é lumjítng hkyô mã bo é chyitdap myit eq nguítng hkyô gi, haú gumang wui chyáng ru joq nyi sháng gaq ô! ²⁴A dat htúm é chyitdap myit mai, nga-nhung é Yhumsing Yesuq Hkrisduq lé chyitdap é lhunglhang bang chyáng, Garaí jeju gi, ru joq nyi sháng gaq ô!

HPILIPÍ

Pê Chyáng Hun Kat é Laiká

(Philippians)

1 Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

²Nga-nhúng é Íwa Garai Gasang eq Yhumsing Yesuq Hkrisduq chyáng má é jeju eq ngingón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³Ngò gi, nungmoq lé myit bûn kat hkanqmó, ngá é Garai Gasang lé jeju hkya-ôn nyi lhê. ⁴Ngò gi, kyûdung hkanqmó, hkâ-nhám le nungmoq banshoq bâng é matú gabú myit èq dung byí nyi lhê. ⁵Hkâsu mù gâ le, nungmoq gi, sâng-hí nyí mai ahkuí jé shoq, gabú danglù má ngò eq chôm zùm yap nyi é yanmai nghut lhê. ⁶Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán rà nghut lhê nghû, ngò hkyak myit lum tô lhê.

⁷Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasâng jeju chôm hkâm yu é bang nghut lhê. ⁸Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

¹⁰Garai Gasâng é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyí sháng gaq nghû le; ¹¹nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹²Gumang wui ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò rà matú dut lò bê nghut ri. ¹³Hau é yanmai, haû hkohkâm-wâng zúng é lhunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴Hau htoq agó, ngò htóng lúng é yanmai, haû Yhumsing Yesuq má gumang wui nghut é myo mi-myó gi, myit wum wó yû kômù, Garai Gasâng é mungdang lé, je riyhang a gyuq a kyum wám hko kyo bekô nghut ri.

¹⁵Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. ¹⁶Ge é myit mai hko é bang gi, gabú danglù lé húng rà matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô. ¹⁷Haû góbang chyaú gi, sanséng é i-myit eq a nghut é za, ngò kyum wut é hkyô má wuífke jamjau jat byi rà matú, myit nyi bùm kô é nghut mù luí, Hkrisduq é hkyô lé yhumsing é wuízat é dông za, hko taí nyi bum akô nghut ri. ¹⁸Nghut kôlhang, haû gi, haí rà ri lhú? Yhumsing wuízat é dông hko é nghut nghut, tengmán é dông hko é nghut nghut, hkyô hkat hkanqmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. ¹⁹Hkâsu mù gà le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut lâi lò bê hkyô gi, ngò wó luthkyô dut râ nghut é lé ngò sê lhê. ²⁰Ngò myit láng tô é eq myit myoqbyù tô é má, ngò gi, hoq nó haí a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyu myit a bo é hkyô lé wó yù mù luí, Hkrisduq gi, ngá gûng má hkyá-on waq toq é hui râ nghut lhê. ²¹Hkâsu mù gà le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²²Nghut kôlhang, ngò gi, gungsho má rû dui nyi mù, ngò kut é muzó má ashi zúí lo é nghut le gi, hká lhum lé sheq hkyin yu le gè râ lú? ²³Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gà le, haú gi, je ge é hkyô nghut ri. ²⁴Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. ²⁵Haú mù, ngò gi, shí hkyô lé hkyak myit lum to luí, lumjíng hkyô má nungmoq kô jat lo é eq gabú nyí râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. ²⁶Haú mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haú jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhú má za yap gîng to mù, haú gabú danglù lé lumjíng hkyô má, i-myit rahkat zâ èq shikut nyi kô é hkyô lé le; ²⁸nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sê râ nghut lhê. Haú gi, yhangmoq é matú htên byoq hui râ kumlhá dut

lò bê nghut lhê; nghut kôlhang, nungmoq gi, hkyi yù hui râ nghut lhê. Haú gi, Garai Gasang kut é nghut lhê. ²⁹Hkâsu mù gà le, Hkrisduq má wó lumjíng râ é jeju za a nghut, Yhang é matú wuínke jamjau hui râ jeju le, nungmoq hkam yù bekò nghut ri. ³⁰Haú gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

Yesuq, Myit Lhoq Nyhum É Hkyô

2 Hkrisduq eq rading ralhú za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, núnhâm é myit eq shogyo nhikmyîn é hkyô rajung jung lé, nungmoq wó yu é nghut le gi, ²nungmoq gi, haú i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhú za kut nyi é dông, ngá é gabú hkyô lé, byíng jup nhâng keq. ³Yhumsing é wuízat é dông le, akôm gyáng pyâm é dông le, haí le a kut é za, myit lhoq nyhum nyi mù, góbang gi, nungmoq htoq má je gyaú lhê nghú myit yu nyi keq. ⁴Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi râ lhê.

⁵Hkrisduq Yesuq má bo é myit yhang, nungmoq chyáng bò râ dut lhê.

⁶Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷Yhânggùng lé lhoq gôm pyám luí, dui nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

⁸Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haú tapzîng htoq má lhang tap sat pyâm é hui shoq jîno gyô ri.

⁹Haù mù luí, Garai Gasang gi, Yesuq é mying lé mauhkúng htoq mâ é hkyihput, myidàm htoq mâ é hkyihput eq moming má é hkyihput hkingmó htuq paí luí, ¹⁰haù Íwa Garai Gasang é hpungwup shingkang é matú, Yesuq Hkrisduq gi, Yhumsing nghut lhê nghú, nhut shô hkingmó yín yù sháng gaq ga, ¹¹myhang htâng é jowò má Yhang lé lhoq toq tô é eq, mying lhunglhâng é htoq má gyaú é mying haù, Yhang lé byí to bê nghut ri.

Kyí Pé Su Duqbó Nyí Râ Hkyô

¹²Haù mù luí, ngò chyitdap é luzúm wuí ê, nungmoq gi, hkâ-nhám le jìno gyô nyí é eq rajung za, ngò, nungmoq eq rahá nyí é u lé su za a nghut, ngò eq wê gâng tô é hkún le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq. ¹³Hkâsu mù gâ le, Garai Gasang gi, Yhang ô nau é hkyô lé, kut naù râ myit èq wó kut râ hkyô lé nungmoq má lhoq htoq byí nyí é sù nghut lhê.

¹⁴Haí kut kôlhâng, taí put lhúm é dông, haù a nghut jáng, dang jet jet lhúm é dông hkâkut kó. ¹⁵Haù jáng sheq, myit goí é, agè ashop é pyat hkaú má, nungmoq gi, mara a bo é, sân-yúng é, shut hkyô a bo é, Garai Gasang é yhangzô pé dut kó râ nghut lhê. ¹⁶Hau htoq agó, nungmoq gi, asak mungdang lé chung htoq uchyang, mauhkúng mâ é kyí pé su, yhangmoq chyáng wó duqbó nyí kó râ nghut lhê. Haù hkún, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. ¹⁷Nghut kôlhâng, ngò gi, shuq jung hkungga^{††} ralhum su, nung-

moq é lumjúng myit mai nhongjaú byí é shigu hkungga ahtoq má hut gyün pyâm é hui le lháng, gabú luí, nungmoq ban-shoq bang eq rahá chôm gabú nyi lhê. ¹⁸Haù eq rajung za, nungmoq le gabú luí, ngò eq rahá chôm gabú nyi râ dut lhê.

Timohiti Eq Epahprodi Nhik Lé Nhang Kat Râ Gâ É Hkyô

¹⁹Ngò gi, nungmoq chyáng Timohiti lé hân za wó nhang kat râ lé, haù Yhumsing Yesuq má myit myoqbyu nyi lhê; haù hkún sheq, nungmoq eq sêng é ludang lé ngò wó sé jáng, ngò myit ngón râ nghut lhê. ²⁰Nungmoq é hkyô lé, yhang su hkyak za ge myit chiq byí é byù gotú rayuq le ngò a wó. ²¹Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. ²²Yhang kúm gi, zo rayuq mai íwa lé htuqbâng é su, haù gabú danglù hkyô má ngò eq rahá dojaú é yanmai, yhâng lumluq é hkyô tûn shit é lé, nungmoq sê nyi lhê. ²³Haù mù luí, ngò gi, ngò má hkâsu dut râ lé sê é hkún yhang, yhang lé nhang kat râ matú ngò myit myoqbyu nyi lhê. ²⁴Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghú, haù Yhumsing má hkyak lum nyi lhê.

²⁵Nghut kôlhâng, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taú kat byi râ lhê nghú, ngò myit hpyit to bê nghut lhê. ²⁶Hkâsu mù gâ le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekô nghut é

^{††}2:17 *Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shí má shí hkâm é hkyô lé taí nau é nghut lhê.*

yanmai, gyai yhang myit myo myit chiq nyi ri. ²⁷ Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri. ²⁸ Haú mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byí nau ri. ²⁹ Nungmoq gi, gyai yhang gabú é myit èq, haú Yhumsing má yhang lé lhom hkúlum yù mù, yhang su dut é bang lé hkungga keq. ³⁰ Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haú Hkrisduq é muzó é yanmai, aluq shoî shoî shi é hui zò ri.

Gungsho Má Lumhkaú Râ Hkyô A Joq

3 Hau htoq agó, ngá é gumang wui ê, haú Yhumsing má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyú dut râ matú sheq ru nghut lhê.

² Haú, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.^{¶¶} ³ Hkâsu mù gâ le, Garai Gasang é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaú é bang, nga-nhúng gi, ahpyo-kuq hpyit hkam yu é bang akying^{§§} nghut lhê. ⁴ Ngò kúm gi, gungsho má lumhkaú râ hkyô wó ang sù nghut lhê.

Góbang rayuq yuq, haú gungsho má lumhkaú râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkuí lé é htàng shit

nyí nghû râ nyí má ahpyo-kuq hpyit bê sù; Israelaq amyú mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haú noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghú myit yù bê nghut lhê. ⁸ Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhunglhang lé ngò tò pyâm é gi, Yhang é yanmai nghut lhê. ⁹ Ngò gi, Hkrisduq lé wó yú râ eq, Yhang eq rahá wó nghut nyí râ matú, haú jung hkangmó lé buzaq nghú myit yu pyám bê. Garai Gasang chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjínq é yanmai za wó yu é ru nghut lhê; haú gi, lumjínq myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzó é hkyô má wó zùm yap râ lé le, Yhang shí hkâm é hkyô lé wó cháng râ lé le, sé nau ri. ¹¹ Haú jáng gi, ngò le, shi byuq bê mai dum dui toq é hkyô lé wó myoqbyu râ nghut lhê.

Myit Myoqbyu Tô É Jowô Shut Din Nyi Râ Hkyô

¹² Ngò gi, haú pé banshoq lé wó gú bê le a nghú naù, ngò gumjup gù bê le a nghú naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haú lé wó lhom yù sháng gaq

^{¶¶}3:2 Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê.

^{§§}3:3 Ahpyo-kuq hpyit hkam yu é bang akying gâ é gi, Garai Gasang é yhangzo hkyak nghut bê bang lé gâ lhê.

ngû, châng hkat nyi lhê. ¹³Gumang wui ê, ngò yhang ngò gi, haû lé wó hap yù bê ngû a myit; nghut kôlhang, ngò kut é muzó ralhúm gi, nunghtáng mâ é lé tô-myhî pyám mù, myoq hí mâ é lé wó yù shoq ngû shikut luí, ¹⁴Hkrisduq Yesuq má Garai Gasâng èq ngo lé ahtoq shut ji yu é chyunghuq lé wó yù rà matú, myoqbyu tô é jowò shut châng hkat din nyi lhê.

¹⁵Gumjup bê bang nga-nhúng lhungl-háng gi, haû sù é myit bò rà lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit rà nghut lhê. ¹⁶Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷Gumang wui ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq. ¹⁸Hkâsú mù gà le, hí hkûn ngò, nungmoq lé anum num taí kyô wú luí, ahkuí lhang, ngàu byí èq dum taí kyô é eq rajung za, Hkrisduq é tapzîng lé gyê kut é bang myo myo nyi bum akô nghut ri. ¹⁹Yhangmoq é jìhtúm gi, htên byoq hkyô nghut ri; yhangmoq é garai gi, yhangmoq é wam dau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri. ²⁰Nghut kôlhang, nga-nhúng é yhum-mau gi, mauhkûng mingdán má nghut lhê. Nga-nhúng gi, haû mâ é Yhum-sîng Yesuq Hkrisduq gà é hkyi yù Sù lé, myoqbyu lánq nyi é bang nghut lhê. ²¹Yhang gi, jung hkangmó lé, Yhang uphkan é a-ô má wó kut tô é Yhâng é a-tsâm èq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng rà nghut lhê.

4 Haû mù luí, chyitdap é luzúm wui le nghut mù, ngò chyitdap bún nghâm

nyi é, ngá é gabú jowò eq janmaú nghut nyi é, ngá é gumang wui ê, haû gi, Yhum-sîng má nungmoq hkâsú kut yap gîng nyi rà hkyô nghut lhê.

Lhoq Pun Lhoq Kyîng É Hkyô

²Ngò gi, Uodia eq Suntuki nhik lé, haû Yhumsîng má rayuq eq rayuq myit huí lhúm nyi rà matú, gyai yhang pying kat lhê. ³Ngá é mù wùn luzúm kyîng ê, ngò gi, myiwe shí nhik lé garúm yù laq ngû, nang lé le dông tôngbán kat lhê; yhang-nhik gi, Klemen eq le, asak jihpán laiká buk má mying bo é, ngá é mù wùn luzúm wui góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴Haû Yhumsîng má hkâ-nhâm le gabú nyi keq! Ngò dum taí lhê, gabú nyi keq! ⁵Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri. ⁶Haí eq séng luí le, myit hkâ-myo hkâchiq kó; hkyô hkangmó má jeju hkya-on uchyang, kyûdông é eq dông tôngbán é dông, nungmoq dông é hkyô pé lé, Garai Gasâng chyáng shit kyô nyi keq. ⁷Haú hkûn, sé gyô é nyan banshoq htoq má gyaú é, Garai Gasâng é nguingón hkyô gi, nungmoq é myit nhiklhúm eq nungmoq myit é hkyô lé, Hkrisduq Yesuq má upzîng byí nyi rà nghut lhê.

⁸Jìhtúm má, gumang wui ê, tengmán é, hpautap gîng é, dingmán é, sansêng é, wó chyitdap é, hkungga gîng é, haí má nghut kôlhang, aróng wó dik é hkyô rajung jung, a nghut jáng, hkya-on gîng é hkyô rajung jung bo é nghut le gi, haû sù é hkyô pé lé myit nyi keq. ⁹Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haû hkûn, nguingón hkyô byí é Garai Gasang gi, nungmoq eq rahá nyi nyi rà nghut lhê.

Jeju Bùn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haû Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhâng, haû lé tân shit râ ahkáng a wó kó nghut ri. ¹¹ Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yû bê nghut lhê. ¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkgangmó eq dut tô é ahkyo lhum jup má, wam gyi kôlhâng, zòmut kôlhâng, agùn agó wó tô nyi kôlhâng, ra châ to kôlhâng, myit dik nyi râ hpaqchyí lé ngò wó mhoq yû bê nghut lhê. ¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkgangmó wó kut lhê.

¹⁴ Nghut kôlhâng, ngò wuîhke jamjau huí nyi é hkûn, nungmoq garúm yû kô é gi, ge é hkyô kut bekô nghut ri. ¹⁵ Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló râ hkûn, haû byi é hkyô eq lhom yu é hkyô má, nungmoq mai lai luí, noqkuq hpúng gotú ralhúmg lhang, ngo lé garúm kat é hkyô a bo é nghut lhê. ¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ

é hkyô lé adàm dàm hûn byi bekô nghut ri. ¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat râ matú lé za sheq ho nyi é nghut lhê. ¹⁸ Ngò gi, haí le gúm shoq myang yu é htoq agó, chyân shoq lhang nghut bê. Ahkuí, haû nungmoq hun kat é chyunghuq lé, Epahprodi chyáng mai ngò lhom myang yû luí, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yû gíng é hkungga ralhúmg nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shinggang gi, nga-nhûng é Íwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuî gi, nungmoq lé shi-kyám kat akô nghut ri. ²² Sân-yúng bang banshoq gi, nungmoq lé shi-kyám kat akô; Kehtaq é yhûm mâ é sân-yúng bang gi, je riyhang shi-kyám kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE

Pê Chyáng Hun Kat é Laiká

(Colossians)

1 Garai Gasâng èq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi, ²Kolose wà mó má nyi bang nghut é, Hkrisduq má chyoiyúng bang nghut é, lhunzuí é gumang wui chyáng dang kyô kat lhê. Nga-nhông é Íwa Garai Gasâng chyáng mà é jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Eq Kyûdung É Dang

³Nungmoq gi, nungmoq é matú kyûdung byí é hkûn, nga-nhông é Yhum-sing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴Haí mù gà le, Hkrisduq Yesuq má nungmoq lumjín hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵Lumjín myit eq chyitdap myit haú gi, nungmoq é matú mauhkúng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gú nghut lhê. ⁶Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri. ⁷Nungmoq gi, haú hkyô lé, ngamoq é chyitdap byinzùm Epahpra chyáng mai mhoyu é nghut lhê. Yhang gi, ngamoq é gunglik đông, Hkrisduq é lhunzuí é hpúng mù wùn sù nghut lhê. ⁸Yhang gi,

haú Woi-nyí èq nungmoq lé byí tô é chyitdap hkyô lé, ngamoq lé taí kyo sù le nghut ri.

⁹Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byí nyi lhê. Garai Gasang ô nau é hkyô lé sé rã hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq đông mai nungmoq chyáng lhoq pyíng byi sháng gaq nghũ, Yhâng chyáng kyûdung byí nyi lhê. ¹⁰Haú su kut kyûdung byí é gi, haú Yhumsing ô nau é hkyô eq gingdán é đông nungmoq asak wó duí luí, hkyô hkangmó má Yhang lé wó gabú nhâng rã matú nghut lhê. Hau đông mai, nungmoq gi, ge é muzó hkangmó má ashi zuí nyi luí, Garai Gasang lé sê é hpaqchyí má kô myhang nyi kó rã nghut lhê. ¹¹Hau htoq agó, nungmoq gi, Yhâng é hpungwup a-tsam đông mai a-tsam banshoq èq wum-o lhoq kóng byí é huí nyi kó rã nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yú kó rã nghut lhê. ¹²Maubó é mingdán má, sân-yúng bang eq sêng é muizè lé wó bo hkam yù rã matú, nungmoq lé gingdán nhâng é sù haú Íwa lé le, jeju wó hkya-on kó rã nghut lhê. ¹³Hkâsu mù gà le, Íwa haú gi, nga-nhông lé, mauchut èq up é hkaú mai hkyi htoq yú luí, Yhang chyitdap é Yhang Zô é mingdán má shuí hâng é Sù nghut lhê. ¹⁴Nga-nhông gi, haú Yhang Zo đông mai, hkyi xe yu é hui mù, yubak mara hkyut pyám byí é hui bê nghut lhê.

Jung Hkangmó É Ushuq, Hkrisduq

¹⁵Hkrisduq gi, myoq èq a byu-myàng é Garai Gasâng é gunghyâng isâm nghut luí, zomún đông hpan tô é lhunglhâng htoq má gyaú é sù nghut ri. ¹⁶Hkâsu mù gà le, mauhkúng eq

*1:5 Bun zo shí má bo é myit myoqbyù hkyô gi, Yesuq lé taí é nghut lhê.

myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglhang gi, Yhâng èq hpan to huí é chyat nghut lhê. Lhunglhang gi, Yhâng é matú, Yhâng èq hpan to huí é chyat nghut ri. ¹⁷Yhang gi, lhunglhang é hí mã é nghut mù, lhunglhang gi, Yhâng é yanmai joq gíng bum é chyat nghut lhê. ¹⁸Yhang gi, noqkuq hpúng nghu é gungdú é ulhum nghut ri; Yhang gi, jung hkgangmó má gyaú dik é ushuq dut sháng gaq ga, sâng-hi awang nghut sù eq shi é bang mã é hí dui toq é zomún dut sù nghut ri. ¹⁹Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit ngui ô nau é nghut mù, ²⁰haú tapzìng má htoq byí é Yhang Zô é sui dòng mai nguínón hkyô kut byí é èq, myigùng htoq mã é azíng zê nghut nghut, mauhkúng mã é azíng zê nghut nghut, lhunglhang lé, Yhang Zo dòng mai, Yhang eq nguínón simsaq hkyô xoq yú bê nghut ri.

²¹Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlai é yanmai, nungmoq i-myt má, Yhâng é gyè dut wú bekô nghut lhê. ²²Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoyúng é dòng Yhâng é hí má shit râ matú, Hkrisduq é gungsho gungdu shí hkâm é dòng, nungmoq eq nguínón simsaq hkyô xoq yú bê nghut ri. ²³Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtíng nyi mù, nungmoq é lumjìng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkúng ô má hpan tô é jung hkgangmó lé hko kyô nyi bê nghut lhê. Ngò, Poluq le, gabú danglù

hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzó é hkyô lé, ngá é gùng má ngò lhoq gumjup yu nyi lhê. ²⁵Ngò gi, Garai Gasang é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mú wùn sù dut é nghut lhê. ²⁶Mungdang haú gi, gohkún mai apyat pyat haq tô gyó lo é zaú tô é hkyô nghut kôlhang, ahkuí gi, haú sânyúng bang lé hpông shit bê nghut ri. ²⁷Garai Gasang, haú su kut é gi, zaú tô é hkyô hau é agùn agó hpungwup shíngkang, túngbaù pê chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haú gi, hpungwup shíngkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸Hkrisduq má gumjup é dòng, byuq hkgangmó lé wó shuí jé sháng gaq nghú, ngamoq gi, Hkrisduq é hkyô lé taí pyô luí, yuq hkgangmó lé, hpaqchyí byéng-yá banshoq èq taí pun taí kyíng é eq mhóqshit nyi é nghut lhê. ²⁹Ngò, haú-í yhang wó wùn waq shikut é gi, ngò má wum-o a-tsam byíng byíng mú zuí nyi Su é wum-o banshoq èq wùn waq shikut nyi é ru nghut lhê.

2 Ngò gi, nungmoq é matú le, Ladoki wà mó bâng é matú le, ngò eq myoqdong hkyúm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ²Haú su awui ahke shikut é hkyô gi, yhangmoq, myit má wum-o byí é hui râ eq chyitdap myit má rad-íng ralhúum za wó dut râ matú nghut lhê.

Haù hkùn, yhangmoq gi, Garai Gasâng é zaù tô é hkyô nghut é, Hkrisduq lé wó sé rã matú, sê gyô é nyan lunglhang é isut byíng shoq lé wó yù kó rã nghut lhê.³ Haù Hkrisduq má kúm gi, hpaqchyí byéng-yá eq sumsé hpaqchyí gâ é sutzè lunglhang lé tsíng tô ri.⁴ Nungmoq lé ngò haù hkyô taí kyô é gi, ó yuq le, dang ngón dang ngui èq mhoq hpyoq é đông, nungmoq lé a wó mhaù zo rã matú nghut lhê.⁵ Hkâsu mù gâ le, ngá gungdu nungmoq eq rahá a nài kôlhang, ngá é myit gi, nungmoq eq rahá nghut nyí luí, nungmoq shuq shuq tap tap za nghut nyí kô é eq Hkrisduq lé lumjíng é má hkâ-í gingtíng nyí kô é lé myàng mù, ngò gabú nyí lhê.

Hkrisduq Đông Mai Wó É Gumjup É Asak Dui Hkyô

⁶ Haù mù luí, nungmoq gi, Hkrisduq Yesuq lé Yhumsíng nghú hap yù bekô nghut é eq rajung za, Yhang má asak xoq dui nyí keq.⁷ Yhang má apún amyit chín gíng nyí mù, kô myhang lò luí, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkya-ôn é hkyô byíng zan nyí keq.

⁸ Hkrisduq chyáng mâ é a nghut é za, mingkan shí mâ é uphkâng tará pé eq xângzo wui é htungli cháng luí, mhaù zô é myit són hpaqchyí eq akyú a bo é dang đông, ó yuq èq le, nungmoq lé a wó shuí nghoq yù kó sháng gaq, sidiq nyí keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyí mù,¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri.¹¹ Yhang má, nungmoq gi, byu loq

èq kut é ahpyo-kuq hpyit hkyô đông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri.¹² Nungmoq gi, wui-myhup hkâm é hkùn Hkrisduq eq rahá myhup yhùm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjíng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pé é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkùn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhùng é yubak mara lunglhang lé hkyut pyám byi luí,¹⁴ nga-nhúng eq shai lhum mù, nga-nhúng lé htuq htíng é, tará pé bo é jéyáng rã jihpán lé huí sêng pyám byi bê nghut ri. Yhang gi, haù lé tapzíng htoq má dok tap pyâm é đông yu pyám byi bê nghut lhê.[†] ¹⁵ Haù đông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzíng èq yhangmoq lé ung pyâm é đông, byù pé é hí má yhangmoq lé de de kut to bê nghut ri.

¹⁶ Haù mù luí, nàng haí zo haí shuq é yanmai le, noqkuq htúng eq sêng é pôi buinyí, Lhoxan Lhosik pôi, Bánno buinyí eq séng luí le, nungmoq lé, ó yuq èq le a wó jéyáng kó sháng gaq.¹⁷ Haù pé gi, dut lò rã hkyô pé é wupzo chyat nghut lhê; haù gùng gyíng gi, Hkrisduq yhang nghut nyí ri.¹⁸ Myit lhoq nyhum mhaù é eq maumang lagyô pé lé noqkuq é lé myit ngui é sù ó yuq èq le, nungmoq lé, chyunghuq eq a gingdán rã đông hkâkut nhâng kó. Haù su é yuq gi, yhumsíng byu-myang é lé[‡] za taí shikut mù, yhum-

[†]2:14 Yhang gi, haù lé tapzíng htoq má dok tap pyâm é đông yu pyám byi bê nghut lhê gâ é gi, Hkrisduq tapzíng má shí hkám byí é hkùn, nga-nhùng é yubak mara banshoq lé, Garai Gasâng èq hkyut pyám byí é lé taí nau é nghut lhê.

[‡]2:18 Byu-myang é lé gâ é gi, yhang myit htoq é shing-rán lé gâ lhê.

sing é gungsho myit mai, akôm yang nghut é lé gyáng dang tai é sũ nghut ri. ¹⁹Yang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lãng tsing tô é haũ ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹Nungmoq gi, Hkrisduq eq rahá, mingkan shĩ mã é tarã pé eq shi gang bekô nghut le nhĩng, haĩ mù, haũ eq sêng lhum nyi ashĩ kó lɦú? “Hkãzui, hkãchyãm, hkãzãng.” gã é tarã ô mã nyi nyi ashĩ kó lɦú? ²²Haũ pé gi, waxãng zô wui é hknmó pé eq mhoqshit hkyô pé nghut é yanmai, jai chung é hkũn, htên byuq rã chyat nghut lhê. ²³Haũ sũ é tarã pé gi, yhumsĩng yang noqkuq shikut é, myit lhoq nyhum mhaũ é eq gungdu lé gunjãng é pé nghut luĩ, hpaqchyĩ byéngyã bo é su dut kôlhang, gungshô é agè ashop yut yut ô nau hkyô lé wó hkũm zing pyãm rã mã, hai akyũ a bò nghut ri.

Chyoiyúng É Đông Asak Dui Rã Hkyô

3 Haũ mù luĩ, nungmoq gi, Hkrisduq eq rahá lhoq dui toq é hui bekô nghut jãng, Garai Gasãng é loqyo hkyam¹ mã zung tô é Hkrisduq é jowò mã joq é, ahtoq mã é azĩng zê pé lé myit ô nau nyi keq. ²Nungmoq gi, myidãm htoq mã é azĩng zê lé myit tuĩ é a nghut é za, ahtoq mã é azĩng zê lé myit tuĩ nyi keq. ³Hkãsu mù gã le, nungmoq gi, shĩ bekô nghut luĩ, ahkuĩ, nungmoq é asak gi, Hkrisduq eq rahá, Garai Gasang mã haq tô é hui bekô nghut ri. ⁴Nungmoq é asak nghut sũ, Hkrisduq htoq shit é hkũn, nungmoq le, Yang eq rahá, hpungwup shinggang hkaũ mã htoq shit kó rã nghut lhê.

⁵Haũ mù luĩ, nungmoq é mingkan hkyô eq sêng é, ashop é đông gungsho

zũm yap é hkyô, agot a-ũ nyi zô lɦũm é hkyô, ye lhai nau é hkyô, agè ashop yut yut ô nau é hkyô eq, hparã noq hkyô nghut é myoqnoq hkyô pé haĩ lé le sat pyãm keq. ⁶Haũ hkyô pê é yanmai, Garai Gasãng é nhikmo-yo hkyô gi, jĩno a gyo bãng é ahtoq mã[§] jé rã za nghut lhê. ⁷Laĩ lò bê hkũn, nungmoq le, haũ hkyô pé đông sô wũ kô é nghut lhê. ⁸Nghut kôlhang, ahkuĩ, nungmoq gi, nhikjum yô é, nhikmo-yô é, agè ashop é đông nõ shoq kut é, lumũ gansang é eq, nungmoq é nhutwuĩ mai hkunchoq tai é hkyô shĩ pé banshoq lé, yhumsĩng gũng yhumsĩng tô pyãm rã dut lhê. ⁹Rayuq eq rayuq hkã-mhaũ lhum kó; hkãsu mù gã le, nungmoq gi, nungmoq é byũ xau eq byũ xau é nyi yap hkyô lé hkyut pyãm mù, ¹⁰byũ sik lé tũ wut yũ kô é nghut lhê; byũ sik haũ gi, sũmsé hpaqchyĩ đông mai, yang lé hpãn Su é gungdu isãm mã asik jat lò nhang é huĩ nyi ri. ¹¹Byũ sik mã gi, Grik eq Yudaq byũ ngu é, ahpyokuq hpyit hkãm bang eq a hkãm bang ngu é, byũ bíng eq byũ jum ngu é, jũn eq jũn a nghut sũ ngu é a nyi lô é za, Hkrisduq gi, banshoq nghut mù, banshoq mã nyi nyi ri.

¹²Haũ mù luĩ, Garai Gasãng èq hkyin yũ huĩ é bang, Yhãng èq gyai yang chyitdap é huĩ é chyoiyúng bang đông, shogyo myit, gè hkyô shit é myit, lhoq nyhum é myit, nú nhãm é myit eq myit hing é hkyô pé lé, yhumsĩng gũng yhumsĩng mebu su wut to keq. ¹³Nungmoq yangchang mara kut shut é hkyô joq é nghut jãng, hkãm jan byĩ lhum luĩ, rayuq eq rayuq mara hkyut byĩ lhum keq. Haũ Yhumsĩng gi, nungmoq é mara hkyut pyãm byĩ é su, nungmoq le mara hkyut byi keq. ¹⁴Haũ ge é sãm lai banshoq wó é htoq agó, gumjup é rading ralhũm za dut é hkyô mã, banshoq lé rahá

¹3:1 *Loqyo hkyam* nghũ é gi, ahko ahkãng wó é jowò lé gã é nghut lhê.

[§]3:6 *Jĩno a gyo bãng é ahtoq mã*, gã é dang, chyũmding ra-am mã a bò nghut lhê.

wó tuí zing tô é chytđap myit lé puq wut to keq.

¹⁵Nungmoq gi, nguingón hkyô wó rá matú ji yu é hui bekô nghut mù, gungđu ralhũm mã é bang chyat nghut bekô yan-mai, Hkrisđuq é nguingón hkyô lé, nungmoq é myit má up nhang nyi keq. Haũ mù, jeju hkya-ôn nyi keq. ¹⁶Nungmoq, rayuq eq rayuq, hpaqchyí byéng-yá ban-shoq eq mhóqshít é eq lhoq pun lhoq kyíng lhũm é hkũn le, Garai Gasang lé nungmoq jeju bũn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkũn le, haũ Hkrisđuq é mungđang lé, nungmoq é myit nhikhũm mã agùn agó bò nhang nyi keq. ¹⁷Nungmoq haũ wá kut kut, dang đông nghut nghut, zui saĩ é đông nghut nghut, banshoq lé Yhumsing Yesuq é myíng mai kut é hkũn, haũ İwa nghut é Garai Gasang lé Yhang đông mai jeju hkya-on keq.

Hkristan Ikun Byu Pé Nyí Yap Rá Hkyô

¹⁸Ikun myhĩ pé ê, ikun hpô pé uphkanđ é ahkaũ mã nyi keq. Haũ gi, Yhumsing é hí mã kut gíng é hkyô nghut lhê.

¹⁹Ikun hpô pé ê, ikun myhĩ pé lé chytđap nyi keq. Yhangmoq lé đang htãn hkâ-nyô kó.

²⁰Zo wuí ê, jung hkanđmó mã nungmoq é mó wuí é jino gyo keq; hkâsu mù gá le, haũ gi, Yhumsing ô nau é hkyô nghut lhê.

²¹İwâ pé ê, nungmoq é zo wuí lé myit hkâ-nô nhãng kó, nõ nhãng jãng gi, yhangmoq, myit wum gyuí byuq kó rá nghut lhê.

²²Jũn pé ê, hkyô hkanđmó mã nungmoq é myidãm htoq mã é jũn sítng bang uphkanđ é ahkaũ mã nyi nyi keq; yhangmoq é myoq hí mã za zui saĩ luĩ, myoqđong ho é đông a nghut é za, haũ Yhumsing lé gyuq hkunggá é eq lhũmzui é

myit mai zui saĩ nyi keq. ²³Nungmoq haũ wá kut kôle, byu é matú kut é a nghut, haũ Yhumsing é matú kut nyi é đông, nungmoq é myit nhikhũm banshoq eq zui saĩ nyi keq. ²⁴Haũ mù gá le, nungmoq gi, haũ Yhumsing chyáng mai, muizè lé chyungđuq đông wó yũ kó rá nghut é lé, sé kô é yanmai nghut lhê. Nungmoq do-jaũ nyi é sũ gi, Yhumsing Hkrisđuq ru nghut lhê. ²⁵Kut shut sũ gi, yhang kut shut é marã matú đãm byĩ é hui zo rá nghut lhê, haũ mù gá le, Garai Gasang gi, myoqđong hkyin é hkyô a joq.

4 Jũn sítng bang ê, nungmoq é jũn pé lé, tengmán é eq gíng ãng é đông la-jang byĩ nyi keq; haũ mù gá le, nungmoq le, mauhkũng htoq mã Yhumsing rayuq wó é lé sé kô é yanmai nghut lhê.

Xoq Lui Pyíng Kat É Hkyô

²Nungmoq gi, kyũđũng é mã myit zítng zuq nyi mù, machyã luĩ, jeju hkya-ôn nyi keq. ³Ngò, shamtoq-tui hut huĩ nyi shoq đut é, Hkrisđuq é zaũ tô é hkyô lé ngamoq wó taĩ pyô shãng gaq, Garai Gasang gi, mungđang lé ngamoq taĩ rá hkyô hkũm hpóng byi rá matú kyũ bo đung byi kó laq. ⁴Haũ Hkrisđuq é zaũ tô é hkyô lé, ngò taĩ ãng é đông san za wó taĩ pyô shãng gaq, kyũ bo đung byi kó laq. ⁵Nungmoq gi, a lumjítng bang eq zũm yap é hkũn hpaqchyí bo nyi keq; wó yu é ahkyíng hkanđmó lé rago yhang chung jai keq. ⁶Nungmoq gi, yuq hkanđmó lé hkâsu tũ taĩ rá hkyô wó sé kó shoq, đãng nyo é mã, xô eq nghãm nhang é su, hkâ-nhãm le jeju byíng é dang bo nyi shãng gaq.

Ló Htãng É Shi-kyãm Dang

⁷Tuhkiku gi, ngá hkyô eq sêng é dan-glũ banshoq, nungmoq lé taĩ kyo rá nghut lhê. Yhang gi, ngá é chytđap gumang, haũ Yhumsing mã, lhũmzui é hpúng mũ wũn sũ eq byinzũm nghut lhê. ⁸Ngò, yhang lé nungmoq chyáng nhang

kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkangmó lé taî kyo kó râ nghut lhê.

¹⁰Ngò eq rahá htóng lúng sũ Aristakuq gi, nungmoq lé shi-kyâm kat ri. Barnaba é yhâng za-aũ Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.)

¹¹Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik títng byî é bang nghut akô. ¹²Nungmoq chyáng mâ é byù nghut sũ eq Hkrisduq Yesuq é mù wùn sũ, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù,

gumjup luí wó gingtítng nyi sháng gaq ga, Yhang gi, ayang nungmoq é matú kyúdung shikut byî nyi ri. ¹³Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵Ladoki wà mó mâ é gumang wui lé le, Numhpa eq yhâng yhùm mâ é noqkuq hpúng lé le, bo shi-kyám byi keq.

¹⁶Laiká shî lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

¹⁷“Haũ Yhumsing chyáng mai nàng hap yù to bê é muzó lé rago za lhoq pán pyám aq.” nghũ, Arhkipò lé taî kyo keq.

¹⁸Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bũn nyi keq. Jeju gi, nungmoq chyáng ru joq nyi sháng gaq ô.

HTESALONI

Pê Chyáng Hĩ Dàm Hun Kat é Laiká

(1 Thessalonians)

1 Ngò Poluq, Sila** eq Timohti pé gi, Íwa Garai Gasang eq Yhumsing Yesuq Hkrisduq má nghut nyí bê bang, haũ Htesaloni và mó byu pê é noqkuq hpúng lé dang kyô kat lhê. Garaĩ jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

²Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on luí, ngamoq é kyúdung dang má nungmoq lé bo dũng lhôm nyi lhê. ³Nungmoq é lumjúng myit mai zui saĩ é nungmoq é muzó lé le; chyitdap myit é yanmai, nungmoq shikut é hkyô lé le; nga-nhũng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhũng é Íwa Garai Gasang é hí má, ngamoq ru bũn nyi lhê.

⁴Garai Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkũn, nungmoq é matú hkâsu kut lai lo é hkyô lé, nungmoq sé gũ nghut lhê. ⁶Nungmoq gi, wuĩhke jamjau myo myo hui zo kôlhang, Chyoiyúng Woi-nyí byĩ é gabú myit mai, danglù haũ lé lhom yù kôluĩ, ngamoq lé le, haũ Yhumsing lé le, alik kut yu é bang dut bekô nghut ri. ⁷Haũ mù, Make-doni mau eq Ahkaia mau mà é lumjúng

bang banshoq é alik, nungmoq dut bekô nghut ri. ⁸Nungmoq chyáng mai, Make-doni mau eq Ahkaia mau má, haũ Yhumsing é mungdang hũ htoq ló e za a nghut, Garaĩ Gasang má nungmoq lumjúng hkyô gi, jowò hkangmó jàm ló bê nghut luí, ngamoq gi, haĩ le taĩ nó a ra lo nghut ri. ⁹Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaĩ Gasang shut hkâsu kut lhing lò mù, rũ dui nyi é eq tengmán é Garaĩ Gasang lé dojaũ nyi é hkyô lé le; ¹⁰mauhkũng mà é haũ Yhang Zo lé lánng nyi é hkyô lé le, yhangmoq taĩ kyô akô. Yhangzo haũ gi, Yhang èq shi é mai lhoq dui toq yu é hui luí, jé lô rã nhikmó yo hkyô mai nga-nhũng lé hkyi yù sũ, Yesuq nghut ri.

Poluq, Htesaloni Và Mó Má Garaĩ Mũ Wùn Waq É Hkyô

2 Gumang wui ê, nungmoq chyáng ngamoq lé kũm é hkyô gi, akôm a nghut é lé, nungmoq yhang sê lhê. ²Nungmoq sê é eq rajung za, ngamoq gi, hí hkũn, Hpilipi và mó má wuĩhke jamjau eq rhoĩ é huĩ wú bê nghut lhê; nghut kôlhang, nga-nhũng é Garaĩ Gasang garúm é yanmai, gyaĩ lhom htuq htíng é hui kôle, Garaĩ Gasang é gabú danglù lé, a gyuq a kyum nungmoq lé wám taĩ kyô é nghut lhê. ³Hkâsu mù gâ le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myit đông eq nungmoq lé mhaũ zô é đông a nghut e za, ⁴haũ gabú danglù lé chũng gíng é bang ga, Garaĩ Gasang chyáng mai ahkáng wó é đông za, ngamoq taĩ é nghut lhê. Ngamoq gi, byu pé lé gabú nhâng rã matú a nghut, ngamoq é myit lé chyam wú nyi é Garaĩ Gasang lé, gabú nhâng rã matú shikut é

**1:1 Sila lé gi, Salwanu le gâ lhê.

ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaû é dang le hkâ-nhâm a chûng wú, nghop tô é myoqnoq myit le hkâ-nhâm a bò, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotû ó yuq mai le hkyanon râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hûn naù jáng wó hun lhê; nghut kôlhang, ⁷ Ìnu rayuq, yhang é zoshâng zô pé lé hku baù é su, nungmoq chyáng nú-nhâm é dông nyi lai lò bê nghut lhê. ⁸ Ngamoq gi, nungmoq lé gyai yhang chytidap luí, Garai Gasâng é gabú danglù za a nghut, ngamoq é asak pé nungmoq lé byí pyâm le lhang nhik dik lhê; hkâsu mù gâ le, nungmoq gi, ngamoq chytidap dik é bang dut bekô nghut é yanmai nghut lhê. ⁹ Gumang wuì ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zuí é nghut lhê.

¹⁰ Ngamoq gi, lumjínng bê bang nungmoq é hí má, hkâsu chyoyíyung é eq dingmán é, mara hûn râ a bo é bang dut lai lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, Ìwa rayuq mai yhumsing yhangzô pé lé kut byí é su, nungmoq yuq hkanngmó lé, myit wum byí nyi é hkyô lé le, nhik tai ting nyi é hkyô lé le, ¹² Yhang é mingdán eq hpungwup shinkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byí nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjínng é bang nungmoq má mù

zuí nyi é, haù Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkyâ-ôn nyi lhê. ¹⁴ Gumang wuì ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haù pé gi, Yudaq byu pé zing-rí é lé hui zô é su, nungmoq le, yhumsing mau má é byu pé zing-rí é lé hui zô akô nghut ri. ¹⁵ Yudaq byu pé gi, haù Yhumsing Yesuq eq myiqhtoí pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô. ¹⁶ Tungbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhâm le, yhumsing é mara lé dik shoq haù dông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wuì ê, ngamoq gi, rayoq zo nungmoq eq myoqdong byam gang to kôle, myit gi, a gang é nghut lhê; nungmoq lé gyai bun-nghâm nyi luí, wó myang hui shoq nghû, ngamoq gyai yhang shikut nyi lhê. ¹⁸ Nungmoq chyáng ngamoq jé lé naù mù luí, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nga-nhûng é Yhumsing Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaù gi, haù jung wá nghut lhê gâ le, nungmoq yhang nghut nyi lhê a nghut kó lú? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3 Haù mù luí, ngamoq gi, haù lé a wó jân nyi lo jáng, Ahten myuq má ng-

amoq baú nyi gyó le je gè râ nghut lhê nghû, myit hpyit yû mù, ²wuĩhke jam-jau shí pè é yanmai, ó yuq le, myit a hten kó sháng gaq nghû, nungmoq é lumj́ing hkyô má, nungmoq lé wum-o byi râ eq myit wum byi râ matú, ³Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuĩhke jam-jau pé hui zo râ matú, hkyin to huĩ é bang nghut é lé, nungmoq yhang rago sê nyi lhê. ⁴Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taĩ kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵Hau é yanmai, ngò a wó jân nyi lo jáng, haú gungláu sũ mai nungmoq lé gungláu yû luĩ, ngamoq wùn waq bê muzó gi, akôm dut byuq râ lé, myit chiq mù, nungmoq é lumj́ing hkyô lé wó sé râ matú, yhang lé ngò nhang kat é nghut lhê. Gungláu sũ gi, nat Tsadán nghut lhê.

Timohti Lo Shit Kyô É Wum Byi Dang

⁶Ahkuĩ kúm, Timohti gi, nungmoq é lumj́ing hkyô eq chyitdap myit eq séng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bũn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taĩ kyo bê nghut ri. ⁷Haú mù luĩ, gumang wui ê, ngamoq myit myo uhkyĩ é hkyô eq zing-ri huĩ é hkyô pé banshoq má, nungmoq é lumj́ing hkyo é yanmai, nungmoq eq séng luĩ myit wum byi é hkyô lé ngamoq wó yû bê nghut lhê. ⁸Ahkuĩ, ngamoq gi, haú Yhumsing má nungmoq yap gíng nyi kô é yanmai, gè gè nyi ngón bê nghut lhê. ⁹Nga-nhúng é Garai Gasâng hí má, nungmoq é yanmai, ng-

amoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju úng hkya-on râ lhú? ¹⁰Ngamoq gi, nungmoq lé dum myàng râ matú eq, nungmoq é lumj́ing myit má langhpyut é hkyô lé wó lhoq hkúm byi râ matú, nyi, myín, gyai yhang lhumzui luĩ kyúđung nyi lhê.

¹¹Nungmoq chyáng ngamoq lé râ matú, nga-nhúng é Yhumsing Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq. ¹²Nungmoq lé ngamoq chyitdap nyi é su, haú Yhumsing gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³Nga-nhúng é Yhumsing Yesuq gi, Yhâng é chyoiyúng bang banshoq eq rahá lé é hkûn, nga-nhúng é Íwa Garai Gasâng é hí má, nungmoq gi, mara hũn jowò a joq é eq chyoiyúng é bang dut râ matú, nungmoq é myit nhiklhum má, haú Yhumsing mai wum-o lhoq ḱing byi nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taĩ záng lhê.

Garai Gasang Ô Nau É Đông Asak Dui Râ Hkyô

4 Xoq luĩ taĩ nau é gi, gumang wui ê, ngamoq gi, ahkuĩ nungmoq cháng nyi é eq rajung za, nungmoq hká dông nyi yap luĩ, Garai Gasang lé gabú nhâng râ hkyô nungmoq lé mhoqshit byi bê nghut lhê. Ahkuĩ le, ngamoq gi, shí hkyô lé nungmoq hau htoq je wó châng jat râ matú, Yhumsing Yesuq má nungmoq lé đung tôngbán luĩ, myit wum byi kat lhê. ²Hkâsu mù gâ le, nungmoq gi, haú Yhumsing Yesuq é ahko ahkáng dông, ngamoq mai, nungmoq lé mhoqshit to byi é hkyô pé lé, sê akô nghut ri.

³Garai Gasang ô nau é hkyô gi, haú nungmoq sân-yúng é hui râ matú le,

ashop é dōng gungsho zùm yap é hkyô lé koi pyám rã matú le; ⁴nungmoq yuq hkangmó gi, haú Garai Gasang lé a sê é, a lumj́ng bang kut é su, gungsho yut yut ô nau é hkyô a chãng e za, ⁵haú chyoiyúng é eq hkungga gíng é sũ wó dut shoq, yhumsing gùng lé wó hkang é hkyô mhoq yũ rã matú le; ⁶shí hkyô eq séng luí, ó yuq le, yhumsing é gumang lé, a ge shut, a ge lhúngzo rã matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haú Yhumsing gi, haú hkyô shut é banshoq lé, dam byi rã nghut lhê. ⁷Hkãsu mù gã le, Garai Gasang gi, nga-nhúng lé a sãn-yúng é bang dut rã matú wut yu é a nghut, chyoiyúng é dōng asak dui nyi rã matú sheq wut yu é ru nghut lhê. ⁸Haú mù luí, mhoqshit hkyô shí lé he-ngik pyâm é sũ gi, byù lé he-ngik é a nghut, haú nungmoq lé, Yhãng é Chyoiyúng Woi-nyi byí tô é sũ, Garai Gasang lé he-ngik pyâm é sheq ru nghut lhê.

⁹Rayuq eq rayuq chyitdap lhum rã matú, nungmoq yhang, Garai Gasang èq mhoqshit é hui bekô nghut é yanmai, gumang yhangchang chyitdap lhũm é hkyô eq séng luí, ngamoq gi, nungmoq chyáng kã kat byi a ra lo nghut ri. ¹⁰Haú eq rajung za, nungmoq gi, Makedoni mau gón mã é gumang wuì banshoq lé chyitdap nyi akô nghut ri. Nghut kôlhãng, gumang wuì ê, haú su je myo kut rã matú nungmoq lé ngamoq wum byí lhê.

¹¹⁻¹²Nungmoq é nyi wui lhê é asak dui hkyô mã, gotú byu pè èq hkunggã é wó yũ luí, ó yuq lé le, lumhkaú a ra wó dut sháng gaq, hí hkũn nungmoq lé ngamoq taí kyô tô é eq rajung za, num num byù zè rã hkyô lé le, yhumsing eq a sêng é hkyô a kut wún rã lé le, yhumsing loq èq zui saí mù nyi rã lé le, nungmoq é myit myoqbyù jowò kut yũ keq.

Haú Yhumsing Gyó Lé Rã Hkyô

¹³Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haú yhup ngón byuq é bang eq séng luí, nungmoq a sé rã lé, ngamoq a ô nau é nghut lhê. Yhup ngón byuq é bang gã é gi, lumj́ng luí shi lô byuq é bang lé gã é nghut lhê. ¹⁴Hkãsu mù gã le, Yesuq shí luí, dum dui toq bê hkyô lé nga-nhúng lumj́ng é yanmai, Garai Gasang gi, Yesuq mã yhup ngón byuq é bang lé, Yesuq eq rahá shuí lé rã nghut lhê nghũ, nga-nhúng lumj́ng é nghut lhê. ¹⁵Haú Yhumsing taí é dang eq rajung za, nungmoq lé ngamoq taí kyo kôlé, haú Yhumsing dum lé é hkũn, asak dui nyi é eq myit gyo tô é bang nga-nhúng gi, yhup ngón byuq bê bãng htoq ratsuí le wó hí rã a nghut. ¹⁶Hkãsu mù gã le, haú Yhumsing yhang gi, htê mó hkunmó èq le, maumang lagyo mó é hte èq le, Garai Gasang é tutmó mut hte èq le, mauhkũng mai gyó lé lô luí, haú Hkrisduq mã shi lô bê bang hí dui toq rã nghut lhê. ¹⁷Hau htãng, asak dui nyi é eq myit gyo tô é bang nga-nhúng gi, yhangmoq eq rahá mhut htoq mã shuí toq yu é hui luí, maulat mã haú Yhumsing eq hui rã nghut lhê. Haú hkũn, nga-nhúng gi, haú Yhumsing eq ahtum abyuq nyi nyi berã nghut lhê. ¹⁸Haú mù luí, nungmoq gi, dang shí pé mai rayuq eq rayuq myit wum byí lhũm nyi keq.

5 Nghut kôlhãng, gumang wuì ê, ahkyíng buinyi eq séng luí, nungmoq lé ngamoq kã hũn byi a ra lo nghut ri. ²Hkãsu mù gã le, haú Yhumsing é buinyi gi, myín lé hkau sũ wang é su jé lé rã nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé rã buinyi lé taí nau é nghut lhê. ³Byu pé gi, 'Nguingón yuqyo ri.' ga taí nyi bũm kô é u lé, gùng laí é myiwe rayuq zohkũ-nò no lo é su, htên byoq hkyô gi, byodàn tung yhangmoq chyáng

je luí, hká đông lé yhangmoq wó h pang lut kó rã a nghut.

⁴Nghut kôlhâng, gumang wuì ê, nungmoq gi, mauchut hkaû má nyi é bang a nghut é yanmai, buinyì haû gi, hkau sù lé é su, nungmoq é matú byodàn tung dut rã a nghut. ⁵Nungmoq lhunglhâng bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaû eq sêng é bang a nghut. ⁶Haû mù luí, nga-nhúng gi, byù gôbang su a yhup nyi e za, machyã luí, gying gying kut nyí sháng. ⁷Hkãsu mù gã le, yhup é bang gi, myín lé yhup akô; í shuq wut é bang le, myín lé shuq wut akô. ⁸Nghut kôlhâng, nga-nhúng gi, nyí eq sêng lhê nghut é yanmai, gying gying kut nyí luí, lumjín myit eq chyt-dap myit lé gi, wànggò-long lé su gò to, hkyi yù hui rã lé myit myoqbyù tô é hkyô lé gi, shamtoq-muq lé su tsung to, kut sháng. ⁹Hkãsu mù gã le, Garai Gasang gi, Yhâng nhikmo-yô é hkyô lé hkâm zo rã matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yù hkyô lé nga-nhúng wó yù rã matú hkyin to bê nghut lhê. ¹⁰Yesuq gi, nga-nhúng yhup bûn nyi kôlhâng, yhup ngón to kôlhâng, Yhang eq rahá wó nyi nyi sháng gaq ga, nga-nhúng é matú shí hkám byi bê nghut ri. ¹¹Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhum mù, htuqluq htuqbáng kut lhúm nyi keq.

Ló Htâng Lhê É Mhoqshit Hkyô

¹²Gumang wuì ê, nungmoq mã é muzò shikut luí, haû Yhumsing má nungmoq lé up nyi é eq lhoq pun lhoq kyîng nyi é bang lé, nungmoq hkungga rã matú le; ¹³yhangmoq zui saí é muzò jizô é yanmai, yhangmoq lé chyt-dap myit đông gyai yhang hkungga rã matú le, nungmoq lé ngamoq sang kat lhê. Nungmoq le, rayuq eq rayuq nguóngón lhúm nyi

keq. ¹⁴Gumang wuì ê, nungmoq lé ngamoq wum byí kat nau é gi, lagôn é bang lé lhoq pun lhoq kyîng keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byí nyi keq; ¹⁵ó yuq lé nghut kôlhâng, a ge é hkyo é yanmai, a ge é đông a taû kut rã lé lhoq pun lhoq kyîng nyi keq; nungmoq eq rayuq eq rayuq le, gôbang banshoq eq le, shikut luí, hkã-nhám le, ge é hkyô kut byí lhum nyi keq.

¹⁶Hkã-nhám le, ru gabú nyi keq; ¹⁷abyit alan kyûdûng nyi keq; ¹⁸hkyô hkat hkangmó má jeju hkya-ôn nyi keq, hkãsu mù gã le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹Haû Woi-nyí lé hkâlhoq jôm pyám kó; ²⁰myiqhtoi htoí é lé, haí su a ngàm hkâkut kó. ²¹Jung hkangmó lé, chyam wú luí, ge é hkyô lé zuí zing nyi mù, ²²agè ashop é hkyô hkangmó lé, koi pyám keq.

²³Nguóngón hkyo é apûn awang nghut é Garai Gasang yhang, nungmoq lé, lhunglhâng lhoq sân-yúng pyám byi sháng gaq; nga-nhúng é Yhumsing Yesuq Hkrisduq dum lé é hkûn, nungmoq é woi-nyí, myit nhiklhúm, gungdu gi, mara hûn rã hkyô a bò sháng gaq. ²⁴Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut rã nghut lhê.

²⁵Gumang wuì ê, ngamoq é matú kyû bo dung byi kó laq. ²⁶Gumang wuì banshoq bang lé, chyoiyúng é chyt-puq puq é đông bo shi-kyám byi kó laq. ²⁷Gumang wuì banshoq bang lé, hun kat é laiká shí nghap kyo rã matú, haû Yhumsing é myîng mai, ngò, nungmoq lé pying kat lhê.

²⁸Nga-nhúng é Yhumsing Yesuq Hkrisduq é jeju gi, nungmoq chyáng ru joq nyí sháng gaq ô!

HTESALONI

Pê Chyáng Htang Dàm Hun Kat é Laiká

(2 Thessalonians)

1 Ngò Poluq eq Sila, Timohti pé gi, nga-nhùng é Iwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pê é noqkuq hpúng lé dang kyô kat lhê.

²Haù Iwa Garai Gasang eq Yhumsing Yesuq Hkrisduq chyáng mã é jeju eq nguingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyûdùng É Hkyô

³Gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haù gi, gíng lhê; hkâsu mù gâ le, nungmoq é lumjúng myit gi, je je kô jat lo nyí luí, nungmoq yuq hkgámó é chyitdap myit le, rayuq eq rayuq é ahtoq má je myô jat lo nyí é yanmai nghut lhê. ⁴Haù mù luí, ngamoq gi, nungmoq zing-ri huí é hkyô pé eq wuìhke jamjau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjúng hkyô lé, Garai Gasang é noqkuq hpúng pê é hí má gumrong nyi lhê.

⁵Shí hkyô banshoq gi, haù Garai Gasang dingmán é đông jéyáng é hkyô lé saksé tûn shit é nghut lhê; haù mù luí, nungmoq gi, Garai Gasang é mingdán é matú wuìhke jamjau hui zo bekô nghut é yanmai, mingdán haù eq gingdán é bang gâ é hui kó râ nghut lhê; ⁶Garai Gasang gi, tengmán Sû nghut lhê; haù mù, nungmoq lé jamjau byí é bang lé, Yhang mai jamjau byi râ eq, ⁷jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng

râ matú, ⁸haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkúng mai htoq shit é hkún, dut râ nghut lhê. ⁹Yesuq jé lé lô mù, Yhâng é chyoiyúng bang má hpungwup shingkang wó yu é eq lumjúng bang banshoq mai mauhong é huí é buinyì má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. ¹⁰Hau htoq agó, haù Yhumsing é hí mai le, Yhâng é a-tsam kô làm é mai le, lhoq káng pyâm é hui kó râ nghut lhê. Ngamoq é saksé dang lé nungmoq lumjúng bekô nghut é yanmai, haù lumjúng bang má nungmoq le lòm bekô nghut lhê.

¹¹Haù mù luí, nga-nhùng é Garai Gasang gi, nungmoq lé, Yhang ji yu é hkyô eq gingdán ri ga râ le, haù Yhang é wum-o a-tsam mai, nungmoq myit tô é ge é hkyô hkgámó eq nungmoq é lumjúng myit eq sêng é muzó lhumjup lé, lhoq dik byi sháng gaq nghû le, nungmoq é matú, hkâ-nhám le, ngamoq kyûdung byí nyi lhê. ¹²Ngamoq haù su dung byí nyi é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

A Tara É Sû

2 Gumang wuì ê, haù nga-nhùng é Yhumsing Yesuq Hkrisduq dum lé râ hkyô, Yhang eq nga-nhùng rahá zup nyi to râ hkyô eq séng luí, nungmoq lé ngamoq pying kat nau é gi, ²haù Yhumsing é buinyì gi, jé to gù nghut bê gâ é myiqtoi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dân kó. ³Hkâsu mù gâ le, haù htên byoq é yhangzo nghut é a tará Sû htoq

shit luí, haú gumlau toq é hkyô hí a htoq htoq gi, buinyí haú jé rã a nghut, haú mù luí, nungmoq lé, ó yuq èq, hká dông mai mhaú kôlhang hkâjîng kó. ⁴ Haú yuq gi, Garai ga noquq huí é zè lhungháng lé htuq htîng luí, haú pé banshoq é htoq má yhanggùng yhang lhoq gyaú yû rã nghut lhê; haú mù luí, Garai Gasâng é noquq yhùm má zung to luí, yhanggùng yhang Garai Gasang nghut lhê ga taí rã nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lhu? ⁶ Haú yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. ⁷ Haú a tara é hkyo é haq dâ é a-tsam gi, mù zui nyi gù nghut bê; nghut kôlhang, haú lé hkûm zing nyi sù gi, hui htot pyám huí é hkûn jé shoq, haú lé hkûm zing nyi shirã nghut lhê. ⁸ Haú hui htot pyám huí é hkûn, a tarã Sù htoq shit rã nghut lhê; haú Yhumsîng Yesuq kúm gi, Yhâng nhut mã é soq èq yhang lé sat pyám rã eq, Yhang gyó lo u lhê é hpungwup mó èq, yhang lé lhoq htên pyám rã nghut lhê. ⁹ Haú a tarã Sù lé lo é gi, Tsadán a-tsam dông lak-láí kumlhá pé, kumlhá pé, mauhpo muzó pé ajung jung kut mhaú é eq, ¹⁰ htên byoq huí nyi é bang lé mhaú zo rã agè ashop é hkyô jung hkangmó lé tân shit rã nghut lhê. Yhangmoq htên byoq é gi, haú tengmán hkyô lé chyitdap luí hkyi yû hui rã nghut é hkyô lé he-ngik pyám kô é yanmai nghut ri. ¹¹ Hau é yanmai, Garai Gasang gi, haú tengmán hkyô lé a lumjîng e za agè ashop hkyô má ô nau é lhunghâng bang mara byí é hui kó sháng gaq ga, ¹² mhaú é dang lé jîng kó rã matú, a-tsam mó bo é lum shut rã hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyi rã hkyô

¹³ Nghut kôlhang, haú Yhumsîng chyitdap é gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on rã dut ri. Hkâsu mù gâ le, haú Woi-nyí èq lhoq sân-yúng nyi é muzó dông le, tengmán hkyô lé lumjîng é dông le, hkyi yû hui rã matú, Garai Gasang gi, nungmoq lé, sâng-hi mai hkyin yû bê nghut ri. ¹⁴ Yhang gi, nga-nhúng é Yhumsîng Yesuq Hkrisduq é hpungwup shingkang má, nungmoq wó bo lòm shoq ga, ngamoq é gabú danglù dông nungmoq lé shí hkyô má ji yû bê nghut lhê. ¹⁵ Haú mù luí, gumang wuì ê, nhutdang dông nghut nghut, laiká dông nghut nghut, nungmoq lé ngamoq lhai byí é mhoqshit hkyô lé zuí gîng nyi luí, gîng gîng yap nyi keq.

¹⁶ Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhúng lé chyitdap é, nga-nhúng é Íwa Garai Gasang eq nga-nhúng é Yhumsîng Yesuq Hkrisduq gi, ¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

Kyû Dung Byi Rã Matú Lung Kat É Hkyô

3 Gumang wuì ê, je htâng má pying kat nau é hkyô gi, nungmoq chyáng dut wú bê eq rajung za, haú Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkangmó gi, lumjîng myit bo é a nghut é yanmai, haú achayut agè ashop é byu pê chyáng mai ngamoq wó lut rã matú le, kyû bo dung byi kó laq. ³ Nghut kôlhang, haú Yhumsîng gi, lhumzuí é sù nghut é yanmai, Yhang nungmoq lé wum-o lhoq kîng byi mù, haú agè ashop su chyáng mai nungmoq lé hung yû rã

nghut lhê. ⁴Nungmoq gi, ngamoq pying tô é dang pé lé kut nyî mù, xoq luí le kut nyî râ nghut lhê nghû, haû Yhumsîng má ngamoq hkyak myit lum tô lhê. ⁵Haû Yhumsîng gi, nungmoq lé Garai Gasâng é chytidap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é myìng mai nungmoq lé hkunmó hkyô kat lhê. ⁷Hkâsu mù gà le, ngamoq kut é alik lé hká đông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ó yuq é zoshuq lé le, ngùn a byî é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui saí é nghut lhê. ⁹Ngamoq gi, nungmoq lé garúm nhâng râ ahkáng a wó é a nghut, yhumsîng gùng lé nungmoq cháng râ matú alik dut sháng gaq nghû sheq, haû su kut é ru nghut lhê. ¹⁰Hkâsu mù gà le, ngamoq, nungmoq eq rahá nyi é hkûn, “Mû a kâm zui sù gi, a zo sháng gaq.” nghû, nungmoq lé ngamoq mai sang to bê nghut lhê.

¹¹Hkâsu mù gà le, nungmoq chyáng mâ é byù ra-am lagon luí, haí mù le a

zuí e za, mù châng lhoq gyô byî wún akô gà é hkyô lé, ngamoq wó gyô é yanmai nghut lhê. ¹²Ngamoq gi, haû su kut é bang lé, zim za nyi mù zui saí luí, yhumsîng é zoshuq ho nyi kó sháng gaq nghû, haû Yhumsîng Yesuq Hkrisduq é myìng lé lang luí, hkunmó hkyô kat mù, wum byî kat lhê. ¹³Gumang wui ê, nungmoq kúm gi, ge é muzó kut é hkyô má, hkânhám le, hkâ-ngú byuq bùm kó.

¹⁴Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haû yuq lé rago chôm matsîng yù mù, yhang hoq bun sháng gaq, yhang eq hkâzùm yap kó. ¹⁵Nghut kôlhang, yhang lé gyè rayuq đông a sôn e za, gumang rayuq đông lhoq pun lhoq kyîng nyi keq.

Ló Htâng Lhê É Shi-kyám Dang

¹⁶Haû nguingón hkyo é Yhumsîng yhang gi, ahkyîng hkangmó eq hkyô hkat hkangmó má, nungmoq lé nguingón hkyô byî nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

¹⁷Ngò, Poluq gi, ngá é loq mai yhang shi-kyám dang shí lé kê kat lhê; shí gi, ngò kê é laiká banshoq má kumlhá nghut lhê. Ngò kê é gi, shí đông chyat nghut lhê.

¹⁸Nga-nhùng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

TIMOHTI

Chyáng Hî Dàm Hun Kat é Laiká

(1 Timothy)

1 Nga-nhùng é hkyi yù Sû Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ²haù lumjúng hkyô má ngá zo sítng nghut sù, Timohti lé dang kyô kat lhê; haù Íwa Garai Gasang eq nga-nhùng é Yhumsing Hkrisduq Yesuq chyáng mâ é, jeju eq shogyo nhikmyin hkyô, ngingón hkyô gi, náng chyáng ru joq nyi sháng gaq ô.

Sará Pyoq Pé Lé Sidiq Râ Hkyô

³Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjúng myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi é nghut lhê. ⁵Haù hkunmó hkyó luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bún é myit eq lumjúng myit akying mai lo é nghut lhê. ⁶Byù ra-am gi, haù hkyô pé mai htoq ló kôluí, dangsôm taí é hkyô shut lhing ló byuq bekô nghut ri. ⁷Haù bang gi, jep é tarâ sará pé dut naù kôlhang, yhangmoq haí taí nyi é hkyô lé le, hkyak, haí lé mhoqshit é hkyô lé le, a sé kó nghut ri.

⁸Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhúng sê lhê. ⁹Haù jep é tarâ gi,

dingmán bâng é matú tô tô é a nghut e za, tarâ lu laí é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjúng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú, ¹⁰ashop é dông gungsho zùm yap é bang eq yuqgè yhangchang nyi zo lhum bâng é bang, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhúng sê lhê. ¹¹Tengmán mhoqshit hkyô haù gi, hkungsô wó é Garai Gasâng èq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹²Ngò gi, ngo lé wum-o byí é, nga-nhùng é Yhumsing Hkrisduq Yesuq lé jeju hkyá-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yanmai nghut lhê. ¹³Hí hkûn, ngò gi, Garai Gasang lé taí hpoi sù, zing-ri sù eq byù rhoi sù nghut wú kôlhang, a sé shi mù lumjúng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴Nga-nhùng é Yhumsing é jeju lé le, Hkrisduq Yesuq eq sêng é lumjúng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjúng é mungdang nghut luí, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶Nghut kôlhang, Hkrisduq Yesuq gi, Yhang lé lumjúng luí ahtum abyuq é asak lé wó yù râ bâng é alik dut râ

matú, yubak dap bang má yubak je ko sú nghut é, ngá é ahtoq má, Yhâng é hkam jan hkyô lhunghâng wó tún shit sháng gaq ga, Garai Gasang gi, ngo lé shogyo nhikmyîn yu ri. ¹⁷ Haú mù, haú aróng eq hpungwup shing kang gi, ahtum abyuq é, a dat htên byoq é, myoq èq a byu-myang é Hkohkâm nghut sú, rayuq zâ é Garai Gasang chyâng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timothei ê, nàng eq séng luí myiqhtoi dang joq wú é eq rajung za, ngò gi, nang lé haú dông mhoqshit kat lhê; haú mù, nàng gi, haú pé lé chung nyi luí, ge é majan zan mù, ¹⁹ lumjín myit eq mara a bò bún é myit bo nyi sháng gaq. Byù ra-am gi, haú hkyô pé lé hengik pyám kô é nghut luí, yhangmoq é lumjín myit gi, wui-sanghpo htên byoq ló é su htên byoq byuq bekô nghut ri. ²⁰ Haú bang má, Humenu eq Alesander le bò kômù, Garai Gasang lé taí hpoi é dang a taí rá matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

Noqkuq Hkyô Eq Séng Luí Mhoqshit Byí Ê Hkyô

2 Haú mù luí, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó ngu-ingón yuqyo nyi sháng gaq, hkokhâm pé eq ahkáng ayá wó bang banshoq é matú le, ² yuq hkanmó é matú le, dúng tông-bán byi, kyúdung byi, dúng xoq byi, jeju hkya-on byi, kut aq nghû nau ri. ³ Haú gi, ge é hkyô nghut mù, nga-nhúng é hkyi yù Sú Garai Gasang ô nau é hkyô nghut ri. ⁴ Yhang gi, byù lhunghâng bang hkyi yu é hui mù, tengmán é mungdang lé sê gyo rá lé, ô nau nyi ri. ⁵ Hkâsu mù gâ le, Garai Gasang gi, rayuq za nghut luí, Garai Gasang eq byu é gyoro má sô xoq byi sú le rayuq za nghut lhê; haú yuq

gi, xângzo byù nghut é Hkrisduq Yesuq nghut ri. ⁶ Yhang gi, byù lhunghâng bâng é matú shíhtaí gunglik hkungga dông Yhânggùng lé byí pyám bê nghut ri; haú gi, ahkyíng yam-yoq jé é hkún, saksé htoq shit bê nghut lhê. ⁷ Ngò gi, túngbaù pé lé, tengmán é lumjín hkyô mhoqshit rá matú, hkô kyo sú rayuq eq lagyo rayuq dông hkyin tô é hui sú nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

⁸ Yuqgè wui gi, nhikjum yô é hkyô eq dang htíng htíng lhúm é hkyô a bo e za, jowò hkanmó má chyoiyúng é loq tú mù kyúdung rá lé, ngò ô nau ri.

⁹ Myiwe wui gi, xâm nik nik é, hîng zè, palhé, hpaú jung mebù èq a mhôn chung e za, siri bo é mebu wut chûng mù, tap tap za, shuq shuq za kut luí, ¹⁰ Garai Gasang lé noqkuq é myiwe wui eq gíng shoq, ge é muzó èq yhumsing gùng lé mhôn nyi rá lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yù kó sháng gaq. ¹² Myiwe gi, yuqgè lé mhoqshit rá hkyô lé le, yuqgè lé uphkang rá hkyô lé le, ngò ahkáng a byi; myiwe gi, zim za kut nyi ra rá nghut lhê. ¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaú é hui zo sú a nghut; haú myiwe sheq mhaú é hui zo luí, mara kut shut é ru nghut lhê. ¹⁵ Nghut kôlhâng, myiwe wui gi, lumjín myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó rá nghut lhê.^e

Hpúng-up Eq Hpungtê Kut Râ Bâng É Hkyô

3 Rayuq yuq, hpúng-up ayá lé ô nau nyi é nghut jáng, haú yuq gi, aróng

wó é muzó lé ô nau nyi ri gâ é dang gi, lumgíng é dang nghut nyi ri. ²Haû mù luí, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkgang é sù, hkungga gíng é sù, byù bíng lé dat hkulum é sù, dat mhoqshit é sù, ³ihpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. ⁴Yhang gi, yhâng é ikun lé rago dat uphkâng luí, yhang zô pé mai hkungga myit bo é èq yhâng dang lé gyo byí é sù le, nghut râ lhê. ⁵Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon râ lhú? ⁶Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbûn lò luí, jéyáng é hkyô lé nat Tsadán hui zô é su hui zo abe. ⁷Hpúng-up rayuq gi, tûngbaù pé hí má ge é myíng wó é sù le dut râ lhê; haû jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

⁸Haû eq rajung za, hpungtê pé gi, hkungga gíng é bang, shô-kó a xân é bang, ihpê é jùn a dut é bang, a tengmán é amyat lé a ho é bang, nghut râ lhê. ⁹Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-myt èq châng nyi ra râ nghut lhê. ¹⁰Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

¹¹Haû eq rajung za, yhangmoq é yhumsing myhí pé le, myit no nhang é dang a taí e za, dat sidiq é eq hkyô hkangmó má lumgíng luí, hkungga gíng é myiwe wuì, nghut ra râ dut lhê.

¹²Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³Hpungtê mù lé rago za wùn waq

bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyíng du myáng pyâm le, ¹⁵Garai Gasâng é ikun hkaû má, byu pé hkâ dông nyi yap râ é hkyô lé, nàng sé sháng gaq nghú, pying kat é dang shi pé lé ká byí kat lhê; ikun haû gi, rû dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apûn awang nghut ri. ¹⁶Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjíng luí, hpungwup shinggang eq Yhang lé mauhkúng shut shuí toq yû bê nghut ri.

Timohti Lé Mhoqshit É Hkyô

4 Jihtûm buinyi pé má, byù ra-am gi, lumjíng hkyô mai htaq htoq ló luí, mhaú zô é woi-nyí pé htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haû Woi-nyí gi, san za taí ri. ²Haû sù é mhoqshit hkyô pé gi, gegùn labyoq kut é byù-mhaú pé chyáng mai lo é nghut lhê; haú bâng é myit nhiklhum gi, nyhê nhe tô é shamtoq èq nyhê man tô é su dut byuq bê nghut ri. ³Haú bang gi, hâng lûm é hkyô lé hkûm tang é hkyô lé le, haû lumjíng luí tengmán hkyô lé sê é bang mai jeju hkyon mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri. ⁴Garai Gasang hpan tô é lhunglháng gi, ge é chyat nghut ri; Garai Gasâng é mungdang eq kyûdûng é

dang đông haú pé lé lhoq sân-yúng nyi é nghut é yanmai, ⁵jeju hkya-on luí hap yu é nghut le gi, haí jung lé lhang he-ngik pyám rà hkyô a bò nghut ri.

⁶Haú gumang wui lé, nang haú hkyô pé lhoq pun lhoq kyíng é nghut le gi, nang gi, haú nang cháng bê ge é mhoqshit hkyô eq lumjíng hkyô mà é teng-mán hkyô má, kô myhâng sủ nang nghut rà htoq agó, Hkrisduq Yesuq é ge é hpungmú wùn sủ le dut rà nghut lhê.

⁷Garai a bo é myit htoq mhô-myi dang eq hpô-myhí mâng pê é mhô-myi dang-sôm lé koi pyám luí, tarâ hkunggâ é hkyô má yhumsing gùng lé lhoq kúng yù aq. ⁸Hkâsu mù gâ le, gungsho lé lhoq kúng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹Haú gi, banshoq hap yù gíng é, lumjíng é mungdang nghut lhê. ¹⁰Haú mù luí, xângzo byù banshoq bâng é hkyi yù Sủ nghut é, je riyhang, lumjíng bâng é hkyi yù Sủ nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹Haú pé lé, hkunmó hkyô luí mhoqshit byí nyi aq. ¹²Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq. ¹³Náng chyáng ngò jé lé é buinyi jé shoq, nang gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴Nang gi, hpúng suwún wui náng é ahtoq má loq ke byí é hkùn, myiqhtoi dang đông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵Haú hkyô pé lé, myit zìng zuq luí zui saí nyi aq; nang kô myhang lo é hkyô lé, yuq hkangmó byu-myàng kó sháng gaq, náng gùng banshoq haú pé má ap nóng nyi aq. ¹⁶Náng é asak duí hkyô má le, nang mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, nang haú su kut é nghut jáng, náng é asak lé le, náng chyáng mai gyô yu é bang lé le, nang wó hkyi yù rà nghut lhê.

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

5 Asak ko sủ lé dang htân a tân e za, yhumsing é íwa lé su, yhang lé lhoq pun lhoq kying aq. Zorâm wui lé gi, gumang wui lé su, ²asak kô é myiwe wui lé gi, ínû pé lé su zùm yap luí, zomyi wui lé gi, nhammó wui lé su sansêng é i-myt banshoq èq zùm yap nyi aq.

³Gè gè yhang garúm rà dut é chuimó myhí pé lé, hkunggâ nyi keq. ⁴Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, ínû íwa eq íchyí íwchoí pé lé jeju taú é đông, yhangmoq é lumjíng hkyô lé, zui saí é má lhoq mhán nhâng rà lé hí mhoq yù ra rà nghut lhê; hkâsu mù gâ le, haú gi, Garai Gasang ô nau é hkyô nghut ri. ⁵Haú lùm rà ó yuq le a wó mù, gè gè yhang rà tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm rà hkyô lé dúng nyi ri. ⁶Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. ⁷Yhangmoq lé, ó yuq èq le mara a hùn kó sháng gaq, haú hkyô pé lé le mhoqshit byí nyi aq. ⁸Rayuq yuq, yhâng é buinùm ji-myi wui lé a baú é htoq agó, je luí yhumsing é ikun byù lé a baú é nghut le gi, haú lumjíng hkyô lé he-ngik

pyám bê nghut luí, a lumjǐng su htoq má je ashop é sũ dut bê nghut ri.

⁹Hkyuq xê zàn byǐng bê é chuimó myhí za a nghut jǎng, chuimó jihpán má wó kat rǎ a nghut; hau htoq agó, yhang gi, yuqgè rayuq za wó wú é sũ; ¹⁰zoshǎng wuì lé hku baú é sũ, bíng lé rago dat hkulum é sũ, sǎn-yǐng bê bang é hkyí lé chi byí é sũ, wuǐhke huí tō é bang lé garúm luí, ge é muzó junghkang jungmó má yhumsǐng gǔng yhang ap nóng nyi ri ga, yhang kut é ge é muzó má myǐng hũ é sũ le, nghut rǎ lhê.

¹¹Asak tiq é chuimó myhí pé lé, jihpán haú má hkâkat. Hkâsu mù gǎ le, gungsho ô nau é hkyo èq Hkrisduq chyǎng yhangmoq ap nóng tō é hkyô lé ung pyâm é hkũn, yhangmoq gi, myi ló nau kó rǎ nghut lhê. ¹²Haú mù, yhangmoq gi, sǎng-hi lé yhangmoq tō tō é danggidiq lé lhoq hpyoq pyám kô é yanmai, tarǎ darǎ é hui zo kó rǎ nghut lhê. ¹³Hau htoq agó, yhangmoq gi, rayhũm htǎng rayhũm chǎng wang wún kômù, lagôn mǎn byuq kó rǎ nghut lhê. Lagôn é bang za dut kó rǎ a nghut, lumù gansang é bang eq yhangmoq taí a ge é pé lé taí kômù, yhumsǐng eq a sèng é mù má chǎng wang nyo wún é bang le, dut kó rǎ nghut lhê. ¹⁴Haú mù luí, gyè pé mai lumù gansǎng dang a wó taí pyám kó shǎng gaq, asak tiq é chuimó myhí pé gi, myi ló mù, zoshǎng hkũ luí, yhangmoq é ikun lé gôn lajang rǎ matú, ngò, yhangmoq lé hpaqchyí byí kat lhê. ¹⁵Hkâsu mù gǎ le, ra-am gi, lhing taú ló kôluí, Tsadán é htǎng chǎng nyi lugù nghut bekô nghut ri.

¹⁶Lumjǐng é myiwe rayuq yuq gi, yhǎng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yú

ra rǎ nghut lhê; haú hkũn sheq, noqkuq hpúng gi, gè gè yhang rǎ tō é chuimó myhí pé lé wó garúm rǎ nghut lhê.

¹⁷Haú noqkuq hpúng lé rago za shuí ũ é hpúng suwún wuí gi, akyũ í tú hkam yù gǐng lhê; haú mungdang hko é hkyô eq mhoqshit é hkyô má shikut é suwún wuí gi, je riyhang hkam yù gǐng lhê. ¹⁸Hkâsu mù gǎ le, “Guq nǎng nyi é no lé, nhuttsung hkâ-tsǔng to byi.”^f ga le, “Mũ zui sũ gi, yhǎng é zuihpau wó yú gǐng lhê.”^g ga le, Chyúmdang má taí tō ri. ¹⁹Hpúng suwún rayuq lé mara hun é hkyô lé, í yuq sum yuq mai saksé hkãm e za a nghut le gi, hkǎlhom yù. ²⁰Nghut kôlhǎng, lhoq pun lhoq kyǐng é hkyô lé góbang wó yú kó shǎng gaq, mara kut shut é bang lé, shiwa byu pé hí má tân mhoqshit aq.

²¹Pyǐng kat é dang shi pé lé, gamhkuì myit a bo e za chǎng nyi rǎ eq, myoq-dong hkyǐn luí haí le a kut rǎ matú, Garai Gasang eq Hkrisduq Yesuq é hí má le, hkyǐn yù huí é maumang lagyô pé é hí má le, ngò, nang lé pyǐng kat lhê.

²²Ó yuq é ahtoq má le loq ke^{††} byi rǎ lé hkǎhǎn; góbang é mara hkaũ má le hkâbo lòm. Yhumsǐng yhang yhumsǐng sǎn-yǐng shoq kut nyi aq.

²³Nǎng é wamdau ra luí, anum num no lò lò dut é yanmai, nǎng gi, wuì za shuq é hkyô lé nô pyám luí, tsibyiq wing le ratsuí tsuí shuq byi aq.

²⁴Byù ra-ǎm é mara pé gi, de de dut é nghut mù luí, tarǎ jéyǎng é jang má hí ló jé ri; ra-ǎm é mara kúm gi, hau é htǎng má chǎng byông htoq lo ri. ²⁵Haú eq rajung za, ge é muzó pé gi, de de nghut nyi luí, haú su de de a nghut é pé lé le, wó zaú to rǎ a nghut.

6 Jùn dut é wòlai hkaũ má nyi é lhunglhǎng bang gi, yhangmoq é

^{††}5:22 Haú hkun lhê bang gi, hpúng suwún kut rǎ matú hkyin to bê bang lé, loq ke kyúdung byí é nghut lhê.

yhumsing wui lé gyai yhang hkungga gíng lhê nghû, myit yù râ dut lhê; haú hkûn sheq, Garai Gasang é mying eq nga-nhung é mhoqshit hkyô gi, lumù gansang é a hui râ nghut lhê. ²Lumjíng é yhumsing wui é jùn gi, gumang wui nghut é yanmai, yhangmoq lé a wú myuq é za, yhangmoq dojaú luí akyú myang hkâm zô é bang gi, lumjíng bang eq chytidap gíng é bang nghut é yanmai, yhangmoq lé je ge é dōng dojaú râ lhê. Shí hkyô pé lé, nang gi, yhangmoq lé mhoq byí nyi é eq lhoq pun lhoq kying byí nyi aq.

Ngùn Lé Chytidap É Hkyô

³Rayuq yuq gi, shut é lumjíng hkyô lé mhoqshit luí, nga-nhung é Yhumsing Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huí é nghut jáng, ⁴haú yuq gi, nghutbûn é sù eq haí lé le a sê gyô é sù nghut ri. Yhang gi, htuq htíng lhúm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haú mai, manon é hkyô, byoq lhum byoq cheq é hkyô, lumù gansang é hkyô, agè ashop é dōng myit ngam pyám é hkyô eq, ⁵haú tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bāng é gyoro má, byin a huí é hkyô pé lé, lhoq htoq kat ri.

⁶Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri. ⁷Hkâsu mù gâ le, nga-nhung gi, mingkan htoq má haí jung le a yu wang lé, haú mai le haí wó yu htoq ló râ a nghut. ⁸Haú mù luí, nga-nhung gi, wutbu wutmè eq zoshuq wó é nghut jáng, hau èq nhik dik nyi sháng. ⁹Wó naú sùt nau é byu pé gi, gunlauí hkyô eq tuihkyó má le, haú byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo

eq myit nò nhāng nau é hkyô má le, byit gyó wāng kó râ nghut lhê. ¹⁰Hkâsu mù gâ le, ngùn lé chytidap é hkyô gi, agè ashop hkyô ajung jūng é apūn awang nghut nyi ri. Byù ra-am gi, ngùn lé ô nau luí, haú lumjíng hkyô mai sô nghoq ló mù, yhumsing gūng lé yhumsing, haú yón kuq hkyo èq htaú rot pyám bekò nghut ri.

Timohti Lé Pying Kat É Dang

¹¹Nghut kôlhang, Garai Gasang é byù nang gi, haú pé banshoq lé koi pyám luí, dīngmán hkyô, tarâ hkungga hkyô, lumjíng hkyô, chytidap hkyô, hkam jan hkyô eq nú-nhām é hkyô pé lé chāng hkat nyi aq. ¹²Lumjíng hkyô eq sēng é ge é majan le zān nyi aq. Hap yù lumjíng bê ga, saksé myo myô pê é hí má, ge é dōng nang yín yu é hkûn, wut yu é hui luí wó é ahtum abyuq é asak lé, zui zing nyi aq. ¹³Haú lhunglhang lé asak byí é Garai Gasang é hí má le, Pontu Pilat chyáng saksé hkâm nyi é hkûn, ge é dōng yín yu é Hkrisduq Yesuq é hí má le, ngò, nang lé pying kat lhê: ¹⁴Yhāng é ahkyíng yam-yoq jé jáng, Garai Gasang htoq shit nhāng râ nghut é sù, nga-nhung é Yhumsing Yesuq Hkrisduq htoq shit é buinyi jé shoq, ¹⁵nang gi, agot a-u é hkyô eq mara hūn râ hkyô a bo e za, hkunmó shí lé chāng nyi aq. Garai Gasang gi, hkungsó wó sù, Yhang za up sù, hkohkam pé é Hkohkām, yhumsing pé é Yhumsing, ¹⁶Yhang za ahtum abyuq dui nyi sù, a ge chyāng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhāng chyāng ahtum abyuq ru joq nyi sháng gaq ô! Amen.

¹⁷Shí ipyat má wó sùt é bang gi, a gumrōng râ eq a gīng é sutzè má yhangmoq é myit myoqbyù hkyô a tô e za, nga-nhung nguínón yuqyo nyi râ matú jungkang jungmó lé agùn agó byí é sù, Garai Gasang chyāng za, yhangmoq myit

myoqbyu nyi râ matú, hkunmó hkyó aq.
¹⁸Ge é hkyô kut luí, ge é muzó má wó sùt nyi mù, a chum e za, gam chûng nau é myit bò râ matú, yhangmoq lé hkunmó hkyó aq. ¹⁹Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haú le wó zuí zing to kó râ nghut lhê.

²⁰Timohti ê, nang lé ap to bê hkyô lé, zúng nyi aq. Tarâ a hkunggâ é po-ming ming bâng èq hpaqchyî nghut lhê ga myhîng shut é htuoq hting lhum lhum kut é hkyô lé, koi pyám aq. ²¹Byù ra-am gi, haú lé hpaqchyî nghut lhê ga yín yú kôluí, haú lumjîng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyi sháng gaq ô.

TIMOHTI

Chyáng Htang Dàm Hun Kat é Laiká (2 Timothy)

1 Hkrisduq Yesuq chyáng mã é asak byi râ gâ é danggidiq eq rajung za, Garai Gasang ô nau é đông, Hkrisduq Yesuq é lagyo nghut sũ, ngò, Poluq gi, ngò chyitdap é ngá zo Timohti lé, dang kyô kat lhê.

²Haũ Îwa Garai Gasang eq nga-nhúng é Yhumsing Hkrisduq Yesuq chyáng mã é jeju eq shogyo nhikmyin hkyô, ngu-íngón hkyô gi, ru joq nyí sháng gaq ô!

Lumluq Râ Matú Myit Wum Byí É Hkyô

³Ngò gi, ngá é kyûdung dang má, nyí, myín, abyit alan nang lé bûn nyí uchyang, sân-yúng é i-myt mai, ngá é íchý íwâ pé dojaú é su, ngò dojaú nyí é Garai Gasang lé, jeju hkya-ôn nyi lhê.

⁴Ngò gi, ngò má gabú hkyô byíng jup sháng gaq nghũ, náng é ngaubyi lé myit bûn nyi mù, nang lé gyai yhang myàng nau nyi ri. ⁵Ngò gi, nang é gyíng é lumjíng myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghũ, hkyak myit lum nyi lhê. ⁶Hau é yanmai, ngò loq ke byí é đông, nàng mã bo tô é Garai Gasang é chyunguq lé, gyúng nhang nyi râ matú, nang lé ngò lhoq pûn kat lhê. ⁷Hkâsu mù gâ le, Garai Gasang gi, gyuq sê é myit nga-nhúng lé a kat byí e za, a-tsam bo é myit, chyitdap sê é myit, yhumsing gùng lé dat hking é myit sheq kat byí tô é ru nghut lhê.

⁸Haũ mù luí, nàng gi, nga-nhúng é Yhumsing eq séng luí saksé hkâm é hkyô mã le, Yhâng é yanmai htóng byú dut to sũ ngá é hkyô mã le, hoq myit a bo é za, Garai Gasang é wum-o mai, haũ

gabú danglu é matú, ngò eq rahá wuínke jamjau chòm hui goq. ⁹Garai Gasang gi, nga-nhúng zui saí é muzó đông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhúng lé, hkyi yù luí chyoiyúng é asak ùi hkyô má ji yù bê nghut ri. Ahkyíng nghu é lháng a joq shi mai yhang, jeju haũ gi, Hkrisduq Yesuq mã nga-nhúng lé byi to gù nghut bê. ¹⁰Nghut kôlháng, nga-nhúng é hkyi yù Sũ, Hkrisduq Yesuq pò htoq é đông, ahkuí, haũ lé lhoq htoq shit bê nghut ri. Yhang gi, shí-nò hkyô lé lhoq htên pyám luí, haũ gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri.

¹¹Ngò gi, gabú danglu é matú hko kyo sũ, lagyo eq mhoqshit sũ đông, hkyin tô é hui sũ nghut lhê. ¹²Hau é yanmai, ngò gi, wuínke jamjau shí lé huí nyi é nghut lhê. Nghut kôlháng, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haũ buinyi jé shoq, Yhang wó zúng râ nghut lhê nghũ hkyak myit lum tô é yanmai, ngò a hoq.

¹³Nàng gi, ngá chyáng mai wó gyô yu é tengmán dang pé lé, Hkrisduq Yesuq mã, lumjíng myit eq chyitdap myit mai alik kut yu nyi aq. ¹⁴Nang lé ap byí to bê, haũ ge é mungdang lé, nga-nhúng chyáng bo tô é Chyoiyúng Woi-nyí é wum-o mai zúng nyí aq.

¹⁵Asia mau mã é bang yuq hkingmó gi, ngo lé pyâm to kô é hkyô lé, nàng sê lhê; haũ bang mã, Hpugelu eq Heramoge nhik le bo akô nghut ri.

¹⁶Haũ Yhumsing gi, Onesihpurú é yhumbyù lé shogyo nhikmyín é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e za, ¹⁷yhang, Romaq myuq mã jé nyi é hkûn, ngo lé myang hui shoq, ho shikut é sũ nghut ri. ¹⁸Haũ Yhumsing gi, haũ buinyi má, yhang lé haũ Yhum-

sing é shogyo nhikmyin hkyô byi sháng gaq! Ehpesu myuq má, yhang ngo lé hkâm-yhó garúm bê nghut é gi, nàng rago yhang sê lhê.

2 Haû mù, ngá zo ê, nàng gi, Hkrisduq Yesuq mâ é jeju hkaû má, wúm bo nyi aq. ²Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. ³Hkrisduq Yesuq é ge é gyezo rayuq su, wúhke hkyô lé chôm jan nyi sháng. ⁴Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵Haû eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶Yo-mû zû shikut é sù gi, kyôshi lé sânghi myang hkam yù râ sù nghut lhê. ⁷Haû Yhumsing gi, shí pé banshoq lé wó sê é nyan nang lé byi râ nghut é yanmai, ngò tai é hkyô pé lé myit wú aq;

⁸Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê. ⁹Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. ¹⁰Haû mù luí, ngò gi, Hkrisduq Yesuq chyáng mâ é hkyi yù hkyô eq ah-tum abyuq é hpungwup shingkang lé wó yù kó sháng gaq nghú, haû hkyin yù hui bâng é matú, jung hkangmó lé hkam jân nyi lhê.

¹¹A-ô mâ é dang gi, lungíng é dang nghut lhê:

Nga-nhúng gi, Yhang eq rahá shî bê nghut jáng, Yhang eq rahá duì râ nghut lhê.

¹²Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

¹³Nga-nhúng gi, lhumzui myit a bò kôlhang, Yhang gi, lhumzui nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴Nàng gi, yhangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê. ¹⁵Nàng gi, haû tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq. ¹⁶Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê. ¹⁷Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí, ¹⁸haû tengmán hkyô mai sô ngoq ló byuq akô. Yhangnhik gi, haû dum dui toq hkyô dut lai bê ga tai kômù, ra-âm é lumjúng hkyô lé lhoq htên pyâm byi akô nghut ri. ¹⁹Nghut kôlhang, “Haû Yhumsing gi, Yhang eq séng é bang lé sê lhê.”^h ga luí le, “Haû Yhumsing é myìng lé yín yu é bang yuq hkangmó gi, agè ashop hkyô mai lhing tau ra kó râ nghut lhê.” ga luí le, dizik haû htung tap tô é, Garai Gasâng é ging títng é apùn awang gi, gíng nyi ri.

²⁰ Yhûm mó ralhûm má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyô é matú, ra-am gi, aróng hkyô é matú a nghut. ²¹ Haú mù luí, haú pé mai yhumsing gùng lé lhoq sansêng pyâm é sù gi, chyoiyúng luí, haú Yhumsing chung jai gíng é sù, ge é muzô hkangmó kut rà hen tô é sù nghut é yanmai, aróng hkyô é matú chungzè dut rà nghut lhê.

²² Zoram é agè ashop é ô naù hkyô lé koi pyám mù, haú sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, nguingón hkyô pé lé, châng hkat nyí aq. ²³ Go é eq ngok é đông dang jet jet lûm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haú hkyô lé koi pyám aq. ²⁴ Haú Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byí é, wó mhoqshit é, a dat nhik-yô é su dut ra rà nghut lhê. ²⁵ Yhang gi, yhang lé htuq htíng é bang lé, nú-nhâm é đông mhoqshit byi ra rà nghut lhê; haú hkûn, Garai Gasang gi, yhangmoq lé myit lîng hkyô byi mù, tengmán hkyô lé sê gyo nhâng luí, ²⁶ yhangmoq gi, bûn gyíng lò mù, nat Tsadán ô nau é hkyô lé kut byi rà matú, chyup yú huí é, nat Tsadán é tuihkyó mai wó hpang lut lò kó abe ngû, myit lum kat lhê.

Jihtûm Buinyì Pé Má Dut Lò Râ Hkyô

3 Jihtûm buinyì pé má, wúihkê é ahkýing pé joq lò rà nghut é lé, nàng matsing to aq. ² Hkâsu mù gà le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé taí hpoi é bang, înu îwa nyo é lé a gyô é bang, jeju a dat bûn é bang, a chyoiyúng é bang, ³ chyitdap myit a bo é bang, mara hkyut byi a sê é bang, lumù

gansang é bang, yhumsing gùng lé hkâng a sê é bang, byuwuí pé, ge é hkyô lé a ngui é bang, ⁴ haq gumlaù é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut rà malaí ngón kún hkyô lé za chyitdap é bang, dut bùm kó rà nghut lhê. ⁵ Yhangmoq gi, tará hkunggâ é bang su dut kôlhâng, haú pé é a-tsam lé he-ngik pyâm akô nghut ri; haú sù é bang lé, nàng koi pyâm nyí aq.

⁶ Yhangmoq gi, hpaqchyí da mù yhûm pé má wàng kôluí, mara wòlai lé wun é, agè ashop é ô naù hkyô ajung jung má sô nghoq ló byuq é, ⁷ hkâ-nhâm le mhoq yu nyí kôlhâng, haú tengmán hkyô lé a sê gyô é, myit nyhôm é myiwe wui lé wó lâng nghoq yu é bang nghut akô. ⁸ Yanne eq Yambre nhik gi, Mosheq lé htuq htíng é su, haú bang le, haú tengmán hkyô lé htuq htíng akô nghut ri; yhangmoq gi, myit é hkyô htên byuq kôluí, haú lumjíng hkyô má lhum a zú é bang nghut akô. ⁹ Nghut kôlhâng, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô rà nghut mù, haú mai lai luí yhangmoq wó kut jat kó rà a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjíng hkyô, myit hîng hkyô, chyitdap hkyô, hkam jan hkyô, ¹¹ zing-ri huí é hkyô eq wúihke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsing gi, haú pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaú kut é bang gi, mhaú zô nyi bum é eq mhaú zô é huí nyi bùm kôluí, a ge é hkyô shut je riyhang myô jat lò kô é hkûn, ¹³ Hkrisduq Yesuq

má tarâ hkunggâ é asak đông nyiyap nau é bang yuq hkanmó gi, zing-rí é hui kó rá nghut lhê. ¹⁴ Nghut kôlhang, nang gi, ô pê chyáng mai nang mhoq yû bê hkyô lé le, Hkrisduq Yesuq lé lumjínj áng hkyi yu é hui shoq, ¹⁵ nang lé hpaqchyî byéng-yá wó byí é chyoiyúng Chyúm-dang pé lé, zoshâng hkûn mai nang sê to bê hkyô lé le, nang sê é yanmai, nang mhoq yu to bê hkyô eq hkyak lumjínj to bê hkyô má, xoq kut nyí aq. ¹⁶ Chyúm-dang hkanmó gi, Garai Gasâng é soq hâng tô é pé chyat nghut é yanmai, mhoqshít é hkyô, tân mhoq é hkyô, lhoq jo byí é hkyô eq dingmán hkyô lé tân shit byí é hkyô pê é matú, akyú bo ri; ¹⁷ haú mù luí, haú Garai Gasâng é byù gi, ge é muzó jizó hkanmó lé kut rá matú, wó gumjup rá nghut lhê.

4 Garai Gasâng é hí má le, dui nyi bang eq shi byuq bang lé tarâ dara rá sù Hkrisduq Yesuq é hí má le, Yhang htoq shit rá hkyô eq Yhâng mingdán é yanmai, ngò, nang lé pying kat é gi, ² haú mungdang lé hko kyo aq; ahkyíng yamyoq ang kôlhang, a ang kôlhang, rì rì hen to aq; myit gyái hing é eq rago za mhoqshít é đông, lhoq jo byi, tân mhoqshít é eq myit wum byi kut nyí aq. ³ Hkâsu mù gâ le, byu pé gi, tengmán mhoqshít hkyô lé a kâm gyô é ahkyíng jé mù, yhangmoq ô naù yut yut é hkyô cháng luí, yhangmoq é no yo bui nau é nohkyap gyô nau é hkyô taí nhâng rá matú, sará pé rajùm rayò lé lhinghkyuq má lhoq tsing to kó rá nghut lhê. ⁴ Yhangmoq gi, haú tengmán hkyô mai yhangmoq é nohkyap lé lhing pyám mù, myit htoq mhô-myi dang shut lhing ló kó rá nghut lhê. ⁵ Nghut kôlhang, nang gi, dut tô é hkyô banshoq má rago sidiq nyi aq; wuñke jamjau hkyô lé hkam jân nyi aq; gabú danglù hko kyô é muzó kut nyí aq; nang é hpungmû banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhum đông hut pyám é huí

nyi gù nghut mù luí, mingkan mai ngò htoq ló rá ahkyíng jé bê nghut ri. ⁷ Ngò gi, haú ge é majan le zan bê; din shingjóng lhúm é hkyô le bàn bê; haú lumjínj hkyô le chang bê nghut lhê. ⁸ Ahkuí, haú tengmán é tarâ Agyi nghut sù, Yhumsíng gi, haú buinyi má ngo lé ap byi rá nghut é, haú dingmán hkyô é janmaú lé, ngá matú tô to byi bê nghut lhê. Haú gi, ngá é matú za a nghut, Yhang htoq shit rá hkyô lé myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nang gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shí lé chyitdap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nang eq rahá shuí lé lò aq; yhang gi, ngá é hpungmû má wó htuqbáng rá sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nang gi, lé lo é hkûn, Troa myuq má, Karpu chyáng ngò tô tô é buhíng haú lé le, ngá é chyúmding lé le, je luí eq haú shokuq chyúmding pé lé le, yù lé lô byi aq.

¹⁴ Haú ningdup hpó Alesander gi, ngo lé a ge é myo myo kut bê nghut ri; haú Yhumsíng gi, yhang kut é eq rajung za, yhang lé dam byi rá nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nang le, yhang lé sidiq ra rá nghut lhê.

¹⁶ Sâng-hí dàm, ngá gúng lé ngò taí hung é hkûn, yuq hkanmó gi, ngá é hkyam shut a bo lom e za, ngo lé pyám tô akô. Nghut kôlhang, haú gi, yhangmoq ahtoq má mara a dut sháng gaq. ¹⁷ Nghut kôlhang, ngò đông mai danglù haú lé rago wó hko pyo kat luí, tûngbaù pé banshoq bang wó gyo kó sháng gaq ga, haú Yhumsíng gi, ngá hkyam shut

yap to mù, ngo lé wum-o byî é nghut lhê. Hau htoq agó, ngò gi, hkanghkyî é nhut mai le hkyi yù hui bê nghut lhê.^{‡‡}
¹⁸ Haû Yhumsîng gi, ngo lé agè ashop é hkyô hkangmó mai hkyi yù luî, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng chyáng ahtum abyuq ru joq nyî sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesih-puru yhumbyù wuî lé le, bo shi-kyám byi

laq.²⁰ Erastu gi, Korinhtuq myuq má nyi gyó to bê; Trohpimu lé gi, nò luî, Melitu wà mó má ngò nyhi pyâm to bê nghut lhê.²¹ Nàng gi, wó dut é í, gyoqmyò a wàng shi lé, shî má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuî banshoq bang gi, nàng lé shi-kyâm kat akô nghut ri.

²² Haû Yhumsîng gi, náng é woi-nyî eq rahá nghut nyî sháng gaq. Jeju gi, nung-moq chyáng ru joq nyî sháng gaq ô.

^{‡‡}4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.

TITUQ

Chyáng Hun Kat é Laiká

(Titus)

1 Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjíng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ²Haù ahtum abyuq é asak hkyô lé, mhaù a sê é Garai Gasang gi, ahkýing nghu é lháng a joq shi mai danggidíq byi to mù, Yhang masat tô é ahkýing yam-yoq má sheq mungdang hko kyô é đông lhoq htoq shit luí, ³nga-nhûng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴Nga-nhúng chòm lumjíng é hkyô đông mai, ngá zo síng nghut é Tituq lé laiká kê kat lhê. Íwa Garai Gasang eq nga-nhûng é hkyi yù Sù Hkrisduq Yesuq chyáng mã é jeju eq nguóngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê. ⁶Haù hpúng suwún kut râ sù gi, mara hún râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hún râ jowò a joq é lumjíng bang nghut é sù, nghut râ lhê. ⁷Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hún râ hkyô a bo é sù nghut râ lhê; yhang gi,

yhumsing myit a cháng; i-myyit a lúm tot; ìhpê é jùn a dut; mabyoq jishùm a kut; a sansêng é ngùn hîng lé a myit ô nau é sù nghut râ lhê. ⁸Yhang gi, byù bíng lé dat hkulùm sù; ge é hkyô lé chyitdap sù; nùm é sù, dingmán sù; chyoiyúng sù; yhumsing gùng lé wó hkang é sù; ⁹mhoq yu to bê hkyô eq rajung za, lumjíng é mungdang lé ging ging zui zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byi é eq, haù eq shai lhum é bang lé, shut é hkyô wó tûn shit râ nghut lhê.

¹⁰Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹²Kreti byù mã é myiqhtoi rayuq lháng gi, “Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô.” ga taí wú ri. ¹³Saksé shî gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴haù lumjíng hkyô má ging tîng nyi kó sháng gaq, yhangmoq lé htân htân tân mhoqshit byi nyi aq. ¹⁵Sân-yúng bâng é matú gi, azíng zê lunglhang sân-yúng ri; a sân-yúng bang eq a lumjíng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶Yhangmoq gi, Garai Gasang lé sê lhê ga kôlhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achaq achyut

é bang, jìno a gyô é bang eq, ge é mù joq mijoq eq a htuk é bang nghut akò nghut ri.

Hká Đông Nyì Yap Râ Hkyô

2 Nàng kúm gi, tengmán é mhoqshit hkyô eq wuí é đông mhoqshit nyì rà dut lhê. ²Hpô-mâng pé lé gi, i-myyit shiràs sé rà hkyô; hkungga gíng é byù dut rà hkyô; yhumsing gùng lé wó hkàng rà hkyô eq, lumjíng myit gíng rà, chyitdap myit gíng rà, hkam jan hkyô gíng nyì rà hkyô pé lé, mhoqshit byì nyì aq.

³Haù eq rajung za, hpô-myí mâng pé lé gi, hkungga gíng é a-kyang bo nyì rà hkyô; lumù gansâng dang a taí rà hkyô; íhpê é jùn a dut rà hkyô eq ge é hkyô lé za dat mhoqshit é bang wó dut rà matú mhoqshit byì aq. ⁴Haù hkùn, Garai Gasâng é mungdang gi, lumu pyám é a hui sháng gaq, yhangmoq gi, hpô-myí zô pé lé, yhumsing yhanglâng eq, yhangzô pé lé chyitdap é, ⁵yhumsing gùng lé wó hkang é, siri bo é, ikun lé dat wùn waq é, ge é myit wó tún shit é, yhumsing é yhanglâng uphkang é đông dat châng é bang dut rà matú, ge mhoqshit é hpô-myí mâng pé dut rà nghut lhê.

⁶Haù eq rajung za, zorâm wuí lé le, yhumsing gùng lé wó hkang nyì kó sháng gaq, lhoq pun lhoq kyíng nyì aq. ⁷Hkyô hkat hkangmó má, yhangmoq lé nàng yhang ge é muzó alik tún shit nyì aq. ⁸Nàng lé lhom htuq htíng é bang gi, nga-nhúng é hkyô má mara a wó hún kômù hoq hpù nyì kó sháng gaq, nàng mhoqshit é hkyô má, taí pyám rà hkyô a bò shoq, têng é, siri bo é, eq sansêng é dang taí nyì aq.

⁹⁻¹⁰Nga-nhúng é hkyi yù Sù Garai Gasang eq sêng é mhoqshit é hkyô pé hkat hkangmó yúng nyì sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyì mù, yhumsing wui é i-myyit ngón shoq dang

a tu rà; a hkau rà; wó lum tô é bang dut rà hkyô pé lé, mhoqshit byì aq.

¹¹Hkâsu mù gà le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shingkan eq htoq shit rà hkyô lé lánng nyì é hkùn, ¹²tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkàng rà, dingmán rà eq, tarâ hkunggâ é hkyô wó cháng shoq, ¹³nga-nhúng lé mhoqshit byì rà matú, Garai Gasâng jeju chyunghuq gi, htoq shit bê nghut mù luí, byù lunglhang bang lé hkyi yù hkyô hpóng byì bê nghut ri. ¹⁴Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut rà matú wó lhoq sân-yúng yù shoq ga, nga-nhúng é matú Yhânggùng lé ap byì pyám bê nghut ri.

¹⁵Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyì aq; myit wum byì é eq, tân mhoqshit é hkyô lé le kut nyì aq.

Ge É Muzo Zui Saí Râ Hkyô

3 Nàng gi, lumjíng bang lé, zau wuí eq ahko ahkáng wó bâng é a-ô má nyì mù, jìno gyô nyì rà eq, hkâ-nhám le ge é muzó hkangmó zui saí rà lé hen nyì uchyang, ²ó yuq lé le lù a mù rà; ngu-ingón hkyô hô rà; myit tê byì é hkyô tún shit rà eq; byù banshoq lé nùm é i-myyit tún shit nyì kó sháng gaq, lhoq pun lhoq kyíng nyì aq.

³Hkâsu mù gà le, nga-nhúng le, hí hpyang gi, byù ngok pé, jìno a gyô é bang, mhaù zo huí é bang eq, gungsho ô nau é hkyô eq mingkan ngón hkyô ajung jùng èq jùn kut é hui bang, dut mù luí, agè ashop é eq manon lhum é hkyô

kut nyí mù, rayuq eq rayuq a jú lhùm é dōng nyi laí lò bê nghut lhê. ⁴Nghut kōlhang, nga-nhúng é hkyi yù Sû Garai Gasāng jeju eq chyitdap myit htoq shit é hkùn, ⁵nga-nhúng yhang kut é ding-mán é muzó èq a nghut é za, Yhāng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri. ⁶Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byí é Chyoiyúng Woi-nyí èq nga-nhúng lé chí san chí sēng pyám byi mù, woi-nyí má dum hku é hui nhāng luí, myit sik htaí byí é hkyô dōng nga-nhúng lé hkyi yù bê nghut ri. ⁷Haú mù luí, Yhāng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. ⁸Dang shí pé gi, lumjǐng é dang nghut lhê mù luí, Garai Gasang lé lumjǐng é bang gi, ge é muzó lé myit lòm luí rago zui saí nyi kó sháng gaq, háu hkyô pé lé nāng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhāng bāng é matú ge é eq, akyû bo é hkyô nghut lhê.

⁹Nghut kōlhang, ana apâ ga luí taí htǐng lhùm é hkyô lé le; byùxik labaú gôn é hkyô lé le; nyo byoq lhùm é hkyô

lé le; jep é tarâ eq séng mù byoq lhùm é hkyô pé lé le koi pyâm nyi aq, hkâsu mù gâ le, háu pé gi, akyû a bo é hkyô eq chūng a ge é hkyô pé nghut ri. ¹⁰Gam hkuí é myit bò sù lé gi, í dām mhoqshit wú mù, a wó jáng, yhang lé baú tô pyám aq. ¹¹Haú su kut sù gi, yhang kut é muzó má mara wó to bê nghut mù, yhumsing gùng lé yhumsing mara hun é sù nghut é lé, nāng sê to lo aq.

Je Htāng Má Pying É Dang

¹²Ngò gi, Nikopoli wà má gyoqmyò lhoq lai râ dōng myit hpyit tô é yanmai, Artima lé, a nghut jáng Tuhkiku lé, nāng chyáng nhang kat byi râ, jé eq yhang, nāng gi, shikut luí, háu wà shut ngá chyáng lé lô aq. ¹³Nāng gi, tarâ sê é sù Zena eq Apolo nhik lé, yhangnhik é hkyowuì má râ é hkyô banshoq, shikut luí garúm kat aq. ¹⁴Nga-nhúng é byu pé gi, nyí wuì râ é hkyô lé wó htuq é eq ashi zuí é bang dut kó sháng gaq, ge é muzó lé myit lòm mù zui saí nyi râ hkyô lé mhoq yû râ lhê.

¹⁵Ngò eq rahá nyi é bang yuq hkanmó gi, nang lé shi-kyâm kat akô. Lumjǐng hkyô má ngamoq lé chyitdap é bang lé, bo shi-kyám byi aq.

Garai é jeju gi, nungmoq eq rahá joq nyi sháng gaq ô!

HPILEMON

Chyáng Hun Kat é Laiká

(Philemon)

1 Hpilemon ê, Hkrisduq Yesuq é yanmai htóng lúng nyí sù, ngò Poluq eq nga-nhùng é gumang Timohti nhik gi, ngá-nhik chyitdap é mù wùn luzúm nghut é sù nang lé le, ²ngá-nhik é gu-nhá Ahpiaq lé le, náng é yhùm má huí lhum lhum kut é noqkuq hpúng lé le, dang kyô kat lhê.

³Nga-nhùng é Îwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyí sháng gaq ô!

Jeju Hkya-ôn É Hkyô Eq Kyúdung Dang

⁴⁻⁵Ngò gi, Yhumsing Yesuq lé nàng lumjing é hkyô lé le, sân-yúng bang ban-shoq lé nàng chyitdap é hkyô lé le, wó gyô é yanmai, ngò kyúdung é hkùn, nang lé myit bün nyí luí, hkâ-nhám le ngá é Garai Gasang lé jeju hkya-ôn nyí lhê. ⁶Ngò gi, Hkrisduq é matú nga-nhùng chyáng bo tô é ge é mù lhumjup lé sê gyô é hkyô lé, nàng wó yù sháng gaq nghú, náng é lumjing hkyô lé, nàng saksé hkâm é má akyú htoq râ matú, kyúdung byí nyí lhê. ⁷Náng é chyitdap myit gi, ngo lé gyai gabú nhang é eq wum-o wó yú nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yú bekô nghut ri.

Onesimu É Matú Tôngbán Byí É Hkyô

⁸Haú su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haú wó kut nhang lhê nghut kôlhang, chyitdap myit đông za nang lé pying kat

lhê. ⁹Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, ¹⁰ngò kyum hut huí nyí é u lé ngá zo dut lo é Onesimu é matú nang lé ngò dúng tôngbán kat lhê. ¹¹Yhang gi, hí hpyang náng é matú akyú a bo é nghut kôlhang, ahkuí gi, náng é matú le, ngá é matú le, akyú bò bê nghut ri.

¹²Ngò nhik htung é Onesimu lé náng chyáng dum taú nhang kat lhê. ¹³Haú gabú danglu é yanmai, ngò htóng lúng nyí é má náng é malá ngo lé garúm râ matú, yhang lé ngò shuí nyí to naú kôlhang, ¹⁴ngò gi, nàng myit a huí le haí le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵Hkâsu mù gâ le, náng chyáng mai yhang rayoq rabun zo gâng nyí é gi, yhang dum taú lò mù hkâ-nhám le nàng eq rahá dum wó nyí nyí râ matú nghut lhê abe. ¹⁶Yhang gi, htang hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷Haú mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸Yhang, nang lé rajung jung shut pyâm é nghut le le, chyín dap tô é nghut le le, haú gi, ngá chyáng dap é chyín nghú sôn yù aq. ¹⁹Ngò, Poluq gi, chyín haú xap râ nghú luí, ngá loq èq yhang kê kat kôlhang, nàng yhang lhang, ngo lé asak chyín xap râ sù nghut é lé bün nham aq. ²⁰Nghut bê, gumang hpó ê, nang é yanmai, haú Yhumsing má ngò gabú é hkyô wó yu nyí sháng gaq, Hkrisduq má ngá é i-myit lé lhoq ngui lhoq ngón byí é đông, shí, ngò pying kat é dang lé gyo byi laq. ²¹Nàng gi, ngò taí kat é htoq má je lhom

kut râ nghut é lé, hkyak za sé luí, ngò kâ kat é nghut lhê.

²²Hau htoq agó, ngá é matú nyi râ gok lajang lánq aq. Hkâsu mù gâ le, nungmoq kyûdung byí é yanmai, ngò gi, nungmoq chyáng dum wó jé râ lé myit myoqbyu nyi lhê.

²³Hkrisduq Yesuq é yanmai, ngá é htóng lúng luzúm nghut é sù Epahpra gi,

nang lé shi-kyâm kat ri. ²⁴Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyi sháng gaq ô!

HEBRE

Pê Chyáng Hun Kat é Laiká

(Hebrews)

**Garai Yhangzo Gi, Maumang Lagyô
Pê Htoq Je Gyaú É Hkyô**

1 Laí ló bê ipyat pé má, Garai Gasang gi, nga-nhùng é íchyí îwâ pé lé my-
iqhtoí pé dông alhng lnhng eq adông
dông mai dáng nyo wú bê nghut lhê.
² Nghut kôlhng, ló htâng é buinyì shí pé
má, Yhang gi, Yhâng Zo dông mai nga-
nhúng lé dang nyô bê nghut ri; Yhang
gi, lhunglhang lé sng sũ dut rã matú
haú Zo lé masat to mù, Zo dông mai, nyì
mi-nyì, joq mijoq lé hpan to bê nghut
ri. ³ Haú Zo gi, Garai Gasang é hpung-
wup shingkang duqbó é hkyô eq Yhâng
é gunghyâng isâm roq nghut nyì mù,
lunglhang lé Yhâng é a-tsam byíng é
dâng èq zuí zing tô ri. Yhang gi, yubak
mara lé lhoq sân-yúng é hkyô lé ban kut
é htâng, mauhkung htoq má Hkikhkam
dik Sũ Garai Gasang é loqyo hkyam má
zung to bê nghut ri. ⁴ Haú mù luí, Yhang
gi, maumang lagyô pê é myíng htoq gyaú
é myíng lé wó sing yù bê nghut é eq ra-
jung za, yhangmoq htoq je riyhang gyaú
sũ dut bê nghut ri.

⁵ Hkâsu mù gâ le, Garai Gasang gi,
“Nàng gi, Ngá Zo nghut ri. Hkũ-nyí, Ngò
gi, Náng Wa dut bê nghut lhê.”ⁱ
gâ le, dum,
“Ngò gi, Yhâng Wa dut rã nghut mù,
Yhang gi, Ngá Zo dut rã nghut lhê.”^j
gâ le, maumang lagyo hká yuq lé hkâ-
nhám wá taí wú é nghut lhê lhú? ⁶ Dum,
Garai Gasang gi, Yhâng é zomún lé
mingkan shut nhang hâng kat é hkũn,

“Ngá é maumang lagyô pé banshoq gi,
Yhang lé noqkuq kó sháng gaq.”^k

ga taí ri. ⁷ Maumang pé eq séng luí Garai
Gasang taí é má,

“Yhang gi, Yhâng é maumang lagyô pé
lé laí su dut nhâng mù, Yhâng é dui-
nhâng zoshâng wuì lé, myishâm pé
su dut nhang é nghut ri.”^l

gâ ri. ⁸ Nghut kôlhng, haú Zo eq séng
luí, Yhang gi,

“Garai Gasang ê, Náng é hkohkâm-
tanghkuq gi, pyat dedu ahtum
abyuq gíng nyì mù,

Náng é dingmán hkyô gi, Náng é
mingdán lé uphkang é hkyô dut rã
nghut lhê.

⁹ Nàng gi, dingmán hkyô lé chyitdap bê
nghut mù, agè ashop é hkyô lé a
ngui byuq lô é nghut lhê.

Haú mù luí, Garai Gasang, náng é Garai
Gasang gi, Nang lé, gabú nhang é xũ
but byí é dông, Náng é luzúm wui
htoq je lhoq gyaú to bê nghut ri.”^m

ga taí ri. ¹⁰ Hau htoq agó, Yhang gi,

“Yhumsing ê, Nàng gi, a-nham sân-hi
má myidàm é apũn awang lé hi tô é
nghut mù,

mauhkung pé gi, Náng é loqmú chyat
nghut ri.

¹¹ Haú pé gi, htên byoq byuq rã nghut
lhê; nghut kôlhng, nàng gi, ru gíng
nyì rã nghut lhê; haú pé banshoq gi,
mebu su xau byuq rã nghut lhê.

¹² Nàng gi, haú pé lé, bumó lé su dng
yup rã nghut lhê; Nàng gi, haú pé
lé, mebu su htaí pyám rã nghut lhê.

Nghut kôlhng, Nàng gi, rajung za ru
gíng nyì rã nghut mù, Náng é zan-
wut pé gi, hkâ-nhám le htũm rã a
nghut.”ⁿ

gâ le taí ri. ¹³ Garai Gasang gi,

ⁱ1:5 Hkya-on 2:7 ^j1:5 2 Sam 7:14 ^k1:6 Tarâ Pun 32:43

^l1:7 Hkya-on 104:4 ^m1:9 Hkya-on 45:6-7 ⁿ1:12 Hkya-on 102:25-27

“Ngò, náng é gye pé lé, náng é hkyî nang tanghkuq kut pyám byî é hkyíng jé shoq, Ngá é loqyo hkyam shut zung nyi shi aq.”^o

ga maumang lagyo hká yuq lé hkâ-nhám wá taí wú é lhú? ¹⁴Maumâng pé ban-shoq gi, hkyi yù hkyô lé hkam yù rà nghut é bang lé dojaú rà matú, nhang kat huí é mú wùn woi-nyí pé chyat za nghut akò, a nghut kó lhú?

Sadiq Byî É Hkyô

2 Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyi rà dut lhê. ²Hkâsu mù gâ le, maumang lagyo pê èq taí bê mungdang gi, gîng nyi mù, shut shaí lu laí é hkyô eq jîno a gyô é hkyô hkangmó kut é sù gi, yhumsîng eq gíng é mara dam byî é hui zo kô é nghut le gi, ³nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hfang lut rà lhú? Hkyi yù hkyô haú gi, haú Yhumsing èq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekò nghut ri. ⁴Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byí é đông mai, haú hkyô lé saksé shit bê nghut ri.

Hkyi Yù Hkyô Hpông Byi Sù

⁵Garai Gasang gi, maumang lagyo pé lé, ngamoq taí nyi é jé lô rà mingkan lé, uphkâng nhâng rà a nghut. ⁶Rayuq yuq mai, rawò má saksé hkâm tô é gi, “Byù gi, haí wá nghut mù, Nàng, yhang lé bún nyi lhê lhú?

Byu Yhangzo gi, haí wá nghut mù, Nàng, yhang lé wú gôn nyi lhê lhú?

⁷Nàng gi, yhang lé, maumang lagyo pê htoq ratsuí lhoq nyhum to bê nghut ri.

Nàng gi, yhang lé, hpungwup shing kang eq aróng bò nhâng mù,

⁸jung hkangmó lé, yhâng é hkyiwa ô má tô to bê nghut ri.”^p

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lháng a myhit to loshoq yhang uphkâng é a-ô má tô to bê nghut é lé gâ lhê. Nghut kôllhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lhê. ⁹Nghut kôllhang, nga-nhúng gi, maumang lagyo pê htoq ratsuí zo lhoq nyhúm huí é sù Yesuq lé myang é nghut lhê. Yhang gi, Garai Gasang jeju mai, yuq hkangmó é matú shí hkám byí é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shing kang eq aróng bò nhâng bê nghut ri.

¹⁰Zo wui myo myo lé hpungwup shing kang wó hkam yù nhâng sháng gaq ga, jung hkangmó lé Yhang é matú chyat eq Yhang đông mai chyat joq nyi nhang é Garai Gasang gi, wuihke jamjau hui nhang é đông, yhangmoq é hkyi yù Sù lé lhoq gumjup byi rà matú htuk âng nyi ri.

¹¹Haú byu pé lé chyoiyúng nhang é Sù eq lhoq chyoiyúng huí é bang gi, ikun ralhú za má é bang chyat nghut lhê. Haú mù, Yesuq gi, yhangmoq lé, gumang wui ngù rà lé a hoq é nghut lhê.

¹²“Ngò gi, Náng myíng lé, Ngá gumang wui chyáng taí pyô rà nghut lhê;

Ngò gi, shiwa hpông é myoq hí má, Nang lé hkya-on mahkôn hkôn rà nghut lhê.”^q

ga, Yhang taí ri. ¹³Yhang gi,

“Ngò gi, Yhang lé lumhkau nyi râ nghut lhê.”^r

ga le dum taí ri. Hau htoq agó,
 “Ngò gi, Garai Gasang ngo lé byî é zoshâng wuì eq shî má nyi nyi lhê.”^s
 ga, Yhang dum taí ri.

¹⁴Haù zoshâng wuì gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shî-nò hkyô dông mai, shî-nò hkyô é a-tsam lé zú zing é sù nghut é nat Tsadán lé wó lhoq htên pyám rà eq, ¹⁵yhangmoq é shî-nò hkyô lé gyuq é èq, yhangmoq é asak gón lé jùn dông zú zing to huì é bang lé, wó lhoq lhut râ nghut lhê. ¹⁶Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷Haù nghut é yanmai, Yhang gi, Garai Gasang lé dojaú é má shogyo nhikmyîn é eq lhumzui é hkyangjong mó wó dut rà eq, byu pê é yubak marâ é matú shihtai gunglik hkungga wó kut rà matú, hkyô hkangmó má Yhâng é gumang wuì eq dù shoq kut é huì rà dut é nghut lhê. ¹⁸Yhang gi, gunlaú huì é hkùn, Yhâng-gùng yhang jamjau huì zo bê nghut é yanmai, gunlaú huì nyi é bang lé wó garúm yu é nghut lhê.

Yesuq Gi, Mosheq Htoq Gyaú É Hkyô

3 Haù mù luí, mauhkùng mai wut yù huì é, chyoyíung é gumang wuì ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq. ²Mosheq, Garai Gasâng é yhûm gón má lhumzui é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.^t
³Yhûm kut sù gi, yhûm htoq je gyaú é aróng lé wó é su, Mosheq htoq, Yesuq

gi, je gyaú é aróng lé wó gíng é lé myàng ri. ⁴Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôlhâng, Garai Gasang gi, jung hkangmó lé saí é sù nghut lhê. ⁵Mosheq gi, Garai Gasâng é yhûm gón má dui-nhâng zoshâng rayuq dông lhumzui mù, Garai Gasang taí râ nghut é lé saksé hkám bê nghut ri. ⁶Nghut kôlhâng, Hkrisduq gi, lhumzui é zo rayuq dông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyi bê.

A Lumjínng Bang Lé Sidiq Byî É Hkyô

⁷Haù mù luí, haù Chyoyíung Woi-nyí taí é eq rajung za,
 “Hkû-nyí, nungmoq gi, Yhâng é danghtê lé wó gyo kô é nghut jáng, ⁸yoso má Yhang lé chyâm kô é u lé,
 gumlau toq é hkùn nungmoq é îchyí íwâ pé kut kô é su, nungmoq é i-myt lé hkâlhoq htan to kó.
⁹Nungmoq é îchyí íwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekô nghut ri.
¹⁰Haù nghut é yanmai, Ngò gi, ipyat haù lé nhikjum yo mù,
 ‘Yhangmoq é myit nhiklhum gi, hkâ-nhám le hkyô nghoq byuq akô;
 yhangmoq gi, ngá é hkyô pé lé a sé kômù nghut ri.’ nghû taí é nghut lhê.
¹¹Haù mù, ‘Ngá é bánno jowò má yhangmoq hkâ-nhám le wó wâng kó rà a nghut.’ nghû, Ngò, nhikjum yô é eq dakâm dang taí bê nghut lhê.”^t
 gâ ri.
¹²Gumang wuì ê, nungmoq mâ é ó yuq le, haù rû dui nyi é Garai Gasâng chyáng

^r3:2 Bun zo shî eq bun zo 5, 6 lhum mã é *Garai Gasâng é yhûm gâ é gi*, Garai Gasâng é byu pé lé gâ é nghut lhê.

^r2:13 Esai 8:17 ^s2:13 Esai 8:18 ^t3:11 Hkya-on 95:7-11

mai, lhing taù ló byuq sê é, yubak mara byíng é, a lumj́ng é i-myit a bò sháng gaq, sidiq nyí keq. ¹³Nungmoq gi, ó yuq le, yubak marâ é mhaù zô é hkyo èq i-myit lhoq htan pyâm é a hui kó sháng gaq, “hkû-nyí” nghû ru wó taí nyí nyí gi, nyí wuí, rayuq eq rayuq myit wum byí lhúm nyí keq. ¹⁴Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyí é nghut jáng, Hkris-duq eq chóm zùm yap nyí é bang dut bê nghut ri. ¹⁵Haù gi,

“Hkû-nyí, nungmoq, Yhâng é danghtê lé wó gyô é nghut jáng, gumlau toq é hkún, nungmoq é íchýí íwâ pé kut kô é su, nungmoq é i-myit lé hkâl-hoq htan to kó.”^u

ga taí é eq rajung za nghut ri.

¹⁶Wó gyô yù mù, gumlau toq é bang gi, ô pé nghut akô lúh? Haù bang ban-shoq gi, Egutuq ming mai Mosheq èq shuí htoq lo é bang nghut bum lhê, a nghut kó lúh? ¹⁷Myi xê zàn yhang Garai Gasang lé nhikjum yó nhang é bang gi, ô pé nghut akô lúh? Haù bang gi, mara kut shut mù, yoso má shi leq byuq é bang nghut bum lhê, a nghut kó lúh? ¹⁸Jino a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lúh? ¹⁹Haù mù, yhangmoq a lumj́ng kô é yanmai, a wó wâng kô é lé, nga-nhúng myang é nghut lhê.

Garai Gasâng É Byu Pê É Matú Bánno Buinyì Đông Nghut É Bánno Jowò

4 Haù nghut mù luí, Garai Gasâng é bánno jowò má wàng râ danggidiq ru gíng nyí ashí nghut é yanmai, nungmoq mâ é ó yuq le, haù má a hkyit hkap é a dut râ matú, nga-nhúng sidiq nyí sháng. ²Hkâsu mù gà le, yhangmoq lé

gabú danglù haù hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyû a bò, haí mù gà le, haù wó gyô é bang gi, lumj́ng myit mai a lhom hap yù kô é yanmai nghut ri. ³Nga-nhúng lumj́ng bê bang za, bánno jowò haù má wó wang é nghut lhê. Haù hkyô gi,

“Haù mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é èq dakâm dang taí bê nghut lhê.”^v

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê. ⁴Hkâsu mù gà le, “Garai Gasang gi, nyhit nyí nghû râ buinyì má Yhâng é muzó banshoq mai bánno bê nghut ri.”^w gà é dang pé má, haù nyhit nyí nghû râ buinyì eq sêng é hkyô lé rawò má Yhang taí tô ri. ⁵Bánno jowò joq é eq séng luí, Yhang dum taí tô é gi, “Ngá é bánno jowò má yhangmoq hkâ-nhám le wó wâng kó râ a nghut.”^x gà ri.

⁶Bánno jowò haù má wàng râ bang ram nyí é danggidiq joq tô ashí nghut ri; hí hkún, gabú danglù haù wó gyô wú bê bang kúm gi, yhangmoq jino a gyo kô é yanmai, a wàng kô é nghut lhê. ⁷Haù mù luí,

“Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myit lé hkâlhoq htân kó.”^y

gà é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkún, “Hkû-nyí” gà é buinyì ra-nyí dum masat to bê nghut ri. ⁸Hkâsu mù gà le, yhangmoq lé, Yoshuq èq bánno jowò byi bê ru nghut le gi, Garai Gasang gi, htâng má, gotú buinyì eq séng luí taí râ a nghut lo. ⁹Haù mù luí, Garai Gasâng é byu pê é matú gi,

^u3:15 Hkya-on 95:7-8 ^v4:3 Hkya-on 95:11 ^w4:4 Apùn 2:2
^x4:5 Hkya-on 95:11 ^y4:7 Hkya-on 95:7-8

Bánno buinyì dông nghut é bánno jowò ru joq tô ashî nghut lhê. ¹⁰Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lhê. ¹¹Haû nghut mù, yhangmoq é jino a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haû má wó wàng shoq, a-tsam bo é í shikut sháng.

¹²Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³Hpan tô é lhungl-háng gi, Garai Gasâng é hí mai wó haq pyâm é haî le a joq é nghut lhê. Jung hkyangmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴Haû mù luí, nga-nhúng gi, Garai Gasâng é Yhangzo Yesuq nghut sù, mauhkúng pè shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjín hkyô lé gíng gíng myhik zing nyi sháng. ¹⁵Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkyangmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê. ¹⁶Haû mù luí, nga-nhúng gi, shogyo nhikmyîn é hkyô wó yû râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak

lum é myit mai Garaí jeju tanghkuq shut chyâng htep é sháng.

5 Hkyangjong mó yuq hkyangmó gi, byu pè chyáng mai hkyin htoq yû huí é nghut mù, mara pè é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik dông, hkyin masat to huí é bang nghut akò. ²Yhânggùng yhang gi, wum nyhôm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³Wum nyhôm é yanmai, yhang gi, byu pè é marâ é matú le, yhânggùng yhâng é marâ é matú le, hkungga nhông byi rà dut é nghut lhê.

⁴Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasâng èq wut yu é hui jáng sheq wó é nghut lhê. ⁵Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé,

“Nàng gi, Ngá Zo nghut ri; Ngò, hkû-nyí Náng Wa dut bê nghut lhê.”^z

ga taí é nghut lhê. ⁶Hau htoq agó, “Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri.”^a

ga, gó wô má le, Yhang taí to ashî nghut ri.

⁷Yesuq gi, myidàm htoq má asak dui nyi é buinyì pé má, Yhang lé, shi é mai wó hkyi yû Su chyáng, ngaubyi ngau-nhap eq wut garú é èq, kyúdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri. ⁸Yhang gi, Zo rayuq nghut to kôle, Yhang hui zô é wuíhke jamjau hkyô mai jino gyo hkyô wó mhoq yû bê nghut ri. ⁹Yhang gi, lhoq

^z5:5 Hkya-on 2:7 ^a5:6 Hkya-on 110:4

gumjup huí é hkûn, Yhang é jino gyo bang banshoq é matú, ahtum abyuq é hkyi yù hkyo é awang dut byuq bê nghut é eq, ¹⁰Melakhizedek wó é hkyangjong ayá hkyô đông mai hkyangjong mó dut rã matú, Garai Gasâng èq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹Ngamoq gi, shí hkyô eq séng luí taí rã gyaí joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuí ri. ¹²Gè gè ga jáng, ahkui lhê ahkýing má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang má é tengmán hkyo é awang lé, rayuq yuq èq nungmoq lé dum taú mhoq byi rã ru dut nyi akô nghut ri. Nungmoq gi, htan é zoshuq rã é bang a nghut, naú wing rã é bang ru nghut nyi ashí kó myhi-nhung! ¹³Naú wing shuq rã é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. ¹⁴Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yù shoq, hkâ-nhám le yhumsing gùng yhumsing lhoq mhân yu nyi é, kô ding bê bang é matú ru nghut lhê.

6 Haú mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô ding é hkyô shut xoq sô ê sháng. Nga-nhúng gi, shí-nò hkyô shut shuí jé é muzó mai myit lêng hkyo é, Garai Gasang lé lumjng hkyo é, ²baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apún awang dum hí nó a ra lô é nghut lhê. ³Garai Gasang gyô é nghut jáng, nga-nhúng gi, myit kô ding hkyô shut xoq so rã nghut lhê.

⁴Myoq lhoq bóng é radàm hui bê bang, mauhkung chyunghuq lé myang hap yù bê bang, haú Chyoiyung Woi-nyí lé chôm hkam yù bê bang, ⁵Garai

Gasâng é mungdang é gè hkyô eq jé lo nyi é ipyat é a-tsam pé lé myang chyam wú bê bang, ⁶yhangmoq hpuq lhik ló byuq é nghut le gi, hká đông lé myit lêng dum ge wó rã a nghut lo, haí mù gà le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷Yhâng ahtoq má wo gyùn é mau wuí lé shuq yù mù, yò mù saí bang é matú akyú bo é hôwa nuqhpýi lhoq htoq byí é maumyí gi, Garai Gasâng é shimân jeju myang hap yu é nghut ri. ⁸Nghut kôlhang, zu gâm eq myoq gàm yuq htoq nhang é maumyí gi, akyú a bò mù, nhing pyâm é hui zo rã lé chiq rã ri. Haú gi, ló htáng má nyhê hkyô pyâm é hui rã nghut lhê.

⁹Nghut kôlhang, chyitdap é gumang wuí ê, ngamoq gi, haú su nghú taí é nghut kôlhang, nungmoq é hkyi yù hkyô eq séng é je ge é jung pé, nungmoq wó bekô rã nghú hkyak myit lum tô lhê.

¹⁰Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é đông, Yhang lé nungmoq chyitdap é myit shit kô é hkyô lé le, a tô-myí rã nghut lhê. ¹¹Ngamoq gi, nungmoq é i-myt myoqbyù hkyô wó byíng jup rã matú, nungmoq yuq hkgámó ipyat htum shoq xoq shikut nyi kó rã lé gyaí ô nau ri. ¹²Ngamoq gi, nungmoq lagon bang dut byuq rã lé a ô nau é za, Garaí danggidiq byí to bê é lé, lumjng myit eq myit hng hkyô đông mai hkam yu é bang su châng kut kó rã lé ô nau é ru nghut lhê.

Garai Gasâng É Danggidiq Gíng Nyi É Hkyô

¹³Garai Gasang gi, Abraham lé danggidiq tô é hkûn, Yhâng htoq gyaú é dakâm mying lang rã rayuq lhang a nyi é nghut mù, Yhânggùng lé Yhang lang luí dakam é gi, ¹⁴“Ngò gi, nang lé teng

yang shimân byi mù, nang lé awut ashîn myo myo byi râ nghut lhê.”^b gâ ri. ¹⁵Haû mù, Abraham gi, myit hîng hîng láng yu é htâng má, byî tô é danggididq lé wó yû bê nghut ri.

¹⁶Byu pé gi, yangmoq htoq gyaú su é myîng lé lang luí, dakâm kô é eq, yangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. ¹⁷Garai Gasang gi, Yang myit hpyit tô é hkâ-nhám le a htaí lhik é hkyô lé, danggididq byî tô é lé hkam yù râ bâng chyáng san za shit nau ri; haû mù luí, dakâm dang eq lhoq gîng to bê nghut ri. ¹⁸Garai Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggididq eq dakâm dang joq é nghut mù, Yang haû su kut é gi, nga-nhûng hí má tô to byî é myit myoqbyù hkyô lé myhik zîng râ matú gaú é jowò shut h pang wàng bê bang nga-nhúng lé wum mó byî é dut râ matú nghut lhê. ¹⁹Nga-nhúng gi, myit nhiklhûm é shamtoq goknghe dông myit myoqbyù hkyô haû lé wó é nghut mù, haû gi, gingtîng é eq gaú é hkyô nghut ri. Myit myoqbyù hkyô haû gi, mauhkûng noqkuq yhûm mâ é pân-gyang ahkaú mâ é sân-yúng gok má jé wang é nghut ri. ²⁰Jowò haû gi, nga-nhúng é akyu é matú, nga-nhúng é hí má wàng byî é sî Yesuq wang jé é jowò nghut ri. Yang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

Hkyangjong Melahkizedek É Hkyô

7 Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yang gi, hkohkâm pé lé sat ûng pyám luí dum taú lo é Abraham lé hui mù, shimân byi bê nghut ri. ²Haû mù, Abraham gi, wó

lo é jung hkangmó mâ é, xê gambùm mâ é ragambùm, yang lé byi bê nghut ri. Sâng-hi lhê é Melahkizedek é myîng lichyúm gi, “dingmán hkyo é hkohkâm” gâ é nghut mù, htâng lhê é “Salem é hkohkâm” gâ é gi, “nguingón hkyo é hkohkâm” gâ é nghut lhê. ³Yhâng é înu îwa é hkyô eq byùxik labaú le, hi é buinyi eq asak htûm é hkyô le a kâ to nghut ri. Yang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴Yang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yang lé byi ri-nhung! ⁵Hkyangjong dut bang Lewiq é awut ashîn pé gi, yangmoq é gumang wuì, Abraham mai nyi gyó lo é bang nghut kôle, tarâ má bo é eq rajung za, haû bâng chyáng mai xê gambùm mâ é ragambùm lé hkyui yù râ dut é bang nghut akô. ⁶Nghut kôlhang, Melahkizedek gi, Lewiq mai gyó lo é amyú a nghut kôle, danggididq pé wó to sî nghut é Abraham chyáng mai xê gambùm mâ é ragambùm hap yù mù, shimân byî ri. ⁷Shimân byi sî gi, shimân byî é lé hkam yù sî htoq je gyaú sî nghut é lé, ó yuq le úng-áng râ hkyô a joq é nghut lhê. ⁸Hkyangjong pé eq séng luí ga jang, shi byuq sê é byu èq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byî é huí su èq hkyui yu é nghut lhê. ⁹Xê gambùm mâ é ragambùm hkyui yù sî, Lewiq lháng gi, Abraham dông mai xê gambùm mâ é ragambùm byi bê nghû wó taí ri. ¹⁰Haû mù gâ le, Melahkizedek gi, Abraham lé huí é hkûn, Lewiq gi, yhâng é îchyí íkê é gungdu hkaú má ru bo tô ashî nghut ri.

Melakhizedek Eq Dù É Yesuq

¹¹ Haû Lewiq hkyangjong amyû pê é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yû kô é nghut le gi, haî mù luí, Arun wó é hkyangjong ayá hkyo đông a nghut é za, Melakhizedek wó é hkyangjong ayá hkyo đông lo é sù gotú hkyangjong rayuq ra shirâ lúh?

¹² Hkâsu mù gâ le, hkyangjong amyû htaí é hkûn gi, tarâ le htaí yhang htaí râ dut é nghut lhê. ¹³ Haû su nghú taí é hkyô pé eq sêng é Sû gi, gotú byuhú má é sù nghut mù, byuhú haû mai gi, ó yuq le hkungga gyap má dojaú wú é a nghut.

¹⁴ Hkâsu mù gâ le, nga-nhûng é Yhum-sing gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haû eq sêng é hkyô má, hkyangjong pé eq séng luí haî lé a taí é nghut lhê. ¹⁵ Melakhizedek eq dù é gotú hkyangjong rayuq pô htoq bê nghú, ngamoq taí bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut râ lhê gâ é tarâ đông hkyangjong rayuq lé dut é a nghut é za, a wó lhoq htên é asak é atsam eq rajung za lé dut é ru nghut lhê.

¹⁷ Hkâsu mù gâ le,

“Nàng gi, Melakhizedek wó é hkyangjong ayá hkyô đông mai, ahtum abyuq hkyangjong rayuq nghut nyi ri.”^c

ga Yhang eq séng luí taí pyo tô é nghut lhê.

¹⁸ Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gâ le, haû jep é tarâ gi, gumjup hkyô haî a wó kut byí é nghut lhê. Haû mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haû mai

Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri.

²¹ Nghut kôlhang, Yesuq kúm gi,

“Nàng gi, ahtum abyuq hkyangjong rayuq nghut lhê.”

ga haû Yhumsing dakâm bê nghut mù, Yhang myit é hkyô htaí râ a nghut.”^d

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri. ²² Dakâm dang hau é yanmai, Yesuq gi, je ge é dang-shikaq é pahkám wò yù sù dut bê nghut ri.

²³ Hkyangjong pé myo myo nyi râ dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁴ Nghut kôlhang,

Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi râ nghut lhê. ²⁵ Haû mù luí, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haî mù gâ le, Yhang gi, yhangmoq é matú dúng tôngbán byi nyi râ matú, rû dui nyi é sù nghut lhê.

²⁶ Yesuq gi, chyoiyúng é sù, mara hûn râ hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkúng pê ahtuq má lhoq toq lhoq gyaú yu huí é sù nghut ri. Haû sù é hkyangjong mó gi, nga-nhúng râ é lé lajang byi râ htuk ang ri.

²⁷ Nyí nyí bui bui, yhumsing é marâ é matú hí hkungga nhông byi mù, byu pê é mara matú le hkungga nhông byí é gotú hkyangjong mó pé su, Yhang gi, a kut râ é sù nghut lhê. Yhang gi, Yhânggùng lé Yhang nhông byí é hkûn, yhangmoq é yubak marâ é matú banshoq radàm za hkungga nhông byi pyám bê nghut ri.

²⁸ Hkâsu mù gâ le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ah-tum abyuq lhoq gumjup hui bê nghut ri.

Dangshikaq Asik É Hkyangjong Mó Yesuq

8 Ngamoq taí nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garaí é hkohkâm-tanghkuq é loqyò hkyam shut zùng to mù, ²byu èq saí é a nghut é za, haû Yhumsing èq saí é saksé zúm akying hkaû mâ é, sân-yúng dik gok má dojaú é sù nghut ri.

³Hkyangjong mó hkanmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra râ nghut lhê. ⁴Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gâ le, jep é tarâ dông ga jang, chyunghuq nhông jaú é byu pé nyi to gù bê nghut lhê.

⁵Yhangmoq, sân-yúng dik gok má dojaú é hkyô gi, mauhkúng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saí râ nghut é hkûn, “Nang lé, bùm má tún shit é azòng eq rajung za jung hkanmó wó saí shoq kut aq.”^e ga sidiq byi huí é nghut lhê. ⁶Nghut kôlhang, Yesuq, gyoro sô xoq byí é dangshikaq gi, axaû lhùm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haû mù, dangshikaq

haû gi, je ge é danggidiq pê htoq má awang hi tô é nghut lhê.

⁷Hkâsu mù gâ le, sâng-hi lhê é dangshikaq má râ é hkyô haí a bo é ru nghut le gi, gotú ra râ a nghut lo. ⁸Nghut kôlhang, Garai Gasang gi, byu pé chyáng mara bo é myàng mù, taí é gi,

“Haû Israelaq é yhumbyù wui eq le, Yudaq é yhumbyù wui eq le,

Ngò, dangshikaq asik to râ ahkýing jé lo nyi ri ga haû Yhumsing taí pyo ri.

⁹Haû gi, Ngò, yhangmoq é íchýí íwâ pé lé loq èq zui mù, Egutuq ming mai shuí htoq lo é hkûn,

yhangmoq eq tô tô é dangshikaq su dut râ a nghut.

Haí mù gâ le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.

¹⁰Shí gi, ahkýing haû lai é htâng má, Israelaq é yhumbyù wui eq Ngò to râ nghut é dangshikaq nghut lhê ga haû Yhumsing taí pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklhum má kê to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

¹¹'Haû Yhumsing lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhoqshit é byù nyi râ a nghut lo,

haí mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

¹²Hkâsu mù gâ le, Ngò gi, yhangmoq é agè ashop hkyô lé mara hkyut pyám

byi mù, yhangmoq é mara pé lé dum a bun byi lo râ nghut lhê.”^f gâ ri.

¹³Dangshikaq haû lé, Yhang “asik” gâ é gi, sâng-hî lhum lé, axau kut pyâm é nghut ri; xau lô byuq é haî le, hkâm-yhâng a myáng má byuq lô byuq râ nghut lhê.

Myidàm Saksé Zúm Má Noqkuq É Hkyô

9Sâng-hi lhê é dangshikaq gi, noqkuq râ htúngtarâ pé eq noqkuq râ myidàm sân-yúng dik gok bo é nghut ri. ²Saî tô é saksé zúm é sâng-hi gok má gi, haû myibung tsúng jang, siboi eq haû hông byî é muk joq mù, haû gok lé gi, Chyoiyúng Jowò ga myhîng ri. ³Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gâ é nghut lhê. ⁴Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. ⁵Dangshikaq sidek é ahtoq má gi, shîhtaî gunglik hkungga byi jang htoq má wup tô é, Hpungwup shingkang bò Sû é hkerubim^{§§} pé joq tô ri. Nghut kôlhang, ngamoq gi, ahkuí haû pé lé jihkúm nuquq a wó taí san kyo é nghut lhê.

⁶Haû đông jung hkangmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri. ⁷Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé kut shut é marâ é matú le, hông byi râ sui chùng mù, razàn má radàm za wang é nghut lhê. ⁸Haû Chyoiyúng Woi-nyí gi, haû pé đông mai, sâng-hi é

saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tún shit nyi ri. ⁹Haû gi, ipyat shi é matú tún shit é azông nghut mù, hông byî é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byî é hkyô lé taí nau é nghut lhê. ¹⁰Haû pé gi, zojung, shuqjung eq chí san chí séng hking ahú hú eq za séng é nghut mù, htúngli asik, lé joq é ahkýing jé shoq za tô tô é gungsho eq séng é tarâ pé nghut ri.

Hkrisduq É Sui

¹¹Hkrisduq gi, shî má joq to gù nghut é gè hkyô pé é hkyangjong mó đông lé jé é hkûn, hpan tô é má a lom nghû nau é, byu èq saî é a nghut é, je kô é eq je gumjup é saksé zúm mai wang lai bê nghut lhê. ¹²Yhang gi, Chyoiyúng Htâng é Jowò má wang é hkûn, bainám eq nojùng zo pé é sui lé chùng mù wang é a nghut é za, Yhâng é suí èq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³Htúngli đông agot a-û dut é bang lé lhoq sân-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sanséng é hui kô é nghut lhê. ¹⁴Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai hông byî é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhông é myit sôn sê é hkyô lé, je riyhang wó lhoq sanséng yu ri-nhung mhai!

¹⁵Haû nghut é yanmai, Hkrisduq gi, danggidiq byi tô é ahtum abyuq é muizé lé, ji yù huí é bang wó hap yù kó sháng

§§9:5 *Hkerubim* gâ é gi, byù su su, đusak su su dut é, dùng dap é maumang lagyo rahú nghut lhê.

gaq ga, dangshikaq asik é gyoro sô xoq byi sũ nghut nyi ri. Haũ su wó kut é gi, sâng-hi lhê é dangshikaq ahkaũ má mara kut shut é bang lé lhoq lhut yũ râ matú, yubak chyĩn xap zê ralhũm dông, Yhang shĩ hkám byi yanmai nghut ri.

¹⁶ Madat dang eq séng luĩ ga jang, madat dang taĩ sũ haũ shĩ bê hkyô saksé shit râ lhê. ¹⁷ Haĩ mù gã le, madat dang gi, rayuq yuq shĩ jáng za sheq lichyũm htoq é nghut lhê. Madat dang taĩ sũ rũ dui nyi nyi, haũ gi, hkâ-nhám le lichyũm htoq râ a nghut. ¹⁸ Haũ nghut é yanmai, sâng-hi lhê é dangshikaq lháng gi, sui a bo lòm jáng lichyũm a htoq é nghut lhê. ¹⁹ Mosheq gi, haũ jep é tarâ má bo é hkunmó hkangmó lé, shiwa byũ banshoq bang lé ban taĩ pyo é hkũn, zam zam ne é saumaũ eq jàm kyâng lé yũ mù, nojũng zô é sui eq bainám sui eq wuĩ nyhò tô é lé, chyũmding má le, shiwa byũ banshoq bang lé le, hpyun gyũn é nghut ri. ²⁰ Yhang gi, “Sui shĩ gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê.”^g ga taĩ ri. ²¹ Yhang gi, saksé zúm eq dojaũ é má chung é zè pé má le, haũ eq rajung za sui haũ hpyũn gyũn ri. ²² Gè gè gi, haũ jep é tarâ má bo é dông ga jang, azíng zê aluq banshoq gi, suĩ èq lhoq sân-yũng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haũ mù, mauhkũng zè pé é azòng pé gi, hkungga haũ pé èq lhoq sân-yũng é hui râ é nghut lhê. Nghut kôlhãng, mauhkũng zè pé yhang gi, haũ pé htoq je ge é hkungga pé èq lhoq sân-yũng é hui râ dut é nghut lhê. ²⁴ Hkâsu mù gã le, akying lhũm é azòng za nghut é, byu èq saĩ é chyoiyũng dik é jowò má Hkrisduq wang é a nghut é za, Yhang gi, mauhkũng má yhang wang é nghut mù, ahkuĩ gi, nga-nhũng é matú Garai

Gasâng é hí má bo yap byĩ nyi é nghut lhê. ²⁵ Yhang gi, haũ hkyangjong mó mai yhumsĩng é sui a nghut é sui lé chũng mù, Chyoiyũng Htâng é Jowò má zàn wuĩ wàng luĩ kut é su, yhãnggũng lé dum nhõng byi byi kut râ matú mauhkũng má wang é le a nghut. ²⁶ Haũ dông ru nghut le gi, Hkrisduq gi, mau htoq xãng hkũn mai shĩ hkâm é adam myo myo nghut berâ nghut lhê. Nghut kôlhãng, ahkuĩ, Yhang gi, yubak mara huĩ sêng pyám byi râ matú, yhãnggũng lé hkungga nhõng byi râ ga ipyat pé ló htãng ló nyi é má, banshoq é matú radãm za htoq shit bê nghut ri. ²⁷ Byũ gi, radá za shĩ râ nghut mù, hau htãng má tarâ jéyáng é hui râ nghut é eq rajung za, ²⁸ Hkrisduq gi, byũ myo myô é yubak mara lé yu pyám byi râ matú, radá za hkungga nhõng é hui bê nghut ri. Haũ mù, Yhang gi, yubak mara wun pyám byi râ a nghut lo é za, Yhang lé lán nyi é bang lé hkyi yũ hkyô yu lé byi râ matú, htãng má í dãm nghũ râ dãm htoq shit râ nghut lhê.

Hkrisduq É Gũng Lé, Banshoq É Matú Radãm Za Nhõng Byĩ É Hkyô

10 Haũ jep é tarâ gi, jé lô râ nghut é gè hkyô pé é akyĩng a nghut é za, wupzo za nghut ri. Haũ nghut é yanmai, jep é tarâ gi, zàn wuĩ ru nhõng byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ² Tarâ haũ wó lhoq gumjup byĩ é ru nghut le gi, yhangmoq nhõng byĩ é hkyô nô pyám kó râ a nghut lhĩ? Hkâsu mù gã le, haũ noqkuq é bang gi, banshoq é matú radãm za lhoq sanséng huĩ é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lhê. ³ Nghut kôlhãng, shigu hkungga haũ pé gi, zàn wuĩ yubak mara pé lé lhoq pun byĩ é zè nghut ri. ⁴ Haĩ

mù gâ le, nohtó pé eq bainám pê é sui gi, yubak mara lé huí sêng pyâm é hkyô wó dut é a nghut.

⁵Haû mù luí, Hkrisduq, mingkan má lé jé é hkûn, Yhang taí é gi,

“Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷Hau htâng, Ngò gi, 'Garai Gasang é, Ngò eq séng luí chyúmding má kâ tô é eq rajung za,

Nàng ô nau é hkyô kut râ matú, Ngò, shí má nyi lhê.' nghú taí é.”^h

gâ ri. ⁸Sâng-hi má, Yhang gi, “Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê.” ga taí ri. Haû jep é tarâ dông haú pé lé kut râ dut kôlhang taí é nghut ri. ⁹Hau htâng má, Yhang gi, “Nàng ô nau é hkyô kut râ matú, Ngò, shí má nyi lhê.” ga taí ri. Haû gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri. ¹⁰Myit ô nau hkyô hau é yan-mai, Yesuq Hkrisduq, Yhâng é gungdu lé hkungga dông banshoq é matú radàm za nhông byí é dông mai, nga-nhúng gi, lhoq chyoiyúng é hui bê nghut ri.

¹¹Hkyangjong hkanmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byí é, rajung zâ é shigu hkungga lé, dum nhông byi byi kut é nghut lhê.

¹²Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkýing banshoq é matú ban nhông byí é hkûn jang, Garai Gasâng é loqyo hkyam shut

zung to bê nghut ri. ¹³Haú hkûn mai, Yhang gi, Yhâng é gyè pé lé, Yhâng é hkyi nang jang kut byi râ lé lánng nyi é nghut ri. ¹⁴Haí mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedû é matú lhoq gumjup byi bê nghut ri.

¹⁵Haú Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi, ¹⁶“Haú Yhumsing taí ri, shí gi, ahkýing haú laí htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhikhlum hkaú má kat byi mù, yhangmoq é i-myt má kâ to byi râ nghut lhê.”ⁱ

gâ ri. ¹⁷Hau htâng, Yhang taí jat é gi, “Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut.”^j

gâ ri. ¹⁸Haû mù, mara haú pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹Haû mù luí, gumang wuì ê, nga-nhúng gi, Yesuq é suí èq, haú Chyoiyúng Htâng é Jowò má wàng râ matú hkyak wó lum to bê nghut lhê. ²⁰Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê.

²¹Haû nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, ²²nga-nhúng gi, gíngtíng é lumjíng hkyô mai sansêng é i-myt èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sanséng râ matú nga-nhúng é i-myt lé hpyun gyún é hui nhâng luí, nga-nhúng é gungdu gi, sân-yúng wui èq chi byí é hui yú sháng. ²³Nga-nhúng gi, nga-nhúng yín

^h10:7 Hkya-on 40:6-8

ⁱ10:16 Yer 31:33

^j10:17 Yer 31:34

yu é myit myoqbyù hkyô lé zuí gíngtíng nyí sháng; hkâsu mù gà le, danggidíq byí to bê Sû gi, lhumsuz Sû nghut lhê. ²⁴ Chy-itdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byí lhum rá hkyô lé, dat myit nyí sháng. ²⁵ Chôm huí zup lhúm nyí é hkyô lé, ra-am lhaq tô pyâm nyí kô é su, nga-nhúng gi, a tô pyâm é za, haù Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhúm nyí sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi rá hkungga a joq lo. ²⁷ Tará jéyáng hkyô eq Garai Gasâng é gyè pé lé nyhê hkyô pyám rá nghut é nhikmo-yô é myi lé za, gyuq chiq myit mai lánq nyí rá dut bê nghut lhê. ²⁸ Mosheq é tará lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. ²⁹ Haù jáng, Garai Gasâng é Yhangzo lé hkyiwa ô má nâng pyeq bê sù, yhumsíng lé lhoq sâ-n-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í yhang gyaú é mara dam byí é hui gíng rá nghut lhê nghú, nungmoq wó myit akô lhú? ³⁰ Hkâsu mù gà le, “Lató hpuq rá gi, Ngò ru nghut lhê; Ngò lató hpuq rá.”^k ga le, “Haù Yhumsíng gi, Yhâng é byu pé lé tará jéyáng rá nghut lhê.”^l ga le, taí é Sû lé, nga-nhúng sê lhê. ³¹ Haù rú dui nyí sù Garai Gasâng é loq hkaù má byit gyó wang é gi, gyuq chiq jung yhang nghut ri.

³² Nungmoq, haù maubó lé hap yu é* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pè

hí má de de rhoi shit é eq zing-rí é hui zo bekô nghut ri; ra-u u má, nungmoq gi, haù su hui zo bang eq rahá bo hui zo bekô nghut ri. ³⁴ Nungmoq yhang, je ge é eq ru gíng nyí é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haù mù luí, nungmoq é hkyak myit lum tô é hkyô lé hkádú pyám kó; agùn agó chyunghuq shigyaú é hui kó rá nghut lhê. ³⁶ Nungmoq gi, Garai Gasâng é ô naù hkyô lé kut é hkûn, Yhâng danggidíq byí tô é lé wó hap yù rá matú, nungmoq hkam jan rá dut é nghut lhê. ³⁷ Hkâsu mù gà le, razup zo nghut jáng, “Haù lé lô rá Sû gi, jé lé rá nghut mù, ahkyíng lhoq myáng rá a nghut.

³⁸ Nghut kôlhang, Ngá é dîngmán sù gi, lumjíng myit mai asak duí rá nghut lhê.

Yhang nungzut zut é nghut le gi, Ngò, Yhang lé myit nguí rá a nghut.”^m ga tô ri. ³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjíng mù hkyi yù huí é bang ru nghut lhê.

Lumjíng Myit Mai

11 Lumjíng myit nghu é gi, nga-nhúng myit myoqbyu tô é lé hkyak wó rá nghu é eq nga-nhúng a myàng shí é lé joq lhê nghú hkyak sê é hkyô nghut lhê. ² A-nham lhê bang gi, lumjíng myit haù mai Garaí èq owaq é hui kô é nghut lhê.

³ Lumjíng myit mai, nga-nhúng gi, nyí mi-nyí, joq mijoq lhunglhang lé Garai Gasâng é hkunmó èq hpan tô é hkyô sê gyô é nghut lhê. Haù mù, myoq èq wó myang é pé gi, byu-myang é pé mai saí htoq tô é a nghut.

*10:32 Haù maubó lé hap yu é gà é gi, gabú danglù lé sâng-hi wó hap yu é lé gà lhê.

^k10:30 Tará Pun 32:35 ^l10:30 Tará Pun 32:36 ^m10:38 Hbk 2:3-4

⁴Lumj́ng myit mai, Abelaq gi, Ka-in kut é htoq je ge é hkungga, Garai Gasang lé nhông byí é nghut ri. Lumj́ng myit mai, yhang gi, yhâng é hkungga eq séng luí Garai Gasang hkya-ôn é hkún, dingmán sũ rayuq đông owaq é hui bê nghut ri. Haũ mù, lumj́ng myit mai, yhang gi, shi byuq bê nghut kôlhang, dang rũ nyo nyi ashĩ nghut lhê.

⁵Lumj́ng myit mai, Enuq gi, shi é a hui zo shoq, asak shĩ mai mauhkũng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myàng lo nghut ri. Hkâsu mù gâ le, yhang gi, shuí yu é a hui shĩ é hí má, Garai Gasang lé nguĩ nhâng sũ rayuq đông owaq é hui sũ nghut ri. ⁶Lumj́ng myit a bo é nghut le gi, Garai Gasang lé a wó nguĩ nhang é nghut lhê. Haĩ mù gâ le, Yhâng chyáng shikut luí lé jé é sũ gi, Yhang nyi é hkyô lê le, lhumzui myit mai Yhang lé hô bang lé, Yhâng èq shigyaú é lé le, lumj́ng rã dut é nghut lhê.

⁷Lumj́ng myit mai, Noaq gi, a myang wú shĩ é hkyô pé eq séng luí sidiq byi huĩ é hkún, yhâng é yhumbyù wuĩ lé hkyĩ rã matú, gyuq hkunggã é đông mai wuĩ-sanghpo saĩ bê nghut ri. Yhâng é lumj́ng myit mai, mingkan lé mara byí é nghut mù, lumj́ng myit mai lo é dingmán hkyo é jeju lé hkam yù sũ dut bê nghut ri.

⁸Lumj́ng myit mai, Abraham gi, yhâng é muizè đông, htâng má yhang hap yù rã nghut é, Garai Gasang byí é jowò shut e ló rã matú ji yu é huĩ é hkún, jĩno gyo mù, yhang hká shut e ló é a sé kôlhang, ê bê nghut ri. ⁹Lumj́ng myit mai, yhang gi, gó ming má nyi é byù bíng rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zã é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰Hkâsu mù gâ le, Abraham gi, Garai Gasang èq azông

hên mù saĩ tô é, gĩng é apũn awang pé eq mu é myuq lé myit myoqbyu nyi é nghut ri.

¹¹Lumj́ng myit mai, Abraham gi, yhâng é asak ipyat laĩ ló byuq é eq, Sarah le baũdung nghut to kôlhang, haũ danggidiq byi Sũ, lhumzui sũ nghut lhê ga myit sôn yu é yanmai, iwa rayuq wó dut é hui bê nghut ri. ¹²Haũ mù luĩ, yhang gi, shĩ gũng đông nghut kôle, yhang rayuq mai lo é awut ashĩn pé gi, mauhkũng mã é kyĩ pé eq wuĩmau yàm mã é a ung nghap é semuĩ myhó myò lò bê nghut ri.

¹³Byù haũ bang banshoq gi, yhangmoq shi é hkún jé shoq lumj́ng myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haũ pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yũ bekô nghut ri. ¹⁴Haũ su yín yu é byu pé gi, yhangmoq yhumsing é ming lé ho nyi é bang nghut é lé tũn shit é nghut akô. ¹⁵Yhangmoq htoq lo é ming lé, yhangmoq myit tui nyi kô é ru nghut le gi, dum tau ló rã ahkáng wó kó rã nghut lhê. ¹⁶Ahkuĩ kúm, yhangmoq gi, je ge é ming nghut é, mauhkũng mingdán lé myit tuĩ nyi akô nghut ri. Haũ mù luĩ, Garai Gasang gi, yhangmoq é Garai Gasang nghu é hui rã lé a hoq é nghut lhê. Hkâsu mù gâ le, Yhang gi, yhangmoq é matú myuq ralhũm lajàng to byi bê yanmai nghut ri.

¹⁷Lumj́ng myit mai, Abraham gi, Garai Gasang èq yhang lé chyam é hkún, Isak lé hkungga ralhũm đông nhông byi bê nghut ri. Haũ gi, danggidiq pé lé hap yu to bê sũ gi, yhâng é yuqzo zote lé nhông byi rã dã é nghut lhê. ¹⁸Garai Gasang gi, “Isak đông mai lo é lé, náng é awut ashĩn nguĩ sôn byi rã nghut

lhê.ⁿ ga yhang lé danggidiq byî to bê nghut kôle, yhang haû su kut é nghut ri. ¹⁹Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰Lumj́ng myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹Lumj́ng myit mai, Yakup gi, yhang shi ló rà u má, Yosep é yhangzô nhik lé shimân byi mù, yhâng é dumbáng-u má ngè luí, noqkuq bê nghut ri.

²²Lumj́ng myit mai, Yosep gi, yhâng asak htúm ló rà u lé, Israelaq byu pé Egutuuq ming mai htoq lò rà eq séng luí taí mù, yhâng é showui pé eq séng luí hkâsu kut rà hkyô lé pying to bê nghut ri.

²³Lumj́ng myit mai, Mosheq é yhângnu eq yhângwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.[†]

²⁴Lumj́ng myit mai, Mosheq gi, yhang kô lo é hkûn, Hpara-uq é by-izô é yhangzo ga rà lé he-ngik pyâm ri.

²⁵Yhang gi, yubak marâ é ngón hkyô má rayoq zo ngón kún rà malaí Garai Gasâng é byu pé eq rahá hpuzô é hui rà lé sheq hkyin yù bê nghut ri. ²⁶Yhang gi, haû Hkrisduq é matú rhoi huí é lé, Egutuuq ming mã é sutzè htoq mã je riy-hang hpauđap lhê ga myit sôn yu ri. Haí mù gâ le, yhang gi, yhâng é shi-gyaú chyunghuq lé myit myoqbyu nyi sù nghut ri. ²⁷Lumj́ng myit mai, yhang gi, hkohkâm hpó nhikjum yô é lé a gyuq é za, Egutuuq ming mai htoq lò byuq bê nghut ri. Yhang gi, myoq èq a wó

myang é sù Garai lé wó myang é sù dông, hkam jân é nghut ri. ²⁸Lumj́ng myit mai, yhang gi, haû zomún lé sat é mau-mang lagyô èq Israelaq byu pé é zomún lé a wó záng sháng gaq ga, Lhoqlhai Poí eq sui hpyûn é hkyô le kut hí bê nghut ri.

²⁹Lumj́ng myit mai, haû shiwa byu pé gi, Nhões Nè lé kyuq huí é myigùng htoq mai su laí byit bekô nghut ri; nghut kôlhang, Egutuuq byu pé le, haû dông laí shikut wú kô é hkûn, yhangmoq gi, myup shi byuq bekô nghut ri.

³⁰Lumj́ng myit mai, shiwa byu pé, Yerihko myuq xêwâm lé nyhit nyí sô lhing é htàng má, xêwâm haû leq gyop byuq bê nghut ri.

³¹Lumj́ng myit mai, shiwa myhí Ra-hap gi, haû Israelaq jó wú bang lé ngu-ingón é eq lhom hkulum yu é yanmai, jino a gyo bang eq rahá sat pyâm é a huí é nghut lhê.

³²Haû htoq lai luí, ngò haí taí jat ra shirâ lhú? Gidon, Barak, Samson, Yephta, Dawiq, Samuelaq pé eq myiqh-toí pé é hkyô lé taí rà ahkyíng ngò a wó. ³³Haú bang gi, lumj́ng myit mai mingdán pé lé wó zân ung yù bekô, tengmán hkyô lé chung jai bekô, dang-gidiq byî to bê lé wó hap yù bekô, hkanghkyi pé é nhut lé wó myhî pyâm bekô, ³⁴myiduq myishâm lé wó sat pyâm bekô, shamsó mai le wó hfang lut bekô nghut ri. Yhangmoq é wum nyhóm hkyô gi, wum taú bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyâm kô é nghut lhê. ³⁵Myiwe wui gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut

[†]11:23 Haú-u lé, hkohkâm hpó gi, Israelaq pé é yuqzo zonú wui lé sat pyâm rà hkunmó hkyô tô é nghut lhê.

é hui râ lé he-ngik pyám kômù, zing-rí é gyai yhang hui zo bekô nghut ri. ³⁶Ra-am gi, wuizùi kut pyám byî é eq nhuq bat é hui bekô, góbang gi, sham-toq kyum hut huí é eq htóng lhúng é hui bekô nghut ri. ³⁷Yhangmoq gi, luqgok eq dú sat é, í túm dut shoq yik hpyit é, sham èq sat pyám é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rí é eq rhoi pyám é hui bekô nghut ri. ³⁸Yhangmoq lhumzúi nyì kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyúng pé eq myì-dong pé má nyi lhing wún bekô nghut ri.

³⁹Haú bang banshoq gi, yhangmoq é lumjín myit é yanmai, owaq é hui bê nghut kôle, yhangmoq ó yuq le, dang-gidiq byî tô é lé a myang hkam yù kó nghut ri. ⁴⁰Haí mù gà le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajáng to byi bê nghut ri.

Garai Gasang, Zo Wuí Lé Mhoqshit É Hkyô

12 Haú mù luí, nga-nhúng gi, haú myhò é saksé pé mhutdúm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byî é yubak mara lé dú pyám mù, nga-nhúng òn râ matú tô tô é hkyô lé, hkam jan luí òn e ló sháng. ²Nga-nhúng gi, nga-nhúng é lumjín hkyo é apún awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpú é hkyô lé haí su a ngam é za, tapzín má shí hkâm é hkyô lé jân pyám luí, Garai Gasang é

hkohkâm-tanghkuq é loqyo hkyam shut zung to bê nghut ri. ³Nungmoq gi, a ngu byuq râ eq myit wum a gyuí byuq kó sháng gaq, yubak dap bâng chyáng mai haú su htuoq htíng é hkyô lé jân pyám é Yesuq chyáng mai myit wum yù keq.

⁴Nungmoq gi, yubak mara lé htuoq htíng shikut é hkyô má, nungmoq é sui shun pyám shoq yhang a kut shí kó nghut ri. ⁵Hau htoq agó, nungmoq gi, zo wuí lé òng Garai Gasang nungmoq lé wum byî é dang lé tô-myhí pyám bekô lhú? Wum byi dang haú gi,

“Ngá zo ê, haú Yhumsing mhoqshit é hkyô lé agya alhá hkâkut pyám, Yhang, nang lé tân é hkûn, myit wum hkâgyui,

⁶haí mù gà le, haú Yhumsing gi, Yhang chyitdap é bang lé mhoqshit mù, zo rayuq lé òng,

Yhang hap yu é bang yuq hkangmó lé dam byî é nghut lhê.”^o

gâ é nghut ri.

⁷Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé òng kut é ru nghut lhê. Hkâsu mù gà le, yhumsing é yhângwâ èq a mhoq é zo gi, ó wá nyi lhê lhú? ⁸Nungmoq gi, yuq hkangmó huí lai é mhoqshit hkyô lé, a hui kô é nghut jáng, dezô pé òng nghut byuq mù, zo síng wui a nghut lo kó. ⁹Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haú nghut jáng, je riyhang, nga-nhúng é woi-nyí eq sêng é Íwâ é a-ô má nyi mù, asak òn râ dut ri myhi-nhung! ¹⁰Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mho-

qshit ri. ¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguingón hkyô eq dingmán hkyo é ashi lhoq htoq byî ri.

¹² Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kîng keq. ¹³ Hkyî hten bang a wó sô é a dut shoq, lhoq gê byî é wó hui kó sháng gaq, nungmoq so rà matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyi rà eq choyiyúng rà matú wó dut é í shikut keq. Hkâsu mù gà le, ó yuq le, choyiyúng hkyô a bo é gi, haû Yhum-sîng lé myàng rà a nghut. ¹⁵ Ó yuq le, Garai Gasâng jeju lé a tô pyám rà matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó. ¹⁶ Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut rà matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le, ¹⁹ tut htê mying é eq, dang taí htê mying é má le, a jé é kô nghut ri. Dang htê haû

lé wó gyô é bang gi, yhangmoq lé, dang a taí jat lo rà matú dung tôngbán akô nghut ri. ²⁰ Haû mù gà le, yhangmoq gi, “Bùm haû má dusak pé záng jáng lháng, luqgok èq dú sat rà dut lhê.”^p ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haû byu-myàng hkyô gi, lûm wú gyuq hpo dut é yanmai, Mosheq lháng gi, “Ngò, gyuq nán ri.”^q ga taí é nghut ri.

²² Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, mau-mang lagyô pé ajùm ayò gabú ratung zup zîng é jang eq, ²³ mauhkûng htoq má myìng kâ to huí é, zomún pê é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pê chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.^z

²⁵ Nungmoq gi, dang nyô Sù lé a gyo a kut rà matú, sidiq keq. Myidàm htoq má sidiq byî é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byî é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut rà a nghut kó lhí? ²⁶ Haû Garaí dang taí é u má, Yhâng é htê gi, mingkan lé lhoq nhûn kat ri, ahkuí kúm gi, “Ngò, mingkan lé za a nghut, mauhkûng pé lé le radàm dum lhoq nhún rà nghut lhê.”^r ga Yhang danggidiq byî to bê nghut ri. ²⁷ “Radàm dum” gà é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám rà lé gà é nghut lhê.

^z12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq rà matú nghut ri; nghut kôlhang, Hkrisduq é sui kúm gi, hkyi yù hkyô lajang byî ri.

²⁸ Haù mù luí, nga-nhúng gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é đông noqkuq sháng. ²⁹ Hkâsu mù gâ le, nga-nhúng é “Garai Gasang gi, nyhê jôm é myi nghut ri”.⁵

Ló Htàng Má Lhoq Pun Kyîng É Hkyô

13 Rayuq eq rayuq, gumang yhangchang đông chytidap lhùm nyi keq. ² Byù bíng pé lé hkulúm rã hkâtô-myhí kó, hkâsu mù gâ le, ra-am gi, haù su kut nyi kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lhunglhâng bâng eq hpautap é hui rã dut é nghut mù, myiháng yhuphpú gi, sân-yúng rã dut lhê. Hkâsu mù gâ le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng rã nghut lhê. ⁵ Nungmoq é asak dui hkyô má, ngùn lé chytidap é myit tô pyám mù, nungmoq wó é lé nhik dik nyi keq, haí mù gâ le, Garai Gasang gi, “Hkâ-nhám le, Ngò, nàng eq a gang rã; hkâ-nhám le, Ngò, nang lé a tô pyám rã.”^t

ga taí é nghut lhê. ⁶ Haù mù, nga-nhúng gi, hkyak lum é myit mai,

“Haù Yhumsíng gi, ngo lé garúm sù nghut lhê yanmai, ngò, gyuq rã a nghut. Ó yuq wá, ngo lé haí wó kut rã lhú?”^u

ngùu taí é nghut lhê.

⁷ Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi laí lo é sâmlai lé myit wú

mù, yhangmoq é lumjíng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

⁹ Maù nhô zâ é mhoqshit hkyô ajung jung maí eq shuí nghoq huí é bang hkâdut kó. Zo bang lé hai akyû a byí é, htúngli zoshuq eq a nghut é za, Garai jejû eq nga-nhúng é myit nhiklhum lé wum-o lhoq kíng yu é gi, gè hkyô nghut lhê. ¹⁰ Nga-nhúng gi, saksé zúm má dojau é hkyangjong pé zo rã ahkáng a wó é hkungga gyp ralhum wó é nghut lhê.

¹¹ Haù hkyangjong mó gi, dusak pé é sui lé, yubak mara hkungga đông Chyoiyúng Htàng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri.

¹² Haù eq rajung za, Yesuq le, Yhâng é sui đông mai byu pé lé wó lhoq chyoiyúng rã matú, myuq hkum shinggan má jamjau hpuzo mù shí hkám bê nghut ri. ¹³ Haù mù luí, nga-nhúng gi, byù nyi jowò shinggan má Yhâng chyáng ê mù, Yhang hui zô é rhoi hkyô lé ê bo hui zo sháng. ¹⁴ Hkâsu mù gâ le, nga-nhúng gi, mingkan shí má ru gíng nyi é myuq wó bang a nghut é za, jé lé lô rã myuq lé ho nyi é bang ru nghut lhê.

¹⁵ Haù mù luí, nga-nhúng gi, Garai Gasâng é myìng lé yín yu é nhutwui é ashi nghut é, hkya-on hkungga lé, Yesuq đông mai, Garai Gasâng chyáng xoq xoq không byí nyi sháng. ¹⁶ Ge é hkyô kut rã eq góbang lé shuí gam chùng rã hkyô lé, hkâtô-myhí kó; hkâsu mù gâ le, Garai Gasang gi, haù sù é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyi keq. Yhangmoq gi, jihpán shit rã dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a

^s12:29 Tarâ Pun 4:24

^t13:5 Tarâ Pun 31:6

^u13:6 Hkya-on 118:6-7

dut é za, gabú hkyô ralhum wó dut sháng gaq, yhangmoq é jìno gyô nyì keq.

¹⁸Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duì râ lé ô nau lhê nghû, hkyak wó myit ri. ¹⁹Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taí tsuq kat lhê.

²⁰Sau hpúng pê é sau zúng Sû mó nghut é, nga-nhông é Yhumsing Yesuq lé, haù ahtum abyuq é dangshikaq é sui dông, shí bê mai dum lhoq dui toq é sù, nguingón hkyô é Garai Gasang gi, ²¹Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhông chyáng kut nyì sháng gaq.

Hpungwup shingkang gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.

²²Gumang wuì ê, ngò lhoq pùn kyîng é dang lé nungmoq wó hkam jan kó sháng gaq nghû, wum taí tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.

²³Ngò gi, nga-nhông é gumang Timohi lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴Nungmoq lé shuí-u bang banshoq eq Garai Gasâng é byu pé banshoq lé bo shi-kyâm byi keq. Itali ming mâ é gumang wuì gi, nungmoq lé shi-kyâm kat akô nghut ri.

²⁵Jeju gi, nungmoq banshoq bâng chyáng ru joq nyì sháng gaq ô.

YAKUQ

Hun Kat é Laiká

(James)

1 Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngu-ingón dang shit kyô kat lhê.

Lumjîng Myit Lé Chyam É Hkyô Eq Hpaqchyî Byéng-yá

²Ngá gumang wuì ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³wuîhke jamjau ajung jung lé htông huí é hkûn, gàu jowò mó nghut nyi lhê nghû luí myit yû keq. ⁴Hau htoq agó, nungmoq ban-shoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵Nungmoq má rayuq yuq hpaqchyî byéng-yá langhpyut tô é nghut le gi, haú banshoq bang lé, mara a hun é za, agùn agó byi nyi é Garai Gasang chyáng dîng nyi sháng gaq, haú jáng, Garai gi, yhang lé byi râ nghut lhê. ⁶Nghut kôlhang, lum shut é myit a bo é za, lumjîng é myit èq dîng nyi sháng gaq, hkâsu mù gà le, lum shut é sù gi, laidûn èq hik luí toq lo é nhông mã é wuìlhêng eq wuí nyi ri. ⁷Haú yuq gi, Yhumsing Garaí chyáng mã é haí le wó yû râ su a ngam nyi sháng gaq. ⁸Yhang gi, myit-kó xan sù nghut luí, yhang é hkyô hkat hkangmó má, mù htâng a nyang é sù nghut nyi ri.

Myùng Sù Eq Wó Sù

⁹Myung é gumang hpó gi, waq toq huí é má, wó sù gi, lhoq nyhûm huí é má,

gabú gumrong nyi sháng gaq. ¹⁰Hkâsu mù gà le, wó sù gi, wàhu banbó su woí byuq lô râ nghut lhê. ¹¹Buì gi, nyé é lai èq toq lô jáng, haú wàhu nyhuí byuq lô mù, abó le yoq gyó byuq é eq, hau é yúng sâm pé gi, htên byuq é su; wó sù le haú eq rajung za, yhang kut nyi é muzó má woí byuq lô râ nghut lhê.

Gunglaú É Hkyô

¹²Wuîhke jamjau huí le, wó shikut shirang nyi sù gi, hkungsò wó nyí ri; hkâsu mù gà le, chyam wú é ban hui jáng, yhang gi, Garai Gasang lé chyitdap é bang lé, byi tô é danggidîq asak janmaú lé, wó yû râ nghut lhê.

¹³Gunglaú huí é sù ó yuq nghut kôlhang, gunglaú huí é hkûn lé, “Garai Gasang, ngo lé gunglaú nyi ri.” nghû luí, a taí sháng gaq, hkâsu mù gà le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴Nghut kôlhang, ó yuq nghut le le, yhumsing é gungsho ô nau é dông, shuí lâng nghoq lô é nghut le gi, agúng alaú hui bê. ¹⁵Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶Ngò chyitdap é gumang wuì ê, i-myit hkyô nghoq hkâ-nghoq nyí kó. ¹⁷Gè réng é eq byíng jup é chyunghuq lunglháng gi, ahtoq shut mã é nghut mù luí, maubó gung pé[†] é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. ¹⁸Yhang hpan tô é amyú pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haú tengmán é mungdang mai, nga-nhúng lé hkû to bê nghut ri.

[†]1:17 Maubó gung pé gà é gi, buì, kyî, lhamó lé gà lhê.

Gyo Yu É Eq Cháng Kut É Hkyô

¹⁹Ngò chyitdap é gumang wuì ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang tái râ lé a hân sháng gaq; nhik-yo râ lé le hkâhân kó. ²⁰Hkâsu mù gâ le, byù nhik-yô é hkyô gi, Garai Gasang ô nau é dingmán é đông asak ùi hkyô wó lhoq htoq râ a nghut. ²¹Haù mù luí, achau achyut é banshoq eq ladu laí agè ashop é pé lé lhoq san lhoq sêng pyám luí, nungmoq é i-myt lé wó hkyi yù râ matú, i-myt unghkaù má Garai Gasang hô tô é mungdang lé, nú-nhâm é myit èq hkam yu nyi keq.

²²Nungmoq gi, yhumsing gùng lé a mhaù pyám sháng gaq, haù mungdang lé wó gyô yu é bang za a nghut, haù đông châng kut é bang le nghut nyi sháng gaq. ²³Mungdang haù lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuì ri. ²⁴Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. ²⁵Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó èq tân shit é sù nghut é yanmai, haù yuq gi, yhang cháng kut é muzó má shimân jeju wó râ nghut lhê.

²⁶Byù rayuq yuq, “Ngò gi, noqkuq htúng lé lhoq dik sù nghut lhê.” ga luí, myit to kôlhang, yhumsing nhut shô lé a wó hkâng mù, yhumsing myit lé mhaù pyâm é nghut le gi, haù yuq é noqkuq htúng gi, akôm za nghut nyi ri. ²⁷Íwa Garai Gasâng é hí má sansêng é eq, râ é hkyô a bo é noqkuq htúng gi, wuìhke jamjau huí é chuimó chuizô pé lé, châng wú garúm é hkyô eq, mingkan htoq mâ é achau achyut é hkyô lé koi pyâm é hkyô nghut ri.

Myoqdong A Wó Hkyin Lhum

2Ngá é gumang wuì ê, hpungwup shingkang bo é nga-nhúng é Yhum-sing Yesuq Hkrisduq lé lumjíng hkyô má, byu é myoqdong lé hkâhkyin lhum kó. ²Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awuì é sù rayuq gi, nungmoq é tarajong má wang lò kô é nghut le, ³haù réng é mebu wut é sù lé, nungmoq lhom wú mù je hkunggâ é èq, “Shí aróng wó é jowò má zùng aq.” dum, haù asho awuì é sù lé nghut jáng gi, “Mhó má yap to aq.” haù su a nghut jáng, “Ngá é hkyi htâng má zùng aq.” ga tái kô é nghut le gi, ⁴nungmoq rayuq eq rayuq gamhkuí lhum luí, a ge é i-myt èq doqdân é bang dut lò bekô a nghut kó lhú?

⁵Ngò chyitdap é gumang wuì ê, gyô yù keq, lumjíng hkyô má wó sùt nyi luí, gidíq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuì é bang lé hkyin yù bê a nghut kó lhú? ⁶Nungmoq kúm gi, asho awuì é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut lò bekô, a nghut kó lhú? ⁷Nungmoq eq sêng é kô dik é myìng lé lhang, yhangmoq yhang rhoi dang tái bum akô, a nghut kó lhú?

⁸Haù mù luí, Chyúmdang má, “Náng gûng lé nàng chyitdap é su, náng é chyangnâm mâ é bang lé le chyitdap aq.”^v ga luí, tái tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gû nghut bê yanmai, haù

tarâ lé shut é bang lé su tarâ jéyáng é huí nyí bekò râ nghut lhê. ¹⁰ Byù ó yuq nghut le le tarâ banshoq lé cháng kôlhang, haú mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gà le, “Su-myi sulàng hkâlú.”^w ga luí, hkang tô é sù gi, “Byù lé hkâsat.”^x ga luí le, taí tô ashí. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haú su mù luí, nungmoq lé lhoq lhut kat é tarâ dông jéyáng doqdân é huí râ bang su, ru taí nyí keq; ru châng kut nyí keq. ¹³ Hkâsu mù gà le, shogyo myit a bò sù gi, a shogyo é dông jéyáng doqdân é huí râ nghut lhê. Shogyo nhikmyín é hkyô kúm gi, jéyáng doqdân é hkyô lé wó ông lut râ nghut lhê.

Lumjín Myit Eq Zui Saí É Hkyô

¹⁴ Ngá gumang wui ê, byù rayuq yuq, “Ngò gi, lumjín myit bo lhê.” ga taí nyí kôlhang, muzó a bo lom é nghut le gi, haí akyû bò râ lhú? Lumjín myit haú gi, yhang lé wó hkyi yù râ lhú? ¹⁵ Gumang, gu-nhá rayuq yuq a chîn dut nyí é eq, nyí wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô haí le a byí é za, yhangmoq lé, “Nungmoq wut é gùng lúm sháng gaq, zô é ùng gyí sháng gaq, ngui ngui ngón ngón ló keq.” ga taí é nghut le gi, hai akyû bò kó râ lhú? ¹⁷ Haú eq rajung za, lumjín myit má muzó a bo é nghut le gi, shí é eq rajung za nghut nyi ri.

¹⁸ Dum rahkyô gi, “Nàng gi, lumjín myit bo ri, ngò gi, muzo bo lhê. Muzó a bo é náng é lumjín myit ngo lé tún shit wú aq, haú hkûn, ngá muzó èq ngá lumjín myit lé, nang lé ngò tún shit râ nghut lhê.” ga luí, rayuq yuq taí râ nghut lhê. ¹⁹ Garai Gasang rayuq za nghut é lé

nàng lumjín ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjín mù gyuq nán nyi akò nghut ri.

²⁰ Kyoq a bo é byù bam ê, lumjín myit má muzó a bo le akôm za nghut é hkyô lé, nàng sé nau lhê a nghut lhú? ²¹ Nga-nhùng é Iwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gà é lé wó yù bê a nghut lhú?

²² Haú mù luí, yhâng é lumjín myit gi, yhâng é muzó eq rahá za e ló é yanmai, lumjín myit gi, jup byíng lo é lé, nàng wó myâng bê nghut ri. ²³ Haú su mù, “Abraham gi, Garai Gasang lé lumjín é nghut mù luí, yhang lé dingmán sù ga són byi bê.”^y ga luí, kê tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê. ²⁴ Haú mù luí, byù gi, lumjín é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akò.

²⁵ Haú eq rajung za, Rahap gà é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sù gà é wó yù bê a nghut lhú? ²⁶ Haú su mù, gungdu má woi-nyí a bo le gi, shí é eq rajung za, haú lumjín myit má muzó jizó a bo le gi, shí gû nghut bê nghut ri.

Mhé Wuí É Shô

3 Ngá é gumang wui ê, byù myo myo sará hkâkut naú kó. Hkâsu mù gà le, ngamoq sê é eq rajung za, sará pé gi, je riyhang htan é dông jéyáng doqdân é huí zo râ nghut lhê. ² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi,

jup byíng sù eq yhumsing é gùng lé wó hkanq é sù nghut ri.

³Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é đông wó cháng nhang lhê. ⁴Haû mai gotû, wuì-sanghpo pé lé wú wú keq, haû-í kô é sanghpo lé htan é laidûn èq mut é hui kôlháng, sanghpo hkâng sù gi, gyai tiq é sanghpo shap èq za, yhâng ô nau é đông, haû pé lé wó hkanq yu ri. ⁵Haû eq rajung za, shô gi, tiq é gungsho za nghut kôlháng, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶Shô haû gi, myi eq wuí nyi ri. Nga-nhúng é gungsho má, shô haû gi, agè ashop é mingkan dut lò mù, nga-nhúng é gungsho asak lé achayut dut nhâng luí, gungsho asak lé nyhê tuq kat ri. Haû gi, ngaraí myí èq nyhê tuq kat é nghut bê.

⁷Dusak ajung jung, nghoq ahú hú, myi má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haû pé lé mhê yu nyi akô. ⁸Nghut kôlháng, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô đông hpan tô é waxâng zo wuí lé le nhíng pyâm nyi ri. ¹⁰Nhut ralhúm za mai, hkya-ôn é dang eq nhíng é dang htoq lo ri. Ngá é gumang wuì ê, haû su kut é gi, a gè. ¹¹Wuìbúm radong za mai, chuí nghâm é wuì eq hkô é wuì wó htoq râ lhú? ¹²Ngá gumang wuì ê, maihpáng gâm mai tsanlun shi, tsibiyiq núí mai maihpáng shi, wó zui râ lhú? Haû eq rajung za, xô ngam é wuì gi, chuí nghâm é wuì lé wó lhoq htoq byi râ a nghut.

Ahtoaq Mai Lo É Hpaqchyí

¹³Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haû yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó đông tûn shit nyí sháng gaq. ¹⁴Nghut kôlháng, nungmoq é myit má ladu laí é manon é i-myyit eq, lú lhum bat zik é i-myyit bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó. ¹⁵Haû sù é hpaqchyí byéng-yá kúm gi, mauhkúng htoq mai gyó lo é hpaqchyí byéng-yá a nghut, haû gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri. ¹⁶Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

¹⁷Mauhkúng htoq mâ é hpaqchyí byéng-yá kúm gi, sâng-hi awang má san-sêng nyi ri; hau htâng má gi, nguingón hkyô lé ô nau é, myit nûm é, jìno gyô é, shogyo nhikmyin sê é eq ge é ashi zui nyi mù luí, gamhkui a bò, ahpuq alik a dut é eq, kut mhaû a sê é hpaqchyí byéng-yá nghut nyi ri. ¹⁸Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yù kó râ nghut lhê.

Yhumsing Gùng Lé, Garai Gasâng Chyáng Ap To Râ Hkyô

4 Nungmoq má gyè dut lhúm é eq mabyoq jishúm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhúm é yanmai, dut htoq lo é a nghut kó lhú? ²Nungmoq yut yut myit ô nau nyi kôlháng, haí le a wó yù kó. Nungmoq sat nyi é eq manon nyi kôlháng, a wó yù kó. Nungmoq byoq lhúm nyi é eq majan htoq lhúm nyi kôlháng, haí le a wó yù kó; hkâsu mù gâ le, nungmoq, Garai

Gasang lé a dung kô é yanmai nghut ri. ³Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyâm râ matú, shut é đông đung nyi kô é yanmai nghut ri.

⁴Su-myi sulàng lú é bang su gidiq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haú mù luí, mingkan ô nau é hkyô eq buinùm dù naù sù ó nghut kôlhang, Garai Gasâng é gyè nghut nyi ri. ⁵Dum ralhum, nga-nhúng má Garai Gasang kat lhung tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú? ⁶Nghut kôlhang, Yhang gi, je kô é jeju ru byí nyi lhê. Haú eq rajung za, Chyúmdang má, “Garai Gasang gi, nghutbûn é bang lé hkûm zing pyâm kôlhang, myit lhoq nyhum é bang lé jeju byí ri.”^z ga taí tô ri.

⁷Haú mù, Garai uphkan é a-ô má ru nyi nyi keq; Nat Tsadán lé hkûm tang pyâm keq; haú hkûn, yhang nungmoq chyáng mai hpang byuq râ nghut lhê. ⁸Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyâm keq. Myit koq xân é bang ê, nungmoq é myit nhikhum lé lhoq chyoi lhoq yúng to keq. Yudaq htúng đông loq lé chí san chí sêng pyâm keq gâ é lichyúm gi, i-myit, gungđu lé lhoq san lhoq sêng pyâm é lé gâ lhê. ⁹Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon đông, nungmoq é gabú é hkyô lé gi, yón kuq é đông htaí pyâm keq. ¹⁰Haú Yhumsîng Garaí é hí má i-myit lhoq ny-

hum nyi keq, haú hkûn, Yhang gi, nungmoq lé lhoq toq râ nghut lhê.

¹¹Gumang wui ê, nungmoq yhangchang a ge é đông hkâtaí hpoí lhum kó. Yhumsing é yhanggu yhangmang lé a ge é đông taí hpoí nyi é sù, haú a nghut jáng, jéyáng é sù gi, haú tarâ lé a ge é đông taí hpoí nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹²Garai Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

Gyáng Dang A Taí Râ Hkyô

¹³“Ngamoq, hkû-nyí napmá ra-nyí nyí, wà rawà wà shut ê mù, haú má razàn kô ê nyí luí, hpugá wuiloq gá mù amyat wó myang yù râ.” ga taí nyi é bang ê, gyô wú keq. ¹⁴Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lú? Haú gi, razup rahtâng za htoq shit luí dum byuq byuq lô mù é, nghansoq eq rajung za nghut nyi ri. ¹⁵Haú mù luí, nungmoq haú su ga taí nyi râ malaí gi, “Yhumsîng Garaí đông é nghut le gi, ngamoq le ru wó dui nyi mù, shí le, mhô le, wó kut râ nghut lhê.” nghû luí, wó taí râ nghut lhê. ¹⁶Ahkuí kúm gi, nungmoq é gyáng é dang đông gumrong nyi akô; haú su gumrong é hkyô banshoq gi, agè ashop é jung chyat nghut nyi ri. ¹⁷Haú mù luí, ge é mù sê kut to luí, a kut é sù gi, mara kut sù dut bê nghut ri.

Sùt Wó Bang Lé Sidiq Byí É Dang

5 Sùt wó é bang ê, gyo keq, nungmoq chyáng jé lé lô râ é wuihke jam-jau hkyo é yanmai, ngau garú nyi keq.

²Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³Nungmoq é hîng eq ngùn má lháng, jogyik zui byuq mù luí, haû jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyi shí pé má, sutzè lé za hkong to bekô nhung! ⁴Wú keq, nungmoq é yohtung ðung yò yam nhâng mù luí, ahpau a byí é za, nungmoq mhaú zô tô é ahpau pé garú nyi é htê pé eq, mù zui bang garú é htê pé lé gi, haû a-tsam dik shoq bo é Garai wó gyo byi bê nghut ri. ⁵Nungmoq gi, myigùng htoq má hkik hkik hkâm hkâm wó nyi é eq, i-mytit ô nau é ðong ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶Haû ðingmán é sù⁸ lé, nungmoq mara hûn mù, sat pyám bekô. Yhang kúm gi, nungmoq lé a lhom hkûm zing nghut ri.

Myit Hîng Hîng Hkam Jan Ra Râ Hkyô

⁷Haû mù luí, gumang wui ê, haû Yhumsing dum jé lé é buinyi jé shoq myit hing é èq láng nyí keq ô! Hkyâm saí sù lé wú wú keq, yhang gi, myih-pún mai ahpau dán é ashi lé wó yû shoq ga mau mún eq wò htáng htáng é mau wo gyûn é jé shoq myit hîng hîng láng nyi ri. ⁸Haû eq rajung za, nungmoq le, Yhumsing Yesuq dum jé lé râ gi, chyâng lo nyi bê nghut é yanmai, myit hing é èq, i-mytit lé lhoq ging lhoq tîng to keq. ⁹Gumang wui ê, nungmoq jéyáng a hui sháng gaq, nungmoq yhangchang hkânyung nyâng lhûm nyi ko. Wú keq, Tarâ agyí gi, hkúmdong má jé nyi to bê nghut ri.

¹⁰Gumang wui ê, haû Yhumsing Garai é myîng eq hko kyô é myiqhtoí pé wuîhke jamjau huí é hkûn, jân pyám é

myit lé, nungmoq gi, ge é alik agàn kut yû keq. ¹¹Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htâng má myo myo dum shimân byí é hkyô lé, nungmoq wó gyô wú bê nghut lhê. Haû mù gà le, haû Yhumsing Garai gi, gyai shogyo nhikmyîn é sù nghut nyi ri.

¹²Ngá é gumang wui ê, banshoq má ahkyak dik é gi, haí le le hkâdakâm kó. Mauhkûng lé a nghut jáng, myigùng lé lang luí le hkâdakâm kó. Dakam é dang gotû lé le hkâtaí nyi kó. Nungmoq doqđân é a hui sháng gaq, nungmoq gi, nghut é le gi, “nghut lhê”, a nghut é le gi, “a nghut”, nghû za, taí keq.

Lumjîng Myit Eq Kyûdung Râ Hkyô

¹³Nungmoq má rayuq yuq wuîhke jamjau huí é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkôn nyi sháng gaq. ¹⁴Nungmoq má rayuq yuq nôhpyo huí é nghut le gi, noqkuq hpúng mã é nhik bô suwún wuî lé ji yù mù, haû bang gi, Yhumsing Yesuq é myîng mai yhang lé xû but byi luí, kyûdung byi kó sháng gaq. ¹⁵Haû su mù, lumjîng myit èq kyûdung é dang gi, haû nô sù lé lhoq gê luí, Yhumsing Garai gi, haû yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byí é hui râ nghut lhê. ¹⁶Haû mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byí lhûm nyi keq. ðingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷Eliyaq gi, nga-nhúng su i-mytit unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung

⁸5:6 *ðingmán é sù* gà é danghkun lé, Chyúmlaika ra-am má gi, *ðingmán é bang* gà ri.

jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸Kyû dum dúng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byi wú bê nghut lhê.

¹⁹Ngá é gumang wuì ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq

yuq gi, yhang lé tengmán hkyô shut dum wó shuî taû lo é nghut le kúm gi, ²⁰haû shuî taû yù sù gi, yubak mara kut é sù lé, shut shai é hkyô mai tengmán hkyô shut shuî taû yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuî nghop pyám byi é sù dut berâ lé, bûn nyi keq ô!

PETRUQ

Hĩ Dàm Hun Kat é Laiká

(1 Peter)

1 Yesuq Hkrisduq é lagyo nghut sũ, nõgõ Petruq gi, Pontuq, Galatiq, Kapadokia, Asia eq Bihtuni mau pé má byo myín tõ bum é, Yesuq Hkrisduq é jino gyo rà matú le, Yhâng é suí èq hpyûn gyûn é hui** rà matú le, haũ Woi-nyí é lhoq sân-yúng nyi é muzó dõng mai, İwa Garai Gasâng é hí te sê tõ é hpaqchyí má cháng luí, hkyin yù huí é bang nghut é, ²Garai Gasâng èq hkyin htoq yũ luí, mingkân é byùbíng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyí É Myit Myoqbyù Hkyô

³Hkya-on kungtôn hkyô gi, nga-nhúng é Yhumsîng Yesuq Hkrisduq é Yhângwa nghut sũ Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô dõng, Yhâng é gyai shogyo nhikmyín é yan-mai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó, ⁴nungmoq é matú mauhkûng htoq má tõ to byi bê nghut é, hkâ-nhám le, a hten a byoq é, agot a-ũ a dut é, a hpoi byuq é muí lé le wó nhang é nghut lhê. ⁵Nungmoq gi, lumjîng kô é yanmai, ló htâng é ahkyíng má lhoq htoq shit rà rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akô. ⁶Haũ mù, nungmoq gi, ahkuí razup zo, wuĩhke hkyô junghkang jungmó má yón hpuzô é hui kó rà nghut kôlhâng, gyai yhang gabú nyí keq. ⁷Wuĩhke hkyô haũ

pé mai, nungmoq é lumjîng myit gi, jet é hkyô lé wó chyam htoq mù, myi mai jên yù kôlhâng htên byoq sê é hîng htoq je gyaũ luí, Yesuq Hkrisduq htoq shit é hkûn, hkya-on kungtôn hkyô, hpungwup shing kang eq arõng sitang lé, nungmoq wó kó rà nghut lhê. ⁸Nungmoq gi, Yesuq lé a myang wú kôlhâng, Yhang lé chyitdap bum akô; Ahkuí, nungmoq, Yhang lé a myàng kôlhâng, Yhang lé lumjîng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi ri. ⁹Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjîng myit é akyû lé wó yu nyi kô é nghut ri.

¹⁰Hkyi yù hkyô haũ eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit èq jí jí chyun chyun ho gon wú bekô nghut ri. ¹¹Yhangmoq gi, Hkrisduq wuĩhke jamjau hui luí, hpungwup shing kang wó rà nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut rà eq hkasú é u má nghut rà hkyô lé ho gôn wú bekô nghut ri. ¹²Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lhâng gi, haũ hkyô pé lé gyai wú nau bum akô nghut ri.

Chyoiyúng Nyí Râ Hkyô

¹³Haũ mù luí, zui saí rà matú nungmoq é i-myt lé hen to keq; yhumsing gùng yhumsîng hkang nyí keq; Yesuq Hkrisduq htoq shit é hkûn, nungmoq lé

** 1:1 *Yhâng é suí èq hpyûn gyûn é hui gâ é gi, Yhâng é suí èq mara chĩ sân pyám byí é lé gâ lhê.*

byi râ nghut é jeju lé, hkyak za myit myoqbyu nyi keq. ¹⁴ Jino gyô é zoshâng wui su, myoq a búng shí é pyat má nungmoq nyi tô é hkûn, nungmoq é agè ashop ô naù hkyô lé a châng kut é za, ¹⁵ haù nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyi keq. ¹⁶ Hkâsu mù gà le, “Ngò gi, chyoiyúng Sû nghut é yanmai, nungmoq le chyoiyúng nyi keq.”^a ga kâ tô ri.

¹⁷ Byù yuq hkgamó é muzó lé, myoqdong a hkyin é za tarâ jéyáng é sù îwa lé, nungmoq wut dung kô é yanmai, byùbúng dông shí má nyi é u lé, Garai lé gyuq hkunggâ é myit mai asak duì keq.

¹⁸ Hkâsu mù gà le, nungmoq gi, nungmoq é íchýí îwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bè nghut kôlhang, jhtôm ahkyíng shí pé má sheq, nungmoq é matú htoq shit nhang é hui bè nghut ri. ²¹ Yhang lé, shi é mai lhoq duì toq yù mù, hpungwup shingkang bò nhang é Garai Gasang lé, nungmoq gi, Hkrisduq dông mai lumjínng kô é nghut luí, nungmoq é lumjínng myit eq myit myoqbyù hkyô gi, Garai Gasâng chyáng nghut nyi bekô nghut ri.

²² Ahkuí kúm, nungmoq gi, haù tengmán hkyô lé châng é dông mai, yhum-sing gùng yhumsing lhoq sân-yúng yù bekô nghut mù, nungmoq é gumang wui lé, lhumzuí é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. ²³ Hkâsu mù gà le, nungmoq gi, htên byoq sê é

amyui mai dum hkû huí é a nghut é za, Garai Gasâng é, rû dui nyi é eq ru gíng nyi é mungdang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gà le,

“Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò mã é banbó pé eq pung ri;

wàhu mhan gi, nyhuí kyuu byuq luí, banbó pé gi, yoq gyó byuq lhê;

²⁵ nghut kôlhang, haù Yhumsing é mungdang gi, ahtum abyuq gíng nyi lhê.”^b

gâ tô ri. Haù gi, nungmoq lé hko kyo bè mungdang nghut lhê.

2 Haù mù luí, i-myt dû é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkgamó pé lé tô pyám keq. ² Asik hku é zonú pé naù lé ô naù gadaú é su, woi-nyí eq sêng é jet é naú^{††} lé ô naù gadaú nyi keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gà le, haù Yhumsing gi, gè sù nghut é lé, nungmoq chyam wú bekô nghut ri.

Rû Dui Nyi É Luqqok Eq Hkyin Yù Huí É Byù Myù

⁴ Byu pé mai hkyin htoq pyám kôlhang, Garai Gasâng é matú hpaudap luí, Yhâng èq hkyin yù huí é, rû dui nyi é Luqqok nghut sù, haù Yhumsing chyáng nungmoq jé lé é hkûn, ⁵ nungmoq le, rû dui nyi é luqqok pé su, woi-nyí eq sêng é yhúm^{‡‡} saí nyi é hui luí, Yesuq Hkrisduq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyù dut

^{††}2:2 Woi-nyí eq sêng é jet é naú gà é gi, Garai Gasâng é mungdang lé taí é nghut lhê.

^{‡‡}2:5 Woi-nyí eq sêng é yhúm gà é gi, noqkuq hpúng lé taí nau é nghut lhê.

^a1:16 Nhung 11:44-45; 19:2; 20:7 ^b1:25 Esai 40:6-8

bekô nghut ri. ⁶Hkâsu mù gâ le, Chyúm-dang má,

“Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lhezq tô é nghut lhê;

Yhang lé lumhkau é sù gi, hkâ-nhám le hoq hpû é hui râ a nghut.”^c

ga tai tô ri. ⁷Haû mù, lumjîng bang nungmoq é matú gi, luqgok haû hpaudap é nghut lhê. Nghut kôlhang, a lumjîng bâng é matú gi,

“Haû yhûm sai bang hkyin htoq pyâm é luqgok gi, htungchyûn mâ é ahkyak dik é luqgok”^d dut bê nghut ri.”^d

ga le,

⁸“Byu pé lé, htung leng râ luqgok eq myit leqbat nhâng râ luq mó cham dut bê nghut ri.”^e

ga le, tai tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó tai pyô kó sháng gaq ga, hkyin yù huí é byuhú, hkohkâm hkyangjong amyû, choyiýung é byù myû, Garai Gasang eq sêng é byu pé nghut akô nghut ri. ¹⁰Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yu bekô nghut ri.

¹¹Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghû, gó ming byu pé eq byùbîng pé dông mingkan htoq má nyi é bang nungmoq lé, ngò, wum tai tsuq kat lhê. ¹²Haû a lumjîng shî é byu pé

gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kûm é buinyi má Garai lé shigyaú kó sháng gaq, a lumjîng shî é byu pé é ahkaû má haû su ge é asak ùi hkyô dông nyi yap keq.

Uphkâng Bang Eq Yhumsîng Wui É A-ô Má Nyi Râ Hkyô

¹³Haû Yhumsing é yanmai, byu pé má é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle, ¹⁴shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng eq nhang tô é mauzaú pé é a-ô má nghut kôle, nyi nyi keq. ¹⁵Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zîm pyâm é gi, Garai Gasang ô nau é hkyô nghut lhê. ¹⁶Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchûng kó; Garai Gasâng é dui-nhâng zoshâng wui dông nyi keq. ¹⁷Yuq hkanmó lé rago za hkunggâ é hkyô shit keq; lumjîng é gumang wui lé chyitdap keq; Garai Gasang lé gyuq hkunggâ nyi keq; hkosêng lé hkungga keq.

¹⁸Dui-nhâng zoshâng wui ê, hkungga myit banshoq eq, nungmoq é yhumsîng wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq. ¹⁹Hkâsu mù gâ le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuíhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê. ²⁰Nghut kôlhang, nungmoq gi, mara kut shut é yanmai, nhuq bat é hkâm zo luí, haû lé jân nyi é nghut le gi, hai aróng wó kó râ lú? Nghut kôl-

^f2:7 Ahkyak é luqgok gâ é gi, Hkrisduq lé tai é nghut lhê.

^c2:6 Esai 28:16 ^d2:7 Hkya-on 118:22 ^e2:8 Esai 8:14

hang, nungmoq gi, ge é hkyô kut luí, wuĩhke hui zô é lé jân pyâm é nghut jáng, haũ gi, Garai Gasâng hí má hkyáon gíng é hkyô nghut lhê. ²¹ Nungmoq gi, haũ hkyo é matú ji yù huí é nghut lhê; haĩ mù gâ le, Hkrisduq gi, nungmoq é matú wuĩhke hkyô huí é má, nungmoq lé alik đông to byi bê nghut mù, nungmoq gi, Yhâng é hkyĩ-kám pé lé cháng rà dut lhê.

²² “Yhang gi, hai mara le a kut shut, Yhâng é nhut mai mhaũ é lé a myàng.”^f

²³ Yhang gi, rhoi é huí é hkûn, yhangmoq lé a dum taũ rhoi; wuĩhke hkyô huí é hkûn, kyuq é dang a taĩ. Haũ kut rà malaĩ, tengmán é đông jéyáng é Su chyáng, Yhânggùng lé ap pyâm ri.

²⁴ Nga-nhúng gi, yubak mara eq wó shi gang mù, dıngmán hkyo é matú asak wó duĩ kó sháng gaq ga, Yhang gi, sik zıng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pê é yan-mai, nungmoq gi, lhoq gê byĩ é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuĩ, nungmoq gi, haũ sau zúng Sũ eq nungmoq é asak woi-nyĩ lé upzúng Su chyáng lhing taũ lò bekô nghut ri.

Ikun Myhĩ Pé Eq Ikun Hpô Pé

3 Ikun myhĩ pé ê, haũ eq rajung za, yhumsing é ikun hpô uphkanq é a-ô má nyi keq; haũ hkûn, yhangmoq má é rayuq yuq, haũ mungdang lé a lumjıng kôlhang, ² yhumsing é asak duĩ hkyô má é sansêng é hkyô eq hkunggâ é hkyô lé myàng kôjáng, dang đông a nghut é za, yhâng é yhumsıng myhĩ é nyi yap é sãm-lai đông mai yhang lé wó lhoq lhik yũ rà nghut lhê. ³ Nungmoq yúng é hkyô gi, ahtoq pyâm za nghut é, xâmban nik é đông, hıng zê mhôn chung é eq réng é

mebu wut é đông mai lo é a ge nghut. ⁴ Hau é malaĩ, haũ gi, Garai Gasâng é hí má gũ bo é, nú-nhâm é eq zim za dut é woi-nyĩ é, a dat hpoĩ é yúng hkyô nghut é nungmoq é i-mytit unghkaũ má é su é yúng hkyô sheq dut rà lhê. ⁵ Hkâsu mù gâ le, gó hkûn, Garai Gasâng chyáng myit myoqbyũ bang nghut é, chyoiyúng é myiwe wui gi, yhangmoq gıng lé haũ đông mhôn yũ yũ kut kô é nghut lhê. ⁶ Sarah gi, Abraham é jıno gyo luĩ, yhang lé yhâng é yhumsıng ga wut é su, yhangmoq gi, ó le ô é yhumsing é ikun hpô uphkanq é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byızô pé nghut bê.

⁷ Ikun hpô pé ê, haũ eq rajung za, yhumsing é ikun myhĩ eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlĩ wó é bang đông, yhangmoq lé hkungga keq. Haũ hkûn, nungmoq é kyũdung dang lé a he-ngik pyám byi rà nghut lhê.

Ge É Kut Luĩ, Jamjau Hkam É Hkyô

⁸ Dang htâng sat é má, nungmoq ban-shoq bang gi, rayuq eq rayuq myit huĩ lhũm nyi keq; myit wú nô mù, gumang nhiktâng wui su chyitdap lhũm nyi keq; shogyo nhikmyin myit bò luĩ, i-mytit nyhum nyi keq. ⁹ Agè ashop é lé, agè ashop é đông lató a hpuq é eq rhoi é lé rhoi é đông lató a hpuq é za, shimân byi keq; haĩ mù gâ le, nungmoq gi, haũ pê é matú, shimân jeju muĩ wó hkam yũ kó sháng gaq ga, ji yu é hui kô é ru nghut lhê.

¹⁰ Hkâsu mù gâ le,

“Asak duĩ rà lé chyitdap é eq ge é buinyi pé lé myàng nau é sũ ó yuq le, yhâng é shô lé, agè ashop é mai, yhâng é nhutwuĩ lé, mhaũ dang taĩ é mai, lhoq kâng pyám ra rà nghut lhê.

^f2:22 Esai 53:9

¹¹ Yhang gi, agè ashop hkyô mai ling tau mù, ge é kut ra râ nghut lhê; yhang gi, nguínón simsaq hkyô lé hô mù, châng hkat nyi ra râ nghut lhê.

¹² Hkâsu mù gâ le, haû Yhumsing é myoqjî gi, dingmán bang lé wú nyi é nghut luí, yhangmoq é kyûdung dang lé, Yhâng é nohkyap êq gyo byí ri;

nghut kôlhang, haû Yhumsing é myoqdong gi, agè ashop hkyô kut bang lé gye dông myang pyâm ri.”⁸

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lúh? ¹⁴ Nghut kôlhang, dingmán hkyo é matú, nungmoq wuîhke jamjau huí le lhâng, nungmoq gi, hkungsô wó nyi ri. “Yhangmoq gyuq é hkyô lé hkâgyuq kó; hkâgyuq dân kó.”^h

¹⁵ Nungmoq kúm gi, myit nhiklhum má, Hkrisduq lé, Yhumsing dông jowò byi keq. Nang wó é myit myoqbyù hkyô lé myí é sù yuq hkanmó lé, haí mù wó é hkyô tú taí kyo râ matú, ayang hen to aq. Nghut kôlhang, nú-nhâm é eq hkunggâ é dông haû lé kut nyi aq; ¹⁶ nungmoq é unghkaû myit san za dut nyi keq, haú hkûn, Hkrisduq dông mai nungmoq wó é ge é a-kyang lé rhoi dang taí é bang gi, yhangmoq lumù gansang é yanmai hoq hpû é hui kó râ nghut lhê. ¹⁷ Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê. ¹⁸ Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pê é yubak marâ é yanmai, radàm za shí hkâm pyâm bê nghut ri; haû gi, dingmán Sû, a dingmán bâng é matú shí hkâm byí é nghut lhê. Yhang gi, gungdu shí bê nghut kôlhang, haû Woi-nyí má lhoq dui é hui bê nghut ri. ¹⁹ Yhang gi,

Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haú pé gi, anham lé, Noaq é ipyat má wuî-sanghpo lé Noaq tsuq nyi é hkûn Garai Gasang myit hîng hîng lánng nyi é u lé, jîno a gyô é bang nghut akô. Wui-sanghpo má wàng mù, wuî mai hkyi yù huí é byù shau luí, shit yuq za nghut akô. ²¹ Wui haû gi, ahkuí nungmoq lé le hkyi yu é nghut é baptisma é azông nghut ri; haû gi, gungdu mâ é agot a-û lé huí sêng pyâm byí é a nghut é za, sansêng é unghkaû myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kó é nghut lhê. ²² Yesuq Hkrisduq gi, mauhkûng má doq ló luí, Garai Gasâng é loqyò hkyam má nyi tô é nghut mù, mau-mang lagyô pé, ahkáng ayá pé eq a-tsam pé gi, Yhâng uphkan é a-ô má nghut nyi bum akô.

Garai Gasâng É Matú Asak Dui Râ Hkyô

4 Haû mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâm-lai hau êq yhumsing gùng má gye hking dông wut to keq, haí mù gâ le, yhâng é gungdu má hpuzo bê sù gi, mara eq gang bê nghut ri. ² Haû nghut é yanmai, yhang gi, yhang nyi tím tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê. ³ Hkâsu mù gâ le, nungmoq gi, lai lò bê ahkyíng má, a lumjîng shí é byu pé hkyin kut nau é hkyô nghut é, shut é dông nyi zô lhúm nau é i-myit, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye lhai râ wut jung zoshuq lé yut yut ô nau é hkyô, achaq achyut é hparâ noq hkyô pé

má, ahkyíng luq shoq nyi lâi lò bê bang nghut akô. ⁴Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵Nghut kôlhâng, yhangmoq gi, dui nyi é bang eq shí bê bang lé tarâ jéyáng rà rì rì nghut to Sù lé jihpán shit kyo ra kô rà nghut lhê. ⁶Hau é yanmai, ahkuí shi byuq bê bang lé lháng gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù dông mai tarâ jéyáng é hui rà eq, woi-nyí eq séng luí ga jang, Garai Gasang dông mai asak wó duí rà matú nghut lhê.

⁷Lhunglháng htum rà ahkyíng gi, chyáng bê nghut ri. Haú mù luí, nungmoq kyû wó dung kó sháng gaq, bûn gyíng luí, yhumsing gùng yhumsing hking nyí keq. ⁸Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gà le, chyitdap myit gi, yubak mara myo myo lé wó nghop pyâm é nghut lhê. ⁹Rayuq eq rayuq, taí nyung nyâng é hkyô a bo é za, rago hkulum lhum keq. ¹⁰Yuq hkingmó gi, yhumsing wó hkam yù bê chyunghuq eq rajung za, góbang lé dojaú rà lhê; Garai Gasâng jeju chyunghuq ajung jung lé, lhumzui é èq rago chung jài rà lhê. ¹¹Rayuq yuq taí é nghut jáng, Garai Gasâng é mungdang haú eq yhang rajung za taí ra rà nghut lhê. Garai Gasang gi, lunglháng má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú rà rà nghut lhê. Haú hpungwup shingking eq a-tsam gi, Yesuq Hkrisduq chyáng pyat dedu ah-tum abyuq joq nyí sháng gaq ô. Amen.

Hkristan Dut É Yanmai Jamjau Huí É Hkyô

¹²Chyitdap é luzúm wuí ê, wuíhke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó. ¹³Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingking eq rahá Yhang htoq shit é hkûn, nungmoq gi, gabú dik é hui kó rà nghut lhê. ¹⁴Hkrisduq é myíng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gà le, hpungwup shingking bo é Woi-nyí ngu é, Garai Gasâng é Woi-nyí gi, nungmoq chyáng nyi nyi ri. ¹⁵Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbang é mù má cháng gunjang sù dông jamjau huí é a dut sháng gaq. ¹⁶Nghut kôlhâng, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, myíng hau é yanmai hkya-ôn nyí keq. ¹⁷Hkâsu mù gà le, tarâ jéyáng rà ahkyíng gi, jé bê nghut luí, Garai Gasâng é ikun byu pé mai hí rà nghut lhê; haú gi, nga-nhúng mai hi é nghut jáng, Garai Gasâng é gabú danglù lé a châng é bang gi, hkâsu wá dut lò rà nghut lhê lhú?

¹⁸“Haú dingmán sù, hkyi yù hui rà wuí é nghut le gi, tarâ a hkunggâ é eq yubak dap é sù gi, hkâsu wá dut rà nghut lhê lhú?”¹
gâ tô ri.

¹⁹Haú nghut mù luí, Garai Gasang ô nau é dông jamjau huí é bang gi, yhum-sing gùng lé, lhumzui é Hpân Su chyáng ap byi mù, ge é lé xoq kut nyi ra rà nghut lhê.

Suwún Wuí Éq Zorâm Wuí

5 Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shing kang lé bo hkâm râ nghut sù đông mai sang kat kôlé: ² Nungmoq lé ap to bê nghut é Garai Gasâng é sau hpúng^{§§} lé zúng rém bang dut mù, shuí u bang đông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. ³ Nungmoq é loq má ap byí to bê bang lé a up zô é za, yhangmoq é hí má alik dut nyí keq. ⁴ Haú jáng, Sau zúng Agyí mó* htoq shit é hkûn, nungmoq gi, hpungwup shing kang bo é, hkâ-nhám le a shum a byuq é janmaú lé myang hap yà kô râ nghut lhê.

⁵ Zorâm wuí ê, nungmoq le, nungmoq htoq ipyat ko bâng é a-ô má nyí keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le,

“Garai Gasang gi, nghutbùn é bang lé hkûm zing pyám kôlhâng, myit lhoq nyhum é bang lé jeju byí ri.”[†]

ga tô ri. ⁶ Haú mù luí, ahkýing jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsing myit lé yhumsing lhoq nyhum nyí keq. ⁷ Nungmoq é myit chiq hkyô banshoq lé, Yhâng htoq má dú kê pyâm to keq, haí mù gâ le, Yhang gi, nungmoq é matú chiq byí nyí sù nghut lhê.

⁸ Yhumsing gùng lé yhumsing hkâng mù, machya nyí keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri.

⁹ Yhang lé htuq htíng pyám mù, lumjíng myit má gingtíng nyí keq, haí mù gâ le, mingkan gón mâ é nungmoq é gumang wuí le, rajung zâ é jamjau hkyô pé hui zô nyí kô é lé, nungmoq sê lhê.

¹⁰ Haú mù, jeju banshoq é Garai Gasang gi, Hkrisduq má ahtum abyuq joq nyí é Yhâng é hpungwup shing kang matú nungmoq lé ji yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, ging ging tíng tíng dut nhâng râ nghut lhê. ¹¹ Haú hpungwup a-tsam banshoq gi, Yhâng chyáng pyat dedu ahtum abyuq rú joq nyí sháng gaq. Amen.

Ló Htâng É Shi-kyám Dang

¹² Lhumzúi é gumang nghù ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kâ kat é nghut lhê. Tengmán é jeju haú má yap gíng nyí keq.

¹³ Babelon má nyí é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyí é nungmoq banshoq bâng chyáng ru joq nyí sháng gaq ô.

§§5:2 Sau hpúng gâ é gi, lumjíng bang lé gâ lhê.

*5:4 Sau zúng Agyí mó gâ é gi, Hkrisduq lé gâ é nghut lhê.

PETRUQ

Htang Dàm Hun Kat é Laiká

(2 Peter)

1 Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjúng hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Gíng Lhoq Tíng Râ Hkyô

³ Yhâng é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyo é matú nga-nhông rá é jung hkanmó lé byi bê nghut ri. ⁴ Haú pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkún, nungmoq gi, haú danggidiq pé dông mai, Garaí é myit sâmlai lé wó bo hkam yù rá eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô rá nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjúng hkyô má ge é hkyô lé jat yù keq; ge é hkyô má sumpsé hpaqchyí lé, ⁶ sumpsé hpaqchyí má yhumsing gùng yhumsing hkang é hkyô lé, yhumsing gùng yhumsing hkang é hkyô má jân shirang é hkyô lé, jân shirang é hkyô má tarâ hkunggá é hkyô lé, ⁷ tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù

keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng rá a nghut. ⁹ Nghut kôlhâng, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, laí lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wui é, nungmoq lé ji yu é hkyô eq hkyin yu é hkyô lé, je riyhang lhoq gíngtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó rá a nghut; ¹¹ hau htoq agó, nga-nhông é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó rá nghut lhê.

Chyúmdang Mã É Myiqhtoi Dang

¹² Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gíngtíng nyi kô é nghut kôlhâng, ngò, nungmoq lé hkâ-nhám le hau pé lé ru lhoq pún nyi rá nghut lhê. ¹³ Shí gungdu má ngò rû dui nyi nyi gi, nungmoq lé lhoq pún kying byí le ge ri nghú, ngò wó myit ri; ¹⁴ haí mù gâ le, nga-nhông é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to rá nghut é lé sê lhê. ¹⁵ Ngò htoq ló byuq é htàng má, nungmoq, hkâ-nhám le haú pé lé ru wó bûn nyi rá lé myàng nau mù, ngò, wó dut é í shikut nyi rá nghut lhê.

¹⁶ Nga-nhông é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkún, ngamoq gi, kut htoq yu é labyoq mhô-myi lé a châng é za, Yhâng

é kô làm hkikhkâm hkyô lé myoq èq myang é saksé pé nghut lhê. ¹⁷Hkâsu mù gà le, haù Kô Làm Hkikhkâm Hkyo é Hpungwup Shingkang mai, “Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê.”^k ga taí é htê, Yhâng chyáng jé é hkûn, haù Íwa Garai Gasâng chyáng mâ é aróng eq hpungwup shingkang lé Yhang wó hap yù bê nghut ri. ¹⁸Ngamoq yhang, chyoyíung bùm má Yhang eq rahá nyi tô é hkûn, htê haù mauhkûng mai htoq lo é lé wó gyô é nghut lhê.

¹⁹Haù mù luí, myiqhtoí pè dang lé je lhoq ging bê hkyô, ngamoq wó é nghut lhê; haù mù, maubó lô luí, nungmoq é myit má bó-myhú htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haù lé, nungmoq gyo mù rago châng kut rá dut lhê. ²⁰Banshoq htoq má, Chyúmdang mâ é myiqhtoi dang gi, haù myiqhtoí pé mai ó le ó lichyúm lhoq htoq yu é đông a nghut é lé, nungmoq sê to rá dut lhê. ²¹Hkâsu mù gà le, myiqhtoi dang gi, byù ô nau é đông hkâ-nhám lé a htoq wú é za, haù Chyoyíung Woi-nyí èq shuí u huí é bang mai, Garai Gasâng chyáng mâ é dang taí é ru nghut lhê.

Sará Apyoq Pê É Hkyô

2 Nghut kôlhang, myiqhtoi pyoq pé gi, Israelaq byù haù bâng é ahkaù má nyi wú bê nghut lhê, haù eq rajung za, nungmoq é ahkaù má le sará apyoq pé nyi rá za nghut lhê. Yhangmoq gi, htên byoq hkyô nghut é byoq gang rá mhoqshít hkyô pé lé, haq lhoq pyo é htoq agó, yhangmoq lé wuí yu é, Yhumsing lé lháng he-ngik pyám kó rá nghut lhê. Haù mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô rá nghut lhê. ²Byù myo myo gi, haù bâng é ahoq ahí hkyô má

cháng kó rá eq, tengmán hkyô lé taí hpoí pyám nhâng kó rá nghut lhê. ³Sará apyoq haù bang gi, yhangmoq myoqnoq é hkyô má, yhangmoq kut htoq tô é mhômyi đông nungmoq lé mhaù zo kó rá nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhâng to gù bê nghut é htoq agó, yhangmoq é htên byoq hkyô gi, yhup myhí tô nyi é a nghut.

⁴Hkâsu mù gà le, Garai Gasang gi, mara kut shut é maumâng pé lé lháng a ha bún é za, ngaraí ming má hkyô pyám luí, tará jéyáng é hui rá hkûn jé shoq, yhangmoq lé tuq tuq chut é dong hkaù má kat tô é nghut lhê. ⁵Yhang gi, tará a hkunggâ é byu pé lé dowuí tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotú nyhit yuq lé hung yu é nghut ri; ⁶Yhang gi, Sodom eq Gomoraq myuq lé, myi-mhop dut shoq nyhê hkyô pyám é đông mara dam byi luí, tará a hkungga bâng chyáng dut lò rá hkyô é azông kut tô é nghut ri; ⁷ nghut kôlhang, tará a chùng bâng é achaa achyut asak duì hkyo é yanmai myit wui myit hke huí é, haù dingmán sù Lot lé hkyi htoq yu é nghut ri; ⁸ (hkâsu mù gà le, dingmán sù haù gi, nyí hkangmó yhangmoq ahkaù má nyi nyi é nghut luí, tará a chùng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.) ⁹Haù su nghut é nghut jáng, Yhumsing gi, tará hkunggâ é byu pé lé, wuíhke hkyô mai hkâsu kut hkyi htoq yù rá eq, a dingmán é bang lé, tará jéyáng é buinyí jé shoq, dam byí é hkyô lé xoq kut nyi é u má hkâsu kut zuí zing to rá lé sê lhê. ¹⁰Haù yubak gungshô é htên byoq sê é yut yut ô naù hkyô châng é eq ahko ahkáng lé wú tiq bâng chyáng, haù hkyô hkyak dut rá nghut lhê.

^k1:17 Mht 17:5; Mrk 9:7; Luk 9:35

Byù haù bang gi, ngegáng-htu é eq nghutbùn é bang nghut kôluí, mauhkúng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haù Yhumsing é hí má, haù mauhkúng bang lé mara hun é đông lumù gansâng hkyô a wám kut kó nghut ri. ¹² Nghut kôlhang, haù sará apyoq pé gi, yhumsing a sê gyô é hkyô pé lé rhoí dang taí akô. Yhangmoq gi, haù chyup yu é hui luí, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haù pé su, yhangmoq le, htên byoq byuq kó râ nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô naù hkyô lhoq dik râ matú nghut ri. Yhangmoq gi, nungmoq eq rahá zoshuq poí kut kô é hkún, mhaù é lé yhangmoq é ngón hkyô kut kômù, agè agau é eq achau achyut é bang nghut akô. ¹⁴ Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkyíng kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kúng é bang nghut kômù, nhíng pyâm é hui bang nghut akô. ¹⁵ Yhangmoq gi, haù dítg é hkyô lé tô pyâm to kômù, Be-ora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yhang kut shut é hkyo é yanmai, logúng èq tân mhoqshit é hui ri; dang a dat nyo é logúng haù gi, byu é htê đông dang taí lò mù, myiqhtoi hpó a gyíng é hkyô lé hkúm tang pyâm ri.

¹⁷ Byù hau bang gi, wuì a bo é wuìh-tung eq, laidùn èq mut tâng ló é nghan-soq eq púng kômù, yhangmoq é matú gi, tuq tuq chut é mauchut hkaù lé la-jang to bê nghut ri. ¹⁸ Hkâsu mù gâ le, yhangmoq gi, asôm gyáng dang lé táí mù, yubak gungshô é yut yut ô nau é hkyô đông mai, haù shut shai é hkyô má asak dui nyi é mai asik za hpang htoq lo é bang lé, mhoq hpyoq yù akô nghut ri. ¹⁹ Yhangmoq gi, haù bang lé luthkyô byi râ gidíq byi kô é nghut kôle, yhangmoq gúng gi, htên byoq hkyô lhoq htoq é gungsho yut yut ô naù hkyo é jùn dut nyi akô; haí mù gâ le, byù rayuq gi, yhumsing lé hai èq up sing le, hai é jùn nghut lhê. ²⁰ Byu pé gi, nga-nhúng é Yhumsing eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hpang lut htoq bê nghut kôle, yhangmoq lé hau èq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ nghut lhê. ²¹ Haù dingmán é hkyô lé yhangmoq sé luí, yhangmoq lé ap byí to bê nghut é chyoiyúng hkunmó lé tô pyâm to mù lhing taù ló byuq kô é htoq má, haù hkyô lé a sê é gi, yhangmoq é matú je gè kó râ nghut lhê. ²² “Hkui gi, yhang hpat tô é lé dum taù zô lhê.” gâ é eq, “Waq gi, chí pyám byí é htâng, yhang é galhu htum má dum taù lhu lhê.”²¹ gâ é sanghkyang gi, yhangmoq chyáng dik bê nghut ri.

Haù Yhumsing Jé Lé Râ Buinyi

3 Chyitdap é luzúm wuì è, shí gi, nungmoq lé ngò í dá nghú râ dàm ká byí kat é laiká nghut lhê. Laiká shí í lhum má, nungmoq é sansêng é i-myt lé lhoq toq râ matú taí pún kat é laiká nghut lhê. ² Haù gi, chyoiyúng myiqhtoi pé mai laí lò bê hkún taí tô é dang pé eq, nga-nhúng é Yhumsing eq hkyi yù Sù mai, nung-

moq é lagyô pé dông byí to bê nghut é hkunmó lé, ngò, nungmoq lé bun nhâng naù luí nghut lhê.

³Sâng-hi má, ló htâng é buinyì pé má yhumsing é agè ashop ô naù hkyô má cháng luí taí hpoi bang htoq lô rà nghut é lé, nungmoq sê gyô to ra rà nghut lhê.

⁴Haù bang gi, “Dum jé lé rà’ ga Yhang gidiq byí é gi, hkâmá lhú? Nga-nhông é íchyí iwâ pé gi, shi byuq ló beko nghut mù, junghkang jungmó gi, mau htoq xâng hkun mai dut é su roq dut nyi ri.” ga taí kó rà nghut lhê. ⁵Nghut kôlhang, yhangmoq gi, a-nham lé, Garai Gasâng é hkunmó mai, mauhkông pé joq é eq, myigùng gi, wuì mai dut htoq nhâng mù, wuì dông hpan tô é hkyô lé, a sé gûn kut pyâm akô nghut ri. ⁶Wuì hau èq sheq, haù hkun lhê é mingkan lé dowuì títg mù, lhoq htên pyâm é nghut lhê. ⁷Ahkui lhê é mauhkông pé eq myigùng lé gi, tarâ a hkungga bang htên byoq hui rà nghut é, tarâ jéyáng é buinyì jé shoq, myi má nyhé rà matú, hkunmó hau èq Yhang hkong to bê nghut ri.

⁸Nghut kôlhang, chyitdap é luzúm wuì ê, haù Yhumsing é hí má, ra-nyí gi, zanwut rahkyíng dông, zanwut rahkyíng gi, ra-nyí dông nghut é hkyô shí lé, hkâtô-myhí kó. ⁹Haù Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq rà lé a ô nau é yanmai, yuq hkangmó myit lhing rà lé za ô naù mù, nungmoq lé myit hîng byí nyi é nghut lhê.

¹⁰Nghut kôlhang, haù Yhumsing é buinyì gi, hkau sù su a bûn nùng má jé rà nghut lhê. Haù buinyì má, mauhkông pé gi, mying hum htê eq byuq byuq rà nghut lhê; duqbó-gùng pé gi, myí èq lhoq htên pyâm é hui luí, myigùng eq haù má é joq mijoq gi, nyé gyó byuq rà nghut lhê.

¹¹⁻¹²Joq mijoq gi, haù hkyô dông lhoq htên pyâm é hui rà nghut é yanmai, nungmoq gi, hkasú é byu pé dut ra rà lhú? Nungmoq gi, haù Garai Gasâng é buinyì lé ho nyi é eq buinyì haù hân za jé rà lé ô nau nyi é hkún, chyoiyúng é eq tarâ hkunggâ é asak duì hkyô dông nyi ra rà nghut lhê. Buinyì haù gi, mauhkông pé lé, myí èq lhoq htên pyâm luí, duqbó-gùng pé le, lûm nyé luí, nyé yui pyâm é buinyì dut rà nghut lhê. ¹³Nghut kôlhang, nga-nhông gi, Garai é danggidiq nghut é, dingmán hkyô é yhûm, mauhkông asik eq myigùng asik lé, myoqbyu nyi é bang nghut lhê.

¹⁴Haù nghut mù luí, chyitdap é luzúm wuì ê, nungmoq gi, haù hkyô lé myoqbyu é bang nghut kô é yanmai, Yhang é hí má achaq achyut a dut é eq mara hân rà hkyô a bo é za, Yhang eq ngu-ingón nyí rà hkyô lé gyai yhang shikut nyi keq. ¹⁵Nga-nhông é chyitdap gumang Poluq gi, yhang lé, Garai Gasang byí tô é hpaqchyí byéng-yá èq, nungmoq chyáng ká byi bè eq rajung za, nga-nhông é Yhumsing é myit hîng hkyô gi, hkyi yù hkyô nghut é lé matsing to keq.

¹⁶Poluq gi, yhang kê é laiká pé banshoq má, haù hkyô pé eq séng luí rajung za kê shit tô ri. Yhang é laiká hkaù pé má, ra-am gi, sê gyo wuì é hkyô pé bo é yanmai, a mhoq wú é bang eq a gingtîng é bang gi, gotú Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsing htên byoq hkyô kut yu nyi akô nghut ri.

¹⁷Haù mù luí, chyitdap é luzúm wuì ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyo èq nungmoq lé a wó shuí nghoq yù rà eq, nungmoq é gaù é jowò mai a wó byit gyó byuq sháng gaq, yhumsing gùng yhumsing upzúng nyí keq. ¹⁸Nga-nhông é Yhumsing eq hkyi yù Sû nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq.

Hpungwup shingkang gi, Yesuq Hkris-
duq chyáng, ahkuí le, ahtum abyuq le,
ru joq nyí sháng gaq ô! Amen.

YOHAN

Hĩ Dàm Hun Kat é Laiká

(1 John)

Asak Mungdang

1 Ngò gi, haù sâng-hi mai joq nyì mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ²Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut ê ahtum abyuq é asak haù lé nungmoq lé taí kyô lhê. ³Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyì Râ Hkyô

⁵Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶Nga-nhúng gi, Yhang eq zùm yap nyi lhê nghû taí kôlháng, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô đông asak a dui é bang nghut ri. ⁷Nghut kôlháng, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸Mara a bò nghû nga-nhúng taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri. ⁹Nghut kôlháng, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê. ¹⁰Nga-nhúng gi, mara a kut shut nghû taí é nghut jáng, nga-nhúng mai Yhang lé mhaù sù nghû chyô pyám é nghut luí, Yhâng é mungdang gi, nga-nhúng má a bò nghut ri.

Hkrisduq Gi, Nga-nhúng Lé Garúm Sù

2 Ngò chyitdap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlháng, rayuq yuq mara kut shut é nghut le gi, nga-nhúng é matú haù Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê. ²Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

³Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴Byù rayuq yuq mai, “Ngò gi, Yhang lé rago sê lhê.” ga taí kôlháng, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. ⁵Ó yuq nghut kôlháng, Garai Gasâng é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri. ⁶Yhang má asak dui nyi lhê ga taí é sù ó yuq nghut kôlháng, Yesuq kut bê eq rajung za, châng kut râ lhê. Haù hkún sheq, nga-nhúng gi,

Yhang má nghut nyi bê hkyô lé, wó sê lhê.

Hkunmó Asik

⁷Chyitdap é luzúm wuî ê, ngò gi, nungmoq lé hkunmó asik ká byî kat é a nghut é za, haû sâng-hi mai nungmoq wó to bê hkunmó axau sheq ru nghut lhê. Hkunmó axau shî gi, nungmoq wó gyô wú bê mungdang nghut nyi ri. ⁸Nghut kôlhang, ngò gi, nungmoq lé hkunmó asik ká byî kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haû mauchut gi, laî ló byuq luî, haû tengmán é maubó gi, duq nyi gù bê nghut ri.

⁹Ngò gi, maubó hkaû má nghut nyi lhê ga luî, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashî. ¹⁰Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luî, yhang má myit leqbat nhâng râ hkyô haî le a bò nghut ri. ¹¹Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luî, haû má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hká shut e ló nyi é hkyô lé a sé nghut ri.

¹²Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luî, nungmoq lé ngò kê kat é nghut lhê.

¹³Îwâ pé ê, nungmoq gi, haû sâng-hi mai nyi é Sù lé sé bekô nghut é yanmai, nungmoq lé ngò kê kat é nghut lhê. Zorâm wuî ê, nungmoq gi, haû agê ashop sù lé ûng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuî ê, nungmoq gi, haû Îwa lé sé bekô nghut é yanmai, nungmoq lé ngò kê kat é nghut lhê.

¹⁴Îwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê. Zorâm wuî ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agê ashop sù lé ung pyám bekô nghut é yanmai, nungmoq lé ngò kê kat é nghut lhê.

Mingkan Lé A Chyitdap Râ Hkyô

¹⁵Mingkan eq mingkan htoq mâ é haî le lé, hkâchyitdap kó. Byù rayuq yuq, mingkan lé chyitdap é nghut le gi, haû Îwa lé chyitdap é myit, yhâng chyáng a bò nghut ri. ¹⁶Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjî yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Îwâ chyáng mai htoq lo é a nghut, haû mingkan mai htoq lo é ru nghut lhê. ¹⁷Mingkan eq mingkan ô nau hkyô pé gi, laî ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ah-tum abyuq dui nyi râ nghut lhê.

Hkrisduq É Gye Pé

¹⁸Chyitdap é zo wuî ê, shî gi, ló htâng é ahkyíng nghut bê; haû anti-hkrisduq[†] gi, lé lo nyi ri gâ é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri. ¹⁹Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq

[†]2:18 Anti-hkrisduq nghú é lichyúm gi, Hkrisduq lé gyè kut é sù lé gâ lhê

lhang nga-nhung eq a sêng é hkyô lé tân shit bê nghut ri.

²⁰ Nghut kôlhang, nungmoq gi, haû Chyoiyúng Sû mai xû but byî é hui[‡] bekô nghut mù luí, nungmoq banshoq bang haû tengmán hkyô lé sê akô nghut ri.

²¹ Haû tengmán hkyô lé nungmoq a sé kôluí, nungmoq lé ngò kê kat é a nghut; haû hkyô lé nungmoq sé gù nghut luí le, haû mhaû é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kê kat é nghut lhê.

²² Mhaû é sù gi, ó yuq nghut lhê lhu? Haû Yesuq gi, Hkrisduq a nghut ga he pyâm é sù nghut ri. Haû Íwa eq Yhangzo lé he-ngik é sù gi, anti-hkrisduq yhang nghut nyi ri. ²³ Haû Yhangzo lé he-ngik sù ó yuq nghut kôle, haû Íwa lé sé sù a nghut. Haû Yhangzo lé hap yu é sù kúm gi, haû Íwa lé le sé bê sù nghut lhê.

²⁴ Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haû nghut jáng, nungmoq gi, haû Yhangzo eq Íwa chyáng nyi nyi rá nghut lhê. ²⁵ Haû gi, nga-nhung lé Yhang byî tô é ahtum abyuq é asak wó yû rá gâ é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bâng é hkyô eq séng luí, nungmoq lé shí gù kê kat é nghut lhê. ²⁷ Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luí, mhoqshit rá góyuq a ra lo nghut ri. Nghut kôlhang, haû Yhâng é xû but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luí, mhaû é hkyô haí le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wuê ê, nga-nhung gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é,

wó dut rá matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

Garai Gasâng É Yhangzô Pé

3 Nga-nhung gi, haû Garai Gasâng é yhangzô pé ga wut rá hui bê nghut é yanmai, haû Íwâ é chyitdap myit gi, nga-nhung ahtoq má hkâ-í yhang ko nyi ri myhi-nhung! Nga-nhung gi, yhangzô pé yhang nghut bu-nhung! Mingkan gi, Yhang lé a sé é yanmai, nga-nhung lé le a sé nghut ri. ² Chyitdap é luzúm wuê ê, ahkuí, nga-nhung gi, Garai Gasâng é yhangzô pé nghut nyi to kôlhang, nga-nhung hkâsu dut rá hkyô lé, a tân shit shi nghut ri. Nghut kôlhang, Hkrisduq htoq shit é hkûn, nga-nhung gi, Yhang su dut rá nghut é hkyô lé, nga-nhung sê lhê; hkâsu mù gâ le, Yhang hkâsu nghut é hkyô lé roq yhang, nga-nhung myàng rá nghut lhê. ³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu laí é sù nghut ri; gè gè ga jang, mara gi, tarâ lu laí é hkyô nghut nyi ri. ⁵ Nghut kôlhang, Yhang gi, nga-nhung é yubak mara lé hkyut pyám byi rá matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyí nghut ri; mara xoq kut nyí sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wuê ê, nungmoq lé ó yuq èq le hkyô a shuí nghoq kó sháng

[‡]2:20 Xû but byî é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haù gi, sâng-hi mai yhang mara kut nyi bê nghut ri. Haù Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lhê gâ é hkyô haù gi, sâng-hi mai nungmoq wó gyô yù bê danglù nghut ri. ¹² Haù agè ashop sù eq le séng é, yhanggu lé sat pyâm é Ka-in su a ge kut. Yhang gi, haù mù luí yhanggu lé sat pyâm lhê lú ga le, yhâng é muzó pé gi, agè ashop hkyô, yhanggû é muzó pé gi, dingmán é hkyô nghut é yanmai nghut ri. ¹³ Ngá é gumang wui ê, nungmoq lé mingkân èq a ngui a jú kut kôlhang, hkâmaù kó. ¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byi pyám bê lé wú jáng, chyitdap myit hkasú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byi pyám gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò râ lú? ¹⁸ Chyitdap é zo wui ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng. ¹⁹ Haù hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkangmó, Garai Gasâng é hí má nga-nhúng i-myt wó ngón nyi bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkangmó lé sê nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyùm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haù lé le kut é yanmai, nga-nhúng dúng é hkyô lhungl-háng lé, Yhâng chyáng mai wó yú râ nghut lhê. ²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjáng é eq, rayuq eq rayuq chyitdap lhum é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haù bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byi tô é Woi-nyí đông nga-nhúng wó sê yu é nghut lhê.

Woi-nyí Pé Lé Gôn Wú Râ Hkyô

4 Chyitdap é luzúm wuí ê, woi-nyí hkanmó lé hkálumjǐng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ²Garai Gasâng é Woi-nyí lé nungmoq wó sê yù râ hkyô gi, shí dông nghut lhê: haú Yesuq Hkrisduq gi, gungsho dông jé lé bê ga, yín yu é woi-nyí hkanmó gi, Garai Gasâng chyáng mâ é nghut lhê. ³Nghut kôlháng, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lháng mingkan htoq má nyi to gù nghut é anti-hkrisduq é woi-nyí nghut ri.

⁴Chyitdap é zo wuí ê, nungmoq gi, Garai Gasâng chyáng mâ é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sû gi, mingkan má nyi to su htoq je kô ri. ⁵Yhangmoq gi, mingkan eq sêng é bang nghut lhê mù luí, mingkan hkyam dông taí bum akô; mingkan zo wuí le yhangmoq é dang lé gyo byí akô nghut ri. ⁶Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlháng, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yú bê nghut ri.

Garai Gasang Gi, Chyitdap Myit

⁷Chyitdap é luzúm wuí ê, nga-nhúng gi, rayuq eq rayuq chyitdap lhúm nyi sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù

nghut ri. ⁸Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shihtai gunglik hkungga dut sháng gaq ga, Yhang Zo lé nhang kat byí é nghut ri; haú gi, chyitdap myit yhang nghut bê. ¹¹Chyitdap é luzúm wuí ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê. ¹²Garai Gasang lé ó yuq èq le, hkâ-nhám lháng myang wú é a nghut; nghut kôlháng, nga-nhúng rayuq eq rayuq chyitdap lhúm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup râ nghut lhê.

¹³Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. ¹⁴Haú Íwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵Ó yuq nghut kôlháng, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê nghut ri. ¹⁶Nga-nhúng gi, Garai Gasâng èq nga-nhúng lé chyitdap é hkyô lé, sé luí lumjǐng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luí, Garai Gasang le haú yuq má nyi nyi bê

nghut ri. ¹⁷ Haú đông mai, chyitdap myit gi, nga-nhung chyáng gumjup bê nghut luí, nga-nhung gi, tarâ jéyáng é buinyi má a gyuq a kyum é myit wó yú râ nghut lhê; hkâsu mù gâ le, nga-nhung gi, mingkan shî má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sủ gi, chyitdap myit má gumjup sủ a nghut.

¹⁹ Yhang hí nga-nhung lé chyitdap bê nghut é yanmai, nga-nhung le chyitdap nyi lhê. ²⁰ Byù rayuq yuq gi, “Ngò, Garai Gasang lé chyitdap lhê.” ga tái kôlhang, yhang é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsing byu-myang é gumang lé lhang a chyitdap é sủ gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sủ ó yuq le, yhumsing gumang lé le chyitdap râ lhê gâ é dang haú gi, nga-nhung é matú, Yhang mai hkyô tô é hkunmó nghut lhê.

Garai Gasâng É Yhangzo Lé Lumjúng Hkyô

5 Yesuq gi, haú Hkrisduq nghut ri ga lumjúng é sủ ó yuq nghut kôle, Garai Gasâng chyáng mai hku kat bê sủ nghut ri; íwa lé chyitdap é sủ ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhung wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai

mó a nghut. ⁴ Hkâsu mù gâ le, Garai Gasâng chyáng mai hku kat bê sủ ó yuq nghut kôle, mingkan lé ung pyám bê nghut ri. Nga-nhung é lumjúng myit gi, mingkan lé nga-nhung ung pyâm é ong-dang hkyô nghut ri. ⁵ Yesuq gi, Garai Gasâng é Yhangzo nghut é lé lumjúng é sủ mai lai luí, mingkan lé wó ung pyâm é sủ gi, ó yuq wá nghut lhê lhu?

⁶ Haú yuq gi, wui eq sui⁴ mai lé é sủ, Yesuq Hkrisduq yhang nghut nyi ri. Yhang gi, wui mai za lé é a nghut, wui mai le, sui mai le, lé é sủ nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wui le, sui le, haú sủm lhum é saksé hkâm akô nghut ri; ⁸ haú sủm lhum gi, rajung za nghut akô. ⁹ Nga-nhung gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri. ¹⁰ Garai Gasâng é Yhangzo lé lumjúng é sủ gi, saksé haú lé yhang é i-myt má wó bê nghut ri; Garai Gasang lé a lumjúng é sủ kúm gi, Yhang lé byù mhaú rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjúng é yanmai nghut ri. ¹¹ Nga-nhung lé, Garai Gasang byí é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri. ¹² Garai Gasâng é Yhangzo lé wó sủ gi, asak haú lé wó bê; Yhang Zo lé a wó sủ gi, asak haú lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjúng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghu, shí hkyô pé lé ngò

⁴5:6 Wui eq sui nghu é gi, Yesuq baptisma hkam yu é hkyô eq shî hkâm é hkyô lé tái nau é nghut ri.

ká byi kat é nghut lhê. ¹⁴Nga-nhúng hai dúng le le, Garai Gasang ô nau é đông nghut jáng gi, Yhang gyo byi râ nghut lhê; haù gi, Yhâng é hí má nga-nhúng a gyuq a kyum wó wâng râ matú nghut ri. ¹⁵Haù mù, nga-nhúng hai dung kôlhang, Yhang gyo byi é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

¹⁶Ó yuq nghut kôle, yhumsing é gumang hpó mai shi a gíng é mara kut shut é lé, myang é nghut le gi, haù yuq é matú kyúdung byi râ lhê. Haù hkûn, Garai Gasang gi, haù yuq lé asak byi râ nghut lhê. Haù gi, shi a gíng é mara wó bâng é matú tai é nghut lhê. Shi gíng é mara le joq lhê; nghut kôlhang, hau é matú dung râ lhê nghû, ngò tai nyi é a nghut. ¹⁷A dingmán é hkyô lunglhang gi, mara nghut lhê; nghut kôlhang, shi a gíng é mara le joq lhê.

¹⁸Garai Gasang chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haù Garai Gasang é Yhangzo gi, haù yuq lé wú zúng nyi é nghut mù luí, haù agè ashop sù gi, haù yuq lé wó záng htung râ a nghut. ¹⁹Nga-nhúng gi, Garai Gasang é yhangzô pé nghut é lé le, mingkan gón lé haù agè ashop su èq up tô é hkyô lé le, sê lhê. ²⁰Hau htoq agó, Garai Gasang é Yhangzo jé lé luí, haù tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haù tengmán Sù má le nyi nyi bê nghut lhê. Yhang gi, haù tengmán é Garai Gasang eq ahtum abyuq é asak nghut nyi lhê.

²¹Chyitdap é zo wui ê, hparà hó pé lé koi pyâm nyi keq.

YOHAN

Htang Dàm Hun Kat é Laiká

(2 John)

1 Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ²nga-nhúng eq ahtum abyuq ru joq nyí rã nghut é tengmán hkyo é yanmai, haú tengmán hkyô lé sê é lhunglhang bang le, nungmoq lé chyitdap nyi lhê.

³Haú Íwa Garai Gasang eq Íwã é Yhangzo Yesuq Hkrisduq chyáng mã é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô mã, nga-nhúng eq rahá joq nyí sháng gaq.

⁴Haú Íwa mai nga-nhúng lé hkunmó hkyô tô é eq rajung za, nung zô pé ram gi, haú tengmán hkyô mã châng nyi é hkyô lé, ngò wó sê é yanmai, gyai yhang gabú nyi lhê. ⁵Chyitdap é hpô-myhí ê, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut. ⁶Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nung-

moq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyí rã matú nghut lhê.

⁷Hkâsu mù gâ le, Yesuq Hkrisduq gi, gungsho đông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut rã nghut lhê. ⁸Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq. ⁹Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhkaú mã hkâwâng nhâng kó; yhang lé hkâlhom xoq yù kó. ¹¹Hkâsu mù gâ le, haú yuq lé lhom xoq yu é sù gi, yhâng é agè ashop é muzó mã lòm bê sù nghut ri.

¹²Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum rã lé myit myoqbyu nyi lhê.

¹³Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN

Súm Dam Dàm Hun Kat é Laiká

(3 John)

1 Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

²Chyitdap é luzúm hpó ê, ngò gi, haù náng é asak woi-nyí nyi-ngón yuqyo nyi é eq rajung za, nàng nguingón wángzán rá eq hkyô hkat hkangmó má, nyi-ngón yuqyo nyi sháng gaq ngú, kyúdung byí kat lhê. ³Hkâsu mù gà le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkún, gyai yang gabú é yanmai nghut lhê. ⁴Haù tengmán hkyô má, ngá zô pé châng nyi é hkyô lé, ngò wó gyô é hkún gabú é í, gotú gabú hkyô a wó lo nghut ri.

⁵Chyitdap é luzúm hpó ê, haù gumang wui gi, mau we bíng pé nghut to kôlhang, nàng yangmoq lé lhom garúm yu é hkyô má, nàng gi, lhumzui nyi ri. ⁶Yangmoq gi, haù noqkuq hpúng má é bang lé, náng é chyitdap myit eq séng lui taí kyo bekô nghut ri. Nàng gi, Garai Gasâng hí má gingdán é dông, yangmoq é hkyowui matú garúm lui, dé kat é nghut jáng, ge é muzó jizó kut é nghut bê. ⁷Hkâsu mù gà le, yangmoq gi, Hkrisduq é myìng hau é matú htoq ló kôlú, a lumjìng bâng chyáng mai hái lhang a hap yù kó nghut ri. ⁸Haù mù lui, nga-nhúng gi, haù tengmán hkyô é matú

rahá za wó chòm zui saí sháng gaq, haù sù é byu pé lé lhom hkúlum yù rá lhê.

⁹Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰Haù mù lui, ngò lé jé jáng gi, ngamoq lé a jo a âng é dang taí é eq lumù gansang é, yang kut é muzó lé, taí hpýi kyo rá nghut lhê; yang gi, haù hkyô lé myit a dik shí é nghut mù lui, yang yang le gumang wui lé a lhom hkúlum yù, lhom hkúlum yù naù bang lé le, yang mai hkúm zing pyám lui, yangmoq lé haù noqkuq hpúng mai hkat htoq pyám ri.

¹¹Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shí é sù nghut ri. ¹²Demetri ge é hkyô lé, yuq hkangmó mai le, haù tengmán hkyô èq le, saksé hkám byí akô nghut ri; ngamoq le, yang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.

¹³Ngò gi, nang lé ká kat ra hkyô myo myo joq kôlhang, kâjung eq kâjung-chi dông a ká kat naù lo. ¹⁴Ngò gi, a myáng má, nàng eq myang huí lhum rá lé myit myoqbyu tô lhê. Haù hkún sheq, ngá-nhik myoqdong hkyùm myang nyo lhum rá nghut lhê.

¹⁵Nàng nguingón yuqyo nyi sháng gaq; shí má é luzúm wui gi, nang lé shi-kyám kat akô nghut ri. Nàng le, haù má é luzúm wui lé, myìng du htau lui bo shi-kyám byi laq.

YUDE

Hun Kat é Laiká

(Jude)

1 Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq jí yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.

²Shogyo nhikmyin hkyô, nuingón hkyô eq chyitdap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

³Chyitdap é luzúm wuê ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kâ kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjáng hkyo é matú nungmoq htuq htíng rá dut é lé, myit wum byi rá hkyô ká rá dut é lé, ngò byu-myang ri. ⁴Hkâsu mù gâ le, haù mara dam byí é hui zo rá hkyô lé, a-nham pyat mai kâ matsíng tô é hui bê bang ram gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglhang wó sù, Yesuq Hkrisduq lé he-ngik pyám akô nghut ri.

⁵Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsíng Garai mai, Yhâng é byu pé lé, Egotuq ming mai hkyi

htoq yù kôlhang, a lumjáng é bang lé gi, htâng má dum lhoq htên pyâm é nghut lhê. ⁶Hau htoq agó, haù yhumsing é ayá lé tô pyám luí, yhumsing é nyì jowò lé pyâm tô é maumâng pé lé, Yhang gi, haù tarâ jéyáng é hui rá Buinyì mó jé shoq, ahtum abyuq é toqjâng tuí èq tui luí, mauchut hkaù má lhùng tô é nghut lhê. ⁷Haù eq rajung za, Sodom eq Gomoraq myuq eq hau é awui ayàm mâ é wà pé mâ é bang gi, ashop é đông gungsho zùm yap é hkyô shut é eq myiwe yhangchang yuqgè yhangchang nyì zô lhùm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. ⁹Nghut kôlhang, haù maumang lagyo agyì Mihkaelaq lhang gi, Mosheq é gùng eq séng luí, haù nat zau eq dang rhâng lhùm é hkún, yhang lé rhoi é đông mara hùn dang a wám taí é za, “Nang lé, haù Yhumsíng nhik-yo sháng gaq!” ga za taí ri. ¹⁰Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyâm akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lhang, yhumsing gùng lé lhoq htên yu akô nghut ri.

¹¹Yhangmoq gi, dingnyé wó rá! Hkâsu mù gâ le, yhangmoq gi, Ka-in[§] kut é agé ashop é hkyô đông cháng kô é yanmai le, akyú wó rá matú, Balam^{**} shut é đông bo shut kô é yanmai le, Kora^{††} é gumlau toq hkyô kut kômù, yhang su htên byoq byuq é hui kô é yanmai le nghut ri.

§1:11 Ka-in gi, yhanggu lé sat sù nghut lhê. Apùn 4:1-8

**1:11 Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35

††1:11 Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

¹²Yhangmoq gi, nungmoq é chyitdap zoshuq poî má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkún, yhumsing gùng lé za yhum-sing lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpún pyám luí, í dâm shi é, xung nám lhê é sikgâm pé su nghut akô. ¹³Yhangmoq gi, yhumsing é hoq jung lé, tsú-myup su htoq nhang é, haû wuimau mâ é kô é wuilhêng pé eq, tuq tuq chut é mauchut hkaû má tarâ jéyáng hui râ matú, ahtum abyuq tô to huí é, yông wún é kyí pé su nghut akô.

¹⁴Byù haû bang eq séng luí, Adam mai byùxik nyhit xik má nyi é Eruk, myiqh-toi htoi tô é gi, “Wú keq, haû Yhum-sing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵Yhang gyó lé lo é gi, yuq hkangmó lé tarâ jéyáng râ matú eq, haû tarâ a hkunggâ é lhunglhâng bang, tarâ a hkunggâ é đông kut é muzó pé ban-shoq lé le, tarâ a hkunggâ é yubak byu pé, Yhang lé taí shut é dang htân pé ban-shoq lé le, mara byi râ matú nghut lhê.” gâ ri. ¹⁶Byù haû bang gi, put dang taí é bang eq mara hûn dang taí é bang nghut akô; yhangmoq gi, yhumsing ô nau é agè ashop hkyô cháng kô é htoq agó, yhum-sing gùng yhumsing nghutbún é dang taí é eq yhumsing maiwáng zat é đông, góbang lé owaq é bang nghut akô.

Hkam Jân Râ Hkyô

¹⁷Nghut kôlhâng, ngò chyitdap é luzúm wuí ê, nungmoq gi, haû nga-nhông é Yhumsing Yesuq Hkrisduq é lagyô pé mai te taí tô é dang lé, bûn nyi

keq. ¹⁸Hkâsu mù gâ le, yhangmoq gi, “Haû ló htâng é ahkyíng pé má, tarâ a hkunggâ é yhumsing ô nau é hkyô đông châng é, rhoijap-dap dang taí é byu pé nyi to râ nghut lhê.” ga, nungmoq lé taí wú kô é nghut lhê. ¹⁹Byù haû bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.

²⁰Nghut kôlhâng, ngò chyitdap é luzúm wuí ê, nungmoq gi, haû Chyoiyúng Woi-nyí má kyúđung é đông, nungmoq é chyoiyúng é lumjúng hkyô má, yhumsing gùng yhumsing lhoq kô yu nyi keq. ²¹Ahtum abyuq é asak lé wó yú râ matú, haû nga-nhông é Yhumsing Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²²Lumjúng hkyô má úng-âng é bang lé, shogyo nhikmyin nyi keq; ²³góbang lé gi, myi mai she htoq yú mù, hkyi yú keq; dum, góbang lé gi, sidiq myit èq shogyo nhikmyin hkyô tûn shit mù, haû gung-shô é achâq achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵Nungmoq lé, a lingbat shoq wó upzúng luí, nungmoq lé, mara hûn râ hkyô a bo é za, gabú dik é đông mai Yhang é hpungwup shingkang bo é myoq hí má wó shuí shit é, nga-nhông é hkyi yú Sû, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq đông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN

Laiká

(Revelation)

Dang-hi Hpóng

1 Yesuq Hkrisduq é shing-rán shí gi, adê myáng má dut lò rà hkyô pé lé, Yhâng é dui-nhâng zoshâng wui lé tân shit nhâng rà matú, Garai Gasâng èq Yesuq Hkrisduq Yhang lé byí tò é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, shing-rán haú sé nhang ri. ²Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. ³Haú ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luí, haú má kâ tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le, ⁵lhumzúí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nuingón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí èq, nga-nhúng lé, nga-nhùng é mara

pé mai lhoq lhut byí é eq, ⁶Yhâng é Garai Gasang eq Íwa lé dojaú rà matú, nga-nhúng lé, mingdán byu pé eq hkyangjông pé^{‡‡} dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷Wú keq, Yhang gi, mhut mai lé lo nyi é nghut luí, myoqjí hkgámó gi, Yhang lé myàng kó rà nghut lhê; haú Yhang lé htaú rot bang^{¶¶} lháng, myàng kó rà nghut lhê; haú myidàm htoq mâ é byú lhunglhang bang gi, Yhâng é yanmai, yón ngau é hui zo kó rà nghut lhê.

Haú dông nghut sháng gaq! Amen.

⁸“Ngò gi, Alhpa eq Omega^{§§} nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê.” ga, haú Yhumsing Garai Gasang taí ri.

Byu Yhangzo Su Dut Su É Hkyô

⁹Yesuq é, wuñke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê. ¹⁰Haú Yhumsing é Buinyì* má, ngò gi, Woi-nyí èq shuí moq byuq ló é nghut mù, “Nàng myang é eq rajung za, chyúmding ralhú má ká luí, Ehpesu, Samurna, Pergamu, Htu-atira, Sardi, Hpiladehpi eq Ladoki wà pé má joq é, ¹¹noqkuq hpúng nyhit lhúm chyáng hun kat aq.” ga, tut htê su gâ é htê mó, ngá é nunghtáng má mying é lé, ngò wó gyô ri.

‡‡1:6 Htoq Ló 19:6

¶¶1:7 Htaú rot bang gâ é gi, Yesuq tapzîng má jén to huí é hkûn, Yhâng é namcham má lham èq htaú é bang lé gâ lhê.

§§1:8 Alhpa eq Omega gi, Grik laiká myhí mâ é sâng-hi cham eq ló htâng cham nghut lhê; haú taí nau é gi, rû dui nyi sù gâ é nghut lhê.

*1:10 Yhumsing é Buinyì gâ é gi, yuban nyí lé gâ lhê.

¹²Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le, ¹³myi-kok tsungjang haú pè é agùng má, byu yhangzo su dut é Sû rayuq nyi tô é lé le, myang kat ri; haú yuq gi, hkyigoq htoq jé é buhîng wut to luî, wànggàng má hîng wànggò le wut tô ri. ¹⁴Yhâng é ullum eq xâm gi, sau hpyû maú eq gyo su hpyu zan tô ri; Yhâng é myoqjî gi, myishâm su duq nyi ri. ¹⁵Yhâng é hkyî gi, myi bungghyûng má jên yu é jet é gyi su dut ri; Yhâng é htê gi, wui myo myo mying hûm é htê su gà ri. ¹⁶Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyî gûng bui su tso nyi ri.

¹⁷Yhang lé myang é hkûn, ngò gi, shî gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, “Hkâgyuq, Ngò gi, Sâng-hi eq Jihtûm nghut lhê. ¹⁸Ngò gi, dui nyi Sû le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shî hkyô eq momîng é zoqshi pé lé chûng Su nghut lhê.

¹⁹Haû mù, nàng myang é lé le, ahkui dut é hkyô eq htàngnùng le dut lò râ hkyô lé le, kê to aq. ²⁰Nàng myang é, Ngá é loqyo loq mã é kyî nyhit cham eq hîng myi-kok tsungjang nyhit lhûm é zaú tô é hkyo é lichyûm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

Ehpesu Myuq Mã É Noqkuq Hpúng Lé Kâ Kat É Laiká

2 Ehpesu myuq mã é noqkuq hpúng é maumang lagyo lé isu nghû kê kat aq:

Haû yhâng é loqyo loq mã kyî nyhit cham chûng luî, hîng myi-kok tsungjang nyhit lhûm é gyoro mã sô nyi Su é dang gi, ²Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haû lagyo a nghut kôlhang, lagyô pé nghut lhê gà é bang lé, nàng chyam wú mù, yhangmoq lagyo apyoq pé nghut é lé wó sê yu kô é hkyô lé le, Ngò sê lhê. ³Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hûn râ hkyô joq ri. ⁵Nàng hká mai byit gyó é lé, myit bun aq! Myit lîng luî, sâng-hi nàng kut é muzó pé lé, kut aq. Nàng myit a lîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huî pyám byi râ nghut lhê. ⁶Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashî nghut ri.

⁷Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haû Garai Gasâng é hparadisu mã joq é asak siggâm mã é ashî zo râ ahkáng, Ngò byi râ nghut lhê.¹ gâ ri.

Samurna Myuq Mã É Noqkuq Hpúng Lé Kâ Kat É Laiká

⁸Samurna myuq mã é noqkuq hpúng é maumang lagyo lé isu nghû kê kat aq:

Haû Sâng-hi eq Jihtûm nghut é eq, shi byuq luî, asak dum dui Su é dang gi, ⁹Nàng hui zô é wuîhke

jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò sê lhê.¹⁰ Nàng hui zo râ nghut é wuîhke hkyô lé, hkâgyuq. Ngò, nungmoq lé taí kyo kôlé, haú nat Tsadán gi, nungmoq lé chyam wú é dông, nungmoq chyáng mã é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-rí é hui zo kó râ nghut lhê. Shí shoq lhumzuí nyi aq, haú hkún, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Í dâm nghû râ shi é hkyô[†] gi, wó ung é sù lé, wó záng htung râ a nghut.' gâ ri.

Pergamu Myuq Mã É Noqkuq Hpúng Lé Kâ Kat É Laiká

¹² Pergamu myuq mã é noqkuq hpûng é maumang lagyo lé isu nghû kâ kat aq:

Haú shamsó í shut dap é shâm wó Su é dang gi, ¹³ Nàng nyi é jowò lé, Ngò sê lhê; haú gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkún lhang, nàng Ngo lé lumjínng é hkyô lé, a hengik pyám nghut ri.

¹⁴ Nghut kôlhang, Ngò, nang lé mara hûn râ hkyô ratsuí joq ashí; hkâsu mù gâ le, hparà lhô pé lé tîng byí é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq

hpyoq râ hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri. ¹⁵ Haú eq rajung za, haú Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haú mù luí, myit lhíng aq! Haú a nghut jáng, Ngò gi, náng chyáng hân jé lé mù, haú Ngá nhut mai htoq é sham èq yhangmoq lé zan râ nghut lhê.

¹⁷ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kâ tô é luqgok hpyú racham lé le, Ngò byi râ nghut lhê, lhom hap yu é sù za sheq, myíng haú lé sé râ nghut lhê.' gâ ri.

Htuatira Myuq Mã É Noqkuq Hpúng Lé Kâ Kat É Laiká

¹⁸ Htuatira myuq mã é noqkuq hpûng é maumang lagyo lé isu nghû kâ kat aq:

Haú myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi, ¹⁹ Náng é a-kyang, chyitdap myit, lumjínng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôlhang, yhumsing gùng yhumsîng myiqhitoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wuì lé, ashop é dông gungsho zùm yap râ eq hparà lhô pé lé tîng byí é zoshuq zo râ hkyô lé mhoqshit luí, yhangmoq lé hkyô shuí nghoq ri. ²¹ Ngò gi, yhang lé, ashop é dông gungsho zùm yap é hkyô mai myit lhíng

[†]2:11 Í dâm nghû râ shi é hkyô gâ é gi, ngaraí ming wang é lé gâ lhê.

râ ahkyíng byi kôlhang, yhang gi, a myit lêng naù nghut ri. ²²Haù mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhang-moq kut é hkyô lé myit lêng kô é za a nghut jáng, wuñhke jamjau mó hui zo nhâng râ nghut lhê. ²³Ngò gi, yhang zô pé lé sat pyám râ nghut lhê; haù hkûn, Ngò gi, myit nhikhum eq myit é hkyô lé sé Sû nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haù noqkuq hpúng pé banshoq wó sé kó râ nghut lhê. ²⁴Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò táí kôlé, nungmoq lé gotû wòlai Ngò jat byi râ a nghut. ²⁵Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷Wó ung é eq Ngò ô nau é hkyô lé jihâtum jé shoq châng é sù lé gi,

“Yhang gi, yhangmoq lé, shamtoq dumbáng eq up[‡] râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê.”ⁿ

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸Ngò gi, yhang lé, haù bó-myhû byi râ nghut lhê. ²⁹Gyo râ nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

Sardi Myuq Mã É Noqkuq Hpúng Lé Kâ Kat É Laiká

3 Sardi myuq mã é noqkuq hpúng é maumang lagyo lé isu nghû kâ kat aq:

Haù Garai Gasâng é woi-nyí nyhit woi-nyí eq kyí nyhit cham lé chùng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhang, shi byuq sù nghut ri.

²Gyíng lò aq! Myit gyó tô é, shi byuq râ za nghut é pé lé, wum-o lhoq kíng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

³Haù mù, nàng hkâsu kut wó hap yu é eq wó gyô yu é hkyô lé, myit bun aq; haù dòng cháng luí, myit lêng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haù bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵Wó ung é sù gi, haù bang su, hpyu é mebu myang wut râ nghut lhê. Ngò gi, haù yuq é myíng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pé é hí má le, haù yuq é myíng lé, Ngò yín yù râ nghut lhê. ⁶Gyo râ nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

[‡]2:26-27 Shamtoq dumbáng eq up gâ é gi, ahko ahkáng banshoq wó luí, up é lé gâ lhê.

ⁿ2:26-27 Hkya-on 2:9

**Hpiladehpi Myuq Mã É Noqkuq
Hpúng Lé Kâ Kat É Laiká**

⁷Hpiladehpi myuq mã é noqkuq hpúng é maumang lagyo lé isu nghû kê kat aq:

Haù chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpông loshoq myhí é Su é dang gi, ⁸Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hí má hpông to byí lhê. Nàng gi, wum-o ratsuí za bò kôlhang, Ngá é dang gyo luí, Ngá é mying lé a he-ngik pyâm é hkyô lé, Ngò sê lhê.

⁹Haù tarajong má noqkuq kôlhang, Tsadán lé dojaú bang nghut é, Yu-daq byù a nghut kôlhang, nghut lhê gâ é byù mhaù pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê.

¹⁰Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yù râ nghut lhê.

¹¹Ngò gi, a myâng má jé lé lô râ nghut lhê. Náng é janmaù lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq. ¹²Wó ung é sù lé gi, Ngá é Garai Gasâng é noqkuq yhúm mã é hkungzing mó dut nhâng râ nghut lhê. Haù yuq gi, hkâ-nhám le haù mai dum htoq ló râ a nghut. Ngò gi, Ngá é Garai Gasâng é mying lé le, Ngá é Garai Gasâng chyáng mai htoq luí, mauhkúng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é mying sik lé le, yhâng chyáng kâ tap byi râ nghut lhê. ¹³Gyo râ

nohkyap dap sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

**Ladoki Myuq Mã É Noqkuq
Hpúng Lé Kâ Kat É Laiká**

¹⁴Ladoki wà mó mã é noqkuq hpúng é maumang lagyo lé isu nghû kê kat aq:

Haù lhumzúi é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jáng gú, nye jáng jáng nye dut râ lé, Ngò ô nau ri.

¹⁶Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷“Ngò gi, wó sù nghut lhê; ngò gi, sutzè gyai wó bê nghut luí, haí lhang a ra lo.” ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myùng sù, my-oqjit sù eq achîn dut sù nghut é lé, nàng a sé myhi-nhung. ¹⁸Haù mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyú lé le, nàng myoq wó myâng sháng gaq, náng é my-oqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyí byí lhê.

¹⁹Ngò chyitdap é bang lé gi, tan luí, mhoqshit lhê. Haù mù, nàng gi, hân bûn gying luí, myit lîng aq. ²⁰Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byí é nghut jáng, Ngò gi, wàng mù, haù yuq eq rahá zo shuq râ nghut lhê; haù yuq le, Ngò eq rahá zo shuq râ nghut lhê.

²¹Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lhê. ²²Gyo râ nohkyap dap é sù gi, haù Woi-nyí mai noqkuq hpúng pé lé taí é hkyô lé, gyô yù sháng gaq.' gâ é nghut ri." gâ ri.

Mauhkúng Htoq Má Hkohkâm-tanghkuq Joq É Hkyô

4 Hau htâng má, ngò wú kat le, mauhkúng má hkum ralhum bóng tô é lé myang ri. Ngò sâng-hí dàm wó gyô é tut htê su gâ é danghtê ngo lé taí é gi, "Shí má doq lò aq, htàngnùng má dut lò râ hkyô pé lé, Ngò, nang lé tún shit bá." gâ ri. ²Haù hkún jáng yhang, ngò gi, Woi-nyí má moq byuq ló luí, mauhkúng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tô ri. ³Haù má zung to Su é isâm gi, huhpé eq ne yúng lungsêng su dut ri. Huí nyùi lungsêng su dut é woqgan síng-yang gi, haù hkohkâm-tanghkuq má hkông lêng tô ri. ⁴Hkohkâm-tanghkuq hau é lênghkyuq má, hkohkâm-tanghkuq gotú í xe myí lhum le joq to luí, hpyu é mebu wut mù, ulhum má hêng janmaú tsúng tô é suwún í xe myi yuq gi, haù má zung tô bum akô. ⁵Haù hkohkâm-tanghkuq mai, lhap hpyat é, mying hùm é eq maugum gùm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasàng é woi-nyí nyhit woi-nyí nghut ri. ⁶Hau htoq agó, san zâ é myoqjàm su dut mâ é wuì-nhông le, haù hkohkâm-tanghkuq hí má dítng tô ri.

Haù hkohkâm-tanghkuq agùng má le, lênghkyuq má le, hí-u nunghtáng lênghkyuq myoqjí dap é dui é dusak myí du nyi tô ri. ⁷Dui é dusak sâng-hí du gi, hkanghkyi su dut ri; í du nghû râ

du gi, nohtó su dut ri; sùm du nghû râ dù é myoqdong gi, byu myoqdong su dut ri; myí du nghû râ du gi, dâng wún é zungbung su dut ri. ⁸Dui é dusak myí du haù gi, du hkangmó dúng hkyuq lhum lhum dap é htoq agó, lênghkyuq má myoqjí kôm dap luí, dúng hkaù má lhang dap ri. Yhangmoq, nyí myín hkâ-nhâm a no loshoq taí nyi kô é gi,

"A-nham pyat le, ahkuí pyat le, htang pyat má le, rú nyi nyi é, haù wum-o a-tsam dik shoq bò Sù Yhumsing Garai Gasang gi, chyoiyúng, chyoiyúng, chyoiyúng nyi ri."

gâ akô. ⁹Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byí é hkangmó, ¹⁰haù suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haù hkohkâm-tanghkuq hí má hkyut to mù, taí kô é gi,

¹¹"Ngamoq é Yhumsing eq Garai Gasang ê, nyi mi-nyí, joq mijoj lé, Nàng hpan to bê nghut luí, haù pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai, Nàng gi, hpungwup shingkang, aróng eq hpungwup a-tsam lé, hap yù gíng Sù nghut ri." gâ akô.

Chyúmding Eq Sauzo

5 Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri. ²Hau htoq agó, a-tsam mó bo é maumang lagyo rayuq gi, "Haù dizik pé lé hí pyám râ eq chyúmding lé hpóng râ gi, ó yuq wá gíngdán lhê lú?" ga luí,

htê mó èq wut taí nyi é lé le, ngò myang ri. ³Nghut kôlháng, mauhkûng htoq má le, myigùng htoq má le, myigùng ô má le, haû chyúmding lé wó hpóng râ eq ahkaû má wó wú râ byù rayuq lháng a nyi nghut ri. ⁴Haû chyúmding lé hpóng mù, ahkaû má wú râ gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê. ⁵Haû hkûn, haû suwún wuí mâ é rayuq, ngo lé taí é gi, “Hkâ-ngaû! Wú aq, haû Yudaq byuhú mâ é Hkanghkyi nghu é, haû Dawiq é Amyit nghut Sû gi, ùng bê nghut luí, haû chyúmding eq haû mâ é dizik nyhit lhum lé wó hpông lhê.” gâ ri.

⁶Hau htâng, haû dui é dusak myí du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuí nyhit lhum eq myoqjí nyhit lhum dap ri. Myoqjí haû nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. ⁷Haû Sauzo gi, lé mù, hkohkâm-tanghkuq má zung to Su é loqyò mâ é chyúmding lé yu ri. ⁸Haû chyúmding lé yu é hkûn jáng, haû dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tít eq sân-yúng bâng é kyúdung dang gâ é namngón jung byíng mui tô é hng góm pé le chung bum akô nghut ri. ⁹Yhangmoq gi, “Nàng gi, haû chyúmding lé yù râ eq hau é dizik pé lé hpóng râ gingdán Sû nghut ri.

Haí mù gâ le, Nàng gi, sat hui bê nghut luí, byuhú hkangmó mai le, myíng hkangmó mai le, byù myú hkangmó mai le, mingdán hkangmó mai le, Garai Gasâng é matú, Náng é suí èq byù pé lé wui hpyit yú bê nghut ri.

¹⁰Nga-nhùng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kó râ nghut lhê.”

ga luí, mahkôn sik ralhum hkôn akô nghut ri.

¹¹Haû hkûn, ngò wú kat le, haû hkohkâm-tanghkuq lhinghkyuq má le, dui é dusak pé eq suwún wui é lhinghkyuq má le, nyi tô bum é mau-mang lagyo ajùm ayò mun mun sen sên é htê lé wó gyò ri. ¹²Yhangmoq gi, “Haû sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng sitang,

hpungwup shinggang eq hkya-on kungtôn hkyô lé, hap yù gíng ri.” ga luí, htê mó èq ton bum akô nghut ri.

¹³Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huí é lhunglháng gi, “Hkya-on kungtôn hkyô, aróng sitang, hpungwup shinggang eq hpungwup a-tsam gi, haû hkohkâm-tanghkuq má zung tô é Sû eq Sauzô chyáng, pyat dedu ahtum abyuq ru joq nyí sháng gaq ô!”

ga luí, ton nyi bùm kô é lé, ngò wó gyò ri. ¹⁴Haû dui é dusak myí du gi, “Amen” ga taí jang, haû suwún wuí gi, ngóm gop luí noqkuq akô nghut ri.

Dizik Nyhit Lhùm É Hkyô

6 Haû Sauzo gi, dizik nyhit lhum mâ é sâng-hí lhum lé hpông kat é hkûn, ngò myang é nghut lhê. Hau htâng, haû dui é dusak myí du mâ é radu gi, maugum su gâ é htê mó èq, “Lé aq.” gâ é lé, ngò wó gyò ri. ²Ngò wú kat é hkûn, ngá é myoq hí má myang hpyú radu nyi tô é lé myang ri! Haû má jî to sù gi, lai rahpu chung tô é htoq agó, yhang lé, janmaú

ralhum tsúng to byí luí, úng budang wó rã matú úng sù rayuq dông htoq ló ri.

³Haú Sauzo gi, í lhum nghû rã dizik lé hpông kat é hkûn, haú í du nghû rã dui é dusak gi, “Lé aq.” ga taí é lé, ngò wó gyô ri. ⁴Hau htâng, myang nè radu htoq lo ri; haú má jî tô é sù gi, myidàm htoq mã é nguingón simsaq hkyô lé wup yù rã eq, byù yhangchang rayuq eq rayuq sat lhum nhâng rã a-tsam byí é hui sù nghut luí, yhang lé shâm mó rahkyam le byí to bê nghut ri.

⁵Haú Sauzo gi, sùm lhum nghû rã dizik lé hpông kat é hkûn, haú sùm du nghû rã dui é dusak gi, “Lé aq.” ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶Haú hkûn, “Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsanlun xù eq tsi-byiq wing lé kúm gi, hkâlhoq hten kó.” gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷Haú Sauzo gi, myí lhum nghû rã dizik lé hpông kat é hkûn, haú myí du nghû rã dui é dusak gi, “Lé aq.” ga taí é lé, ngò wó gyô ri. ⁸Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mã é ratú má nyi é bang lé sat pyám rã ahkáng wó yu to bekô nghut ri.

⁹Sauzo gi, ngo lhum nghû rã dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô mã nyi tô bùm kô é lé, ngò myang ri. ¹⁰Yhangmoq gi, “Chyoiyúng é eq tengmán é, ahko ahkáng lhunglháng wó é Yhumsing è, myidàm htoq mã nyi é byu pé lé, ng-

amoq é sui manglat dam a byí é eq tarã a jéyang é za, hkâ-myháng jé shoq nyi nyi rã lhú?” ga, htê mó èq garu bum akô. ¹¹Haú hkûn, yhangmoq yuq hkangmó gi, bu hpyú hng radung dung hut é hui luí, yhangmoq su sat hui rã bang, yhangmoq é byinzùm dui-nhâng zoshâng wui nghut é gumang wui sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

¹²Hkyuq lhum nghû rã dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; ¹³maihpáng gâm lé, lai mó èq lo mut nhún kat é hkûn, a myhíng shí é maihpáng-shi yoq gyó é su, mauhkúng mã é kyí pé gi, myidàm htoq mã byit gyó lo bum ri. ¹⁴Haú mauhkúng gi, laiká lé dng lhum é su htot pyâm é hui luí, bùm hkang bùm mó eq zinlóng lhumjup pé gi, yhâng é jowò mai huí pyâm é huí ri.

¹⁵Haú hkûn, haú myidàm htoq mã é hkohkam pé, uphkang bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mã é luqgok gyoro pé má haq tô bùm uchyang, ¹⁶haú bùm pé eq luqgok pé lé, “Ngamoq é gùng htoq mã gyó ke kó laq! Haú hkohkâm-tanghkuq mã zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi rã lhú?” ga garú taí bum akô nghut ri.

144,000 Yuq Masat Lhò Tap Hui Kô É Hkyô

7 Hau htâng má, maumang lagyo myi yuq gi, maumyí myi chyún mã yap to mù, myigùng htoq mã le, wui ming htoq mã le, siggâm pé mã le, lai a hik sháng gaq ga, myi shut mã é lai lé zú

zing to kô é lé, ngò myang ri. ²Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihotoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³“Nga-nhông é Garai Gasâng dui-nhông zoshâng wui é ngelang má, ngamoq mai masat lhô a tap byi byi gi, haú myigùng, wui ming eq siggâm pé lé hkâlhoq hten shi kó.” ga htê mó èq wut taí kat ri. ⁴Haú hkûn, masat lhô tap huí é bang byù hkâm-myhó yuq nghut é lé, ngò wó gyô ri. Israelaq byuhú banshoq má é 144,000 yuq nghut ri.

⁵Masat lhô tap huí yu é,
Yudaq up má é bang gi, 12,000 yuq,
Rubin up má é bang gi, 12,000 yuq,
Gat up má é bang gi, 12,000 yuq,
⁶Ashe up má é bang gi, 12,000 yuq,
Nahtali up má é bang gi, 12,000 yuq,
Manase up má é bang gi, 12,000 yuq,
⁷Simeon up má é bang gi, 12,000 yuq,
Lewiq up má é bang gi, 12,000 yuq,
Yishahka up má é bang gi, 12,000 yuq,
⁸Zebulun up má é bang gi, 12,000 yuq,
Yosep up má é bang gi, 12,000 yuq,
Ben-yamyin up má é bang gi, 12,000 yuq,
nghut bum akô.

Bu Hpyû Hîng Wut Bâng É Hkyô

⁹Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luí, yhangmoq é loq má byùm-haq chung tô bùm kômù,

¹⁰“Hkyi yù hkyô gi, haú hkohkâm-tanghkuq má zung tô é nga-nhông é Garai Gasang eq Sauzo chyáng má é nghut ri ô!”

ga luí, htê mó èq garû bum akô nghut ri. ¹¹Haú maumang lagyo lhunglhâng bang gi, haú hkohkâm-tanghkuq é lhînghkyuq má le, suwún wui eq dui é dusak myí du é lhînghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹²“Amen! Hkya-on kungton hkyô eq hpungwup shingkaq,
hpaqchyí byéng-yá eq jeju bun hkyô,
aróng, hpungwup a-tsam eq wum-o gi,
nga-nhông é Garai Gasâng chyáng pyat dedu ahtum abyuq ru joq nyí sháng gaq ô!
Amen!”
ga taí bum akô.

¹³Haú hkûn, suwún wui má é rayuq gi, “Shí bu hpyû hîng wut é bang gi, ô pé lhú? Yhangmoq gi, hkâmai lé é bang nghut akô lhú?” ga ngo lé myí ri.

¹⁴Ngò gi, “Suwún hpó è, nàng sê lhê.” nghû tô taí jáng, yhang gi, “Shí bang gi, haú wuîhke jamjau mó mai wó lut htoq lô luí, yhangmoq é bu hîng lé, haú Sauzô é sui má chí hpyû yù bê bang nghut akô. ¹⁵Haú mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haú hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râⁿ nghut lhê. ¹⁶Yhangmoq gi, hkâ-nhám le, zò-mut wuîshit hui râ a nghut lo; bui lhap é le, hkyíng hkyíng nyé é le, yhangmoq lé wó záng râ a nghut. ¹⁷Hkâsu mù gâ le, haú hkohkâm-tanghkuq agùng má é Sauzo gi, yhangmoq é sau-rém sù dut râ

^{7:15} Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyí râ gâ é nghut lhê.

nghut luí, Yhang gi, yhangmoq lé, asak wuìbúm jé shoq shuí è râ nggut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nggut lhê.” ga tai ri.

Nyhit Lhum Nghû Râ Dizik Eq Namngón Jung Nyhê É Hing Góm

8 Haú Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zím byuq ri.

²Haú hkûn, Garai Gasang é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byí tô ri.

³Namngón jung nyhê é hing góm chung é maumang lagyo gotú rayuq gi, haú hkungga gyap yàm má lé yap tô ri. Haú hkohkâm-tanghkuq hí mâ é hing hkungga gyap má, sân-yúng bang ban-shoq é kyúdung dang eq rahá nhông byi râ matú, namngón jung gyai myo shoq, yhang lé byí tô ri. ⁴Haú namngón júng é myihkau gi, sân-yúng bâng é kyúdung danghtê eq rahá, maumang lagyo haú yuq é loq mai Garai Gasang chyáng hkyang rot lô bê nggut ri. ⁵Hau htâng, maumang lagyo haú yuq gi, góm lé yù mù, hkungga gyap mâ é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶Hau htâng, tut nyhit lhum wó é maumang lagyo nyhit yuq gi, tut mut râ hen akò nggut ri.

⁷Sân-hi yuq nghû râ maumang lagyo gi, yhang é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyí sum tú mâ é ratú eq sikgâm sum tú mâ é ratú nyé gyó byuq é htoq agó,

wàhu mhanzo banshoq le nyé gyó byuq bê nggut ri.

⁸Í yuq nghû râ maumang lagyo gi, yhang é tut lé mut kat ri; haú hkûn, myi dap tô é bùm mó su é lé, wuìshuq lung-aú má dú hkyô kat ri. Wuìshuq lung-aú sum tú mâ é ratú gi, sui dut byuq bê nggut ri; ⁹wuìshuq lung-aú mâ é dui jung sum tú mâ é ratú gi, shi byuq luí, wuì-sanghpo pé sum tú mâ é ratú gi, htên byuq bê nggut ri.

¹⁰Sum yuq nghû râ maumang lagyo gi, yhang é tut lé mut kat ri; haú hkûn, myihu dùm su duq é kyí mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pé htoq má lo gyó záng ri. ¹¹Kyí hau é myíng gi, Kyí Kyí Hko gâ é nggut ri. Wuìlàng sum tú mâ é ratú hkô byuq luí, wuì haú hkô byuq é yanmai byù myo myo shi byuq bekò nggut ri.

¹²Myi yuq nghû râ maumang lagyo gi, yhang é tut lé mut kat ri; haú hkûn, buì sum tú ratú, lhamó sum tú ratú, kyí sum tú ratú gi, hten luí, haú pé é sum tú ratú gi, mauchut byuq bê nggut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³Ngò wú nyi le, zunbung radu gi, maulat má dang wún mù, “Gotú maumang lagyo sum yuq eq mut râ nggut é, tut hte é yanmai, myidàm htoq má nyi bâng é matú, dingnyé, dingnyé, dingnyé nggut ri.” ga luí, htê mó eq garú tai ri.

9 Ngo yuq nghû râ maumang lagyo gi, yhang é tut mut kat é hkûn, mauhkûng mai myidàm htoq má byit gyó tô é kyí racham lé, ngò myang ri. Haú nik dik htúm é Lasang-dông é zoqshi gi, kyí haú lé byí tô ri. ²Kyí haú gi, nik dik htúm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htúm é Lasang-dong haú mâ é myihkau dum é yanmai, buì eq maulat gi, mauchut byuq bê nggut

ri. ³ Myihkau dùm haù mai dinggám pé htoq lô mù, myidàm htoq má gyó lé akò; myidàm htoq mâ é gogok é a-tsam sù é a-tsam le, yhangmoq lé byî to bè nghut ri. ⁴ Myidàm htoq mâ é wàhu pé lé le, mhan-haq hpoqnoq pé lé le, sikhgám pé lé le a lhoq htên é za, yhumsing é ngelang má Garai Gasâng é masat lhò a dap é byu pé lé baù zing-ri rà matú, yhangmoq lé taí tô ri. ⁵ Nghut kôlhang, haù bang lé sat pyám rà ahkáng kúm gi, yhangmoq a wó e za, lhamó ngo hkyap tup haù bang lé zing-ri rà ahkáng za ru wó akò nghut ri. Haù bang hui zô é shí-nò jamjau gi, gogok èq pat hkùn no hpú é su yhang nghut ri. ⁶ Haù buinyì pé má, byu pé gi, shí hkyô hô kôlhang, myàng kó rà a nghut; shí nau dik kôlhang, haù shí hkyô gi, yhangmoq chyáng mai hpang byuq rà nghut lhê.

⁷ Dinggám haù pé gi, majan zan rà matú buí tô é myang pé su dut akò. Yhangmoq é ulhum má gi, hîng janmaù sù é tsung tô é htoq agó, yhangmoq é myoqdong gi, byu myoqdong su dut bum akò nghut ri. ⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri. ⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri rà a-tsam bo ri. ¹¹ Yhangmoq é hkohkâm gi, nik dik htâm é Lasang-dong mâ é maumang nghut ri; haù é mying gi, Hebre mying dong Abadon ga, Grik mying đông Apolion⁸ gâ ri.

¹² Sâng-hí lhum dingnyé gi, lai lô byuq bè nghut ri; nghut kôlhang, dingnyé í lhum jé lô shirâ nghut lhê.

¹³ Haù hkyuq yuq nghû rà maumang lagyo gi, yhâng é tut mut kat ri. Haù hkùn, Garai Gasâng é hí má joq é hîng hkungga gyap é hkyuí myî lhum mai htê htoq lo é gi, ¹⁴ “Uhprat wui mó lêng má tuí lhung tô é maumang myi yuq lé, nhang pyám aq.” ga tut chung tô é hkyuq yuq nghû rà maumang lagyo lé taí é lé, ngò wó gyô ri. ¹⁵ Haù hkùn, xângzo byù sum tú mâ é ratú lé sat pyám rà matú, ahkyíng, buinyì, lhôhkyap, zanwut lé, ri ri hen to bè nghut é haù maumang myi yuq lé nhang kat bê nghut ri. ¹⁶ Myang ji jî é gyè jum gi, byù du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jûm eq haù pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut luí, yhangmoq é nhut mai, myi, myihkau eq hang pé htoq lo ri. ¹⁸ Haù yhangmoq é nhut mai htoq lo é myi, myihkau eq hang gâ é wúm ihkyup sùm jûng é yan-mai, xângzo byù sum tú ratú gi, sat hui bekò nghut ri. ¹⁹ Myang haù jum é sho-myi gi, lhangmui su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haù sùm jung mai wó lut luí, myit gyó tô é xângzo byu pé gi, yhangmoq é loq pé èq zui saí é muzó mai, myit a lêng shi kô é htoq agó, nat gâng pé lé le, a wó myàng, a wó gyo, a wó sô é, hîng, ngùn, gyi, luqgok, sik pé é alhò lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é đông gungsho zùm yap é hkyô mai le, hkaù é mai le, myit a lêng shi kó nghut ri.

⁸9:11 Apolion gâ é lichyúm gi, lhoq hten lhoq hpyoq sù gâ é nghut ri.

Maumang Eq Laiká Ding É Hkyô

10 Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut eq htup yup to luí, yhâng é u htoq má woqgan síng-yang gyân tô ri; yhâng é myoqdong gi, bui su dut luí, yhâng é hkyî gi, myi zîng su dut ri. ² Yhâng é loq má gi, hpông tô é laiká ding zo ralhûm chung tô ri; yhâng é loqyo hkyî gi, wuîshuq lung-aû má nang, yhâng é loqpaí hkyî gi, myigùng htoq má nâng to luí, ³ hkanghkyi mying é htê su ga, htê mó èq garú kat ri. Yhang garu kat jáng, maugum htê nyhit lhum tú gûm kat ri. ⁴ Haû maugum htê nyhit lhum tú gûm kat é hkûn, ngò ká rá da jáng, “Haû maugum htê nyhit lhum tú gûm é hkyô lé záu pyám aq; haû pé lé hkâkâ to.” ga, mauhkûng mai danghtê htoq lo é lé ngò wo gyô kat ri.

⁵ Haû hkûn, wuîshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri. ⁶ Haû mù, yhang gi, mauhkûng eq haû má nyi é lhunglháng lé le, myidàm htoq eq haû má nyi é lhunglháng lé le, wuîshuq lung-aû eq haû má nyi é lhunglháng lé le, hpan tô é, pyat dedu ah-tum abyuq dui nyi Su é myîng lé lang luí, dakam é gi, “Ahkyîng ratsuí le, lhoq myáng nyî lo rá a nghut! ⁷ Nghut kôlhang, Garai Gasang mai Yhâng é dui-nhâng zoshâng wuî nghut é myiqhtoi pé lé tai to bê é danglû eq rajung za, Yhâng é záu tô é hkyô gi, nyhit yuq nghû rá maumang lagyo èq yhâng é tut lé mut myhîng é buinyî pé má, shit rá nghut lhê.” gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum tai é gi, “Haû wuîshuq lung-aû eq myidàm htoq

má nâng yap tô é maumang lagyo loq má hpông tô é laiká ding lé, è yù aq.” gâ ri.

⁹ Haû mù, ngò gi, è luí, laiká ding zo haû, ngo lé byi rá matú maumang lagyo haû lé é dung le, yhang gi, “Shí lé yù mù, zo kat aq. Nâng é wam má hko rá nghut lhê; nghut kôle, nâng é nhut má gi, byo-î su yhang chui rá nghut lhê.” gâ ri. ¹⁰ Haû mù, ngò gi, laiká ding zo haû lé, maumang lagyo é loq mai yù mù, zô é nghut lhê; haû hkûn, ngá é nhut má gi, byo-î su yhang chuî nghâm ri; nghut kôle, bàn zô kat é hkûn, ngá é wam hkaû má hkô bê nghut ri. ¹¹ Haû hkûn, “Nàng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoi dum htoi rá rá nghut lhê.” ga, ngo lé tai kyô ri.

Saksé Í Yuq É Hkyô

11 Ké rá jung dumbáng su dut é jàm-yang rahkat ngo lé byi luí, ngo lé tai é gi, “Ê mù, haû Garai Gasâng é noqkuq yhûm lé le, hkungga gyap lé le, kê wú luí, haû má noqkuq é bang lé ng-hap wú aq. ² Nghut kôlhang, shinggan mâ é wâng lé gi, a kê é za lhai pyâm to aq; hkâsu mù gâ le, haû gi, tûngbaù pé lé byi to bê nghut lhê. Yhangmoq gi, haû chyoiyúng myuq lé, lhamó myixe í hkyap tup chôm nang kó rá nghut lhê.

³ Hau htoq agó, ngò gi, ngá é saksé í yuq lé a-tsam byi rá nghut luí, yhangnhik gi, ji mebu wut** mù, buinyî 1260 nyî tup myiqhtoi htoi kó rá nghut lhê.” gâ ri.

⁴ Yhangnhik gi, haû myidàm Yhumsing é hí má yuq tô é tsanlun gàm í gâm eq my-ibung tsungjang í lhum nghut ri. ⁵ Byù rayuq yuq, yhangnhik lé zîng-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám rá nghut lhê. Yhangnhik lé kâm zîng-ri é sù gi, haû su kut sat pyâm

**11:3 Ji mebu wut gâ é gi, iyon yôn é lé gâ lhê.

é hui zo râ nghut lâ. ⁶Yhangnhik gi, yhangnhik myiqhtoi htoî nyi é buinyi pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

⁷Yhangnhik gi, saksé ban hkâm é hkûn, haú nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lâ. ⁸Yhangnhik é mâng lé gi, danghîng dông Sodom eq Egotuq gâ é, yhangnhik é Yhumsîng lé le, tapzîng má jén sat pyâm é myuq mó é hkyô gùng má, leq to râ nghut lâ. ⁹Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lâ. ¹⁰Myidàm htoq má nyi é bang gi, yhangnhik shi byuq é yanmai gabú ngu-ingón luí, rayuq eq rayuq chyunghuq byi lhûm é dông ngón poî kut kó râ nghut lâ. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuîhke jamjau byi lai bê su nhik nghut akô.

¹¹Nghut kôlhang, sum nyí èq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri. ¹²Haú hkûn, “Shí má doq lò keq.” ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lò bekô nghut ri.

¹³Haú u lé yhang, layàng mó nún lô luí, myuq hkaú raxé tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut

luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

¹⁴Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

¹⁵Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

“Mingkan htoq mâ é mingdán gi, nganhûng é Yhumsîng eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lâ.”

gâ ri. ¹⁶Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

¹⁷“Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkya-on lâ.

¹⁸Byù myû pé gi, nhikjum yo bûm kôluí, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoi pé lé le,

Náng é sân-yúng bang lé le, Náng é myìng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri.”

gâ akô.

¹⁹Haú hkûn, mauhkûng htoq má, Garai Gasâng é noqkuq yhûm hpông

to luí, Yhâng é noqkuq yhúmhaû má, Yhâng é dangshikaq eq sêng é saksé sidek lé byu-myang ri. Haú hkún jáng, lhap hpyat é, myíng hûm é, maugum gûm é, layàng nún é, likwò mó gyó é pé dut htoq lo ri.

Myiwe Myhí Eq Manjung É Hkyô

12 Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. ²Yhang gi, zogûng dut tô é nghut luí, zo hkû rà matú, zohkû-nò no nyí é yanmai, gyai yhang ngau garú nyí ri. ³Hau htâng, mauhkûng má gotú kumlhá dum htoq shit é gi: gyai kô é manjung nè mó^{††} radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú tsûng tô ri. ⁴Yhâng é sho-myi gi, mauhkûng mâ é kyí sum tú mâ é ratú lé shûm tsíng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri. ⁵Myiwe myhí haú gi, mingdán banshoq lé shamtoq dumbáng èq up rà nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. ⁶Myiwe myhí haú gi, yhâng é matú Garai Gasang la-jâng to byí é yoso hkaú má hfang wang ê bê nghut ri; haú jowò má, yhang gi, 1260 nyí tup lhom baú é hui rà nghut lhê.

⁷Mauhkûng htoq má majan htoq bê nghut ri. Mihkaelaq eq yhâng é mau-mang lagyô pé gi, manjung lé majan ê zan kôluí, haú manjung eq yhâng é maumâng pé le, tau zân akô. ⁸Nghut kôlhang, yhangmoq gi, a ûng kômù,

mauhkûng mâ é yhangmoq nyí jowò lhoq hpyuq pyám bekô nghut ri. ⁹Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyám é hui bê nghut ri.

¹⁰Haú hkún, mauhkûng htoq má htê mó đông taí é lé, ngò wó gyô é gi, “Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé,

nyí, myín mara hun nyí é sù gi, dú hkyô pyám é hui bê nghut ri.

¹¹Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

¹²Haú mù luí, mauhkûng eq haú má nyí é bang ê, gabú nyí keq!

Nghut kôlhang, myidàm htoq eq wuìshuq lung-aú gi, dingnyé wó ri; hkâsu mù gâ le, haú natzau gi, yhâng é ahkyíng yàm-yoq tot za ru joq alò nghut é lé sê é yanmai,

nhikmo-yô é èq, nungnhik chyáng gyó lé lô bê nghut ri.”

gâ ri.

¹³Haú manjung gi, myidàm htoq má dú hkyô kat huí é lé myàng luí, haú yuqzo hku é myiwe myhí lé zing-rí ri.

¹⁴Myiwe myhí haú gi, lhangmuí chyáng mai wó lut luí, yhang é matú lajâng tô é yoso má wó dang jé mù, ahkyíng ralhûm, ahkyíng í lhum, ahkyíng rawuí

^{††}12:3 Manjung nè mó gâ é gi, Tsadán lé taí nau é nghut lhê.

hkup[‡] lhom baú nyi é hui sháng gaq ga, zùn mó é dùng í lhum byí é huí ri. ¹⁵Haú hkûn, haú lhangmuí gi, myiwe myhí haú lé wó lhoq myhû pyám shoq ga, myiwe myhí é nunghtáng má, yhâng é nhut mai wuì mó llang í é wuì lhoq htoq kat ri. ¹⁶Nghut kôlhang, manjung nhut mai lhoq htoq kat é wuì mó llang haú lé, myigùng gi, yhâng é nhut há mù myui pyám byí é dông, myiwe myhí haú lé garúm yu ri. ¹⁷Haú mù, manjung haú gi, myiwe myhí hau é yanmai, gyai yhang nhikmo-yo luí, Garai Gasâng é jep é tará lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri. ¹⁸Manjung haú gi, wuìshuq lung-aú yàm má yap tô ri.

Tân Jung Dusak Radu Wuìshuq Lung-aú Mai Htoq Lo É Hkyô

13 Haú hkûn, haú wuìshuq lung-aú mai tân jung dusak radu htoq lo é lé, ngò myàng ri. Dusak haú má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é mying dap tô bum ri. ²Ngò myang é tân jung dusak haú gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haú manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haú lé ap byí ri. ³Tân jung dusak hau é ulhum ralhumi gi, shí râ í é dàm dap huí é su dut kôlhang, damhkô haú gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri. ⁴Manjung gi, tân jung dusak lé ahko

ahkáng ap byí é yanmai, byu pé gi, manjung haú lé noqkuq é htoq agó, tân jung dusak haú lé le, noqkuq kômù, “Ó yuq wá, tân jung dusak shí du su dut ri lú? Ó yuq wá, yhang lé wó zan ùng râ lú?” ga bum akô.

⁵Gyang dang tái râ eq Garaí aróng lhoq hpoi dang tái râ nhut gi, tân jung dusak haú lé byi to bê nghut é htoq agó, lhamó myí xe í hkyap tup, yhâng é ahko ahkáng lé chûng râ ahkáng wó bê nghut ri. ⁶Yhang gi, yhâng nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é mying eq nyi jowò lé le, mauhkung htoq má nyi é bang lé le, lumù gansang é sù nghut ri. ⁷Haú sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. ⁸Haú sat hui bê Sauzo eq sêng é asak jihpán laiká buk má, mau htoq xâng hkun mai, mying a kâ lhôm é, myidàm htoq má nyi é lhungl-hâng bang gi, haú tân jung dusak lé noqkuq kó râ nghut lhê.

⁹Gyo râ nohkyap dap sù gi, gyô yù sháng gaq.

¹⁰Shúm zung é hui râ sù gi, shúm zung é hui râ za nghut lhê.

Sham eq sat é hui râ sù gi, sham eq sat é hui râ za nghut lhê.[¶]

Haú mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹Hau htâng, ngò gi, tân jung dusak gotú radu^{§§} myigùng mai htoq lo é lé

[‡]12:14 Ahkyíng ralhumi, ahkyíng í lhum, ahkyíng rawuí hkup gâ é gi, “razàn, í zân, lhamó hkyuq hkyap” lé gâ é nghut lhê; haú gi, 1260 nyí nghut ri.

[¶]13:10 Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham eq byù sat é sù gi, sham eq sat é hui râ nghut lhê, ga bo tô ri.

^{§§}13:11 Tân jung dusak gotú radu gâ é shí gi, myiqhtoi pyoq lé gá nau é nghut lhê.

myang ri. Yhang gi, sauzô é hkyuî su dut é hkyuî í lhum yuq ri; nghut kôlhang, yhang gi, manjung su ga dang nyo ri. ¹²Yhang gi, tân jung dusak hí lhê dû é ahko ahkáng lhunglháng lé, haú du é hí má chûng mù, shí rã í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. ¹³Hau htoq agó, yhang gi, byu pé é myoq hí má, mauhkûng mai myigûng shut myi lé lháng wó lhoq hkyô é, limik kumlhá mó kut shit ri. ¹⁴Yhang gi, tân jung dusak hí lhê dû é hí má, kumlhá haú pé kut rã ahkáng wó é yanmai, myidàm htoq má nyi é bang lé mhoq hpyoq yû luí, haú shâm damhkô dap kôlhang, dui nyi é tân jung dusak haú lé, hkunggâ é dông, yhangmoq lé, yhâng é alhô saí nhang ri. ¹⁵Yhang gi, haú tân jung dusak hí lhê dû é alhô lé, soq wó mut kat byî é a-tsam lé wó yû sũ nghut ri; haú mù, alhô haú gi, dang wó taí luí, yhang lé a noqkuq é bang lé, sat hui nhang ri. ¹⁶Hau htoq agó, yhang gi, byù mó byù zo, wó sũ myûng sũ, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri. ¹⁷Haú hkûn, haú tân jung dusak é mying, a nghut jáng, yhâng mying é masat námbat dap sũ mai lai luí, ûng é, wui é hkyô, ó yuq le wó kut rã a nghut.

¹⁸Hpaqchyî byéng-yá gi, shí má bo rã ri. Hpaqchyî bò sũ gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

Sauzo Eq 144,000 Yuq É Hkyô

14 Hau htâng, ngò wú kat le, haú Sauzo gi, Zi-un bùm má yap tô é lé myang ri; Yhâng mying eq Yhâng Wá é mying lé, yhumsing é ngelang má kã

tap tô é byù 144,000 yuq le, Yhang eq rahá yap tô bùm ri. ²Haú hkûn, ngò gi, wui pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haú gi, títng bat bang, yhangmoq é títng lé bat myhîng é htê su gâ ri. ³Yhangmoq gi, haú hkohkâm-tanghkuq é hí má le, dui é dusak myî du eq suwûn wui pé hí má le, mahkôn sik lé hkôn akô nghut ri. Haú myidàm htoq mai hkyi yû huí é byù 144,000 yuq mai lai luí, ó yuq le, mahkôn haú lé a wó mhoq sê yû kó nghut ri. ⁴Haú bang gi, myiwe wui eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haú Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luí, sâng-hi myhîng é ashi lé su, haú Garai Gasang eq Sauzo lé ap byî é hui akô nghut ri. ⁵Yhangmoq é nhut má, mhaú é hkyô haí le a taí kó; yhangmoq chyáng mara hûn rã hkyô le a bò kó nghut ri.

Maumang Sum Yuq É Hkyô

⁶Hau htâng, maumang lagyo gotû rayuq gi, maulat má dang wún é lé ngò myang ri; yhang gi, haú mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myû hkangmó mâ é bang lé, hko kyo rã ahtum abyuq é gabú danglù wó ri. ⁷Yhang gi, “Garai Gasang, tarã jéyáng rã ahkyíng jé bẽ nghut é yanmai, Yhang lé gyuq hkungga luí, Yhâng é hpungwup a-tsam lé shi-gyaú keq. Haú mauhkûng eq myigûng, wuîshuq lung-aú eq wuîbúm pé hpan tô é Sũ lé, noqkuq keq.” ga luí, htê mó èq taí ri.

⁸Í yuq nghû rã maumang lagyo gi, htâng má châng lé mù, “Haú mingdán

pé* lhunglhang lé, yhang kut shut é ashop é đông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!” ga taí ri.

⁹Sum yuq nghû râ maumang lagyo gi, yhangnhik é htâng má châng lé mù, “Haù tân jung dusak eq yhang é alhô lé, noqkuq luí, yhumsing é ngelang má nghut nghut, loq má nghut nghut, yhang é masat lhô lé tap yu é sù, ó yuq nghut kôle, ¹⁰Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haù chyoiyúng maumang lagyo pé hí má le, Sauzô é hí má le, yhang gi, duq nyi é myi eq hang èq zing-rí é hui zo râ nghut lhê. ¹¹Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haù tân jung dusak eq yhang é alhô lé, noqkuq é bang eq yhang mying é masat lhô tap yû sù é matú gi, nyí, myín, no râ ahkyíng wó râ a nghut.” ga luí, htê mó èq taí ri. ¹²Garai Gasâng é jep é tará cháng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò râ lhê.

¹³Hau htâng, “Ahkuí mai gi, haù Yhumsing má shí é sù, hkungsô wó nyi ri nghû kê to aq.” gâ é htê, mauhkúng mai htoq lo é lé, ngò wó gyô ri.

Haù hkûn, haù Woi-nyí gi, “Nghut rô, yhangmoq kut é muzó é akyû gi, yhangmoq htâng cháng râ nghut é yanmai, yhangmoq gi, yhumsing zuí ngu é muzó mai myang hkying bekô râ nghut lhê.” ga taí ri.

Myidàm Htoq Mã É Kyôshi Shû É Hkyô

¹⁴Ngò dum wú kat le, mhut hpyû rah-tui ngá hí má joq tô é lé myang ri; mhut hpyû htoq haù má Byu Yhangzo su dut

é byù rayuq zung tô ri; Yhâng é ulhum má gi, hâng janmaù tsúng to luí, Yhâng é loq má gi, htoq é zaiyik ralhüm chung tô ri. ¹⁵Haù hkûn, gotû maumang lagyo gi, noqkuq yhûm mai htoq lô mù, “Haù myidàm htoq mã é kyôshi gi, myhâng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq.” ga, haù mhut htoq mã zung tô é Sù lé, htê mó èq taí garû kat ri. ¹⁶Haù mù, mhut htoq mã zung tô é Sù gi, Yhâng é zaiyik lé, myigúng htoq mã dú hkyô kat luí, myidàm htoq mã é kyôshi lé, ban shû yù bê nghut ri.

¹⁷Maumang lagyo gotû rayuq gi, mauhkúng htoq mã é noqkuq yhûm mai htoq lo ri; haù yuq le, htoq é zaiyik ralhüm chung tô ri. ¹⁸Haù, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, “Myidàm htoq mã é tsibiyiq shi gi, myhíng bê nghut é yanmai, náng é htoq é zaiyik yù mù, tsibiyiq shipaù haù pé lé, yâm tsíng yù aq.” ga, htê mó èq taí garû kat ri. ¹⁹Maumang lagyo haù gi, yhâng é zaiyik lé, myidàm htoq mã dú hkyô kat mù, haù mã é tsibiyiq shi pé lé yâm tsíng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰Myuq shinggan mã é tsibiyiq wing pyik jang haù má, tsibiyiq shi haù pé lé nâng nyhoq luí, tsibiyiq wing pyik jang haù mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui ló bê nghut ri.

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

15 Ngò gi, mauhkúng mã gotû limik kumlhá joq é lé, dum byu-myang ri; haù gi, wúm nyhit lhum chung é maumang lagyo nyhit yuq nghut ri; wúm

*14:8 *Mingdán pé gâ é gi, a lumjíng bang lé gâ é nghut lhê.*

†14:20 180 déng gi, Grik pé é stadia 1600 kô bo ri.

haú pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê. ²Hau htoq agó, myi eq nyhô tô é myoqjâm wùi-nhông su dut é lé le, ngò myang ri; haú tân jung dusak eq yhâng é alhô lé le, yhâng mying é nâmbat lé le, wó ung pyám bê bang gi, wùi-nhông yâm haú má yap tô bum akô; yhang-moq gi, Garai Gasang byí é títng pé lé chung to kôluí, ³Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

“Wum-o a-tsam dik shoq bò Sû Yhumsing Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴Yhumsing ê, Nàng lé a gyuq a hkungga râ eq Náng myíng lé a lhoq gyaú râ gi, ó yuq wá nyi râ lúh?

Hkâsu mù gâ le, Nàng za chyoiyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myû lhunglhang gi, Náng hí má lé noqkuq kó râ nghut lhê.”

gâ akô nghut ri.

⁵Hau htâng, ngò wú kat le, mauhkung má, saksé zúm joq é noqkuq yhûm bống tô é lé, myang ri. ⁶Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhang-moq gi, sân-yúng duqbó é nú nhâm mebu wut luí, yhangmoq é wànggàng má hîng hpyihit baíyup tô akô nghut ri.

⁷Haú hkûn, haú dui é dusak myí du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byí ri. ⁸Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi, myihkau byíng zan to bê nghut luí, haú

maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

Garai Gasâng É Nhikmo-yo Hkyô Bo É Góm Nyhit Lhum

16 Hau htâng, maumang lagyo nyhit yuq lé, “Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq.” ga, noqkuq yhûm mai htê mó èq taí é lé, ngò wó gyô ri.

²Haú hkûn, sângh-hi yuq nghû râ maumang lagyo gi, htoq é mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achaq achyut é eq hkê-nho dik é, yapjeq ana dap tô bùm bê nghut ri.

³Í yuq nghû râ maumang lagyo gi, yhâng é góm lé, wuishuq lung-aû má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

⁴Sum yuq nghû râ maumang lagyo gi, yhâng é góm lé, wuilàng pé eq wuibúm pé má hut hkyô kat jáng, haú pé gi, sui dut byuq bê nghut ri. ⁵Haú hkûn, haú wùi lé upzúng é maumang lagyo taí é lé, ngò wó gyô é gi,

“A-nham pyat le, ahkui pyat le, rû nyi nyi é Chyoiyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

⁶hkâsu mù gâ le, yhangmoq gi, Náng é sân-yúng bang eq myiqhtoí pê é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri.”

gâ ri. ⁷Haú hkûn, haú hkungga gyap mai,

“Nghut rô! Wum-o a-tsam dik shoq bò Sû Yhumsing Garai Gasang ê, Nàng

jéyáng é hkyô pé gi, tengmán é eq dingmán é nghut ri.”

ga le, taí kat é htê lé, ngò dum wó gyô ri.

⁸Myi yuq nghû râ maumang lagyo gi, yhang é góm lé, bui é ahtog má hut hkyô kat é hkún, bui gi, byu pé lé myí èq nyhê kyuq râ ahkáng wó bê nghut ri. ⁹Haû mù, yhangmoq gi, nyé dik é èq nyhê kyuq é hui zo luí, wúm shí pé lé up nyi é Garai Gasâng é mying lé nhing akò; haû-í yhang hpuzo kôlhang, yhangmoq gi, myit le a lhing kó, Garai Gasang lé le a shigyaú kó nghut ri.

¹⁰Ngo yuq nghû râ maumang lagyo gi, yhang é góm lé, tân jung dusak é hkohkâm-tanghkuq htoq má hut hkyô kat jáng, yhang é mingdán gi, mauchut tuq dut byuq bê nghut ri. Mingbyû wui gi, yhumsing é shô lé lháng, ngat tân bùm shoq shí-nò jamjau hui zo kôluí, ¹¹yhangmoq no hpû é eq jeq é ana dap é yanmai, mauhkung mâ é Garai Gasang lé nhing akò; haû-í yhang hpuzo kôlhang, yhangmoq gi, yhangmoq kut é hkyô mai myit a lhing shi kó nghut ri.

¹²Hkyuq yuq nghû râ maumang lagyo gi, yhang é góm lé, Uhprat wui mó lãng má hut hkyô kat jáng, wuilàng haû gi, kân byuq luí, haû buihog hkyam mâ é hkohkam pé, lé lô râ hkyô dong bê nghut ri. ¹³Haû hkún, po su dut é, agè ashop é byò sum woi-nyí lé, ngò myang ri; haû pé gi, manjung, tân jung dusak, myiqh-toi pyoq pé é nhut mai htoq lô kô é bang nghut akò. ¹⁴Woi-nyí haû pé gi, nat gâng pé é woi-nyí nghut luí, limik kumlhá pé kut shit kômù, haû wum-o a-tsam dik shoq bò Sû Garai Gasâng é buinyi mó má majan zan râ matú, mingkan gón mâ é hkohkam pé lé lhoq tsing yù râ ga, htoq é lô akò nghut ri.

¹⁵“Wú keq, Ngò gi, hkau sù su jé lé é nghut lhê! Su hí má gungchîn a so râ

eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gying gying kut nyi é sù gi, hkungso wó nyi ri.”*

¹⁶Haû mù, nat haû bang gi, hkohkam pé lé, Hebre myíng dông Armagedon gâ é jowò má, rahá ji tsing tô akò nghut ri.

¹⁷Nyhit yuq nghû râ maumang lagyo gi, yhang é góm lé, maulat má hut hkyô kat ri; haû hkún, haû noqkuq yhûm mâ é hkohkâm-tanghkuq mai, “Bàn bê!” gâ é htê mó htoq lo ri. ¹⁸Hau htoq agò, lhap hpyat é, mying hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkún mai, layàng haû su nún é eq haû-í htan é gi, a joq wú shí é nghut lhê. ¹⁹Haû mù, haû myuq mó gi, sûm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhang é nhikmo-yô é tsibiyiq wing byíng shoq bo é góm lé shuq nhâng bê nghut ri. ²⁰Zinlóng hkangmó gi, hpang byuq bê nghut luí, bùm pé le byuq byuq bê nghut ri. ²¹Haû hkún, myi xê jói kô laí é likwò mó gi, mauhkung mai byu pé htoq má wo gyó gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhing bum akò nghut ri.

Shiwa Myhí Mó É Hkyô

17 Haû góm nyhit lhum chung tô é maumang lagyo nyhit yuq mâ é rayuq gi, lé lô mù, “Lé aq, haû wui myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá. ²Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq

*16:15 Dang shí hkun gi, Yesuq taí é dang nghut lhê.

wing lé shuq wut bùm bekô nghut ri.” ga luí, ngo lé taí ri.

³Haú mù, maumang lagyo haú gi, Woi-nyí má, ngo lé yoso shut shuí wang e ló ri. Haú ulhum nyhit lhum eq hkyuí raxê lhum dap luí, taí hpoí é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri. ⁴Myiwe myhí haú gi, me me dut é eq zam zam ne é mebu wut luí, hîng, lungséng, pallhé pê èq mhôn chung ri; yhâng é loq má gi, yhâng é myiwe yuqgè nyí zô lhum hkyo é agot a-û hkyô eq achauq achyut é zè pé byíng tô é hîng góm ralhumm chung tô ri.

⁵NIK DIK É HKYÔ, MYIDÀM HTOQ MÁ É ACHAQ ACHYUT HKYÔ PÉ EQ SHIWA MYHÍ PÊ É YHÂNGNU, BABELON MYUQ MÓ.

gâ é myíng gi, yhâng é ngelang má kâ tap tô ri. ⁶Myiwe myhí haú gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haú mù, ngò gi, gyai yang maú byuq é nghut lhê. ⁷Haú hkún, maumang lagyo haú ngo lé taí é gi, “Nàng, haí mù maú lhê lú? Myiwe myhí haú eq, yang jí tô é, ulhum nyhit lhum eq hkyuí raxê lhum dap é tân jung dusak é zaú tô é hkyô lé, ngò, nàng lé taí kyo rá nghut lhê. ⁸Nàng myàng é tân jung dusak haú gi, hí hkún nyí wú bê, ahkuí a nyí lo, nghut kôlhang, ník dik htúm é Lasang-dong mai htoq lô mù, htên byoq é hui rá nghut lhê. Mau htoq xâng hkun mai, asak jihpán laiká buk má myíng a kâ tô é, myidàm htoq má nyí é bang gi, tân jung dusak haú lé myàng kô é hkún, maú byuq bùm kó rá nghut lhê. Hkâsu mù gâ le, haú gi, nyí wú bê, ahkuí a nyí lo, nghut kôlhang, dum lé rá nghut é yanmai nghut ri.

⁹Hpaqchyí byéng-yá bo é nyan gi, shí má rá ri. Haú ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰Ngo yuq gi, byit gyó

byuq bê; rayuq gi, ahkuí nyí to ashí; myit tô é rayuq gi, a jé lé shí nghut ri; haú yuq jé lé é hkún, yang gi, ahkyíng razup zo za wó nyí rá nghut lhê. ¹¹Hí hkún nyí wú bê, ahkuí a nyí lo dut é tân jung dusak haú gi, shit yuq nghú rá hkohkâm nghut ri. Yang gi, haú nyhit yuq eq séng é yanmai, yhâng é htên byoq hkyô shut e ló rá nghut lhê.

¹²Haú nàng myàng é hkyuí raxê lhum gi, míngdán a myang yù shí é hkohkâm raxê yuq nghut ri; nghut kôlhang, yangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yú kó rá nghut lhê. ¹³Yangmoq gi, myit myoqbyù hkyô ralhumm za nghut kômù, yangmoq é a-tsam eq ahko ahkáng lé, haú tân jung dusak lé byi kó rá nghut lhê. ¹⁴Yangmoq gi, haú Sauzo lé majan chôm zan kó rá nghut lhê; nghut kôlhang, Sauzo haú gi, yhum-sing pê é Yhumsing eq hkohkam pê é Hkohkâm nghut é yanmai, yangmoq lé ung pyám rá nghut lhê. Haú Sauzo eq rahá nghut é bang gi, jí yù huí é bang, hkyin yù huí é bang eq lhumzuí é bang nghut akô.” gâ ri.

¹⁵Hau htâng, maumang lagyo haú ngo lé dum taí é gi, “Nàng myang é, shiwa myhí zung tô é wui pé gi, byù myú pé, byù ajùm ayò pé, míngdán pé eq myíng lhumjup nghut ri. ¹⁶Haú nàng myang é tân jung dusak eq hkyuí raxê lhum gi, shiwa myhí haú lé a jú kut kó rá nghut luí, yhâng é sutzè banshoq shang yu pyám byi mù, mebu lhang a dap loshoq achindum kut to kó rá nghut lhê; hau htoq agó, yhâng é sho lé zo luí, myí èq nyhê hkyô pyám kó rá nghut lhê. ¹⁷Hkâsu mù gâ le, Garai Gasang gi, haú bang mai, i-myt rahkat zâ èq, yhumsing é a-tsam, haú tân jung dusak lé byi rá myit, yangmoq lé kat byi Sù nghut ri. Haú mù, yangmoq gi, Garai Gasang é mungdang lhoq dik é hkún jé shoq, haú su kut kó rá nghut lhê. ¹⁸Nàng myang é

myiwe myhí haû gi, myidàm htoq mâ é hkohkam pé lé up zô é myuq mó nghut ri.” gâ ri.

Babelon Lêng Gyop É Hkyô

18 Hau htâng, maumang lagyo gotú rayuq mauhkûng mai gyó lo é lé, ngó myang ri. Yhang gi, ahko ahkáng mó wó é nghut luí, haû myidàm htoq lé, yhâng é hpungwup èq duqbó to byí ri.

² Yhang, htê mó o mó èq garú taí kat é gi,
“Babelon myuq mó gi, lêng gyop bê, lêng gyop bê!

Myuq haû gi, nat gâng pê é yhûm eq agé ashop é nat hkangmó é hkyûng dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

³ Hkâsu mù gâ le, haû byù myû lhungl-háng gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri.”

gâ ri.

⁴ Hau htâng, mauhkûng mai htoq lo é htê gotú lé ngò dum wó gyô é gi,

“Ngá é byu pé ê, myuq hau é mara pé má nungmoq a bo lòm râ matú le, yhâng é wúm pé lé nungmoq a hui zo kó râ matú le, haû mai hân hfang htoq lò keq;

⁵ hkâsu mù gâ le, yhâng é mara gi, mauhkûng htung shoq bum zang to bê nghut luí,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó

eq rajung za, yhang lé í tú taû kut keq.

Yhang nyhó byí é góm má, í tú taû nyhó byi keq.

⁷ Yhang gi, yhumsing gùng lé yhumsing lhoq gyaú yû luí, ladu lai shoq ngón kún nhang é í,

wuîhke jamjau hkyô eq iyon hkyô myo myo, yhang lé taû byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui râ a nghut.' ga gumrong nyi ri.

⁸ Haû mù luí, yhâng é wúm nghu é shí hkyô, iyon hkyô eq mutmó gyó hkyô gi,

ra-nyí bui má za, yhâng chyáng jé râ nghut lhê.

Hau htoq agó, yhang gi, myí èq nyhê hkyô pyâm é lé hui râ nghut lhê;

hkâsu mù gâ le, yhang lé jéyáng é, haû Yhumsing Garai Gasang gi, wum-o a-tsam bò Sû nghut ri.

⁹ Haû yhang eq rahá myiwe yuqgè nyi zô lhum hkyô kut shut é eq yhâng é ladu lai shoq ngón kún hkyô má bo lom é, haû myidàm htoq mâ é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é huí bùm kó râ nghut lhê. ¹⁰ Yhangmoq gi, yhang no jamjaû nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ralhûm má za, dam byí é hkyô gi, náng chyáng jé bu-nhung!'

ga luí, taí garu kó râ nghut lhê.

¹¹ Myidàm htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é hui kó râ nghut lhê; hkâsu mù gâ le, yhangmoq é gai zè lé, ó yuq le a wuì byi lo kô é yanmai nghut ri. ¹² Gai zè haû pé gi, hîng, ngùn,

lungsêng eq palhé, nú-nhâm é pán, me me dut é pán, láí hkyîng eq zam zam ne é pán; namngón jung sik ajung jung, maguí zuí lé saí é, gùloq hpaû jung sik lé saí é, gyi lé saí é, shamtoq lé saí é, luq hpyû lé saí é jung ajà jà nghut ri.

¹³ Hau htoq agó, changhpyik gâm, xun-mân, namngón jung, mura, loban, tsi-biyiq wing, tsanlun xû, mún eq sungso, nojûng eq sau, myang eq myanglhêng pé; byù é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taú yù rá a nghut.' ga taí kó rá nghut lhê.

¹⁵ Gàì zè haú pé lé ung luí, yhâng chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé mhone tô é myuq mó gi, dingnyé wó ri-nhung! Dingnyé wó ri-nhung!

¹⁷ Hkyíng hkum rahkum má za, haú-í yhang wó é sutzè pé htên byoq byuq bu-nhung!

ga taí kó rá nghut lhê.

Wuì-sanghpo agyì yuq hkangmó eq wuì-sanghpo mai jón wún é bang banshoq, wuì-sanghpo hkâng bang eq wuìshuq lung-aû mai wam baú hkyô wó yu é bang banshoq gi, we we má yap to kômù, ¹⁸ myuq haú nyé gyó nyi é myihkau lé myàng kôjáng, 'Myuq mó shí eq pûng é myuq gi, hkâmá joq shirâ lhú?' ga taí garu kó rá nghut lhê. ¹⁹ Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang,

'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aû má wuì-sanghpo pé wó é bang gi, yhâng é sutzè pé é yanmai, sutzè wó bum akô.

Nghut kôlhâng, hkyíng hkum rahkum má za, htên byoq hkyô gi, yhâng chyáng jé bu-nhung!

²⁰ Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoí pé ê, hkye gabú keq!

Hkâsu mù gà le, yhang, nungmoq lé kut é eq rájung za, Garai Gasang gi, yhang lé jéyáng bê nghut ri.'

ga taí kó rá nghut lhê." gà ri.

²¹ Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yú mù, wuìshuq lung-aû má dú hkyô kat luí, taí é gi,

"Haú Babelon myuq mó gi, haú su kut wum kat dú hkyô pyâm é hui rá nghut luí,

hkâ-nhám le dum myàng rá a nghut lo.

²² Haú tíng bat é bang, dat gó dat ye é bang, sampyí mut é bang eq tut mut é bâng é htê lé,

náng chyáng hkâ-nhám le dum wó gyo lo rá a nghut.

Loq hpaqchyí ajung jung kûng é byù lé, náng chyáng hkâ-nhám le dum myàng lo rá a nghut.

Luqluí luí é htê lé, náng chyáng hkâ-nhám le dum wó gyo lo rá a nghut.

²³ Haú myibung duq é myishâm lé, náng chyáng hkâ-nhám le dum wó duq lo rá a nghut.

Myisik lusik é htê lé, náng chyáng hkâ-nhám le dum wó gyo lo rá a nghut.

Náng é hpugá byù pé gi, mingkân é byù mó pé nghut ri.

Náng é myoqheq hpaqchyí èq mingdán banshoq mâ é bang lé, hkyô shuí nghoq bê nghut ri.

²⁴ Haú myiqhtoí pé é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê
nghut ri.”
gâ ri.

Haleluya!

19 Hau htâng, mauhkûng htoq má,
byù ajùm ayò garû é htê mó su
gâ é lé, ngò wó gyô é gi,
“Haleluya!”¹

Hkyi yù hkyô eq hpungwup shing kang,
a-tsam gi, nga-nhûng é Garai Gasang
eq sêng é nghut lhê.

²Hkâsu mù gâ le, Yhang tarâ jéyáng é
hkyô gi, tengmán é eq dingmán é
yanmai nghut ri.

Yhang gi, myidàm htoq mâ é bang lé,
haù yhâng é ashop é đông gungsho
zùm yap é hkyo èq mara kut shut
nhang é shiwa myhí mó lé, mara byi
luí,

Yhâng é dui-nhâng zoshâng wuì é sui
yuichyîn dam byi bu-nhung ô!”
gâ ri.

³Dum radàm, yhangmoq taí garu kô é
gi,
“Haleluya!

Myuq hau é myihkau gi, pyat dedu ah-
tum abyuq ru ìng doq nyì sháng gaq
ô!”

gâ bum akô nghut ri.

⁴Haù suwún í xe myi yuq eq dui
é dusak myí du gi, haù hkohkâm-
tanghkuq má zung tô é Garai Gasang lé
paí gop luí, noqkuq uchyang,
“Amen, Haleluya!”

ga, taí garû bum akô.

⁵Haù hkûn,
“Garai Gasâng é dui-nhâng zoshâng wuì
nghut é, yhang lé gyuq hkunggâ é
tiq ko banshoq bang ê!

Nga-nhûng é Garai Gasang lé, hkya-on
kungtôn keq ô.”

gâ é htê, haù hkohkâm-tanghkuq mai
htoq lo ri.

⁶Hau htâng, byù ajùm ayo é htê su ga,
wuì myo myo mying hûm é htê su ga,
maugum mó é htê su ga, taí garû é htê
lé ngò wó gyô é gi,
“Haleluya!

Hkâsu mù gâ le, wum-o a-tsam dik shoq
bò Sù nga-nhûng é Yhumsing Garai
Gasang gi, up nyi ri.

⁷Nga-nhûng gi, ngón gabú luí, Yhâng é
hpungwup shing kang lé lhoq gyaú
sháng ô!

Hkâsu mù gâ le, haù Sauzo myiháng poí
gi, jé bê nghut luí, Yhâng é myisik
gi, rì rì mhôn to bê nghut ri.

⁸Sân-yúng duq wik nú-nhâm é mebu le,
wut râ matú, Yhang lé byi to bê
nghut ri.”

gâ ri. (Nú-nhâm é mebu haù gi, sân-yúng
bang kut é dingmán é muzò nghut ri.)

⁹Hau htâng, maumang lagyo gi, ngo
lé, “Haù Sauzò é myiháng zoshuq poí
má ji yu é hui bang gi, hkungsô wó nyi
ri.' nghû ká aq.” ga taí luí, “Dang shí pé
gi, Garai Gasâng é tengmán mungdang
yhang nghut lhê.” ga xoq taí ri.

¹⁰Haù hkûn, ngò gi, yhang lé noqkuq
rà nghû, yhâng é hkyí wang má paí gop
kat é nghut lhê. Nghut kôlhang, yhang
gi, “Haù su hkâkut! Ngò gi, nàng eq
haù Yesuq é saksé lé hkâm é náng gu-
mang wuì eq rahá, byinzùm dui-nhâng
zoshâng ru nghut lhê. Garai Gasang lé
noqkuq aq! Hkâsu mù gâ le, Yesuq é
hkyô lé saksé hkâm é gi, myiqhtoi htoí
é Woi-nyí é myit đông nghut ri.” ga, ngo
lé taí hkûm ri.

Myang Hpyû Jí To Su É Hkyô

¹¹Hau htâng, ngò gi, mauhkûng bóng
tô é lé le, ngá é myoq hí má myang hpyû
radu nyi tô é lé le, myang ri. Myang hpyû

¹19:1 Haleluya gâ é gi, Hebre myíng đông, “Yhumsing Garai Gasang lé hkya-on kungton lhê” gâ é dang nghut ri.

haú má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri. ¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsung tô ri. Yhang mai lai luí, ó yuq le a bo sê é mying, Yhâng chyáng kâ tap tô ri. ¹³ Yhang gi, sui má jum yù bê nghut é buhîng radung wut to luí, Yhâng é mying gi, Garai Gasâng é mung-dang gâ ri. ¹⁴ Haú mauhkûng gyê pé gi, hpyu é eq sanséng nú-nhâm é mebu wut mù, myang hpyû ji kôluí, Yhâng htâng má châng bum akô nghut ri. ¹⁵ Byù myû haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng èq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê. ¹⁶ Hkohlkâm pê é Hkohlkâm eq yhumsing pê é Yhumsing gâ é mying gi, Yhâng é buhîng eq Yhâng é tangbaú má kâ tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé banshoq lé, “Lé keq, Garai Gasâng é zoshuq poí mó matú, lé zup zing keq; ¹⁸ haú hkûn, nungmoq gi, hkohlkâm pê é, gyezaú pê é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pê é, byù mó byù zo pé lhungl-hâng é gungsho pé lé, myàng zo kó râ nghut lhê.” ga, htê mó èq wut garú tái ri.

¹⁹ Hau htâng, haú tân jung dusak eq myidàm htoq mâ é hkohlkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri. ²⁰ Nghut kôlhâng, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lô lé hkam yù luí, yhâng é alhô lé noqkuq é bang lé, mhaú zo râ matú,

tân jung dusak hau é gunglik đông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duì gù dú hkyô kat é hui bekô nghut ri. ²¹ Haú myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luí, nghoq pé lhungl-hâng gi, haú bâng é gungsho lé, gyi gyi dau dau myàng zo bùm bekô nghut ri.

Rahkyîng Zàn

20 Dum, maumang lagyo rayuq gi, nik dik htûm é Lasang-dông é zo-qshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to râ matú, chyup tuí yù bê nghut ri. ³ Haú mù, maumang lagyo haú gi, rahkyîng zàn a byíng shî é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haú tarâ jéyáng râ ahko ahkáng wó é bang zung tô bum é hkohlkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haú gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng

zàn haù a byíng byíng wó dum dui toq kó rà a nghut.) ⁶Sâng-hî dàm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dàm nghû rà shi é hkyô gi, haù bang lé up rà ahkáng wó é a nghut; haù bang gi, Garai Gasang eq Hkrisduq é hkyangjông pé dut rà nghut é htoq agó, Hkrisduq eq rahá zanwut rahkýng tup up kó rà nghut lhê.

Tsadán Htên Byoq Huí É Hkyô

⁷Rahkýng zàn haù lai jáng, Tsadán gi, htóng mai nhang htoq kat é hui luí, ⁸majan zan rà matú, myidàm htoq myi chyún má nyi é, Goga eq Magoga gà é byù myú pé lé mhaù shuí tsíng yù rà ga, htoq ê rà nghut lhê. Byù haù bang gi, wuìshuq lung-aù yàm mâ é semuí myhó myo kó rà nghut lhê. ⁹Yhangmoq gi, maumyí htunghtáng hkap shoq chòm yán doq lò kômù, haù Garai Gasâng é byu pé nyi é dap nghut é, Garai Gasang chyitdap é myuq lhíngkhyuq má, lé lóm tô bùm bekô. Nghut kôlhang, mauhkúng mai myi gyó lò luí, yhangmoq lé nyhê hkyô pyám bê nghut ri. ¹⁰Haù tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haù le dú hkyô pyám é hui bê nghut ri. Yhangmoq gi, nyí, myín, pyat dedu ahtum abyuq wuífke jamjau hui zò nyi kó rà nghut lhê.

Ló Htâng É Tará Doqdan Hkyô

¹¹Hau htâng, hkohkâm-tanghkuq hpyú mó ralhúm eq haù má zung tô é Sù lé, ngò myang ri. Haù mauhkúng eq myigùng gi, Yhâng é hí mai h pang ló bê nghut mù, yhangnhik é matú jowò a joq lo nghut ri. ¹²Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gà é

gotú laiká buk le, hpông tô ri. Haù shi byuq bê bang gi, yhumsíng kut é eq rajung za, laiká buk pé má kâ tô é dông, tará doqdan é huí bùm bekô nghut ri. ¹³Haù hkùn, wuìshuq lung-aù gi, yhang má lúng tô é, shi byuq bê bang lé ap byi luí, haù shi é hkyô eq Moming le, yhangnhik chyáng lúng tô é, shi byuq bê bang lé ap byí akò nghut ri; yuq hkangmó gi, yhumsíng kut é eq rajung za tará doqdan é hui bekô nghut ri. ¹⁴Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haù gi, í dàm nghû rà shi é hkyô nghut lhê. ¹⁵Asak jihpán laiká buk má, myìng a bo é sù ó yuq nghut kôle, myi nhông haù má dú hkyô kat é hui bekô nghut ri.

Yerusalem Asik

21 Hau htâng, mauhkúng asik eq myigùng asik lé, ngò myang ri; hkâsu mù gà le, hí lhê é mauhkúng eq myigùng gi, lai ló byuq bê nghut luí, wuìshuq lung-aù le, dum joq rà a nghut lo. ²Haù hkùn, Chyoiyúng Myuq gà é Yerusalem asik gi, lusik é matú mhôn yúng tô é myisik su, hen lajàng yù luí, Garai Gasâng chyáng mà é nghut mù, mauhkúng mai gyó lé lo é lé, ngò myang ri. ³Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, “Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi rà nghut lhê. Yhangmoq gi, Yhâng é byu pé dut rà nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut rà nghut lhê. ⁴Garai Gasang gi, yhangmoq é myoq mâ é ngaubyi lhunglhang lé, sut pyám byi rà nghut lhê. Htângnùng má gi, shí-nò hkyô, iyon hkyô, ngaubyi ngau-nhap hkyô eq no hpu hkyô nghû é joq rà a nghut lo; hkâsu mù gà le, hí lhê é hkyô pé gi, lai ló byuq bê nghut ri.” gà ri.

⁵Haù hkohkâm-tanghkuq má zung to Sù gi, “Wú aq, jung hkangmó lé, Ngò asik kut nyí bê nghut lhê.” ga tái luí, “Shí lé kâ to aq, hkâsu mù gâ le, dang shí pé gi, lumgíng é dang eq tengmán é dang nghut lhê.” ga tái ri.

⁶Hau htoq agó, Yhang gi, “Haù pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sù le nghut lhê. Wui shit sù lé gi, ahpau a dŭng é za, asak wuìbúm mã é uchyam lé, Ngò byi huq râ nghut lhê. ⁷Wó ung é sù ó yuq nghut kôle, Garaí é silí wunlí haù pé banshoq lé sîng râ nghut mù, Ngò gi, yhâng é Garaí Gasang dut luí, yhang gi, Ngá zo dut râ nghut lhê. ⁸Nghut kôlhang, gyuq myit bò bang, a lumjîng bang, achâq achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaù bang lhunglhang é jowò gi, haù hang myi duq nyí é nhông nghut râ nghut lhê. Haù gi, í dâm nghû râ shi é hkyô nghut ri.” ga ngo lé tái ri.

⁹Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mã é rayuq gi, lé mù, “Lé aq, haù Sauzô é yhangmyi gâ é myisik lé, ngò tŭn shit râ nghut lhê.” ga ngo lé tái ri. ¹⁰Hau htâng, yhang gi, ngo lé Woi-nyí mai bùm myhâng mó ralhumm mã shuí jé luí, Garaí Gasâng chyáng mã é nghut mù, mauhkûng mai gyó lé lo é, haù Chyoiyúng Myuq gâ é Yerusalem lé tŭn shit ri. ¹¹Myuq haù gi, Garaí Gasâng é hpungwup shingkang hù é htoq agó, haù maubó gi, hpaù dik é huhpé lungsêng su dut luí, myoqjâm su sân-yúng ri. ¹²Myuq xêwâm gi, kô myhang é htoq agó, hkum raxe í lhum hpông tô ri; hkum haù pé mã, maumang lagyo raxe í yuq zúng tô ri. Hau htoq agó, Israelaq byù myû raxe í hu é myìng lé, hkum haù pé mã kâ tap

to bum ri. ¹³Hkum haù pé gi, buihtoq hkyam shut sŭm lhum, buiwàng hkyam shut sŭm lhum, maupyí shut sŭm lhum, mautsŭng shut sŭm lhum kut hpông tô ri. ¹⁴Myuq xêwâm haù gi, awang raxe í lhŭm èq hi tô é nghut luí, awang haù pé mã, Sauzô é lagyo raxe í yuq é myìng dap tô bum ri.

¹⁵Haù ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhumm chung tô ri. ¹⁶Myuq haù gi, myi chyŭn dut mã é nghut luí, hîng hpyang làm hpyang rawuí wuí za dut mã é nghut ri. Maumang haù gi, myuq lé jâm-yang hau èq kê wú é hkŭn, hîng hpyang, làm hpyang, myhâng hpyang banshoq 1400 déng^s kô bo ri; ¹⁷yhang gi, haù byù kê é jung eq wuí é maumang lagyo é kê jung lé chŭng mù, myuq xêwâm lé ké wú é hkŭn, rasho myí xê myi dúng bo ri. ¹⁸Myuq xêwâm haù gi, huhpé lungseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri. ¹⁹Myuq xêwâm haù é awang pé gi, hpau jung lungsêng ajung jŭng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sŭm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq, ²⁰ngo lhum nghû râ gi, nyhaù myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaù lhum nghû râ gi, utohpaya (bó huí hui é jung) lungseng èq, raxê lhum nghû râ gi, mahuya nyuì lungsêng èq, raxe ralhumm nghû râ gi, wakintu (mhan-haq nyuì eq mauhkûng

^s21:16 1400 déng gi, Grik pê é stadia 12000 kô nghut ri.

nyùi nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri. ²¹Haù myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haù myuq é hkyô mó gi, hîng jet èq saí é nghut luí, myoqjàm su duq san é hkyô nghut ri.

²²Ngò gi, myuq haù má noqkuq yhûm joq é lé a myàng, hkâsu mù gà le, haù wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³Haù Garai Gasang é hpungwup shingkang gi, myuq haù má duqbó byí é htoq agó, Sauzo gi, myuq hau é myibung nghut é yanmai, myuq haù má gi, buì eq lhamó tsô byi a ra nghut ri. ²⁴Haù byù myû pé gi, myuq haù duqbó é hkaù má hkyô wó so kó râ nghut lhê; haù myidàm htoq mâ é hkohkam pé gi, yhangmoq é hkikhkâm hkyô lé, myuq haù má yù lé kó râ nghut lhê. ²⁵Myuq haù má gi, myín nghû é a joq é yanmai, myuq hkum myhî é le joq râ a nghut lo. ²⁶Haù byù myû pê é hpungwup shingkang eq aróng lé, myuq haù má yu lé kó râ nghut lhê. ²⁷Myuq haù má, a sansêng é hkyô haí le wó wàng râ a nghut é htoq agó, hoq hpu hkyô eq mhaù zô é hkyô kut é sù ó yuq le wó wàng râ a nghut; haù Sauzô é asak jihpán laiká buk má myîng bo é bang za wó wàng râ nghut lhê.

Asak Wuì Mó Lâng

22 Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaù mâ é hkyô mó gûng dông yui ló é, myoqjàm su sânyúng é asak wuì mó lâng lé, maumang lagyo haù, ngo lé tân shit ri. ²Wuìlàng í hpoq é má, ashi raxe í myû zuí é asak

shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haù pé mâ é ahaq pé gi, byù myû pé lé yâ gè râ matú nghut ri. ³Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaù haù má joq nyi râ nghut mù, Yhâng é dui-nhâng zoshâng wuì gi, Yhang lé noqkuq dojaù kó râ nghut lhê. ⁴Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myîng kê tap é hui kó râ nghut lhê. ⁵Myín nghû é le joq râ a nghut lo. Myibung duqbó byí é le, buì tsô byí é le, yhangmoq ra kó râ a nghut lo, hkâsu mù gà le, haù Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶Maumang haù gi, ngo lé, “Dang shí pé gi, lumgíng é dang eq tengmán é dang nghut lhê. Myiqhtoí pê é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri.” ga taí ri.

Yesuq Jé Lé Lô Râ Hkyô

⁷“Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri.”** gà é lé, ngò wó gyô ri.

⁸Haù hkyô pé lé wó myàng wó gyô é sù gi, ngò Yohan nghut lhê. Ngò gi, haù hkyô pé lé wó myàng wó gyô é hkûn, ngo lé, shí hkyô pé tân shit é maumang lagyo é hkyî wang má noqkuq râ matú paí gop é nghut lhê. ⁹Nghut kôlhâng, yhang gi, ngo lé, “Haù su hkâkut! Ngò gi, nàng eq le, náng é gumang myiqhtoí pé eq le, laiká shí mâ é mungdang pé lé châng kut é lhunglhâng bang eq le rahá, byinzùm

**22:7 Dang shí hkun gi, Yesuq taí é nghut lhê.

dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰Hau htâng, yhang gi, "Laiká shî má bo é myiqhtoi dang pé lé, hkâzaú to lo, hkâsu mù gâ le, haû ahkýing gi, chyâng lò bê nghut ri. ¹¹A dingmán é sù gi, a dingmán é đông xoq kut nyí sháng gaq; a sansêng é sù gi, a sansêng é đông xoq dut nyí sháng gaq; dingmán é sù gi, dingmán é đông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

¹²"Wú keq, ngò gi, a myáng má jé lé lô râ nghut lhê! Ngò gi, yuq hkgangmó lé, yhumsing kut é eq rajung za byi râ shigyau chyunhuq chung tô lhê. ¹³Ngò gi, Alhpa eq Omega nghut lhê, Sâng-hi eq Jihtum nghut lhê, Sâng-hi Awang eq Ló Htáng Sù le nghut lhê.

¹⁴Asak shigâm má jé râ eq myuq hkaû shut hkúmdong mai wó wang jé râ ahkáng wó yû shoq, yhumsing é buhông lé chí sân é bang gi, hkungsô wó nyi ri.

¹⁵Shinggan má gi, hkui đông nyi é bang, myoqheq hpaqchyî kut é bang, ashop é đông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô nàu luí châng kut é bang lhunglhang nyi bum akô nghut ri.

¹⁶Ngò, Yesuq gi, haû noqkuq hpúng pé lé, shí hkyô pé saksé hkâm shit sháng

gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haû duqbó é Bó-myhû le nghut lhê."^{††} gâ é lé, ngò wó gyô ri.

¹⁷Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wui lé, shuq sháng gaq.

¹⁸Laiká shî má bo é myiqhtoi dang pé lé wó gyô é bang yuq hkgangmó lé, ngò sidiq byi é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kâ tô é wúm pé lé jé nhâng râ nghut lhê.

¹⁹Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kâ tô é asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.

²⁰Shí hkyô pé lé saksé hkâm byi é Sù gi, "Nghut bê, Ngò gi, a myáng má jé lé lô râ nghut lhê." ga taí ri.

Amen. Yhumsing Yesuq ê, lé lô aq ô!

²¹Haû Yhumsing Yesuq é jeju gi, Garai Gasang é byu pê chyáng joq nyí sháng gaq ô! Amen.

^{††}22:16 Dang shí hkun gi, Yesuq taí é nghut lhê.